

მისეილ რეხვიავვილი

იგეჩეთის სავეჟო

(1462—1810 წწ.)



თბილისის უნივერსიტეტის გამომცემლობა
თბილისი 1989

ფეროი იღწერს შთლიანი ქართული საბელმწიფოს დამ-
ლას ცალკეულ პოლიტიკურ ერთეულებად და იმერეთის სა-
მეფოს წარმოშობას, მის ისტორიას სამეფოს დაარსებიდან
რუსეთთან შეერთებამდე.

წიგნი განკუთვნილია ისტორიკოს-სტუდენტთა, ასპირან-
ტთა, საქართველოს ისტორიის მასწავლებელთა და მკით-
ხველთა ფართო წრისათვის.

რედაქტორი ისტ. მეცნ. დოქტორი ქ. ჩხატარაიშვილი

რეცენზენტები: ისტ. მეცნ. დოქტ. პროფ. **შ. ხანთაძე**

ისტ. მეცნ. დოქტ. ზ. ცქიტიშვილი

© თბილისის უნივერსიტეტის გამომცემლობა, 1989.

P 0503020906
M 608 (06)—89

ISBN 5-511-00277-1

„საქართველო თავად ცოტა იყო და მერე მრავლათ გა-
ყოფილი და ერთმანეთის ურჩი და ქიშპნი მტერნი,
ერთმანეთისა მარბევნი და მაწყინარნი და იესოს
ქრისტეს რჯული ეჭირათ. აძისათვის იქით ურუმნი
არბევდეს და აქეთ ყიზილბაშნი და ამისთანას ორს
დიდ ხელმწიფეებს შუაში ბევრს ევადნეს, აქეთ იქნიეს
ხმალი და იქით და მრავალი ნავნებიც ქნეს, მაგრამ არ
იქნა და ვერცა რას თავს გაუვიდნენ.“

ფ ა რ ს ა დ ა ნ გ ო რ გ ი ჯ ა ნ ი ძ ე

„საქართველოს დარბაისელნი... არც ერთმანეთს ასვე-
ნებდნენ და არც ქვეყანასა და ამით მტერმა უფრო ძა-
ლა წამოატანა და დაჩაგრა, თორემ თუ ამათ ერთი პი-
რი ჰქონოდათ, ვერცარას უზამდნენ, ვერც არას სხვა
მტერი წაართმევდა რასმე, ამათი საქმე ნიადაგ ასე
ერთმანეთის მესისხლეობით გათავებულა და წამხდარა,
მაგრამ ამ საქმეს არც მოკლებიან და არც მოუშლიათ“.

ყ ა ნ ჩ ა ე თ ი ს ე ა მ ნ გ უ ლ ა ნ ი დ ა ნ .

ვეძღვნი შოთა მესხიას
ნათელ ხსოვნას

შ ე ს ა ვ ა ლ ი

მე-15 საუკუნის მეორე ნახევარში საქართველოს ფეოდალური სახელმწიფო საბოლოოდ დაიშალა და დაიყო რამდენიმე ცალკეულ სამეფო-სამთავროდ. ერთ-ერთი ასეთი ქართული სამეფოთაგანი იყო დასავლეთი საქართველოს ტერიტორიაზე ჩამოყალიბებული იმერეთის სამეფო, რომელმაც მეტ-ნაკლებად დამოუკიდებლად იარსება მე-15 საუკუნის ბოლოდან ვიდრე მე-19 საუკუნის დასაწყისამდე, როდესაც იგი შევიდა რუსეთის იმპერიის შემადგენლობაში.

ქართულ ისტორიოგრაფიაში იმერეთის სამეფოს შესახებ შეიქმნა მნიშვნელოვანი შრომები, რომლებიც ეხებიან საქართველოს ამ ნაწილის სოციალ-ეკონომიკურ ვითარებას, საერო და საეკლესიო ფეოდალურ სენიორიებს, ფეოდალური კლასის მდგომარეობას, სათავადოების სოციალ-პოლიტიკურ ისტორიას, საგარეო და საშინაო პოლიტიკური ისტორიის საკითხებს და სხვა.

მე-15—18 საუკუნეების იმერეთის სამეფოს სრული პოლიტიკური და სოციალ-ეკონომიკური ისტორია დღემდე მთლიანად შესწავლილი არ არის, თუმცა სამეცნიერო ლიტერატურაში აღნიშნულ საუკუნეებს და განსაკუთრებით მე-18 საუკუნეს მრავალი ცალკეული გამოკვლევა მიეძღვნა, რომლებშიც გამოთქმულია საყურადღებო მოსაზრებანი და გაანალიზებულია მნიშვნელოვანი ფაქტები.

წინამდებარე ნაშრომი წარმოადგენს მე-15—18 ს-ის იმერეთის პოლიტიკური, კულტურული და სოციალ-ეკონომიკური ისტორიის შესწავლის ცდას. იგი დაწერილია პირველწყაროებსა, უცხოენოვან წყაროებსა და არსებულ გამოკვლევებზე დაყრდნობით.

შესწავლილია. დასავლეთ საქართველოს სამეფო-სამთავროების პოლიტიკური ურთიერთობა, ფარული და აშკარა ბრძოლა ჰეგემონობისათვის, მათი გაერთიანებული ბრძოლა ირან-ოსმალეთის აგრესიის წინააღმდეგ და პირიქით, ზოგიერთი მთავრისა თუ ფეოდალის ლაღატი და აგრესორის დახმარებით თანამოქმეთა ხარჯზე თავისი ძლიერებისა და კეთილდღეობისაკენ სწრაფვა.

განხილულია ოსმალთა ლაშქრობები დასავლეთ საქართველოში და ქართველი ხალხის შეიარაღებული ბრძოლა აგრესორის წინააღმდეგ, იმერეთის მეფეების დიპლომატიური მოლაპარაკებანი აგრესორთან.

გაშუქებულია, თუ რაოდენ მწვავედ იღვა საქართველოს საკითხი ირან-ოსმალეთის ურთიერთობაში; როგორ ცდილობდნენ ქართველი პოლიტიკოსები თავისი ქვეყნის სასარგებლოდ გამოეყენებინათ ამ დიდ სახელმწიფოებს შორის არსებული წინააღმდეგობანი.

გადმოცემულია მეფე-მთავართა თუ ფეოდალთა დაუსრულებელი შინა ქიშპი, მტრობა და ურთიერთბრძოლა, რაც მეტად ასუსტებდა მათ ძალებს.

ვრცლადაა განხილული მე-17 საუკუნის დასაწყისიდან მეფე-მთავართა მიერ რუსეთის სახელმწიფოსთან კავშირის დამყარების ცდა, რასაც პრაქტიკული შედეგი არ მოჰყოლია, მაგრამ იმერეთის მეფეები რუსეთთან ურთიერთობას მაინც იმედის თვალით შეჰყურებდნენ.

იმერეთის ისტორია საქართველოს მთლიანი სამეფოდან გამოყოფით დაწყებული რუსეთთან შეერთებამდე (1462 — 1810 წწ) გაპირობებული იყო თავისებური საგარეო და შინაგვითარებით, რაც ხშირად არსებითად განსხვავდებოდა საქართველოს აღმოსავლეთი ნაწილის პოლიტიკურ ერთეულთა (ქართლისა და კახეთის სამეფოების) მდგომარეობისაგან, ამიტომ ამ ისტორიის ცალკე გადმოცემა სრულიად აუცილებელია ჩვენი სამშობლოს მთლიანი ისტორიის შესწავლის მიზნით.

იმერეთის სამეფოს ისტორია მოიცავს მე-15—18 სს. ჩვენ წლების განმავლობაში ვსწავლობდით ამ დასავლეთი ქართული პოლიტიკური ერთეულის ისტორიას, უკვე გამოქვეყნდა სამი წიგნი: 1. იმერეთის ისტორია მე-16 საუკუნეში (პოლიტიკური ისტორია, 1976 წ.), 2. დასავლეთი საქართველო მე-17 საუკუნეში (ნარკვევები, 1978 წ.) და 3. იმერეთი მე-18 საუკუნეში (ნარკვევები, 1982 წელი).

აღნიშნული წიგნების გამოსვლამ მკითხველი საზოგადოების დიდი ინტერესი გამოიწვია.

რა თქმა უნდა, ჩვენი წიგნები, როგორც პირველი ცდა გადმოცემული ყოფილიყო იმერეთის ისტორია სამხანგევარი საუკუნის მანძილზე, არ იყო თავისუფალი უზუსტობათა და ხარვეზებისაგან. ჩვენ მაღლობით მივიღეთ გამოთქმული შენიშვნები და ვეცადეთ გადაგვემუშავებინა ნარკვევები და ერთ წიგნად მიგვეწოდებინა მკითხველისათვის. წიგნი დაეხმარება როგორც სტუდენტ ახალგაზრდებს საქართველოს ისტორიის დაუფლების საქმეში, ისე მასწავლებლებს თავიანთ პედაგოგიურ მუშაობაში, აგრეთვე საინტერესო იქნება მკითხველთა ფართო წრისათვის.

იმერეთის ისტორიის ცალკეული საკითხები საფუძვლიანად შესწავლილია ჩვენი ისტორიკოსების მონოგრაფიებში. მაგალითად, ისტორიულ მეცნიერებათა დოქტორმა ო. სოსელიამ¹ დიდი წვლილი შეიტანა იმერეთის სამეფოში სოციალური ურთიერთობის საკითხების შესწავლაში, მის შრომებში განხილულია სათავადოების სისტემა დასავლეთ საქართველოში, წარმოჩენილია ის წანამძღვრები, რომლებმაც განაპირობებს სათავადოების წარმოქმნა და მისი თავისებურებანი. ამომწურავად შესწავლილია სათავადოთა სოციალ-პოლიტიკური სტრუქტურა, ფეოდალური საკუთრების ფორმები, ნაჩვენებია სათავადოსათვის დამახასიათებელი ყველა ნიშანი.

დიდი დახმარება გაგვიწია საქ. სსრ მეცნიერებათა აკადემიის წევრ-კორესპონდენტის მამია დუმბაძის კაპიტალურმა შრომამ „დასავლეთ საქართველო მე-19 ს. პირველ ნახევარში“,² სადაც მდიდარი მასალის საფუძველზე საკითხები მარქსისტული თვალთახედვით არის გაშუქებული.

საინტერესო შრომები გამოაქვეყნა შ. ბურჯანაძემ მე-18 საუ-

¹ ო. სოსელია, ფეოდალური ხანის დასავლეთ საქართველოს ისტორიიდან. თბ. 1966; ნარკვევები ფეოდალური ხანის დასავლეთ საქართველოს სოციალ-პოლიტიკური ისტორიიდან, თბ. 1973; ნარკვევები ფეოდალური ხანის დასავლეთ საქართველოს სოციალ-პოლიტიკური ისტორიიდან (სათავადოები), თბ. 1981; სამეგრელოს სამთავროს წარმოშობის თარიღისათვის, შიმომხილველი, II, თბ. 1951.

² მ. დუმბაძე, დასავლეთ საქართველო მე-19 ს. პირველ ნახევარში, თბ. 1957.

კუნის მეორე ნახევრის იმერეთის სამეფოს პოლიტიკურ ისტორიაზე.¹

დიდი მნიშვნელობისაა მ. სვანიძის მონოგრაფია „საქართველოსმაღლეთის ურთიერთობის ისტორიიდან მე-16—მე-17 სს“;² მონოგრაფიაში დიდი ადგილი აქვს დათმობილი იმერეთის ისტორიის საკითხებს, კერძოდ ოსმალთა პოლიტიკას დასავლეთ საქართველოს მიმართ და ქართველი ხალხის ბრძოლას ოსმალეთის აგრესიის წინააღმდეგ.

საინტერესოა ზ. ცქიტიშვილის ნაშრომი³ სადაც გადმოცემულია მე-18 ს. II ნახევრისა და მე-19 ს. დამდეგის ქართლ-კახეთისა და იმერეთის სამეფოების გამოჩენილი მოღვაწეების: მაქსიმე კათალიკოსის, დავით კვინიხიძის, სოლომონ ლიონიძის და სულხან თუმანიშვილის სახელმწიფოებრივი და პოლიტიკური მოღვაწეობა.

ჩვენთვის ერთ-ერთ დასაყრდენ შრომას წარმოადგენდა „საქართველოს ისტორიის ნარკვევები, IV ტომი“⁴, სადაც ადგილი აქვს დათმობილი მე-16—მე-18 საუკუნეების იმერეთის სამეფოს სოციალ-ეკონომიური და პოლიტიკური ისტორიის საკითხების გადმოცემას. აღნიშნული შრომის ავტორია ქვ. ჩხატარაიშვილი.

იმერეთის სამეფოს ისტორიას გარკვეული ადგილი უკავია აკად. ნ. ბერძენიშვილის განმაზოგადებელ ნაშრომში, რომელიც გამოქვეყნდა მისი გარდაცვალების შემდეგ (საქართ. ისტორიის საკითხები, წიგნი მე-6), ასევე ცალკეულ წერილებში და მისი რედაქციით გამოქვეყნებულ საქართველოს ისტორიის დამხმარე სახელმძღვანელოში (1958 წ.).

საინტერესოა შრომები გამოაქვეყნეს მ. სანაძემ,⁵ მ. გონიკაშ-

¹ მ. ბუჩანაძე, სოლომონ I-ის მეფობის პირველი პერიოდი (1752 — 1768 წწ), თსუ შრომები, ტ. 41, 1950; იმერეთის სამეფოს პოლიტიკური ისტორიისათვის 1784 — 1789 წწ. საქ. მეც. აკად. ხელნაწერთა ინსტიტუტის მოამბე, II, 1960; იმერეთის სამეფო 1768—1784 წლებში, იქვე, ტ. III, 1961; იმერეთის სამეფოს საშინაო პოლიტიკა 1782—1802 წლებში, იქვე, ტ. 4, 1962; ლიხთიმერეთის 1737 წლის რუკა როგორც ფეოდალური საქართველოს ისტორიის პირველწყარო, იქვე, ტ. I, 1959.

² მ. სვანიძე, საქართველო-ოსმალეთის ურთიერთობის ისტორიიდან, თბ. 1971.

³ ზ. ცქიტიშვილი, საქართველოს სახელმწიფო მოღვაწენი. მე-18 ს. II ნახევარი მე-19 ს. დამდეგი, თბ. 1980.

⁴ ქ. ჩხატარაიშვილი, იხ. წიგნში, საქართველოს ისტორიის ნარკვევები, ტ. IV თბ. 1973.

⁵ მ. სანაძე, გლეხობა დასავლეთ საქართველოში მე-15 — მე-18 ს-ში, თბ. 1979.

ვილმა,¹ გ. მეტრეველმა² და სხვებმა. მე-18 საუკუნის იმერეთის სა-
მეფოზე ანოტირებული მასალები აქვს გამოქვეყნებული იასე
ლორთქიფანიძეს.³

დიდია პროფესორ სარგის კაკაბაძის დეაწლი იმერეთის ისტო-
რიის საკითხების შესწავლაში. მის მიერ გამოცემული დოკუმენ-
ტური მასალები (სიგელ-გუჯრები) და მეცნიერული გამოკვლევება
შეიცავენ ფეოდალური საქართველოს სოციალურ-ეკონომიკური და
პოლიტიკური ისტორიის ძვირფას მასალას.

საქართველოს ისტორია ხასიათდება როგორც განვითარების
აღმავალი და შედარებით ნორმალური მსვლელობით, ისე გარკვე-
ული პერიოდიდან, პროგრესულ განვითარებათა შეფერხებით და
ხშირად უკუსვლითაც. განვითარების ნორმალური გზიდან აცდენა
კონკრეტული ისტორიული პირობების შედეგი იყო და მას მოჰყვა
საქართველოს ერთიანი ფეოდალური სახელმწიფოს დაშლა ცალ-
კეულ სამეფო-სამთავროებად. ერთ-ერთი ასეთი ქართული სამე-
ფოთაგანი იყო დასავლეთ საქართველოს ტერიტორიაზე ჩამოყა-
ლიბებული იმერეთის სამეფო, რომელმაც მეტ-ნაკლებად დამო-
უკიდებლად იარსება XV საუკუნის ბოლოდან ვიდრე XIX საუკუ-
ნის დასაწყისამდე, როდესაც იგი რუსეთის იმპერიის შემადგენ-
ლობაში იქნა შეყვანილი.

თანამედროვე ქართულ მარქსისტულ ისტორიოგრაფიაში იმერე-
თის სამეფოს ისტორიული განვითარების შესახებ შეიქმნა მნიშ-
ვნელოვანი შრომები, რომლებიც ეხებიან საქართველოს ამ ნაწი-
ლის სოციალურ-ეკონომიკური ისტორიის ცალკეულ მხარეებს, მა-
გალითად, გლეხთა სოციალურ-ეკონომიურ კატეგორიებს, საერო
და საეკლესიო ფეოდალურ სენიორიებს, ფეოდალური კლასის
მდგომარეობას, სათავადოების სოციალ-პოლიტიკურ ისტორიას და
სხვა.

საგარეო და საშინაო პოლიტიკური ისტორიიდან შესწავლილია
ცალკეული კონკრეტული საკითხები; განმაზოგადებელ შრომებში
(სახელმძღვანელოებში, „ნარკვევებში“) შედარებით მოკლედაა
მიმოხილული XVI—XVII საუკუნეების იმერეთის ისტორიის სა-
კითხები.

¹ მ. გონიკაშვილი, იმერეთი მე-18—მე-19 საუკუნეთა მიჯნაზე, თბ. 1979.

² გ. მეტრეველი, იმერეთის სამეფო მე-18-ის მეორე ნახევარში, სამთა-
ვროებთან მიმართებაში.

³ ი. ლორთქიფანიძე, მასალები საქართველოს ისტორიისათვის, (მე-18
საუკუნე), წიგნი მსდკ, II, თბ. 1940.

XVI—XVIII საუკუნეების ფეოდალური საქართველოს ერთი ნაწილის — იმერეთის სამეფოს სრული პოლიტიკური და სოციალ-ეკონომიკური ისტორია დღემდე შესწავლილი არ არის, თუმცა სამეცნიერო ლიტერატურაში აღნიშნულ საუკუნეებს მრავალი ცალკეული გამოკვლევა მიეძღვნა, რომლებშიც გამოთქმულია საყურადღებო მოსაზრებანი და გაანალიზებულია მნიშვნელოვანი ფაქტები.

წინამდებარე ნაშრომი წარმოადგენს XVI—XVIII საუკუნეების იმერეთის პოლიტიკური და სოციალ-ეკონომიკური ისტორიის შესწავლის ცდას. იგი დაწერილია პირველწყაროებსა, უცხოენოვან წყაროებსა და არსებულ გამოკვლევებზე დაყრდნობით.

შრომაში შესწავლილია დასავლეთი საქართველოს სამეფო-სამთავროების პოლიტიკური ურთიერთობის ფორმები, ურთიერთშორის ფარული და აშკარა ბრძოლა ჰეგემონობისათვის, მათი გაერთიანებული ბრძოლა ირან-ოსმალეთის აგრესიის წინააღმდეგ და პირიქით, დრო და დრო თითოეული მთავრისა თუ ფეოდალის ლატი და აგრესორის დახმარებით თანამოძქმეთა ხარჯზე თავისი ძლიერებისა და კეთილდღეობისაკენ სწრაფვა.

შრომაში განხილულია დასავლეთი საქართველოს სამეფო-სამთავროების პოლიტიკური ურთიერთობა ოსმალეთთან, ოსმალთა ლაშქრობები დასავლეთ საქართველოში და ქართველი ხალხის შეიარაღებული ბრძოლა აგრესორის წინააღმდეგ; გაშუქებულია, თუ რაოდენ მწვავედ იდგა საქართველოს საკითხი ირან-ოსმალეთის ურთიერთობაში, როგორ ცდილობდნენ ქართველი პოლიტიკოსები თავისი ქვეყნის სასარგებლოდ გამოეყენებინათ ამ დიდ სახელმწიფოებს შორის არსებული წინააღმდეგობანი.

მონოგრაფიაში მოცემულია ქართველ მეფე-მთავართა თუ ფეოდალთა დაუსრულებელი შინა ქიშპი, მტრობა და ურთიერთბრძოლა, რაც მეტად ასუსტებდა მათ ძალებს, ვრცლადაა განხილული XVII საუკუნის გარიჟრაჟზე დასავლეთი საქართველოს მეფე-მთავართა მიერ რუსეთის სახელმწიფოსთან კავშირის დამყარების ცდა, რასაც პრაქტიკული შედეგი არ მოჰყოლია, მაგრამ იმერეთის სამეფოს პოლიტიკური მესვეურნი XVIII საუკუნეში და განსაკუთრებით მის მეორე ნახევრიდან რუსეთთან ურთიერთობას იმედის თვალით შეჰყურებდნენ. აღრე ქართველი მეფეების მიერ შემუშავებული ფორმულა, რომ თავისუფლება მოვიდოდა ჩრდილოეთიდან და საქართველოს „აღდგომა-გამოხსნა“ მხოლოდ ამ გზით შეიძლებოდა, XVIII საუკუნის II ნახევარში ისევე გაცოცხლდა და გაბატონ-

ნებული ადგილი დაიკავა პროგრესულად მოაზროვნე ქართველთა პოლიტიკურ ორიენტაციაში.

ამ დროს „აღმოსავლეთის საკითხით“ დაინტერესებული რუსეთი კავკასიის ქედს აქეთ საიმედო დასაყრდენს ეძიებდა. ასე დაიწყო ჩვენი ქვეყნის ისტორიაში ახალი ეტაპი — რუსეთის დიპლომატიური ურთიერთობა საქართველოსთან.

ამ დიპლომატიური ურთიერთობის გაცხოველებას შედეგად მოჰყვა 1783 წლის ტრაქტატი აღმოსავლეთ საქართველოსთან. იმერეთის მეფეები სოლომონ I, დავით გიორგის ძე და სოლომონ II დაჟინებით თხოვდნენ რუსეთის საიმპერატორო კარს 1783 წლის ტრაქტატის მსგავსი ხელშეკრულების გაფორმებას, რომლის ძალითაც იმერეთი რუსეთის მფარველობაში შევიდოდა.

მართალია, დასავლეთი საქართველო რამდენიმე პოლიტიკურ ერთეულს შეიცავდა, რომლებიც დამოუკიდებლობისა და თვით პეგემონობისაკენაც კი მიისწრაფოდნენ, მაგრამ იმდენად მჭიდროდ იყვნენ ურთიერთდაკავშირებულნი როგორც საგარეო, ისე საშინაო პირობებით, რომ თითოეული მათგანის ცალკეული ისტორიის გადმოცემა მეტად არასრულ სურათს მოგვცემდა და ცალმხრივ წარმოდგენას შეგვიქმნიდა მათ შესახებ.

ამით არის გამოწვეული, რომ წინამდებარე ნაშრომში მოცემულია ცდა დასავლეთი საქართველოს ისტორიის ერთობლივი მიმოხილვისა, ამიტომ წიგნი შეიცავს მეტ მასალას, ვიდრე მისი სახელწოდების ქვეშ იგულისხმება.

ნ ა წ ი ლ ი პ ი რ ვ ე ლ ი

XVI საუკუნე

ფეოდალური საქართველოს პოლიტიკური დაშლა და იშვრეთის სამეფოს წარმოქმნა

მე-15 საუკუნის II ნახევარში საქართველოს ფეოდალური სახელმწიფო საბოლოოდ დაიშალა და დაიყო რამდენიმე სამეფო-სამთავროდ. აკად. ივ. ჯავახიშვილის დასკვნით „საქართველოს დაყოფა სამეფოებად და სამთავროებად ხანგრძლივი პროცესისა და ბრძოლის შემდეგ მომხდარა. ამასთანავე ერთბაშად კი არა, არამედ თანდათანობით. პირველად სამცხე-საათაბაგო ჩამოშორდა, შემდეგ სამეგრელო-აფხაზეთი და გურია, მერე კახეთის სამეფოც დაარსდა მალე ქართლი და იმერეთიც ცალკე სამეფოებად გაიყვნენ, მაგრამ ეს მდგომარეობა საბოლოო არ ყოფილა: ბრძოლა საქართველოს მთლიანობის აღსადგენად შემდეგშიაც არ შეწყვეტილა. ამიტომ საქართველოს პოლიტიკური სურათი ცვალებადი იყო და ახლად შექმნილი ერთეულების სივრცე-საზღვრებიც მრავალჯერ შეცვლილა“¹.

ცნობები საქართველოს სამეფო-სამთავროებად დაშლის შესახებ მოგვეპოვება მე-18 საუკუნის პირველ ნახევარში შექმნილ საისტორიო თხზულებებში. ეს თხზულებებია: ბერი ეგნატაშვილის მეთაურობით შედგენილი ე. წ. „სწავლულ კაცთა კომისიის“ კოლექტიური ნაშრომი, რომელიც ქართლის ცხოვრების უკანასკნელ გამოცემაში შეტანილია სათაურით: „ახალი ქართლის ცხოვრება. პირველი ტექსტი“², უცნობი ავტორების მიერ შედგენილი „ახალი ქართლის ცხოვრება. მეორე ტექსტი“³, „ახალი ქართლის ცხოვრება-

¹ ივ. ჯავახიშვილი, ქართველი ერის ისტორია, წ. 4, თბ., 1967, გვ. 96.

² ბერი ეგნატაშვილი, ახალი ქართლის ცხოვრება [ქართლის ცხოვრება, II, თბ., 1959, გვ. 326—442.]

³ ახალი ქართლის ცხოვრება, მეორე ტექსტი [ქართლის ცხოვრება, II, თბ., 1959, გვ. 443—476.]

ბა, მესამე ტექსტი¹ და ვახუშტი ბაგრატიონის ფუნდამენტური შრომა „აღწერა სამეფოსა საქართველოსა“².

ჯერ კიდევ მე-16 საუკუნეში კახეთში ყოფილა დაცული გადმოცემა, რომ ალექსანდრე პირველმა (1412 — 1442 წწ.) საქართველო თავის შვილებს დაუნაწილა: ერთს მისცა კახეთი, მეორეს — ქართლი და მესამეს — იმერეთი. თითქოს ამის ნიადაგზე წარმოქმნილიყოს სხვადასხვა სამეფოები. ამ აზრს ავითარებდა კახეთის მეფე ალექსანდრე II რუს ელჩებთან საუბარში 1589 წელს³.

სწავლულ კაცთა კომისია აღიარებს, რომ ალექსანდრესა და კონსტანტინეს მეფობის დროს „არლარა იცვლებოდა ერისთავნი და არცა თავადნი, ყოველნივე ხევსა და სანახებსა და თემთა და ადგილთა მკვიდრ ქმნილიყვნენ, და, ვისცა მამულსა მისცემდა, მკვიდრად მიეცემოდა. და ყოველნივე ძლიერ იყვნეს: მთავარნი, ერისთავნი და თავადნი.“

ხოლო ამა ალექსანდრესა და კონსტანტინესა უამში განდგნენ იმერელნი, ოდიშარნი და გურიელნი, და არლარა მორჩილებდა ათაბაგი, და განდგა კახეთი“⁴.

სწავლულ კაცთა კომისიის წარმოდგენით ამ დროს ცენტრი უკიდურესად დასუსტებულია. მას აღარ შეუძლია ერისთავთა და მთავართა შეცვლა. კომისიის წევრები დაშლის ფაქტს თავისებურად განმარტავენ, მათთვის უცნობია იმერეთისა და კახეთის მეფის წარმომავლობა.

„ხოლო ესე ვერა ვსცანით, თუ ბატონი იმერეთისა და კახეთისა, რომლისა თესლისაგან არიან, და ანუ ვითარ უპყრიესთ ქვეყანანი იგი“⁵ ე. ი. სწავლულ კაცთა კომისია ვერ არკვევს იმერეთისა და კახეთის მეფეების ჩამომავლობას, მაგრამ მათ შრომას იქვე ახლავს შენიშვნა უცნობი ავტორისა, რომ „ეგნატაშვილს მტერობა უმგარი სიცრუე იმას, რომ იმერთა და კახთა... ჭეშმარიტად მეფენი არიან და ბაგრატიონნი“⁶.

სწავლულ კაცთა კომისია იქვე წერს: „ხოლო იმერეთისა რომელთამე თქუეს: „ოდეს მამა ალექსანდრესი ბაგრატი მეფე ჩავიდა

¹ ახალი ქართლის ცხოვრება, მესამე ტექსტი [ქართლის ცხოვრება, II, თბ., 1959, გვ. 477 — 539].

² ვახუშტი ბაგრატიონი, აღწერა სამეფოსა საქართველოსა [ქართლის ცხოვრება, 4, თბ., 1973]. შემდეგში იხ. ვახუშტი.

³ С. А. Белокуров. Сношения России с Кавказом, выпуск I, Москва, 1889, стр. 168—170.

⁴ ბერი ეგნატაშვილი, ქართლის ცხოვრება, II, 1959, გვ. 348;

⁵ იქვე, გვ. 348, შენიშვნა № 4.

⁶ იქვე, შენიშვნა 4.

იმერეთს, მაშინ თვისნი მისნი დაუტევა და მიერთგან ძენი მისნი არიანო.“ როგორც ვხედავთ, ეს გადმოცემაც ზეპირსიტყვიერებიდან მომდინარეობს და სწავლულ კაცთა კომისიას ხელთ საამისო არცერთი დოკუმენტი არა ჰქონია.

საქართველოს დაყოფა-დანაწილების საკითხით ვახუშტი ბაგრატიონიც იყო დაინტერესებული. მან სწავლულ კაცთა კომისიისაგან სრულიად განსხვავებული დებულებანი წამოაყენა.

ვახუშტი ბაგრატიონმა უარყო კახეთში გავრცელებული გადმოცემა მეფე ალექსანდრეს მიერ საქართველოს დაყოფის შესახებ. მისი აზრით, ალექსანდრე მეფეს არ შეეძლო საქართველოს დანაწილება თუნდაც იმიტომ, რომ „არ იყო ჩვეულება მეფეთა და უფროსლა ბაგრატიონთა შინა, რათამცა განხეთქილება ექმნათ სამეფოსა, გარნა უფროს განუხეთქელობასა მცდელობდნენ და არცა რიღებდნენ სისხლთა, ვითარცა საჩინო არს“¹. ვახუშტი დასძენს, რომ თუ კი მაინც და მაინც რომელიმე პროვინციას ჩააბარებდა მეფე თავის შვილებს ან ნათესავეებს, ესენი მეფენი კი არ იყვნენ, არამედ ერისთავებიო.²

ვახუშტი ბაგრატიონი იმოწმებს მის ხელთ არსებულ სიგელგუჯრებს და ასკვნის, რომ საქართველოში „ბრწყინვალე გიორგიდამ, ვიდრე გიორგი ალექსანდრეს ძისამდე იყო ერთმეფობა, გუჯართა, სიგელთა და ქორონიკონთა მოწმობითა“.

ვახუშტი ყველა საწინააღმდეგო მოსაზრებას აკრიტიკებს და უარყოფს. იგი ამბობს: საქართველოს დაშლა-დანაწილება მოხდა გიორგი ალექსანდრეს ძის დროსო³.

გიორგი მე-8 დროს ცენტრალურ ხელისუფლებას უფრო მეტად დაეტყო დასუსტება. ამას შედეგად ის მოჰყვა, რომ მთავრები აღარ ემორჩილებიან მეფეს და იწყება ბრძოლა მათ შორის.

ვახუშტის გადმოცემით, სამცხის ათაბაგი ყვარყვარე გიორგი მეფის უკმაყოფილო იყო (ვინაიდან გიორგიმ თავდაპირველად მხარი დაუჭირა ყვარყვარეს მეტოქეს ათაბაგის ტახტზე — ალბულას); ამიტომ იგი იმერეთის ერისთავს ბაგრატს უკავშირდება და ასეთ გეგმას შესთავაზებს: თუ ბაგრატი გიორგი მეფეს აუჭანყდება, იგი ბაგრატს დაახმარს გურიელს, დადიანს და სვანთა ერისთავს; გამარჯვების შემთხვევაში მან მთავრები უნდა გაათავისუფლოს სამეფო ვალდებულებისაგან. ბაგრატი ამ პირობაზე თანხმდება.

¹ ვ ა ხ უ შ ტ ი, ქართლის ცხოვრება, 11, 1854, გვ. 101.

² იქვე.

³ იქვე, გვ. 283.

1462 წელს ჩიხორს (იმერეთში)¹ მოხდება გადამწყვეტი ბრძოლა მეფე გიორგი მე-8 და ბაგრატ იმერთა ერისთავს შორის. ამ ბრძოლაში გიორგი მეფე მარცხდება, ხოლო ბაგრატი გამარჯვებული მოვიდა ქუთაისს, „აქა მოერთვნენ დადიან-გურიელი, აფხაზნი და სვანნი და აკურთხეს, სრულიად იმერთა სათნო ჩინებითა, მეფედ.“² აღასრულა მთავართა მათ აღქმული თავისი და განთავისუფლდნენ, თვინიერ ლაშქრობისა და ქვეგანწესებისა მეფისა და იქმნა იმერეთი მიერთ ერთ მეფედ და ოთხ სამთავროდ ანუ სათავადოდ, რამეთუ მიიღო დადიანმან ოდიში, გურიელმან გურია, შარვაშიძემ აფხაზნი და ჭიჭნი, და გელოვან სვანეთი“.³

1462 წლიდან მთავრები მეფეს ფაქტიურად აღარ ემორჩილებიან, მეფის დამოკიდებულება მთავრებთან მხოლოდ „ლაშქრობასა“ და „ქვეგანწესებაში“ გამოიხატება. ამდენად, აღნიშნავს აკად. ნ. ბერძენიშვილი, ბაგრატის გამარჯვება ჩიხორთან „იყო არა ღიბთიქითის ტახტის, არამედ ღიბთიქითის მთავართა გამარჯვებაო“.⁴

ამრიგად, ჩიხორის ბრძოლის შემდეგ დადიანმა, გურიელმა, შერვაშიძემ და გელოვანმა კიდევ ერთ დიდ წარმატებას მიაღწიეს. ვახუშტის გაგებით, ეს ნიშნავდა დასავლეთ საქართველოში ოთხი სამთავროს ჩამოყალიბებას, მაგრამ სანამ მათ მართებთ მეფის მიმართ „ლაშქრობა“ და „ქვეგანწესება“, ჯერ კიდევ არ არიან სრული დამოუკიდებელი მთავრები. მთავრები აგრძელებენ ბრძოლას სრული დამოუკიდებლობის მოსაპოვებლად. ეს ბრძოლა შემდეგ საუკუნეებშიც გრძელდება.

სანამ ჩიხორის ბრძოლა მოხდებოდა, მანამდეც მწვავე ბრძოლები ჰქონიათ გიორგი მეფესა და ბაგრატს. ზევდგინიძიანთ მოხსენებაში ნათქვამია, რომ „გიორგი მეფემ ქუთაისი წაართო ბაგრატს“.

¹ ს. ხოსიტაშვილი ცდილობს დაამტკიცოს, რომ ჩიხორის ბრძოლა მოხდა სამცხეში მდებარე ჩიხორში (იხ. მაცნე, № 6, 1970, გვ. 43). მას რაიმე ახალი დამატებითი წყარო არა აქვს, გარდა იმისა, რაც ივ. ჭავჭავიძემ ჰქონდა ხელთ. მას საბუთად მხოლოდ ის მოაქვს, რომ სამცხეშიც არის ადგილი „ჩიხორისის“ სახელით.

ივ. ჭავჭავიძელია შეაქამა ყველა ის წყარო, სადაც მოცემულია ცნობები ჩიხორის ბრძოლის შესახებ და დაამტკიცა, ვფიქრობთ დამაჯერებლად, რომ ბრძოლა მოხდა იმერეთში მდებარე ჩიხორში (ივ. ჭავჭავიძელი, ქართველი ერის ისტორია, ტ. 4, გვ. 83). ამ აზრს იზიარებს ჯ. ოდიშელიც (იხ. ჯ. ოდიშელი, მცირე ქრონიკები, 1958, გვ. 98 — 99).

² ბაგრატ ერისთავს იმერეთის სამეფო ტახტზე ასვლის შემდეგ მეფე ბაგრატს II-ს ვუწოდებთ. მისგან იწყება იმერეთის მეფეების სია.

³ ვახუშტი, გვ. 806.

⁴ ნ. ბერძენიშვილი, საქართველოს ისტორიის საკითხები, 2, თბ., 1965, გვ. 13.

აკად. ნ. ბერძენიშვილი განმარტავს, რომ „წაართო“ იმას გულისხმობს, რომ ბაგრატს დაპყრობილი კი არ ჰქონია ქუთაისი, არამედ მიღებული ჰქონია მეფისაგან¹. იმავე ზევდგინიძიანთ მოხსენ. 2-დან ირკვევა, რომ მეფე გიორგისა და ბაგრატს შორის 1453—1 წლებში ბრძოლა მომხდარა, ამ ბრძოლაში გიორგი მეფე დამარცხებულია, ნ. ბერძენიშვილი ასკვნის, რომ აღნიშნული წლიდამდე ბაგრატი მეფედ იწოდებოდა² და ჩიხორის ბრძოლამდე მეფის ტიტულს ატარებდა³.

ამას ადასტურებს ლათინურად შენახული ცნობაც; დასავლეთ ევროპაში 1460 წელს საქართველოდან მისულ დესპანებს ანტიოსმალურ კოალიციაში მონაწილეთა შორის დაუსახელებიათ აგრეთვე „ბაგრატ იბერთა (მეფე), რომელნიც აწ გიორგიანებად (ე. ი. ქართველებად) იწოდებიანო“⁴.

ნ. ბერძენიშვილი აღნიშნავს, რომ მე-14 — 15 საუკუნეებში როცა „გახელმწიფდეს დიდებულნი“ და „მეფეთა ადგილთა მჭდომ“ მოსაკარგავემ „ქინილა მეფობა იკადრა“, ალასტანელი უფლისწული, სრულიად ბუნებრივია, „ბატონიშვილობას აღარ სჯერდება და მეფობას მიიტაცებს... განსხვავებით სხვა ფეოდალ მთავართაგან თავიანთ თავს „მეფედ“ უწოდებენ“⁵.

ასეთი მეფეები მე-14 — 15 საუკუნეებში ბევრი არიან და რომ პრინციპულად ამავე კატეგორიისაა ლიხთიქითის „მეფეთა“ საკითხიცო, დასძენს ნ. ბერძენიშვილი.⁶

ივანე ჭავჭავიძე იღობა შენიშნა, რომ უკვე ალექსანდრე პირველის მეფობის დროიდან სამეფო სახლის წევრები, მეფის ძმები და შვილები აქტიურად ერეოდნენ სახელმწიფო საქმეებში.⁷ მთავართა განდგომის საწინააღმდეგო ერთ-ერთი ღონისძიება იყო ცენტრალური ხელისუფლების მიერ ურჩ მთავართა მაგივრად სამეფო სახლის წევრთა დანიშვნა. ამასთან დაკავშირებით ნ. ასათიანი შენიშნავს „ბუნებრივია, რომ ქვეყნის ამა თუ იმ ნაწილში, როგორც ადგილზე გამრიგე მოხელენი, აღმოჩნდებიან სამეფო სახლის წევრები.

¹ ნ. ბერძენიშვილი, საქართველოს ისტორიის საკითხები, 2, თბ., 196.

² იქვე, გვ. 129.

³ იქვე, გვ. 127.

⁴ მ. თამარაშვილი, კათოლიკობა ქართველთა შორის, 1902, გვ. 6.

იხ. აგრეთვე ივ. ჭავჭავიძე, საქართველო ერის ისტორია, ტ. 4, 1967, გვ. 7.

⁵ ნ. ბერძენიშვილი, საქართველოს ისტორიის საკითხები, II, 196 გვ. 133—134.

⁶ იქვე, გვ. 135.

⁷ ივ. ჭავჭავიძე, საქართველოს ისტორია, მე-11 — 15' საუკუნეებ თბ., 1949, გვ. 231.

ქეფეს თითქოს საწინააღმდეგო არაფერი უნდა ჰქონდეს, რომ მთა-
ართა თუ ერისთავთა ადგილას მისი უახლოესი ნათესავეები, შვი-
ტები თუ ძმები, ისხდნენ, ნათესაობა უფრო მტკიცე გარანტია უნ-
დად ყოფილიყო იმისა, რომ შენარჩუნებული იქნებოდა ქვეყნის ამ
სწორების ერთგულება ცენტრალური ხელისუფლებისადმი. ამ
თვალსაზრისით მეფეთა-მეფის მიერ საქართველოს ცალკეულ ხაზი-
ლების „მინებება“ ასეთი მცირე მეფეებისადმი სრულიადაც არ
ნიშნავდა იმას, რომ ამით იგი საქართველოს დაშლას აკანონებდა.
პირიქით, ეს ღონისძიება მიმართული იყო ადგილობრივ ერისთავთ-
ერისთავთა თუ მთავართა მიერ ხელისუფლების უზურპაციის წი-
ნააღმდეგ¹. სამწუხაროდ მეფის ოჯახის წევრები, როგორც კი
ხელში ჩაიგდებდნენ ამა თუ იმ მხარეს, გარკვეული პირობების
შექმნისთანავე, თავიანთ თავს მეფედ აცხადებდნენ². ამის მაგალითს
თვით ბაგრატ მე-6 მოქმედება წარმოადგენს.³

მე-15 საუკუნის 50-იანი წლების საქართველოს პოლიტიკურ
მდგომარეობას 1459 წელს საქართველოდან დასავლეთ ვეროპაშა
გაგზავნილი ეპისტოლეებიდანაც ვგებულობთ.

სამცხის მთავარს ყვარყვარე ათაბაგს თავისი თავი იმდენად
დამოუკიდებლად მიაჩნდა გიორგი მეფისაგან, რომ უტხოკეთში სა-
კუთარ დესპანებს გზავნიდა და მიწერ-მოწერასაც დამოუკიდებლად
აწარმოებდა.

ბედიანი, რომელიც სამეგრელო-აფხაზეთის მთავრად ითვლებო-
და, იმდენად დიდი უფლებებით ყოფილა მოსილი, რომ მეფედაც
კი იწოდებოდა.⁴

¹ ნ. ასათიანი, ფეოდალური საქართველოს პოლიტიკური დაშლის ისტო-
რიიდან, თსუ შრომები, ტ. 78, 1963, გვ. III.

² ჯ. ოდიშელი, აღმოსავლეთ საქართველოს პოლიტიკური ისტორიისათ-
ვის მე-14—17 სს, მე-14—18 სს. რამდენიმე ქართული ისტორიული დოკუმენტი,
თბ., 1964, გვ. 81.

³ ქართულ სამეცნიერო ლიტერატურაში (ქართლის ცხოვრება, ვახუშტი ბაგ-
რატიონი, ივ. ჭავჭავაძის შვილი, ს. კაკაბაძე, ნ. ბერძენიშვილი
და სხვები) ბაგრატ მე-6 შამისშვილობის (ჩამომავლობის) შესახებ განსხვავებული
მოსაზრებანია გამოთქმული. უკანასკნელ ხანს მკვლევარმა ელ. მეტრეველმა იე-
რუსალიმის აღაპების მონაცემების მიხედვით წამოაყენა მოსაზრება, რომ ბაგრატ
მე-6 უნდა იყოს შვილი ალექსანდრე I-ის ძმის გიორგისა (იხ. ელ. მეტრევე-
ლი, მასალები იერუსალიმის ქართული კოლონიის ისტორიისათვის, თბ., 1962,
102; მისივე, იერუსალიმის რამდენიმე ქართული მონასტრის დათარიღების
კვლევა, ხელნაწერთა ინსტიტუტის მოამბე, 4, თბ., 1962, გვ. 226—227).

⁴ ივ. ჭავჭავაძის შვილი, ქართველი ერის ისტორია ტ. 2, თბ., 1967, გვ. 65.

დასავლეთ ევროპაში გაგზავნილ ეპისტოლეში გურიაც ცალკე ერთეულად იხსენიება, თუმცა ბედიანს და გურიელს ცალკე დესპანები არ გაუგზავნიათ ევროპაში.

ზემოთ აღნიშნულის გაანალიზების შემდეგად ივ. ჯავახიშვილი შემდეგ დასკვნას აკეთებს: „თუმცა გიორგი მეფე თავის თავს საქართველოს გამაერთიანებელ მეფეს უწოდებს, მაგრამ ნამდვილად არც სამეგრელო-აფხაზეთი, არც გურია და არც სამცხე-საათაბაგო პირდაპირ მას აღარ ემორჩილებოდა. მაშასადამე, მისი სამეფო მხოლოდლა იმერეთს, ქართლსა და ქიზიყ-კახეთს მოიცავდა. ამგვარად აშკარა ხდება, რომ შავ ზღვას გიორგი მეფის საბრძანებელი ჩამოშორებული ყოფილა“¹.

ევროპიდან დაბრუნებული დესპანების ცნობამ, რომ კოალიციის შექმნას განხორციელება არ ეწერა, საქართველოს მეფე-მთავრებს შორის ისევ ომი გამოიწვია. პირველი ათაბაგი იყო, რომელმაც ომი გააჩაღა და 1465 წელს ფარავანთან საქართველოს მეფე გიორგი მე-8 ტყვედ ჩაიგდო ხელში. ამ მდგომარეობით ისარგებლა ბაგრატ II იმერთა მეფემ. ის ქართლში გადმოვიდა, სადაც, როგორც ჩანს, ბევრი მომხრეები ჰყავდა და თავი საქართველოს მეფედ გამოაცხადა ბაგრატ VI-ის სახელწოდებით.

ათაბაგი მიხვდა თავის შეცდომას, რომ სუსტი მეფის ნაცვლად ტახტი ხელში ჩაუგდო ძლიერსა და უფლებამოყვარე ბაგრატს. იგი სასწრაფოდ ათავისუფლებს გიორგი მეფეს ტყვეობიდან, მაგრამ უკვე გვიანდაა. გიორგი მეფე ტახტისათვის ბრძოლაში უძლური აღმოჩნდა — საქართველოს სამეფო ტახტს ვეღარ იბრუნებს. იგი იძულებული გახდა კახეთში წასულიყო, სადაც მას, როგორც ჩანს, ფეოდალთა ფართო ფენა მხარს უჭერდა, მაგრამ ბრძოლა მაინც უხდება კახეთის მთავარ დავითთან. ამ ბრძოლაში გიორგი იმარჯვებს და 1466 წლიდან გიორგი მე-8 მხოლოდ კახეთის მეფობით კმაყოფილდება. ასე ჩაეყარა საფუძველი კახეთის დამოუკიდებელ სამეფოს.²

ბაგრატ მე-6-ს სამეფო მისი გამეფების მომენტში და შემდეგაც დიდად შემეცირებული იყო და ერთიანი საქართველოს აჩრდილსლა წარმოადგენდა. ბაგრატის სამეფოს საზღვრავდა: დასავლეთით ცხენისწყალი, სამხრეთით — სამცხე-საათაბაგო, აღმოსავ-

¹ ივ. ჯავახიშვილი, ქართველი ერის ისტორია, ტ. 4. თბ., 1967, გვ. 59.

² ნ. ასათიანი, ფეოდალური საქართველოს პოლიტიკური დაშლის ისტორიიდან, თსუ შრომები, ტ. 78, 1963.

ლეთით — კახეთის სამეფო. ქვემო ქართლის მხარე, ე. წ. სომხითი, ლორეს ციხე უზუნ-ჰასანს ქონდა დაპყრობილი.¹

ბაგრატის სამფლობელოს ჩამოცილებული იყო კახეთის სამეფო და სამცხე-საათაბაგო, ხოლო სამეფოს შიგნითაც ერთი დიდი სამთავრო განკერძოების გზაზე იყო შემდგარი. ამ სამთავროს, დასავლეთი საქართველოს შავი ზღვის სანაპირო ეჭირა და მაშინ საბედნიანოდ იწოდებოდა.² საბედნიანოში შედიოდა აფხაზეთი და სამეგრელო თავისი ზღვისპირა ქალაქებით: ცხუმში ანუ სევასტოპოლი (ეხლანდელი სოხუმი) და ფოთი.

საბედნიანოს მთავარი ბაგრატს ემორჩილებოდა როგორც უზენაეს ხელმწიფეს.³ ამრიგად, აკად. ივ. ჯავახიშვილი ასკვნის, რომ „ბაგრატ მეფის დროს საქართველოს პოლიტიკური მდგომარეობა არსებითად თითქმის (კახეთის გამოყოფის გარდა) არ განსხვავდებოდა იმ მდგომარეობისაგან, რომელშიაც საქართველო გიორგი მეფის დროს იყო: მაშინაც მესხეთის მფლობელი ათაბაგი და სამეგრელოს მთავარი ბედნიანი თავიანთ თავს საკმაოდ დამოუკიდებლად გრძნობდნენ და გამოცალკევებულნი იყვნენ. მაშასადამე, მცდარია ის შეხედულება, ვითომც ბაგრატ მეფის დროს მომხდარიყოს მთლიანი საქართველოს გამოყოფა სამ სამეფოდ და სამთავროებად. ბაგრატი მართლაც სხვებსავეთ ლიხთიმერეთისა და ლიხთამერეთის გამაერთიანებელი და ორსავე ტახტის მპყრობელი ყოფილა და, როცა თვითონ გაბატონებულა, უკვე საქართველოს დაყოფაზე არ უფიქრია“.⁴

1477 წელს უზუნ-ჰასანის შემოსევის შემდეგ საქართველოს პოლიტიკური მდგომარეობა კიდევ უფრო მძიმე გახდა. შემდგომში მოვლენებმა ნათლად დაადასტურა, რომ უზუნ-ჰასანის შემოსევა იყო ერთ-ერთი მიზეზი საქართველოს საბოლოოდ დაშლისა.

1478 წელს გარდაიცვალა ბაგრატ მე-6. ტახტზე ასვლა მისმა შვილმა ალექსანდრემ სცადა, მაგრამ ვერ შეძლო, ვინაიდან კონსტანტინეს უფრო მეტი მომხრეები აღმოაჩნდა და კონსტანტინე გამეფდა. აქედან ნათლად ჩანს, რომ კონსტანტინე წინასწარ აგროვებდა თავის მომხრეებს და გარეშე ძალის დახმარებასაც არ თაკილობდა.

¹ იოსაფა ბარბაროსა და ამბროზიო კონტარინის ცნობები. შოაბე, 1894. № 11, გვ. 55.

² საქართველოს ისტორია, ს. ჭანაშვიას რედაქციით, თბ., 1946, გვ. 295.

³ იქვე, გვ. 295.

⁴ ივ. ჯავახიშვილი, ქართველი ერის ისტორია, ტ. 4, თბ., 1967, გვ. 111.

ალექსანდრე ბაგრატიის ძე იძულებული გახდა იმერეთში გადასულიყო და იქ ეცადა სამეფო ტახტზე მომავრება. მან მოუწოდა მთავრებს, მაგრამ „დადიანმან არღარა ინება მოსვლა. აგრეთვე გურიელმან და სხვათა“.¹ ამ მდგომარეობით სარგებლობს კონსტანტინე და ქართლის ჯარით სასწრაფოდ დასავლეთში გადადის 1479 წელს. „და მიერთვნენ ყოველნი იმერნი, ვინაიდგან დადიანსა მიეცა პირი მტკიცე: ამისათვის ვერღარა წინა-აღდგა ალექსანდრე და წარვიდა სიმაგრეთა შინა“.² კონსტანტინემ უბრძოლველად დაიმორჩილა იმერეთის სამეფო.

მეფობის დასაწყისის პირველ ხანებში (1478 წ.) კონსტანტინეს შედარებით წარმატება ჰქონდა და ორთავე ტახტის ამერ-იმერის გაერთიანება შეძლო, მაგრამ მდგომარეობა მალე შეიცვალა და საქართველო ისევ დაშლას იწყებს.

საქართველოს საბოლოო დაშლაში ისევ და ისევ სამცხის მთავარს ყვარყვარეს მიუძღვის ბრალი.

1483 წელს არაღეთის ბრძოლაში³ სამცხის მთავარმა ყვარყვარემ კონსტანტინე დაამარცხა, რის შედეგადაც ალექსანდრე ბაგრატიის ძემ ისარგებლა და იმერეთის ტახტი ისევ დაიპყრო. მაგრამ ეს არ იყო ძირითადი მიზეზი ალექსანდრეს გამეფებისა იმერეთში.

ერთ-ერთი ძირითადი მიზეზი, რამაც ქართლს იმერეთი მოწყვიტა იყო იაყუბ ყაენის შემოსევა ჯერ სამცხეში და შემდეგ ქართლში.⁴ ამიტომ ალექსანდრეს გამეფება იმერეთში მარტო არაღეთის ბრძოლაში კონსტანტინე მეფის მარცხს არ გამოუწვევია, ამავე წელს იაყუბ ყაენის შემოსევამ კონსტანტინეს ხელფეხი შეუკრა და ამით ისარგებლა ალექსანდრემ და იმერეთის ტახტი დაისაკუთრა 1484 წელს. მაგრამ მისი მეფობა დიდხანს არ გაგრძელებულა „დადიანმან კვალად არა ინება მეფობა მისი და მოიწვია მეფე კონსტანტინე დაპყრობად იმერეთისად, უსმინა დადიანსა მეფემან კონსტანტინემ და ჩამოვიდა კვალად სპითა იმერეთს“⁵ (1487 წ.).

¹ ვახუშტი, გვ. 808.

² იქვე.

³ ქართლის ცხოვრება, II, თბ., 1959, გვ. 346—348, 481; ყორღანი, ქრონიკები, II, გვ. 303.

⁴ ქართლის ცხოვრება, II, თბ., 1959, გვ. 482.

⁵ ფუთუხიძე, ჰასან რუმლუს ცნობები საქართველოს შესახებ, თბ., 1966, გვ. 17, 18; იხ. აგრეთვე ისტორიის ინსტიტუტის შრომები, ტ. 7, თბ., 1954; რ. კიკნაძე, საქართველო-ირანის ურთიერთობის ისტორიიდან მე-15 საუკუნის II ნახევარში, გვ. 126, 127.

⁶ ვახუშტი ბაგრატიონი, გვ. 808.

ალექსანდრეს ძალა არ იყო, კონსტანტინეს და დადიანს რომ გამკლავებოდა, ამიტომ მან მიატოვა ტახტი და „წავიდა სიმაგრეთა შინა“. კონსტანტინემ კვლავ გააერთიანა იმერ-ამერი, მაგრამ ეს გაერთიანება ხანგრძლივი არ აღმოჩნდა, ვინაიდან ამ დროს ქართლის თავზე კვლავ ჩამოწვა შავი ღრუბელი: ქართლს ირანის ჯარა შემოესია.

პასან რუმლუ იაყუბი ყაენის მეორედ შემოსევას 1487 — 1488 წლებით ათარიღებს.¹

კონსტანტინე იძულებული გახდა სასწრაფოდ დაეტოვებინა იმერეთი და ქართლისათვის მიეხედა.

შექმნილი მდგომარეობით სარგებლობს ალექსანდრე ბაგრატის ძე და კვლავ ეზავება მთავრებს დადიანსა და გურიელს. ამით მან მშვიდობა დაამყარა იმერეთის სამეფოში და ამავე დროს დაიმორჩილა აფხაზნი და სვანნი. ამის შემდეგ კონსტანტინე მეფესთანაც პყო ზავი.²

ალექსანდრემ არა მარტო იმერეთი შემოიბტკიცა, არამედ მთავარნიც თავის გავლენას დაუმორჩილა, და ამდენად მან ნაწილობრივ აღიდგინა ის დაკარგული პრივილეგიები, რაც იმერეთის მეფეებმა დაკარგეს მთავრებთან კიდილში.

1489 წლიდან იმერეთი საბოლოოდ ჩამოცილდა ქართლის სამეფოს. კონსტანტინე მეფე მაინც ცდილობდა როგორმე გაეერთიანებინა დაშლილი საქართველო. მან 1490 წელს დარბაზის სხდომა მოიწვია და დასვა საკითხი, თუ რა იღონონ საქართველო რომ კვლავ გაერთიანდეს. დარბაზის წევრებმა მეფეს განუცხადეს: „ვინაიდან მტკიცედ დგანან ერთგულებათა ზედა თვისთა რჩეულთა მეფეთა იმერნი და კახნი და კვალად ათაბაგისა სამცხელნი, ამისათვის არა ვაგიზრახავთ ბრძოლასა, რამეთუ თუმცა მრე ვექმნეთ ერთსა, არღარა მოგუცემს მეორე ნებასა, არამედ ვიცადოთ ჟამი, უკეთუ კვალად აგოს ღმერთმან მეფობასა შენსა“³ ის რაც ფაქტიურად მომხდარი იყო, დარბაზმა იურიდიულად დაადასტურა და გააფორმა.

¹ ვ. ფუთურძე; პასან რუმლუს ცნობები საქართველოს შესახებ, თბ., 1966, გვ. 12. ვახუშტი, გვ. 808. ქართლის ცხოვრება, II, 1959, გვ. 486.

² ვახუშტი გვ. 809.

³ ვახუშტი ბაგრატიონი, ქართლის ცხოვრება, II, 1854, გვ. 15.

ამის შემდეგ კონსტანტინე მეფე იძულებული გახდა იმერთა მეფეს დაზავებოდა 1491 წელს.¹

იმერეთის სამეფოს ცალკე ერთეულად ჩამოყალიბება, თვით ქართლის მეფის ტიტულატურაშიც აისახა. ადრე საქართველოს მეფე ყველა საბუთში, თავის თავს მეფეთ-მეფეს უწოდებს, მისი მეცხედრე კი დედოფალთ-დედოფალად იხსენიება. თვით კონსტანტინე მეფე 1488 წლის საბუთში თავის თავზე ამბობს: ჩვენ „გამაერთიანებელმა ლიხთიმერისა და ლიხთამერისამან ორსავე სამეფოსამან მტკიცედ და შეურყეველად მპყრობელმან“-ო². როგორც ამ სიგელიდან ჩანს, კონსტანტინე ისევ ისე იწოდებოდა, როგორც სხვა მისი წინაპარი მეფეები, მაგრამ შემდგომ 1491—1492 წლების სიგელებში კონსტანტინე თავს იმერეთის მპყრობელად აღარ ასახელებს.³

მე-16 საუკუნის დასაწყისში ქართულ სამეფო-სამთავროებს საკუთარი საზღვრები გაუჩნდათ, მაგრამ კუთვნილ ადგილ-მამულებს აღარ სკვრდებოდნენ და თავიანთ თანამომძეებებს საზღვრებს ურღვევდნენ და თავს ესხმოდნენ, ცალ-ცალკე ყველას კანონიერ ხელმწიფედ მიაჩნდა თავი და სხვებს უზურპატორად თვლიდა.

ქართლში დავით კონსტანტინეს ძე მეფობდა (1505—1525 წწ.). კახეთში ალექსანდრე გიორგის ძე (1476—1511 წწ.), ხოლო იმერეთში ალექსანდრე ბაგრატის ძე (1484—1510 წწ.).

მე-16 საუკუნის დასაწყისში ქართველ მეფე-მთავართა შორის ენერგიულ პოლიტიკას იმერეთის მეფე ალექსანდრე ბაგრატის ძე აწარმოებდა. ქართლის მეფე „იყო ლმობიერი, ბრძოლა-შლილობათა და შფოთთა მოძულე და მოყვარე მშვიდობისა.“⁴ ამით ისარგებლა ალექსანდრე იმერთა მეფემ და ქართლის დაპყრობა გადაწყვიტა.

კინკლოსები და ქართლის ცხოვრების პირველი და მეორე გარძელებები⁵ ერთხმად აღნიშნავენ, რომ ალექსანდრე მეფემ 1509 წელს ქართლის საზღვარი გადალახა, გორი და მისი მიმდგომი სა-

¹ თ. ქორდანი, ქრონიკები, II, გვ. 307, 308, 309.

² ს. კაკაბაძე, სიგელი ქართლის მეფის კონსტანტინესი, 1488 წ., გვ. 8; იხ. აგრეთვე თ. ქორდანი, ქრონიკები, II, გვ. 306.

³ ე. თაყაიშვილი, საქართველოს სიძველენი, III, 1910, გვ. 475 (1491 წლის სიგელი); იხ. აგრეთვე, ს. კაკაბაძე, ისტორიული საბუთები, III, 1913, გვ. 41—42 (1492 წლის სიგელი).

⁴ ვახუშტი, გვ. 809.

⁵ თ. ქორდანი, ქრონიკები, II, გვ. 326; იხ. აგრეთვე, ქართლის ცხოვრება, II, 1959, გვ. 487.

ნახები დაიპყრო ისე, რომ ქართლის მეფეს წინააღმდეგობა არ გაუწევია.

იმერეთის მეფის ბატონობა ქართლის ტერიტორიაზე ხანმოკლე აღმოჩნდა. ვახუშტი ბატონიშვილს ნათქვამი აქვს, რომ იმ დროს, როდესაც ალექსანდრე ქართლში იყო, „მოართვეს მორბევა იმერეთისა ჩიხთაგან, უკან იქცა და წარვიდა იმერეთს“.¹

გორი ისევ ქართლის მეფის განკარგულებაში გადავიდა. თუმცა ამის შემდეგაც არ შეწყვეტილა იმერეთის მეფის ცდა გორისა და მისი მიმდგომი ტერიტორიების დასაკავებლად, ხოლო იმერეთის სამეფოს შემოესივნენ არა „ჩიქნი“, როგორც ეს ქართულ წყაროთა უმრავლესობაში არის აღნიშნული, არამედ თურქნი. ეს იყო თურქთა პირველი გამოჩენა დასავლეთ საქართველოში და იმერეთის მეფის, ბაგრატ III-ის მთავარ საზრუნავს ამის შემდეგ სწორედ თურქთა აგრესიისაგან თავდაცვა შეადგენდა.

იმერეთის სამეფოს საგარეო პოლიტიკური ვითარების ბარათულება. ოსმალეთის აბრანისის დასაწყისი

ოსმალეთის აგრესია საქართველოს მიმართ სხვადასხვა მიზეზით იყო გაპირობებული. ჯერ ერთი, ეს მტაცებლური სახელმწიფო მხოლოდ ახალი ქვეყნების დაპყრობით და ძარცვით საზრდოობდა. მეორეც, ირანთან ომის დროს აღმოსავლეთისაკენ წარმატებით შეტევისათვის საქართველო მეტად მნიშვნელოვან პლაცდარმს წარმოადგენდა.

საქართველო ასევე მნიშვნელოვანი ასპარეზი იყო ირანისათვისაც ოსმალეთის წინააღმდეგ ბრძოლების საწარმოებლად. ირანის ახალი, სეფიანთა დინასტიის შაჰები მონღოლთა ყაენების პოლიტიკურ შემკვიდრეობას იჩემებდნენ და საქართველოს დაპყრობას თავიანთ მოვალეობად თვლიდნენ.

ირანსა და ოსმალეთს შორის მე-16 საუკუნის დასაწყისშივე დაიწყო დიდი ომი. 50 წლის განმავლობაში მათ შორის ზავი არ დიდებულა. ან ომი იყო, ან ბრძოლის მოლოდინი. ამ ომების ერთ-ერთ ასპარეზს საქართველო წარმოადგენდა.² მიუხედავად იმისა, რომ ქვეყანა მუდგრად იცავდა თავს აგრესორებისაგან, თავდაცვის

¹ ვახუშტი, გვ. 809.

² ივ. ჭავჭავაძის შვილი, ნ. ბერძენიშვილი, ს. ჭანაშვილის ისტორია, თბ., 1946, გვ. 301.

უნარს ასუსტებდა ის გარემოება, რომ მე-15 საუკუნის მიწურულიდან საქართველო ერთიანი, მთლიანი სახელმწიფო აღარ იყო.

როგორც ცნობილია, პოლიტიკურმა დაშლილობამ განსაკუთრებით მწვავე ხასიათი დასავლეთ საქართველოში მიიღო. იმერეთის სამეფო რამდენიმე დამოუკიდებელ ერთეულად დაიყო: საკუთრივ იმერეთის სამეფო, სამეგრელოს, აფხაზეთისა და გურიის სამთავროები. თავის მხრივ ამ ერთეულებში არსებობდნენ უფრო წვრილი პოლიტიკურ-ფეოდალური ერთეულები — სათავადოები. ამიერიდან ქართველი ხალხი მტრის წინააღმდეგ საერთო ძალით ვეღარ გამოდიოდა. პოლიტიკურად გათიშული ქართული სამეფო-სამთავროები ერთმანეთთან ერთიანი ეკონომიური და კულტურულ-პოლიტიკური ცხოვრებით აღარ იყვნენ დაკავშირებულნი. ხშირი იყო შემთხვევები, როცა ისინი ერთმანეთს გარეშე მტერსაც კი უსისიანებდნენ, ირანის შაჰსა და ოსმალეთის ხონთქარს მორჩილებას უცხადებდნენ, რომ სხვა „საქართველოების“ ხარჯზე თავიანთი სამეფო ან სამთავრო გადაერჩინათ ან დროებით უპირატესობა მოეპოვებინათ.

მე-16 საუკუნის დამდეგისათვის ოსმალეთის იმპერია ერთ-ერთ უძლიერეს სახელმწიფოს წარმოადგენდა მსოფლიოში. ამ პერიოდის იწყება ოსმალეთის შეტევა ამიერკავკასიის ქვეყნების წინააღმდეგაც. იმერეთის მდგომარეობა მეტად გართულებულია. დაშლის პროცესი თანდათან ღრმავდება. „თუ პოლიტიკურ კრიზისის მე-13 საუკუნის საქართველოში მონღოლთა შემოსევამ მოუსწრო, საქართველოს პოლიტიკურ დაშლილობას (მე-15 საუკუნის დასასრულს) დაემთხვა ოსმალეთის სამხედრო-ფეოდალური ახელმწიფოს გაძლიერება და სეფიანთა სახელმწიფოს წარმოქმნა (მე-16 საუკუნის დამდეგს). ასე რომ, ფაქტიურად მე-16 საუკუნეში შეიკრა საქართველოს მტრული სახელმწიფოებით გარემოცვის რკალი“.¹

ყველაზე საშიში მტერი დასავლეთი საქართველოსათვის ოსმალეთი იყო. მას შემდეგ, რაც 1453 წელს ოსმალებმა კონსტანტინეპოლი აიღეს და ბიზანტიის იმპერია საბოლოოდ გაანადგურეს, ხოლო 1461 წელს ტრაპიზონის სახელმწიფოც დაიპყრეს, საქართველოს საზღვრებს უშუალოდ მოადგნენ. „ოსმალეთის სამხედრო-ფეოდალური სახელმწიფოს თანდათანმა გაძლიერებამ და საქართველოს მეზობლად ქრისტიანული სახელმწიფოების გაქრობამ (ბი-

¹ ვ. გაბაშვილი, ქართული ფეოდალური წყობილება, მე-16—17 სს. თბ., 1958, გვ. 61—62.

ზანტიისა და ტრაპიზონის საეპისკოპოსოები) უდიდესი საფრთხე დასავლეთ და სამხრეთ-დასავლეთ საქართველოს შეუქმნა“.¹

1475 წელს ყირიმის დაპყრობის შემდეგ შავი ზღვა ფაქტიურად „ოსმალეთის ტბად“ გადაიქცა. მათმა გაბატონებამ მცირე აზიასა და შავ ზღვაზე უარყოფითი გავლენა მოახდინა საქართველოს ეკონომიურ და პოლიტიკურ მდგომარეობაზე.²

პირველად ოსმალეთმა სამცხე-საათაბაგოზე გაავრცელა თავისი გავლენა, შემდეგ იმერეთის სამეფოს სამი მიმართულებით შემოუტია: 1. ჩრდილო დასავლეთიდან ჭიქეთ-აფხაზეთის გზით, 2. ზღვისპირეთიდან გონიის გზით და 3. სამცხე-საათაბაგოს მხრიდან ზეკარის გზით.³

ამათგან განსაკუთრებული სტრატეგიული მნიშვნელობა ჰქონდა ოსმალთათვის სამცხე-საათაბაგოს, ვინაიდან აქედან ოსმალეთს შეეძლო შეტევა დაეწყო, ერთი მხრივ, დასავლეთ საქართველოზე, ხოლო მეორე მხრივ, ქართლ-კახეთის სამეფოების წინააღმდეგაც. ამავდროს სამცხე-საათაბაგოს დაპყრობით ოსმალეთს გზა ეხსნებოდა აღმოსავლეთ ამიერკავკასიისაკენ, აქედან კი ჩრდილოეთ კავკასიაშიც შეეძლო გაჭრილიყო.

სწორედ სამცხე-საათაბაგოდან, ზეკარის გზით მოხდა თურქთა პირველი შემოსევა დასავლეთ საქართველოში. ამ დაუპატიჟებელი სტუმრის მეგზური სამცხის ათაბაგი მზეჭაბუკი იყო.

1510 წ. ოსმალთა ჯარი ტახტის მემკვიდრე სელიმის მეთაურობით, რომელიც ამ დროს ტრაპიზონის ფაშად იჯდა, მოულოდნელად დაეცა ქუთაისს. ქვეყანა ამას მოუშვადებელი შეხვდა. მოსახლეობამ დახიზვნა ძლივს მოასწრო. ოსმალეებმა აიღეს და ააოხრეს ქალაქები, დაარბიეს სოფლები, დაწვეს ეკლესიები, იმერეთი საომრად ემზადებოდა, მაგრამ მტერი როგორც მოულოდნელად შემოიჭრა, ასევე მოულოდნელად გაბრუნდა უკან, ვინაიდან ზამთარი ახლოვდებოდა, შესაძლებელი იყო ზეკარის უღელტეხილი ჩაკეტილიყო და ოსმალთა ჯარი დიდ განსაცდელში ჩაეარდებოდა.

წყაროებში თურქთა შემოსევა სხვადასხვანაირადაა დათარიღებული: 1508, 1509, 1510, 1512, 1513, 1514 წლებით.⁴

¹ ვ. გაბაშვილი, მე-16—17 სს. საქართველოს ქალაქები მახლობელი აღმოსავლეთის სავაჭრო ურთიერთობათა შუქზე. ნარკვევები მახლობელი აღმოსავლეთის ქალაქების ისტორიიდან, თბ., 1966, გვ. 169.

² ივ. ჯავახიშვილი, ქართველი ერის ისტორია, წ. 4, 1967, გვ. 179—180.

³ საქართველოს ისტორია, ს. ჯანაშიას რედაქციით, თბ., 1946, გვ. 314.

⁴ თ. ეორდანიას, ქრონიკები, II, გვ. 326—327, ქართლის ცხოვრება, II, 1959, გვ. 350.

ვახუშტი ბატონიშვილი გვამცნობს, რომ „ამავე ქორონიკონს (1509 წ.) მოუსდენ ჩიხნი იმერეთის და შოარბიეს სრულად: ესე ესმა აღექსანდრეს ქართლს მყოფს, უკუმოიქცა და მოვიდა იმერეთს მოწყვეტად მათდა“¹.

პიოველად მარი ბროსემ სცადა გაერკვია „ჩიხთა“ ვინაობა და გამოთქვა მოსაზრება, რომ „ჩიხნი“ უნდა ნიშნავდეს „ჯიქნის“. მაგრამ ჯერ თ. ჟორდანიამ, შემდეგ ი. ჯავახიშვილმა ასეთი ვარაუდი არასწორად მიიხსნეს. თ. ჟორდანიას აზრით, „ჩიხნი უნდა იყვნენ თათარნი (თურქნი) და არა ჯიქნი, როგორც ჰგონებოდა ბროსეს“².

ჯავახიშვილი იხილავს ვახუშტის მონაცემებს: „ვახუშტი ბატონიშვილს მტრის ორი შემოსევა აქვს აღნიშნული — ერთი 1509 წელს. რომელმაც აღექსანდრე მეფე აიძულა ქართლიდან წასულიყო და მეორე 1512 წელს, როდესაც სამეფო ტახტზე ბაგრატ III იჯდა. პირველ შემოსევთ ვახუშტი ჩიხებად თვლის და მეორედ შემოსევთ ოსმალებად. ფაქტიურად მტრის ერთი შემოსევა მოხდა... თუ ყველა წყაროების ცნობას ჩავუყვირდებით, ადვილად შევამჩნევთ. რომ თარღლებისა და თავდამსხმელთა ვინაობის განსხვავებისა მიუხედავად: ყველანი ერთ ამბავს მოგვითხრობენ და ნამდვილ თარიღად 1509 ან 1510 წელი უნდა ყოფილიყო“³.

უკანასკნელ ხანს მ. სვანიძემ გამოთქვა მოსაზრება, რომ „ჩიხნი“ შეიძლება რომელიმე თურქული ტომის სახელი იყოს. ველია ჩელების გადმოცემით მე-17 საუკუნის 40-იან წლებში ტრაპიზონის საფაშოში 60 ტომი იყო⁴ და აქედან გამომდინარე, შესაძლებელია ერთ-ერთ თურქულ ტომს დამახინჯებული სახელი „ჩიხნი“ წოდებოდა. მ. სვანიძის მიხედვით, სელიმის ლაშქრობაში ალბათ მონაწილეობას იღებდა ტრაპიზონის საფაშოში მცხოვრები რომელიმე თურქული ტომი და ეს სახელწოდებაც „ჩიხნი“ მათი დამახინჯებული სახელია.⁵

ა. აბდლაძის გამოკვლევით, სომხურ წყაროებში ოსმალთა აღმნიშვნელად გვსვდება სიტყვა „ჩითახი“; ამდენად ვახუშტის „ჩიხნი“ „ჩითახნი“-დან უნდა მომდინარეობდეს. სიტყვა „ჩითახი“ თურქულ დიალექტებში ნიშნავს მოუხეშავს, არამზადას, თავზეხელაღებულს, ჩხუბისთავს. სიტყვა „ჩითახი“ დასავლეთ საქართვე-

¹ ვახუშტი, გვ. 807.

² თ. ჟორდანიას, ქრონიკები, II, გვ. 326.

³ ივ. ჯავახიშვილი, დასახ. ნაშრომი, გვ. 212.

⁴ ს. ჯიქია, ევლია ჩელები ლაზებისა და ლაზეთის შესახებ, „იბერიულ-კავკასიური ენათმეცნიერება“, ტ. 6, 1954, გვ. 243 — 256.

⁵ მ. სვანიძე, საქართველო-ოსმალეთის ურთიერთობის ისტორიიდან (მე-16—17 სს.), თბ., 1971, გვ. 42.

ლოს დიალექტებში ნიშნავს ცუდი გარეგნობის, ანტიპათიურ კოქლს¹.

ვახუშტის ცნობისაგან განსხვავებით, ახალი ქართლის ცხოვრების III ტექსტს ეს ამბები შემდეგნაირად აქვს გადმოცემული. „ამავე წელსა (1510 წ.) იქმნა ბრძოლა ძლიერი ქართლის მეფეს დავითსა და ბაგრატს შუა. ამისთვის ბევრის ტყუევნისა და რბევისაგან ძალი ქართლისა შემცირებულ იყო: აღელო და დეჟირა გორი აღექსანდრეს, მამასა ბაგრატიასა. ამას ზედა მოეხმარნენ ქართლის მეფეს დავითს კახეთის მეფე ვახტანგ და ათაბაგი მზექაბუჯ. დავით მეფე ველარ მოესწრო, მოხისს შეეგება ბაგრატ ვახტანგსა და მზექაბუჯს და გემაჩუა თუესა ივნისს გ“.

ქართლის ცხოვრების III ტექსტის მოტანილი ადგილის ზოგი ცნობა ჩვენს დაქვევებს იწვევს. ამ დროს ვახტანგ მეფე საქართველოს არც ერთ სამეფო-სამთავროში არა ჩანს, ხოლო იმავე წელს, რა წელსაც თათრებმა იმერეთის სამეფო ააოხრეს (და ეს წელი ბაგრატის გამეფების წელიცაა), ბაგრატ მეფეს არ შეეძლო ქართლის დასაპყრობად წამოსულიყო. გარდა ამისა, სხვა კინკლოსებში მხოლოდ ძმებს შორის მომხდარ ბრძოლაზეა ლაპარაკი: „პატრონი ვახტანგ და მეფე ბაგრატ მოხისს შეიბნეს და ბაგრატს გაემარჯვა“ (1513 წ.). ყველა კინკლოსი მხოლოდ ძმებს შორის მომხდარ ბრძოლას აღნიშნავს და ამავე დროს 1513 წელს მიუთითებს, რაც უფრო მისაღები უნდა იყოს.

*

დაძაბული საშინაო მდგომარეობის განმუხტვის შემდეგ, ბაგრატ მეფე აქტიურ საგარეო პოლიტიკაზე გადადის. ამის შესახებ საინტერესო ცნობები მოიპოვება იტალიელი დიპლომატების ნაშრომებში — კატერინო ძენოს „მოგზაურობის კომენტარებში“, ჯოვან მარია ანჯოლელოს „უზუნ-ჰასანის ცხოვრებისა და მოღვაწეობის მოკლე მოთხრობაში“ და სპარსეთში ნამყოფი ანონიმი ვენეციელის „ვაჭრის მოგზაურობაში“².

მათი ცნობების მიხედვით 1514 წელს ოსმალეთ-სპარსეთს შორის ომის მსვლელობის დროს ქართველებიც ჩაბმულან ამ ომში ოსმალეთის წინააღმდეგ, მაგრამ უფრო მეტად პარტიზანული თავ-

¹ ა. აბდალაძე, „ჩიხთა“ ვინაობისათვის. მაცნე. № 1 1977 წ., გვ. 73-75.

² ე. მამისთვალისვილი, იტალიელ მოგზაურთა ცნობებ შინაუკუნის დასაწყისის ირან-საქართველოს ურთიერთობის შესახებ, იხ. კოლონო ქვეყნებში ისტორიის პრობლემები, თბ., 1975, გვ. 147.

დასხმებით აწარმოებდნენ ბრძოლას, ვიდრე გაშლილი ფრონტიო. ამის შესახებ ცნობებს გეაწვდის კატერინო ძენო თავის „მოგზაურობის კომენტარებში“.

1514 წელს ომის დასაწყისშივე დიდ წარმატებას მიაღწიეს ოსმალებმა. მათ გაანადგურეს სპარსეთის ჯარი და სატახტო ქალაქი თავრიზი დაიკავეს, მაგრამ სელიმ I (1512—1520 წწ.) ორი მიზეზით დიდხანს არ გაჩერებულა თავრიზში: 1) სურსათის ნაკლებობის გამო და 2) იმის შიშით, რომ სპარსეთის შაჰინ-შაჰი ისმაილ I (1502—1524 წწ.) ძალებს მოიკრებდა და ბრძოლას გააჩაღებდა. ამიტომ სელიმ I იძულებული გახდა უკან დაეხია. მან თავისი ჯარი ამასიისაკენ წაიყვანა. სწორედ ამ უკან დახევის დროს ქართველმა მხედრობამ მრავალჯნის შებრძოლებით დიდი ზიანი მიაყენა ოსმალებს. მოუესმინოთ თვით კატერინო ძენოს. „თურქები თავრიზში სამ დღეს დარჩნენ და დაინახეს, რომ მეზობელი მთავრები არ მოდიოდნენ მორჩილების გამოსახატავად. სელიმმა იფიქრა, რომ ისმაილო უფრო ძლიერი იყო, ვიდრე ის ვარაუდობდა, რადგან სპარსეთის დიდებულები თავიანთი შეიარაღებული ძალებით უერთდებოდნენ ისმაილს სამეფოს დასაცავად, ამიტომ სელიმმა თავრიზიდან წამოიყვანა ხელოვნებაში განსწავლული რამდენიმე კაცი, წამოიღო ხუთასი საპალნე განძი და ისე, რომ არავითარი ზიანი არ მიუყენებია ქალაქისათვის, გაემართა ეფფრატისაკენ. გზაში იგი ხვდებოდა დაბრკოლებას ქართველების მხრივ, რომლებიც მსუბუქი რაზმებით ძარცვავდნენ არმიის ალაღს და ნაკუწ-ნაკუწ აქევედნენ ყველას, ვინც შეეცდებოდა რიგების მიტოვებას მცირე მანძილითაც კი. მათი თავდასხმები იმდენად ხშირი იყო, რომ აკინჯები, რომლებიც შეჩვეულნი იყვნენ 40—50 მილის გავლას, ვერ ბედავდნენ გაქევევას, ლაშქრისაგან მცირეოდნად მოშორებას, რადგან გამძვინვარებული მტერი (ქართველები) უმოწყალოდ ხოცავდა მათ. მათ მხოლოდ ხმალი კი არ ხოცავდა, არამედ შიშშილიც, რადგან ისინი არახელსაყრელი პირობების გამო ლაშქრის მომარაგებას პროდუქტებით ვერ ახერხებდნენ, თანახმა იყვნენ ერთი საშინელი სიკვდილის ნაცვლად მეორე უფრო საშინელი სიკვდილით დახოცილიყვნენ“¹.

ჰანიბალ მალიპიერო ნიქოზიიდან ვენეციაში გაგზავნილ წერილში აღნიშნავს, რომ „როცა სულთანმა თავრიზი დატო-

¹ ე. მაჰისთვალისვილი, დასახ. ნაშრ. გვ. 156.

ვა და ამასიისაკენ გაეშურა, მიაღვა მღ. ევფრატს. მისი ჯარის ორი მესამედი უკვე გადასული იყო მდინარის მეორე ნაპირზე, ამ დროს ზურგიდან თავს დაესხნენ ქართველები, რომლებმაც ამოწყვიტეს 15 ათასამდე კაცი და ხელთ იგდეს 11 ქვემეხი.¹

თავრიზიდან წამოსულ ოსმალებს რომ დიდი ზიანი მიაყენეს ქართველებმა, ამას ჯოვანი მარია ანჯოლელოც აღნიშნავს.²

XVII საუკუნის ინგლისელ ისტორიკოსს ნოოლზის ასეთი ცნობა აქვს დართული ძენოს „მოგზაურობის კომენტარებზე“. „მიუხედავად იმ სისწრაფისა, რაც სელიმმა გამოიჩინა, ქართველი ცხენოსნების გამოჩენამ ისეთი შიში და არეულობა გამოიწვია მდინარე ევფრატის მთელ იქითა მხარეს, რომ 2 ათასი თურქი, რომლებიც სასწრაფოდ ლაშობდნენ მდინარეში გასვლას, დაიხრჩენენ. მყვინთავებმა დააგროვეს ტალახში ჩაფლული ნარჩენები და მდინარის მიერ წამოღებული მათი დიდძალი ავლა-დიდება. ნადავლით კმაყოფილმა ქართველებმა თურქებს შორს აღარ გასდიეს“³.

როგორც ზემოთ აღნიშნულიდან ჩანს, ქართველებს დიდი სიმაძაყე და გამძლეობა გამოუჩენიათ და დიდი ზარალიც მიუყენებიათ ოსმალებისათვის, მაგრამ ვინ არიან ეს ქართველები და რომელი სამეფო-სამთავროს წარმომადგენელი, ამის შესახებ უცხოური და ქართული წყაროები არაფერს ამბობენ. ე. მ ა მ ი ს თ ვ ა ლ ი შ ვ ი ლ ი ს ვარაუდით ეს ქართველები უნდა იყვნენ ქართლისა და კახეთის სამეფოების წარმომადგენელი⁴. მაგრამ ქართლი ამ დროისათვის მეტად დასუსტებულია, ამას ქართლის ცხოვრებაც ადასტურებს: „ბევრის ტყუევნისა დარბევისაგან ძალი ქართლისა შემცირებული იყო“⁵.

როდესაც იმერთა მეფემ ალექსანდრე ბავრატის ძემ (1484—1510 წწ.) 1510 წელს გორი დაიპყრო, დავით ქართლის მეფემ მის წინააღმდეგ არც კი გაილაშქრა. ასევე, როდესაც კახეთის მეფე ავ-გიორგი (1511—1513 წწ.) ქართლის სანახებს არბევდა, დავით მეფე (1505—1525 წწ.) მის წინააღმდეგ ზომებს არ იღებდა. დავითი „იყო ლმობიერი, ბრძოლა-შლილობითა და შფოთთა მოძულე და მოყვარე მშვიდობისა“⁶. მეფე იტყოდა, რომ „მიეგებათ მეშფოთეთა მისაგებელიო“. ასეთ მეფეს არ შეეძლო ჯარი შეეკრი-

¹ ე. მ ა მ ი ს თ ვ ა ლ ი შ ვ ი ლ ი, დასახ. ნაშრ. გვ. 156.

² ი ქ ვ ე.

³ ი ქ ვ ე, გვ. 157.

⁴ ი ქ ვ ე.

⁵ ქართლის ცხოვრება, II, 1959, გვ. 487.

⁶ ე ა ხ უ შ ტ ი, გვ. 809.

ბა და ოსმალეთის არმიის წინააღმდეგ ებრძოლა, ისიც სხვის ტერიტორიაზე. რაც შეეხება კახეთის სამეფოს, ამ დროისათვის იგი როგორც ცალკე ერთეული არ არსებობს. ავ-გიორგის ტყვედ ჩაგდებისთანავე კახეთი ქართლის სამეფოს შეუერთდა და ამდენად მან 1520 წლამდე დამოუკიდებლობა დაკარგა.

ამიტომ ქართლისა და კახეთის სამეფოების ჯარს არ შეეძლო ამ დროს ოსმალეთის არმიის წინააღმდეგ ბრძოლა.

რაც შეეხება სამცხე-საათაბაგოს, იგი ოსმალეთზე დაყრდნობით ფიქრობდა ჯერ სრული დამოუკიდებლობის მოპოვებას და შემდეგ საქართველოს სამეფო-სამთავროების ხარჯზე თავისი ტერიტორიის გაზრდას. გარდა ამისა, ცნობილია, რომ მზეკაბუჯი მეგობრულ კავშირში იმყოფებოდა სელიმ I-თან.

როგორც ცნობილია, XVI საუკუნის დასაწყისში საქართველოში ენერგიულ პოლიტიკას ჯერ იმერთა მეფე ალექსანდრე და შემდეგ მისი შვილი ბაგრატ III ატარებდნენ, ამასთან ერთად ისიც უნდა გავითვალისწინოთ, რომ 1510 წელს სწორედ სელიმ I შემოიჭრა პირველად იმერეთის სამეფოში და რაც მოიხელთა, ყველაფერი გაანადგურა.

ზემოთ აღნიშნულის შემდეგ სავარაუდებელია, რომ 1514 წელს ოსმალეთის ჯარის წინააღმდეგ შურისძიების მიზნით იბრძოდა იმერეთის სამეფოს ჯარი (სავარაუდებელია ოდიშისა და გურიის სამთავროების ჯართან ერთად), რომელმაც დიდი ზარალი მიაყენეს ოსმალეთის ჯარს.

როგორც კი ოსმალებმა თავრიზი დატოვეს, შაჰ-ისმაილმა მაშინვე დაიკავა სატახტო ქალაქი და ძალების ენერგიულად შეგროვებას შეუდგა, მაგრამ ყიზილბაშებს სხვა ძალის გარეშე არ ქონდათ ამ ომში წარმატების იმედი, ამიტომ მათ ანტიოსმალური კოალიციის შექმნა სცადეს და მიზანსაც მიაღწიეს. იმავე 1514 წელს შექმნილ კოალიციაში საქართველოც მონაწილეობდა.

შაჰ-ისმაილის ელჩებმა ადვილად მიაღწიეს წარმატებას, რადგან ყველა კარგად გრძნობდა, რომ თურქეთი თავის მეზობლებს შთანთქმას უპირებდა და თუ არა ერთიანი ძალით, ცალ-ცალკე ვერ დაამარცხებდნენ. სპარსეთის ელჩები ირწმუნებოდნენ, რომ თუ კი ოსმალეთი სპარსეთს დაიპყრობდა, შემდეგ საქართველოსა და ეგვიპტესაც მიისაკუთრებდა. ამიტომ მოკავშირეებმა (სპარსეთი, საქართველო და ეგვიპტე) ხელშეკრულება გააფორმეს, რომ ცალ-ცალკე არავითარ კავშირს არ დაამყარებდნენ ოსმალეთთან და პირიქით, თუ ერთ რომელიმე მათგანს დაესხმოდა ოსმალეთი თავს, ყველა მოკავშირე გაერთიანებული ძალებით გამოვიდოდა მის წი-

ნააღმდეგ; მაგრამ ამ კოალიციას არავითარი შედეგი არ მოჰყოლია, რადგან ეგვიპტის სულთანმა ხელშეკრულება დაარღვია და ოსმალეთის ელჩები მიიღო. ამის შემდეგ განაწყენებულმა სპარსეთმა 1516 წელს, როდესაც ოსმალეთი თავს დაესხა ეგვიპტეს, მის დახმარებაზე უარი განაცხადა. ამრიგად, ეს მეორე კოალიციაც ჩაიშალა და თურქეთს საშუალება მიეცა ცალ-ცალკე ეწარმოებინა ბრძოლები მეზობლების წინააღმდეგ.



თავის მხრივ იმერეთის სამეფო კარიც ერევა ქართლის ტახტისათვის გამართულ შინაღინასტიურ ბრძოლაში და ამით თავისთვის პოლიტიკური სარგებლობის მოპოვებას ცდილობს. 1525 წ. ქართლის მეფე დავითმა, მიუხედავად თავისი მოღვაწეობის უკანასკნელ ხანს მოპოვებული წარმატებებისა, მეფობას თავი მიანება და ბერად შედგა. გამოთქმულია მოსაზრება, რომ ეს არც თუ ისე ნებაყოფლობითი აქტი უნდა ყოფილიყო, რომ იგი აიძულეს მეფობიდან გადამდგარიყო.¹ მის შემდეგ მეფედ ჩანს არა მისი უშუალო მემკვიდრე ლუარსაბი, რომელიც ამ დროს უკვე სრულწლოვანი იყო და თელეთის ბრძოლაში ქართველთა ცხენოსან ჯარსაც კი ხელმძღვანელობდა, არამედ დავითის ძმა გიორგი. გიორგის შესახებ ცნობები ერთობ მცირეა დაცული წყაროებში. მისი ქართლის მეფედ ყოფნის ხანგრძლივობაც არ იყო ბოლო დრომდე დაზუსტებული. ამჟამად გამოთქმულია მოსაზრება, რომ მას მხოლოდ 2 წელი უმეფია და 1527 წლიდან ქართლის მეფე უკვე ლუარსაბია. გიორგის მეფობის ეს მცირე ხანა შინაპოლიტიკური დაძაბულობით უნდა ხასიათდებოდეს. მის მიერ ხელისუფლების უზურპაციას ლუარსაბი ვერ ეგუება და უნდა ვიფიქროთ, რომ იგი ცდილობს ძალების შეგროვებას თავისი ბიძის წინააღმდეგ. სწორედ ამ პოლიტიკურ მიზანს ემსახურებოდა მისი ქორწინება იმერეთის მეფის ასულ თამარზე. უფრო მეტიც. წყაროები დაყენებით მიუთითებენ, რომ „ქორონიკონსა სიდ (1526 წ.) მისცეს ბაგრატს ქართლი, მეფესა იმერეთისასა, არადეთს წყალს გამოლმა: ალი, სურამი და ახალდაბა“.² ეს იყო ალბათ საზღაური იმ დახმარებისათვის, რასაც იმერეთის მეფე აღმოუჩენდა ლუარსაბს ტახტის დაბ-

¹ გ. ოდიშელი, დასახ. ნაშრ. გვ. 86—87.

² ქართლის ცხოვრება, II, თბ., 1959, გვ. 493, შეად. თ. ჟორდანიია, ქრონიკები, II, გვ. 369, პარიზის ქრონიკა, გვ. 7.

რუნებისათვის ბრძოლაში.¹ მართლაც, 1527 წლიდან ლუარსაბი უკვე მეფედ ჩანს, ხოლო გიორგი IX მალე ბერად აღიკვეცება. ამის შემდეგაც ბაგრატი ხელს უწყობდა ლუარსაბს ხელისუფლების განმტკიცების საქმეში.

ეს კიდევ აისახა ქართულ წყაროებში. „და მეფობდა ლუარსაბ ძალითა და შეწევნითა ბაგრატიისათა“.²

დასავლეთ საქართველოში თურქთა პირველი გამოჩენის შემდეგ ოსმალეთის სულთნები სელიმ I (1512 — 1520 წწ.) და მისი შემკვიდრე სულეიმან I (1520 — 1566 წწ.) ევროპაში ომის წარმოებით იყვნენ დაკავებულნი.

იმერეთის სამეფო კარს ოსმალთა მოუცლევლობის გამო საშუალება ეძლეოდა აქტიურ საგარეო პოლიტიკაზე გადასულიყო და სამეფო საზღვრები მტკიცედ ჩაეკეტა. სწორედ ამას ითვალისწინებდა ბაგრატის თაოსნობით ლაშქრობა ჭიქეთზე და შემდეგ სამცხეზე.

იმერთა მეფე კარგად ხედავდა, რომ თურქები მის ქვეყანას სამი მხრიდან უტევდნენ: სამხრეთ-დასავლეთიდან — ზღვისპირეთით გონიის გზით, ჩრდილო-დასავლეთიდან — ჭიქეთ-აფხაზეთის გზით და სამხრეთიდან — სამცხე-საათაბაგოს გზით.

თურქთა შემოსევისაგან რომ ქვეყანა ეხსნა, ამისათვის საჭირო იყო სამივე გზის ჩაკეტვა. ამის განსახორციელებლად უპირველეს ყოვლისა ბაგრატი მეფემ ყურადღება მიაპყრო ჩრდილო-დასავლეთ საზღვარს. ჭიქნი, რომელნიც ადრევე მოექცნენ თურქეთის გავლენაში, თავს ესხმოდნენ გურია-ოდიშ-აფხაზეთის ზღვის სანაპირო ზოლს და აოხრებდნენ. ბაგრატის თაოსნობით გადაწყდა ლაშქრობა მათ დასასჯელად და ჩრდილო-დასავლეთის მხრიდან გზის ჩასაკეტად.

1533 წლის იანვარში მამია გურიელი და მამია დადიანი გაემართნენ სალაშქროდ. პირველი ბრძოლა მოხდა გაგრასთან 30 იანვარს. ამ ბრძოლაში ჭიქები დამარცხდნენ, მაგრამ მეორე დღეს, 31 იანვარს, ლალატის შედეგად დადიანისა და გურიელის ჯარი სასტიკად დამარცხდა. თვით დადიანი ამ ბრძოლაში დაიღუპა, ხოლო

¹ ნარკვევები საქართველოს ისტორიიდან, 4, გვ. 102.

² ქართლის ცხოვრება, II, თბ., 1959, გვ. 493.

გურიელი თავისი სამი ძმით, ეპისკოპოსით და ჯარით ტყვედ ჩა-
ვარდა.¹

ამის შემდეგ ბაგრატ მეფემ მთელი ყურადღება სამხრეთისაკენ
გადაიტანა. თურქთა შემოსევის მთავარი საფრთხე მაინც სამცხე-
საათაბაგოს მხრიდან იყო. ამიტომ ბაგრატმა იმერეთის სამეფოს
დაცვის ხაზი სამცხე-საათაბაგოში გადაიტანა.

სამცხის ათაბაგებს „დამოუკიდებლობა“ რომ შეენარჩუნები-
ნათ, ირანსა და ოსმალეთს იწვევდნენ ქართველ მეფე-მთავართა წი-
ნააღმდეგ საბრძოლველად. აგრესორები კი კმაყოფილნი იყვნენ
ასეთი „მოწვევით“, ვინაიდან სამცხე-საათაბაგო საუკეთესო პლაც-
დარმს წარმოადგენდა საქართველოს დასაპყრობად. ამას კარგად
ხედავდნენ იმერეთისა და ქართლის სამეფო კარის მესვეურნი. ამი-
ტომ ორივე მეფე ცდილობდა სამხრეთის კარების გამაგრებას, რო-
მელიც ათაბაგთა წინდაუხედავი პოლიტიკის გამო მორღვეული
იყო.

ბაგრატ მეფეს მარტო თავისი ძალებით სამცხე-საათაბაგოს დაპ-
ყრობა არ შეეძლო. მას უნდა დაეყოლიებინა გურიელი და დადიანი
სამცხეზე სალაშქროდ. გურიელი უკმაყოფილო იყო სამცხის
მთავრებზე და თავის მხრივ ემზადებოდა სამცხეზე გასალაშქრებ-
ლად, რათა დაებრუნებინა უკან აჭარა და ჭანეთი, რომლებიც მზე-
ჭაბუქმა ოსმალების დახმარებით წაართვა.

გურიელი თანხმობით შეხვდა სამცხეზე გალაშქრების მოწო-
დებას, რადგან ბაგრატ მეფე გამარჯვების შემთხვევაში აჭარისა და
ჭანეთის გადაცემას დაპირდა, ხოლო დადიანი, როგორც ვახუშტი
გაღმომცემს, „მისისათვის მოერთო იგიცა ბაგრატს“.

გაერთიანებული ძალებით ბაგრატ მეფე თავს დაესხა სამცხე-
საათაბაგოს. ბრძოლა მოხდა 1535 წელს 12 აგვისტოს მურჯახეთ-
თან.

მურჯახეთის ბრძოლა დამთავრდა ბაგრატ მეფის სრული გა-
მარჯვებით. თვით ყვარყვარე ათაბაგი ტყვედ ჩაიგდო ხელში. სამ-
ცხე-საათაბაგოს სამთავრომ დამოუკიდებლობა დაკარგა და იმერე-
თის სამეფოს შეუერთდა 10 წლით, ვიდრე 1545 წლამდე.²

¹ ვახუშტი, გვ. 811.

ქართლის ცხოვრება, II, 1959, გვ. 497; შეადარე, ჰარიზის ქრონიკა (ცხოვ-
რება საქართველოსა), მ. ბროსეს გამოცემა. პარიზი, 1831, ქართული ტექსტი,
გვ. 6—7.

ქ. ოდიშელი, მცირე ქრონიკები, თბ., 1968, გვ. 55, იხ. იქვე შენიშვნა 54;

² ახალი ქართლის ცხოვრება, III ტექსტი, ქართლის ცხოვრება, II, 1959,
გვ. 498.

გურიელმა დაპირებისამებრ აპარა და ჰანეთი მიიღო. მოვლენების ასეთი განვითარებით დადიანი უკმაყოფილო იყო, ვინაიდან არც იმერეთის მეფის და არც გურიელის გაძლიერება მას არ სურდა. ამაში მან თავისთვის საფრთხე დაინახა და განდგომა გადაწყვიტა. მან ეს მაშინ გამოამჟღავნა, როცა სამცხეში ოსმალთა ჯარი შემოიჭრა და მეფეს ლაშქრით მიშველებაზე უარი უთხრა.

სამცხე-საათაბაგოს ფეოდალების ერთი ნაწილი უკმაყოფილო იყო იმერეთის მეფის გამგებლობაში მათი სამფლობელოების მოქცევით და მომხდარ ფაქტს ვერ ურიგდებოდნენ; ისინი ოთარ შალიკაშვილის მეთაურობით, ოსმალეთში გადაიხვეწნენ, ყვარყვარე III-ის ვაჟიშვილი ქაიხოსრო სულთანს წარუდგინეს და დახმარება სთხოვეს იმერეთის მეფის წინააღმდეგ.

სამცხის რენეგატი თავადები, ოთარ შალიკაშვილი და ქაიხოსროს გაათაბაგების სხვა თავდადებული მომხრეები უნდა მიმხვდარიყვნენ, რომ ოსმალეების შემოსვლით ისინი თავის მიზანს ვერ მიღწევდნენ, რომ ამ შემთხვევაში ქვეყანას და მათ სამფლობელოებს უარესი ბედი ელოდა — გაოსმალება, ამიტომ სხვა გზისთვის უნდა მიემართათ.

აკად ი. ჯავახიშვილი თვლის, რომ ქაიხოსროს შაქში ხლება შაჰ-თამაზთან საქართველოში მისი პირველი ლაშქრობის წინ უნდა მომხდარიყო¹.

თუ აქ ფარსადან გორგიჯანიძის მხრივ უფრო ადრეული და გვიანდელი ფაქტების ერთმანეთში აღრევას არ აქვს ადგილი, მაშინ გამოდის, რომ შაჰ-თამაზს ქაიხოსროს მოწოდებით 1541 წლის წინა წლებში იმერეთი დაულაშქრავს და იმერეთის მეფე იძულებული გაუხდია მას დამორჩილებოდა. განსხვავებულად აქვს ეს ვითარება წარმოდგენილი ბერი ეგნატაშვილს. მისი მტკიცებით იმერეთში შაჰ-თამაზის ლაშქრობას არა ჰქონია ადგილი. პირიქით, ქართლში შაჰ-თამაზის პირველი ლაშქრობის შემდეგ, როდესაც „წარვიდა შაჰ-თამაზ ნახჩუანს სომხითისასა და ურჩინი სომხითისანი დაიმორჩილნა“... მაშინ „მპყრობელი იმერეთისა ბაგრატ იყო... სამცხესა მოვიდა მასთან ამა მიზეზისათვის, რომე ოთარი შალიკაშვილი და ძე ყუარყუარესი ქაიხოსრო რომ ხონთქართანა წასულიყუნენ და ამათგან ძალი და ზურგი მოეცათ, ესეცა ბაგრატ ამისთვის მოვიდა შაჰ-თამაზთანა, რომე ამისგან ზურგი და ძალი მოეცა“².

¹ ი. ჯავახიშვილი, ქართველი ერის ისტორია, 4, გვ. 247.

² ქართლის ცხოვრება, II, გვ. 357.

გამოდის, რომ იმერეთში შაჰ-თამაზის ლაშქრობის შემდეგ ბაგრატი როდი დამორჩილებია ირანის მბრძანებელს, არამედ პირიქით, თვითონ მიუძმარათავს მისთვის დახმარების თხოვნით. მაშინდელი ვითარების გათვალისწინებით ეს უფრო რეალური ჩანს. ბ: ეგნატაშვილი აგრძელებს: „თუ უცალო იყო შაჰ-თამაზ და ჯარი ვერ აშველა, მისცა ნიჭი დიდი და გაისტუმრა და თუთ წარვიდა ქუეით“.¹

იგივე ამბები უფრო ვრცლად გადმოცემული აქვს ასალა ქ. ცხის III ტექსტის ავტორს: „და ჟამსა ამას ბაგრატი მპყრობელი იმერეთისა იყო სამცხეს, და ვითარცა ესმა დაპყრობა სომხეთისა, წარმოემართა და მოვიდა შაჰ-თამაზთანა მიზეზითა ამით, რა ჟამს გაემარჯუა ბაგრატი ყუარყუარე ათაბაგსა ზედა, და დაიპყრა ბაგრატი საათაბაგო. მაშინ ოტებულ იქმნა ოთარ შალიკაშვილი, ივლტოდა იგი, და თანა-წარიყვანა ძე ათაბაგის ყუარყუარესი ქაიხოსრო. მივიდეს სტამბოლს და მოაჯე ექმნნეს ხვანთქარს. და შეიწყალა ხვანთქარმან, და მისცა ჯარი მრავალი, და თოფი, და ზარბაზნები დიდ-დიდნი, და უჩინა ამირსპასალარად მუსტაფა ფაშა, და წარმოგზავნა იგინი ბრძოლად ბაგრატისა“². ხონთქარის მიერ ჯარის გამოგზავნა მუსტაფა ფაშის სარდლობით ბერი ეგნატაშვილს მოთხრობილა აქვს შაჰ-თამაზთან ბაგრატის მისვლის შემდეგ. ეს უფრო სწორი

უნდა იყოს. ქ ცხის შევსებული, გადაკეთებული გაგრძელების ავტორმა, ეტყობა, რედაქციული ცვლილება შეიტანა ბერი ეგნატაშვილის გამოცემაში და ამით მოვლენების თანმიმდევრობა აურია, სამაგიეროდ მას ჰქონია დამატებითი მასალა (შეიძლება ზეპირსიტყვიერი გადმოცემა) შაჰ-თამაზთან ბაგრატის მისვლისა და მოლაპარაკების შესახებ, რომელიც საინტერესო ცნობებით ავსებს ჩვენს ცოდნას ბაგრატი-შაჰ-თამაზის ურთიერთობის შესახებ: „ხოლო ესმა რა ამბავი ესე ბაგრატს, მპყრობელსა იმერეთისასა, ამისთვის წარვიდა შაჰ-თამაზთანა, და არეინ წარიყვანა კაცნი უქალარონი, არამედ აარჩინა კაცნი ჰალარანი, და წარიყვანა დიდებულნი და მცირენი, მოხუცებულნი, ჰკუისმყოფელნი, ჰალარანი, კაცნი მსგავსნივე მისნი.“

ხოლო იყო შაჰ-თამაზ აიდარბეგს. და მივიდა ბაგრატი. დიდად პატივსცა ყაენმან, და დაისუა წინაშე, აქა მოხუცებულნი მიმყოლნი მისნი. და უბრძანა ყაენმან ბაგრატს, რათა მოსწიოს მშვილდსა, და მოუტანეს მშვილდი ძლიერი ბაგრატს. ხოლო ბაგრატი არა რამე თავს-იდვა, და ეპყრა მცირე რამე ნატეხი წვრილი ჯოხი, და მით ას-

¹ ქართლის ცხოვრება, II, გვ. 357.

² იქვე, გვ. 498.

წია, ხოლო ყაენმან გაიციან, და მისცა საბოძვარი დიდი და გამოისტუმრა. ითხოვა ბაგრატ მისგან შეწევნა და ძალი ოსმალთა ზედა. და იყო მამინ შაჰ-თამაზ ფრიად უცალო, ვერა ათხოვა ჯარი, და მისცა საბოძვარი მრავალი, და მით შემწე ეყო. და წარვიდა ბაგრატ მპყრობელი იმერეთისა სამცხეს.¹

ეს ეპიზოდი იმ მხრითაც არის საინტერესო, რომ ამით ჩანს ამ ამბების თანამედროვე ქართველი საზოგადოების წარმოდგენა ბაგრატ იმერეთის მეფის პიროვნებაზე. როგორც ვხედავთ, იგი იმდროინდელ საზოგადოებას მიაჩნდა წინდახედულ და მოხერხებულ პოლიტიკოსად, რომელსაც თვით შაჰ-თამაზის გულის მოგებაც კი შეეძლო. აქ ძირითადი მაინც ისაა, რომ ბაგრატს სწორი პოლიტიკური აღლო ჰქონდა. ოსმალეთის მოძალების ვითარებაში ერთდერთ რეალურ ძალად, ვინც შეიძლებოდა ამ უკანასკნელთ დაპირისპირებოდა, შაჰის ირანი იყო. თანაც ირანი იმერეთის მიმართ იმ მიზნებს ვერ დაისახავდა, რასაც ოსმალეთი. სამცხის დაპყრობილი ნაწილი ამის თვალნათელი მაგალითი იყო, ამიტომ საესეებით გამართლებული იყო ბაგრატის აღნიშნული ნაბიჯი. შეიძლება ისიც მართალი იყოს, რომ ოთარ შალიკაშვილის და ქაიხოსროს სხვა მომხრეებსაც მიემართათ ირანის მბრძანებლისათვის დახმარების თხოვნით, მაგრამ შაჰ-თამაზი არჩევდა მხარი დაეჭირა უფრო ძლიერი ძალისათვის, რომელიც ოსმალეთს შეურიგებლად ებრძოდა და რომელიც უფრო რეალურ მოკავშირედ გამოადგებოდა. ასეთი კი იმერეთის მეფე იყო.

ირანის შაჰს უშუალო ჩარევა იმჯერად არ შეეძლო („იყო მამინ შაჰ-თამაზ ფრიად უცალო“), მაგრამ გარკვეული დახმარება ბაგრატს მაინც აღმოუჩინა: „მისცა საბოძვარი მრავალი, და მით შემწე ეყო. და წარვიდა ბაგრატ მპყრობელი იმერეთისა სამცხეს“.

შაჰ-თამაზთან იმერეთის მეფის დაკავშირებას და მისგან „შემწეობის“ მიღებას გარკვეული ნაყოფი გამოუღია. მართლაც, ჩვენ ვხედავთ, რომ ამის შემდეგ ბაგრატ იმერთა მეფემ თურქებს წაართვა მათ მიერ დაპყრობილი ტაო-კლარჯეთის ტერიტორია (მთლიანად თუ არა დიდი ნაწილი მაინც). ამას უნდა ვუთხროთ ვახუშტის ცნობა, რომ მას შემდეგ რაც შაჰ-თამაზმა ბაგრატს „მისცა ნიჭნი დიდნი და წარმოაგლინა დიდ-პატივცემული და მოვიდა სამცხესვე, აღილო ციხენი სამცხისანი და დაიპყრა თვსად“.²

ჩვენ ქვემოთ ვნახავთ, რომ 1541 წელს, როდესაც თურქთა 22-

¹ ქართლის ცხოვრება II, გვ. 498.

² ახალი ქართლის ცხოვრება, III ტექსტი, ქართლის ცხოვრება, II, თბ., 1959, გვ. 498.

ათასიანი ჯარი შემოიჭრა ბაგრატის სამფლობელო ხამცხეში, მათ ალყა შემოარტყეს ოლთისის ციხეს. როგორც ვხედავთ, ოლთისი ისევ ბაგრატს ეკუთვნის, 1536 წელს კი, როგორც აღვნიშნეთ, ერთ-ერთი სანჯაყის ცენტრად იყო გადაქცეული. ე. ი. ბაგრატს მართლაც უკან დაუბრუნებია თურქების მიერ დაკავებული ციხე-სამწუხაროდ, იმ დროის ქართულ წყაროებში საამისო ცნობებარ მოგვეპოვება.

შაჰ-თამაზისათვისაც ბაგრატის მისდამი ერთგულება ირან-ოსმალეთის ომის ვითარებაში უმნიშვნელო არ უნდა ყოფილიყო; აქედან გასაგები ხდება ამის შემდგომ ხანაში ირანის შაჰსა და იმერეთის მეფეს შორის ის კეთილგანწყობილი ურთიერთობა, რასაც წყაროები ერთხმად მიუთითებენ.

სამცხის ჯეოდალები ისევ თურქების დახმარებით ცდილობენ თავიანთი მიზნის მიღწევას. თურქები დროს არ კარგავენ. ისინი კარგად ხედავენ, რომ ბაგრატ მეფე სამცხე-საათაბაგოს სამხრეთ-დასავლეთის საზღვრებზე მდებარე ციხეებს ამაგრებდა, „ამისათვის განრისხნა სულტანი სულეიმან და წარმოატანა მუსტაფა ფაშა სპითა დიდითა და ზარბაზნებითა დიდ-დიდითა“.¹

1543 წ. თურქთა 22 ათასიანი ლაშქარი ტაოში შემოიჭრა და საშინლად ააოხრა. ბაგრატ მეფემ იცოდა, რომ თურქები სამცხეს მას არ დაანებებდნენ, რომ ოსმალები უსათუოდ შემოუტევდნენ, ამიტომ გულხელდაკრეფილი არც თვითონ იქდა. როგორც კი მიიღო სამცხეში მტრის შემოსევის ცნობა, მაშინვე გაემზადა საბრძოლველად, მან ხელახლა თავის ყმებს — დადიანსა და გურიელს მიმართა მტრის წინააღმდეგ ერთიანი გამოსვლისათვის. გურიელი გამოცხადდა მეფესთან, ხოლო დადიანმა, როგორც აღვნიშნეთ, უარი შემოუთვალა: „რა ნიჭი არს ჩემდა, რამეთუ მოვსწყდე სპითა ჩემითა“.²

მიუხედავად საშინაო საქმის ასეთი გართულებისა, ბაგრატ მეფე და გურიელი სწრაფად წავიდნენ მტრის შესახვედრად. ბრძოლა მოხდა ქარაღაქს და დამთავრდა ბაგრატ მეფის სრული გამარჯვებით, ოსმალნი და მათ მხარეზე მდგარი სამცხის თავადები გაიქცნენ, ხოლო მთავარსარდალი მუსტაფა-ფაშა ბრძოლაში დაიღუპა.³

¹ ეახუ შტო, გვ. 812.

² იქვე. ამ პასუხიდან კარგად ჩანს, რომ მთავარი, ქვეყნის დიდი საფრთხის ვითარებაშიც, მხოლოდ თავისი სამთავროს ინტერესებით იფარგლება.

³ ახალი ქართლის ცხოვრება, III ტექსტი, ქართლის ცხოვრება, II, თბ., 1959, გვ. 498; იბრაჰიმ ფეჩევის ცნობები საქართველოსა და კავკასიის შესახებ, თბ., 1964, გვ. 26—27; ჰასან რუმელის ცნობები საქართველოს შესახებ, თბ., 1966, გვ. 23—24.

ქარაღაჭის ბრძოლის შესახებ ცნობებს გვაწვდიან თურქი, სპარსელი და სხვა უცხოელი ისტორიკოსები. იბრაჰიმ ფეჩევი ამ ბრძოლას ასე აღწერს: „ტახტ ბედნიერი ფადიშაჰი ჯიუტ არნაბულთა დასაპყრობად მიემგზავრებოდა; ქართველ არნაბულთაგან რამდენიმე ათასი წყველი მოულოდნელად დაესხა თავს არზრუმის ბეგლარბეგს მუსა-ფაშას, მოჰკლა იგი და კიდევ ბევრი ისლამის სარწმუნოებისათვის მებრძოლი გმირი გაუყენა სამარადისო ბედნიერის (სამოთხის) გზას“¹.

უფრო დაწვრილებით აგვიწერს ქარაღაჭის ბრძოლას სპარსი ისტორიკოსი ჰასან რუმლუ: „ოსმალეთის ხელმწიფემ სულთან სულეიმანმა მუსა-ფაშა, რომელიც არზრუმის მმართველი იყო, 60 სანჯაყის ამირათი საქართველოს დასაპყრობად გაგზავნა. ოსმალები ბრძანების თანახმად დად ელისაკენ გაემართნენ. მეფე ბაგრატმა, რომელიც ბაში-აჩუკად არის ცნობილი, ციხე გაამაგრა, აზნაურების ერთი რაზმი შიგ ჩასვა და თვითონ მთასა და ტყეში წავიდა“. ოსმალებმა პირველი ციხე ათი დღის განმავლობაში აიღეს, შემდეგ მთავარ (ოლთისის — მ. რ.) ციხეს შემოარტყეს ალყა, „სიბები გამართეს და ევროპული ზარბაზნებით და სხვა იარაღით დაუწყეს ციხეს ბრძოლა“. ბაგრატ მეფე ხელდავდა, რომ რიცხვით უამრავ ჯარს ვერ დაამარცხებდა, ამიტომ მან მოტყუებით ბრძოლის მოგება სცადა. „მაშინ ბაში-აჩუკმა, — განაგრძობს ჰასან რუმლუ, — ეშმაკობით და ვერაგობით რამდენიმე კაცი გამოუგზავნა მუსა-ფაშას მრავალი საჩუქრით და შემოუთვალა: მე როგორ შემიძლია ხონთქრის ჯარისათვის წინააღმდეგობის გაწევა, თუ ფაშა უკან გაბრუნდება, ციხის კლიტეებს, ვისაც მიბრძანებთ, იმას გადავცემო. მისი სიტყვებით მოტყუებული ფაშა ოლთისის ციხიდან აიყარა და არზრუმს წავიდა, სანჯაყის ამირთა რაზმი კი თოფხანაში დატოვა, რომ შემდეგ მას გაჰყოლოდა და არზრუმში მიეტანა (თოფხანა).

როცა ბაში-აჩუკმა ფაშას უკან გაბრუნების ამბავი გაიგო, სხვა ქართველ სარდლებთან ერთად თოფხანაში დატოვებულ ოსმალებს მოულოდნელ უბედურებასავით თავს დაესხა. ყოველი მხრიდან გარს შემოერტყნენ, ასე, რომ ათასიდან ერთიც არ გადაარჩენილა. ამის შემდეგ ილღარით ფაშას წინააღმდეგ გაემართა. გვიანი დილა იყო, რომ დაეწია მას, შეუტია... ქართველებმა ლალისფრად შეღებეს ბრძოლის ველი მათი სისხლით და მრავალი ოსმალო, მუსა ფაშასთან და წარჩინებულ ოსმალებთან ერთად დახოცეს. ხოლო მა-

¹ იბრაჰიმ ფეჩევის ცნობები საქართველოსა და კავკასიის შესახებ, თბ., 1964, გვ. 26—27.

თი ბანაკი დაარბიეს და აიკლეს“. თურქებისათვის წართმეული ზარბაზნები ბაგრატმა ქუთაისში გაგზავნა.

ოთარ შალიკაშვილმა და ქაიხოსრომ ისევ დახმარება სთხოვეს სულთანს, მაგრამ მათი თხოვნის გარეშეც სულთანი სამცხე-საათაბაგოში თავისი პოზიციების დამოკლებას არ აპირებდა. გარდა ამისა, მრავალ ბრძოლებში გამარჯვებული სულთანი ამ დამარცხებას ვერ შეურიგდებოდა. ორი წლის შემდეგ სულთანმა დიდძალ ჯარს მოუყარა თავი, მთავარსარდლობა არზრუმისა და დიარბექირის ფაშებს ჩააბარა და საქართველოზე თავდასასხმელად გამოგზავნა.

ბაგრატ მეფემ დადიანსა და გურიელს კვლავ მიმართა მოწოდებით. გურიელი თავისი ლაშქრით გამოცხადდა მეფესთან, მაგრამ დადიანმა კვლავ უღალატა საერთო საქმეს და დახმარებაზე მეფეს უარი შემოუთვალა (როგორც აღვნიშნეთ, დადიანისათვის სასურველიც კი იყო მეფის დამარცხება, ვინაიდან გაძლიერებული იმერეთის სამეფო მისთვის არასასურველად ჩანდა და მას არც გურიელის გაძლიერება მოსწონდა).

ბაგრატ მეფემ თავის სიძეს, ქართლის მეფეს ლუარსაბსაც სთხოვა დახმარება. ლუარსაბი ხედავდა, რომ თურქთა მიერ სამცხის დაკავებით საქართველოს სამხრეთის კედელი ერღვეოდა და ყოველგვარ ღონისძიებას იღებდა ამ კედლის გასამაგრებლად. მან მაშინვე შეჰყარა ქართლის ჯარი და იმერთა ჯარს შეუერთდა.

ბაგრატის, ლუარსაბისა და გურიელის ლაშქარს მესხი აზნაურები შეუერთდნენ და გაერთიანებული ლაშქრით მტრის ჯარს ბასიანში მიეგებნენ. ბრძოლა მოხდა 1545 წელს სოხოისტას ველზე. ბრძოლის ბედი მესხთა ღალატმა გადაწყვიტა.

ბრძოლის წინ მესხებმა კატეგორიულად მოითხოვეს მეწინავედ მისვლა. ამაზე ქართველები არ დათანხმდნენ, და თვით მივიდნენ მეწინავედ. ქართველების ლაშქარი მტერს თავგანწირულად ეკვეთა, მაგრამ „მაშინ შურიტა ბოროტითა აღსავსეთა მესხთა ინებეს განდრეკილება, და არღარა მიჰყენენ ომსა შინა“¹. მესხთა გამოთიშვამ ბრძოლიდან უკუღმა შეაბრუნა მისი ბედი. ბრძოლა დიდიდან საღამომდე გაგრძელდა. ქართველებმა უდიდესი ვაჟკაცობა გამოიჩინეს². მაგრამ ღალატმა და რიცხობრივმა უპირატესობამ თავისი გაიტანა, საქართველოს ლაშქარი დამარცხდა, ქაიხოსრო გაათაბაგებას ელირსა³.

¹ ახალი ქართლის ცხოვრება, III ტექსტი, ქართლის ცხოვრება, II, ობ. 1959, გვ. 499.

² იქვე, გვ. 499—500.

³ მ. სეანიძე, დასაბ. ნაშრ., გვ. 58—59.

ამ გამარჯვების შემდეგ ოსმალებმა მტკიცედ მოიკიდეს ფეხი სამცხე-საათაბაგოში და განსაკუთრებით მის დასავლეთ ნაწილში. ამ დროიდან ოსმალებს სამცხე-საათაბაგოზე გავლით საქართველოში შემოსასვლელად წინ არაფერი ედგათ.

სოხოსტას ბრძოლამ აშკარა გახადა, რომ თავადურ საქართველოს არ შეეძლო ოსმალების წინააღმდეგ წარმატებით ბრძოლა, ამავდროს ისიც ცხადი გახდა, რომ საქართველოს ფეოდალურ ძალებს გაერთიანება აღარ შეეძლოთ საერთო მტრის წინააღმდეგ.

ერთი წლის შემდეგ ბაგრატ მეფე ისევ გადავიდა ლაშქრით სამცხეში, მაგრამ ამოდ, ოსმალებს მთლიანად დაეპყროთ სამცხის ციხე-სიმაგრენი და თავიანთი მეციხოვნე ჯარი ჩაეყენებინათ!—„მერმე კუალა. გადავიდა მეორესა წელსა ბაგრატ მეფე სამცხეს, წარმოასუნა აწყურისა ღუთისმშობელი ციხეჯუარს და ვერღარა დაიპყრა სამცხე, ვინამთგან ციხენი სრულიად დაეპყრათ ოსმალთა; უკუმოიქცა და მოვიდა ქუთათისს?“.²

1546 წ. იმერეთის მეფის ლაშქრობა სამცხეში და აწყურის ღუთისმშობლის ხატის „ტყვედ“ წამოყვანა აღნიშნულია ქართლის ცხოვრების ძველებულ-გადაკეთებულ გაგრძელებაშიც.³ როგორც ჩანს, მისი „წარმატება“ ამის იქით აღარ წასულა, ქაიხოსროს გადაგდება ან დამორჩილება მეფემ ველარ შეძლო. პირიქით, სამცხის მთავარი ამის შემდეგ იმერეთის მეფის წინააღმდეგ დადიან-გურიელის დამხმარე და დამრახმავ ძალად იქცა. თუმცა ასეთი მოქმედებით ქაიხოსრომ ბოლოს ოსმალების მონობა მოიმკო. მას ოსმალებმა მისი „დამოუკიდებელი“ სამთავროს დიდი ნაწილი წაართვეს და უშუალოდ ოტომანის იმპერიას შეუერთეს“.⁴

ქართულ ისტორიოგრაფიაში გაბატონებული იყო აზრი, რომ ბაგრატ მეფემ საქართველოს დარბევაში მონაწილეობა მიიღო შაჰ-თამაზის მეორედ შემოსევის დროს (1546 წლის დეკემბერი და 1547 წლის იანვარი).

ისკანდერ მუნშის ცნობით, „შაჰ-თამაზს, აყ შაჰრში ეახლნენ კახეთის მეფე ლევანი და იმერეთის მეფე ბაგრატი, რომელთაცა

¹ ქართლის ცხოვრება, IV, გვ. 813; ქართლის ცხოვრება, II, გვ. 500—501; კ. სეანიძე, დასახ. ნაშრ. გვ. 64—67.

² ქართლის ცხოვრება, IV, გვ. 813.

³ ქართლის ცხოვრება, II, გვ. 500—501.

⁴ კ. სეანიძე, დასახ. ნაშრ. გვ. 64—67.

ფეშქაში და „ბაჯ ო ხარაჯ“ მიაართვეს შაჰს და იმ ლაშქრობაში მონურად ემსახურებოდნენ“.*

ფარსადან გორგიჯანიძეც აღნიშნავს, რომ „კახეთის ბატონი ლე-
ენ და იმერეთის მეფე ბაგრატ ძღენითა და კარგის ფეშქაშით ყა-
ენტან მოვიდნენ, ის ლაშქრობა ერთგულად იმსახურეს“.¹

ამ ცნობების საფუძველზე ივ. ჯავახიშვილმა გააკეთა დასკვნა,
რომ ეს ორი ქართველი მეფე ამ ლაშქრობაში ერთგულად ემსა-
ხურნენ კიდევ საქართველოს ამოხრებელ მტერს?.

თვით ჰასან რუმელუ, რომელიც პირადად იღებდა მონაწილეობას
ამ ლაშქრობაში, სრულიად განსხვავებულ ცნობას გვაწვდის. იგი
აღწერს იმ ბრძოლებს, რაც მათ გადაინადეს საქართველოში. მხო-
ლოდ საქართველოს დატოვების შემდეგ გამოცხადდნენ შაჰთან
ქართველი მეფეები. „რჯულის საფარველი“ შაჰი აყ-შაჰრიდან დაიბ-
რა და თობღიში (ბარდაეს) წავიდა. გზაში ლევანი, ზაგემისა და
გრემის პაქიმი და საქართველოს პაქიმი ბაში-აჩუყი შეფეთა საფარ-
ველ სასახლეში მოვიდნენ და განდიდებული იქნენ ხელმწიფის

* სათათრო გამოსაღები „ბაჯ ო ხარაჯ“-ის მნიშვნელობა გამოიკვლია პროფ.
ვ. გაბაშვილმა.

ირანის შაჰი ზოგჯერ ფეშქაშით არ კმაყოფილდებოდა. ის ქართველ მეფეს,
გარკვეული პოლიტიკური ურთიერთობის პირობებში, ხარკსაც ახდევინებდა,
ოღონდ ქვეყნის აღწერისა და მალუჯათის გარეშე (მალუჯათი უშუალოდ დაკავ-
შირებულია ყიზილბაშურ მიწისმფლობელობასთან). ასეთ ხარკს „ბაჟი და ხარაჯ“
(„ბაჯ ო ხარაჯ“) ეწოდებოდა.

ხონღემირის გადმოცემით: 1518 წ. ახლო ხანში შაჰ-ისმაილ I-ის (1502 —
1524 წწ.) სარდალ დიე სულთანს, ქართველი მეფე-მთაერები ნახჭევანს საუღვა-
ნია, იქ ქართველებს შაჰის მორჩილება-სამსახური აღუთქვამთ და ხარკის ვაშო-
ლებას დათანხმებულან. ამ დროიდან იწყებენ ქართველი ბეგები „ბაჯ ო
რაჯ“-ის გადახდას. ეს განსხვავდება ჩვეულებრივი „ბაჟისა“ და „ხარაჯისა“-
რადგან ის სეფიანთა ირანში სამატრონუმო ურთიერთობასთან იყო დაკავშირე-
ბული.

„ბაჯ ო ხარაჯს“, როგორც წესი, იხდიდნენ ირანის ფეოდალური სამთავროე-
ბის მპყრობელ-მფლობელები. ასეთ მპყრობელ-მფლობელთა მიწებს, უკეთ ქვე-
ყანას, ეწოდებოდა „მულქი მოურუს“ („სამყვიდრო მულქი“).

მულქი მოურუსის მპყრობელი, როგორც ხელდებული, ორგვარი მოვალეობა
იყო დაკავშირებული ირანის შაჰთან: 1. გამოედო ბოჯ ო ხარაჯ და 2. პირველი
მოწოდებისთანავე გამოსულიყო თავისი ქარით შაჰის სამსახურში (ე. ვანაშ-
ვილი, ქართული ფეოდალური წესობილება მე-16 — 17 საუკუნეებში, თბ., 1956,
გვ. 239 — 268).

¹ ფარსადან გორგიჯანიძის ისტორია, ს. კაკაბაძის გამოც., თბ., 1926, გვ.

² ივ. ჯავახიშვილი, დასახ. ნაშრ., გვ. 245.

აღერსით. ბაში-აჩუკმა შაჰისაგან ნაბოძებთ ხალათი ჩაიცვა და თავის სამფლობელოში დაბრუნდა.¹ ამ ცნობიდან ნათლად ჩანს, დაასკენის რ. კიკნაძე, რომ ქართველი მეფეები იმ დროს ხლებიან შაჰს, როცა საქართველო დალაშქრული ჰყავდა და უკან ბრუნდებოდა.

ჰასან რუმლუს ცნობები, როგორც ზემოთ აღენიშნეთ, ყურადსაღებია. იგი ყველაზე მეტ ნდობას იმსახურებს, როგორც ამ ლაშქრობის თვითმხილველი. ამავე დროს ისკანდერ მუნში და ფარსადან გორგიჯანიძე ხომ თვით ჰასან რუმლუსაგან იღებდნენ ამ ცნობებს.²

ამრიგად, ის მძიმე ბრალდება საქართველოს ამოხრებელი მტრის ლაშქრობაში ბაგრატიისა და ლევანის მონაწილეობას რომ ეხება, რ. კიკნაძის სამართლიანი დასკვნით, არ დასტურდება.³

უფრო მეტის თქმაც შეიძლება. როდესაც ვითარებამ მოითხოვა, ბაგრატ მეფემ ენერგიულად დაუჭირა მხარი შაჰ-თამაზის წინააღმდეგ მებრძოლ ლუარსაბ მეფეს. 1554 წელს ქართლში შაჰ-თამაზის უკანასკნელი, მეოთხე ლაშქრობისას, ლუარსაბ მეფე იძულებული შეიქნა იმერეთისათვის შეეფარებინა თავი. შაჰმა იმერეთში შესვლა ვერ გაბედა.⁴

შაჰ-თამაზის მუქარას ბაგრატ მეფემ იმით უპასუხა, რომ დახმარებისათვის სულთან სულეიმანს მიმართა.⁵ ირანის შაჰი ამ პერიოდში ოსმალეთთან ზავის დადებას ეშურებოდა, ამიტომ მოერიდა სულთანთან ურთიერთობის გამწვავებას.

აღსანიშნავია, რომ ირანსა და ოსმალეთს შორის საზავო მოლაპარაკების დროს ქართლისა და იმერეთის საკითხს განსაკუთრებული ადგილი ეკავა. მ. სვანიძე უთითებს ამ უკანასკნელ ხანს უნგრელი ორიენტალისტის ლ. ფეკეტეს შიერ თურქეთის არქივში აღმოჩენილ მეტად საინტერესო დოკუმენტს. ესაა შაჰ-თამაზის დიდმოხელეების სევინდუქ ბეგის და უსტაჯლუ შაჰ-ყულუ ბენ ჰამზას წერილი არზრუმის ბეგლარბეგ აიას ფაშასადმი,⁶ რომელიც გავზავ-

¹ ჰასან რუმლუს ცნობები საქართველოს შესახებ, თბ., 1966, გვ. 26.

² იქვე, გვ. 11.

³ იქვე, გვ. 58; შენიშვნა № 60.

⁴ მ. სვანიძე, დასახ. ნაშრ., გვ. 74.

⁵ ფარსადან გორგიჯანიძის ისტორია: ს. კაკაბაძის გამოც., თბ., 1926, გვ. 7.

⁶ L. Fekete, Zur Geschichte der Grusinier des 16 Jahrhunderts, Acta Orient. Hung. t. I, fasc. 1, 1950, s. 93—133.

ნილი უნდა იყოს 1554 წ. 30 ოქტომბრის შემდეგ (გამომცემელი ვარაუდობდა 30 აგვისტოს შემდეგ პერიოდს, მაგრამ მ. სვანიძე საესებით სამართლიანად აზუსტებს 30 ოქტომბრის შემდეგი ხანით). წერილი წარმოადგენს „დიპლომატიურ ნოტას“, რომლის „ძირითად არსს შეადგენს საქართველოს საკითხი“. როგორც მ. სვანიძე აღნიშნავს, „წერილის ავტორები მოითხოვენ მოისპოს ისეთი ვითარება, რომელიც ქართლისა და იმერეთის მეფეებს საშუალებას აძლევს ისარგებლონ ორი მეტოქე მუსლიმანური სახელმწიფოს უთანხმოებითა და წინააღმდეგობით და ჩამოაგდონ შუღლი მაჰმადიან სახელმწიფოთა შორის“.¹

1555 წ. 29 მაისს, ქ. ამასიაში დაიღო ზავი ირანსა და ოსმალეთს შორის. დამპყრობლებმა საქართველო დასაპყრობად ორ ნაწილად გაიყვეს: დასავლეთი და სამხრეთ-დასავლეთი საქართველო ოსმალეთმა ირგუნა, ხოლო ქართლ-კახეთი და აღმოსავლეთი სამცხე ირანმა დაიჩემა.

ამ ზავის შემდეგ საქართველოს პოლიტიკური მდგომარეობა უფრო გაუარესდა, ვინაიდან ამიერიდან ირან-ოსმალეთის შიშით ქართველები ერთმანეთს ვეღარ აღმოუჩენდნენ დახმარებას. ამიერიდან გამორიცხული იყო საქართველოს პოლიტიკური გაერთიანება. ქართული ფეოდალური საზოგადოების რეაქციული ნაწილის კავშირი გარეშე მტრებთან და 1555 წლის ამასიის ზავის პირობები გადაულახველ დაბრკოლებებს უქმნიდა საქართველოს გაერთიანების ყოველგვარ ცდას და იგი მუდამ მარცხით მთავრდებოდა.

ორივე დამპყრობელი ცდილობდა, რომ საქართველო ყიზილბაშურ ან ოსმალურ პროვინციად გადაექცია. ამიტომ საქართველოს არც ერთ სამეფო-სამთავროს არ შეეძლო საქართველო გაერთიანებინა. აუცილებელი იყო გარეშე ძალის დახმარება. ამიტომ ქართველების რწმენით რუსეთი იყო ერთადერთი ძალა, რომლის დახმარებით ქართველ ხალხს შეეძლო ირან-ოსმალეთის კლანჭებიდან დაეღწია თავი და პოლიტიკურად გაერთიანებულიყო. ისტორიულად ეს ასეც მოხდა. ფაქტიურად საქართველოს შეერთებამ რუსეთთან გააუქმა ირან-ოსმალეთის 1555 წლის ზავის პირობები.

ამასიის ზავმა, რომელსაც ავბედითი მნიშვნელობა ჰქონდა საქართველოსათვის და რამაც განაპირობა აღმოსავლეთი და დასავლეთი საქართველოს ორად გაგლეჯა და საუკუნეთა მანძილზე მათი პოლიტიკური, ეკონომიური და სოციალური გათიშვა, უდიდესი უარყოფითი როლი შეასრულა ქართველთა ისტორიაში, მაგრამ

¹ მ. სვანიძე, დასახ. ნაშრ., გვ. 77.

ეჭირათ თვალი. მეფე ეკლესიის მიწებს იცავდა. ეპისკოპოსი მეფის მიერ ინიშნებოდა, ამიტომ იგი მეფის ერთგული იყო. საეპისკოპოსოების დაარსებით მეფე თავის ერთგულ ფეოდალთა დასს ქმნიდა, რომელიც მისი დასაყრდენი იქნებოდა.

ბაგრატ III-ემ პირველ რიგში აღადგინა ადრე არსებული ან შექმნა ახალი საეპისკოპოსო ცენტრები, „მეფეთ-მეფემან ბაგრატ განყო ლიხთიმერი სამ საეპისკოპოსოდ“ (1529 წ.).

პირველი საეპისკოპოსო კათედრა დააარსა გელათში (1529 წ.), მეორე საეპისკოპოსო კათედრა ხონში (1529 წ.)², ხოლო მესამე საეპისკოპოსო კათედრა აღადგინა ნიკორწმინდაში.³

ახალი საეპისკოპოსო კათედრების გამგებლობას მეფე თავის მომხრე ფეოდალებს ანდობდა. ამავე დროს ძველ მოქმედ კათედრებზედაც თავის მომხრეებს ნიშნავდა. მართალია ხშირად ეს თანამდებობა მემკვიდრეობით გადადიოდა საგვარეულოს წევრებზე, მაგრამ ეს მეფის თანხმობით ხდებოდა.⁴

ქართულ სამეცნიერო ლიტერატურაში გავრცელებული იყო აზრი იმის შესახებ, რომ ადრე გაუქმებული რაჭის საერისთავო ბაგრატ მეფემ აღადგინა. ო. სოსელიამ გამოიკვლია, რომ ეს არასწორია და ეახუშტის შეცდომიდან მომდინარეობს. ვახუშტი ამბობს „ბაგრატ მეფემან დასვა ერისთავად რაჭას ჩხეიძე შოშიტა და მისცა რომელიმე სახასო დაბანი და ციხე მინდა, რამეთუ აქამომდეც იყო რაქა სამეფოდ და კეალად ჰყო საერისთოდ“.⁵

მე-13 საუკუნის შიშ-იან წლებში დავით ნარინმა მკაცრად დასაჯა⁶. ღალატისათვის რაჭის ერისთავი კახაბერიძე, ხოლო რაჭის საერისთავო გააუქმა და სახასო მამულად აქცია. ამით დამთავრდა რაჭის საერისთავოს არსებობის პირველი პერიოდი,⁷ და მასთან ერთად კახაბერიძეთა ერისთავობაც.

¹ ს. კაკაბაძე, დასავლეთ საქართველოს საეკლესიო საბუთები, 1, გვ. 10.

² სამართალი კათალიკოზისა და მისი მკვიდრის დრო. ს. კაკაბაძის გამოცემა, 1913, გვ. 7.

³ ო. სოსელია, ნაჩვენებები ფეოდალური ხანის დასავლეთ საქართველოს სოციალ-პოლიტიკური ისტორიიდან, თბ., 1973, გვ. 33—34; ბ. ლომინაძე, ქართული ფეოდალური ურთიერთობის ისტორიიდან, სენიორიები, თბ., 1966, გვ. 206.

⁴ იქვე.

⁵ ვახუშტი, გვ. 811.

⁶ ქართლის ცხოვრება, II, 1959, გვ. 275.

⁷ ო. სოსელია, დასახ. ნაშრ. გვ. 70—71; ქართლის ცხოვრება, II, გვ. 276.

„მე-13 საუკუნის 80-იან წლებში გაუქმებული რაჭის საერისთავო მომდევნო საუკუნის მიწურულს იქნა აღდგენილი. მე-14 ს. დასასრულსა და მე-15 ს. დამდეგს ეს უკვე მომხდარი ფაქტია და ერისთავად აქ ვინმე აღბულა ზის“.¹

ამ დროს შემდგომ რაჭის საერისთავო არავის გაუქმებია, ხოლო ძველ საერისთავოსთან შედარებით ნაკლები ტერიტორია ეკავა, მასში აღარ შედიოდა თავიერი და თვით რაჭის ნაწილიც კი.²

ე. ი. ცნობა იმის შესახებ, რომ ერთხელ გაუქმებული რაჭის საერისთავო ბაგრატ მეფემ აღადგინა და ამით კიდევ უფრო დაასუსტა პოლიტიკურად სამეფო, სინამდვილეს არ შეეფერება.³

ბაგრატ III ერთ-ერთ მნიშვნელოვან ღონისძიებად შეიძლება ჩაითვალოს საკათალიკოზო ტახტის გადმოტანა ბიჭვინთიდან გელათში⁴, რაც მაუწყებელი იყო ქვეყნის ცხოვრებაში მომხდარი მნიშვნელოვანი ცვლილებებისა.

„ახალი ქართლის ცხოვრების“ III ტექსტი გვიდასტურებს, რომ კათალიკოსი 1529 წელს ჯერ კიდევ ბიჭვინთაში ზის. ამ წელს ბიჭვინთაში მყოფმა მალაქია აბაშიძემ აკურთხა ქუთაისის, გელათისა და ხონის ეპისკოპოსები.⁵

1545 წელსაც კათალიკოსის ტახტი ისევ ბიჭვინთაშია, ამის დამატკიცებელ საბუთს იძლევა თვით ბაგრატ მეფე.

1545 წელს ბაგრატ მეფეს გელათის წმინდა გიორგის ეკლესია საფუძვლიანად განუახლებია და თავის საძვალედ გაუხდია.⁶ ე. ი. ამ დროს წმინდა გიორგის ეკლესია ჯერ კიდევ არ არის კათალიკოსისათვის გადაცემული. როგორც ცნობილია, საკათალიკოსო ტახტი გელათში წმინდა გიორგის ეკლესიაშია მოთავსებული. ბაგრატ მეფე ერთ-ერთ თავის მიერ გაცემულ საბუთში აღნიშნავს, რომ მეორედ აუშენებია წმინდა გიორგის ეკლესია, მანამდე იგი სადღეღოფლო ყოფილა. „ვიგულსმოდგინეთ და ხელვყავთ საყდრისა და მო-

¹ ო. ს. ო. ს. ე. ლ. ი. ა, დასახ. ნაშრ. გვ. 73; ს. კ. ა. ა. ბ. ა. ძ. ე, გენეალოგია დიდი ოლქსანდრე მეფისა, თბ., 1913, გვ. 19.

² ო. ს. ო. ს. ე. ლ. ი. ა, დასახ. ნაშრ. გვ. 73—75.

³ საქართველოს სიძველენი, I, გვ. 17; ბ. ლ. ო. მ. ი. ა. ძ. ე, გელათი, თბ., 1958, გვ. 36; დასავლეთ საქართველოს საეკლესიო საბუთები, ს. კ. ა. ა. ბ. ა. ძ. ე. გამოცემა, თბ., 1921, გვ. 19; ბ. ლ. ო. მ. ი. ა. ძ. ე, ქართული ფეოდალური ურთიერთობის ისტორიიდან, სენიორიები, თბ., 1966, გვ. 182; მ. რ. ხ. ე. ი. ა. შ. ე. ი. ლ. ი. იმერეთის სამეფო XVI საუკუნეში, თბ., 1976, გვ. 48—50.

⁴ იქვე.

⁵ ქართლის ცხოვრება, II, 1959, გვ. 493.

⁶ ბ. ლ. ო. მ. ი. ა. ძ. ე, გელათი, 1958, გვ. 38.

ნასტრისა წმინდისა გიორგისა მეორედ აღშენებად. პირველად ოდესმე საღვთოფლო ყოფილიყო, აღარავინ ესაფლავებოდა და მოშლილიყო, და აწ ჩვენდა სამარხად და საძვალედ შევეკმენით, აღვაშენეთ და შევამკვეით ხატითა, წიგნითა... და მამულითა“.¹

ამ საბუთიდან ის დასკვნა შეიძლება გამოვიტანოთ, რომ 1545 წელს ეკლესია მოკმედი არაა, კათალიკოსი აქ არ ზის და იგი ბაგრატი მეფის საძვალე ხდება. მას მომდევნო ხანის წყაროებიც ბაგრატის საძვალეს ეძახიან და აქ არიან დასაფლავებულნი თვით ბაგრატი და მისი მეუღლე ელენე.² ე. ი. 1545 წელს წმ. გიორგის ეკლესია მოუწყობელია და უმოკმედო.

კათალიკოსის ტახტის გადმოტანასთან დაკავშირებით, ერთ-ერთ ყველაზე სანდო ცნობას გიორგი ბაგრატის ძის (1565—1583 წწ.) 1569 წლის შეწირულების წიგნი იძლევა. იგი მიგვანიშნებს, რომ წმ. გიორგის ეკლესია ამ დროისათვის გადაცემული აქვს კათალიკოსს და გიორგი მეფე მას უბოძებს მამულს, ხოლო სამაგიეროდ სულის მოსახსენებელ წირვას ინიშნავს:

შემოგწირეთ... წმ. გიორგის... „ყოველთ წელიწადსა რვარვასა ჟამსა გვეწირევადით (sic) პატრონი კათალიკოზი და სადამღის პატრონი ევდემონ კათალიკოზი დღენგძელად და ამოდ იყოს. ისი ნუ დაგვაკლებს წელიწადშიგან ამ მამულისათვის რვა-რვასა ჟამის წირვასა და რა სოფელმე მისი წესი არ დაიკლოს, ვინცა კათალიკოზი იყოს და წმიდის გიორგის მონასტირი და ეკლესია ჰქონდეს ისი ნუ დაგვაკლებს წელიწადშიგან რვარვას ჟამის წირვასა“.³

ზემოთ აღნიშნულიდან მტკიცდება, რომ 1569 წელს კათალიკოსის კათედრა გელათშია გადმოტანილი და მას უკავია წმ. გიორგის ეკლესია. კათალიკოსმა უნდა წიროს მეფის სულის მოსახსენებლად წელიწადში რვა-რვაჯერ, ასევე უნდა მოიქცნენ მომდევნო ხანის კათალიკოსებიც. ე. ი. 1545 წლიდან გელათში უნდა გადმოეტანათ კათალიკოსის კათედრა და ეს უკვე 1569 წელს მომხდარი ფაქტია. ე. ი. საკათალიკოსო ტახტი ბიჭვინთიდან გელათში გადმოვიდა 1545—1569 წლებს შორის.⁴

რა იყო მიზეზი იმისა, რომ კათალიკოსმა ბიჭვინთა დატოვა? ბაგრატი მეფე ენერგიულად ცდილობდა, რომ ეკლესია გაეძლიე-

¹ საქართველოს სიძველენი, I, გვ. 17.

² ბ. ლომინაძე, გელათი, 1958, გვ. 36.

³ დასავლეთ საქართველოს საეკლესიო საბუთები, ს. კაკაბაძის გამოცემა, თბ., 1921, გვ. 19.

⁴ ბ. ლომინაძე, ქართული ფეოდალური ურთიერთობის ისტორიიდან, სენიორები, თბ., 1966, გვ. 182.

რებინა, ვინაიდან იგი სამეფო ხელისუფლების ერთგული იყო და მისი ხელისუფლების გაძლიერებისათვის ბრძოლაში მეფეს გვერდში ედგა. ამიტომ კათალიკოსის გადმოსვლა მეფის ერთ-ერთი ღონისძიება იყო, რომელიც მიზნად ისახავდა სახელმწიფოს ცენტრალური ხელისუფლების გაძლიერებას ეკლესიის მოკავშირეობით. მაგრამ მარტო ამით არ შეიძლება აიხსნას საეკლესიო ტახტის გადმონაცვლება.

საეკლესიო ცენტრის გადატანა გელათში და ბიჭვინთის დაცარიელება მათწყებელი იყო ქვეყნის ცხოვრებაში მომხდარი მნიშვნელოვანი ცვლილებებისა (მიუხედავად ამისა, დასავლეთი საქართველოს საეკლესიო მთლიანობა მაინც არ დარღვეულა, აფხაზეთი კვლავ გელათის საკათალიკოსოს შემადგენელ ნაწილად ითვლებოდა). ამის ნათელ დადასტურებას გვაძლევს „მცნება სასჯულო“ და ლევან II დადიანის (1611 — 1657 წწ.) ერთი საყურადღებო საბუთი. „ძუელითვანი იადგარი გარყუნილიყო და დაკარგულიყო ხო-

ფისა ღთის მშობლისა, მას ჟამსა უღმრთოდ და უსჯულოებად მიიქცეს აფხაზნი, და აღვიყვანეთ იოვაკიმ, კაცი ღირსი ნეტარებისა, დავსვით კათალიკოზად, რომელი აფხაზთა გარყუნეს სჯული და კათალიკოზობა, ხოლო ჩუენ მარჯუენითა ქრისტეს საფლავისათა და იერუსალემისა და ანტიოქის პატრიარქისა მიხაილის ნება დართვითა გავარიგეთ ჟუართა და ონფორითა“¹.

როგორც ამ საბუთიდან ჩანს, აფხაზნი „უღმრთოდ და უსჯულოებად მიიქცეს“. იგივე შამადავლე დადიანის მონაწილეობით შედგენილი „მცნება სასჯულო“ ამასვე ადასტურებს².

მე-15 საუკუნეში აფხაზეთის მოსახლეობის მნიშვნელოვანი ნაწილი ქრისტიანობისაგან სრულიად გამდგარია, ამას ემატება მე-16 საუკუნეში ფეოდალური აშლილობა, ოსმალთა წაქეზებით ჯიქების თავდასხმები ზღვის სანაპირო ზოლზე. ამის შედეგად ქვეყნის ცხოვრებაში ხდება დიდი ცვლილებები.

„პოლიტიკურად დაქუცმაცებულ დასავლეთ საქართველოში, როცა ხელისუფლები (მეფე-მთავრები) გამუდმებულად ერთმანეთს ებრძოდნენ, ხოლო მეფის მომხრე ეკლესიის უმაღლესი მესაჭის ადგილსამყოფელი მოექცა ისეთ კუთხეში, სადაც ოსმალეთის უფლება აღიარებული იყო იმერეთის მეფის საპირისპიროდ, კათალიკოსის მიერ ბიჭვინთიდან ეკლესიის მართვა და მეფესთან კავშირი

¹ საქართველოს სიძველენი, ტ. I, გვ. 26.

² ქართული სამართლის ძეგლები, ტ. III, თბ., 1970, მცნება სასჯულო, გვ. 121—132.

შეფერხებული იქნებოდა; ბიჭვინთის კათალიკოსის ცენტრთან მოახლოება, უეჭველია ერთგვარი გამოხატულება იყო ბაგრატ მეფის საეკლესიო პოლიტიკისა, რომელიც გულისხმობდა ეკლესიის, როგორც დასაყრდენი ძალის, გაძლიერებას ურჩი მთავრების წინააღმდეგ ბრძოლაში. მეორე მხრივ, ოსმალების თუ მათი გავლენას ქვეშ მყოფი ჩრდილო ტომების უმუშალო შემოტევამ აფხაზეთზე. მათმა მოახლოებამ ბიჭვინთისაკენ, უეჭველია, შეაფერხა ქრისტიანული მრევლისა და მასთან ერთად საკათალიკოსო საყმოს ნორმალური განვითარება აფხაზეთში; ომებმა შეაფერხეს კათალიკოსის უშიშარი მისვლა-მოსვლა სამწყსო-საეკლესიო საქმეებზე და საფრთხე შეუქმნეს კათალიკოსის ფიზიკურ არსებობას.¹ ყველა ამ საშინაო და სავარეო პოლიტიკურმა სიტუაციამ მე-16 საუკუნეში იძულებული გახადა ევდემონ ჩხეტიძე დაეტოვებინა ბიჭვინთა და გადმონენაცვლა გელათში, პოლიტიკურ ცენტრში.

ბაგრატ III მიერ საეკლესიო სფეროში ჩატარებული რეფორმა, როგორც აღვნიშნეთ, მიზნად ისახავდა მსხვილი საეპისკოპოსოების დაქუცმაცებას წვრილ, პატარა საეპისკოპოსოებად, ეს უკანასკნელნი უფრო ადვილი დასამორჩილებლნი იქნებოდნენ, ვიდრე ერთიანი, ძლიერი საეპისკოპოსოები, ამასთან, ისინი მეფის უფრო ერთგულნი იყვნენ, ვიდრე საერო ფეოდალები.

ბაგრატის ამ წინ გადადგმული ნაბიჯის სისწორე შემდგომმა დროის მსვლელობამ დაადასტურა. საეკლესიო მოღვაწენი განუხრებლად იდგნენ იმერთა მეფეების მხარეზე და შეძლებისდაგვარად ებრძოდნენ ფეოდალთა აღვირახსნილობას სამეფო კართან ერთად.

სანამ გაერთიანებული ფეოდალური სამეფო არსებობდა, საქართველო ოთხ სადროშოდ იყო გაყოფილი: მეწინავე სადროშოს სამხრეთი საქართველო ქმნიდა, შემარჯვენეს — ლიხთ-იმერეთი, შემარცხენეს — ჰერეთ-კახეთი, ხოლო ცენტრს — ქართლი.

როდესაც გაერთიანებული საქართველო დაიშალა სამეფო-სამთავროებად და მათ თავიანთი საკუთარი საზღვრები გაუჩნდათ, საჭირო გახდა სამხედრო რეფორმების გატარებაც. ასეთი რეფორმა პირველად გატარდა კახეთში. ვახუშტის მტკიცებით, გიორგი კახთა მეფემ ქვეყანა ოთხ სადროშოდ დაჰყო. მაგრამ სადროშოს სარღლობა მან საერო ფეოდალებს კი არ ჩააბარა, როგორც უფრო გვიან ქართლის მეფემ, არამედ ეპისკოპოსებს. ეპისკოპოსობა მემ-

¹ ქუთაისიდან ოდიშისაკენ მიმავალ ევდემონ კათალიკოსს და მის ამაღლს თავს დაესხნენ ყაჩაღები, დაჭრილი კათალიკოსი ყაჩაღებს გაექცა, მაგრამ ცხენიდან გადმოვარდა და მოკვდა („ტოლოჩანოვისა და იველუვის ელჩობა საქართველოში“).

კვიდრობითი თანამდებობა არ იყო. ეს უმაღლესი საეკლესიო ხელისუფალნი მეფის მიერ ინიშნებოდნენ, ამიტომ ისინი უფრო ერთგულნი იყვნენ მეფისა, ვიდრე საერო პირნი. ამასთან ერთად ეპისკოპოსებს საეკლესიო ყმებისა და მიწების გამოყენების საქმეში მეფის მფარველობა სჭირდებოდათ, ვინაიდან საერო ფეოდალები მგლური თვალთ უყურებდნენ საეკლესიო მიწებს. კახეთში აღნიშნული სამხედრო რეფორმა ვახუშტის მიხედვით, კახეთის სამეფოს წარმოქმნის პირველ ხანებშივე გატარდა (მე-15 ს. 60-70 წწ.).

ქართლში აღნიშნული რეფორმა განსხვავებულად გატარდა. მართალია მეფე დავით X (1505-1525 წწ.) ქართლის სამეფო ძველი პრინციპის მიხედვით ასევე ოთხ სადროშოდ დაჰყო, მაგრამ სადროშოს სარღობა იმ მხარის ფეოდალებს ჩააბარა, საიდანაც ლაშქარი გამოდიოდა. ამ ღონისძიებამ ქართლის სამეფო ტახტი კიდევ უფრო დაასუსტა, ვინაიდან ქვეყნის ძალას სათავადოებიდან გამოყვანილი ლაშქარი შეადგენდა და ამ ლაშქრის მბრძანებელი ისევ ძლიერი ფეოდალი იყო.

როგორი მდგომარეობა ვაქვს ამ მხრივ იმერეთის სამეფოში? ერთადერთი, რასაც შეიძლება დავეყარდნოთ, არის ვახუშტი ბაგრატიონის ცნობა. ვახუშტის მიხედვით, იმერეთის სამეფო მე-16 საუკუნის პირველი ნახევრიდან ოთხ სადროშოდ არის დაყოფილი.

პირველი სადროშოა ვაკის იმერეთი, მეორე — არგვეთის, მესამე — რაჭის და მეოთხე — ოკრიბა-ლეჩხუმი¹. ე. ი. ისე, როგორც ქართლისა და კახეთის მეფეებს, ბაგრატი მეფესაც ჩაუტარებია სამხედრო ხასიათის რეფორმა და იმერეთი ოთხ სადროშოდ დაუყვია. როგორც ვახუშტის ცნობიდან ირკვევა, იმერეთშიც სადროშოს უფროსობა თვით სადროშოში შემავალ ფეოდალს ჰქონდა მინდობილი. როგორც ზემოთ აღვნიშნეთ, ეს წესი მეფის ხელისუფლებას ასუსტებდა, სამაგიეროდ ფეოდალის უფლებებს ზრდიდა და უფრო დამოუკიდებელს ხდიდა.

მოგვიანებით, მე-17 საუკუნეში, სადროშოს უფროსად სარღლის განსაკუთრებული თანამდებობაა შემოღებული.

* * *

როგორც დავინახეთ, ბაგრატი მეფის ცდა სამცხე-საათაბაგოს შემოერთებისა, მარცხით დამთავრდა. ქვეყნის შიგნით კიდევ უფრო განმტკიცდა ოდიშისა და გურიის სამთავროების დამოუკიდებ-

¹ ვახუშტი ბ ა გ რ ა ტ ი ო შ ი, აღწერა სამეფოსა საქართველოსა, გვ. 162 — 165.

ლობა, თვით მეფეც იძულებული გახდა 1555 წლის ამასიის ზავის შემდეგ ოსმალეთის ბატონობა ელიარებინა და ხარკი ეხადა ქალაქათა სახით. ამის შედეგად იმერეთის სამეფოს საშინაო მდგომარეობა უარესდება. ოსმალეთის გამეზობლებამ და მისი უფლებების აღიარებამ, ხშირ-ხშირმა თარეშებმა და ოსმალთა მიერ შავი ზღვის შეკვრამ დასავლეთი საქართველო გასაჭირში ჩააგდო. ქვეყნის შიგნით გახშირდა სხვადასხვა ბოროტმოქმედებანი, განსაკუთრებით ტყვის სყიდვა, რაც ოსმალთა გამეზობლებამ და ხელშეწყობამ გამოიწვია.

ტყვის სყიდვა, ქურდობა-ავაზაკობა, მკვლელობა, ეკლესიების ძარცვა იმდენად გაზრდილა და გავრცელებულა, რომ აუცილებელი გამხდარა საეკლესიო კრების მოწვევა, რომელიც ფეოდალურ საზოგადოებას თავისი ავტორიტეტით წინ აღუდგებოდა და მოუწოდებდა ამ უმსგავსოებათა წინააღმდეგ საბრძოლველად. სწორედ ამ მიზანს ემსახურებოდა ბაგრატ იმერთა მეფის მიერ მე-16 საუკუნის 50-იან წლებში მოწვეული საეკლესიო კრება.

ბაგრატ III დასავლეთი საქართველოს საერო და სასულიერო ფეოდალები შეკრიბა და დღის წესრიგში დააყენა ყველაზე მტკივნეული საკითხი — ტყვეთა სყიდვის აკრძალვა.

კრებას დაესწრო აფხაზეთის კათალიკოსი ევდემონი, საგანგებოდ მოწვეულ იქნა ქართლის კათალიკოსი მალაქია და დასავლეთი საქართველოს 10 ეპისკოპოსი: ქუთათელი, გენათელი, ჭყონდიდელი, ბედიელი, მოქველი, დრანდელი, ცაგერელი, ხონელი, ნიკორწმინდელი და ცაიშელი. ამ საეკლესიო კრებამ იმსჯელა გამრავლებულ ბოროტმოქმედებათა შესახებ და შეიმუშავა ხალხის ზნეობრივი ცხოვრების ამალღების მიზნით „სამართალი კათალიკოსისა“.

ტყვეთა სყიდვა ყველაზე მეტად დასავლეთ საქართველოში გავრცელდა. ოსმალეთის გამეზობლების შემდეგ ტყვეთა სყიდვამ უკიდურესი მახინჯი ფორმა მიიღო. ეს სოციალური სენი განსაკუთრებით მე-16 საუკუნიდან გაძლიერდა¹. ამ მოვლენას ღრმა ეკონომიური და საზოგადოებრივი მიზეზები ჰქონდა.

ტყვის სყიდვას ქართველი ერისათვის უდიდესი საფრთხე მოჰქონდა: ხალხის საუკეთესო ნაწილი, მისი ჯანსაღი ახალგაზრდობა, უცხოეთში მიჰყავდათ და საქართველოს სამუდამოდ ეკარგებოდა. არც ერთ ომს, არც ერთ უცხოელ დამპყრობელს ხმლით იმდენი ზარალი არ მიუყენებია საქართველოსათვის, რამდენიც ტყვის სყი-

¹ ნ. ბერძენიშვილი აღნიშნავს, რომ მე-14—15 საუკუნეებში ტყვეთა სყიდვა ჯერ მცირედ უნდა ყოფილიყო შემოსული (იხ. მისი საქართველოს ისტორიის საკითხები, ტ. 6, გვ. 170).

დვამ მიაყენა. „ტყვის სყიდვა — აღნიშნავს ნ. ბერძენიშვილი — კლასობრივი ბრძოლის ყველაზე უფრო მახინჯი და ველური ფორმა იყო საშუალო საუკუნეების საქართველოში“¹

მეფესა და ერისთავებს შორის 1462 წელს დამყარებული დამოკიდებულება გრძელდება XVI საუკუნის 40-იან წლებამდე. დადიანი სარგებლობს იმერეთის სამეფო კარის საგარეო პირობების გართულებით და უარს უცხადებს მეფეს სამხედრო ვალდებულების შესრულებაზე.

„ამგვარად, — ასკვნის ო. სოსელია, — დამოუკიდებელი სამთავროების ჩამოყალიბება დასავლეთ საქართველოში დაიწყო მე-13 საუკუნის 20 — 30-იან წლებში და საბოლოოდ დამთავრდა მე-16 საუკუნის შუა წლებში“².

სოხოსიტას მარცხის შემდეგ, მეფემ გადაწყვიტა მთავრების დამორჩილება და მათი სამფლობელო ქვეყნის შეერთება იმერეთის სამეფოსთან. ამ განზრახვით მოიხმო ლევან დადიანი, ვითომც სანადიროდ ხონის ქალაში „და დალატად შეიპყრო იგი ბაგრატ მპყრობელმან იმერეთისამან და პატიმარჰყო“ (1546 წ.). ამის შემდეგ გურიელიც მოიწვია მეფემ ოდიშზე სალაშქროდ. ვახუშტის მტკიცებით მეფეს განზრახვა ჰქონდა გურიელიც ხელთ ეგდო, გურიასა და ოდიშის სამთავროები გაეუქმებინა და მთელი დასავლეთი საქართველო გაეერთიანებინა.

გურიელმა საფრთხე იგრძნო და მეფის ჩანაფიქრი გამოიცნო „უკეთუ მოჰქრას ტომი დადიანთა და დაიპყრას ოდიში ბაგრატ, მაშინ იქნას ჩემზედაცა მოცალედ და მივილოს მეცა გურია“.

გურიელი მეფეს არ ეახლა, მოიმიზეზა რომ ათაბაგი და ოსმალები ჩემს ქვეყანას ემუქრებიანო და თან ურჩია დადიანი ფიცით შემოემტკიცებინა და გაენთავისუფლებინა.

თავის მხრივ მეფეც მიუხვდა თავის ყმას განზრახვას, განრისხდა და დადიანი გელათის სამრეკლოში გამოეკეტა.

ქაიხოსრო ათაბაგი ხედავდა ბაგრატის გაძლიერებას, რაც მისთვის ხელსაყრელი არ იყო. ამასთან ათაბაგს ახსოვდა ის ერთგულება, რომელიც ნებით თუ უნებლიეთ დადიანმა გამოიჩინა და იმერთა მეფეს ორგზის არ გაყვა სამცხისათვის ბრძოლის დროს. ათაბაგმა ლევან დადიანის მცველი ხოფილანდრე ჩხეიძე მოიხიდა

¹ ნ. ბერძენიშვილი, საქართველოს ისტორიის საკითხები, წ. 6, თბ., 1973, გვ. 170—172.

² ო. სოსელია, ფეოდალური ხანის დასავლეთ საქართველოს ისტორიიდან, თბ., 1966, გვ. 36; იხ. აგრეთვე, სამეგრელოს სამთავროს წარმოშობის თარიღისათვის, მიომხილველი, II, 1951, გვ. 171—182.

და დაავალა¹ სატუსალოდან მისი გაპარება, რაც მან კარგად შეასრულა კიდევ — დაღიანი გელათის სამრეკლოდან გააპარა და ახალციხეში გადაიყვანა.

ქაიხოსრო ათაბაგმა დაივიწყა ძველი მტრობა გურიელთან და ერთობლივი მოქმედებით ლევან დაღიანი ისევ გაამთავრეს იმავე წელს. ამ დროიდან გურიის სამთავრო გამოეყო იმერეთის სამეფოს.

ამრიგად, მთავრებთან ბრძოლაში ბაგრატ III დამარცხდა.

მეფეს სხვა ძალა არ გააჩნდა, გარდა თვით მთავრებს შორის წინააღმდეგობის გამოყენებისა და მათი ურთიერთღიპირისღიპობისა მცდელობისა, მაგრამ ეს ცდა თავიდანვე განწირული იყო ჩასაფურსავად და ასეც მოხდა. მთავრები, პირიქით, შეკავშირდნენ და მეფის წინააღმდეგ გაერთიანდნენ. მეფისაგან დამოუკიდებლად რომ ეგრძნოთ თავი, უფრო მოგვიანებით, ისინი ხონთქრის კალთასაც კი შეეფარნენ და უკვე 1553 წელს არზრუმის ფაშის ახალაში იმყოფებოდნენ.

ქაიხოსრომ მთავარ მიზანს მიაღწია: დაღიანის განთავისუფლებით მეფე დაასუსტა, მთავრები გააძლიერა და მეფისაგან დამოუკიდებელი გახადა. ამიერიდან ბაგრატ მეფეს აღარ შეეძლო სამცხის დაპყრობაზე ეფიქრა, ვინაიდან მთავრები მხარს არ დაუჭერდნენ, მარტო მისი ძალები კი სამცხის დასამორჩილებლად არ კმაროდა.

ბაგრატ მეფემ მაინც მიაღწია დაღიანსა და გურიელს შორის უთანხმოების ჩამოგდებას.

როდესაც გურიას ოსმალები შემოესივნენ და გურიელმა მეფესა და დაღიანს მოუწოდა დახმარებისათვის, ბაგრატ მეფეს მთავრების გაერთიანება არ სურდა, ვინაიდან მათ გაერთიანებაში თავისთვის საფრთხეს ხედავდა.

გურიელის დასახმარებლად მეფემ თავისი ძმა ვახტანგი გაგზავნა 500 მხედრით და თანაც საიდუმლოდ დაავალა, რომ მთავრები როსტომ გურიელი და ლევან დაღიანი ერთმანეთს არ შეხვედროდნენ. საჯავახოში მდგარმა ვახტანგმა ფოთში აფხაზეთ-ოდიშის ჯარით მდგომ ლევან დაღიანს შეუთვალა, რომ მეფემ და გურიელმა თქვენი ღალატი განიზრახესო, ვახტანგი ასე უთვლის ლევანს: ბაგრატ მეფე და როსტომ გურიელი თავს დაგვესხმიან და ანუ მოგაკვდინებენ და ანუ შეგიპყრობენ¹.

¹ ვახუშტი, გვ. 814.

„შაშინ სცნეს რა ესე მეგრელთა მოშიშართა, არღარა ინებეს წამოსვლა გურიას“.¹ ოდიშის ლაშქარი ისევ უკან გაბრუნდა. აღარც იმერეთის ჯარს მიუღია მონაწილეობა ბრძოლაში, ვინაიდან გურიელმა ოსმალნი თავისი ძალებით დაამარცხა და ჭოროხს იქით განდევნა. გურიელს ნაგები არ ჰქონდა და ცხენით გასვლა კი მდინარეში წყალდიდობის გამო არ შეიძლებოდა. ამით ოსმალებმა ისარგებლეს და „ალაშენეს ციხე გონია“. ამიერიდან ურთიერთშორის განაწყენებული მთავრები რიგრიგობით მიდიოდნენ გონიის ციხეში მყოფ აგრესორთან და თვით გადმოუძღვებოდნენ ხოლმე მეზობლის დასარბევად. ამას ოსმალნი სიამოვნებით კისრულობდნენ, ვინაიდან მეფე-მთავართა კინკლაობით ხელს უკეთ ითბობდნენ.

იმერეთის სამეფოს საზინაო და საგარეო პოლიტიკური ვითარება ამასიის ზავის შემდეგ

ბაგრატ მეფემ, მიუხედავად იმისა, რომ ყოველგვარ ზომებს მიმართავდა სამეფოს გასაძლიერებლად, ვერ შეაჩერა იმერეთის სამეფოს უკან ზვლა; რაც ღრმა სოციალური და ეკონომიური მიზეზებით იყო გამოწვეული. ეს თანდათანობით უფრო მეტი სიცხადით იჩენდა თავს. ნელი ნაბიჯით მიმდინარე დაცემის პროცესი ქვეყნის პოლიტიკურ ცხოვრებაშიც თავისებურ გამოხატულებას პოუვებდა.

ბაგრატ III გარდაიცვალა 1565 წელს. სამეფო ტახტი მისმა მემკვიდრემ გიორგი II დაიკავა.² მეფობის დასაწყისში გიორგი მეფემ შეძლო მშვიდობიანი ურთიერთობა დაემყარებინა გურიელთან და დადიანთან.

მაგრამ გიორგი მეფე თანდათან კარგავს მეფურ ავტორიტეტს და დასავლეთ საქართველოში იწყება გაუთავებელი შინა ომები. ბაგრატ III-ის შემდგომი დროიდან მთელი მე-16 საუკუნის ბოლო და მე-17—18 საუკუნეები დასავლეთ საქართველოში არსებითად მეფე-მთავართა ურთიერთბრძოლის ისტორიაა. დაუსრულებელმა ფეოდალურმა ომებმა ერთიანად გააჩანაგა ისედაც უკანმაველი ქვეყანა.

უკვე გიორგის მეფობის დროს დასავლეთი საქართველოს შინა-პოლიტიკური მდგომარეობა უკიდურესად დაიძაბა. ერთი მხრივ გრძელდებოდა მთავრებსა და მეფის ხელისუფლებას შორის ბრძო-

¹ ვახუშტი, გვ. 814.

² იქვე, გვ. 815.

ლა, ხოლო მეორე მხრივ მთავრები ერთმანეთს ეცილებოდნენ პირველობას. ხშირად თავს ესხმოდნენ და იკლებდნენ მეზობელ სამთავროებს. ამასთან, არც ერთი მხარე არ მორიდებია უცხო ძალების გამოყენებას, რასაც უარყოფითი შედეგი მოჰქონდა საქართველოსათვის, მთავრები კი ამას არაფრად აგუებდნენ.

გიორგი მეფე, გიორგი გურიელი, ლევან დადიანი, მთავართა სახლიკაცები, აფხაზეთის მთავრები და სხვა თავადები, ცალ-ცალკე თუ ჯგუფ-ჯგუფად იბრძვიან ერთმანეთის წინააღმდეგ და აობრებენ ქვეყანას. ამ გაუთავებელ ფეოდალურ ომებს 1568 წელს „უამიანობაც“ დაემატა და ქვეყანა საშინელ მდგომარეობაში ჩავარდა.

1568 წელს მოეწყო მეფე გიორგის საწინააღმდეგო შეთქმულება, მაგრამ გიორგი მეფემ სძლია თავის მოწინააღმდეგეებს და გურიელთან კავშირით სცადა დადიანის განდევნა. დადიანმა ოსმალეთის დახმარებით შეძლო როგორც სამთავრო ხელისუფლების დაბრუნება, ისე გურიელის დამარცხება და მისი მიმხრობა.

გურიელ-დადიანის კავშირი მეფეს არ მოსწონს, რადგან მეფის ხელისუფლება დასუსტებულია და არ შესწევს ძალა გაერთიანებულ მთავრებს წინ აღუდგეს. ამიტომ ცდილობს მათ შორის უთანხმოების ჩამოგდებას და მათ გათიშვას. მაგალითად, ბერი ეგნატაშვილი მოგვითხრობს გურიელსა და დადიანს შორის წარმოქმნილ კონფლიქტზე. დადიანი გურიელის დას გაეყარა, იგივე გააკეთა გურიელმა, მეფემ ისარგებლა და გურიის მთავართან, შეკავშირება გადაწყვიტა: „სცნა რა ესე გიორგიმ, მპყრობელმან იმერეთისამან, ვინათგან მტერ-ექმნეს ურთიერთს დადიანი და გურიელი, ამ გიორგის ჰყუა ერთი ქვრივი რძალი და მისცა გურიელსა თვისი ქალის მაგიერად და ესენიცა... (აქ ტექსტს აკლია, მ. რ.)... მაშინ იწყეს შურობად და ლაშქრობად დადიანისა“.¹ ამასვე იმეორებს მესამე ტექსტის ავტორიც.² მხოლოდ ვახუშტის მოეპოვება ცნობა იანეთში მეფეზე თავდასხმისა და ამის შემდეგ მეფე-გურიელის ერთობლივი ბრძოლს შესახებ დადიანის წინააღმდეგ: „შემდგომად განუტევა გურიელმანცა ცოლი თვისი, ასული ლევან დადიანისა, შურისათვის წინათქმულისა და მტერობითა დადიანისათა ემზახლა მეფე გიორგის, რაჟეთუ ჰყვანდა მეფესა გიორგის მუსადია ქვრივი და მისცა იგი გიორგი გურიელსა ცოლად და დაიმოყურნენ ამით. ამისთვის მოიმწო ვახტანგის ძის ძემ ხოსრომ დადიანი

¹ ქართლის ცხოვრება, II, გვ. 361.

² იქვე, გვ. 502.

და აჰან იშუელა ჭილაძე ვარაზა ლიპარტიანით ოდიშრით. ესენი ყოველნი ღალატად დაესხნენ გიორგი მეფესა იანეთს და იქმნა ბრძოლა ძლიერი. ვერა რაი, აენეს გიორგი მეფესა, არამედ ივლტოდნენ იგივენი ქ სა ჩფაძე, ქარ. ს ნვ და მოისროდნენ მახვილითა.

მაშინ იწყო მეფემან გიორგი მტერობა გურიელთურთ დადიანსა ზედა¹. როგორც ვხედავთ, 1568 წლის 24 ივნისს გიორგი მეფის წინააღმდეგ გამოსულან ხოსრო ვახტანგის ძე და გიორგი დადიანი, რომელთაც მოუმხრიათ აგრეთვე ჭილაძე ვარაზა და ლიპარტიანი. შეთქმულები ღამით აპირებდნენ გიორგი მეფეზე უვდასხმას, რომელიც იანეთში (საიაშვილოში) მდგარა თავისი ცოლ-შვილით. ამ საქმეში აქტიური მონაწილე ჩანს ბეჟან ნემსაძეც, რომელსაც გიორგი მეფისაგან წყალობად მიღებული ჰქონია სამეფო — სახასო მამული სოფ. ცხუკურს, მაგრამ მას მაინც მეფის ბიძაშვილისათვის დაუჭერია მხარი. თვითონ მეფე გიორგის მოთხრობით

„ნემსაძემ ვვილალატა და ჩნი ბიძაშვილი ხოსრო დაგვასხა თავსა იანეთს“. ეს ისე უნდა გაეიგოთ, რომ ბეჟან ნემსაძემ ალბათ მიაწოდა ცნობა მეფის მოწინააღმდეგეებს მეფის ადგილსამყოფელს შესახებ და შეიძლება მეგზურობდა კიდევ მათ. სხვა მხრივ ამ მცირე შეძლების აზნაურიშვილს ამ ამბოხების ორგანიზატორად ვერ მივიჩნევთ. თავდასხმა წარუმატებლად დამთავრდა, რადგან მეფე თავისი ცოლ-შვილით წინა დლით გასცილდა იმ ადგილს. მეამბოხეებს მხოლოდ მეფის ძმისწული („ძე კონსტანტინესი“) ჩაუგდიათ ხელთ. მეფემ შესძლო მეამბოხეების დამარცხება. იგი შეტევაზეც გადავიდა. მის მხარეზე დგას გურიელიც. ვახუშტის გადმოცემით „მაშინ იწყო მეფემან გიორგი მტერობა გურიელთურთ დადიანსა ზედა. ვერლარა შეუძლო დადიანმან წინააღმდეგობა და წარვიდა სტამბოლს“² იგივეს გადმოგვცემენ ქ ც ბის გაგრძელებათა ავტორები.³

მეფემ და გურიელმა ოდიშის სამთავრო დაიკავეს. ლევან დადიანს არ შეეძლო გამკლავებოდა მეფე-მთავრის გაერთიანებულ სამხედრო ძალას და ლტოლვილი სტამბოლში წავიდა, რათა დახმარება ეთხოვა სულთანისათვის.

სულთანმა, კმაყოფილმა იმით, რომ დასავლეთ საქართველოს

¹ ვახუშტი, გვ. 815—816.

² იქვე.

³ ქართლის ცხოვრება. II, გვ. 502.

სამეფო-სამთავროების საშინაო საქმეებში ჩაერეოდა და აქ ფეოდალურ შუღლს კიდევ მეტად გაამწვავებდა, სიამოვნებით მისცა ლევან დადიანს არზრუმ-ტრაპიზონის საფაშოების ლაშქარი და აჩუქა 9 ხომალდი.¹ ლევან დადიანი თურქთა დიდი ჯარით საქართველოში მოვიდა და დაღვა სატყეველას. „შეშინდა გურიელი სიდიდისათვის სპათათა, დაუწყო დადიანს ვედრება, რათა ზავჰყონ და არა მოუოხრონ ქვეყანა“² დადიანმა თავისი ასულის განმეებისათვის მისხლი მოსთხოვა გურიელს, თანხმობის შემთხვევაში აღუთქვა დაზავება. „ულონო კმნილმან გურიელმან მისცა სისხლად 10.000 ღრაკჰანი“³. ამის შემდეგ დადიანსა და გურიელს შორის ისევ აღსდგა მეგობრული კავშირი: თვით გურიელის დახმარებით ლევან დადიანმა იოლად შემოიღო ტყეცა ოღიში.

გიორგი მეფემ დადიანისა და გურიელის გაერთიანების წინააღმდეგ კონტრზომების მიღება გადაწყვიტა, „მეფემან გიორგიმ მოუწოდა ჯავახს ჭილაძეს, მოჰკლა იგი... რამეთუ მიმდგომიცა იყო დადიანისა და დაიპყრა მამული ჯავახ-ჭილაძისა მეფემან გიორგიმ“⁴.

ჭილაძეთა სათავადოს დიდი მნიშვნელობა ჰქონდა. იგი იმერეთ-გურიას უშუალოდ ემიჯნებოდა და ამ ქვეყნების თავდაცვაში შეეძლო დიდი როლი ეთამაშა. იმერეთის მეფეს თავისი პოზიციები რომ განემტკიცებინა, საჭირო იყო ჭილაძეთა მიწა-წყალი თვითონ დაეკავებინა.⁵

ეკვთიმე თაყაიშვილი აღნიშნავს, რომ „ჭილაძეები ერთ დროს მთავრები იყვნენ და ფლობდნენ დიდ მხარეს გურიასა და სამეგრელოს შორის. გურიაში მათი სამფლობელო საეროსთაოდლის მიდიოდა, ესე იგი, მათ ეჭირათ მთელი ახლანდელი მხარე გურიისა, რომელსაც ჰქვია საჯავახო, სამეგრელოს მხრით მათი სამფლობელო, როგორც ახლა ირკვევა, ბანძამდის მიდიოდა. ამ საზღვრებში შედიოდა, გარდა საჯავახოსისა, სამტრედიის, ეხლანდელი საჭილაო, აბაშა, სეფიეთი“⁶.

„ჭილაძეები მთავრული განკერძობებისაკენ მიისწრაფვიან“⁷. მე-15 საუკუნის II ნახევარში ისინი შეეცადნენ თავიანთი სამფლო-

¹ საქართველოს სიძველენი, ტ. II, 1909, გვ. 79.

² ვახუშტი, გვ. 816.

³ იქვე.

⁴ იქვე.

⁵ ო. სოსელია, ნარკვევები ფეოდალური ხანის დასავლეთ საქართველოს სოციალ-პოლიტიკური ისტორიიდან, 1973, გვ. 277.

⁶ ექ. თაყაიშვილი, არქეოლოგიური მოგზაურობა სამეგრელოში, ძველი საქართველო, III, გვ. 3.

⁷ ო. სოსელია, დასახ. ნაშრომი, გვ. 274.

ბელო სამთავროდ გადაექციათ, მაგრამ ვერ შეძლეს. ამის ერთ-ერთი მიზეზი მათი სათავედღოს გეოგრაფიული მდებარეობა იყო.

ჭილაძეების სამფლობელო მდებარეობდა რიონისა და ცხენისწყლის ორივე სანაპიროზე, ეკონომიურად სუსტად იყო დაკავშირებული ერთმანეთთან. ამან გაუადვილა მეზობელ სამთავროებს მისი დაპყრობა.

მეფე გიორგის საჯავახოდან უფრო წარმატებით შეეძლო ეწარმოებია ბრძოლა დადიანისა და გურიელის წინააღმდეგ, მაგრამ შუქის მიერ საქილაოს დაპყრობის განზრახვის გაგებისთანავე „აღუძნდათ დადიან-გურიელსა, შეითქვენენ და მოვიდნენ სპითა და არა აუფლებდენ გიორგი მეფესა მამულსა ზედა-ჭილაძისასა, არამედ ნახევარი დაიპყრა დადიანმან და ნახევარი გურიელმან“.¹ ამის შემდეგ ჭილაძისეულ იმ ტერიტორიას, რომელიც მიისაკუთრა დადიანმა, საქილაოს ეძახიან, ხოლო გურიელისას — საჯავახოს.

გურიელმა ეს მხარე ვერ შეინარჩუნა და იგი დადიანის ბიძამ ბათულიამ დაიპყრო. თუმცა დიდხანს არც მას შერჩენია ეს მხარე.²

1572 წელს გარდაიცვალა ლევან I დადიანი, იმავე წელს მთავრობს ტახტი მისმა ძემ გიორგიმ. დაიკავა.

დადიანი და გურიელი რომ გაეთიშა, გიორგი მეფე დადიანს დაემოყვრა და მისი და თავის შვილს, ტახტის მემკვიდრე ბავრატს შერთო ცოლად. ამით იშერეთსა და ოდიშს შორის ნათესაური კავშირი დამყარდა, რაც მათ ურთიერთმოკავშირეობას ნიშნავდა.

იმ დროს ასეთი დამოყვრება „არ ხდება სოციალურ და პოლიტიკურ ინტერესებისა და ანგარიშის გარეშე... დამოყვრება-დამძახლება, სახლის კაცად შეყრა, მოდაწერილობა თუ სხვაგვარი „მოკიდება“ უაღრესად სოციალურ-პოლიტიკურ საფუძვლებს და ანგარიშობას ემყარებოდა“.³ ვახტანგ მეფე თავის სამართლის წიგნის 23-ე შუბლში აღნიშნავს: „როგორც კაცი მამულით, კაცობით, ბატონის სამსახურით, ციხით, მონასტრით და უფროსის კაცის მოყურად მოკიდებით ამალღდების და სისხლი გაუდიდდების, ისე გაყრითა და მამულის მოკლებით სისხლიც მოაკლდების“. ნ. ბერძენიშვილის უპყვნით მეფის ძლიერება მის მოყვრად „მოკიდებულ კაცთა სიმრავლესა და ერთგულებაში“ იყო.⁴

¹ ვახუშტი, გვ. 816. ქართლის ცხოვრება, II, 1959, გვ. 502—503.

² ვახუშტი, გვ. 817. ქართლის ცხოვრება, II, 1959, გვ. 505, მარი ბროსე, საქართველოს ისტორია, II ნაწ., გვ. 181.

³ ნ. ბერძენიშვილი, „მოკიდებულისათვის“, საქართველოს ისტორიის საკითხები, III, თბ., 1966, გვ. 115.

⁴ ნ. ბერძენიშვილი, დასახ. ნაშრომი, გვ. 113—117.

გურიელმა მეფე-დადიანის საწინააღმდეგოდ „გარდობირა და-
დიანის ძმა მამია და მოიყვანა გურიას, შერთო დაი თვისი ცოლად.
მერმე შემოიკრიბნა სპანი გურიელმან, მიუხდა დადიანს ზუგდიდს,
ეკვეთა დადიანიცა, არამედ ბრძოლასა იძლია დადიანი გიორგი და
ივლტოდა აფხაზეთს“.¹ ამის შემდეგ გურიელი და მამია დადიანი
გიორგი მეფეს შეუთანხმდნენ, რომ თუ კი მამიას გადადიანებაზე
წინააღმდეგი არ იქნებოდა, ჰილაძისეულ მამულს მისცემდნენ, რო-
მელიც დადიანს ჰქონდა დაპყრობილი. გიორგი მეფე ამ წინადადე-
ბაზე უათანხმდა, მით უმეტეს. მამიაც ისეთივე მზაბალი იყო მისი,
როგორც გიორგი.²

დამარცხებულმა და გაძევებულმა გიორგიმ „იშოვა ლაშქარი
აფხაზეთისა, ჩიქისა და ჩერქეზისა“ და მამიას წინააღმდეგ წამოვი-
და. მამიამ შეელა სთხოვა გურიელს. გურიელიც თავისი ჯარით
ზუგდიდს მივიდა. ამჯერადაც გიორგი დადიანი დამარცხდა.³

გიორგი დადიანი, ძალით რომ ვერაფერი გააწყო, სამთავროს
ოპაბრუნებლად „ევედრა გიორგი მეფესა, რათა შწე ექმნას მას“.
გიორგი მეფე გურიელს შეეკითხა, თუ რა უყონ დადიანსა, გურიელ-
მა უთხრა „ვითარცა განუტევე დაი მისი და შივეც სისხლი, ეგ-
რეთვე მანცა განუტევა დაი ჩემი, მომცეს ნასისხლი ჩემი და მე
დავარწმუნო მამიას და ვყოთ იგივე დადიანადვე“.⁴

გიორგი დადიანი უათანხმდა ამ პირობაზე, მან აღუთქვა გური-
ელს 10.000 დრაჰკანის მიცემა და ამავე დროს მეფეს სთხოვა სიმ-
ტკიცისათვის მისთვის ცოლად მიეცა ცოლისდა, ჩერქეზის ბატო-
ნის ასული, რომელიც ქუთაისის სამეფო კარზე იზრდებოდა. მეფე
დათანხმდა, მამია დადიანი კი დაარწმუნეს, შერიგებოდა ძმას და
მთავრის ტახტი ძმისთვის გადაეცა როგორც უფროსისათვის, სამა-
გიეროდ საუფლისწულოდ გაშოუყვეს ჰილაძის ყოფილი მამული.
ხოლო „ვინაიდგან მწირობდა დადიანი და არა აქვდა ეგოღენი
(10.000 დრაჰკანი) მისთვის მისცა ხოფი, ვიღრე ამოვიდეს ფასი ოქ-
როსა“.⁵

ამის შემდეგ ერთხანს მშვიდობა მყარდება, მაგრამ შფოთი ისევ
ბათულია დადიანმა ასტეხა. მან გაიხსენა გიორგი დადიანის მტრო-
ბა, რომელმაც ადრე ცოლი წაართვა და მისი მოკვლა გადაწყვი-
ტა. საჯავახოს ქართან ერთად მან „მოობირნა ვინამენიცა მეგრელ-
ნი“ და „წარვიდა, რათა თავდასხმით ლალატად მოჰკლას გიორგი

¹ ვახუშტი, გვ. 817.

² იქვე.

³ ქართლის ცხოვრება, II, 1959, გვ. 503.

⁴ ვახუშტი, გვ. 817—818.

⁵ იქვე, გვ. 818.

დადიანი“. ეს ამბავი დადიანმა გაიგო და სასწრაფოდ ოდიშის ლაშქარი შეკრიბა. ბათულიამ ველარ გაბედა თავდასხმა და ისევ უკან მობრუნდა. ხოლო გიორგი მეფემ და დადიანმა გურიელს ნება დართეს „რათა მოჰკლას ბათულია და დაიპყროს თვით საჯავახო“.¹ გურიელი სიხარულით შეზვდა ამ მოწოდებას. მან ბათულია შეიპყრო და ციხეში გამოჰკეტა, ხოლო საჯავახო საგურიელს შეუერთა. მეფემ და დადიანმა კვლავ მოსთხოვეს გურიელს ბათულიას მოკვლა, მაგრამ მან ეს არ შეასრულა „არამედ მისცა მათ ნება და ამათ წარავლინეს კაცი და მოაშთვეს ბათულია და იქმნებოდა ესრეთ მშვიდობა“.²

ამრიგად, მთავრებთან ურთიერთობაში მეფე იძულებული ხდება ხშირად შეიცვალოს მათდამი დამოკიდებულება. მეფის ხელისუფლება დასუსტებულია და არ შესწევს ძალა გაერთიანებული მთავრების ძალას წინააღმდეგობა გაუწიოს, ამიტომ იგი ცდილობს მთავრებს შორის უთანხმოება ჩამოაგდოს და ისინი გათიშოს. თავის მხრივ მთავრებიც გაერთიანებული ძალებით გამოდიან მეფის წინააღმდეგ, რადგან გრძნობენ, თუკი ერთად არ იბრძობენ, ცალ-ცალკე დაპარცხდებიან და თავიანთ სამფლობელოს დაკარგავენ.

იმიერეთის სამეფო XVI საუკუნის უკანასკნელ მემოთხედში

1555 წლის ამასიის ზავის დადების შემდეგ ირან-ოსმალეთს შორის წინააღმდეგობა არ შენელებულა; მართალია, ოსმალეთმა ირანთან ერთგვარ წარმატებას მიაღწია, მაგრამ მაინც უკმაყოფილო იყო და ზელსაყრელ მოქმენტს უცდიდა, რომ ისევ ახალი ომი გაეჩაღებინა.

ოსმალეთს განსაკუთრებით ამიერკავკასიის დაპყრობა აინტერესებდა, წარმატების შემთხვევაში მას საშუალება ექნებოდა ირანისათვის ჩრდილო-დასავლეთიდან შეეცია. კასპიის ზღვის სანაპიროს დაპყრობით ოსმალეთი შუა აზიის ხალხებთან ურთიერთობას განაპტიცებდა. ოსმალეთისათვის დიდი მნიშვნელობა ჰქონდა აგრეთვე იმ სავაჭრო გზების ხელში ჩაგდებას, რომელნიც ამიერკავკასიაში მდებარეობენ. მის მიზანს წარმოადგენდა ხელთ ეგვლო ევროპა-აზიის ახალი სავაჭრო გზაც, ვოლგა-ასტრახანზე რომ გადიოდა.

¹ ვახუშტი, გვ. 818.

² ვახუშტი, გვ. 818. ქართლის ცხოვრება, II, 1950, გვ. 504; მარი ბროსე, საქართველოს ისტორია, II ნაწ., 1900, გვ. 481.

ამიერკავკასიის დაპყრობით და ჩრდილოეთ კავკასიაში გაბატონებით ოსმალეთი უპირისპირდებოდა რუსეთს, რომელიც თანდათანობით მიიწვედა სამხრეთისაკენ და მფარველად ევლინებოდა ამიერკავკასიის ხალხებს, რომელნიც ოსმალეთის წინააღმდეგ იბრძოდნენ.

თავის მხრივ ირანის შაჰი დაინტერესებული იყო ამასიის ზავის პირობები შეენარჩუნებინა. მაგრამ თურქეთის სულთანმა გადაწყვიტა ესარგებლა ირანის შინა არეულობით და ომი დაეწყო.

1578 წლის 2 იანვარს ოსმალეთის ლაშქრის მთავარსარდლად დაინიშნა მუსტაფა ლალა ფაშა. მას დავალებული ჰქონდა ამიერკავკასიის ქვეყნების დაპყრობა და ოსმალეთისათვის დამორჩილება.

პირველი დიდი ბრძოლა ოსმალეთსა და ირანს შორის ჩილდირის ველზე მოხდა. ამ ბრძოლაში ოსმალებმა ბრწყინვალე გამარჯვება მოიპოვეს. ამის შემდეგ გაშარჯებულებს გზა გახსნილი ჰქონდათ საქართველოსაკენ. 24 აგვისტოს მათ თბილისი დაიკავეს.

მუსტაფა ფაშა ცდილობს კიდევ უფრო მეტად გააღრმავოს ქართლ-კახეთ-იმერეთის სამეფოებს შორის მტრული დამოკიდებულება. ჭერ კიდევ საქართველოში მოხვლამდე იგი იმერეთის მეფეს გიორგის სწერდა, რომ დახმარება აღმოეჩინა თბილისის ციხის აღებაში და თუ კი გაიმარჯვებდა ციხეს მის შვილს მისცემდა.¹ ლალა ფაშა გიორგის სწერდა: „სწრაფი მოსახრებულობა გამოიჩინეთ, თქვენ თანამოღვაწეებთან, ხელქვეითებთან და თქვენ მომხრეებთან ერთად უნდა მოახერხოთ თბილისის ციხის აღება და იგი თქვენი შვილისათვის გვიბოძებია“².

მსგავსი შინაარსის წერილი გაეგზავნა კახთა მეფესაც. აღსანიშნავია, რომ თბილისი მუსტაფა ლალა ფაშამ გიორგი მეფის შვილს არ უბოძა. ხოლო კახეთის მეფეს ალექსანდრე II გამაჰმადიანება დაუდო პირობად. კახთა მეფემ ეს პირობა უარყო.³

შარვანიდან უკან მობრუნებულმა ფაშამ თბილისის საქმეები მოაგვარა, გორი გაამაგრა და ლაშქრის ერთი ნაწილი იმერეთის დასაპყრობად გაგზავნა „ამის მცნობი გიორგი მეფე წარვიდა სპითა მოსწრაფედ და შეუკრა მთა ლიხისა და მოვიდნენ ოსმალნიც, დაუწყეს ბრძოლა იმერთა სიმაგრით-კამო და მოსერიდნენ მრავალთა ოსმალთა. შემდგომად იძლივნენ ოსმალნი და მოსწყვეტ-

¹ მ. სვანიძე იმერეთის მეფის გიორგის შვილად თელის გამაჰმადიანებულ იუსუფ ფაშას (შამას) (მ. სვანიძე, საქართველო-ოსმალეთის ურთიერთობის ისტორიიდან მე-16—17 სს. თბ., 1971, გვ. 141—142, 143—155).

² მ. სვანიძე, დასახ. ნაშრ., გვ. 115.

³ იქვე.

დიან იმერნი, აღიღეს ალაფი და მოვიდა გამარჯვებული მეფე ქუთაისს“.¹

ამრიგად, ოსმალთა ცდა, რომ იმერეთი დაეპყროთ, ამჯერად მარცხით დამთავრდა.

სულთანს განზრახული ჰქონდა დასავლეთი საქართველოსათვის შავი ზღვის სანაპიროდან შეეტია და დაეპყრო.

1579 წელს, ლალა ფაშას ბრძანებით აღმირალი კილიჩ ალი-ფაშა 60 ხომალდისაგან შემდგარი ფლოტით შავი ზღვიდან მდინარე ფაზისის (რიონის) შესართავში შევიდა და ქ. ფოთში ციხის აშენებას შეუდგა.

ფოთის დაპყრობის შემდეგ ოსმალები მდ. რიონით ქუთაისისაკენ გაემართნენ და მისი დაპყრობა სცადეს. არქანჯელო ლამბერტი წერს: „ამ განზრახვით გაგზავნეს თავისი გალერები ფაზისში, ხოლო როგორც კი ეს გალერები მიუახლოვდნენ ქუთაისს, მათ დახვდათ თოფებით შეიარაღებული ჯარი ქართველებისა, რომელიც ჩაესაფრა, სადაც უფრო ვიწრო იყო მდინარე, და ისე ძლიერად დაუწყო თურქებს თოფის სროლა ორსავე ნაპირიდან, რომ აიძულა იგინი მაშინვე თავი დაენებებინათ თავის განზრახვის შესრულებისათვის“.²

არქანჯელო ლამბერტი იქვე მიუთითებს, რომ ლევან დადიანმა თურქების მიერ აშენებული ციხე ფოთში დაანგრია და იქიდან 25 ზარბაზანი წამოიღო.³ ამრიგად, ცდა ოსმალებისა, რომ დასავლეთი საქართველო ზღვიდან დაეპყროთ მარცხით დამთავრდა.

თურქეთის სულთანს მურად III უკმაყოფილო იყო 1579 წლის ომის შედეგებით, ამიტომ მან მთავარსარდალი მუსტაფა ლალა ფაშა გადააყენა. გადაყენების მიზეზი ის იყო, რომ მან ვერ შეძლო ქართველი ხალხის წინააღმდეგობის დაძლევა და სიმონ მეფის დამორჩილება.

სიმონ მეფე, რომელიც აქამდე 9 წლის მანძილზე ყიზილბაშთა ტყვეობაში იმყოფებოდა და ალამუტის ციხეში იყო გამოკეტილი შაჰ-ხუდაბანდემ განათავისუფლა და ოსმალეთის წინააღმდეგ ბრძოლა დაავალა.

სიმონი ქართლში 1578 წლის ოქტომბერში ჩამოვიდა. ოსმალებს ამასობაში ქართლი დაეპყროთ და თბილისი საბეგლარბეგოდ გადაეჭციათ. ამით ისინი მთელ ქართლში „ოსმალობის“ (ოსმალური სოციალურ-ეკონომიკური და პოლიტიკური წყობილების) შემო-

¹ ე ა ხ უ შ ტ ი, გვ. 817.

² არქანჯელო ლამბერტი, სამეგრელოს აღწერა, გვ. 172.

³ იქვე.

ლებას აპირებდნენ. ქართლის მოსახლეობის ყველა ფენა დამპყრობ-
თა ამ პოლიტიკით უკიდურესად უკმაყოფილო იყო და მტრის წი-
ნააღმდეგ ბრძოლას არ წყვეტდა. ოსმალებს მდგომარეობა გაურ-
თულდათ. განსაკუთრებით შევიწროებული თბილისის გარნიზონი
იყო. ოსმალთა სარდლობა იძულებულია ჯარი-ჯარზე გამოგზავნოს,
რათა თბილისში ჩაყენებული ოსმალთა სამხედრო ძალა სრული
განადგურებისაგან გადაარჩინოს. სიმონი წარმატებით ებრძოდა
როგორც თბილისში ჩაყენებულ ოსმალებს, ისე მათ დასახმარებ-
ლად გამოგზავნილ ჯარებს და მათ დიდ ზიანს აყენებდა¹. ამ წა-
რუშატიებლობის გამო ოსმალებმა თბილისის აკლავიდან მუჰამედ
ფაშა შესცვალეს, მაგრამ ვერც ახალმა ბეგლარბეგმა ჰაჯი ბეგ ზადე
აჰმედ ფაშამ შეძლო მდგომარეობის გამოსწორება. ოსმალთა სარ-
დლობა იძულებული ხდება ქართველებთან კომპრომისის გზას და-
აღვეს. ამ მხრივ საგულისხმოა აღმოსავლეთის ლაშქრის მთავარ-
სარდლის მოვალეობის დროებით შესრულებლის ხუსრევ ფაშას
მიერ სიმონ მეფისადმი წერილის გაგზავნა, რომელშიც ოსმალო
სარდალი სიმონ მეფეს ჰპირდებოდა თბილისის და მისი ქვეყნის
გადაცემას „საფაღიშაჰო ლივას“ სახით, თუ იგი მის მხარეზე დად-
გებოდა და დახმარებას აღმოუჩენდა თბილისში მყოფ ოსმალებს².
ოსმალეთის მთავრობის ეს წინადადება სიმონ მეფისათვის მიუღე-
ბელი იყო თუნდაც იმიტომ, რომ ამ პირობით ქართლს მეფე მხო-
ლოდ ოსმალო მოხელედ იქცეოდა და ქართლში „ოსმალობა“ კვლავ
ძალაში ღარჩებოდა. ეს წინადადება იმ მხრივ არის საინტერესო,
რომ ოსმალები ქართველი ხალხის წინააღმდეგობის დათრგუნვას
თუ შეწყვეტას ცდილობდნენ ასეთი გარეგნული დათმობით—ქვეყ-
ნის სათავეში ფორმალურად ქართველი მეფის ჩაყენებით, რომელსაც
არაავითარი მეფური უფლება არ ექნებოდა და მხოლოდ ოსმალო
მოხელე იქნებოდა. სიმონ მეფე ამაზე არ დათანხმდა. ამასობაში
საქართველოში ჩამოღის ახალი სარდალი სინან ფაშა, რომელიც
გადაყენებული მუსტაფა ლალა ფაშას მაგივრად იყო დანიშნული.
აღსანიშნავია, რომ სულთანმა ეს ახალი სარდალი ამავე დროს თა-
ვის დიდ ვეზირად დანიშნა. სამცხიდან თბილისისაკენ მომავალმა
სინან ფაშამ თან წამოიყვანა სამცხის მთავრები ყვარყვარე და მა-
ნუჩარი. სამცხის მთავარი ყვარყვარე იმერეთში გაგზავნა დავალებ-
ით დაეთანხმებინა იმერეთის მეფე გიორგი რათა იგი სიმონ მე-
ფეს არ მიმხრობოდა და პირიქით ოსმალებისათვის დაეჭირა მხა-
რი სიმონისა და ქართლის წინააღმდეგ ბრძოლაში. რითი შეიძლებო-

¹ მ. ს. ვ ა ნ ი ძ ე, დასახ. ნაშრ. გვ. 136—138.

² იქვე, გვ. 139—140

და დაეთანხმებინათ იმერეთის მეფე ამ წინადადებაზე? გავიხსენოთ, რომ ჯერ კიდევ მუსტაფა ლალა ფაშა ჰპირდებოდა გიორგი მეფეს, რომ თუ იგი ოსმალებს დაეხმარებოდა, თბილისს მის შვილს მისცემდა. მაგრამ თბილისის აღების შემდეგ ქალაქი ლალა ფაშამ იმერეთის მეფის შვილს არ უბოძა. ამჯერად კი, როდესაც ოსმალებს ასე გაუჭირდათ, გასაგებია, ამ ძველი პირობის ასრულების შესახებ დადგებოდნენ. მ. სევანიძე იხილავს მთელი რიგი ოსმალური და სხვა წყაროების ჩვენებას, რომ სინან ფაშამ თბილისის ბეგლარბეგობიდან გადააყენა აჰმედ ფაშა და მის ადგილზე დანიშნა გიორგი ბეგი. მკვლევარი მიღის დასკვნამდე, რომ გიორგი ბეგი უნდა იყოს გიორგის შვილი შამია, რომელმაც გამაჰმადიანების შემდეგ მიიღო იუსუფ ფაშას სახელი.¹ სამართლიანად მსჯელობს მ. სევანიძე: „ის გარემოება, რომ ქართლის (თბილისის) ბეგლარბეგად დანიშნული იქნა საქართველოს სამეფო გვარის გამაჰმადიანებული წარმომადგენელი და არა თურქი მოხელე, ნიშნავს ოსმალეთის უკან დახვევას და დათმობას, მაგრამ მეორე მხრივ ამით სულთანმა თითქმის მის წინააღმდეგ მებრძოლ ძალებს, უპირისპირებდა რა ერთიმეორეს სიმონ ქართლის მეფესა და იმერეთის მეფეს გიორგის“.²

გასათვალისწინებელია ის გარემოებაც, რომ გიორგი მეფე ალბათ შიშობდა, რომ თუ იგი არ დაეთანხმებოდა ოსმალთა სარდლის წინადადებას, ეს უკანასკნელი მას მიუსევდა გურიელსა და დადიანს, რომლებიც მუდამ მისწრაფოდნენ, რაც შეიძლება მეტი დამოუკიდებლობა მოეპოვებინათ იმერეთის მეფისაგან და საამისოდ არც დამპყრობელთა სამსახურს ერიდებოდნენ. ოსმალთა დემაგოგიურმა პოლიტიკამ თავისი შედეგი გამოიღო და დასავლეთი საქართველოს მეფე-მთავრები ქართლში აწყობენ ლაშქრობას. „მაშინ გაზრახვითა ათაბაგისათა შემოიკრიბნა გიორგი მეფეჲს სპანი და მოიყვანა დადიან-გურიელიცა სპითა მათითა“; „ვინაიდან აქუნდათ ერთობა და ბრძანებულიცა იყო ხონთქარისა, მიუხდნენ შიდა ქართლს, ვერა სადა ჰპოვნეს ზიზანნი და დაწვნეს სრულიად გაღმა-გამოღმართნი. მერმე უკუმოიქცნენ და მოვიდნენ უვნოდ“. ამრიგად, მ. სევანიძის ვარაუდით, მათ ლაშქრობას მხოლოდ ის შედეგი მოჰყვა, რომ გიორგი მეფის შვილი დანიშნეს თბილისის ბეგლარბეგად, ისე კი ქვეყანა დაზიანებული ყოფილა და სიმონ მეფესთანაც შეჯახება არ მომხდარა. მემატრიანე იმასაც კი წარმატებად უთვლის მომხდურთ, რომ ისინი უკან უვნებლად დაბრუნდნენ.

¹ მ. სევანიძე, დასახ. ნაშრ., გვ. 141—142.

² იქვე, გვ. 143.

ამრიგად, იმერეთის მეფემ, დასავლეთ საქართველოს სხვა მთავრებთან ერთად, წებით თუ უნებლიეთ, მოძმეთა წინააღმდეგ აღმართა ხმალი. თუმცა ფეოდალური ეთაყით ამაში არაფერი იყო არაჩვეულებრივი. ამაზე აღრეც და მის შემდეგაც, როგორც ერთ მხარეს, ისე მეორე მხარეს ერთმანეთის დალაშქრასა თუ დარბევასი არაერთხელ მიუღიათ მონაწილეობა. ესლა კი განსაკუთრებული ვითარება იყო. ქვეყანას უღიდესი საფრთხე აღგა. ოსმალეთი საბოლოო დაპყრობით და გაოსმალებით ემუქრებოდა მთელ ქართველ ხალხს. სულერთია, საამისოდ პირველ რიგში რომელ კუთხეს აირჩევდა. ამ ვითარებაში ფეოდალური გათიშულობის მიუხედავად, ძალების გაერთიანება იყო საჭირო და ერთიანი ძალით აღდგომა აგრესორის გეგმების ჩასაშლელად. ამ გაერთიანებული ბრძოლის მეთაური იყო სიმონ I. სხვა მეფე-მთავრები უფრო შეეგუების პოლიტიკას არჩევდნენ და ძალაუვნებურად მტრის იარაღი ხდებოდნენ. ზოგიერთი ამას მალე მიბედა, მაგალითად ჯამცხის მთავარი მანუჩარი, მაგრამ ამჯერად ოსმალთა დემაგოგიას ერთგვარი წარმატება მაინც ჰქონდა. სიმონის შეურთგებელმა ბრძოლამ დამპყრობთა იმედი გააქარწყლა.

ამასობაში დასავლეთ საქართველოში ახალი ძალით იფეთქა ფეოდალურმა შინა ომმა. 1582 წელს გარდაიცვალა გიორგი დადიანი. მთავრად მისი ძმა მამია დაჯდა. ახლადგამთავრებული მამია დადიანი ოდიშის ჯარით გურიელს მიუხდა. გურიელი ბრძოლაში დამარცხდა და ლტოლვილი სტამბოლში გაიქცა. გამარჯვებულმა დადიანმა გურიელის გვარიდან გამოძებნა ვინმე ვახტანგი და გურიელად დასვა 1583 წელს. ამავე წელს იმერთა მეფემ გიორგიმ დაიჭირა თავისი ძმა კონსტანტინე და მის შეილთან, როსტომთან ერთად ციხეში გამოკეტა, რათა მის მემკვიდრეს, მცირეწლოვან ლევანს მეფობაში არ შეეცილებოდნენ.

გიორგი II 1586 წელს გარდაიცვალა. ტახტი მისმა შეილმა, 12 წლის ლევანმა დაიჭირა. კონსტანტინე ბატონიშვილმა ციხიდან გამოსვლა მოახერხა, ისარგებლა ლევანის მცირეწლოვანებით, აჯანყდა და დაიპყრო არგვეთი, ციხეები სკანდა და კაცხი.

ლევანმა ცოლად შეირთო მამია დადიანის ასული მარეხი. სიმამრის დახმარებით 1587 წელს მან გაილაშქრა აჯანყებული ბიძის წინააღმდეგ და დაამარცხა.

ლევანის მეფობის დროს (1583—1590 წწ.) იმერეთში სრული ანარქიაა გამეფებული. დადიანი და გურიელი ერთმანეთს მტრობენ, იმერელი თავადების ერთი ნაწილიც ჩარეულია ამ შინაურ ბრძოლებში; ეს იმ დროს, როდესაც ქვეყანას ოსმალთა მხრივ სრული დაპყრობა და გადაგვარება ელოდა. ირან-ოსმალეთის ომი თუ

ოსმალეთის სასარგებლოდ დამთავრდებოდა და ქართლის წინააღმდეგობაც დაძლეული იქნებოდა, ოსმალთა დამპყრობლები აღარ დააყოვნებდნენ როგორც ქართლში, ისე იმერეთში ადგილობრივი მმართველობის გაუქმებას და აქ თავიანთი სოციალ-ეკონომიკური და პოლიტიკური წყობილების შემოღებას, ე. ი. ქართულ ფეოდალურ ურთიერთობას უფრო ჩამორჩენილი ოსმალური, „ბარბაროსული ფეოდალიზმი“ (ე. მარქსი) შეეცვლიდა, ქართველი ხალხი მოექცეოდა დამპყრობელთა მტაცებლური ექსპლოატაციის ქვეშ და თანდათანობით დაპყრობილი იქნებოდა თავის ეროვნულ-კულტურულ სახეს. ასეთ ვითარებაში აღუცლებელი იყო ქართველი ხალხის ძალების გაერთიანება და ამ ძალების მიმართვა დამპყრობლების წინააღმდეგ. ქართლში სიმონ მეფე საკმაოდ წარმატებით ებრძოდა ოსმალებს და ქვეყანაში ფეხის მოკიდების საშუალებას არ აძლევდა. ამ ბრძოლებიდან განზე იდგა იმერეთი. ხოლო როგორც დავიანახეთ, ზოგჯერ დამპყრობელი ქართლის წინააღმდეგ მის გამოყენებასაც აზერხებდა. იმერეთის თავადების ნაწილი ასეთი მდგომარეობით და აღნიშნული პერსპექტივით უკმაყოფილო და შემფოთებული იყო, ამიტომ ოსმალეთის წინააღმდეგ მებრძოლ სიმონ მეფეს იმერეთის ფეოდალთა ეს ნაწილი მხარს უჭერდა.

სიმონ მეფემ წინასწარი დაზვერვა მოახდინა. მას სურდა გამოერკვია, თუ როგორი პოლიტიკური მდგომარეობა სუფევდა დასავლეთ საქართველოში. დაზვერვამ სასურველი შედეგი ამცნო: „იმერეთა მისცეს სვიმონს პირი მტკიცე“¹, „აბაშიძენი და ჩხეიძენი და წერეთელნი და აწ ვინც წყალწითელას აქეთ საბატიოს კაცის შვილნი ესახლნენ, ყველანი მეფეს სვიმონს მოუვიდნენ“.²

ამის შემდეგ სვიმონ მეფე ქართლის ჯარით იმერეთის შემოსამტკიცებლად წავიდა. თავის მხრივ ლევან მეფემაც იმერეთის ჯარი შეკრიბა და დადიანსა და გურიელს მოუწოდა, მაგრამ მთავრები ერთიმეორის შურით ლევანს არ ეახლნენ. ბრძოლა მოხდა 1588 წელს ვოფანთოს³. ლევანი დამარცხდა და ლეჩხუმში გადაიხვეწა. სიმონ მეფემ ქუთაისი დაიკავა, თავისი მოხელეები განაწესა, თავადებს მძევლები გამოართვა და სასწრაფოდ უკან გაბრუნდა, ვინაიდან ოსმალთა მეციხოვნეების შიშით ქართლიდან დიდი ხნით წასვლა არ შეეძლო.

¹ ვახუშტი, გვ. 820.

² გოფანთოს ბრძოლას ვახუშტი 1588 წ. ათარილებს, ბერი ეგნატაშვილი კი

³ გოფანთოს ბრძოლას ვახუშტი 1588 წ. ათარილებს ბერი ეგნატაშვილი კი 1592 წლათ. თხრობა ერთნაირა აქვთ. მიღებულია ვახუშტის თარიღი.

ქართლში სიმონის გაბრუნების შემდეგ ლევანი ლეჩხუმიდან ჩამოვიდა, თავისი მომხრე თავადების დახმარებით მეფის ტახტი ისევ დაიკავა და იმერეთი კვლავ შემოიმტკიცა. ლევანი უკმაყოფილო იყო დადიანისა, რომელმაც გოფანთოს ბრძოლაში დახმარება არ აღმოუჩინა, ამიტომ მის დასასჯელად დროსა და შემთხვევას უცდიდა. დადიანმა დასწრება ამჯობინა. იგი მოულოდნელად დაესხა თავს იმერეთის მეფეს, ბრძოლაში „სძლო დადიანჴან და შეიპყრა მეფე ლევან (1590 წ.)“. დაპატიმრებული ლევანი სიმაჴრმა ოდიშს, შხეფის ციხეში გამოკეტა, მეფე რამდენიმე ხნის შემდეგ იქვე გარდაიცვალა.

იმერეთის ტახტზე მამია დადიანის დახმარებით და ასევე იმერეთის თავადების თანხმობით მეფედ აკურთხეს ლევანის ბიძაშვილი როსტომ კონსტანტინეს ძე (1590—1605 წწ.). ეს კი დადიანის გაძლიერებას ნიშნავდა.

1590 წელს მამია დადიანი გარდაიცვალა, მთავრის ტახტი მისმა ძმამ მანუჩარმა დაიკავა (1590—1611 წწ.). მანუჩარიც როსტომის მომხრე იყო და შემდეგში მისი დასაყრდენი ვახდა.

გურიის მთავარს არ მოსწონდა დადიანის სახლის განდიდება, ამიტომ გიორგი გურიელმა შეკრიბა გურიის ჯარი, თავს დაესხა იმერეთის მეფეს, განდევნა იგი და ტახტზე თავისი სასურველი კანდიდატი — ბაგრატ თეიმურაზის ძე დასვა. „განუმაგრა ციხე ქუთათისი და მოუდგინა ძე თვისი მამია ბაგრატს“¹. ამას არ დასჯერდა და „მოიყვანა ოსმალთა სპანი, განდევნა ჩიჯავაძე, აღიღო ციხე სებეკა, შემუსრა იგი და მუნ დასვა სხვა ჩიჯავაძე“².

სიმონ მეფე, როგორც კი ეს ამბავი შეიტყო, სასწრაფოდ იმერეთში გადმოვიდა „მიერთნენ იმერნი, მოადგა ქუთათისს, აღიღო და გამოიყვანა ბაგრატ და მას შინა შეაყენნა გუშაგნი თვისნი და დაამძევლნა კვალად იმერეთი და წარვიდა ქართლს“³. დატყვევებული მეფე ბაგრატი და მძევლებით სიმონ მეფე ისევ სასწრაფოდ გაბრუნდა ქართლში.

ქართლში სიმონის გაბრუნებით და მოუცლევლობით ისარგებლა მანუჩარ დადიანმა და მისი დახმარებით როსტომ მეფე კვლავ გამეფდა იმერეთში. სიმონი იძულებული ვახდა მესამედ გადმოსულიყო იმერეთში იმავე 1590 წელს. „გამოილაშქრა ძალითა დიდითა, ზარბაზნებითა და აღკაზმულობითა სპათათა გარდმოვლო ლიხი და მიერთნენ კვალად იმერნი“⁴. „აბაშიძენი და ჩხეიძენი და

¹ ვახუშტი, გვ. 821.

² იქვე.

³ იქვე.

⁴ იქვე. გვ. 822.

წერეთლები და აწ ვინც წყალწითელას აქეთ საბატონოს კაცის შვილნი ესახლნენ, ყველანი მეფე სვიმონს მიუვიდნენ, დიდროანის ზარბაზნებით უომრათ ქუთათის მიიყვანეს და ცხენისწყალს აქეთნი თავადებნი ზოგნი მოუვიდნენ და ზოგნი არა. დადიანს მოუვიდნენ, მეფე სვიმონ შეუპოვრობით და ამაყობითა უფროსი ერთნი საქართველოს ლაშქარი და ჯარი დააბრუნა და თვითონ დადიანზედ გაილაშქრა.¹ როსტომ მეფეს წინააღმდეგობის გაწევა არ შეეძლო და ლტოლვილმა დადიანის კარს შეაფარა თავი.

სიმონ მეფემ ალილო ციხენი სკანდა, კვარა, კაცხი, სვერი, შეაყენნა თვისნი და მოადგა ქუთათისს, ალილო იგიცა.²

სიმონ მეფე ოდიშს წავიდა, რათა როსტომ მეფე ტყვედ ჩაეგდო და ამით იმერეთი საბოლოოდ შემომეტკიცებინა, ვინაიდან სამეფო გვარის პირდაპირი ხაზით გამგრძელებელი მის გარდა აღარავინ იყო. სიმონ მეფე ოფშკვიტს იღვა თავისი ჯარით, როცა მანუჩარ დადიანმა ელჩები აახლა და სთხოვა „გვიმოწე ორნივე და მიეც როსტომს იმერეთი და ვიყვნეთ მორჩილ შენდა საუკუნოდ“.³ სიმონმა უარყო დადიანის მიერ შეთავაზებული პირობა და დარწმუნებულმა თავის გამარჯვებაში, დადიანს შეუთვალა „გნებაეს მომეც როსტომ და დავიცვა ქვეყანა შენი უფნოდ, უკეთუ არა, მოვიდე და თუმცა ძალგიცს დამხუდი ბრძოლად“.⁴

სიმონ მეფეს იმერეთის სრული შემოერთება ჰქონდა განზრახული. იმერეთის თავადებისათვის ცხადი გახდა, რომ სიმონის წარმატება მათ თავისუფლებას დააკარგვინებდა, მეფე შტკიცე ხელით შეზღუდავდა მათ თვითნებობას, ამიტომ ისევ როსტომისა და დადიანის მხარი დაიჭირეს. ისინი, ვინც სიმონის ბანაკში ღარჩნენ „მეფეს დღეს ხეალობით ატყუებდნენ — თუ დადიანი მოგივიაო და დადიანსა სწერდნენ — თავს დაგვესხითო, არ შემოგებმითო“.⁵

გარიყრაუზე დადიანისა და როსტომის ჯარი დაესხა ოფშკვიტს მდგომ სვიმონ მეფის ჯარს. იმერელი თავადების დალატის შედეგად სიმონ მეფე დაპარცხდა. მეფე გაბრუნდა ქართლში. „ხოლო დადიანმან ალილო ალაფი დიდი და ზარბაზნები წარიღო ოდიშს. მოიყვნა როსტომ და აკურთხეს ქუთათისს მეფედ“.⁶

¹ ფარსადან გორგიჯანიძის ისტორია, ს. კაკაბაძის გამოც., 1926, გვ. 14.

² ვ ა ხ უ შ ტ ი, გვ. 822.

³ ი ქ ვ ე.

⁴ ი ქ ვ ე.

⁵ ფარსადან გორგიჯანიძის ისტორია, ს. კაკაბაძის გამოც., 1926, გვ. 14.

⁶ ვ ა ხ უ შ ტ ი, გვ. 823.

ამრიგად, იმერეთის შეერთების ცდა ქართლის სამეფოსთან მარცხით დამთავრდა (1590 წ.). ამის შემდეგ სვიმონ მეფე და როსტომ მეფე დაზავდნენ, სვიმონმა დააბრუნა წაყვანილი მძევლები, ხოლო როსტომმა — ტყვედ ჩავარდნილი ქართლები.

მეტოქეობა გურიელისა და დადიანის სამთავრო სახლებს შორის ოდიშის სამთავროს სახლის გამარჯვებით დამთავრდა. ამიერიდან ოდიშის სამთავრო თანდათანობით ძლიერდება და შემდეგში, მე-17 საუკუნეში, დასავლეთ საქართველოში ყველაზე დიდი და ძლიერი პოლიტიკური ძალა გახდა.

ნ ა ნ ი მ ე რ ა

XVII ს ა უ კ უ ნ ე

იმერეთის სამეფოს პოლიტიკური მდგომარეობა XVII საუკუნის პირველ ნახევარში

დასავლეთი საქართველო მე-17 საუკუნის მიჯნაზე სავალალო სურათს წარმოადგენდა: ამ დროს ერთიანი საქართველო უკვე დიდი ზანია აღარ არსებობს; ქართლი, კახეთი, სამცხე-საათაბაგო თითქმის ორი საუკუნისა და მეტის მანძილზე ცალკე პოლიტიკური ერთეულებია; დასავლეთი საქართველო დაქუცმაცებულია: იმერეთის სამეფო, რომელიც საკუთრივ იმერეთს, ლეჩხუმს და რაჭას შლიდა; სამეგრელოს (ოდიშის) სამთავრო, რომელიც, გარდა ოდიშისა, ჯერ კიდევ ცალკე სამთავროდ ჩამოუყალიბებელ აფხაზებს ფლობს და დრო-და-დრო ლეჩხუმიც უჭირავს; გურიის სამთავრო, რომელიც გურიის ძველ ტერიტორიას ფლობს, სვანეთის სამთავრო, რომელიც ისე, როგორც რაჭის საერისთავო, მხოლოდ ნომინალურად ემორჩილება იმერთა მეფეს.

იმერეთის სამეფოსა და ქართლის სამეფოს შორის საზღვარი სურამის ქედის დასავლეთით, ახლანდელი ორჯონიკიძის რაიონის ტერიტორიაზე გადიოდა. ამ რაიონის დიდი ნაწილი, აგრეთვე ახლანდელი საჩხერის რაიონის ზოგიერთი სოფელი ქართლის სამეფოში შედიოდა.

იმერეთის სამეფოს ჩრდილოეთით ესაზღვრებოდა დვალეთი, რომლის დასავლეთი ნაწილი მას ეკუთვნოდა.

ჩრდილო-დასავლეთით იმერეთის სამეფოს ეკრა სვანეთი, ხოლო დასავლეთით — სამეგრელოს სამთავრო. იმერეთის სამეფოსა და სამეგრელოს (ოდიშის) სამთავროს შორის საზღვარი მდ. ცხენისწყალს მისდევდა. სვანეთის სამხრეთ-აღმოსავლეთი ნაწილი (ლენტეხი) და თაკვერი (ლეჩხუმი) იმერეთის სამეფოს შემადგენლობაში ითვლებოდა.

სამხრეთ-დასავლეთით იმერეთის სამეფოს ეკრა გურიის სამთავრო: საზღვარი მათ შორის საჯავახოს ქედს მისდევდა და აჭარა-

იმერეთის ქედს ებჯინებოდა, ხოლო გურიის სამთავროს სამხრეთი საზღვარი (ოსმალეთის შხრიე) მდ. ჭოროხზე გადიოდა.

სამეგრელოს სამთავროს გურიის სამთავროსაგან მდ. რიონა ჰყოფდა. აფხაზეთის და სამეგრელოს სამთავროებს შორის საზღვარი ჯერ მდ. კოდორზე გადიოდა, შემდეგ კი (XVII ს. 80-იანი წლებიდან) მდ. ენგურზე, აფხაზეთს ჩრდილო დასავლეთით ჯიქეთი ესაზღვრებოდა, რომელიც ადრე საქართველოს ეკუთვნოდა, ამ დროს კი თურქეთის გავლენაში იყო¹.

დასავლეთი საქართველოს სამეფო-სამთავროების ეს საზღვრები მუდმივ უცვლელი არ ყოფილა. მათ შორის არსებული პოლიტიკური ურთიერთობის პირობებში ამ ერთეულების სივრცე-საზღვრებიც ხშირად იცვლებოდა.

გარეშე მტრების — ოსმალეთისა და ირანის მწვავე ურთიერთბრძოლის ვითარებაში, რაც სხვა მიზეზებთან ერთად ამიერკავკასიის ქვეყნებში, პირველ რიგში საქართველოში, გზაბატონების მოცილებამ განაპირობა, საქართველოს სამეფო-სამთავროები მძიმე მდგომარეობაში აღმოჩნდნენ, რადგანაც მათ მიერ სწორი, თანმიმდევრული პოლიტიკური ორიენტაციის შემუშავება შეუძლებელი გახდა; ფეოდალურმა პარტიკულარიზმმა თვით ისინი ბრმა იარაღად აქცია გარეშე მტრების ხელში და ერთმანეთს დაუპირისპირა.

XVII საუკუნის დასაწყისში ცალკე სამთავროდ ჩამოყალიბდა აფხაზეთიც, რომელიც მანამდე წვრილ ერთეულებად დაქუცმაცებული ოდიშის სამთავროში შედიოდა. XVII საუკუნის დასაწყისში აფხაზეთში დაწინაურდა შერვაშიძეთა საგვარეულო, რომელმაც შეძლო აფხაზ ფეოდალთა შეკავშირება და აფხაზეთის გამოყოფა ოდიშის სამთავროსაგან.²

ამრიგად, დასავლეთ საქართველოს ტერიტორიაზე XVII საუკუნის დასაწყისიდან იმერეთის სამეფოს, ოდიშისა და გურიის სამთავროების გვერდით არსებობს აფხაზეთის სამთავროც. თითოეული სამთავრო ცდილობდა მეორის ზარჯზე გაფართოებას და პოლიტიკური გავლენისა და ძლიერების მოპოვებას.

მთავრები დამოუკიდებელ პოლიტიკას აწარმოებდნენ და იმერ-

¹ საქართველოს ისტორიის ნარკვევები, ტ. IV, თბ., 1973, გვ. 226—227.

² საქართველოს ისტორიის ნარკვევები. ტ. IV, თბ., 1973, გვ. 143, 297. არქანჯელო ლამბერტი, სამეგრელოს აღწერა, გვ. 176; И. Антелава. Очерк по истории Абхазии XVII—XVIII веков 1949, стр. 25, 3. Анчабадзе. Из истории средневековой Абхазии (VI—XVII вв.), 1959, стр. 261—262.

თა მეფეს შაინცდამაინც თავს არ უღებდნენ, ხოლო იგი თუმცა მთავრებს ვასალებად თვლიდა, მაგრამ ფაქტიურად ცნობდა სამთავროების დამოუკიდებლობას, მიუხედავად ყოველივე ამისა, დასავლეთ საქართველოს მეფე-მთავრები XVII საუკუნის 20-იან წლებამდე ერთიანი ძალით გამოდიოდნენ თურქების წინააღმდეგ.

XVII საუკუნის დასაწყისიდან „მთელი დასავლეთი საქართველო ოსმალეთის მოხარკე და მისი ვასალია. მიუხედავად ამისა, სამეფო-სამთავროები შინაგან დამოუკიდებლობას ინარჩუნებდნენ, ზმირად კი დამოუკიდებელ საგარეო პოლიტიკასაც აწარმოებდნენ“¹ მიუხედავად ხარკის გადახდისა, პიეტრო დელა ვალეს სიტყვით „დადიანი და გურიელი თურქებს მაინც არ აძლევენ ნებას, რომ შემოვიდნენ, იმათ ქვეყანაში არამც თუ საბრძანებლად, არამედ ჯარების სხვაგან გასატარებლადაც“.²



იმერეთის მეფე როსტომ კონსტანტინეს ძე 1605 წელს გარდაიცვალა.³ მას მემკვიდრე არ ღარჩენია. გავლენიანმა ფეოდალებმა ქუთაისს მეფედ აკურთხეს როსტომ მეფის ნახევარი ძმა, ნაშობი მხეველისაგან, გიორგი კონსტანტინეს ძე (1605—1639 წწ.)⁴

1600 წელს გარდაიცვალა გიორგი გურიელი, მთავრად მისი ძე მამია II დაჯდა (1600—1625 წწ.)⁴

მანუჩარ დადიანის გარდაცვალების შემდეგ ოდიშის მთავარი ხდება მისი მცირეწლოვანი ძე ლევან II დადიანი (1611—1657 წწ.).

პირველ ხანებში დასავლეთი საქართველოს მეფე-მთავრების დამოკიდებულება ურთიერთშორის კარგი იყო.

ასევე კარგ დამოკიდებულებაში იყვნენ ისინი აღმოსავლეთი საქართველოს პოლიტიკურ მესვეურებთანაც. ამის ნათელი დადასტურებაა შემდეგი ფაქტი: როცა ირანის მპყრობელი შაჰ-აბასი შემოესია აღმოსავლეთ საქართველოს, თეიმურაზ I კახთა მეფე და ლუარსაბ II ქართლის მეფე დასავლეთ საქართველოში გაიხიზნენ და იმერეთის სამეფო კარზე ჰპოვეს თავშესაფარი.

¹ საქართველოს ისტორიის ნარკვევები, ტ. IV, გვ. 300.

² გაზეთი „ივერია“, 1879, № 3, გვ. 56—67.

³ ქართლის ცხოვრება, ტ. IV, თბ., 1973, გვ. 823.

⁴ იქვე, გვ. 824.

1590 წელს შაჰ-აბასის ინიციატივით ირან-თურქეთს შორის ზავი დაიდო. მიუხედავად იმისა, რომ ზავის პირობები ირანისათვის მეტად მძიმე იყო, შაჰ-აბასს მეტი გამოსავალი არ ჰქონდა, რადგან მას ესაჭიროებოდა დროის მოგება, რათა შომავალ ომში თურქეთს უკეთ მომზადებული შეხვედროდა.

შაჰ-აბასმა ჯარის რეორგანიზაცია დაავალა თავის ცნობილ საზღვარდას ალავერდი-ხანს. მას ეხმარებოდნენ ინგლისელები. მოკლე დროში ირანის არმია გარდაიქმნა ერთ-ერთ საუკეთესო რეგულარულ არმიად.

XVII საუკუნის დამდეგისათვის ირანი წარმოადგენდა ძლიერ, ცენტრალიზებულ ფეოდალურ სახელმწიფოს კარგად შეიარაღებული მუდმივი ჯარით.

1603 წელს შაჰმა დაარღვია ზავი და დაიწყო ირან-თურქეთის ომი, რომელიც 1639 წლამდე გაგრძელდა, საომარ ასპარეზს ამიერკავკასია წარმოადგენდა.

ამ ომში ქართლისა და კახეთის მეფეებიც იღებდნენ მონაწილეობას ირანის მხარეზე და დიდი წვლილიც შეიტანეს საომარ მოქმედებათა მსვლელობაში.¹ მიუხედავად ამისა, შაჰ-აბასი ვერაგულად შემოიჭრა საქართველოში 1614 წელს და კახეთის სამეფო სასტიკად ააოხრა.

კახეთის მეფე თეიმურაზ I და ქართლის მეფე ლუარსაბ II დასავლეთ საქართველოში — იმერეთის სამეფოში გადავიდნენ და უპატრონოდ დარჩენილ კახეთს (ქართლი შედარებით იოლად გადაარჩა) 50 დღის განმავლობაში ყიზილბაშები არბევდნენ და ანადგურებდნენ.²

ირანის შბრძანებელი შეეცადა თავისი „ქვეშევრდომი მეფეები“ ხელთ ეგდო, ამისათვის, ფარსადან გორგიჯანიძის გადმოცემით, შაჰ-აბასი ნიჭოზს შივიდა და იქედან რისხვით საუსე წერილი მისწერა იმერთა მეფეს გიორგი III-ს.

„ჩვენი ყმანი თქვენთან მოსრულანო, გამოგვიგზავნეთო, თორა ჯარს გამოგიძახებთო, იმას (ე. ი. გიორგი III—მ. რ.) დაბალი სახვეწარი წიგნი მოეწერა: ყმას რომ ბატონისაგან ეშინოდესო, ერთგულებაში ჩაიგდებისო. ამათ თქვენგან ეშინიანო, შერმე კიდეც

¹ ქართლის ცხოვრება, II, 1959, გვ. 380—381; საქართველოს ისტორიის ნარკვევები, ტ. IV, გვ. 247.

² საქართველოს ისტორიის ნარკვევები, ტ. IV, გვ. 265—266.

დავითხოვო, აფხაზეთს წავლენო და იმერეთი რომ კიდევ დაარბიოთო, ღომის მეტს ვერას იშოვნინაო...¹

ფარსადან გორგიჯანიძისაგან განსხვავებით, ვახუშტი ბატონი-შვილი ასე ფადმოფცევს შაჰ-აბასის ღესპანისათვის გიორგი მეფის ნაპასუხებს:

„შისცეს მას მეფენი და უკეთუ არა, მოვიდეს სპითა ჩარუხ დაპრაიანითა და მოსპოს ქვეყანა მისი. მაშინ გიორგი მეფემან ჰკითხა: „რაჲარს ჩარუხი და დაპრა“: მიუთხრეს კობუნჯი და წალდი. მიუგო ღესპანსა: (გიორგი მეფემ—მ. რ.) ვგონებდი შეშინებასა სარმუზოსანითა, გარნა კობუნჯნი და წალდნი აქუსთ მრავლად ჩემთა მარგუელთაჲცა“².

XVII საუკუნის 20-იან წლებამდე დასავლეთ საქართველოს მეფე-მთავრები შეგობრულად არიან განწყობილი და ქვეყნის საგარეო საკითხებს ურთიერთშეთანხმებით წყვეტენ: შაჰ-აბასის ელჩისათვის პასუხის გასაცემად არა მარტო იმერეთის სამეფო კარის შესვეურნი შეიკრიბნენ, არამედ ოდიშის მთავარი ლევან დადიანი და გურიის მთავარი შამია გურიელიც მოვიდნენ. თათბირი მიმდინარეობდა გეგუთის სასახლეში, მას ესწრებოდნენ ლტოლვილი მეფეები—ლუარსაბი და თეიმურაზიც, თათბირმა ერთხმად მიიღო გადაწყვეტილება, რომ ლტოლვილ მეფეებს არავითარ შემთხვევაში არ გასცემდნენ.

მიუხედავად შაჰის მუქარისა, თუ მეფეებს არ გადასცემდნენ, ის იმერეთს დაარბევდა, გიორგი III-მ შაჰის წინაშე წარავლინა ელჩები — აფხაზეთის კათალიკოსი მალაქია და პაატა აბაშიძეს თხოვნით „რათა მისცეს ორთავ მეფეთა მკვიდრნი თვისნი და ეგრეთ დაიმორჩილოს“³

ელჩები წარსდგნენ შაჰ-აბასის წინაშე, გადასცეს ძვირფასი საჩუქრები და მოახსენეს დანაბარები, შაჰი დარწმუნდა, რომ გიორგი იმერთა მეფე „ხიზნებს“ არ გასცემდა, შაჰ-აბასს კი არ შეეძლო იმერეთში გადასვლა, რადგან ირან-თურქეთის ზავით დასავლეთი საქართველო ისევ თურქეთმა მიისაკუთრა და თუ ახლა შაჰ-აბასი ლინთ-იმერეთის საზღვარს გადალახავდა და დასავლეთში შეიჭრებოდა, ეს თურქეთთან ომის დაწყებას ნიშნავდა. შაჰ-აბასს ჯერჯერობით თურქეთთან ომი არ სურდა და არც პირობები გააჩნდა ამისა.

¹ ფარსადან გორგიჯანიძის ისტორია, ს. კაკაბაძის გამოცემა, თბ., 1926, გვ. 21.

² ქართლის ცხოვრება, ტ. IV, გვ. 325.

³ იქვე, ტ. II, 1959, გვ. 393;

მეორე მიზეზი, რაც შაქს აჩერებდა, იყო დასავლეთი საქართველოს სამეფო-სამთავროების პოლიტიკურ მესვეურთა შორის დადებული პირობა მტრის მოგერიებისა ერთიანი ძალით.

შაქმა ხერხს მიმართა: ყალბი დაპირებით, ცბიერებით და მოტყუებით ლუარსაბ მეფე ხელში ჩაიგდო, ჯერ სპარსეთში იწვია, შემდეგ გულაბის ციხეში ცამოკეტა და იქვე მოაშთობინა.

• • •

სელჯუკთა სახელმწიფოს ნანგრევებზე ოსმალ-თურქებმა ძალთა გაერთიანება მოახერხეს და, ისარგებლეს რა ბიზანტიის სახელმწიფოს დასუსტებით, 1453 წელს კონსტანტინეპოლი აიღეს, მთლიანად დაეუფლნენ ბალკანეთის ნახევარკუნძულს, ხოლო XV საუკუნის მეორე ნახევარში შავი ზღვის ჩრდილო სანაპიროებიც, ყირიმის სახანოს ჩათვლით, თურქეთის ხელქვეით აღმოჩნდა. აკად. ივ. ჯავახიშვილის აზრით, „საქართველოსათვის ეს ისეთი უბედურება იყო, რომლის მსგავსი მის წარსულში ბევრი არ მოიპოვება“.¹

შავ ზღვაზე თურქთა გაბატონების შემდეგ საქართველო სრულიად მოწყვეტილი აღმოჩნდა ქრისტიანული სამყაროსაგან და მაჰმადიანურ გარემოცვაში მოემწყვდა.

გარეშე შტერთა წინააღმდეგ ძალთა გაერთიანება რომ საჭირო იყო, ამას კარგად გრძნობდნენ ქვეყნის შიგნით არსებული პროგრესული ძალები, ამის დამადასტურებელი ისაა, რომ 1459 წელს თურქთა საწინააღმდეგოდ შექმნილი დასავლეთის სახელმწიფოთა კოალიციის მოწოდებისთანავე საქართველოს მეფე-მთავრებმა შინა ბრძოლები შეწყვიტეს და ურთიერთშორის ხელშეკრულება დადეს, რომ თურქთა წინააღმდეგ გაერთიანებული ძალებით იბრძოლებდნენ, მაგრამ თურქთა წინააღმდეგ შექმნილი კოალიციის მოწყობა ვერ განხორციელდა. ამის შემდეგ მეფე-მთავრებს შორის დადებულმა ხელშეკრულებამაც ძალა დაკარგა. საქართველოს სამივე მეფე „ყოვლისა საქართველოს... ლიხთ-იმერეთის და ლიხთ-ამერეთის მეფედ“ აცხადებდა თავს და საქართველოს გაერთიანებას ცდილობდა, მაგრამ გაშეერთიანებელი პირობები კი არსაიდან ჩანდა.

დაქუცმაცებულ საქართველოს ერთი მხრიდან თურქეთი ემეზობლებოდა, ხოლო მეორე მხრიდან ირანი. შავი ზღვა ჩაკეტილი იყო თურქების მიერ, კასპის ზღვა კი—მიუწვდომელი. ქართველი ხალხის შეგობარი არც მის ირგვლივ მდებარე სახანოებს შორის

¹ ივ. ჯავახიშვილი, ქართველი ერის ისტორია, ტ. III, 1966, გვ. 437;

ჩანდა, ხოლო სომხეთს სახელმწიფოებრივობა დაკარგული ჰქონდა და თვითონაც რბევის ობიექტად იყო გადაქცეული.



XVI საუკუნეში რუსეთი უკვე ცენტრალიზებულ სახელმწიფოდ ჩამოყალიბდა. სოციალ-ეკონომიკური განვითარებით იგი ირანისა და ოსმალეთის სახელმწიფოებზე წინ იდგა.

ყაზანისა და ასტრახანის სახანოების მიერთების შემდეგ რუსეთი ვოლგა-ასტრახანის სავაჭრო გზაზე გაბატონდა და ამით კავკასიის უშუალო მეზობელი გახდა.

საქართველოს პოლიტიკური მესვეურნი იმედის თვალით შეპყრებდნენ ქრისტიანული სახელმწიფოს თანმიმდევრულ ბრძოლას აგრესიული სახელმწიფოების — თურქეთისა და ირანის წინააღმდეგ.

ქართველ პოლიტიკურ მოღვაწეებს რუსეთის დახმარება სჭირდებოდათ თურქეთისა და ირანის მოძალებული აგრესიისაგან თავდასაცავად, ხოლო რუსეთს კი თურქეთისა და ირანის წინააღმდეგ ბრძოლაში რეალურ მოკავშირედ ესახებოდა საქართველო. იმდროინდელი რუსეთის ინტერესები მოითხოვდა კავკასიაში ძლიერი ქრისტიანული სახელმწიფოს არსებობას, რომელიც წინააღმდეგობას გაუწევდა ირანსა და თურქეთს.

საქართველოსა და რუსეთს შორის კულტურულ-პოლიტიკური ურთიერთობა ჯერ კიდევ XI—XII საუკუნეებში დაიწყო, მაგრამ მონღოლთა შემოსევამ ეს ურთიერთობა შეწყვიტა; მისი აღდგენა მოხდა შას შემდეგ, როცა რუსეთმა საბოლოოდ დააღწია თავი მონღოლთა ბატონობის უღელს.

პირველი ცდა საქართველოსა და რუსეთს შორის ურთიერთობის განახლებისა მოხდა 1491 წელს, როცა კახეთის მეფე ალექსანდრე გიორგის ძემ (1476—1511 წწ.) ელჩები გაგზავნა მოსკოვის დიდ მთავარ ივანე III-თან. ეს განახლებული ურთიერთობა გარემავდა და XVI საუკუნეში სამხედრო კავშირად იქცა. ეს ურთი-

¹ მაგ. როცა ივანე IV-ემ (1547-1584 წწ.) ჩრდილო კავკასიაში მდ. თერგისა და სუნჯის შესართავთან ციხე-სიმაგრე ააგო, კახეთის მეფემ ლევანმა (1520—1574 წწ.) ელჩები გაუგზავნა და მფარველობა სთხოვა. თავის მხრად ივანე IV-ემ 1564 წელს ლევან კახთა მეფეს მფარველობა შესთავაზა და მცირე ჯარიც კი გამოუგზავნა, რომელიც 1565—1572 წლებში იდგა კახეთში. (იხ. Белокуръ, Сношения России с Кавказом; შესავალი LXIV; ნ. ბერძენიშვილი, საქართველოს ისტორიის საკითხები, ტ. IV, 1967, რუსეთ-საქართველოს ურთიერთობის ისტორიიდან XVI—XVII საუკუნეთა მიჯნაზე); იასეცინცაძე, ძიებანი რუსეთ-საქართველოს, ურთიერთობის ისტორიიდან (XVI—XVII-სს), თბ., 1956.

ერთობა კვლავ შეწყდა და ისევ განახლდა XVI საუკუნის 80-იან წლებში. კახეთის მეფემ ალექსანდრე II-ემ (1574—1605 წწ.) 1587 წელს რუსეთის მეფის ერთგულების ფიცი მიიღო, ხოლო 1589 წელს რუსეთის მეფემ „წყალობის წიგნი“ გამოუგზავნა ალექსანდრეს.

დიპლომატიური ურთიერთობა რუსეთსა და კახეთის სამეფოს შორის 1605 წლამდე არ შეწყვეტილა, მაგრამ რეალური სამხედრო დახმარების აღმოჩენა არ განხორციელდა.

* * *

XVII საუკუნის დასაწყისში დასავლეთი საქართველოს მეფე-მთავრებმაც დაამყარეს რუსეთთან დიპლომატიური ურთიერთობა.

კახთა მეფის თეიმურაზ I-ის ინიციატივით 1618 წელს დასავლეთ საქართველოს მეფე-მთავრებმა რუსეთის სახელმწიფოს ქვეშევრდომობა ითხოვეს. საქართველოდან წარგზავნილ ელჩებს 1618 წელს თან შიპქონდათ თეიმურაზის, გიორგი III-ისა და გურიელის წერილები.

გიორგი მესამე რუსეთის ხელმწიფეს ატყობინებდა, რომ შაჰ-აბასმა ააოხრა ივერიის მიწა, თეიმურაზი თავის სამეფოდან განდევნა და ჩვენთან აფარებს თავსო. იმასაც ატყობინებდა, რომ შაჰმა ჩვენთან ელჩი გამოგზავნა და მეფის გაცემა მოითხოვა. წინააღმდეგობის შემთხვევაში აოხრებით გვემუქრებაო, ჩვენ ყველა ქრისტიანი მეფეები ერთად შევიყარეთ ჩვენ-ჩვენი ლაშქრით და ყიზილბაშების შაჰს უარი ვუთხარით ქრისტიანი მეფის (ე. ი. თეიმურაზ მეფის—მ. რ.) გაცემაზეო.¹

ანალოგიურ წერილს უგზავნიდა მამია გურიელიც. იგი წერდა, რომ იმერეთის მეფე გიორგი, მე და სადადიანოს მფლობელი ლევან დადიანი შევიკრიბეთ ერთად, რათა უარი ვუთხარათ შაჰის მოთხოვნასა და მუქარასო.² ამასთან ერთად დასძენდნენ, მართალია, ჩვენ გაერთიანებული ვართ და საერთო ძალებით ვიბრძვით ირანის აგრესიის წინააღმდეგ, მაგრამ, რადგან ეს ძალები საკმარისი არ არის, გთხოვთ ჯარი მოგვაშველოთო.³

¹ М. Полиевктов. Материалы по истории грузино-русских взаимоотношений, 1615—1640, Тб., 1937, стр. 47.

² დასახ. ნაშრომი, გვ. 55.

³ Н. Накашидзе. Грузино-русские политические отношения в первой половине XVII века, 1968, стр. 60—63.

ამ ელჩობას შედეგი არ მოჰყოლია, ვინაიდან რუსეთი თავისი საშინაო და საგარეო საქმეებით იყო დაკავებული.

* *

როგორც ზემოთ აღვნიშნეთ, ოდიშის სამთავროს ტახტი მანუჩარის შემდეგ დაიკავა მისმა შვილმა ლევან II დადიანმა. მან ბავშვობა თავის პაპის ალექსანდრე კახთა მეფის კარზე გაატარა. 1611 წელს მანუჩარი ნადირობისას დაიღუპა.¹ მას მემკვიდრედ დარჩა 14 წლის ლევანი, მისი მცირეწლოვანობის გამო სამთავროს განაგებდა მისი ბიძა გიორგი ლიპარტიანი.²

ლევანი თავისი აღზრდით, მორალით და პოლიტიკური შეგნებით, დიდი შილი იყო საქართველოს იმპრონდული ისტორიულ-ვიტარებისა. პირველ შამაცობასთან ერთად მას ახასიათებდა ორჭოფობა და თვალთმაქცობა. მით უმეტეს, რომ ლევანი იზრდებოდა კახეთში თავისი ბაბუის ალექსანდრე II-ის (1574—1605 წწ.) კარზე, სადაც ერთმანეთს ზედებოდნენ ირანის, ოსმალეთისა და რუსეთის დიპლომატები, რომელთა მოქმედებაში სიცრუე, ორპირობა, მლიქვნელობა და ბევრი სხვა ამგვარი ხერხი ჩვეულებრივ საშუალებას წარმოადგენდა. ვახუშტი ლევანს ასე ახასიათებს: „ესე ლევან იყო ბოროტი, ხუანჯიანი, ამაყი, მზაკუარი და ძვირის მომსხენე და იმარჯვიდა ჟამთა“.³

დიდი ნიჭისა და ალღოს მქონე ლევანი ისწრაფოდა სადადიანოს დამოუკიდებლობის განმტკიცებისაკენ. ამავე დროს მიზნად ისახავდა განედევნა იმერეთის მეფე და თვითონ გაეფეხებულყო დასავლეთ საქართველოში.⁴

ამ მიზნის განსახორციელებლად ყოველგვარ ზერხს იყენებდა, სხვა სამთავროებს უკავშირდებოდა ნათესაურად, დიპლომატიურ მოლაპარაკებას აწარმოებდა თურქეთთან და რუსეთთან, კმნილა ძლიერ ჯარს და გამუღმებით ესხმოდა თავს იმერეთს, ამიტომ თანამედროვე ქართულ ისტორიოგრაფიაში „ლევან დადიანის მოქმედება რეაქციონერი ფეოდალის მოღვაწეობად არის შეფასებული“.⁵

¹ კ. გ რ ი გ ლ ი ა, ილორის წმ. გიორგის ხატის წარწერა, ენიშვის მოამბე, XIII, 1942, გვ. 149.

² ა რ ქ ა ნ ჯ ე ლ ო ლ ა მ ბ ე რ ტ ი, სამეგრელოს აღწერა, გვ. 15.

³ ქართლის ცხოვრება, IV, გვ. 825.

⁴ ს. მ ა კ ა ლ ა თ ი ა, სამეგრელოს ისტორია და ეთნოგრაფია, თბ., 1941, გვ. 104.

⁵ საქართველოს ისტორიის ნარკვევები, ტ. IV, 1973, გვ. 341.

მიუხედავად თეიმურაზ კახთა მეფის მცდელობისა, დასავლეთ საქართველოს მეფე-მთავრების ურთიერთკავშირი დაირღვა. ეს დაემთხვა იმ დროს, როცა ლევან II დადიანმა მთავრის უფლებები აიღო ხელში 1620 წლის ახლო ხანში.

ამ დროიდან დასავლეთ საქართველოში ფეოდალურმა ანარქიამ მწვეავე ხასიათი მიიღო, რაც დაახლოებით ორი საუკუნე გაგრძელდა.

1618 წელს იმერთა მეფემ გიორგი III-მ თავის შვილს — ალექსანდრეს კოლად შირთო მამია გურიელის ქალი თამარი, რომელთანაც ალექსანდრეს შეეძინა შვილი ბაგრატე. მკვრამ მათი კოლქმრული ურთიერთობა დიდხანს არ გაგრძელებულა. ორი წლის შემდეგ „შესწამა ალექსანდრემ ცოლსა თვისსა, რეცა სიძუად ქუთათელის ვაჟრისა თანა და განუტევა ცოლი თვისი და წარავლინა ძით თვისით ბაგრატით მამისა მისისა გურიელის მამიას თანა“.¹ ამ ამბით შეურაცხყოფილმა მამია გურიელმა გადაწყვიტა მეფე გიორგის წინააღმდეგ მოქმედება და ამ მიზნით დაუპოყვრდა ლევან II დადიანს, რომელიც თავის მხრივ კმაყოფილებით შეხვდა ამ ფაქტს.

ვახუშტი ბატონიშვილის ცნობით, როცა ლევან დადიანმა გვიგო იმერთა მეფის გიორგის და გურიელის კონფლიქტის ამბავი, კიდევაც გაუხარდა „მტერობა გურიელისა და მეფისა და მისცა დამ თვისი სვიმონს ძესა გურიელისასა“,² რომელიც ათაბაგის სახლის შვილი იყო. ეს ქორწინება მოხდა 1621 წელს.³

ამრიგად მეფე-მთავრის უთანხმოებით სარგებლობს ლევან დადიანი და პოლიტიკურ კავშირს კრავს გურიელთან თავისი დის მარიამის და გურიელის ძის სიმონის ქორწინებით. თვით ლევან დადიანი დაქორწინებული იყო აფხაზეთის მთავარ სეტემან შერვაშიძის ასულზე. ამიერიდან დასავლეთ საქართველოში ჩამოყალიბდა ორი ერთმანეთის საწინააღმდეგო ბანაკი: ერთ მხარეს იმერთა მეფე გიორგი III (მას კახთა ლტოლვილი მეფე თეიმურაზი უჭერდა მხარს), ხოლო მეორე მხარეს — დადიანი, გურიელი და შერვაშიძე. ძალთა თანაფარდობა ლევან დადიანის მხარეზე იხრებოდა. მეფის მოწინააღმდეგეთა ბანაკს დაემატა კიდევ ერთი იმერელი ფეოდალი — პაატა წულუკიძე, რომელმაც გარკვეული როლი ითამაშა მეფესა და მთავარს შორის ცუდი ურთიერთობის დამყარებაში.

¹ ქართლის ცხოვრება, IV, გვ. 826.

² იქვე.

³ თ. ეორდანია, ქრონიკები, II, 1897, გვ. 444; მარი ბროსე, საქართველოს ისტორია, II ნაწ., თბ., 1900, გვ. 187.

პაატა წულუკიძემ ლევანის დიდი ნდობა დაიმსახურა და მალე ოდიშის პირველი ვეზირიც გახდა. მისი შეგონებით გაუჩნდა აზრი ლევან დადიანს დასავლეთ საქართველოში ჰეგემონობისა და თვით მეფის ტახტის დაკავებისაჲც კი.

ამრიგად, დასავლეთ საქართველოში თანდათან შფოთი ჩამოვარდა, „ამ შფოთმა ნელ-ნელა იზარდა და ბოლოს ისე გადაიღდა, რომ არია მთელი ქვეყანა და მოსპო ყოველივე მშვილობიანობა“.¹

ვახუშტი ბატონიშვილი ასეთ დეტალს გადმოგვცემს: „მეფემან გიორგიმ შერისხა რაისამე ზედა წულუკიძეს პაატას და მიუხუნა (ჩამოართვა — მ. რ.) მამულნი და პაატა წარვიდა ლევან დადიანის ათანა“².

მეფეზე განაწყენებული თავადი, ვახუშტის სიტყვით, დადიანს მუდამყვამს გიორგი მეფისადმი მტრობას ჩააგონებდა: „პაატამ (რომელსაც უხმობდნენ წუწკალ უძლურებისათვის, რაჟეთე იყო კუტი) უმეტესად შთაუდგა ლევანს მტერობა გიორგი მეფისა“.³

ვახუშტის გადმოცემით, მეფე გიორგის არ შოსწონებია დადიან-გურიელ-შურვაშიძის კავშირი, „შეუძნდა მეფესა გიორგის შეერთება დადიან-გურიელისა, და დაუწყო მტერობა; შემდგომად შემოიკრიბნა სპანი თვისნი გიორგი მეფემან და განვიდა და დაღვა გოჭორაულსა ზედა“.⁴

გიორგი მეფის საომარი სამზადისი შეუმჩნეველი არ დარჩა ლევან დადიანს და, თავის მხრივ, მანაც ლაშქარი შეკრიბა. მამია გურიელმა, როგორც ჩანს, ნეიტრალური პოზიცია დაიკავა, ვინაიდან წყაროები არ ახსენებენ მის მონაწილეობას ამ ომში. „მოვიდა ლევან დადიანიცა სპითა ოდიშარ-აფხაზ-ჯიქითა და იქმნა ბრძოლა ძლიერი და მოსწყდნენ მრავალნი“.⁵ ამ ბრძოლაში მეფე გიორგი დამარცხდა და ბრძოლის ველიდან თავს გაქცევით უშველა.⁶

დადიანმა „შეიპყრნა მრავალნი წარჩინებულნი და მდაბიურნი, აღიღო ალაფი და იავარი და წარვიდა ოდიშს“.⁷

¹ არქონჯელო ლამბერტი, სამეგრელოს აღწერა, გვ. 16.

² ქართლის ცხოვრება, IV, გვ. 825.

³ იქვე, გვ. 826.

⁴ იქვე.

⁵ იქვე.

⁶ იქვე.

⁷ იქვე.

ეს ბრძოლა, ვახუშტი ბატონიშვილის მიხედვით, მოხდა 1623 წლის 9 დეკემბერს¹ ქუთაისის მახლობლად — გოჭოურასთან.

ლევან დადიანმა ტყვედ წაყვანილ იმერელთა თავი დაახსნევინა ფულით. ვახუშტის თქმით, ეს იყო პირველი შემთხვევა დასავლეთ საქართველოს შინაურ ომში ტყვეების თავის დასახსნელად ფულის მოთხოვნისა.² ამის შემდეგ განმტკიცდა ეს ახალი წესი, რაჟაყ თავის მზრვი, ძლიერ შეუწყო ხელი ურთიერთმიხედობისა, რბევისა და აღამიანთა ტყვედ წაყვანის გახშირებას.³

გიორგი მეფესთან ომში გამარჯვების შემდეგ მთელ დასავლეთ საქართველოში დიდად გაიზარდა ლევან დადიანის პოლიტიკური გავლენა.

1623 წლის შემდეგ ლევან დადიანსა და სორეხ შერვაშიძეს შორის ურთიერთობა გაუარესდა, რაც ომში გადაიზარდა; როგორც ზემოთ აღვნიშნეთ, ლევანმა ცოლად შეირთო აფხაზეთის მთავრის შერვაშიძის ასული⁴.

მთავრის შეუღლეს დაუახლოვდა მისი ვეზირი პაპუნა. ამ ამბავმა ლევანის ყურამდე მიაღწია, მან თავისი ცოლი, — შერვაშიძის ასული, — გააგდო, მასთან შეძენილი ორი ვაჟი მოწამვლით მოაკვლევინა, ხოლო თავისი ვეზირის მოკვლა ვერ გაბედა, შეიპყრო და გურიაში თავის სიძესთან პატიმარჰყო. თვითონ ლევანმა თავის

¹ ამ თარიღს მხარს უჭერს პროფ. კ. ჭ რ ი გ ო ლ ი ა, იხ. კ. გ რ ა გ ო ლ ი ა, ილორის წმ. გიორგის ხატის წარწერა, ენიშნის შოაშვე, XII, 1942, გვ. 149; მაგრამ ა. ანთელავა ამ ბრძოლის თარიღად 1622 წ. თვლის იხ. ანთელავა, ოდიშის სამთავროს პოლიტიკური ისტორიიდან, საისტორიო კრებული, ტ. V, თბ., 1976, გვ. 119.

² ქართლის ცხოვრება, IV, გვ. 826.

³ ს. კ ა კ ა ბ ა ძ ე, საქართველოს ისტორია, ახალი საუკუნეების ეპოქა, თბ., 1922, გვ. 57.

⁴ ქართულ საისტორიო მწერლობაში გაბატონებულია აზრი, რომ ლევან დადიანმა შერვაშიძის ასულზე ჯვარი დაიწერა 1621 წლის ახლო ხანებში (იხ. საქართველოს ისტორიის ნარკვევები, ტ. IV, გვ. 302, დ. გ ვ რ ი ტ ი შ ვ ი ლ ი, ნარკვევები საქართველოს ისტორიიდან, II, თბ., 1965, გვ. 419; З. А н ч а б а д з е. Из истории средневековой Абхазии. Сухуми, 1959, გვ. 262). ი. ანთელავასა და თ. ბერაძის აზრით ეს ქორწინება უნდა მომხდარიყო 1614—1615 წლებში, რაც უფრო სწორად ჩანს (იხ. ი. ანთელავა, ოდიშის სამთავროს პოლიტიკური ისტორიიდან, საისტორიო კრებული, ტ. V, თბ., 1976, გვ. 107—116—118; თ. ბერაძე, ერთი საკითხი სამეგრელოს ისტორიული გეოგრაფიიდან, საქართველოს ისტორიული გეოგრაფიის კრებული, თბ., 1964, გვ. 122), არქანჯელო ლამბერტი, სამეგრელოს აღწერა, გვ. 15; ე. თ ა ყ ა ი შ ვ ი ლ ა, არქეოლოგიური მოგზაურობა სამეგრელოში, ძველი საქართველო, ტ. III, გვ. 17.

ბიძას გიორგი ლიპარტიანს წაართვა ახალგაზრდა ცოლი, კილძის ასული და ცოლად შეირთო.¹

• • •

ლევანის საქციელმა ორ სამტრო ბანაკად გაყო ოდიშარნი. ბიძა-ძმისწულის დავა იარაღს უნდა გადაეწყვიტა, მაგრამ მოულოდნელად გარდაიცვალა ლიპარტიანი, და ამან სისძლის ღერისაგან იხსნა ოდიშარნი.

ლევან დადიანის მოწინააღმდეგე ბანაკი თანდათან იზრდებოდა, გიორგი იმერთა შეფეს მხარში ედგა აფხაზეთის მთავარი შერვაშიძე, გურიის მთავარიც შეშფოთებული იყო ოდიშის გაძლიერებით. ამ სიტუაციით ისარგებლა ოდიშის ყოფილმა ვეზირმა პაპუნამ, რომელიც გურიელთან იმყოფებოდა პატიმრობაში და ჯანიზრახა ლევან დადიანის მოკვლა, ზოლო მის მაგივრად შისი ძმის — იოსების გამთავრება.

მრავალჯონ შეგონებით პაპუნამ თავის მხარეზე გადაიბირა გურიელი. იგი ჩააგონებდა გურიელს, რომ ლევანი დაუდგრომელი ხასიათისაა, „ამიტომ უკეთესი იქნებაო, რომ კოლხიდის მთავრად შისი ძმა იოსები გავხადოთო, კაცი ბევრად სასიამოვნო, კაცთმოყვარე, ზრდილობიანი, დამჯდარი ხასიათისა და ამას გარდა ხალხისაგან მეტად პატივცემული და თაყვანსაცემიო“.²

შეთქმულებამ ფართო ხასიათი მიიღო. ლამბერტის მტკიცებით, შეთქმულების მონაწილენი იყვნენ იმერთა მეფე გიორგი, აფხაზთა მთავარი შერვაშიძე და თვით გურიელი. შეთქმულებას პაპუნა ვეზირი ხელმძღვანელობდა.³ მაგრამ ამ შეთქმულებიდან არაფერი გამოვიდა, რადგან თავდასხმისას მთავარი მსუბუქად დაიჭრა და გადარჩა.⁴

შეთქმულება გამჟღავნდა, ამ საქმის მოთავე ვეზირი „ჩერ ღმით დაახრჩეს და მერე დღისით ერთ დიდ ზარბაზანში ჩასდეს, ცეცხლი მისცეს და ამგვარად შისი სხეული, ნაკუწ-ნაკუწად ქცეული, პაერში გაიბნა. თავის ძმას იოსებს მთავარმა თვალები დასთხა-

¹ არქანჯელო ლამბერტი, სამეგრელოს აღწერა, გვ. 16, 21; ეან შარდენი, მოგზაურობა... თბ, 1975, გვ. 233—234; დონ ჭუზეპე ჭუდიხე შილანელი, წერილები საქართველოზე, გამოსცა ბუენ გიორგაძემ, თბ, 1964, გვ. 83.

² არქანჯელო ლამბერტი, სამეგრელოს აღწერა, გვ. 20.

³ იქვე.

⁴ იქვე.

რა. ყოველივე ქონება ჩამოართვა და დაუტოვა მხოლოდ სულ მცირე რამ, რაც საკმაო იყო საწყლად ცხოვრებისათვის.¹

საშინაო საქმეები რომ ჩააწყენარა და შიში აღარ ჰქონდა ამბოხებებისა, ლევანმა საგარეო საქმეებს მიხედა. პირველ რიგში მან მიზანში ამოიღო აფხაზეთის მთავარი, რომელსაც ოდიშის სანაპირო სოფლები სასტიკად აეოხრებინა.

არქანჯელო ლამბერტის ცნობით, აფხაზები „დადიანისაგან თავს შეურაცხყოფილად სთვლიდნენ, რადგან მან გააგდო ცოლი, მათი მთავრის ქალი, ამის გამო აფხაზები ისე გაბრაზებული იყვნენ დადიანზე, რომ იმ დროს როცა დადიანი გართული იყო ძმისაგან დაწყებული ამბოხების დაცხრომის საქმეში, სულ თავს ეიხმოდნენ სამეგრელოს საზღვრებს, რომელიც თითქმის სრულიად მოაოხრეს, მცხოვრებლები დაატყვევეს და აფხაზეთში გადაასახლეს“.²

1628 წლამდე ლევანმა ორჯერ ილაშქრა აფხაზეთში. პირველად კაპოეტის წყალს აქეთ სრულიად ააოხრა აფხაზეთი; კაპოეტის წყალზე შებმიან დადიანს მარშანიები და დადიანს გაუმარჯვია.

დადიანმა მეორედაც ილაშქრა აფხაზეთში და „აფხაზებმა მორჩილება განუცხადეს, ხარკი იტვირთეს, მაგრამ რადგან ეს ხალხი მოქალაქეობას და ვაჭრობას მოკლებულია, და არც ფული გააჩნია, არც საქონელი ხარკის გადასახდელად, დადიანმა მათ ხარკად დაადგა რამდენიმე მწევარ-მეძებარი და მიმინო“.³

მიუხედავად ზავის დაღებისა, აფხაზები შაინც ეხმოდნენ თავს ოდიშის განაპირა სოფლებს და აოხრებდნენ მას. „ამ თარეშების მოსაგერიებლად დადიანი იტულებული გახდა საზღვარზე გაეყვანა ზღვასა და მთებს შორის 60 ათასი ნაბიჯის სიგრძე ჯებირი ხის კოშკებით, რომელშიდაც იდგნენ მეთოფეები. ამ მეთოფეებს რიგ-რიგობით აყენებდნენ ოდიშის ეპისკოპოსები და წარჩინებულნი თავადები თანახმად მთავრის განკარგულებისა“.⁴

• • •

ოდიშში ამბოხების პერიოდში გურიაშიც მნიშვნელოვანი ამბავი მოხდა. 1625 წელს „განირისხა ღმერთი და მოკლა მამა თვისი მამია გურიელი ძემან თვისმან სვიმონ. მწოლარე სარეცელსა ზედა ძილად“⁵ და თვითონ დაჯდა გურიელად. სვიმონმა გამთავრებისა-

¹ არქანჯელო ლამბერტი, სამეგრელოს აღწერა გვ. 21.

² იქვე, გვ. 22.

³ იქვე.

⁴ ს. კაკაბაძე, დასახ. ნაშრ., გვ. 58.

⁵ ქართლის ცხოვრება, IV, გვ. 826.

ნავე ცოლის ძმის საწინააღმდეგო კურსი აიღო და, როგორც ზემოთ აღვნიშნეთ, შეთქმულების ერთ-ერთი მონაწილე გახდა.

სამთავროს საშინაო საქმეების მოვლარების შემდეგ ლევან დადიანმა მიზანში ამოიღო თავისი სიძე სიმონ გურიელი. ლევანმა საბაბად გამოიყენა შვილის მიერ მამის მკვლელობა და დიდი ჯარით საგურიელოში შეიჭრა. ლევანმა სვიმონს მოსთხოვა თავისი დის უჟან დაბრუნება: „ვინაითგან მოჰკალ მამა შენი, არღარა მნებავს მოყურობა შენი, მომეც დაი ჩემი და უკუნევიკევი.“¹ სიმონი იყო მხნე, აბოვანი და შემმართველი, დადიანის პასუხად მან ჯარი შეჰყარა და ბრძოლად გამოვიდა. ლანჩხუთთან ბრძოლაში სიმონ გურიელი დამარცხდა და ტყვედ ჩავარდა.

სიმონი ლევანმა სასტიკად დასაჯა: არქანჯელო ლამბერტის თქმით, „დასთხარა თვალი, წაართვა ცოლი, შვილი და სამთავროც“².

სიმონის მეუღლე სილამაზით და სათნოებით სახელგანთქმული მარიამი ისევ სამეგრელოში დააბრუნეს. სიმონი ერთი წლის ტყვეობის შემდეგ ლევანმა გაათავისუფლა: „სიმონი... წავიდა იერუსალიმში, შედგა იქ ბერად, იცოცხლა ღრმა მოხუცებულობამდე და 1672 წელს კიდევ ჰქონდა მიწერ-მოწერა თავის ცოლად ნამყოფთან, სათნო დედოფალ მარიამთან“.³

გურიის მთავრად ლევანმა მამიას ძმა, დასავლეთ საქართველოს კათალიკოსი მალაქია გურიელი დასვა (1625—1639 წწ). ამის შემდეგ გურია ოდიშის სამთავრო სახლის ინტერესებს დაექვემდებარა და იმერეთის მეფის საწინააღმდეგო კურსი აიღო, რამდენადაც დასავლეთ საქართველოს კათალიკოსის 24 მამულიდან 18 მამული ოდიშის ტერიტორიაზე იყო განლაგებული.⁴ კათალიკოსი მალაქია ოდიშის მთავრის ხელის შემყურე იყო. ამიტომ, რომ მალაქიას მთავრობის პერიოდში ლევანი „დადიან-გურიელად“ იწოდებოდა.⁵

არქანჯელო ლამბერტის აღნიშვნით: „დაიმორჩილა თუ არა აფხაზეთი და გურია, დადიანმა იმერეთის დაჭერაც მოისურვა... ამ განზრახვით დადიანს განუწყვეტელი ომი ჰქონდა იმერეთთან. თუმცა აქამდინ თავისი წადილი ვერ შეასრულა, რადგან იმერეთის მეფე გამავრდა ქუთაისის ციხეში და მის სიმაგრეს დადიანმა ვერ

¹ ქართლის ცხოვრება, IV, გვ. 827.

² არქანჯელო ლამბერტი, დასახ. ნაშრ., გვ. 21.

³ მარი ბროსე, საქართველოს ისტორია, II ნაწ., 1900, გვ. 188.

⁴ ბ. ლომინაძე, ფეოდალ. მეურნ. ორგანიზაციის ისტორიიდან გვიან-ფეოდალურ საქართველოში, მსკი, ნაკვ. 30, 1954, გვ. 101—114; მისივე, ქართული ფეოდალური ურთიერთობის ისტორიიდან. ტ. I, გვ. 213.

⁵ ე. თაყაიშვილი, დასახ. ნაშრ., გვ. 216.

სძლია, მაგრამ შაინც ისე დაასუსტა იმერეთის სამეფო, რომ სამეგრელოს ბევრად ჩამოუყვარებოდა ძალ-ღონით“.¹

საქართველოს მეფე-მთავართა აშლილობით სარგებლობდა ოს-მალეთი და თავის საქმეს აკეთებდა: თანდათან იპყრობდა შავი ზღვის სანაპირო ქალაქებს, ავრცელებდა მამამდიანობას, სადაც ეს შესაძლებელი იყო და ამ გზით ცდილობდა დაპყრობილი მხარეების სარწმუნოებრივადაც შემომტკიცებას.

ბატონყმობა და ნატურალური მეურნეობის ბატონობა. კიდევ უფრო აძლიერებდა ქვეყნის აკარჩაკეტილობას. ასეთ ვითარებაში დაქუცმაცებულმა დასავლეთმა საქართველომ მრავალჯერ განიცადა თურქეთის ოკუპაცია, რაც შესაძლოა თავიდან იქნებოდა აცილებული, ქართულ სამეფო-სამთავროებს შორის მუდმივ შინაბრძოლებს და ურთიერთდაპირისპირებას რომ აღგილი არ ჰქონოდა. რუსი დიპლომატის პ. ლევაშოვის (1766 წ.) აზრით „ქართველები მთელს აზიაში უმამაცესი ხალხი იყო და მათ საშინაო თანხმობა რომ ჰქონოდათ, ვერავითარი საგარეო მტრული ძალა უმცირეს ზიანსაც კი ვერ მიაყენებდა“.²

უან ბატისტ ტავერნიე ასე გადმოგვცემს დასავლეთ საქართველოს მდგომარეობას: „სულთანი ძლიერ კმაყოფილია ამ ქვეყნის აგრე დანაწილების გამო, რადგან როცა სამივე ნაწილი ერთად იყო, ერთის ხელმწიფის ქვეშ, სულთანს არ შეეძლო მათი დამორჩილება, მიზეზი ამისა ის იყო, რომ იმერეთის მეფეს მაშინ შეეძლო მოკლე დროში გამოეყვანა სალაშქროდ თითქმის ორმოცდაათი ათასი კაცი“.³ განუდგა თუ არა იმერეთის მეფეს დადიანი, შეუთანხმდა დიდ სენიორს და ვალდებულება იკისრა მისთვის მიეწოდებინა რკინის ერთგვარი რაოდენობა იმ პირობით, რომ იმერეთთან ომის შემთხვევაში დიდი სენიორი მას ტრაპიზონის, ერზერუმისა და ყარსის საფაშოებიდან 20 ათასამდე ცხენოსანს მიაშველებდა“.⁴

როგორც ზემოთ აღნიშნულიდან ჩანს, უცხოელის თვალსაც კარგად აქვს შემჩნეული, რომ როცა მეფე-მთავრები შეთანხმებით

¹ ბ რ ქ ა ნ ქ ე ლ ო ლ ა მ მ ბ ე რ ტ ი, სამეგრელოს აღწერა, გვ. 22.

² საქართველოს ისტორიის ნარკვევები, ტ. IV, გვ. 16.

³ თურქული წყაროების ცნობით, XVI საუკუნის ბოლოს დასავლეთ საქართველოს სამეფო-სამთავროებში ყოფილა: იმერეთში—60000, სამეგრელოში—80 000, ბოლო გურიაში—20 000 კომლი. ეს ცნობა ადასტურებს ე. ბ. ტავერნიეს დასკვნის სისწორეს, რომ გაერთიანებულ იმერეთის სამეფოს (გურია-სამეგრელოს ჩათვლით), რომლის მოსახლეობა 160.000 კომლს შეადგენდა, მცირე დროის განმავლობაში შეეძლო 50 000 მეომრის გამოყვანა (იხ. უ ა ნ - ხ ა ტ ი ს ტ რ ა ვ ე რ ნ ი ე, თბ., 1974, გვ. 235).

⁴ უ ა ნ ბ ა ტ ი ს ტ ტ ა ვ ე რ ნ ი ე, თბ., 1974, გვ. 200: იხ. აგრეთვე „მოამბე“: 1898, №6, გვ. 6.

მოქმედებდნენ, გარეშე მტრები ვერ ბედავდნენ მათ დალაშქვრას.

თურქი მოგზაურის და ისტორიკოსის ევლია ჩელების გადმოცემით, დასავლეთი საქართველოს მეფე-მთავრები შურად შეოთხემ (1623—1640) დაიმორჩილა. ამ დროიდან მოყოლებული, ოსმალეთი დასავლეთ საქართველოს თავის სამფლობელოდ თვლიდა,¹ მაგრამ სამცხე-საათაბაგოსაგან განსხვავებით, აქ არსებული სოციალურ-ეკონომიკური წყობა და ფეოდალური ორგანიზაცია არ შეცვლილა. მეფე-მთავრებს ყოველწლიურად ძღვენის გაგზავნა ევალებოდათ, თუმცა ამას ყოველთვის არ ასრულებდნენ; პირიქით, მოხერხებულ დროს ოსმალთა წინააღმდეგ ბრძოლას იწყებდნენ.

ევლია ჩელების გადმოცემით, როდესაც კაზაკებმა მოულოდნელად გონიის ციხე აიღეს² და ოსმალთა რაზმებთან ბრძოლას აწარმოებდნენ, „ურჩი აზნაურების“ (სამეგრელოს—მ. რ.) ქვეყნიდან კაზაკებს ზღვით დამხმარე ძალა მოუვიდათ ორმოცი-ორმოცდაათი ლაზური ნავით.³

ევლია ჩელების „მოგზაურობის წიგნში“ ჩანს, რომ ოსმალეთი სამეგრელოს თავის სამფლობელოდ თვლიდა, მაგრამ მისი დიდი ნაწილი დამოუკიდებელი იყო. ისტორიკოსი მოგზაური სამეგრელოში ელჩობის დროს აღწერს,⁴ რომ აქ მან „სამოცდაათამდე ქალაქის მსგავსი სოფელი“ დაათვალიერა,⁵ მისი თქმით ზღვისპირა ზოლი, სადაც ოსმალებს ხელი მიუწვდებოდათ, დაპყრობილი იყო, ხოლო სამეგრელოს „მთებში ბალ-ვენახიანი, დასახლებული და აყვავებული, დაუმორჩილებელი მეგრული სოფლები არსებობდა. ზღვისოდენი ჯარიც რომ იყოს, მათ მთებში შესვლა ძნელია. ორმოც-ორმოცდაათათასამდე თოფით შეიარაღებული მოსახლეობაა“.⁶

ზღვისპირა აფხაზებს ევლია ჩელები დამორჩილებულად თვლის. მათ შესახებ ამბობს, რომ „მშვიდი და მორჩილი ხალხია, რადგანაც მათი ადგილები ძნელი მისასვლელი არ არის“, მაგრამ მისივე გან-

¹ ევლია ჩელების ცნობით დასავლეთი საქართველოს მეფე-მთავრები სულთანის მორჩილნი არიან, ყოველწლიურად მშვიდობიანობისა და მორჩილების დასადასტურებლად ორმოც-ორმოცდაათამდე ბიქსა და გოგოს, ათას წვეილ თევთიკის წინდას, სასახლის სამზარეულოსათვის ათას წვეილ ტილოს და სხვა მრავალ ძღვენს აგზავნიან (ევლია ჩელები, „მოგზაურობის წიგნი“. ნაკვ. I, თბ., 1971, გვ. 83).

² ევლია ჩელების მოგზაურობის წიგნი, ნაკვ. I, თბ., 1971, გვ. 323.

³ დასახ. ნაშრომი, გვ. 326.

⁴ იქვე, გვ. 93.

⁵ იქვე, გვ. 95.

⁶ იქვე, გვ. 96.

⁷ იქვე, გვ. 105.

ცხადებით, მთაში ოსმალეთის გავლენა ვერ აღწევს: „ხარაჯას და სხვა ბალ-ვენახის მოსავალს, ან აშარის მსგავსს არაფერს იძლევიან. მრავალი ასი ათასი ურჩი და მემამბოხე ხალხია,“¹ ამისათვის ანაპის „ციხე რომ შეეკეთდეს (გამაგრდეს) და შიგ სრულყოფილი ჯაშახანა და მეომრები ჩააყენონ, აბაზას და ჩერქეზეთის ქვეყნების დამორჩილება გაადვილდება“.²

ამრავად, თვით თურქული წყაროს მოწმობით, ოსმალეთის ბატონობა დასავლეთი საქართველოს მხოლოდ ბარის გარკვეულ ნაწილზე ვრცელდებოდა, მთის ადგილებში კი მათ ხელი არ მიუწვდებოდათ.

მაგრამ ოსმალთა პასიურობის ძირითადი მიზეზი მაინც ის იყო, რომ XVII საუკუნის დასაწყისისათვის სულთნის ხელისუფლება საგრძნობლად შესუსტდა. ამას ადასტურებს იმდროინდელი თურქი მოღვაწის ელჩ ბეი გორიჯელის ტრაქტატი, რომელშიც აღნიშნულია, რომ ჯარი „სალაშქროდ მიდის: როცა მოესურვება, მორჩილება არა აქვთ, ხელისუფლების შიში და რიდი არა აქვთ“,³ ახლა ცენტრალურ ხელისუფლებას ძველებურად აღარ მიუწვდებოდა ხელი პროვინციებზე. ამიტომაც სულთნის ბრძანებებს არაფრად ავდებდნენ. „წინათ რომელიმე მხარეში მაღალი მთავრობის ბრწყინვალე ბრძანება რომ მოვიდოდა, იმ მხარის სოფლებში და ქალაქებში აურზაური ატყდებოდა და დიდსა თუ პატარას შიში და მოკრძალება მოიცავდა; ფადიშაჰის ფირმანი მოსულაო, ამბობდნენ და ყურს მიუშვებდნენ. ეხლა კი ბრძანებები და ბარათები რა საქმესაც არ უნდა ეხებოდეს — უჭმია. ერთიმეორის საწინააღმდეგო ბარათები და დადგენილებანი მისი უდიდებულესობისა წელწოდში ათასი იწერება“.⁴ ამიტომ სულთანის ბრძანებებს აღარავინ ასრულებდა. იანიჩართა შორის დისციპლინა იმდენად დაეცა, რომ ომში წასვლის პირობად ზელფასის მომატებას ითხოვდნენ. სულთანი უძლური იყო იანიჩარების წინაშე; მათი ჯარის რეორგანიზაცია არ ხერხდებოდა, რადგან იანიჩარები არ თმობდნენ ტრადიციულ სამხედრო ორგანიზაციას; როცა ოსმან II-ემ (1618—1622 წწ.) იანიჩართა კორპუსის რეორგანიზაცია დააპირა, რათა იგი უფრო ბრძოლისუნა-

¹ ევლია ჩელების მოგზაურობის წიგნი, ნაკვ. I, თბ., 1921, გვ. 105—106.

² იქვე, გვ. 109.

³ ვ. ფუთურძე, ოსმალეთი XVI—XVII საუკუნეთა მიჯნაზე; ნარკვევები მახლობელი აღმოსავლეთის ისტორიიდან, თბ., 1957, გვ. 279—280.

⁴ იქვე.

რიანი გაეხადა, იანიჩარები აჯანყდნენ და 1622 წელს სულთანი მოკლეს.¹

აჯანყებულებმა ტახტზე აიყვანეს სასახლის კედლებში გამომწყვდეული სულელი უფლისწული მუსტაფა, მაგრამ 1623 წელს მოხელეთა ერთმა ჯგუფმა, იანიჩარებთან შეთანხმებით მუსტაფა ტახტიდან გადააყენა და მცირეწლოვანი მურად IV (1623—1640 წწ.) გაამეფა.

სტამბოლში მომხდარი ამბები, რაც უშუალო მდგომარეობაში აყენებდა ცენტრალურ ზელისუფლებას, შელავათს უქმნიდა დაპყრობილ ქვეყნებს, მათ შორის გამონაკლისს არც დასავლეთი საქართველო წარმოადგენდა.

* * *

ამ ხანებში აღმოსავლეთი საქართველოც არ იყო დამშვიდებული, მარტყოფისა და მარაბდის (1625 წწ.) შიშიმ ბრძოლების შემდეგ მოძმენი ორ სამტრო ბანაკად გაიყვნენ, ერთ მხარეს ქართლის მოურავის გიორგი სააკაძის და მეორე მხარეს სიძე-სიმამრ ზურაბ არაგვის ერისთავისა და ქართლ-კახეთის მეფე თეიმურაზ I-ის მომხრენი დაჯგუფდნენ.

ურთიერთობა მეფესა და მოურავს შორის იმდენად გამწვავდა, რომ სააკაძემ აიძულა თეიმურაზი ქართლის ტახტი დაეტოვებინა.

ქართლის მოურავმა სთხოვა იმერეთის მეფეს გიორგი III-ს თავისი შვილი ალექსანდრე გამოეგზავნა ქართლში გასამეფებლად. არჩილიანი ასე გადმოუკვცემს ამ ამბავს:

„აჲ დაუწყო მეფეს თხოვნა შვილის ქართლსა საბატონოდ, აჲყვა მეფეც დაიყოლა, ბრძანა არ აქვს დასალონად“.²

იმერთა მეფის შვილის გამეფება ქართლში მომავალ (ბაზალეთის) ბრძოლას უნდა გადაეწყვიტა: „თუ გიორგი თეიმურაზზე გაიპარკვებდა, მაშინ ალექსანდრე ქართლ-კახეთის მეფე და იმერეთის ტახტის მემკვიდრე იქნებოდა. გიორგი მეფის გარდაცვალების შემდეგ კი (იქნებ მანამდეც) იმერეთი ქართლ-კახეთს შეუერთდებოდა. ერთ სახელმწიფოდ გაერთიანებულნი სამი სამეფო კი გამდგარ სამთავროებსაც აღვილად შეიერთებდა და საქართველო აღსდგებოდა“.³

¹ ვ. ფუთუჩიძე, დასახ. ნაშრ., გვ. 282.

² არჩილიანი, II, თბ., 1937, გვ. 79.

³ საქართველოს ისტორიის ნარკვევები, ტ. IV, გვ. 290.

სანამ გიორგი სააკაძე ქართლის ტახტზე ალექსანდრეს გამეფებას გადაწყვეტდა, მანამდე ამ აქტს მოურავისა და იმერთა მეფის მოყვრობის ამბავი უძლოდა წინ. ჯერ კიდევ ბაზალეთის ბრძოლამდე იმერთა მეფე გიორგი ქართლის მოურავს გიორგი სააკაძეს აძლევს პირობის წიგნს (1625—1626 წწ.): „ეს ფიცი და პირი გიბოძე ჩვენ, მეფეთ-მეფემ პატრონმა გიორგიმ და ძემან ჩემმა პატრონმა ალექსანდრემ, მამუკამ და როსტომ თქვენ, მოურავს პატრონს გიორგის, ასრე რომე ჩემი ქალი ბატონი ხვარამზე გულგანწმენდით თქვენის შვილის ავთანდილისათვის მომიცემია“.¹

ამ დამოყვრების შემდეგ გიორგი მეფე, საფიცარ წიგნს აძლევს გიორგი სააკაძეს: „ან შენ ან შენი ძმა და ან შენი შვილი ჩუენსა ქუეყანასა მოხვიდეთ, კილეც კარგად გარჩინოთ და არცავის საძალთ და საავჯაცოდ დაგანებოთ, რისაც შემძლებელნი ვიყოთ და კიდევ კარგად მოგებყრათ; და თუ ვინმე თქუენი თავი შემოგუაბებლოს, არც გაუკითხავად შეგიბეზლოთ“.² ე. ი. ამ დამოყვრების შემდეგ, იმერეთის მეფე გიორგი III და ქართლის მოურავი გიორგი სააკაძე შეთანხმდნენ, რომ, საჭიროების შემთხვევაში სააკაძეს დახმარებას აღმოუჩენდნენ შტრების წინააღმდეგ ბრძოლაში.

იმერეთიდან მოურავი ლევან II დადიანს ეწვია ოდიშში. აქაც ანალოგიური შეთანხმება მოხდა, ასეთივე შეთანხმება მოხდა გურიის მთავარ მალაქიასა და სააკაძეს შორის, რამაც ფიცის წიგნში კპოვა ასახვა.³ ამ ურთიერთშეთანხმების ნიადაგზე, როდესაც გიორგი სააკაძეს ჯარი დაჭირდა მეფე თეიმურაზის წინააღმდეგ საბრძოლველად, იმერთა მეფემ ზემო მხარის ლაშქარი მისცა მამუკა ბოქაულთუხუცესის და აშილაბაშ აბაშიძის სარდლობით.

გიორგი სააკაძის შორსმკვრეტელმა ალლომ თეიმურაზს ცოტა რამ ასწავლა. როგორც ზემოთ ითქვა, თეიმურაზის საწინააღმდეგოდ გიორგი სააკაძემ იმერთა მეფის ძის გამეფება სცადა ქართლში, ამაზე აღრე კი მეფეს დაემძახლა. ეს მოყვრობა გიორგის საქართველოდან წასვლამ ჩაშალა, მაგრამ ახლა თეიმურაზმა მოისაზრა, რომ აუცილებელი იყო იმერეთის მეფესთან დამეგობრება და ზურგიდან თავდასხმის აშორება. სწორედ ამ მოსაზრებით ხელმძღვანელობდა იგი, როდესაც მან ზურაბ ერისთავის ცხედარს გაციებაც

¹ ისტორიული დოკუმენტები იმერეთის სამეფოსა და გურია-ოდიშის სამთავროებსა, შ. ბურჯანაძის გამოცემა, თბ., 1959, გვ. 22.

² იქვე, გვ. 24.

³ გ. ჯამბუკია, გიორგი სააკაძე, თბ., 1964, გვ. 147—149. ფარსადან გორგიჯანიძის ისტორია, გვ. 29; არჩილიანი, II, თბ., 1937, გვ. 81.

არ აცალა და მისი ქვრივი — თავისი ქალი დარეჯანი ქმრის ოჯახიდან გამოიტაცა, შუხრანს მიიყვანა და იმერთა მეფის ძეს ალექსანდრეს მიათხოვა 1629 წელს.

• • •

1632 წელს ირანის შაჰმა გამაჰმადიანებული როსტომ-ხანი ქართლში მეფის ტახტის დასაყავებლად გამოგზავნა.

თეიმურაზ მეფეს ძალა არ ეყო წინააღმდეგობა გაეწია ირანის ლაშქრისათვის, ამიტომ უბრძოლველად დათმო ტახტი და იმერეთის სამეფო კარს შეაფარა თავი.

როსტომ მეფე უცოლო იყო. მისმა ვეზირებმა გამართეს თათბირი, თუ ვისთან დაემოყვრებინათ ქართლის ახალი მეფე. ქართლის მესვეურთ სწორედ ისეთი პიროვნება უნდა გამოენახათ, რომელიც შაჰმადიან მეფეს საჭიროების შემთხვევაში მხარს გაუმფარებდა და გვერდში ამოუდგებოდა. ბოლოს მრჩეველნი მივიდნენ იმ გადაწყვეტილებამდე, რომ რაკი თეიმურაზ მეფე ქართლის ტახტს ნებაყოფლობით არ დათმობდა, ხოლო როსტომის წინააღმდეგ ბრძოლაში მას ყოველთვის დაუჭერდნენ მხარს იმერეთის მეფე გიორგი და ტახტის მემკვიდრე ალექსანდრე, ამიტომ ისეთი მოკავშირე უნდა ეშოვათ, რომელიც იმერეთის მეფეს და მის მემკვიდრეს მოქმედების საშუალებას მოუსპობდა და ამით თეიმურაზ მეფის დაბმარებაზე ხელს ააღებინებდა. ასეთი მიზნის განსახორციელებლად მათ საუკეთესოდ მიიჩნიეს როსტომის დამოყვრება ოდიშის მთავარ ლევან II დადიანთან.¹ ამ დროისათვის ლევანი დასავლეთ საქართველოში ძლიერი პოლიტიკური ფიგურა იყო, ამასთან, იმერეთ-ოდიშს შორის მტრული დამოკიდებულება არსებობდა.

ამ მოსაზრებიდან გამომდინარე, ქართლის მესვეურთ როსტომ მეფის საცოლედ ლევან დადიანის და მარიამი აირჩიეს.

როსტომ მეფემ ეს ამბავი შაჰს შეატყობინა და ნებართვა სთხოვა. სპარსეთის შაჰს კარი ამას დიდი კმაყოფილებით შეხვდა, რადგან, ჯერ ერთი, მოუსვენარ ქართლში მათი კაცი მოყვარეს იძენდა, რომელიც თეიმურაზის წინააღმდეგ ბრძოლაში მოკავშირედ გამოადგებოდათ; მეორეც, თურქეთის წინააღმდეგ ომში სპარსეთისათვის სამეგრელოს დიდი მნიშვნელობა ექნებოდა.²

¹ კ. გრიგოლიძე, ენამკის მოამბე, III, თბ., 1942, გვ. 154.

² აქვე.

როსტომ მეფე და ლევან დადიანი შეთანხმდნენ, როდის მომხდარიყო ქორწილი. პირობის თანახმად, ლევან დადიანი იმერეთში უნდა მისულიყო დიდი ლაშქრით, როსტომიც იქ უნდა გადასულიყო ჯარით და მეფე-დედოფალი საჩხებიძეოში უნდა შეეკროდნენ ერთმანეთს. შეთანხმების თანახმად მეფე დიდი ჯარით წავიდა და იმერეთის საზღვარზე — სურამში დადგა. გიორგი იმერთა მეფეს კარგად ესმოდა როსტომისა და ლევანის მოყვრობის პოლიტიკური არსი, რაც იმერეთის სამეფოს წინააღმდეგ იყო მიმართული, ამიტომ მან გზა არ მისცა როსტომს. სხვა საშუალება არ იყო, როსტომმა და ლევანმა ისევ განაპირა გზით სვლა ირჩიეს, როსტომი ახალციხე-ზეკართ ბაღდადში ჩავიდა, კაკას ხილთან, ლევან დადიანი კი სამიქელაძეოზე გავლით დანიშნულ ადგილას გაჩნდა¹.

XVII საუკუნის მეორე მეოთხედისათვის ჩმერეთის სამეფო რთულ საგარეო-პოლიტიკურ ვითარებაში მოექცა. შაჰ-აბასის ორგზის ლაშქრობის შედეგად ირანმა დაიკავა ქართლ-კახეთის სამეფოები და ლიხის ქედთან შოაღწია. ირანის ინტერესები იმერეთის წინააღმდეგ იყო მიმართული, ვინაიდან: 1) ქართლ-კახეთის მტკიცე დაპყრობისათვის საჭირო იყო იმერეთის დაკავებაც, ამით ქართლ-კახეთის შეფეებს მოესპობოდათ „სახიზარი“, 2) შავ ზღვასა და მის მისასვლელებს პირველხარისხოვანი სტრატეგიულ-ეკონომიკური მნიშვნელობა ჰქონდა თურქეთის წინააღმდეგ ომში; 3) იმერეთის სამეფო კარი რუსეთთან კავშირს ამყარებდა და მფარველობას სთხოვდა მას, ამიტომ ამიერკავკასიაში მეფის რუსეთის შემოჭრის საფრთხე იმერეთიდან იმუქრებოდა, აქედან გამომდინარე, ირანის პოლიტიკაში იმერეთის სამეფოს დიდი მნიშვნელობა ენიჭებოდა.² ირანმა თავისი ზრახვები სწორედ ლევან დადიანის მეშვეობით განახორციელა. „სპარსეთის შაჰმა ლევანს 50000 მარჩილი გამოუგზავნა“ და გარდა ამისა „წელწადში ათასი თუმანი ჯამაგირი გაუჩინა“³.

მეფე გიორგიმ სასიძოსთან შესახვედრად წამოსულ დადიანს გზა გადაუჭრა და თავისი ჯარით წინ დაუდგა. იმერთა ჯარში იყო თეიმურაზ კახთა მეფეც თავისი დიდებულებით.

მიუხედავად გაფრთხილებისა, გიორგი მეფემ არ დაიშალა და „ცოტა კაცი“ თანხლებით დადიანის ჯარის დასახვერავად წავიდა. ამ დროს გიორგი მეფის მხლებლის გამცემლობით, რომელმაც ლე-

¹ ქართლის ცხოვრება, ტ. IV, გვ. 828.

² კ. გრიგოლია, ილორის წმ. გიორგის ხატის წარწერა, ენიმკის მოამბე, 111, 1942, გვ. 155.

³ ფარსადან გორგიჯანიძის ისტორია, გვ. 33.

ვან დადიანს შეატყობინა მეფის ადგილსამყოფელი, ლევან დადიანი თავს დაეცა მზირად გამოსულ მეფეს და ტყვედ ჩაიგდო ხელში.¹

გიორგის დატყვევების შემდეგ მოხდა ბრძოლა იმერთა და ოდიშართ შორის, რომელშიც იმერეთის ჯარი დამარცხდა.

როსტომ მეფის ქორწინების და კაკას ხიდთან გიორგი მეფისა და ლევან დადიანის ბრძოლის თარიღი დადგენილად არ ითვლება. ამ საკითხზე ქართველ ისტორიკოსთა სხვადასხვა შეხედულება არსებობს. ბერი ეგნატაშვილის ჩვენებით ეს ბრძოლა მოხდა 1632 წელს,² ვახუშტი ბატონიშვილი მას 1638 წლით ათარიღებს.³ ეს თარიღი (1638 წ.) დამკვიდრდა ახალ საისტორიო მწერლობაში. მარი ბროსესა და ექვთიმე თაყაიშვილს იგი სწორად მიაჩნდათ, ლევან მუსხელიშვილიც ამავე აზრისაა.

ივანე ჯავახიშვილის, სარგის კაკაბაძის⁴ და დ. გვრიტიშვილის⁵ მიხედვით ეს ბრძოლა 1634 წელს უნდა მომხდარიყო.

მარიამ დედოფლის მიერ ლეონის ღვთისმშობლის ყმათათვის ნაბობები 1634 წლით დათარიღებული თარხნობის წიგნის საფუძველზე კ. გრიგოლიას მიაჩნია, რომ ბრძოლა უნდა მომხდარიყო ან 1632 წელს, როგორც ბერი ეგნატაშვილი მიუთითებს, ან 1633 წელს. ყოველ შემთხვევაში, 1634 წელს აქვთ ამ თარიღის გადმოწევა კ. გრიგოლიას უმართებულოდ მიაჩნია.

უკანასკნელ დროს გ. ჯამბურიაშვილმა 1633 წელი მიუთითა.⁶ მაგრამ არსებობს ორი წყარო, რომლებიც მტკიცედ არის დაკავშირებული ჩვენი მსჯელობის საგანთან: 1) სამეგრელოდან მოსული იყვნენ ელჩები ქართლში იმის თაობაზე, თუ როდის უნდა მომხდარიყო ქორწინება როსტომსა და მარიამს შორის. ელჩებს შორის იყო ნიკოლოზ ირბახიცი (ჩოლოყაშვილი). მან გორში ინახულა კათოლიკე მისიონერები არქანჯელო ლამბერტი და იოსებ ჯუდიჩე და ურჩია მათ სამეგრელოში წასულიყვნენ, სადაც უფრო მეტ მხარდაჭერას პოვებდნენ მთავრისაგან (ამ დროს ქართლში მისიონერები შეეწირებოდას განიცდიდნენ ხელისუფლებისაგან), ამავე დროს თვითონაც დაპირდა დახმარებას. მართლაც, ლევანის ელჩებთან ერთად

¹ ქართლის ცხოვრება, ტ. IV, გვ. 828.

² ბერი ეგნატაშვილი, ქართლის ცხოვრება, II, 1959, გვ. 420.

³ ქართლის ცხოვრება, IV, 1973, გვ. 905.

⁴ ს. კაკაბაძე, საქართველოს ისტორია, ტფ., 1922, გვ. 59.

⁵ დ. გვრიტიშვილი, ნარკვევები საქართველოს ისტორიიდან, ტ. II, თბ., 1965, გვ. 426.

⁶ საქართველოს ისტორიის ნარკვევები, ტ. IV, გვ. 318, სქოლიო № 5.

ორივე მისიონერი 1633 წლის 23 ოქტომბერს სამეგრელოში გაემგზავრა.¹

ფაქტს, რომ მისიონერები 1633 წელს მოვიდნენ სამეგრელოში, ადასტურებს ის დოკუმენტები, რომლებიც მიქელ თამარაშვილმა მოიპოვა ევროპის სხვადასხვა არქივში, გარდა ამისა, ამავე ფაქტს გადმოგვცემს თვით არქანჯელო ლამბერტიც თავის ცნობილ შრომაში „სამეგრელოს აღწერა“. მისიონერები რომ სამეგრელოს ელჩების მეშვეობით მოხვდნენ სამეგრელოში, უდავოა. ამით ის მტკიცდება, რომ ჯერ კიდევ 1633 წელს ქართლსა და სამეგრელოს შორის მხოლოდ საქორწინო პირობებზე იყო ლაპარაკი; 2) მიქელ თამარაშვილის მტკიცებით, მისიონერები პირველად გურიაში მივიდნენ 1634 წელს, მისიონერების მისვლა გურიაში, ქორწინება და კაქას ხილთან მომხდარი ბრძოლა ერთმანეთთანაა დაკავშირებული.

მარიამ ღედოფალს მაყრიონად მოყვნენ გორში შემოქმედელი ეპისკოპოსი და სხვა წარჩინებულნი პირნი. ეპისკოპოსი სამეგრელოში გაცნობოდა პატრებს ლამბერტსა და ჯულიჩეს; ამჟამად, როცა მან ნახა სხვა მისიონერები, მათ უფროსს-ავიტაბილეს წარუდგა და სთხოვა, პატრები გურიაში გაეშვა. მისი თხოვნა დაკმაყოფილდა 1634 წელს; იგი პატრების თანხლებით გურიაში დაბრუნდა.²

ეს ორი საბუთიც, ვფიქრობთ, მხარს უჭერს იმას, რომ კაქას ხილთან მომხდარი ბრძოლისა და ქორწინების თარიღად 1634 წელი ჩაითვალოს.

• • •

გიორგი იმერთა მეფის ტყვედ ჩავარდნისთანავე დადიანმა და მისმა თანამზრახველებმა სასწრაფოდ მოიწვიეს თათბირი და იმერთში ქაიხოსრო გურიელის გამეფება გადაწყვიტეს, მაგრამ ამ გადაწყვეტილებას განხორციელება არ ეწერა, „მეფედ თქმულ“ ქაიხოსროსა და ლევანის ზრახვებს ფრთები შეეკვეცა, რადგანაც იმერთის პოლიტიკური მესვეურები, რომლებიც დარწმუნდნენ, დადიანი მეფეს ჯერ-ჯერობით არ გამოუშვებდა, მაშინვე შეიკრიბნენ და გიორგი მეფის ძე ალექსანდრე მეფედ აკურთხეს.³

ალექსანდრეს უპირველესი საზრუნავი იყო მამის დაბნა ტყვეობიდან. ამ საკითხის მოგვარება არც თუ ისე ადვილი აღმოჩნდა,

¹ არქანჯელო ლამბერტი, სამეგრელოს აღწერა, გვ. V, იქვე, გვ. III-ე [მთარგმნელისაგან].

² მ. თამარაშვილი, კათოლიკობა ქართველთა შორის, თბ., 1902, გვ. 150—151.

³ ფარსადან გორგიჯანიძის ისტორია, გვ. 33.

მეფე დაიხსნეს ორი წლის ტყვეობის შემდეგ დიდი „სახსრის“ გაღებით. ფარსადან გორგიჯანიძის გადმოცემით: „მეფე გიორგი ორს წელიწადს დადიანს ჰყავდა, სახსრად მისცეს მურასა გვირგვინი, ოქროსა და ვერცხლის ჭურჭელი. თვალმარგალიტით მურასა იარაღი და ნაპირის ალაგნი ქილაძენი და მიქელაძენი და რაც ჩხარში ვაჭარი ესახლეს სომხები, რომ დადიანმა რუხის ქალაქი იმაებით ააშენა“.¹

ფარსადან გორგიჯანიძის გარდა ამ ფაქტს ადასტურებს ქართლის ცხოვრება,² ვახუშტი ბატონიშვილი³ და ილორის წმ. გიორგის ხატის 1651 წლის წარწერა, რომელშიც ნათქვამია: „ამავე ეამსა აფყარეთ სრულბით ქალაქი ჩხარისა, მოვასხით ზუგდიდს და დაგუსახლეთ ადგილსა რუხისასა“.⁴

ლევან დადიანმა მეფის „სახსარში“ ძვირფასეულობის გარდა ოდიშს წაასხა და რუხს ჩაასახლა ჩხარისა და ჩიხორის ებრაელები და სომხები. ლევანმა რუხში სავაჭრო ცენტრის შექმნა განიზრახა. არქანჯელო ლამბერტის თქმით: „მხოლოდ სომხების ქალაქში (ე. ი. რუხში — მ. რ.), რომელიც აშენებულია აწინდელი მთავრის დროს, არის მოედანზე რამდენიმე დუქანი, სადაც იყიდება ტილო და ირანული შალი“,⁵ მაგრამ მოკლე დროის განმავლობაში ამ სავაჭრო ცენტრმა არსებობა შეწყვიტა.

დადიანის მეცადინეობა იმის შესახებ, რომ ოდიშში აღებ-მიცემობა დაენერგა და საქალაქო ცენტრი შეექმნა, მარცხით დამთავრდა. რუხი, როგორც სავაჭრო ცენტრი, დაქვეითდა და შემდეგ მთლად გაქრა. იგი დარჩა მხოლოდ როგორც ციხე-სიმაგრე.

• • •

1639 წელს გარდაიცვალა იმერთა მეფე გიორგი III. ტახტი დაიკავა მისმა შვილმა ალექსანდრე მესამემ (იგი უკვე 1634 წელს აკურთხეს მეფედ), ამ დროისათვის ქვეყანა მეტად დაუძღურებული იყო. ამ სავალალო მდგომარეობიდან ქვეყნის გამოყვანა ალექსანდრე მეფეს არ შეეძლო, ვინაიდან დადიანისაგან მუდამეამს თავდასხმებს განიცდიდა. ბერი ეგნატაშვილი ასე გადმოგვცემს და-

¹ ფარსადან გორგიჯანიძის ისტორია, გვ. 33.

² ქართლის ცხოვრება, II, 1959, გვ. 420.

³ ქართლის ცხოვრება, IV, გვ. 829.

⁴ ივ. ჭავჭავაძის შვილი, ქართველი ერის ისტორია, ტ. IV, 1967, გვ. 376.

⁵ არქანჯელო ლამბერტი, დასახ. ნაშრ., გვ. 156.

დიანის მძლავრობას იმერეთზე: „ესრეთ გაუჭირა საქმე ალექსანდრეს, რომე ქუთაისს გალავანი შემოივლო და იჯდა მას შინა და ვერა წინ აღუდგებოდა დადიანს“.¹ ამ ფაქტს ვახუშტი ბატონიშვილიც ადასტურებს.²

იმერთა მეფე ალექსანდრე III იძულებული გახდა ლევან დადიანის წინააღმდეგ ბრძოლაში ოსმალთათვის ეთხოვა დახმარება. ოსმალნიც უკმაყოფილონი იყვნენ დადიანის განდიდებით, რაც იმაში გამოიხატა, რომ ოდიშის მთავარი უწინდებურად არ მორჩილებდა მათ და ირანთან კავშირს ამყარებდა. ამან, თავის მხრივ, ოსმალეთის აგრესიის გაძლიერება გამოიწვია დასავლეთ საქართველოში. არქანჯელო ლამბერტის გადმოცემით, ოსმალთ დადიანის დასჯა იმიტომაც უნდოდათ, რომ იგი აღრე ღონელ კახაყებს თავშესაფარს აძლევდა, რომელნიც თურქეთის სანაპიროებს და მათ ფლოტს არბევდნენ, ამიტომ ოსმალებმა სტამბოლიდან გამოგზავნეს დიდი ვეზირის შვილი მაჰმად-ფაშა და ექვსი სხვა ფაშა დიდი ჯარით, რომელნიც ოდიშს შეესიენ.

1634 წლის მაისში თურქები შეიჭრნენ სამეგრელოში, დაარბიეს კოდორის ახლო-მახლო სოფლები და გაძარცვეს ღრანდის მონასტერი.³ დადიანი იძულებული გახდა მორჩილება განეცხადებინა ოსმალთათვის და რამდენიმე ხნით შეეწყვიტა იმერეთზე თავდასხმა.⁴

რაც ღრო ვადიოდა, მით უფრო მწვევდებოდა დადიანსა და ალექსანდრეს შორის ურთიერთდამოკიდებულება.

ალექსანდრე მეფე იძულებული გახდა გაემაგრებია ქალაქი ქუთაისი და იქ მოეთავსებია იმერეთის დიდებულნი თავისი ოჯახებით, რათა ისინი დადიანის მხარეზე არ გადასულიყვნენ.⁵

ქუთაისის ციხის გამაგრებამ დადიანი ვერ შეაჩერა, პირაქით, არქანჯელო ლამბერტის ცნობით: „დადიანმა მოინდომა ქუთაისის ციხიდან მეფის გამოგდება, ციხის დანგრევა და მოწასთან გასწორება. ამისათვის ერთს ფრანგს, რომელიც ტყვედ ჰყავდა, გააკეთებინა ოცდაათიოდე ზარბაზანი და შეუდგა განზრახულ საქმეს“.⁶

¹ ქართლის ცხოვრება, II, 1959, გვ. 421.

² ქართლის ცხოვრება, IV, გვ. 829.

³ დ. გვრიტიშვილი, ნარკვევები საქართველოს ისტორიიდან, ტ. II, თბ., 1965, გვ. 425.

⁴ ს. კაკაბაძე, საქართველოს ისტორია, თბ., 1922, გვ. 60.

⁵ ქართლის ცხოვრება, IV, გვ. 830.

⁶ არქანჯელო ლამბერტი, სამეგრელოს აღწერა, გვ. 92.

1645 წელს ლევან დადიანმა გაილაშქრა იმერეთის წინააღმდეგ. მას დიდი ჯარი ჰყავდა და ზარბაზნებიც ჰქონდა. ალექსანდრეს ქუთაისი საგანგებოდ გაემადგრებინა. მას შემოვლებული ჰქონდა თხრილები, აღმართული იყო ხის კოშკები. დიდი ბრძოლით ოდიშარებმა აიღეს ციხის გარე სიმაგრეები, მაგრამ ციხის აღება ვერ შეძლეს, დაანგრეს მეფის სასახლე აჯამეთში, მთლად გაავერანეს ქალაქის ახლო-მახლო მდებარე სოფლები და დიდი ნადავლით უკან გაბრუნდნენ. დადიანმა ერთი კვირა დაასვენა თავისი ჯარი და ისევ დაეცა ქუთაისს. ამჟამად უფრო მეტი ტყვე და ნადავლი იშოვა. ერთი წლის შემდეგ, 1646 წელს, თებერვლის თვეში, დადიანმა ყველაზე დიდი ლაშქრობა მოაწყო იმერეთზე. გადაბუგა და ააოხრა მთელი არგვეთის მხარე, ისევ შემობრუნდა ქუთაისში, წაიღო აუარებელი დავლა და წაასხა უამრავი ტყვე.¹

ბერი ეგნატაშვილის ვადმოცემით, იმერეთში „არსადა დაშთა დაბანი და შენობანი და სიმაგრენნი, რომელ არა მიემძლავრა ლევანსა“.²

1647 წელს ლევან დადიანმა ისევ ილაშქრა იმერეთში და როგორც სხვა დროს, ახლაც ეს ლაშქრობა მისი გამარჯვებით დამთავრდა: ქალაქი გადაწვა და ააოხრა.

გამარჯვებით გალაღებულმა ლევან დადიანმა იმერეთის საზღვარზე მცხოვრებ ოდიშართ უბრძანა, მუდმივი თავდასხმით შეეწუხებინათ „მტერი“, ისინიც ასრულებდნენ ბრძანებას და ხშირად აოხრებდნენ იმერეთის სამეფოს, საიდანაც დიდი ნადავლით, საქონლით თუ ტყვეებით ბრუნდებოდნენ უკან. მეგრელები „ისე გათავხედდნენ, — აღნიშნავს არქანჯელო ლამბერტი, — რომ ხანდახან თვით ქუთაისის ციხემდის მიდიან და იტაცებენ ქალაქის ნახირს“³. ა. ლამბერტის ვადმოცემით „ერთ დღეს ოდიშიდან გამოსულიყო ოციოდე კარგად შეიარაღებული ცხენოსანი, ამათ ქუთაისის ციხესთან ზედ მეფის თვალწინ დიდძალი პირუტყვი მოიტაცეს, იმერეთის მეფე დალონდა რასაკვირველია უფრო სირცხვილისაგან, ვიდრე დანაკლისის გამო, და უსაყვედურა თავისიანებს, თქვენ იმდენი გული აღარ გერჩისთ, რომ მეგრელებს შეარჩინთ ასეთს თავგასულობას და უტიფრობასო. მეფის სიტყვამ იმოქმედა და ოთხმოცამდე იმერელი შეიარაღებული შექდა ცბენზე და სწრაფად დაედევნა მეგ-

¹ მ ა რ ი ბ რ ო ს ე, საქართველოს ისტორია, II, 1900, გვ. 192—193.

² ქართლის ცხოვრება, II 1959, გვ. 428.

³ ა რ ქ ა ნ ჯ ე ლ ო ლ ა მ ბ ე რ ტ ი, დასახ. ნაშრომი, გვ. 93.

რელებს... და დაეწივნენ... მეგრელები მოუბრუნდნენ მღევრებს... შეეტაკნენ და თითქმის ყველა ჩამოაგდეს ცხენიდან და უმეტესი ნაწილი მათ შორის ტყვედ წაიყვანეს“.¹

ლევანის უკანასკნელი თავდასხმა ისევ ქუთაისზე იყო. „მიუხედიტ მეფესა ალექსანდრეს რიონს გაღმა, ქუთათისი ქალაქი დავსწვით და ავაოხრეთ, და შემოვადექით გენათელის ციხესა და დაუწყეთ ბრძოლა. დაუშინეთ დიდროვანი ზარბაზნები, დავამტკრიეთ ციხე და ავიღეთ სწორზედა, ორმოცის თავადითა და აზნაურშვილებითა, სხვისა მრავლითა და მეთოფითა მისი საქონლითა და ალაფითა ავსებულნი მშვიდობით გამარჯვებულნი შინ მოვედით“.² ამ წარწერიდან ჩანს, რომ დადიანის რისხვა გენათელ ეპისკოპოსს ქვარიანსაც გადასწვდომია, როგორც მეფის უახლოეს მრჩეველს და მის ერთ-ერთ აქტიურ მომხრეს.

გენათელ ეპისკოპოსთან ბრძოლა უნდა მომხდარიყო 1651 წლამდე, ვინაიდან აღნიშნული წარწერა ლევან დადიანმა 1651 წელს გააკეთებინა.

როცა ცხადი გახდა, რომ დადიანი და ალექსანდრე მეფე ვერ შერიგდებოდნენ და მეფე „ტყვეებს“ ვერ დაიბრუნებდა დადიანისაგან, ზოლო თეიმურაზი დასავლეთ საქართველოდან ვერავითარ დახმარებას ვერ მიიღებდა, სიძე-სიმამრმა რუსეთის მეფეს მიმართეს (1649—1651 წწ.) 'როსტომისა' და დადიანისაგან თავის დასაცავად, ამის საპასუხოდ გაბრაზებულმა დადიანმა გაახშირა იმერეთზე თავდასხმები, ზოლო მამუკა ბატონიშვილს ჯერ თვალები დასთხარა და შემდეგ წამებით სული ამოხადა 1653 წელს.³

ფარსადან გორგიჯანიძე აღნიშნავს, რომ „ლევანს ყაენიც მწყალობელი და ლაშქრითა და სალაროთ მომხმარებელი ჰყვანდა“.⁴ ირანმა მიზანს მიაღწია დადიანის ეკლადბირებით: იმერეთის სამეფო ისე დაძაბუნდა, რომ იგი ველარ ჩაერეოდა ქართლ-კახეთის საქმეებში. იგივე გორგიჯანიძე აღნიშნავს, რომ 1648 წელს ალექსანდრე მეფემ იმიტომ ვერ მოახერხა თეიმურაზის დახმარება ირანის წინააღმდეგ, რომ „თუ მეფე ალექსანდრე იმერეთით დაიძროდა, დადიანი იმერეთს ჩამოუდგებოდა“.⁵

საკვიროა აღინიშნოს კიდევ ერთი გარემოება, რომელიც განაპირობებდა იმერეთის მარცხს ოდიშელებთან. ეს იყო იმერეთის

¹ არქანქელი ლამბერტი. დასახ. ნაშრომი, გვ. 93.

² ს. გრიგოლია, დასახ. ნაშ., გვ. 158.

³ ქრონიკები, II, გვ. 467; ვახუშტი ბატონიშვილი მამუკას გარდაცვალებას 1654 წლით ათარიღებს (ქართლის ცხოვრება, IV, გვ. 832).

⁴ ფარსადან გორგიჯანიძე, დასახ. ნაშ., გვ. 51.

⁵ ფარსადან გორგიჯანიძის ისტორია, გვ. 51.

თავადაზნაურობის არაერთსულოვნება; ზოგიერთნი მხარს არ უჭერდნენ მეფეს და ლალატობდნენ კიდევ. ამის დასამტკიცებლად ვახუშტი ასეთ ფაქტს მოგვითხრობს: ალექსანდრემ წარჩინებულთა ლალატის აღსაკვეთად დიდი ზღუდე მოავლო ქალაქს, მოაყვანინა მათ თავიანთი ცოლ-შვილი და „თვითცა იმყოფებოდა მასვე შინა, რათა არა მიერთნენ დადიანსა ჰყო-მისთვის“.¹ ასეთ მდგომარეობაში მეფეს არ შეეძლო აქტიური თავდაცვა ეწარმოებინა, ვინაიდან ფეოდალთა ლალატისა ეშინოდა.

* * *

ისტორიული წყაროები ლევან II დადიანის მოღვაწეობას სხვადასხვანაირად აფასებენ. უცხოელი ავტორები: ჟან შარდენი, არქანჯელო ლამბერტი, დონ ჯუზეპე ჯუდიჩე მილანელი და სხვები მას დიდი ქებით იხსენიებენ. ჟან შარდენის თქმით, იგი იყო მამაცი, დიდსულოვანი, ჰკვიანი და სამართლიანი; ვახუშტის დახასიათებით კი, როგორც ითქვა, იგი იყო „ბოროტი, ხვანჯიანი, ამაყი, მზაკვარი და ძვირის მოხსენე“. ლევანის პიროვნების შეფასებაში ერთნიც და მეორენიც ნაწილობრივ მართალნი არიან. ლევანის დროს საქმეგრელოს სამთავრო გაიზარდა, პოლიტიკურად და ეკონომიურად გაძლიერდა; მთავარი დიდად ზრუნავდა ვაჭრობა-ხელოსნობის, მწერლობისა და საერთოდ ხელოვნების განვითარებაზე, მაგრამ იგი მიიწწრაფოდა ჰეგემონობისაკენ, შეუწინაღობად ებრძოდა იმერეთის სამეფოს და სხვა მეზობლებს, რითაც ხელს უშლიდა ქვეყნის გაერთიანებას გარეშე მტრების წინააღმდეგ ბრძოლაში. თანამედროვე ქართულ ისტორიოგრაფიაში ლევან დადიანის მოღვაწეობა შეფასებულია, როგორც რეაქციონერი ფეოდალის საქმიანობა.²

* * *

თეიმურაზ კახთა მეფე ვერ ურიგდებოდა მაჰმადიან როსტომის ბატონობას ქართლში. ამიტომ საქმე ისევ ხმალმა გადაწყვიტა. 1648 წელს როსტომ მეფესთან ბრძოლაში თეიმურაზი დამარცხდა, მან როსტომს იმერეთში წასასვლელი გზა სთხოვა, რისი ნებართვაც მიიღო. ამიერიდან მეფე გამოეთხოვა კახეთს და, საერთოდ, აღმოსავლეთ საქართველოს. დარჩენილი ცხოვრების უმეტესი წლები თეიმურაზმა იმერეთში — სკანდის ციხეში გაატარა.

¹ ქართლის ცხოვრება, IV, გვ. 829.

² საქართველოს ისტორიის ნარკვევები, ტ. IV, თბ., 1973, გვ. 341.

იმერეთში გადასვლის შემდეგ თეიმურაზმა და იმერთა მეფე ალექსანდრე III-ემ 1649 წელს ელჩები გაგზავნეს რუსეთის სამეფო კარზე. თეიმურაზმა ელჩებად წარგზავნა თავადი ივანე¹ და არქიპანდრიტი პახომი, ხოლო ალექსანდრემ — მღვდელ-მონაზონი ვასილი და დავითი.

უიქედლობაში მყოფი თეიმურაზი რუსთ ხელმწიფეს ევედრება, რომ იშუამდგომლის სპარსეთის შაჰის წინაშე, რათა მან შეწყვიტოს თეიმურაზის დევნა და არ დაანგრეოს საქართველოში ქრისტიანული ეკლესიები. ამავე დროს, თუკი რუსეთის მეფე ჯ.ს.სმ მეომარს გამოგზავნის, ყველა აქაურ (ე. ი. ქართულ) მიწებს დაეპატრონება და ქრისტიანულ ეკლესიებსაც დაიცავს. ამასთან ერთად, თეიმურაზი ითხოვს, რომ რუსთა მეფემ თავისი და მიათხოვოს თეიმურაზის შვილიშვილს — ლუარსაბს, განდევნოს აგარიანნი, დაეუფლოს საქართველოს მიწებს და მიიღოს ხარკი.¹

ასევე, 1649 წელს იმერეთის მეფე ალექსანდრე III რუსთ ხელმწიფეს წერს: „მე ალექსანდრე მეფე და ხელმწიფე იმერეთისა, ჩემი თავადები, ყმები და მთელი ჩემი ქვეყანა, თქვენი უდიდებულესობის ქვეშევრდომად და მორჩილად მიგვიღეთ... ამიერიდან თქვენი ყმები ვართ და მომავალშიც ვიქნებით“.² ამ წერილში იმერთა მეფე ოდიშის მთავარ ლევან II დადიანს უჩივის და მის წინააღმდეგ დახმარებას სთხოვს რუსეთს.

„დადიანი ჩემი მონა-მორჩილი იყო და ხარკსაც მე მიხდიდა. ახლა გადამიდგა და სტამბოლის თურქთა სულთანს მიემხრო. ჯარები შეკრიბა და ორჯერ-სამჯერ თავს დამესხა. აფხაზებსა და ჯიქებს აგროვებს და ყოველ წელს ჩემს წინააღმდეგ ლაშქრობს, და ხან სამას, ხან ოთხას ქრისტიან ბავშვს თურქეთის სულთანთან ტყვეებად ჰგზავნის, ხოლო იმ ხარკს, რომელსაც მე მიხდიდა ახლა თურქეთის სულთანს უხდის. მე იმისათვის გადამიდგა, რომ ქრისტიანი მეფე ვარ, თურქეთს კი მიემხრო, მათი რჩული მიიღო (ლევან დადიანს მაჰმადიანობა არ მოუღია. მ. რ.) და ერთგულება შეჰფიცა. ახლა უნდა ამ ჩვენი ქვეყნის დამორჩილება თურქეთის სულთანისადმი, მართლმადიდებლობის და ქრისტიანული ტაძრების დარბევა სურს“.³ იმერთა მეფე ამცნობს რუსთ ხელმწიფეს, რომ ქართული მიწები თერგთან ახლოა, იმერეთამდე მხოლოდ ერთი კვირის საეალია: „შევიძლია 20.000 მეომარი გამოგზავნო ჩვენში და ჩვენს

¹ ნ. ტოლოჩანოვის იმერეთში ელჩობას მუხლობრივი აღწერილობა, 165ა—165ბ, გამოსცა ი. ცინცაძემ, თბ., 1970, გვ. 35.

² იქვე, გვ. 36.

³ ლევან დადიანი ტაძრებს არა თუ ანგრევდა, არამედ აშენებდა და ამკობდა

ქვეყანას დაეუფლო... და ეს ადგილებიც ნაცვლად იმისა, რომ მაჰმადიანებს ჰქონდეთ, თქვენი უმალესი ძალაუფლების ქვეშ მოექცევა... ღღის ამას იქით თქვენი მოკრძალები ვარ... ჩემი თავადები, მთელი ხალხი, ჩემი მოწა-წყალი და მთელი ჩემი ქვეყანა თქვენი დიდებული მეფობის მონა-მორჩილები გახლავართ... თქვენი ბრწყინვალეების ბრძანებლობის ქვეშ ყოფა გვირჩევენია უწმინდურთა ხელქვეით ყოფნას... მოიღე მოწყალეობა და აქაური ადგილების დასათვალისწინებლად ელჩები გამოგზავნე. დაათვალისწინოს თუ როგორია ის, როგორი შემკულია ჩვენი ეკლესიები და წმინდა მონასტრები, იხილოს ჩვენი წმინდა ნაწილები, ჩვენი საოცარი ხატები, ჩვენი მშვენიერი ციხე-ქალაქები, უძველეს ქრისტიან მართლმადიდებელ მკვთავან ნაშენები. ახლა კი ორივე მეფე ერთად ვართ, მეფე თეიმურაზი და მე, მეფე ალექსანდრე, და ორივენი მუხლმოდრეკით გთხოვთ თქვენ თქვენო ბრწყინვალეობა და შევეთხოვთ უფალს, მოწყალეობა მოიღოთ და თქვენის უმალესი ხელისუფლების ქვეშ მოგვიდოთ და შენი ხელმწიფური წყალობა არ მოგვაკლო, ხოლო თუ წყალობას არ მოიღებ და ჩვენზე უარს იტყვი, ქრისტიანული მართლმადიდებლური სარწმუნოება აღმოიფხვრება, ხოლო წმინდა მონასტრებს და ეკლესიებს ყიზილბაშები დაეპატრონებიან და იქ „მეჩეთებს“ მოაწყობენ, ქრისტიანული მოსახლეობა კი დაიქსაჩსება“.¹

ამ ელჩობის შემდეგ რუსეთის სამეფო კარმა გადაწყვიტა საპასუხო ელჩობა გაეგზავნა იმერეთში (1650—1652 წწ). კახეთი და იმერეთი ცალკე პოლიტიკური ერთეულებია მოსკოვისათვის, მაგრამ რადგანაც თეიმურაზ მეფეც იმერეთში იყო, ამიტომ ერთ ელჩობას დაევალა მათთან მოლაპარაკება.

ელჩებს ევალდებოდნენ თეიმურაზთან მოლაპარაკება და ამ მოლაპარაკების შინაარსის აღწერა, ამავე დროს მათ უნდა წაეყვანათ თეიმურაზის შვილიშვილი რუსეთის სამეფო კარზე, თუმცა ამჟამად მისი წაყვანის საკითხი ვერ მოგვარდა.²

არსებითად იმერეთ-მოსკოვის ურთიერთობა ახლა იწყებოდა, ამიტომ ელჩებს — ალექსი იევლევისა და ნიკიფორე ტოლოჩანოვის რუსეთის სამეფო კარში სპეციალური დავალება მისცა, რომ აღეწერათ იმერეთი, როგორც გეოგრაფიულად, ისე დემოგრაფიულად, მისი ციხე-ქალაქები, ეკლესია-მონასტრები, სავაჭრო გზები, პოლიტიკური ურთიერთობანი და სხვ. სახელდობრ, მათ (ელჩებმა) „უნ-

¹ ნ. ტოლოჩანოვის იმერეთში ელჩობის მუხლობრივი აღწერა... 1650—1652, გამოსცა ი. ცინცაძემ, თბ., 1970, გვ. 37—38.

² ტოლოჩანოვის ელჩობა იმერეთში... გვ. 15.

და დაათვალიერონ იმერეთის ქვეყანა... ხელთ იგღონ ზუსტი ცნობები იმის შესახებ, თუ რას წარმოადგენს იმერეთის ქვეყანა, რაოდენ ვრცელია იგი, რამდენი ვერსის მანძილზეა გადაჭიმული, რამდენ ქალაქს და დასახლებულ ადგილს შეიცავს და საერთოდ რაოდენ დასახლებულია, ხალხი როგორია, უყვართ თუ არა მეფე ალექსანდრე და შემდეგშიაც სასურველია მათთვის ეს მეფე თუ არა. რა მოდის უხვად მათ მიწაზე, როგორი იცის ხორბლის მოსავალი, როგორი ქსოვილები მოიპოვება, რა ნივთი იაფია იქ და რა ძვირობს, რამდენი და რა გვარი (მოსამსახურე პირია) და რა იარაღით იბრძვიან, ყავთ თუ არა ვაჭრები, ადგილობრივად ვაჭრობენ თუ სხვა ქვეყნებშიც დადიან საღმე, რაგვარ საქონელს აწარმოებენ, სადადიანოს მთავარი თავის სამთავროშია ამჟამად თუ არა, მეფე ალექსანდრესთან მეგობრულ განწყობილებაშია თუ არა, თუ არა, ვის ექვემდებარება—თურქს თუ შახს, თუ დამოუკიდებელია და ხარკს არავის არ უხდის. ყოველივე ამის შესახებ ნამდვილი (უტყუარი) ცნობები უნდა შეკრიბოთ და დაწერილებით ჩასწეროთ მუხლობრივ აღწერილობაში.

თუ კი იმერეთში ჩასვლამდე გზაში გაიგოთ, რომ მეფე ალექსანდრე აღარ მეფობს იმერეთში, რომ იგი ყიზილბაშთა შაჰმა განდევნა და მის ადგილზე თავისი რომელიმე ხანი ან თუ გინდ თვით ალექსანდრეს ვაჟი შაჰმა იმერეთის ტახტზე დასვა, ისიც გაიგეთ მაშას რატომ უორჯულა და როცა ყოველივე ამას დანამდვილებით გაიგებთ, მაშინ ნიკიტორე და ალექსი იმ ახალ მეფესთან აღარ უნდა მივიღნენ და გზიდან უკან უნდა დაბრუნდნენ და თერგიდან ყოველივე დაუყოვნებლივ ხელმწიფეს შეატყობინონ“.¹

ასეთი დავალებებით მოდიოდნენ საქართველოში რუსეთის ელჩები, რომელნიც 1651 წელს დიდი ზეიმით იქნენ მიღებული იმერეთის სატახტო ქალაქში.

იმერეთში რუსი ელჩების მოსვლის შემდეგ ალექსანდრე III მედიდურად აცხადებს, რომ იგი რუსთ ხელმწიფის ყმა არის და მისი ხელმწიფური ქომავობის მოიხედეს ახლა აღარავისი ეშინია, არც თურქეთისა და არც სპარსეთისა: „ხელმწიფე უფლებამოსილია ჩემს სახელმწიფოში, თავის სახელს და პრესტიჟს გამოესარჩლება ხელმწიფე და იმერეთის სახელმწიფოსაც დაიცავს იმიტომ, რომ მე ხელმწიფის ყმა ვარ, ჩემი თავი და სახელმწიფო ხელმწიფეს შივართვი (ჩავაბარე) ქეშარიტ მართლმადიდებლურ ქრისტიან-

¹ ტოლოჩანოვის იმერეთში ელჩობის მუხლობრია აღწერილობა, 1650—1652, ი. ციციანის გამოცემა, თბ., 1970, გვ. 49.

ნულ სარწმუნოების მფარველობისათვის და ჩემი მტრებისაგან მის დასაცავად“.¹

ალექსანდრე III საზეიმო ვითარებაში მოსკოვის ელჩებს ფიცს აძლევს, რომ „დიდ მთავარს ალექსი მიხეილის ძეს სრულიად რუსეთისას სამულამოდ ვეყმე, ჩემი შვილით ბაგრატიო, ჩემი ძმით მამუკათი, მთელი ჩემი იმერეთის ქვეყნით“.² ფიცის წიგნზე დასმულ ბეჭედზე (რომელიც იმხანად მოაჭრევიანა) ასეთი წარწერა იყო: „მე იმერეთის მეფე ალექსანდრე, ჩემი შვილით ბაგრატიო და ჩემი ძმით მამუკათი სამულამო ყმა ვარ, ხელმწიფის და მეფის, დიდი მთავრის ალექსი მიხეილის ძის სრულიად რუსეთისა“.

1652 წელს იმერეთის მეფე რუს ელჩებს თავის ელჩებს აყოლებს: მოლარეთუხუცესს ლომკაც ჯაფარიძეს და არტიმონ არქიმანდრიტს, მაგრამ, ისე როგორც წინა ელჩობას, ამჟამადაც იმერეთის სამეფოსათვის მას რეალური შედეგი არ მოუტანია.



დაშლილი საქართველოს გაერთიანებისა და ეკონომიკურად მომძლავრებისათვის საჭირო იყო ხანგრძლივი მშვიდობიანი პერიოდი, მაგრამ გარეშე მტრები ჩვენს ქვეყანას ამის საშუალებას არ აძლევდნენ. ამიტომ ძლიერი ქვეყნის საფარველში შესვლა საქართველოს შესვეურებს დროებით ღონისძიებად მიაჩნდათ და ისე ესმოდათ, რომ მფარველს მათი გაძლიერებისათვის ხელი უნდა შეეწყო; ამ გზით უნდა მიედგინათ საოცნებო მომავლისათვის, როცა არავითარი მფარველი საჭირო აღარ იქნებოდა, როცა საქართველო თვითონვე შეძლებდა საკუთარი თავისუფლებისა და დამოუკიდებლობის დაცვას.³

კავკასიის დაუფლებისათვის მებრძოლი სახელმწიფოებიდან (ირანი, თურქეთი, რუსეთი) საქართველოსათვის მისაღები იყო რუსეთი, როგორც მასთან სოციალ-ეკონომიკური წყობით და სარწმუნოებრივი ერთიანობით დაახლოებული ქვეყანა, ამიტომ საქართველოს პროგრესულ მოღვაწეებს გეზი რუსეთისაკენ ჰქონდათ აღებული, რეაქციულს — ირანისა და ოსმალეთისაკენ.

ამიერიდან ქართული ფეოდალური საზოგადოება ორ ნაწილად იყო გაყოფილი: ერთი ნაწილი რუსეთთან ურთიერთობას უკავშირებდა ქვეყნის გათავისუფლების საქმეს და მის მომავალს, მეო-

¹ ტოლოჩანოვის ელჩობა იმერეთში, გვ. 120.

² იქვე, გვ. 140.

³ საქართველოს ისტორიის ნარკვევები, ტ. IV, 1973, გვ. 16.

რე — ირან-ოსმალეთის დახმარებით — ფეოდალური დაქსაქსულობის შენარჩუნებას.

როგორც ირანში, ისე ოსმალეთში სათანადო ანგარიშს უწყებდნენ რუსეთის გამოჩენას კავკასიაში, ამიტომ შეშფოთებულნი იყვნენ რუსეთთან საქართველოს ურთიერთობით, ვინაიდან კარგად იცოდნენ, თუ რას უქადდა მათ ზრახვებს საქართველოში რუსული ორიენტაციის გაძლიერება.

მაგრამ XVII საუკუნის მანძილზე რუსეთის დიპლომატია კარცხს-მარცხზე განიცდიდა, ეს გამოწვეული იყო როგორც შინა ვითარებით — გლეხთა აჯანყებებით, ისე მეზობელ სახელმწიფოებთან წარუმატებელი ომებით, ამიტომ ამიერკავკასიაში პირველობისათვის ბრძოლაში რუსეთი აქტიურად ვერ იყო ჩაბმული; ირანი აღმოსავლეთ საქართველოში გაბატონდა, ხოლო თურქეთი — დასავლეთ საქართველოში. მიუხედავად ამისა, XVII საუკუნის ქართველი მეფეები მაინც რუსეთიდან მოელოდნენ ხსნას. თეიმურაზ I იმერთა მეფეს ალექსანდრე III-ს უმტკიცებდა რუსეთის უპირატესობას და მის მიმართ ოპტიმისტურად იყო განწყობილი.

რუსეთი წაგებულ პოზიციას არ თმობდა და საქართველოს მაინც თავის ქვეშევრდომად თვლიდა, ხოლო ირანსა და თურქეთისათვის ამის თქმას ვერ ბედავდა. რუსეთის მეფე ქრისტიანულ სახელმწიფოებში გაგზავნილ წერილებში ქართლისა და ივერიის მეფედ და მფარველად იწოდებოდა, მაგრამ ირანსა და თურქეთში გაგზავნილი დოკუმენტების ტიტულატურაში საქართველოს ხსენება არ იყო, რადგან ამას შეიძლება დიდი გართულება გამოეწვია.¹

მიუხედავად XVII საუკუნეში დიპლომატიურ სარბიელზე განცდილი მარცხისა, რუსეთი მაინც დიდად იყო დაინტერესებული იმერეთით, ცდილობდა თავის მფარველობაში ყოლოდა იგი და ეს კავშირი ფიცის წიგნით განემტკიცებინა; რუსეთის ელჩებს მოქონდათ, ყოველი შემთხვევისათვის, იმერეთის მეფის კარისკაცთა მოსასყიდად განკუთვნილი ნივთები. ალექსი იევლევის საანგარიშო აღწერილობაში ნათქვამია, რომ „ალექსანდრე მეფე (რუსთ) ხელმწიფეს ფიცს არ აძლევდა, საქმეს აკიანურებდა, კვირიდან კვირამდე გვირდებოდა და ასე გვიტყევედა. ამის გამო, ჩვენ ელჩებ-

¹ Гр. Котошихин. О России в царствование Алексея Михайловича. СПб., Б. 1906, стр. 39.

მა ვიხმეთ მეფის სულიერი მოძღვარი ზაქარია მიტროპოლიტი, დარბაზის კაცი ფეშანგ მდივანი „ამირევი“, ბიძინა თარჯიმანი და ამათ (საიდუმლოდ) მოველაპარაკეთ, რომ მეფეს ურჩიონ, რათა ამ უკანასკნელმა (რუსთ) ხელმწიფეს თავისი პირობის ქვეშარიტება საქმით დაანახოს, ის საქმე დააბოლოოს, ჯვარზე მთხვევით დაიფიცოს და ელჩებს ნუ გვაყოვნებს ისე გაგვიშვას. ამის გამო მიეცათ: მიტროპოლიტს 20 სიასამური, 4 არშინი საუკეთესო ხარისხის მაუდი და ქაშანური აბრეშუმის ქსოვილის ნაჭერი, სულ მას მიეცა 20 მანეთად, 26 ალტინად და 4 დენგად ღირებული (საქონელი).

ფეშანგ დარბაზის მდივანს — 5 ცალი სიასამური, 4 არშინი იგივე მაუდი, აბრეშუმის ქსოვილი ერთი ნაჭერი, სულ 10 მანეთად, 26 ალტინად და 4 დენგად ღირებული საქონელი; თარჯიმანს — თარჯიმნობისათვის მაუდი, 2 ცალი სიასამური — სულ სამ მანეთად ღირებული საქონელი“.¹

აქედან ნათლად ჩანს, რომ რუსეთის სამეფო კარი დაინტერესებას იჩენდა იმერეთის მიმართ.

1657 წლის მარტის თვეში ლევან დადიანი უეცრად გარდაიცვალა.² ფარსადან გორგიჯანიძის ცნობით: „ლევან დადიანს შვილი მოუკვდა და შამამ შვილის ტირილში ლახტი თავს გარდიკრა და შვილს ზედ დააკვდა დაუმარხავს“.³

ლევან II დადიანს პირდაპირი მემკვიდრე არ დარჩენია,⁴ ამიტომ მისი გარდაცვალებისთანავე ოდიშართ ერთხმად გაამთავრეს ლიპარიტი, ძმა ლევანისა, ნაშობი ათაბაგის ქალისაგან.⁵

საქართველოს ისტორიის ნარკვევების მიხედვით ოდიშართ დადიანად დასვეს ლევანის ძმისშვილი ლიპარიტი იესეს (იოსების) ძემის წინააღმდეგ გამოვიდა ვამიყ ლიპარტიანი⁶ (შვილი გიორგი ლიპარტიანისა, ნაყოლი ლევანის მეორე ცოლის დარეჯან ჭილაძის ასულისაგან).⁷ ამ გარემოებით ისარგებლა იმერთა მეფემ ალექსანდრე III-მ და დიდი ლაშქრით გაემართა ოდიშისაკენ შურის საძიებლად: „ამას ვერ წინ აღუდგა ლიპარიტი დადიანი, შევიდა ალექსანდრე ოდიშს, მოსწყვიტნა, მოსტყვევნა, მოაოხრა; აღილო

¹ ალექსი იევლევის 1650—1652 წწ. იმერეთის სამეფოში ელჩობის საანგარიშო აღწერილობა, გამოსცა ი. ცინცაქემ, თბ., 1969, გვ. 180.

² ქრონიკები, II, გვ. 469.

³ ფარსადან გორგიჯანიძე, დასახ. ნაშრ., გვ. 54.

⁴ შარიბროსე, დასახ. ნაშრ., გვ. 191—192.

⁵ ქართლის ცხოვრება, IV, გვ. 832.

⁶ საქართველოს ისტორიის ნარკვევები, ტ. IV, გვ. 341.

⁷ შარიბროსე, დასახ. ნაშრ., გვ. 198.

ციხენი, გამოიღო საგანძურნი და ქონებანი ლევან დადიანისანი, შეიპყრნა წარჩინებულნი სრულიად ოდიშისანი და დაახსნევიანა ვერცხლით ყოველთა თავნი, გამოუხვნა მათვე ძენი მძევლად და დასვა ოდიშს დადიანად ვამიყ, ძე მამია დადიანისა და თვით დაიპყრა უნაგირას აქეთი აღმოსავლეთის კერძი და უნაგირას იქითი დასავლეთისა მისცა ვამიყს“.¹

სანამ ვამიყ დადიანს მთავრად დასვა მდა, იმერთა მეფე რუსეთში მიმავალ თავის სიმამრს — თეიმურაზ კახთა მეფეს სიხარულით ატყობინებს (რომელიც ამ დროს რაჭაში იმყოფებოდა), რომ მან გაიმარჯვა ოდიშელთა წინააღმდეგ ბრძოლაში და თუკი დაბრუნდება და რუსეთში არ წავა, მას ოდიშის ტახტს სთავაზობს, მაგრამ ამაზე თეიმურაზმა უარი უთხრა.

ვამიყის გამთავრებას, რომელიც იმერთა მეფის ნება-სურვილის აღმსრულებელი იყო, დადიანის ძმისწულები ვერ ურიგდებოდნენ, ამიტომ ბრძოლა მთავრის ხელისუფლებისათვის გარდუვალი იყო. ლიპარიტ იესეს ძემ დახმარება სთხოვა ქართლის მეფეს როსტომს, ახალციხის მფლობელ როსტომ-ფაშას (ორივესაგან მაშველი რაზმები მიიღო) და ჭაიხოსრო გურიელს, მათვე შეუერთდნენ ჭილაძენი და მიქელაძენი. აღნიშნული მოკავშირეები ერთად შეიყარნენ, მხოლოდ მათ აკლდათ ქართლის მაშველი ჯარი, რომელსაც სარდლობდნენ მუხრანბატონი (შემდგომში ქართლის მეფე შაჰ-ნავაზად, ანუ ეახტანგ მეხუთედ წოდებული) და არაგვის ერისთავი ზაალი (ამ ორ სარდალს ერთმანეთში უთანხმოება მოუვიდათ და ბრძოლაში მონაწილეობა არ მიუღიათ).

თავის მხრივ, ალექსანდრე მეფემაც შეჰყარა იმერთ ლაშქარი და მოკავშირეების შესახვედრად გაემართა. ბრძოლა მოხდა 1658 წლის იენისში, სოფელ ბანძაში. ამ ბრძოლაში იმერთა ლაშქარმა გაიმარჯვა: „შეიპყრეს ქართველნი, მესხნი, გურულნი და ოდიშარნი... დასხნევიანა (ალექსანდრე მეფემ) ვერცხლითა თავნი და განუტევა თვისთა ქვეყანათა შინა“.²

დამარცხებული ჭაიხოსრო გურიელი და ლიპარიტ დადიანი ლტოლვილნი წავიდნენ სტამბოლს.³

ამ ბრძოლაში მოკავშირეების დამარცხების ერთ-ერთი მიზეზი ის იყო, რომ მათ შორის თანხმობა არ ჰყოფიდა. ფარსადან გორგიჯანიძე, რომელიც მომსწრე იყო ამ ბრძოლისა, გადმოგვცემს: ქარ-

¹ ქართლის ცხოვრება, IV, გვ. 833.

² იქვე, გვ. 834.

³ იქვე.

თლის ჯარის სარდალმა მუხრანის ბატონმა ბახუტამ ქართლის მეფეს როსტომს ასე მოახსენა: „თუ ერისთავიო (არაგვის ერისთავი ზაალი — მ. რ.) იმერეთს გარდამყოლოდაო, მეფე ჩვენზედ წამოვიდოდაო და დადიანს ძმისწული ლიპარი ოდიშს დაიქერდაო. რამდენჯერ გარდასვლა მოვიდომეო, არც თვითონ წამოვიდაო და არც ლაშქარი გამოუშვაო და რა ჩვენის ლაშქრის დამარცხების ამბავი მოვიდაო, ფიცხლავ აიყარა და ქსნის ერისთავი და კახნი თან წამოასხაო და პალეაბარში მოსრულაო“.¹

სარდლებს შორის უთანხმოებამ რომ ჰქონდა ადგილი, ამას სპარსელი ისტორიკოსი მოჰამედ თაჰერიც აღასტურებს: „როსტომ ხანმა, რადგანაც თვით აღარ შესწევდა ძალა მოძრაობისა და ცხენზე ჯდომისა, ბახუტაბეგი მუხრანის ბატონი დანიშნა სარდლად და ზაალ ყარაყალ-ხანის ერისთავთან და სხვა თავადებთან და აზნაურებთან ერთად იმერეთში (ბაში-აჩუქში) გაგზავნა... ბახუტა ბეგსა და ერისთავს შორის ქიშპობის გამო უთანხმოება გაჩენილიყო, ბაში-აჩუქზე გალაშქრება გადაიდო, ერთმანეთზე გაბრაზებულნი ისინი დაბრუნდნენ უკან“.²

ბანძის ბრძოლის შესახებ ქრონიკებში ასეთი ცნობაა: „ბანძას ალექსანდრე მეფეს შეებნენ დადიანი, გურიელი, ფარად-ფაშა, ქართველნი საციციანო-ბარათიანნი, მეფეს ალექსანდრეს გაემარჯვა. ვამეყ დადიანად დასვა, დემეტრე გურიელად, ლიპარიტ დადიანი და ქაიხოსრო გურიელი სტამბოლს წავიდნენ“.³

ბანძის ბრძოლის შემდეგ ლიპარიტ დადიანი მალე გარდაიცვალა, ხოლო აშლილობამ გურიაში გადაინაცვლა, სადაც მთავრის ტახტისათვის ერთმანეთს ეცილებოდნენ ქაიხოსრო და დემეტრე.

ლტოლვილმა ქაიხოსრო გურიელმა დახმარება სთხოვა თურქეთის ხონთქარს, თავის მხრივ, ხონთქარმა უბრძანა ახალციხის როსტომ-ფაშას, რათა დახმარება აღმოეჩინა ქაიხოსროსათვის და გაეგურიელებინა. ბრძანება შესრულდა — ახალციხის ფაშამ ქაიხოსრო ისევ გააგურიელა, ხოლო დევნილმა დემეტრემ იმერეთის სამეფო კარს შეაფარა თავი. სწორედ ეს ამბავი უნდა იყოს აღნიშნული 1658 წლის ერთ გუჯარში, სადაც ქაიხოსროსათვის ჯარი გაუსევია ვამეყ დადიანს, რათა გურიელობა წაერთმია.⁴

¹ ფარსადან გორგიჯანიძე, დასახ. ნაშრ., გვ. 60.

² ვ. ფუთურძე, მოჰამედ თაჰერის ცნობები საქართველოს შესახებ, მასალები საქართველოსა და კავკასიის ისტორიისათვის, ნაკვ. 30, 1954, გვ. 388—389.

³ ქრონიკები, II, გვ. 470—471.

⁴ იქვე, გვ. 471.

ქაიხოსროს გურიელობა ხანმოკლე აღმოჩნდა, იმერთა მეფემ და დემეტრემ დაქირავებული მკლელის ხელით ქაიხოსროს სი-
ცოცხლე მოუსპეს, დემეტრემ ისევ დაიკავა გურიელის „ტახტი“, ხოლო ქაიხოსროს ძენი გიორგი და მალაქია ახალციხის ფაშას შე-
ეკედლნენ.

* * *

იმერთა მეფე ალექსანდრე III თავისი ძის მემკვიდრეობას არ ცნობდა. მან იშვილა თავისი ცოლის ძმისშვილი ლუარსაბი, რომელსაც ტახტის მემკვიდრედ ზრდიდა, მაგრამ ლუარსაბი გარდაიცვალა და ალექსანდრე უმემკვიდროდ დარჩა, ამიტომ იმერთა მეფემ ალექსანდრე III-მ 1659 წელს რუსეთში ელჩობა გაგზავნა — ნიკოლოზ უფლისწულის საქართველოში გამოშვება და იმერეთის ტახტზე გამეფება ითხოვა. იმერთა მეფე რუსეთის ხელმწიფეს ალექსი ალექსის ძეს წერდა: „...შენთვის ცნობილია, რომ ჩვენი მეფური ჩამომავლობისა არაეინ დარჩა, მარტოდმარტო მე დავრჩი ჩემს ღრმა მოხუცებულობაში; ვისზედაც იმედს ვაპყარებდი და ბურჯად მიმაჩნდა, უფლისწული ლეონტი იყო, ისიც შენ იცი, რომ ღვთის ნებით მიიცივალა. ახლა ღვთის წყალობითა და შენი ბედნიერებით, როგორც უწინ იყო ზოლმე ერთობა, ახლაც ივერიისა და იმერეთის მიწა-წყალი შენი სამეფოს ხელქვეით მოვიყვანე, ყველა მტრისა და ღუშმანისაგან გაეწმინდე... ჩვენი ყველა მტერი დაშინებულია. მე მარტო დავრჩი სიბერის დროს მწუხარე... რომ მოგვკდე, ვერავინ გამეფდებდა, ნაშეიერი მე არ დამრჩენია, რომ ჩემს შემდეგ იმერეთის მიწა-წყალი ურჯულეობებს არ ჩაუყარდეთ ხელში. ჩვენი შთამომავლობა კი შენ იცი, რომ მარტო ერთი დარჩა — უფლისწული ნიკოლოზ დავითის ძე... იგი შენი გაზრდილია და შენი მეფური სამსახურის ადათ-წესები იცის, შენი ყმაა და რადგან შენი გამოშვებული იქნება, მარადეამს ისე გემსახურება, როგორც ეს შენ, დიდ ხელმწიფეს, გენებება და შენი მეფური უდიდებულესობის ბრძანებით ივერიისა და იმერეთის მიწა-წყალს განამტკიცებს“.¹

¹ გ. პაიჭაძე, რამდენიმე საბუთი რუსეთ-საქართველოს ურთიერთობის ისტორიისათვის XVII საუკუნის მეორე ნახევარში, „საისტორიო მოამბე“, ტ. 27—28, თბ., 1973, გვ. 534—535. თარგმანი ეკუთვნის თ. ტივაძეს, იხ. თ. ტივაძე, იმერეთის სამეფოს რუსეთთან ურთიერთობის ისტორიიდან (XVII ს-ის 60-იანი წწ.) წიგნში „ივანე ჯავახიშვილის დაბადების 100 წლის-თავისადმი მიძღვნილი საიუბილეო კრებული“, თბ., 1976, გვ. 358.

იმერთა ელჩობა რუსეთიდან მომავალ თეიმურაზ მეფეს გზაში შეხვდა და შვილიშვილის ლუარსაბ დავითის ძის გარდაცვალება აუწყა. იმერთა ელჩობას კახთა მეფემ თავისი ელჩიც აახლა და რუსთა ხელმწიფეს თავისი შვილიშვილის საქართველოში გამოშვება სთხოვა. მაგრამ ამ დროისათვის რუსეთის პოლიტიკურ მესვეურთ არ სურდათ ერეკლე ბატონიშვილის საქართველოში გაშვება, რადგან, ქართველი პოლიტიკოსების მსგავსად, მოხერხებულად იყენებდნენ ქართველი უფლისწულის ყოფნას რუსეთის სამეფო კარზე თურქეთ-ირანთან აშკარა თუ ფარული ბრძოლის საწარმოებლად.¹ სანამ რუსეთიდან პასუხს მიიღებდა ერეკლე ბატონიშვილის გამოშვების შესახებ, იმერთა მეფე იძულებული გახდა ისევ თავისი შვილი ბაგრათი გამოეთხოვა გურიიდან და ტახტის მემკვიდრედ ეცნო.

ალექსანდრე მეფემ გურია-ოდიშის დამორჩილებით და იქ სასურველ პირთა დასმით კვლავ აღადგინა ის პრესტიჟი, რაც სამი ათეული წლის განმავლობაში ჰქონდა დაკარგული იმერეთის სამეფოს, მაგრამ, იმერეთის ეს ჰეგემონობა დასავლეთ საქართველოში ცოტა ხანს გაგრძელდა.

ალექსანდრე III ფარდაიცვალა 1660 წლის პირველ მარტს. თავის მემკვიდრეს ბაგრატს სამეფო დაუძღურებული დაუტოვა; არევ-დარევა, შფოთი და აშლილობა, რომელიც დამახასიათებელი იყო ამ პერიოდის დასავლეთი საქართველოსათვის, კვლავ გრძელდებოდა.

მარი ბროსეს აღნიშნით, 66 წლის განმავლობაში² აქ მოხდა დაახლოებით 29 პოლიტიკური აშლილობა და არევ-დარევა, რის შედეგადაც დასავლეთი საქართველო მთლად დაძაბუნდა და გალატაკდა.

იმერეთის სამეფოს პოლიტიკური მდგომარეობა XVII საუკუნის მთელი ნახევარში

5. ბერძენიშვილი შემდეგნაირად ახასიათებს XVII საუკუნის 60-იანი წლების შემდგომ წინას: „60-იანი წლებიდან მთელი დასავლეთ საქართველო საშინელმა ანარქიამ მოიცვა (ის დაახლოებით ას წელიწადს გრძელდებოდა). მეფის თუ მთავრის ხელისუფლება კიდევ უფრო დაეცა, ქვეყანა თავადების სათარეშოდ იქცა. დალი-

¹ თ. ტ ი ვ ა ძ ე, დასახ. ნაშრ., გვ. 359.

² მ ა რ ი ბ რ ო ს ე, დასახ. ნაშრ., გვ. 199.

ანი, გურიელი, ქართლის ბატონიშვილი, აბაშიძე თუ იმერეთის ბატონიშვილი თავადების სურვილით წარამარა ცვლიდნენ ერთიმეორეს სამეფო ტახტზე (40 წელიწადში ოცჯერ შეიცვალა მეფე. ამათგან მხოლოდ ერთი შერჩა მეფობას ბუნებით სიკვდილამდის)... თავადებმა მიიტაცეს და დაისაკუთრეს სამეფო ყმა-მამული. ერისთავ-მოურავებმა ხელშეწყობა დაიჩემეს. მთავრები აუქმებდნენ საეპისკოპოსოებს, საწინამძღვროებს და იტაცებდნენ საეკლესიო მამულებს, საერო ფეოდალებმა დაიტაცეს საკათალიკოსო სოფლები“.¹

ამ ფეოდალურმა ანარქიამ მთლად დასცა და დააუძლურა ქვეყანა, ვისაც კი საშუალება ჰქონდა, გარბოდა და აღმოსავლეთ საქართველოში სახლდებოდა, სადაც ამ დროს შედარებით სიმშვიდე სუფევდა.

„XVII საუკუნის მეორე ნახევრიდან დასავლეთ საქართველოს პოლიტიკური მეთვალყურეობა და იქაური საქმეების ოსმალთა ინტერესების თანახმად მოგვარება ხონთქარმა ახალციხის ფაშას დაავალა. ჩქარა ახალციხის ფაშა მთელი ლიხთიქეთის პოლიტიკური ცხოვრების მომწესრიგებელი შეიქნა. ფაშა აქ ხონთქარს სახელით მოქმედებდა. ამიერიდან მეფის, მთავრის თუ კათალიკოსის საქმე მას ეკითხებოდა. მისი უშუალო მონაწილეობით და ნებართვით ხდებოდა მათი დასმა-გადაყენება. ფაშა განზრახ აღვიევბდა ბოლო-მოუღებელ შფოთს დასავლეთ საქართველოში. ქვეყნის დასუსტება ოსმალეთის მიზანი იყო“².

ოსმალეთი სულ უფრო და უფრო ეუფლებოდა დასავლეთი საქართველოს სამეფო-სამთავროებს. XVII საუკუნის დასაწყისიდანვე გურიელმა, დადიანმა და უფრო მოგვიანებით იმერეთის მეფემ ყოველწლიურად ჭარკის ძლევა იკისრეს თურქეთისათვის, ხოლო „XVII საუკუნის 70-იან წლებში იმერელმა თავადებმა ოსმალთა ჯარი ქუთაისის ციხეში შეიყვანეს. ამით გარეშე მტერმა ქვეყნის შუაგულში ფეხი მკვიდრად მოიკიდა“.³ ნ. ბერძენიშვილის დარსჯენით, „თუ ამას შედეგად ოსმალთა ხელისუფლების დამყარება და ქვეყნის გამაჰმადიანება არ მოჰყვა, როგორც ეს სამცხე-საათაბაგოში მოხდა, ამის მიზეზი აგრესორის დასუსტება უფრო აუცილებლად დასავლეთი საქართველოს გადაშენების ფაზაზე მდგომი ფეოდალური საზოგადოების თავდაცვის უნარიანობა“.⁴

¹ ნ. ბერძენიშვილი, საქართველოს ისტორიის საკითხები, წიგნი VI, თბ., 1973, გვ. 274.

² იქვე, გვ. 275.

· · · · ·
· · · · ·

· · · · ·
· · · · ·

ფარსადამ გორგიჯანიძის აზრით, ირანისა და ოსმალეთის წარმომადგენლებს საქართველოში ბელს უწყობდა ის, რომ „საქართველო თავად ცოტა იყო და მერმე მრავლად გაყოფილი და ერთმანეთის ურჩხი და ქიშპნი მტერნი, ერთმანეთისა მარბევნი და მაწყინარნი“.¹

მეფე-მთავართა შინაომებით მარჯვედ სარგებლობდა გარეშე მტერი: „ამისათვის იქით ურუმნი არბევდეს და აქეთ ყიზილბაშნი და ამისთანას ორს დიდს ხელმწიფეს შვაში ბევრს ეცადნეს, აქეთ იქნიეს ხმალი და იქით და მრავალი ნაენებიც ქნეს, მაგრამ არ იქნა და ვერც რას თავს გაუვიდნეს. ხონთქარმან და ყაენმან საქართველო შვა გაიყვეს“.²

როგორც ზემოთ ითქვა, ალექსანდრე III 1660 წელს გარდაიცვალა, ნესტან-დარეჯანთან მას შვილი არ ჰყავდა. მან თეიმურაზ I-ის შვილიშვილი — ლუარსაბ დავითის ძე იშვილა და ტახტის მემკვიდრედ ზრდიდა: მაგრამ იგი გარდაიცვალა. ამის შემდეგ ალექსანდრემ გადწყვიტა ისევ თავისი შვილი, პირველ ცოლთან ნაშობი ბაგრატი გაემეფებინა, რომელიც თავის დედულეთში — გურიელთან იმყოფებოდა.

დარეჯანმა თავის გერს ბაგრატს, რომელიც იმერეთის მეფედ ეკურთხა, ცოლად შერთო თავისი ძმისწული — დავითის ასული ქეთევანი,³ მაგრამ „თვითონ მეფეც იყო და დედოფალიცა, ბაგრატს არაფერი ეკითხებოდა“⁴. მართლაც, ამ დროს დედოფალს პირველი ადგილი ეკავა სამეფო კარზე. მაგალითად, 1660 წელს ქაიხოსრო და პაატა წერეთლებს ებოძათ წყალობის წიგნი, რომელიც გაცემულია ნესტან-დარეჯან დედოფლისა და ბაგრატ მეფისაგან.⁵ ამავე პერიოდისაა ბაგრატ მეფის შიერ გაცემული გელათის მონასტრისადმი შეწირულების წიგნი, რომელშიც მოხსენებულნი არიან დედოფალთდედოფალი კახთა მეფის ასული ნესტან-დარეჯანი, შემდეგ მეფე ბაგრატ და მისი თანამეცხედრე ქეთევანი.⁶ დ. გვრიტიშვილი ასკვნის: „ის გარემოება, რომ დოკუმენტებში ჯერ ნესტან-დარეჯანი მოიხსენიება, ხოლო შემდეგ ბაგრატი, ერთხელ კიდევ ადასტურებს ფარსადან გორგიჯანიძის ცნობას იმის შესახებ, რომ

¹ ფარსადან გორგიჯანიძის ისტორია, გვ. 7.

² იქვე.

³ ქართლის ცხოვრება, IV, გვ. 835.

⁴ ფ. გორგიჯანიძის ისტორია, გვ. 62.

⁵ ისტორიული დოკუმენტები იმერეთის სამეფოსა და გურია-აღიშის სამთავროებისა (1466—1770 წწ.), შ. ბურჯანაძის რედაქციით, 1959, გვ. 30—31.

⁶ დასახ. ნაშრ., გვ. 31.

ნესტან-დარეჯანი სამეფოში პირველი პირი იყო¹. მიუხედავად ამისა, მათი მშვიდობიანი ურთიერთობა დიდხანს არ გაგრძელებულა². ბაგრატიის მეფობა შეიშურვა მისმა დედინაცვალმა დედოფალმა დარეჯანმა თეიმურაზ კახთ-ბატონის ასულმა; ჯერ წინადადება მისცა თავის გერს ცოლად გაყოლის შესახებ და როცა ამაზე აღშფოთებული ბაგრატიისაგან უარი მიიღო, შეიპყრო იგი და თვალებში დათხარა. დარეჯანმა ქმრად შეირთო ვახტანგ ბაგრატიონი, რომელსაც ქუჭუნისას შვილს ეძახდნენ და ის იმერეთის მეფედ აკურთხებინა.³

ქრონიკებში დაცულია ცნობა, რომ „1660 წლის ოთხ მარტს მეფე ალექსანდრე მიიცვალა, ამავე წელსა და ამავე თვეს, მის წილ ძე მისი ბაგრატ მეფე იქმნა. და მასვე წელსა, თვესა ივლისსა უღალატა დედინაცვალმან და ზოგმა მისმან ორგულმა ყმაჲა, დაიჭირეს და თვალი დაწუეს და... იმერეთი ოხერ და უმკვიდრო იქნა: ზოგჯერ დადიანს ეჭირა, ზოგჯერ ყიზილბაშთაგან, ზოგჯერ ურუმთაგან და ერთს წელს გურიელიც მეფობდა“.³

ფარსადან გორგიჯანიძე, რომელიც ამ ამბის მომსწრე იყო, გადმოგვცემს: „შეუქდნენ დედოფალს ეშმაკსავით მაცდურები და ასრე გამოურჩივეს; ბაგრატ მოკალ და ქუჭუნენის შვილი ვახტანგ ბაგრატიონი შეირთეო და მეფეთ აკურთხეო და სადამდისინ ცოცხალი იყო, შენ იბატონეო და მანამდისინ რუსეთით ძმისწულიც მოიყვანეო და ის ვაბატონეო“.⁴ დარეჯანმა დაუჭერა მრჩეველებს და თუმცა ბაგრატი სასიკვდილოდ არ გაიმეტა, მაგრამ თვალები მაინც დათხარა და ტახტი წაართვა. დარეჯანის მამა თეიმურაზი ამ დროს სკანდის ციხეში იმყოფებოდა. დარეჯანმა მას წინადადება მისცა იმერეთის სამეფო ტახტი დაეკავებინა, მაგრამ თეიმურაზმა უარი შემოუთვალა, „უჯავრა, რისთვის ჩემს სიძეს თვალები დასთხარაო. სკანდით ქუთათისს არ ჩამოვიდა“.⁵

დარეჯანმა მიიღო რა უარი მამისაგან ტახტის დაკავების შესახებ, ვახტანგ ქუჭუნისას შვილი ქმრად შეირთო და მეფედ აკურთხა. ამ ფაქტს დიდი უკმაყოფილება გამოუწვევია იმერეთის თავადებში: პოემა „შაჰნავაზიანის“ ავტორი ფეშანგი გადმოგვცემს, რომ:

¹ დ. გვრიტიშვილი, ნარკვევები საქართველოს ისტორიიდან, ტ. II, თბ., 1965, გვ. 436.

² საქართველოს ისტორია, ახალი საუკუნეების ეპოქა, თბ., 1920, გვ. 61.

³ თ. ეორდანი, ქრონიკები, II, გვ. 477.

⁴ ფ. გორგიჯანიძის ისტორია, გვ. 62—63.

⁵ იქვე, გვ. 63, იხ. აგრეთვე, პარიზის ქრონიკა ზ. კიკინაძის რედაქციით, 1903, გვ. 65—66.

„შეიყარნეს და არჩივეს ვახტანგის დიდი შტერობა, აგრე გავს რომე დაპკარგონ დედოფლის ბედნიერობა; ცტყობის აღარ ინდომეს სამსახური და ფერობა; აწ დაინანოს რფგუნენმა ამა საქმესა ქმნელობა. თქუს: „დადიანი ვინდომოთ მას მივცეთ ტახტი სრულია ხედეთ უმკვიდრო შეიქმნა, მეფობა გარდასულია; ერთმანეთს ზურგი მოვაბათ ვირემი აღსასრულია; ქალი დავკარგოთ, მივიღეს ვისია ეგ ასულია“.

შაჰნავაზიანის ავტორის გადმოცემით, მთელი იმერეთის თავადები მხოლოდ დადიანის გამეფების მომხრენი არიან. მაგრამ ამის საწინააღმდეგო უტყუარი ცნობებიც მოიპოვება, სადაც აღნიშნულია: „რომელიც დედოფალის კერძნი არ იყვნენ, ქართლისაჲც თავადნი ქართლის მეფეს საყმოდ შემოეპატიუნენ, იმერეთს გარდიყვანეს. ჩაღმა მხრის თავადნი დადიანს საყმოდ შეეპატიუნეს და ქუთათისს მოიყვანეს“.²

ფ. გორგიჯანიძის ცნობით ირკვევა, რომ დარეჯან დედოფლის მოქმედებით უკმაყოფილო იმერეთის თავადები ორ ჯგუფად გაიყვნენ: ქვემო იმერეთის თავადები დადიანს უჭერდნენ მხარს, ხოლო ზემო იმერეთის თავადები ქართლის მეფეს — ვახტანგ V-ს ეპატიუებოდნენ იმერეთში. მიწვევის მიღებისთანავე ორნივე სასწრაფოდ იმერეთისაჲც გაეშურნენ, ვამიყ დადიანმა დაასწრო და ქუთათისი დაიკავა, შეიპყრო დარეჯანი ქმრითურთ და ამ უკანასკნელს თავლები დათხარა და თავი იმერეთის მეფედ გამოაცხადა. „დადიანმა ამასთანავე იმერეთის მეფეების მთელი სიმდიდრე, რამოდენიმე თაობათა განმავლობაში დაგროვილი, ოდიშს გაგზავნა. მარტო ოქრო-ვერცხლეულობა წაღებულ იქმნა 12 ურმით“.³

ბიჭვინთის ერთ-ერთ სიგელში ვამიყ დადიანი თავისთავს ლიხთ-იმერისა და ლიხთ-ამერის, ოსეთისა და დვალეთის, სვანეთისა და ყაბარდოს, ჯიქეთისა და აფხაზეთის, ოდიშისა და გურიის, სრულიად საქართველოს მპყრობელ, დიდ მეფეთ-მეფედ და ხელმწიფედ აცხადებს.⁴

დარეჯან დედოფალი იმავე 1660 წელს, დადიანის მიერ ქუთათისის დაკავების შემდეგ, ქართლის მეფეს ვახტანგ V-ს თხოვნით მი-

შაჰნავაზიანი, გ. ლეონიძისა და ს. იორდანაშვილის რედაქციით, გვ. 70.

² ფ. გორგიჯანიძის ისტორია, გვ. 63.

³ ქრონიკები, II, გვ. 479, ს. კაცაბაძე, საქართველოს ისტორია, ახალი საუკუნეების ეპოქა. თბ., 1920, გვ. 61.

⁴ ს. კაცაბაძე, დასავლეთ საქართველოს საეკლესიო საბუთები, წიგნი I, 1921, გვ. 67.

მართავს „თუ მამეშველებიო, ჩემს ქეთევანსაო თქვენს არჩილს მივეცემო... იმერეთს შეფედ ვაკურთხებო“.¹

ვახტანგ მეფე იმერეთში გადადის, ვამიყ დადიანს ამ დროს იმერეთი დაპყრობილი აქვს და მეფედაც იწოდება; „მეფე და დადიანი ასრე შერიგდეს, რომ არგვეთს აქეთი ქართველს მეფესა და იმას იქით დადიანსა და მას უკან დადიანმა თავისი ქალი მეფის შვილს არჩილს მისცეს და იმერეთში გააბატონონ“.²

ამრიგად, ვახტანგ მეფე და დადიანი შეთანხმდნენ და იმერეთში შუაზე გაიყვეს, აღმოსავლეთი ნაწილი ქართლის სამეფოს შეუერთდა, დასავლეთი ნაწილი — სამეგრელოს, საზღვრად მდ. ბუჯისწყალი დადევს (1660 წ.). ამ ამბავმა გარკვეული ასახვა ჰპოვა „არჩილიანშიც“:

„წამოდგა მეფე ქართლისა და ვამიყ დადიანიცა, იმერეთზედა. ილაშქრეს, მთიდაჲ ალაღდა სვანიცა, დამოყერდნენ, შუა გაიყვეს მთა-ბარი შუაგანიცა“.³

ქართულ წყაროებს გარდა, იმერეთში ამტყდარი არეულობის შესახებ ცნობებს გვაწვდის სპარსელი ისტორიკოსი მოჰამედ თაჰერი. იგი წერს: „ბაგრატის გამეფებიდან ცოტა ხნის შემდეგ თემურაზ ხანის ქალმა, რომელიც ცოლად ჰყავდა ალექსანდრე ხანს და დიდი ნებისყოფის მქონე იყო, გამეფება განიზრახა. ის შეეთქვა ერთ ჯგუფს, რომ ხსენებული (თავისი გერი) მოესპო და გიორგი, რომელიც სამეფოს ერთ მემკვიდრეთაგანი იყო, მის ადგილას დაენიშნა. რაღაც საბაბით ის თავის ბინაზე მოიყვანა და „მისი ქვეყნის მხედველი თვალის გუგები მხედველობის ღირსების მოკლებული გახადა“ (დააბრმავა), გიორგი მის ადგილას დასვა და დაქორწინდა მასზე. ბაში-აჩუკის ხალხს ის ამ ამბის გამო სრულიად შესძაგდა, იქაური თავადებიდან და აზნაურებიდან ზოგი დადიანის (ქვეყნის) ვალისთან წავიდა, ზოგმაც „მეფობის საფარველს“ მიმართა დახმარებისათვის. ბაში-აჩუკის ორივე მიმდგომი მხარის ვალიები განწყობილი ჯარებით გაემართნენ ორ მხრიდან ბაში-აჩუკისაკენ და ბრძოლა დაჰიდლილი იწყეს. ბოლოს რათა მოსპობილიყო შფოთისა და ნგრევის ბოროტება, ბაში-აჩუკის „ოლქის“ მხარეები ერთმანეთს შორის გაიყვნეს. „დადიანის“ ვალი, ხელში ჩაიგდო

¹ ფ. გორგიჯანიძის ისტორია, გვ. 63; იხ. აგრეთვე, პარიზის ქრონიკა, ზ. ჰიქინაძის რედაქციით, 1903, გვ. 65—66.

² ფ. გორგიჯანიძის ისტორია, გვ. 63.

³ არჩილიანი, II, გვ. 125.

რა თეიმურაზის ქალი, უკან ბრუნდება, შაჰ-ნავაზ-ხანსაც თეიმურაზ-ხანი ციხიდან გამოჰყავს და ქართლში მიდის“¹.

ვახტანგ მეფემ ქართლში წასვლის წინ აღმოსავლეთი იმერეთის სარდლად წერეთელი დანიშნა და ასეთი ბრძანება გამოსცა: „ჩ. მეფეთამეფე შაჰნავაზ უზემთაესთა მოგახსენებთ და უქვედაესთა გიბრძანებთ, ერთობილნო ბუჯის წყალს ზედათნო ხრეთიანთ ლიხის მთამდი. მერმე, თქუენი სარდლობა² ზაალ წერეთლისათვის გუბოძებია და რომელიცა ჩუენი სამსახური: ან ლაშქრობა, ან ნადრობა და ან სხუა რამე დაგვატიუოს, ყუელაზედ მოუღდეგით და ნურას საქმეზედ ნუ დაეურჩებით, თუ არამ ვინც დაეურჩებით და ან ამის სამართალს არ გაიგონებთ, იცოდეთ გაგიწყრებით და რაც ავია, იმას გიზამთ“³.

ვახუშტი ბატონიშვილი გამსხვავებულ ცნობას გვაწვდის: „ბაგრატის კერძოთა იმერთა არა სთნდათ და აუწყეს ასლან ფაშასა, შემოიკრიბნა ასლან-ფაშამან სპანი და ჩამოვიდა იმერეთს, მიეგებნენ დადიან-გურიელი და იმერნი, მოვიდა ფაშა, შეიპყრა ვახტანგ და დარეჯან დედოფალი და ქეთევან ცოლი ბაგრატ მეფისა. ხოლო იმერეთს დასუა ბაგრატვე უთუალო მეფედ და იგინი წარიყვანნა და მივიდა ახალციხეს, მუნიდამ ვახტანგ, დარეჯან და ქეთევან წარგზავნნა ოლთისს⁴ და დაასადგურა მუნ“⁵ შესაძლებელია ვახუშტი

¹ ვ. ფ უ თ უ რ ი ძ ე, მოჰამედ თაქერის ცნობები საქართველოს შესახებ, მასალები საქართველოსა და კავკასიის ისტორიისათვის, ნაკ. 30, 1954, გვ. 395.

² იმერეთის სამეფოში სარდლოს თანამდებობა პირველად 1661 წლის საბუთებში იხსენიება (იხ. ისტორიული დოკუმენტები იმერეთის სამეფოსა და გურია-ოდისის სამთავროებისა, I, თბ., 1959, საბ. № 22, გვ. 33).

თუ როდის იქნა დაარსებული სარდლის თანამდებობა, ჭერჭერობით წყაროები ამის დადგენის საშუალებას არ გვაძლევენ. ს. კ ა კ ა ბ ა ძ ე მ ვახუშტის ერთ წყაროზე დაყრდნობით გამოთქვა ვარაუდი, რომ სარდლის თანამდებობის შემოღება ალექსანდრე III-ის დროს (1639-1660) უნდა მომხდარიყო (იხ. ს. კ ა კ ა ბ ა ძ ე, იმერეთის ციხისთავთა შესახებ მე-17 საუკუნეში, საისტორიო ნოაბე, I, 1925, გვ. 87—88). ეს ვარაუდი ო. ს ო ს ე ლ ი ა ს სწორად მიაჩნია, მხოლოდ იგი უფრო აკონკრეტებს და აღნიშნავს, რომ იმერეთში სარდლოს დაწესება 1651-1661 წწ. შუა მომხდარა (იხ. ო. ს ო ს ე ლ ი ა, ნარკვევები ფეოდალური ხანის დასავლეთ საქართველოს სოციალურ-პოლიტიკური ისტორიიდან, თბ., 1973, გვ. 223).

³ ისტორიული დოკუმენტები იმერეთის სამეფოსა და გურია-ოდისის სამთავროებისა, შ. ბ უ რ ჯ ა ნ ა ძ ი ს რედაქციით, თბ., 1959, გვ. 33.

⁴ ოლთისი ათაბაგთა მეორე რეზიდენცია იყო. ვ ა ხ უ შ ტ ი ბ ა ტ ო ნ ი შ ვ ი ლ ი წერს: „ქოროხის აღმოსავლეთის კიდზე არს ოლთისი, ქალაქი კარგი და კეთილჰავეიანი. აქ არს ციხე შავარი და დიდშენი. არს მეორე საქლოში ათაბაგისა, ვითარცა ახალციხე“, ქართლის ცხოვრება, ტ. IV, თბ., 1973, გვ. 683.

⁵ ქართლის ცხოვრება, IV, გვ. 835.

შართალი იყოს, ვინაიდან ცნობილია, რომ ახალციხის ფაშას ჰქონდა მინდობილი დასავლეთ საქართველოს მეთვალყურეობა. ამდენად იმერეთში მომხდარი ამბების გაგებისთანავე ახალციხის ფაშას შეეძლო ჩარეულიყო იმერეთის საქმეებში.

ვახტანგ მეფისა და ვამიყ დადიანის დამოწყობა დიდხანს არ გაგრძელებულა. დადიანმა დაარღვია პირობა და თავისი ქალი (პოლიტიკური მოსაზრებით) იმერეთის თავაღს ბეჟან ლოლოზჯიჩიძეს მისცა.¹

ქართული წყაროებისაგან განსხვავებით, რუსული წყაროები სხვა ცნობებს გვაწვდის იმერეთში მომხდარი ამბების შესახებ.

თეიმურაზ კახთბატონის უფროსი შვილიშვილის — ლუარსაბის გარდაცვალების შემდეგ (რომელიც იმერთა მეფემ იშვილა და ტახტს მემკვიდრედ ზრდიდა) თეიმურაზმა და ალექსანდრე III-მ სპეციალური ელჩობა გაგზავნეს მოსკოვში თხოვნით ერეკლე ბატონიშვილის გამოშვების შესახებ.² რუსეთის სამეფო კარი დათანხმდა და 1660 წლის 3 ივნისს 92 კაციანი ამალით ერეკლე ბატონიშვილი საქართველოში გამოისტუმრეს. ერეკლე ბატონიშვილი თერგის ციხეში შეჩერდა და აქ ელოდებოდა საქართველოდან ამბის მიღებას.

1660 წლის 11 ოქტომბერს თერგის ციხეში იმერეთიდან მივიდნენ თეიმურაზ მეფის ელჩები და თერგის ვოევოდას მოახსენეს, რომ იმერეთის მეფე ალექსანდრე გარდაიცვალა, ხოლო მისმა ცოლმა, დედოფალმა დარეჯანმა თავის გერს, ბაგრატს თვალები ამოწვა. ამის შემდეგ იმერეთის დიდმა თავადმა ერისთავმა თავისი მომხრეებით შეიპყრო თავადი ლუკიანე, რომელიც ამის წინ მოსკოვში იყო ელჩად, ბრძანა მისთვის თვალები ამოეწვათ და გაგზავნა იგი დადიანის ქვეყანაში, ხოლო მისი ყველა შვილი ამოახოცინა. ეს ერისთავი თურქეთში იყო, იქედან იმერეთში მოიყვანა თურქთა ჯარი და ამჟამად ფლობს იგი იმერეთის ქვეყანას და ცხოვრობს ქუთაისში. ალექსანდრეს შეუღლე დარეჯანი, თეიმურაზ მეფის ასული, მან, ერისთავმა დადიანის ქვეყანაში გადაასახლა, ხოლო მეფე თეიმურაზი კი თბილისში წაიყვანეს. თბილისში ზის ყიზილბაშთა შაჰის ხანი შაჰნავაზი, ხოლო დადიანის ქვეყანას ფლობს მეფე ალექსანდრეს მიერ დასმული ლიპარტიანი.³

¹ ქართლის ცხოვრება, IV, გვ. 835.

² გ. პაიჭაძე, მასალები რუსეთ-საქართველოს ურთიერთობის ისტორიისათვის (1660—1685 წწ.), საისტორიო მოამბე, № 23—24, თბ., 1970, გვ. 151.

³ გ. პაიჭაძე, მასალები რუსეთ-საქართველოს ურთიერთობის ისტორიისათვის (1652—1660 წწ.), საისტორიო მოამბე, № 19—20, თბ., 1965, გვ. 459.

იმავე წლის 29 ნოემბერს თერგიდან ასტრახანს ჩასული ამ ელჩობის ერთ-ერთი წევრი ივანე ფეოდოროვი რუს მოხელეებს მოახსენებდა იმერეთში დატრიალებულ ამბებს: 1660 წელს გარდაიცვალა იმერეთის მეფე ალექსანდრე, რომელმაც მხოლოდ სამ დღეს იავადმყოფა. მეფე თეიმურაზმა და იმერლებმა სამეფო ტახტზე დასვეს მისი შვილი ბაგრატი და ცოლად შერთეს ერეკლე ბატონიშვილის დეიძლი და კატერინა (ქეთევანი), მაგრამ მან მხოლოდ სამი თვე დაჰყო სამეფო ტახტზე. იმერეთის ქვეყნის კათალიკოსმა ალექსანდრე მეფის ცოლს, დარეჯანს ჩააგონა, რომ მან თავის გერს, ბატონიშვილ ბაგრატს, თვალები ამოწვას, თვითონ შეირთოს ვახტანგი, და კვლავ შეიქმნას იმერეთის ქვეყნის მფლობელი. დარეჯან დედოფალმა, შარტლაც ამ შეგონებით ბაგრატ ბატონიშვილს თვალები ამოწვა, თვითონ კი ცოლად ფაჰყვა ვახტანგს. ამ ამბიდან სამი კვირის შემდეგ იმერეთის ქვეყნის დიდი თავადი ერისთავი წავიდა თურქთა ქვეყანაში და თან ჩამოიყვანა 12,000-იანი ჯარი. მან დედოფალი დარეჯანი, მის ქმართან, ვახტანგთან ერთად გადასახლა შავი ზღვის პირას მდებარე ციხე-ქალაქ „აბლაზიტში“ (თუ აფხაზეთში? — მ. რ.), თან ბრძანა, რომ ისინი იქ შონასტერში გამოეკეტათ. ამჟამად იმერეთის ქვეყანას ფლობენ ეს ერისთავი და დადიანთა ქვეყნის მფლობელი ლიპარტიანი. (ეს ერისთავი) ცხოვრობს ქუთაისში, ხოლო თურქი ჯარისკაცები დგანან იმერეთშივე. თურქთა სულთანის ვაზირი ჯარით ბაღდადის ციხეში დგას ერისთავის დასახმარებლად იმიტომ, რომ ეს ერისთავი და დადიანთა ქვეყნის მფლობელი ლიპარტიანი თურქთა სულთანს ყმად მიუვიდნენ. ბატონიშვილი ბაგრატი და მისი ცოლი ამ ერისთავს ქუთაისის ციხეში ჰყავს თავისთან, ხოლო მეფე თეიმურაზი შაჰ-ნავაზ ხანმა შაჰის ბრძანებით თბილისში წაიყვანა. თეიმურაზ მეფეს კი მათთან ბრძოლა აღარ შეეძლო, რადგან იგი ყველამ მიატოვა და მან თეიმურაზმა ნახა რა თავისი გამოუვალი მდგომარეობა, სასწრაფოდ გაგზავნა რუსეთის ხელმწიფესთან და ქართველ ბატონიშვილთან, ერეკლე დავითის ძესთან, ეს ელჩები ამ ამბის შესატყობინებლად და გადასაცემად, რომ იგი ერეკლე ბატონიშვილი საქართველოში აღარ წამოვიდეს და გზიდანვე დაბრუნდეს მის მეფურ უდიდებულესობასთან.¹

1661 წლის 11 თებერვალს ქართველი ელჩი ათანასე-პაპუნა, რომელიც თეიმურაზს გამოეგზავნა თბილისიდან რუსეთის მეფისათვის სიგელის და ერეკლესათვის წერილის გადასაცემად, რუსებს აწვდის დამატებით ცნობებს იმერეთის შესახებ. რომ ალექ-

¹ გ. პ ა ი ქ ა ძ ე, მასალები... საისტორიო მოამბე, № 23—24, გვ. 153.

სანდრე მეფე გარდაიცვალა იმის გამო, რომ ორაგული უქამია, მისგან ცუდად გამხდარა და მეხუთე დღეს გარდაცვლილა. მან თავისი შვილი ბაგრათი სიკვდილის წინ ტახტზე დასვა. ბაგრატ ბატონი-შვილი მაშინ გურიელის ქვეყანაში იმყოფებოდა, რადგან ალექსანდრეს იგი არ უყვარდა მისი კჳუასუსტობის გამო. ალექსანდრეს გარდაცვალებიდან მესამე დღეს ბაგრატმა ცოლად შეირთო ნიკოლოზ (ერეკლე) ბატონიშვილის და ეკატერინა (ქეთევანი). სამეფო ტახტზე იგი იყო მხოლოდ ექვს კვირას. გარდაცვლილი მეფის ალექსანდრეს ცოლმა და ახალი მეფის დედინაცვალმა დარეჯანმა მას თვალები ამოწვა იმის გამო, რომ დედოფალს უთხარეს — ბაგრათი თურქებთან მიდგომას აპირებსო. იმერეთის ქვეყნის დიდმა თავადმა ერისთავმა და სხვა იმერლებმა ეს დედოფალი მის ქმართან ვახტანგთან ერთად და ბატონიშვილი ბაგრაციც მის ცოლთან ერთად გადაასახლეს დადიანის ქვეყანაში ლიპარტიანთან. ლიპარტიანმა კი ბაგრათი მის ცოლს გააშორა და მოსწერა მეფე თეიმურაზს სკანდის ციხეში, რომ მისი შვილიშვილი კატერინა (ქეთევანი), რომელიც ბაგრატის ცოლი იყო, ლიპარტიანის შვილისათვის მიეთხოვებინა და იგი იმერეთის ქვეყანაში მეფედ დაესვათ.¹

ყველა ქართული წყაროს მიხედვით ბაგრათი გამეფდა ალექსანდრეს სიკვდილის შემდეგ, მხოლოდ ვახუშტი ამბობს, რომ როცა ნაშვილები თეიმურაზის შვილიშვილიც გარდაიცვალა, „მოიყვანა ბაგრატ ძე თვისი, შობილი გურიელის ქალისაგან და ჰყვანდა თვისათანა, ვითარცა სამეფო ძე“.²

ელჩი ათანასე აღნიშნავს, რომ ბაგრათი, რომელიც ამ დროს უკვე 40 წლისა იყო, დიდი ჰკუითაც ვერ დაიკვებნიდა და თითქოს ესეც იყო ალექსანდრეს მიერ მისი ათვალწუნების მიზეზი, მაგრამ ალექსანდრემ იგი მაინც აკურთხა მეფედ. ამ საქმეში თეიმურაზსაც მიუღია მონაწილეობა. „ალექსანდრეს ასეთი ნაბიჯი — აღნიშნავს დოც. ნ. ასათიანი, — და მასში თეიმურაზის მონაწილეობა ჩვენ გვაფიქრებინებს, რომ იმერეთის სამეფო კარზე ამ პერიოდში არსებობდა გარკვეული დაჯგუფებები განსხვავებული პოლიტიკური მიზნებით“.³

ბაგრატისა და ქეთევანის ქორწინებას ფარსადან გორგიჯანიძე, ბერი ეგნატაშვილი და ვახუშტი ბაგრატიონი ერთხმად დარეჯანის

¹ გ. პაიჭაძე, მასალები... საისტორიო მოამბე, № 23-24, გვ. 155—156.

² ქართლის ცხოვრება, ნაწ. II, ჩუბინოვის გამოცემა, სანკტ-პეტერბურგი, 1854, გვ. 201.

³ ნ. ასათიანი, მასალები XVII საუკუნის საქართველო. ისტორიისათვის, თბ., 1973, გვ. 40—41.

ინიციატივას მიაწერენ.¹ „დარეჯანის ასეთი ინიციატივა და მით უმეტეს ასეთი აჩქარება (ბაგრატს ქეთევანი ცოლად შერთეს ალექსანდრეს გარდაცვალებიდან მესამე დღეს) იმას მოწმობს, — აღნიშნავს ნ. ასათიანი, — რომ დედოფალი (დარეჯანი — მ. რ.) ეშურებოდა, ახალნი მეფე, რომელიც დიდის ქვითა და ნებისყოფით არ გამოირჩეოდა, თავიდანვე თავისი გავლენის ქვეშ მოექცია და არ დაეთმო პოზიციები მოწინააღმდეგე პარტიისათვის.“² ამავე დროს წყაროები დარეჯან დედოფალს უფლებისმოყვარე და დიდი ნებისყოფის მქონე ქალად წარმოგვიდგენენ. დარეჯანი „მეფეც იყო და დედოფალიცა, ბაგრატს არაფერი ეკითხებოდა.“³ სპარსელი ისტორიკოსი მოჰამედ თაჰერიც აღნიშნავს, რომ „თეიმურაზ-ხანის ქალი, რომელიც ცოლად ჰყავდა ალექსანდრე ხანს, დიდი ნებისყოფის მქონე იყო.“⁴

დოკუმენტების მიხედვით დარეჯანს სამეფო კარზე პირველი ადგილი უკავია.⁵ დარეჯან დედოფლის მიერ შეთქმულების მოწყობის მიზეზს გასაგებს ხდის ათანასე ელჩის ცნობა, რომ დედოფლის პოლიტიკის მოწინააღმდეგე იმერელი დიდგვარიანები ბაგრატს აქეზებდნენ, რომ თავი დაეღწია დედოფლის გავლენისაგან და დამხმარედ თურქეთი გამოეყენებინა. როგორც ჩანს, ბაგრატი ამ რჩევის მიღებას აპირებდა,⁶ მაგრამ „დაასწრო დედოფალმა და იმერეთის ამ გზაბნეულ მეფეს სასტიკად გაუსწორდა.“⁷

როგორც ნ. ასათიანი აღნიშნავს, სამეფო კარზე ორი პოლიტიკური დაჯგუფება არსებობდა: „დარეჯანის მომხრედ პირველ რიგში იმერეთის კათალიკოსი ჩანს, დარეჯანის მომხრეთა დასს ეკუთვნის აგრეთვე რუსულ წყაროებში მითითებული ვინმე „ბოიარინი ივანე ლუქიანოვი“ (შეიძლება აქ „ლორთქიფანიძის“ რუსული გადმოცემით), რომელიც 1657 წელს მეფე ალექსანდრეს მიერ მოსკოვში იყო გაგზავნილი ელჩად.“⁸ ამ დასში სხვებიც შედიან, რომლებსაც წყა-

¹ ფ. გორგოჯანიძის ისტორია, ტფ., 1926, გვ. 62; ქართლის ცხოვრება, II, თბ., 1959, გვ. 436; ქართლის ცხოვრება, ჩუბინოვის გამოცემა, ნაწ. II, გვ. 22.

² ნ. ასათიანი, მასალები XVII საუკუნის საქართველოს ისტორიისათვის, თბ., 1973, გვ. 41.

³ ფარსადან გორგოჯანიძის ისტორია, გვ. 62.

⁴ მოჰამედ თაჰერის ცნობები საქართველოს შესახებ, ვ. ფუთურძის გამოცემა, მასალები საქართველოსა და კავკასიის ისტორიისათვის, ნაკ. 30, თბ., 1954, გვ. 395.

⁵ ისტორიული დოკუმენტები შ. ბურჯანაძის რედაქციით, თბ., 1959, გვ. 30—31; თ. ყორღანი, ქრონიკები, II, გვ. 477—478.

⁶ ნ. ასათიანი, დასახ. ნაშრ., გვ. 43.

⁷ იქვე.

⁸ გ. პაიჭაძე, მასალები, საისტორიო მოამბე, № 19—20, გვ. 459—461.

როები მხოლოდ ზოგადად ასახელებენ: „დედოფლის კერძნი“ (ფარსადან გორგიჯანიძე), „დედოფლის მომხრეთა ერთი ჯგუფი“ (მოჰამედ თაჰერი) და სხვ.; დარეჯან დედოფლის მოწინააღმდეგეთა დასში კი შედიან: რუსული წყაროების „ბოიარინი ერისთავი“ (ეს უნდა იყოს რაჭის ერისთავი პაპუნა),¹ აგრეთვე დადიანი, გურიელი და სხვანი (ჩაღმა მხრის და ქართლის მხრის თავადნი, რომლებიც „დედოფლის კერძნი არ იყვნენ“).

ბუნებრივია, ვიფიქროთ, — ასევენის ნ. ასათიანი, — რომ დედოფალი დარეჯანი და მისი მომხრენი თეიმურაზის პოლიტიკის გამტარებელნი არიან; ეს თუნდაც იქიდან ჩანს, რომ ბაგრატის ტახტიდან ჩამოგდების შემდეგ მათ მეფობა თეიმურაზის შესთავაზეს, ასევე რუსეთიდან ერეკლე ბატონიშვილის ჩამოყვანას და მის გამეფებას აპირებდნენ. აქედან გამომდინარე, ბუნებრივია ვიფიქროთ, რომ საგარეო პოლიტიკაში ისინი რუსული ორიენტაციისანი იყვნენ, ხოლო ქვეყნის შიგნით მტკიცე წესრიგის დამყარების მომხრენი იქნებოდნენ. ამრიგად, დარეჯანის გამოსვლა ბაგრატის წინააღმდეგ მარტო მისი ბოროტი ბუნებით არ უნდა აიხსნას, როგორც ამას ზოგიერთი მაშინდელი წყარო წარმოგვიდგენს. მის მოქმედებაში გარკვეული პოლიტიკური ხაზი ჩანს და ამ საქმეში იგი მარტო არ არის.²

ქართული დოკუმენტები პაპუნა რაჭის ერისთავის აქტიურ ჩარევას იმერეთის სამეფო კარის საქმეებში არ ახსენებენ და საერთოდ ღუშან; მის აქტიურობას მხოლოდ რუსეთში წარგზავნილი ელჩების ნაამბობიდან ვგებულობთ. რუსული წყაროები რაჭის ერისთავს დარეჯანის წინააღმდეგ ბრძოლის მეთაურად ასახელებენ.³

მის მხარდამხარ იბრძვიან დედოფლის წინააღმდეგ სამეგრელოსა და გურიის მთავრები და იმერეთის სხვა თავადებიც.

პაპუნა ერისთავი არა მარტო იბრძვის დედოფლის წინააღმდეგ, არამედ იმერეთის დანაწილებაში წილსაც კი იღებს; მაგალითად, საქართველოდან რუსეთში ჩასული ელჩები რუს მოხელეებს მოახსენებდნენ, რომ: „იმერეთის ერთ მესამედს ფლობს შაჰ-ნავაზი, ხოლო დანარჩენ ორ მესამედს — ერისთავი და დადიანი“.⁴ ქართულ წყაროებში ერისთავის მოუხსენებლობის მიზეზის გარკვევა ძნელია; ყველგან შაჰ-ნავაზი და დადიანი არიან მოხსენებული, როცა წყაროები იმერეთის დანაწილების საკითხს ეხება. პაპუნა ერისთავი ჩნდება წყაროებში შოგვიანებით, როცა ვამიყ დადიანმა დათ-

¹ ო. ს. ოსელია, დასახ. ნაშრ., გვ. 119.

² ნ. ასათიანი, დასახ. ნაშრ., გვ. 42.

³ გ. პაიჭაძე, მასალები... საისტორიო მოამბე, №23—24, გვ. 153—155.

⁴ იქვე, გვ. 156.

ქმული პირობა დაარღვია და თავისი ქალი ბეჟან ლოლობერიძეს მისცა არჩილის ნაცვლად. პაპუნა მეფის მხარეზე დგება და დადიანის წინააღმდეგ იწყებს ბრძოლას.¹

„ეს იმას მოწმობს, — აღნიშნავს ნ. ასათიანი, — რომ სამეგრელოს მთავარსა და რაჭის ერისთავს შორის ამ ხნის განმავლობაში უთანხმოება ჩამოვარდნილა. ამ უთანხმოების მიზეზი იყო, ალბათ, ვამიყ დადიანის მცდელობა, ხელთ ეგდო იმერეთის სამეფო ტახტი: როგორც აღნიშნული იყო, იგი აპირებდა იმერეთის მეფედ თავისი შვილი დაესვა. უთანხმოება ერისთავსა და დადიანს შორის იმერეთიდან თურქთა ჯარის გასვლის შემდეგ უნდა დაწყებულიყო.“² ვამიყ დადიანის მეფობა იუკადრისეს ზემო იმერეთის თავადებმა, დემეტრე გურიელიც დადიანის შურით მათ მიემხრო. ამ პერიოდში, ვახტანგ მეფემ, შეურაცხყოფილმა ვამიყ დადიანის მიერ პირის გატეხის გამო, კავშირი დაამყარა დემეტრე გურიელთან და ზემო იმერეთის თავადებთან, რომელთაც ბეჟან ლოლობერიძე მოკლეს და ვახტანგი ისევ იმერეთში მოიწვიეს. ვახტანგმა შეყარა დიდი ჯარი და იმერეთისაკენ დაიძრა 1661 წელს. ვახტანგის მხარეზე დადგნენ იმერეთის ძლიერი თავადები: პაატა აბაშიძე (ზემო იმერეთის თავკაცი), რაჭის ერისთავი პაპუნა, თავი ლეჩხუმისა ლაშბიშვილი ხოსია და იმერეთის ბევრი წარჩინებული თავადი. თავის მხრივ ვამიყ დადიანმაც შეკრიბა ჯარი და იმერეთში შემოსულ ქართლის მეფეს საჩხერესთან დახვდა, მაგრამ შებრძოლება ვერ გაბედა და ოდიშში დაბრუნდა.³ ვახტანგ მეფემ აიღო იმერეთის ციხეები სვერი და კაცხი;⁴ სკანდის ციხეში მყოფმა თეიმურაზმა მოციქულები აახლა ქართლის მეფეს და ირანის შაჰთან შერიგების შუამდგომლობა სთხოვა.⁵ ვახტანგს ეს ამბავი გაეხარდა, თეიმუ-

¹ თავადურ გათიშულობას, — აღნიშნავს ო. სოსელია, — რაჭის ერისთავებმა XVII საუკუნის II ნახევარში იწყებენ. ამას ხელი შეუწყო იმ პოლიტიკურმა არეულობამ, რომელსაც ადგილი ჰქონდა იმერეთში ალექსანდრე III-ის სიკვდილის შემდეგ (1660 წ.). XVII საუკუნის 60-იანი წლების მიწურულთან რაჭის ერისთავები (პაპუნა პირველი — 1651-1660 წწ., შოშიტა II — 1661-1684 წწ., პაპუნა II — 1684-1696 წწ., შოშიტა III — 1696-1731 წწ.) შეუნებლად ებრძვიან ცენტრალურ ხელისუფლებას. ამ ბრძოლაში მათ მხარეზეა აბაშიძე, დადიანი, გურიელი (დრო-და-დრო) და ზოგი სხვა თავადიც (იხ. ო. სოსელია, ნარკვევები ფეოდალური ხანის დასავლეთ საქართველოს სოციალურ-პოლიტიკური ისტორიიდან, თბ., 1973, გვ. 119).

² ნ. ასათიანი, დასახ. ნაშრ., გვ. 50.

³ ქართლის ცხოვრება, IV, გვ. 836.

⁴ იქვე.

⁵ ფარსადან გორგიჯანიძის ისტორია, გვ. 63.

რაზი დიდის პატივისცემით მიიღო, ქართლში გადაიყვანა,¹ და სამი თვის შემდეგ ირანში გაისტუმრა.² მოხუცებულ მეფეს, რომელმაც მთელი თავისი სიცოცხლე ირანის წინააღმდეგ ბრძოლას შეაღია, იმედი ჰქონდა, რომ ირანის შაჰი შეიწყენარებდა და კახეთის სამეფოს მის შვილიშვილს — ერეკლეს მისცემდა.

ვახტანგ მეფემ ქუთაისი უბრძოლველად დაიკავა, შემდეგ ოდიშისაკენ გაილაშქრა და ზუგდიდი აიღო. ვამიყ დადიანი ცოლ-შვილით სვანეთში გაიქცა და ჭაქვინჯის ციხეს შეაფარა თავი. მეფემ ოდიშის მთავრად დასვა ლევან დადიანის ძმისშვილი შამადავლე იოსების ძე.³ მან სახელი გამოიცვალა და ბიძის პატივსაცემად ლევან III-ედ იწოდდა. ვახტანგმა ლევანს ცოლად შერთო თავისი ძმისშვილი თამარი, განსაკვიფრებელი სილამაზის ქალი, რომელიც ათეული წლების მანძილზე დასავლეთი საქართველოს მეფე-მთავართა საცილობელ საგნად იქცა,⁴ და რომლის გამოც ბევრი სისხლი დაიღვარა.

ვახტანგ მეფის ბრძანებით, ხოსია ლაშხიშვილმა ვამიყ დადიანი შეჩენილ კაცებს მოაკვლევინა (1661 წ.).⁵

ვახტანგი ქუთაისში დაბრუნდა, აქ მას დიმიტრი გურიელი ეახლა და შორჩილება ჯანუცხადა. ქართლის მეფემ იმერეთის ტახტზე თავისი 14 წლის შვილი არჩილი დასვა,⁶ შემოუმტკიცა იმერეთი, მრჩეველად „მიუჩინა“ ხოსია ლაშხიშვილი, ციხიდან გამოიყვანა უსინათლო მეფე ბაგრატ IV და ქართლში დაბრუნდა იმერთა ყოფილი მეფითურთ (1661 წ.).

დასავლეთ საქართველოში შაჰნავაზის შესვლა და მის მიერ არჩილის გამეფება ფაქტიურად წარმოადგენდა სპარსეთის შაჰის მოადგილის მიერ ოსმალეთის გავლენაში მყოფი ქვეყნების შინაურ საქმეში ჩარევას. ახალციხის გამგებელმა ასლან-ფაშამ, რომელსაც მინდობილი ჰქონდა დასავლეთი საქართველოს სამეფო-სამთავროების თვალყური, სასწრაფოდ აცნობა ეს გარემოება თურქეთს.

¹ ფარსადან გორგიჯანიძის ისტორია, გვ. 63.

² თ. ტივაძე, მე-17 საუკუნის საქართველოს პოლიტიკური ისტორიიდან, მაცნე, 4, 1971, გვ. 50;

ფ. გორგიჯანიძის ისტორია, გვ. 64;

ვ. ფუთუჩიძე, შოჰამედ თავერის ცნობები საქართველოს შესახებ. მასალები საქართველოსა და კავკასიის ისტორიისათვის, ნაკვ. 30, 1954, გვ. 397.

³ ქართლის ცხოვრება, IV, გვ. 836.

⁴ ს. კაკაბაძე, საქართველოს ისტორია, ახალი საუკუნეების ეპოქა, ტფ. 1922, გვ. 62.

⁵ ქართლის ცხოვრება, IV, გვ. 836.

⁶ იქვე.

1555 წლის ამასიის ზავით დადგენილი ირან-ოსმალეთს შორის ურთიერთობის ფორმულა (ირანი ცნობს ოსმალეთის „უფლებას“ დასავლეთ საქართველოზე, ზოლო ოსმალეთი სცნობს ირანის „უფლებას“ აღმოსავლეთ საქართველოზე) სერიოზულად ართულებდა საქართველოს მდგომარეობას.

ორივე მხარე პირობას დებდა, რომ არ ჩაერეოდნენ ერთმანეთის წილხვდომილი ქვეყნის საქმეებში და ხელს არ შეუშლიდნენ ერთმანეთს თავიანთი „უფლების“ განხორციელებაში. „ირანსა და თურქეთს შორის დადებულ ზავს, — წერს ნ. ბერძენიშვილი, — საქართველოსათვის ჰქონდა განსაკუთრებული პოლიტიკური მნიშვნელობა. ის გარკვეულად ეწინააღმდეგებოდა საქართველოს გაერთიანებას, ამის შემდეგ ყოველი მისი ნაწილის ბრძოლა დამპყრობლებთან მიმდინარეობდა შეუღარებლად მძიმე პირობებში. მანამ, ვიდრე თურქეთი და ირანი იცავდნენ 1555 წლის საზავო ხელშეკრულების პირობებს, დამოუკიდებლობისათვის მებრძოლ ქართულ სამეფოებს არ უნდა ჰქონოდათ დახმარების იმედი ამ მოქიშპე სახელმწიფოებისაგან; ისინი შთლიანად დამოკიდებული რჩებოდნენ საკუთარ სუსტ ძალებზე. გასაგებია, რომ თურქეთისა და ირანის მიერ ქართული სამეფოების და სამთავროების დაპყრობა უფრო წარმატებით მიმდინარეობს 1555 წლის შემდეგ.“¹

ამიერიდან ირანი და ოსმალეთი ეკვის თვალით უყურებდნენ დასავლეთი და აღმოსავლეთი საქართველოს მეფე-მთავრების კავშირ-ურთიერთობას და განიხილავდნენ მას როგორც „მტრულ მოქმედებას“ ირან-ოსმალეთის წინააღმდეგ. 1639 წლის ზოჰაბის ზავით ირან-ოსმალეთმა 1555 წლის ამასიის ზავის მსგავსად საქართველო ისევ გავლენის სფეროებად გაიყვეს, მხოლოდ იმ განსხვავებით, რომ სამცხე-საათაბაგო, როგორც 1555—1639 წლებში მთლიანად ოსმალთა მიერ დაპყრობილი, ირანმა თურქეთის კუთვნილებად ჩათვალა. ოსმალეთმა სამცხე-საათაბაგო საბოლოოდ მოგლიჯა საქართველოს და XVII საუკუნის მეორე მეოთხედში თავის ადმინისტრაციულ ერთეულად აქცია. ამიერიდან ახალციხის საფაშო იქცა საქართველოს წინააღმდეგ მიმართულ ოსმალეთის აგრესიული პოლიტიკის ფორპოსტად.

ამრიგად, ირან-ოსმალეთის 1639 წლის საზავო ხელშეკრულება ისევ აკანონებდა საქართველოს პოლიტიკურ დაშლილობას და აფერხებდა აღმოსავლეთი და დასავლეთი საქართველოს მეფე-მთავართა დაახლოებას.

¹ Н. Бердзенишвили. Очерк, с. 26—27.

ზოპაბის ზაემდე, 1634 წელს, სტამბოლში მიიღეს ცნობა საქართველოს შესახებ, სადაც აღნიშნული იყო ქართლის მეფის როსტომ-ხანის და ლევან დადიანის შეხვედრის ამბავი. თურქი ისტორიკოსის ნაიმას ცნობით, როსტომ მეფემ ცოლად შეირთო დადიანის ქალიშვილი (უნდა იყოს და), რომ თეიმურაზი იმერეთიდანაც გადაიხვეწა, ზოლო როსტომ მეფე (ზოსრო მირზა)¹ დადიანისა და გურიელის დახმარებით, 30000 ყიზილბაშით აპირებს შავი ზღვის ნაპირზე გაჭრას, გონიის და ტირებოლუს მიმართულებით.²

ნაიმას ცნობიდან ირკვევა, რომ ქართლის მეფისა და სამეგრელოს მთავრის დამოყვრება ოსმალეთში მიაჩნდათ მის წინააღმდეგ მიმართულ პოლიტიკურ აქტად. ანგარიშგასაწევი იყო აგრეთვე კაზაკების გააქტიურება შავ ზღვაზე. აღნიშნული ფაქტები სტამბოლში ანტიოსმალური კოალიციის შექმნის ეჭუს ბადებდა.

მართალია, ირანის უახლოესი მიზანი ამ დროს იყო არა შავ ზღვაზე გაჭრა, არამედ დადიანისათვის იმერეთის სამეფოს წინააღმდეგ დახმარების გაწევა,³ მაგრამ კაკას ხიდთან შემდგარი პაემანი ოსმალეთში გაიგეს შაჰის ჩარევად დასავლეთი საქართველონ („სულთნის სამფლობელოს“) საქმეებში.⁴

ზოპაბის ზავის შემდეგ, როდესაც ვახტანგ V-მ 1661 წელს იმერეთის ტახტზე აიყვანა თავისი შვილი არჩილი, სულთანმა ვახტანგ V-ის მოქმედება შეაფასა ირანის აგრესიად თავისი სამფლობელოს მიმართ. მან იმერეთში სალაშქროდ გაგზავნა ახალციხის, ყარსისა და არზრუმის ფაშები, რომელთაც სულთანის უფლება უნდა აღედგინათ დასავლეთ საქართველოში. ამის გარდა, ოსმალეთის მთავრობამ ელჩი მიავლინა საქარსეთში და ზავის დარღვევის გამო პროტესტი განუცხადა ირანის შაჰს. მოჰამედ თაქერის ცნობით, შაჰმა „...ბრძანა, რომ შაჰნავაზ-ხანმა (ვახტანგ V-ემ) ხელი აიღოს ხსენებულ „ოლქზე“ და არჩილ-ხანი იმ ხალხთან ერთად, რომელიც იქ (იმერეთში) ჰყავს დატოვებული, უკან გამოიწვიოს, და რადგანაც ის ქვეყანა ოსმალეთის დიდებული ხელმწიფის ხელქვეითი

¹ ზოსრო-მირზა (1632-1658 წ.წ.) — დაუთ-ხანის უკანონო შვილი, სპარსეთში აღზრდილი, პირველი გამაჰმადიანებული ბაგრატიონი, რომელმაც 1632 წელს სპარსეთის ქარის დახმარებით განდევნა თეიმურაზ I, დაიკავა ქართლის ტახტი და იწოდა როსტომ-ხანად (მეფედ).

² მუსტაფა ნაიმა, ცნობები საქართველოსა და კავკასიის შესახებ. თურქული ტექსტი ქართული თარგმანით, გამოცვლევითა და შენიშვნებით გამოსცა ნოდარ შენგელიძემ, თბ., 1979, გვ. 190—191.

³ ჯ. გრიგოლია, ილორის წმინდა გიორგის ხატის წარწერა, ვნიშვის შოამბე, ტ. XIII, 1942, გვ. 154.

⁴ მუსტაფა ნაიმას დასახ. ნაშრ. გვ. 190—191.

არის, ზავი და კეთილსათნობა ამ ორ მხარეს (ე. ი. ირანსა და ოსმალეთს — შ. რ.) შორის მტკიცეა, ამიტომ გაუშვას ისინი და როგორც უნდათ ისე მოიქცნენო. შაჰნავაზ-ხანი ბრძანების შესაბამისად მოიქცა“.¹

ამრიგად, ოსმალეთმა არ დაუშვა ქართლის პოლიტიკური გავლენის გავრცელება დასავლეთ საქართველოზე. ირან-ოსმალეთის 1555 და 1639 წლების საზავო ხელშეკრულებები არ დარღვეულა 1723 წლამდე. XVIII საუკუნის დასაწყისში ოსმალეთმა ერთხელ კიდევ სცადა აღმოსავლეთ საქართველოს დამორჩილება და იქიდან ირანის განდევნა, მაგრამ ნადირ-შაჰმა კვლავ აღადგინა ირანის უფლება აღმოსავლეთ საქართველოზე 1746 წელს; ამდენად, სანამ ირან-ოსმალეთის ეს ხელშეკრულება ძალაში რჩებოდა, საქართველოს პოლიტიკური გაერთიანება არ ხერხდებოდა.

მოჰამედ თაქერის ცნობას ფარსადან გორგიჯანიძეც ადასტურებს და აღნიშნავს: „ურუმთაგან (ოსმალეთიდან — შ. რ.) ჩაფარი მოვიდა: ჩვენსა და თქვენს შვა წყობა არისო, შაჰნავაზ ხანს იმერეთი რისთვის დაუჭირავსო, ოდიშს შიგ ცოლისძმა დადიანად დაუსვაძსო და იმერეთში შვილი გაუბატონებიაო. არ ვიცითო, თქვენის ბრძანებით უქნიაო, თუ თავისის ძალითაო. ამათ ასრე მისწერეს: დაუშავებიაო და ჩვენ გადავახდევინებთო. ამირ ჰანზა ხან თალიში გაგზავნეს, იმერეთი დაუცალეს და მეფის შვილი არჩილი და გივი ამილახორი მაზანდარას ყაენთან მოვიდნენ, კარგად დახვდა და მრავალი წყალობა დამართა და ორნიც დაათათრა და კახეთი არჩილს უბოძა და შაჰნავაზ ხან დაარქვა... და კახეთს გაგზავნა. ქართლში მამა მეფობდა და კახეთში შვილი ბატონობდა“.²

რა თქმა უნდა, ირანის შაჰს ქართლის მეფის ასეთი გაძლიერება არ მოსწონდა, ამიტომ იყო, რომ როცა თურქეთმა მოითხოვა იმერეთიდან არჩილის გაყვანა, ვახტანგმა ეს სწრაფად შეასრულა — „მოუწერა ყეენმან ვახტანგ მეფესა და მან წარიყვანა ძე თვისი არჩილ“.³

არჩილის მეფობა იმერეთში ხანმოკლე აღმოჩნდა — ორწელიწადნახევრის შემდეგ, 1663 წელს, შაჰის ბრძანებით, იგი იძულებული გახდა დასავლეთი საქართველო დაეტოვებინა. სამაგიეროდ სპარსეთის სამეფო კარმა არჩილ მეფეს კახეთის ტახტი უწყალობა 1664 წელს. ხოლო კახეთის ტახტზე რომ მტკიცედ მჯდარიყო, ამი-

¹ ვ. ფუთურიძე, მოჰამედ თაქერის ცნობები საქართველოს შესახებ, მასალები საქართველოსა და კავკასიის ისტორიისათვის, თბ., 1954, გვ. 403.

² ფარსადან გორგიჯანიძის ისტორია, გვ. 64.

³ ქართლის ცხოვრება, IV, გვ. 837.

სათვის მან ცოლად შეირთო თეიმურაზის შვილიშვილი ქეთევანი (ბაგრატ IV-ის ცოლყოფილი), რომელიც იმხანად ახალციხეში იმყოფებოდა მძევლად. ვახტანგ V-მ 20.000 მარჩილი გადაუხადა ახალციხის ფაშას და ქეთევანი გამოისყიდა.¹

იმერეთიდან არჩილ მეფის წასვლის შემდეგ იმერეთის სამეფო ტახტი ერთ ხანს თავისუფალი იყო; ვინც მეტ „ქრთამს“ გაიღებდა, თურქთა მბრძანებელიც მას გაამეფებდა; ახლაც ასე შოხდა, დემეტრე გურიელმა შეძლო სულთანის გულის მონადირება და სამეფო გვირგვინს დაეუფლა. სულთანის ბრძანებით, ახალციხის ფაშა არზრუმის და ყარსის საფაშოების ჯარით დასავლეთ საქართველოში გადავიდა და ხონთქრის სახელით იმერეთში მეფედ დასვა დიმიტრი გურიელი, ოდიშის მთავარი ლევან III დადიანი გადააყენა, როგორც შაჰ-ნავაზის მიერ დანიშნული პირი და დადიანობაც დიმიტრი გურიელს მისცა, ამის შემდეგ დიმიტრი იწოდებოდა მეფედ, დადიანად და გურიელად.²

დიმიტრი გურიელს იმერეთის ტახტზე დიდხანს არ უმეფია, როგორც კი თურქთა ჯარმა იმერეთის ტერიტორია დაცალა (1663 წ.), იმერეთის თავადებმა იმერეთის სამეფო ტახტიდან ვააძევეს, ხოლო იმავე თავადების თხოვნით, ვახტანგ მეფემ იმერეთის ტახტზე ისევ ბაგრატ IV დააბრუნა (1663 წ.), რომელიც ქართლში ჰყავდა შინაპატიმრობაში. მას საცოლედ თავისი ძმისშვილი თათია — თამარის და — გამოატანა. როგორც ჩანს, ამ დამოყვრებით ვახტანგ მეფე ცდილობდა დასავლეთ საქართველოში თავისი გავლენის შენარჩუნებას, მაგრამ ფეოდალურმა შინაომებმა, რაც ისევ დიდი ძალით გაღვივდა დასავლეთ საქართველოში, თავდაყირა დააყენა ვახტანგის ჩანაფიქრი.

დიმიტრი გურიელის განდევნისა და ბაგრატ IV-ის გამეფების შემდეგ გურიელად დაჟდა გიორგი ქაიხოსროს ძე, ხოლო ლევან III დადიანმა ისევ დაიბრუნა ოდიშის მთავრობა.³

ლევან დადიანმა, რომელიც შაჰ-ნავაზს ენათესავებოდა, არ ინება ბაგრატის გამეფება იმერეთის ტახტზე და ომი აუტეხა მას. ამ ომში ლევან დადიანი დამარცხდა, იგი დაატყვევეს. ვახუშტი ასე აღწერს ამ ომს: ლევან დადიანმა „შემოიკრიბნა სპანი და მოვიდა, მიეგება ბაგრატ სპითა, ეკუეთა და იქმნა ბრძოლა; იძლია დადიანი,

¹ ა. ბარამიძე, ნარკვევები..., II, გვ. 165—166.

² ს. კაკაბაძე, საქართველოს ისტორია, ახალი საუკუნეების ეპოქა, თბ., 1922, გვ. 62.

³ ს. კაკაბაძე დასახ. ნაშრ., გვ. 62.

შეიპყრეს და შოართვეს ბაგრატს, ხოლო სპანი მისნი მოსრნეს და ტყუე-ყვნეს“.¹

შინა ომები რომ შეწყვეტილიყო, იმერეთის თავკაცებმა კათალიკოს სვიმონ ჩხეტიძის მეთაურობით უცნაურ საშუალებას მიმართეს: მათ ლევან დადიანი დააშორეს თავის ცოლს — თამარს და ეს უკანასკნელი ბაგრატს შერთეს, ხოლო ლევანი ბაგრატის დაზე — თინათინზე — გოშაძის ნაცოლარზე დააქორწინეს.² ვახუშტი აღნიშნავს: მეფემ დადიანს „მოაყვანიდა ცოლი თამარ, წარგვარა მას და შეირთო თვით ბაგრატ ცოლად, და განუტევა თითია და თამარისა, რომელი მისცა შანაოზ, რაჟამს წარმოგზავნა იმერეთს, ჭერეთ უქორწინო და ლევან დადიანს მისცა და მისი გოშაძის ნაცოლარი“.³

ბაგრატ მეფემ დადიანს ქორწილი გადაუხადა და ისევე დადასთანად გაუშვა ოდიშს.

ბაგრატს ახალი მეტოქე გამოუჩნდა გიორგი გურიელის სახით (1664—1684 წ.წ.). გიორგი გურიელი ვახუშტის დახასიათებით „იყო კაცი მხნე, შემმართველი, შეილდოსან-მოსასპარეზე რჩეული, უღრმთო, მესისხლე და ტყვის მყიდველი უწყალო“.⁴ ეს გიორგი გურიელი „ეტრფილა ცოლსა ბაგრატ მეფისასა თამარს, მცდელობდა წაგურასა და თვით შერთვასა და ვერ ეწია. ამისთვის ევედრა (ახალციხის — მ. რ.) ფაშასა, რათა წარგუაროს ბაგრატ მეფესა და მისცეს მას და აღუთქუა ქრთამი ღიდი“.⁵ ცოლის წართმევასთან ერთად გურიელი იმერეთის ტახტის მიტაცებასაც მცდელობდა, მაგრამ ვერც ერთს ეწია და ვერც მეორეს. ბაგრატ მეფეს რომ თავიდან მოეცლებინა ჯიუტი მოძალადე, „ეზრახა გიორგი გურიელსა და მისცა ასული თვისი დარეჯან ცოლად, ნაშობი თამარისაგან“⁶ (1674). ურთიერთდამოყვრების ნიადაგზე მეფე-მთავარს შორის მშვიდობიანობა დამყარდა.

მეორედ გამეფებიდან ბაგრატმა 7 წელი⁷ გაძლო ტახტზე, მაგრამ ამ ხნის განმავლობაში არ შეწყვეტილა სისხლისმღვრელი შინაფეოდალური ომები, რომელთა ერთ-ერთი მიზეზი თვით თამარი იყო, რომელიც ნ. ასათიანის სიტყვებით რომ ვთქვათ, „მეფე-მთავ-

¹ ქართლის ცხოვრება, IV, გვ. 837.

² საქართველოს ისტორიის ნარკვევები, ტ. IV, თბ., 1973, გვ. 351.

³ ქართლის ცხოვრება, IV, გვ. 837. იხ. აგრეთვე ნ. ასათიანი, მასალები XVII საუკუნის საქართველოს ისტორიისათვის, თბ., 1973, გვ. 51—52.

⁴ ქართლის ცხოვრება, IV, გვ. 840.

⁵ ქართლის ცხოვრება, IV, გვ. 837; ს. კაკაბაძე, დასახ. ნაშრ., გვ. 62,

⁶ იქვე, გვ. 842.

⁷ საქართველოს ისტორიის ნარკვევები, ტ. IV, თბ., 1973, გვ. 351.

რებს შორის ატეხილ ომში იგი ხელიდანხელში — დამარცხებულ-
ლიდან გამარჯვებულზე გადადიოდა. მისი დაკარგვით გახლებული
ლევან დადიანი თუ მისი სილამაზით მოხიბლული გიორგი გუ-
რიელი გააფთრებით ებრძვიან უსინათლო ბაგრატს და პირველ
რიგში ამ თამარის დაუფლებას ცდილობენ. ასე, რომ სვიმონ
კათალიკოსისა და იმერეთის სხვა თავაკების მიერ განხორციელებ-
ულმა ზემოთ აღნიშნულმა „ორიგინალურმა“ საქორწინო მანიპუ-
ლაციამ იმერეთში შინა ომი კი არ ჩააქრო, არამედ შემდეგ წლებ-
ში კიდევ უფრო მეტი ძალით აღაგზნა.¹

ქრონიკებში დაცული ერთი გუჯარი გედეონ გენათელისა,
რომელიც 1664 წლით თარიღდება, აღნიშნავს: „წილად ხდომილი
ერი შენი ესრეთ აწროებასა, ოხრებასა და მწუხარებასა შინა იყო
ხუთს წელიწადს, რომ ესე ვითარი არა ოდეს მისულიყო ესრეთი
შფოთი და ურვა“.²

ამ პერიოდში დასავლეთ საქართველოს მდგომარეობას ვახუშ-
ტი შემდეგნაირად ახასიათებს: „უამებთა ამათ შინა განდიდნენ მთა-
ვარნი და მიიტაცებდიან თვის-თვისთა მხარეთა და არღა-რა იყო
მოაზილება ეგდენი მეფეთა; იწყეს ტყვის ყიდვა სააჟმნოდ ქრის-
ტეს მოსყიდულთა მაჰმადიანთა ზედა. კუალად ზღომა, შფოთი,
კირთება ერთმან მეორესა ზედა და ოხრება ქუეყანათა“.³

დასავლეთ საქართველოს სამეფო-სამთავროების მდგომარეობა
თანდათან გაუარესდა, უსინათლო მეფეს ახლა სახლთუხუცესი სეხ-
ნია ჩხეიძე გადაუდგა, 1666 წელს ოსმალთა ჯარი მოიყვანა და ქუ-
თაისის ციხეში ჩააყენა: „მოიყვანა სპანი ოსმალთა, მოიპარა ცი-
ხე ქუთათისისა და შეაყენნა ოსმალნი“.⁴

მომდევნო 1667 წელს მოურავმა ბეჟან ლორთქიფანიძემ ქუ-
თაისის ციხე ისევ აიღო და მეფე ბაგრატს გადასცა: „მოურავმან
ბეჟან ლორთქიფანიძემან, შეეტყუა ქუთათისის ციხესა, მოსრნა ოს-
მალნი და აღიღო ციხე“.⁵ ამ გარემოებით ისარგებლეს ბაგრატის
მტრებმა და ახალციხის ფაშა მის წინააღმდეგ წააქეზეს.

როგორც ზემოთ აღნიშნეთ, მეამბოხე მთავრებს დარეჯან დე-
დოფალი ციხეში ჰყავდათ გამოკეტილი. დედოფალი, რომელიც
აქამდე რუსული ორიენტაციის მომხრე იყო, იძულებული გახდა
დახმარებისათვის ისევ თურქეთის ჯარის სარდლისათვის მიემართა,

¹ ნ. ასათიანი, დასახ. ნაშრ., გვ. 59.

² თ. უორდანი, ქრონიკები, I, გვ. 481.

³ ქართლის ცხოვრება, IV, გვ. 838.

⁴ ქართლის ცხოვრება, IV, გვ. 838.

⁵ იქვე.

რომელიც წარმოშობით ქართველი ყოფილა (ბერი ეგნატაშვილის მიხედვით, ეს ასლან-ფაშა იყო სამცხის მთავრის როსტომ-ფაშის შვილი); დარეჯანმა მას თავისი ნათესავიც კი შერთო ცოლად, რომ ტყვეობიდან ეხსნა თავი.

დიდალი ფულის მიღებისა და დანათესავების შემდეგ ასლან-ფაშა თურქთა ჯარით გადავიდა იმერეთში, ტყვეობიდან გაათავისუფლა დარეჯან დედოფალი მის ძმისწულ ქეთევანთან ერთად და თავისთან იახლა. ამის შემდეგ დარეჯან დედოფალი თურქეთის დახმარებით ტახტის დაბრუნებას ცდილობს.¹ მან ფაშას 20000 მარჩილი აღუთქვა, თუ მას და მის ქმარს უსინათლო ვახტანგ ქუქუნიას-შვილს გაამეფებდა. 1668 წელს ახალციხის ფაშა მართლაც ჩავიდა იმერეთში თურქთა ჯარით. მას მიეგებნენ დადიან-გურიელი და სეხნია ჩხეიძე. ბაგრატ IV ლეჩხუმში გადაიხვეწა. იმერეთის ტახტზე კვლავ „დასვეს დარეჯან და ვახტანგ მეფედ“, ხოლო ოსმალთ „მოსრნეს, მოსტყუევენეს იმერეთი, შემუსრნეს მრავალნი ხატნი და ჯუარნი, მოწუეს ქუეყანანი და ეკლესიანი“.² თურქთა ჯარი აუარებელი ტყვიით დაბრუნდა უკან.

ქუთაისში დარეჯან დედოფლის გამეფების შესახებ ფარსადან გორგიჯანიძეც გვაწვდის შემდეგ ცნობას: „დარეჯან დედოფალი ახალციხეს იყო და თავისი ძმისწული ქეთევან დედოფალი გვერც იახლა და მრავალი მურასა იარალი და თვალ-მარგალიტი ჰქონდა, ფაშას ქრთამათ მისცა და ბაგრატს იმერეთი წაართვეს, დარეჯან დედოფალს მისცეს, ბაგრატ ლეჩხუმს გაეცალა“.³ თურქთა ჯარის მიერ იმერეთის სასტიკად დარბევისა და აოხრების ფაქტს ბაგრატ მეფის და იმერეთ-რაქა-ლეჩხუმის სარდალი დიმიტრიც აღნიშნავს 1669 წელს რუსეთში გაგზავნილ წერილში: „...და ქუთათის, დიდი დედაქალაქი, ციხე და მონასტერი თათრითა და შოლით სავსე იყო და პატიოსანი ხატი და ჯვარი დასთხარეს. ოქრო და ვერცხლი დაადვენეს და თან წაიღეს და ზოგი წაასვენეს და სასახსროდ დაატყვევეს“.⁴

¹ ნ. ასათიანი, მასალები XVII საუკუნის საქართველოს ისტორიისათვის, თბ., 1973. გვ. 50—51; „ქართლის ცხოვრების“ მიხედვით დარეჯანი დიმიტრის ძე ქეთევანის ოლთისს იმყოფებოდნენ. იხ. ქართლის ცხოვრება, II, 1959, გვ. 427; ხოლო მაკარიძის და პავლე აღმაშენებლის გადმოცემით დარეჯანი და ქეთევანი არზრუმში იმყოფებოდნენ.

II. Жузе. Грузия в XVII столетии по избр. патриарха Макария, стр. 17.

² ქართლის ცხოვრება, IV, გვ. 838.

³ ფარსადან გორგიჯანიძის ისტორია, გვ. 65.

⁴ М. Броссе. Переписка..., გვ. 84—87.

დარეჯან დედოფალს დიდხანს არ უმეფია. ბაგრატ IV-ის მომხრეთ, გენათელის მეთაურობით, მას მიუჩინეს ხოსია ლაშხიშვილი, რომელიც დარეჯან დედოფალმა იშვილა ჩვეულების თანახმად ძუძუზე კბილის დადებით და ფიცის წარმოთქმით; ამის შემდეგ დედოფალი ხოსიას ენდობოდა, მაგრამ მან ფიცი გატეხა და დედოფალი შუბით განგმირა, იქვე მოკლეს დედოფლის მეუღლე, უსონათლო ვახტანგ ჭუჭუნიას შვილი (1668 წ.).¹ ამ ფაქტს ფარსადან გორგიჯანიძეც ადასტურებს.²

დარეჯან დედოფლის სიკვდილის შემდეგ იმერეთის წარჩინებულმა ფეოდალებმა ბაგრატ IV-ც არ ინდომეს ტახტზე. მათ „მოიყვანეს გურიელი დემეტრე და დასვეს მეფედ“³ (1668 წ.); თუმცა მათი არჩეული მეფეც ვერ მომაგრდა ტახტზე — ისევ იმ ფეოდალებმა, რომელთაც დედოფალი მოკლეს, „შემდგომად მცირედისა ჟამისა შეიპყრეს დემეტრე გურიელი იმერთა, აღმოხადნეს თუალნი და განაძეს“⁴ (1669 წ.). ახალციხის ფაშამ გურიელად დასვა გორგი ქაიხოსროს ძე,⁵ ხოლო ბაგრატ IV-მ ისევ დაიბრუნა იმერეთის ტახტი (1669 წ.).

ახლად გამეფებულ ბაგრატ IV-ს კვლავ არ დაემორჩილნენ სახლთუხუცესი სეხნია ჩხეიძე, ლევან III დადიანი და გორგი გურიელი; სეხნია ჩხეიძემ ახალციხის ფაშის ჯარი ჩამოიყვანა და ქუთაისის ციხეში ჩააყენა. ამის შემდეგ ქუთაისის ციხეში მუდმივად იყო ოსმალთა გარნიზონი; მისი განდევნა მხოლოდ XVIII საუკუნის 70-იანი წლების დასაწყისში მოხერხდა.⁶

ბაგრატ მეფესა და მის მოწინააღმდეგე პარტიას შორის ბრძოლა გარდუვალი გახდა. იმავე წელს (1669 წ.) სეხნია ჩხეიძემ შეკრიბა თავისი მომხრე ჯარი, მოკავშირედ იხმო ლევან დადიანი და გაემართა ბაგრატის წინააღმდეგ; თავის მხრივ, ბაგრატ IV-მ შემოიკრიბა რაჭა-ლეჩხუმ-ოკრიბის ჯარი; ბრძოლა მოხდა ჩხარს; ამ ბრძოლაში სეხნია ჩხეიძე მოკლეს, ხოლო ლევან დადიანი „ივლტოდა ოდიშსავე, და დაიპყრა ბაგრატ უმეტესად იმერეთი“.⁷

ლევან დადიანმა ორი წლის შემდეგ კვლავ გამოილაშქრა ბაგრატის წინააღმდეგ. იმერეთის თავადთა უმრავლესობა დადიანის

¹ ქართლის ცხოვრება, IV, გვ. 839.

² ფარსადან გორგიჯანიძის ისტორია, გვ. 65.

³ ქართლის ცხოვრება, IV, გვ. 839.

⁴ იქვე.

⁵ იქვე.

⁶ საქართველოს ისტორიის ნარკვევები, ტ. IV, 1973, გვ. 353.

⁷ ქართლის ცხოვრება, IV, გვ. 840.

მხარეზე გადავიდა, ბაგრატი მეფე იძულებული გახდა რაქაში წასულიყო.¹ მან შემოიკრიბა რაქა-ლენხუმის ჯარი და „რაოდენიმე იმერნი.“ ბრძოლა მოხდა გეგუთში (1671 წ.). ამ ბრძოლაში დადინი ისევ დამარცხდა: „მოსრნეს სპანი მისნი და ლტოლვილი დადინი შეიპყრეს კვალად და მის-თანა მრავალნი სხვანი.“²

დატყვევებული დადინი ბაგრატი ფიცით შემოიმტკიცა (ვინაიდან „ჰყვა მისი და ცოლად დადინსა“)³ და ოდიშში გაუშვა. გიორგი გურიელი, როგორც ზემოთ აღვნიშნეთ, „ეტრფიალებოდა“ ლევან III-ის ნაცოლარს, იმჟამად ბაგრატი IV-ის ცოლს ულამაზეს თამარს და უნდოდა მისი წართმევა. მან ახალციხის ფაშას დიდძალი ქრთამი მისცა „რათა წაგვაროს ბაგრატი მეფესა (თამარი) და მისცეს მას“. ამასთან ერთად, „შეასმინა“ მის წინაშე ბაგრატი მეფე. 1672 წელს გურიელი თურქთა ჯარით იმერეთში შემოიჭრა.

გიორგი გურიელმა და ახალციხის ფაშამ უსინათლო ბაგრატი მეფე დაამარცხეს და ტყვედ ჩაიგდეს.

გიორგი გურიელი საწადელს მაინც ვერ ეწია, ვინაიდან ბაგრატიმ დედოფალი თამარი კვარას ციხეში გახიზნა, რის აღებაც თურქებმა ვერ შეძლეს.⁴

ბაგრატიმ „ფაშას აღუთქვა დიდი ქრთამი, რათა ჰყოს იგივე მეფედ.“⁵ ფაშამ „მიიღო მეფისა და გურიელისაგან ქრთამი დიდი, მისცა იმერეთი ბაგრატსავე,“⁶ ხოლო ბაგრატიმ მას მძევლად მისცა თავისი უკანონო ძე ალექსანდრე.⁷

იმერეთში ლაშქრობის შემდეგ ახალციხის ფაშა თურქთა ჯარით გიორგი გურიელთან ერთად ოდიშის სამთავროს შეესია და შინაომებით ისედაც გაპარტახებული მხარე მთლად აიკლო. ჟან შარდენი, რომელიც ამ დროს (1672 წ.) სამეგრელოში იმყოფებოდა, აღნიშნავს: „ჩემს გაოცებას და მწუხარებას საზღვარი არა ჰქონდა, როდესაც გავიგე, რომ თურქები და გურიის მთავარი თავიანთი ჯარებით სამეგრელოს დასალაშქრავად მოეშურებოდნენ, თითოეულ მათგანს იარაღი აელო ხელში და იწყებდა ბრძოლას; ისინი ძარცვავდნენ თავიანთ მეზობლების სახლებს და ყველგან, სადაც

¹ ქართლის ცხოვრება, IV, გვ. 840.

² იქვე.

³ იქვე.

⁴ იქვე, გვ. 841.

⁵ იქვე.

⁶ იქვე.

⁷ იქვე.

კი წააწყდებოდნენ, იტაცებდნენ ადამიანებს და პირუტყვს.¹ უან შარდენი, რომელიც იძულებული გახდა მეგრელებთან ერთად გახიზნულიყო, თავისი თვლით ნანახს ასე გადმოგვცემს: „მძიმე სანახავი იყო, თუ როგორ გარბოდა ეს უბედური ხალხი. დედაკაცებს მიჰყავდათ ბავშვები და მიჰქონდათ ფუთები, მამაკაცებს კი ბარგი. ერთნი საქონელს მიერეკებოდნენ, მეორენი საოჯახო ნივთებით სავსე ურიაკას მიაგარებდნენ. გზაზე გვსვდებოდა სულაგამოღებული ცოცხალ-მკვდარი ადამიანები. გვხვდებოდნენ მოხუცები, პატარა ბავშვები, რომლებსაც სიარული არ შეეძლოთ და საშინელი კვნესა-ტირილით ითხოვდნენ შველას.“² უფრო საზარელი სანახავი იყო, რომ ერთ-ერთ ციხეში შეხიზნულ ხალხს ოსმალებმა მცველები დაუყენეს, „ოცდახუთი მონა და რვაასი ეკიუს“ მიცემა მოსთხოვეს,³ ყველა ოჯახიდან, სადაც ოთხი ბავშვი ჰყავდათ, ერთი მათ მიჰყავდათ. ეს იყო მეტად გულსაკლავი სანახაობა, როგორ გლეჯდნენ დედას მკლავებიდან საბრალო ბავშვებს, კრავდნენ მათ ორ-ორად და მიჰყავდათ თურქებთან.“⁴

უან შარდენის გადმოცემით „რუხის (ციხესთან) ოთხი დღის დგომის შემდეგ, თურქებმა ორი ათასზე მეტი ტყვე წაიყვანეს და დიდი ნადავლით წავიდნენ.“⁵

1674 წელს პატრი ძამპი რომს გაგზავნილ წერილში წერს: „სამეგრელო სამეგრელო აღარ არის, ჩადგან ომების გამო უკანასკნელ სიგლახაქეშია ჩავარდნილი, დაქცეული და აოხრებულია. აღარავის ჰყავს საქონელი და ყველას სარჩო აკლია... ახლა კაცს აღარ შეუძლია უშიშრად იყოს.“⁶

თურქთა წასვლის შემდეგ (1672 წ.) ბაგრატ მეფემ იმავე წელს „შურისგების მიზნით“ გაილაშქრა გურიელის წინააღმდეგ, დაამარცხა, ააოხრა გურია და ალაფით დატვირთული ქუთაისში დაბრუნდა.⁷

1674 წელს ბაგრატ მეფემ ქუთაისის ციხე აიღო, სადაც ოსმალთა გარნიზონი იყო ჩაყენებული. ციხის დაკარგვით თურქეთი კარგავდა ძირითად დასაყრდენს იმერეთში, ამიტომ ახალციხის ფაშამ

¹ უან შარდენის მოგზაურობა სპარსეთსა და აღმოსავლეთის სხვა ქვეყნებში, ფრანგულიდან თარგმნა მზია მგალობლიშვილმა, თბ., 1975, გვ. 206.

² იქვე, გვ. 231.

³ იქვე, გვ. 250.

⁴ იქვე.

⁵ იქვე.

⁶ მ. თამარაშვილი, კათოლიკობა ქართველთა შორის, თბ., 1902, გვ. 204.

⁷ ქართლის ცხოვრება, IV, გვ. 841.

ბაგრატს შიველად წაყვანილი ტახტის მემკვიდრის — ალექსანდრეს დაბრუნება. ალუთქვა, თუ ქუთაისის ციხეს უკან დაუბრუნებდა. იმერნი თათბირის შემდეგ ამ პირობაზე დათანხმდნენ და ციხე ისევ თურქებს გადასცეს.¹

ალექსანდრე III გარდაცვალების შემდეგ მძიმე საშინაო მდგომარეობის გამო იმერეთ-რუსეთის ურთიერთობა ერთხანს შეწყვეტილი იყო, მაგრამ დარეჯან დედოფალყოფილმა, რომელიც ახალციხის ფაშას საპატიო ტყვედ ითვლებოდა, 1667 წელს ახალციხიდან რუსეთში ელჩად გაგზავნა თავადი ივანე ჭიჭინაძე ერთი კაცის თანხლებით. ყოფილი დედოფალი რუსეთის სამეფო კარს თხოვდა, რომ ერეკლე ბატონიშვილს გამოქომაგებოდა ირანის შაჰთან, რათა ერეკლე თავის სამემკვიდრეოზე დაებრუნებია. რუსეთის სამეფო კარმა თხოვნა არ შეისმინა და დედოფლის ელჩი 1668 წელს გულცივად გაისტუმრეს საქართველოში.²

იმავე 1667 წელს იმერეთის მეფის ბაგრატ IV-ის ოთხკაციანი ელჩობა ეწვია რუსეთის სამეფო კარს. მათ მეფე ალექსი მიხეილის ძეს მიართვეს ბაგრატ IV წერილი, სადაც აღნიშნული იყო ალექსანდრე მეფის გარდაცვალების შემდეგ დატრიალებული ტრაგედია და მოახსენეს, რომ იმერეთის მეფე ბაგრატ IV რუსეთის ქვეშევრდომობაში აყვანასა და მტრების წინააღმდეგ დახმარების გაწევას სთხოვდა და რუსეთის ხელისუფლება რომ დაეინტერესებია, იმერთა მეფე ელჩების გაგზავნას და დასავლეთ საქართველოს დათვალიერებას ურჩევდა.³

იმერეთის ელჩობა დიდ პატივისცემით მიიღეს, სათხოვარი მოისმინეს, საპასუხო ელჩობის გაგზავნას დაპირდნენ და დიდად დასაჩუქრებული სამშობლოში გამოისტუმრეს 1668 წელს.⁴

საქართველოში დაბრუნებულ ელჩებს დარეჯან დედოფალი ქმრითურთ მკვდარი, ხოლო ბაგრატი ისევ მეფის ტახტზე მჯდომი დახვდათ.

როგორც ჩანს, დარეჯან დედოფლის ელჩობის ყოფნამ რუსეთში, იმერეთის მეფის მომხრეთა პარტია დიდად შეაშფოთა, მათი ვარაუდით შესაძლებელი იყო რუსეთს იმერეთის ტახტზე ერეკლე ბატონიშვილი გამოეგზავნა. ეს რომ არ მომხდარიყო, ბაგრატ მე-

¹ ქართლის ცხოვრება, IV, გვ. 841.

² დაწვრილებით იხ. დ. კაჭარავა, „საქართველოს პოლიტიკური მდგომარეობა და რუსეთთან ურთიერთობის საკითხები XVII ს. II ნახევარი, საკანდიდატო დისერტაცია, თბ., 1968.

³ თ. ტივაძე, დასახ. ნაშრ., გვ. 362—364.

⁴ იქვე, გვ. 364—366.

ფემ იმავე 1668 წელს ისევ აწვია რუსეთის სამეფო კარს 26 კაციანი შემდგარი ელჩობა. ეს ელჩობა 1669 წელს ჩავიდა მოსკოვში, სამეფო კარს მოახსენა დასავლეთ საქართველოში შექმნილი მძიმე პოლიტიკური მდგომარეობა და სამხედრო დახმარება სთხოვა.¹

იმერეთის ელჩობამ 13 თვე დაჰყო გზაში. ამ დაყოვნებას თ. ტივაძე იმერეთის მეფისადმი რუსეთის უარყოფითი დამოკიდებულებით ხსნის, რასაც ერეკლე ბატონიშვილს მიაწერს, რომელმაც მიადწია მას, რომ რუსეთის სამეფო კარს ბაგრატ IV იმერეთის კანონიერ მეფედ არ ეცნო.²

როგორც თ. ტივაძე წერს, ბაგრატის პირველი ელჩობის ჩასვლამ რუსეთში საფუძვლიანად შეარყია ბატონიშვილის იმედები. ამიტომ მას არ სურდა ბაგრატის დაკავშირება რუსეთთან. «ერეკლე ჯერ კიდევ ალექსანდრე III-ის სიცოცხლეშივე იყო მიჩნეული იმერეთის ტახტის მემკვიდრედ, მაგრამ სანამ რუსეთის დახმარებით კახეთის ტახტის დაბრუნების იმედი კიდევ არსებობდა, იმერეთში წასვლის საკითხი ისე მკვეთრად არ იდგა ერეკლეს წინაშე. 1660—1666 წლებში თუშეთში ყოფნამ და ვახტანგ V-ის მედგარმა წინააღმდეგობამ საბოლოოდ დაარწმუნა კახი უფლისწული, რომ ამ გზით მისი სამშობლოში ჩამოსვლა შეუძლებელი იყო. ამიტომ 60-იანი წლების მიწურულში იმერეთში გაემეფება სამკვიდროს დაბრუნების ერთადერთ რეალურ საშუალებად იქცა და ერეკლემ უკვე მეტი ინტერესით ეკიდებოდა ამ საკითხს».³

1669 წლისათვის პოლიტიკური სიტუაცია ერეკლე ბატონიშვილის სასარგებლოდ შეიცვალა. ამ დროისათვის ირან-რუსეთის ურთიერთობა თანდათან გაუარესდა. ამის ერთ-ერთი მიზეზი ქართველი უფლისწულის რუსეთის სამეფო კარზე ყოფნა იყო. ამას კარგად გრძობდნენ რუსეთის პოლიტიკური მესვეურნი და ცდილობდნენ ერეკლე ბატონიშვილის გარიდებას რუსეთის საზღვრებიდან.

ამ დროისათვის ერეკლე ბატონიშვილიც სურვილს გამოთქვამდა სამშობლოში დაბრუნებისას. როგორც ზემოთ აღვნიშნეთ, იგი იმერეთის ტახტის დაკავებაზეც არ ამბობდა უარს. რუსეთის დიპლომატია ერეკლეს რუსეთიდან წასვლით ირანის გულსაც იგებდა და ბატონიშვილის სურვილსაც აკმაყოფილებდა. ამიტომ ბაგრატ

¹ დასახ. ნაშრ. გვ. 367;

² იქვე. გვ. 167; დ. კაკარავა, დასახ. ნაშრ., გვ. 190—192.

³ იქვე, გვ. 367.

IV-ის ელჩების ბედი ერეკლე ბატონიშვილს მთანდეს გადასაწყვეტად¹

ერეკლე ბატონიშვილმა იმერთა მეფის პირველ ელჩს მიტროპოლიტ ევდემონს დარეჯან დედოფლის მოკვლაში მონაწილეობის მიღება, ხოლო მეორე ელჩს ეზეკიელს, როგორც კახელი ბაგრატიონების ყოფილ აზნაურს, ღალატი და მტრულ ბანაკში გადასვლა წაუყენა ბრალდებად.

რუსეთის სამეფო კარი არ მოერიდა საერთაშორისო ნორმების დარღვევას და იმერეთის 26 კაციანი ელჩობა-რუსეთის შორეულ მონასტრებში პატიმრობაში გაგზავნეს. ამ აქტით რუსეთის სამეფო კარი ბაგრატი IV-ეს არ ცნობდა იმერეთის მეფედ და გზას მეფობისაკენ ერეკლე ბატონიშვილს უკაფავდა², თუმცა ამას რაიმე შედეგი არ მოყოლია.

იმერეთში არეულობა ისევ გრძელდებოდა, ბაგრატი IV ისევ ჩიხში მოემწყვდა. არჩილ მეფე ახალციხიდან, ხოლო გიორგი გურიელი გურიიდან ცდილობდნენ იმერეთის ტახტის დაპყრობას.

ასეთ ვითარებაში ბაგრატი IV-ემ გადაწყვიტა, როგორმე შემოემტკიცებინა და თავის მოკავშირედ გაეხადა გიორგი გურიელი. ამიტომ თავისი ქალიშვილი დარეჯანი, „ნაშობი თამარისაგან“, ცოლად მისცა გურიელს 1674 წ. ამით მეფეს იმედი ჰქონდა, რომ გურიელი დაანებებდა თავს თამარის ტრფიალს და მას შემოირიგებდა, მაგრამ ტახტის დაკარგვის საშიშროება მან მაინც ვერ აიცილა.

1678 წელს ახალციხის ფაშის, ოდიშის მთავარ ლევან III დადიანისა და იმერეთის თავადების დახმარებით არჩილ მეფემ კვლავ დაიკავა იმერეთის ტახტი. ბაგრატი მეფემ თავის სიძეს — გიორგი გურიელს მიაშურა, ხოლო ცოლი — თამარი სკანდის ციხეში დატოვა.

¹ ამ საკითხის შესახებ დ. კაჭარავა წერს „...შეიძლება ვიფიქროთ, ერეკლე ბაგრატის წინააღმდეგ იმითომ მოქმედებდა, რომ არჩილისათვის შეემზადებინა ნიადაგი იმერეთში გასამეფებლად. ბაგრატი არჩილის მოწინააღმდეგე იყო და ერეკლეს არ სურდა რუსეთს მხარი დაეჭირა და მფარველობის ხელი გაეწოდებინა ბაგრატისათვის“, დ. კაჭარავა, დასახ. ნაშრ., გვ. 192—193.

ამ საკითხის შესახებ ჩვენ დ. კაჭარავას მოსაზრება უფრო საფუძვლიანი გვეჩვენება ორი გარემოების გამო: 1. არჩილი ერეკლეს სიძეა და რა გასაკვირია, რომ სიძისათვის იმერეთის მეფის ტახტი გამოენათავისუფლებია და თუკი არჩილი იმერეთის ტახტს იშოვიდა და კახეთის ტახტი განთავისუფლდებოდა, ამის შემდეგ ერეკლე ბატონიშვილს შეეძლო მის დასაკავებლად ებრძოლა.

² თ. ტივაძე, დასახ. ნაშრ., გვ. 368—369.

არჩილ მეფემ გამოიყვანა ციხიდან თამარ დედოფალი და ისევ თავის პირველ ქმარს ლევან III დადიანს დაუბრუნა.¹

ბაგრატ მეფემ და გიორგი გურიელმა დახმარებისათვის ხონთქარს მიმართეს; ოსმალთ საჭიროდ სცნეს ისევ ბაგრატის გამეფება და არზრუმის ფაშას დაავალეს წესრიგის დამყარება იმერეთში.

არზრუმის ფაშა ახლანი თურქთა ჯარით იმერეთში შეიჭრა. მას თან ახლდნენ ბაგრატ მეფე და გიორგი გურიელი; იმერელმა თავადებმა კვლავ უღალატეს არჩილ მეფეს და ბაგრატის მხარეზე გადავიდნენ. 1679 წლის აგვისტოში ბაგრატმა კვლავ დაიკავა იმერეთის ტახტი², ხოლო არჩილმა რაჭას შეაფარა თავი. ლტოლვილ მეფეს ფეხდაფეხ მიყვა ოსმალთა ჯარი. მიუხედავად დიდი წინააღმდეგობისა, რიცხობრივმა უპირატესობამ თავისი გაიტანა და რაჭველნი დამარცხდნენ: „რაჭა, რომ მისდღეში არავისაგან დარბეულიყო, ურუმთ დაარბივეს და მრავალი კაცი მოკლეს და ტყვე წამოასხეს“.³

1681 წელს გარდაიცვალა უსინათლო ბაგრატ IV. მას კანონიერი მემკვიდრე არ დარჩენია, ხოლო უკანონო შვილი ალექსანდრე ქართლში პყავდა ტყვედ გიორგი XI-ს, ამით ისარგებლა გიორგი გურიელმა და იმერეთის ტახტი დაიკავა (1681 წ.). თავისი მეფობის დასაწყისი მან იმით აღნიშნა, რომ გაუშვა თავის კანონიერი ცოლი, ასული ბაგრატ მეფისა და თამარისა — დარეჯანი და ცოლად შეირთო თავისი სიღვდრი დედოფალი თამარი.

ამ ფაქტს ფარსადან გორგიჯანიძე ასე აღნიშნავს: „გურიელმან სწვალა ღმერთი და ჰგმო თავისი რჩული და ნაქორწილვეი ცოლი გაუშვა და თავისი სიღვდრი ცოლად შეირთო“.⁴

რაც დრო გადიოდა, გურიელის წინააღმდეგ უკმაყოფილება თანდათან იზრდებოდა. იმერთა თავადების ერთი ჯგუფი ახალციხის ფაშას ეახლა და ხონთქართან იშუამდგომლა, რათა იმერეთის ტახტზე ალექსანდრე ბაგრატის ძე გაემეფებინათ. ხონთქარის ბრძანებით 1683 წელს ალექსანდრე გადმოიყვანეს ქართლიდან და იმერეთის ტახტზე დასვეს ალექსანდრე IV-ის სახელწოდებით.⁵ გურიელმა ისევ გურიას მიაშურა, ხოლო მისი ცოლი თამარი ოდიშში წავიდა (როგორც იქაური ყოფილი დედოფალი), რათა აემხედრე-

¹ ქართლის ცხოვრება, IV, გვ. 843.

² ფარსადან გორგიჯანიძის ისტორია, გვ. 68.

³ იქვე.

⁴ იქვე, გვ. 69;

⁵ ქართლის ცხოვრება, IV, გვ. 846.

ბინა ოდიშარნი, რომ ალექსანდრე მეფეს არ მიმხრობოდნენ და მხარი დაეჭირათ გიორგი გურიელისათვის, მაგრამ მიზანს ვერ მი-
აღწია, რადგან თვით იმავე წელს (1683 წ.) გარდაიცვალა ოდიშში.

როგორც ზემოთ აღვნიშნეთ, 1683 წელს, სულთანის ნებარ-
თვით, იმერეთის ტახტზე ავიდა ბაგრატ IV-ის უკანონო შვილი
ალექსანდრე IV, რომელიც ღვიძლი შვილი იყო იმ საშინელი არეუ-
ლარევისა და ზნეობრივი დაცემისა. ვახუშტის დახასიათებით, იგი
იყო „მხნე, ახოვანი, ჰაეროვანი“, ბრძოლაში მამაცი, უხვი და იმავე
დროს ყოვლად დაუნდობელი და ტყვის მსყიდველი,¹ ალექსანდრემ
დაიახლოვა სეხნია ჩხეიძის შვილი სვიმონ ქუთათელი, მღვდელ-
მთავარი, მაგრამ „უწირავ-ულოცავი, მეძავ-მემრუშე, კაცის მკვლე-
ლი და ტყვის მსყიდველი.“²

ბერი ეგნატაშვილი ალექსანდრე IV-ეს ასე ახასიათებს: „იყო
ესე კაცი შეუგვარი და უღირსი ბატონობისა.“³

ალექსანდრე IV-ს იმერეთის დიდი თავადების მხარდაჭერა
სჭირდებოდა; ერთ-ერთი ასეთი თავადი იყო პაატა აბაშიძე, რო-
მელსაც „მორჩილებდნენ სრულიად მარგველნი.“⁴ ალექსანდრემ
შემომტკიცების მიზნით პაატა აბაშიძეს ცოლად შერთო თავისი
და დარეჯანი — გიორგი გურიელის ნაცოლარი; პაატა აბაშიძე
იყო გიორგი მიქელაძის — ერთ-ერთი ძლიერი თავადის, დისწული,
ამ მოყვრობით მეფემ იმერეთი შემომტკიცა, მაგრამ სხვა გავლენ-
იანმა ფეოდალებმა — შოშიტა რაჭის ერისთავმა და ბეჟან ლორ-
თქიფანიძემ „არ ინებეს მეფობა ალექსანდრესი“ და მის წინააღ-
მდეგ კოალიცია შექმნეს, მათ მიიმხრეს ლიპარტიანი (რომლის
გეგმაში მეფის დასუსტება შედიოდა), შეყარეს ჯარი და შეუერთ-
დნენ გურიელს, რომელსაც გეგმაში იმერეთის ტახტის დაკავება
ჰქონდა; მასვე შეუერთდნენ ჩიჯავაძენი.⁵

ალექსანდრეს მხარეზე იყვნენ: პაატა აბაშიძე, გიორგი მიქე-
ლაძე და სვიმონ ქუთათელი.⁶

გიორგი გურიელი თავისი ჯარით იმერეთში შემოვიდა, მას შე-
უერთდნენ დანარჩენი მოკავშირეებიც.

ბრძოლა მოხდა 1684 წელს, როკითს; გამარჯვება ალექსანდრე
მეფეს დარჩა; მის მომხრეთაგან დაიღუპა ლევან აბაშიძე, ხოლო
პაატა აბაშიძე სასიკვდილოდ დაიჭრა; გიორგი გურიელი და შოშიტა

¹ ქართლის ცხოვრება, IV, გვ. 857.

² ქართლის ცხოვრება, II, 1959, ვგ. 442.

³ ქართლის ცხოვრება, IV, გვ. 847.

⁴ იქვე.

⁵ იქვე.

რაჭის ერისთავი ბრძოლის ველზე დაეცნენ, ხოლო გიორგი ლიპარტიანიმა თავს გაქცევით უშველა.

მეფემ ტყვედ ჩაივარდნილნი გურულ-იმერ-ოდიშარნი „ვერცხლზე დაპყიდნა“.¹ მართალია, ამ ბრძოლაში ალექსანდრემ გაიმარჯვა, მაგრამ აშლილობა და ტყვეთა სყიდვა კიდევ უფრო გაძლიერდა.

როკითის ბრძოლის შემდეგ მოკავშირეთა ძებნაში ალექსანდრე მეფემ ქართლის მეფეს გიორგი XI-ს მოციქული გაუგზავნა და ქალიშვილი სთხოვა ცოლად, მაგრამ იგი დავით ერისთავზე აღმოჩნდა დანიშნული; მაშინ ალექსანდრემ გიორგის ძმისშვილი — ლუარსაბის ასული ელენე სთხოვა ცოლად, მაგრამ ეს საქმე რაჭის ერისთავმა პაპუნამ ჩაშალა, ვინაიდან „მოყვრობდა გიორგი მეფე და იყო მეგობარი პაპუნასი“. გაბრაზებულმა იმერთა მეფემ (რომის ქართლის მეფემ სიძედ დაიწუნა) ჯავრის ამოყრა პაპუნა რაჭის ერისთავზე ისურვა. შეკრიბა დიდი ჯარი და საერისთავოს დასარბევად წავიდა, „ანუ დაიმორჩილოს ანუ მიუღოს რაჭა“.²

იმერთა მეფის ჯარი პაატა აბაშიძის სარდლობით ნინიას ციხეს შემოერტყა, ხოლო ჯარის ნაწილმა მრავალი სოფელი ააოხრა და გადაწვა...

გიორგი XI-მ პაპუნა ერისთავს ქართლის ჯარი მიაშველა ზაალ ხერხეულიძის სარდლობით. პაატა აბაშიძემ თავი აარიდა ქართლებთან ბრძოლას, მეფე ალექსანდრე დაიყოლია და ისევ უკან დაბრუნდნენ იმერეთში.³

ქართლის მეფე გიორგი XI თავისი მამის — ვახტანგ V-ის პოლიტიკას აგრძელებდა და კიდევ მეტად მიისწრაფოდა დამოუკიდებლობისაკენ; იგი სპარსეთის შაჰის დავალებებს ნაკლებად ასრულებდა. ამიტომ ირანის მბრძანებელი მიზეზს ეძებდა ტახტიდან გიორგის გადაყენებისათვის. მიზეზიც ბევრი დაგროვდა და 1688 წელს ირანის შაჰმა გიორგი ტახტიდან გადააყენა; ახალ მეფედ მან გამოგზავნა ერეკლე I დავითის ძე — ნაზარალიხანის სახელწოდებით (თეიმურაზ I-ის შვილიშვილი).

გიორგი XI-მ თავი რაჭის ერისთავს პაპუნა II-ეს (1684—1696) შეაფარა. ალექსანდრე იმერთა მეფემ შოშიტას უბრძანა „არ შეხიზვნა“ გიორგი მეფისა (რადგან გიორგიმ არ ისურვა ალექსანდრეს მზახლობა). რაჭის ერისთავმა არ შეასრულა მეფის ბრძანება,

¹ ქართლის ცხოვრება, IV, გვ. 847, მარი ბროსე, დასახ. ნაშრ., გვ. 208.

² მარი ბროსე, დასახ. ნაშრ., გვ. 209.

³ ქართლის ცხოვრება, IV, გვ. 848, მარი ბროსე, დასახ. ნაშრ., გვ. 208.

ამიტომ იმერთა მეფემ შეკრიბა ჯარი და რაჭას შეესია; რაჭა-ლენხუმის ხალხი ალექსანდრე მეფის მხარეზე დადგა. „ლტოლვილნი“ პაპუნა ერისთავი და ქართლის მეფე გიორგი XI ზემო რაჭის ერთ-ერთ სოფელში — გლოლაში ავიდნენ: „ვერ წინ-აღუდგნენ გიორგი მეფე და პაპუნა და შევიდნენ გლრლას, მივიდნენ სპანი ალექსანდრესნი და მოწუეს უწერა“.¹

რაჭის დარბევის შემდეგ ალექსანდრე მეფე იმერეთში დაბრუნდა, ხოლო პაპუნა ერისთავმა ისევ დაიპყრო რაჭა და „მოსწყვიტა მტერნი თვისნი და იყოფოდა თვისად“.²

გიორგი XI რუსეთში გადახვეწილ ძმას — არჩილს დაუკავშირდა და საქართველოში ჩამოსვლას ურჩევდა იმერეთის ტახტის დასაქავებლად.

როდესაც არჩილ-მეფე რუსეთში მიდიოდა, მას იმედი ჰქონდა რუსთ ხელმწიფის მიერ საქართველოს გამოხსნისა თურქთა კლანკებისაგან. არჩილ მეფე რუსეთის სამეფო კარს უმტკიცებდა, რომ საჭირო იყო საქართველო-რუსეთის საზღვარზე ციხე-სიმაგრეების აგება და 15 000 ჯარისკაცი, რომ თურქები განედევნათ იმერეთიდან. მაგრამ რუსეთმა არჩილს უარი უთხრა სამხედრო დახმარებაზე, მხოლოდ ფულადი დახმარება აღმოუჩინა 6 500 მანეთის რაოდენობით.³

1688 წელს არჩილ-მეფე რუსეთიდან საქართველოში გამოემგზავრა. „ოფიციალურად არჩილის გაშვება მოსკოვიდან გამოცხადებულ იქნა მის გამგზავრებად საკუთარ ქვეყანაში, თავის სამშობლოს გასაანთავისუფლებლად და თურქთა სამხედრო ვითარების გამოსაძიებლად“.⁴

არჩილ-მეფე რაჭაში მოვიდა და გველისთავს დადგა, მას მასპინძლობა რაჭის ერისთავმა გაუწია და დახმარებასაც შეჰპირდა. არჩილის ხელახლა გასამეფებლად იმერთა ტახტზე მოვიდნენ ოდიშის გამგებელი გიორგი ლიპარტიანი, ქილაძე-მიქელაძენი და ბეჟან ლორთქიფანიძე, ხოლო ალექსანდრეს მხარეზე დარჩნენ გიორგი აბაშიძე და სვიმონ ქუთათელი. შემოიკრიბა ალექსანდრე-მეფემ „სპანი და წავიდა გველისთავს მეფეთა ზედა“.⁵

არჩილ-მეფის მომხრეებმა შებრძოლება ველარ გაბედეს, ვინაიდან რაჭის ერისთავს „შინაგამცემი მრავალი ჰყვანდეს რაჭასა ში-

¹ ქართლის ცხოვრება, IV, გვ. 850.

² იქვე.

³ დ. გვრიტიშვილი, ნარკვევები საქართველოს ისტორიიდან, ტ. II, 1965, გვ. 466.

⁴ ვ. ტატიშვილი, ქართველები მოსკოვში, 1947, გვ. 105.

⁵ ქართლის ცხოვრება, IV, გვ. 851.

ნა“.¹ ხოლო გიორგი ლიპარტიანის მხრიდანაც გამოჩნდნენ მოღალატენი „ლეჩხუმელნი იყვნენ ალექსანდრეს კერძოდ და სპანიცა ალექსანდრესი მრავლობდნენ“.²

ამავე დროს ალექსანდრე მეფეს თურქთა ჯარმაც აღმოუჩინა დახმარება.³ ასეთ პირობებში მოკავშირეებმა გაცლა ამჯობინეს. არჩილ და გიორგი მეფენი ჯერ ოდიშში, შემდეგ აფხაზეთში გადავიდნენ, სადაც დიდებულად ისტუმრა შერვაშიძემ; „მოვეგება შერვაშიძე, ისტუმრა პატივით, ვითარცა მეფე და იყოფებოდა ზუფუს ქამ რაოდენმე“.⁴ ამ დროს არჩილ მეფეს სანდო კაცი ჰყავდა — გაგზავნილი ყირიმის ხანთან, რომელსაც შუამდგომლობა უნდა აღეძრა ხონთქართან იმერეთში არჩილის გამეფების შესახებ. როცა მან შეიტყო, რომ „ელჩმა“ მშვიდობით ჩააღწია ყირიმის ხანთან, არჩილ მეფე ისევ უკან მობრუნდა აფხაზეთიდან ოდიშს, მაგრამ ამ დროის განმავლობაში მდგომარეობა შეიცვალა — გიორგი ლიპარტიანსა და იმერთა მეფეს შორის დაზავება მოხდა.

როგორც ზემოთ აღვნიშნეთ, გიორგი ლიპარტიანი იყო „უღთო, ცრუ-ფიც, უპირო“. ალექსანდრე მეფემ მას ლეჩხუმი უწყალობა იმ პირობით, თუკი ის არჩილ მეფეს ჩამოცილდებოდა და ალექსანდრეს მხარეს დაიკავებდა. ლიპარტიანმა გასტეხა არჩილისადმი მიცემული ფიცი და ალექსანდრე მეფეს მიემბრო. ამიტომ არჩილ და გიორგი მეფენი ოდიშში ვეღარ გაჩერდნენ და მრვიდნენ საჭილაოსამიქელაოს, ვინაიდან სხვა გამოსავალი არ ჰქონდათ „მეფენი ეზრაზნენ ალექსანდრეს, რათა მისცეს გზა წარსლვისა“.⁵ ალექსანდრე მეფემ არჩილს მოსთხოვა „უკეთუ მომცე ფიცი არღარა მეცილო იმერეთსა, განგიტევებ და წარვედ რუსეთს, უკეთუ არა, არა გე გზა“.⁶ ვინაიდან სხვა ღონე აღარ ჰქონდა, არჩილ მეფემ მისცა ალექსანდრეს ფიცი ტახტზე არ „შეცილებისა“. ამის შემდეგ არჩილ მეფემ მიიღო გზა, რაჭაზე გავლით გადავიდა დიგორს და იქ დაბინავდა.

გიორგი მეფე გურიელის სტუმარი გახდა, მაგრამ მოკლე დროში მამია გურიელი დაარწმუნეს „ცრუ მოენეებმა“, რომ ნებავეს გურია გიორგი მეფესა თვისად“. ახალგაზრდა მთავარმა დაუჯერა მათ და „რომელნიმე შეიპყრნა და სხვანი უპატიო ჰყვნა“.⁷ ამის

¹ ქართლის ცხოვრება, IV, გვ. 851.

² იქვე.

³ მარი ბროსე, დასახ. ნაშრ., გვ. 210.

⁴ ქართლის ცხოვრება, IV, გვ. 851.

⁵ იქვე.

⁶ იქვე, გვ. 852.

⁷ იქვე.

მხილველი გიორგი მეფე წავიდა გონიას, მისმა მმართველმა აჰმედ-ბეგ თავდგირიძემ დიდი პატივით მიიღო, რამდენიმე ხნის შემდეგ გიორგი მეფე ახალციხის ფაშასთან გადავიდა და „მცდელობა“ იმერეთში არჩილის ისევ გაჰყვებდას.

დიგორს მყოფი არჩილი ყოველ ღონეს ხმარობდა, რომ ალექსანდრე IV გადაეგდო და თვითონ გამეფებულყო, ალექსანდრე კი დებდა ხონთქრის წინაშე, რომ ოცი წლის გადაუხდელ ხარკს გადაიხდიდა, თუკი მას გაამეფებდნენ იმერეთში.¹

ყირიმის ხანის ჩარევის შემდეგ ხონთქარი თითქოს დათანხმდა არჩილის გამეფებას და ფორმალურად გამოგზავნა საგანგებო პირი, „რათა ჰკითხონ იმერთა, რომელი ჰნებავსთ არჩილ ანუ ალექსანდრე“.² ეს მოციქული — ყაფუჩი იმერეთში მივიდა, მაგრამ ალექსანდრე მეფემ მისი მოსვლის მიზეზი რომ გაიგო, მოკვლა დაუპირა. ამის მცნობმა ყაფუჩმა სასწრაფოდ დატოვა იმერეთი და ახალციხეში გადავიდა, იქ გიორგი მეფე დახვდა და ერთობლივი თათბირის შემდეგ ყაფუჩმა ურჩია გიორგის: „მოსკრან ბეჰედნი ყოველთა წარჩინებულთა იმერთანი და დასხან სეინტატიკოსის წიგნსა ზედა არჩილსა-თვის“³. ამის შემდეგ ყაფუჩმა იკისრა ხონთქართან ყველა საქმის მოგვარება.

გიორგი მეფის ხელმძღვანელობით გამოსკრეს სამეფო ბეჰედი და ხელი მოაწერეს თხოვნაზე არჩილის სასარგებლოდ. ამის შემდეგ „მოსცა ხონთქარმან იმერეთი არჩილს, წარმოუვლინა ხრმალი და ხალათი“. ხოლო არზრუმის ფაშას უბრძანა (ვინაიდან ალექსანდრე უომრად არ დათმობდა იმერეთის ტახტს) ჯარით გადასულიყო იმერეთში და არჩილ მეფე დაესვა ტახტზე.

1690 წელს თურქთა ჯარი იმერეთში ზადავიდა და ფერსათის მინდორზე დაბანაკდა. ოსეთში (დიგორს) მყოფ არჩილ მეფეს ეს აცნობეს და იმერეთის ტახტზე მოიწვიეს. რაჭის ერისთავის ჯარის თანხლებით არჩილი იმერეთში ჩამოვიდა, „მთაიცივა არჩილ ხალათი ხონთქარისა და დაემორჩილნენ იმერნი თვინიერ გიორგი აბაშიძისა“⁴, ხოლო ალექსანდრე მეფემ შებრძოლება ვერ გაბედა და ლტოლვილი აღმოსავლეთ საქართველოში ერეკლე I-ს შეეხიზნა.

თურქთა ჯარის წასვლის შემდეგ გიორგი აბაშიძემ მოიმხრო ოდიშის მბრძანებელი გიორგი ლიპარტიანი და არჩილ მეფის წინააღმდეგ ბრძოლა იწყეს⁵ იმ იმედით, რომ ზამთარი იყო და თურქ-

¹ შარი ბროსე, დასახ. ნაშრ., გვ. 210—211.

² ქართლის ცხოვრება, IV, გვ. 852.

³ იქვე.

⁴ იქვე, გვ. 853.

⁵ იქვე.

თა ჯარი არჩილს ვერ დაეხმარებოდა, მათ ქართლში მყოფ ალექსანდრე მეფეს შეატყობინეს თავიანთი სამზადისი არჩილს წინააღმდეგ და სასწრაფოდ იმერეთში მოიწვიეს. მეფემაც არ დააყოვნა და დასავლეთში გადავიდა.

არჩილ მეფეს მხარში ამოუდგნენ პაპუნა რაჭის ერისთავი, სვიმონ ქუთათელი, გიორგი მიქელაძე და ბეჟან ლორთქიფანიძე.¹ ბრძოლა მოხდა გოდოგანში — „იქმნა ბრძოლა ძლიერი, იძლია ალექსანდრე და ივლტოდა ქართლს“².

ფარსადან გორგიჯანიძე ამ ამბავს შემდეგნაირად აღწერს: „ოდისისა და იმერეთის თავადებისაგან საფიცარა მოსვლოდა — მალწამოდიო, არჩილს გავადებო, ვითაც სიყმაწვილის სიჩქარე ახლდა, აღარც ყაენს აცნო და არც ქართლის მეფესა და გორიდან ილღარი ქნა და ქუთაისის სიახლოეს არჩილ მეფეს შეებნეს. უწინ კარგათაც იყვნენ, მაგრამ ამყობით და ყმათა მუხანათობით მეფე ალექსანდრეს დაუმარცხდა და იქივ გორს მოვიდა“³.

არჩილ მეფე ამ ბრძოლის ამბავს ასე აღწერს: „...დეკემბრიც ოცსა, წმინდის ეგნატე ღმერთ-შემოსილის დღეს, შევებენით და, ღმერთმა და მაგათმა სიმართლემ გაგვიმარჯვა და მრავალი ჩვენი ორგული კაცი მოკვდა და დავიჭირეთ, ის ალექსანდრე გაიქცა და იქვე ბატონიშვილს ნიკოლა დავითის შვილთან მივიდა“⁴. არჩილმა გამეფებისთანავე წესრიგის დამყარება სცადა, ფეოდალებს ძალად მიტაცებული მამულები ჩამოართვა და მათ წინანდელ პატრონებს დაუბრუნა. ამ ღონისძიებამ ბევრი ძლიერი თავადი გაუორგულა და ალექსანდრე მეფის მომხრეთა ბანაკში მოახვედრა. „იმერეთის უბატონობაში ვისაც თავისის ძალით სხვათ მამული დაეჭირა, რასაც დღეს არჩილი გამეფდა, ყველას თავისი სამკვიდრო მამულები უბოძა“.

ასეთი ღონისძიებით არჩილი ფიქრობდა წესრიგის აღდგენას, მაგრამ პატრიოტთა რიგები ამ დროს შემცირებული იყო. თუმცა იყვნენ კიდევ დარჩენილნი ისეთნი, ვინც ქვეყნის აღდგენაზე ფიქრობდნენ. არჩილ მეფე კი იმედს უსახავდა პატრიოტებს „თავისი ზნეობრივი სიფაქიზით და რაინდული ხასიათით არჩილი ამ არევდარევის დროს იპყრობდა ყველა იმათ ყურადღებას, რომელთაც ჯერ კიდევ შერჩენოდათ სიყვარული ქვეყნისა და მისი მომავლის იმედი“⁵.

¹ ქართლის ცხოვრება, IV, გვ. 853—854.

² იქვე.

³ ფარსადან გორგიჯანიძის ისტორია, გვ. 77.

⁴ М. Броссе. Переписка..., გვ. 134.

⁵ სარგის კაკაბაძე, დასახ. ნაშრ., გვ. 68.

ალექსანდრე მეფემ ქართლის მეფეს ერეკლე I-ს თხოვა, რათა შაჰთან აღედგრა შუამდგომლობა იმერეთში მისი კვლავ გამეფების შესახებ. ერეკლე მეფემ სასწრაფოდ გაგზავნა კაცი ირანში და შაჰს მომხდარი ამბავი მოახსენა. შაჰმაც მზრუნველობა გამოიჩინა ალექსანდრეს მიმართ, ხონთქართან ელჩი გაგზავნა და ალექსანდრეს იმერეთში გამეფება სთხოვა.¹

სანამ შაჰის ელჩი სტამბოლში ჩავიდოდა, სულთანი სულეიმანი გარდაიცვალა, ტახტი მისმა ძმამ მუსტაფამ დაიკავა. ელჩმა ძღვენი მას მიაართვა და შაჰის თხოვნა გადასცა. ხონთქარი დიდი კმაყოფილებით შეხვდა ირანის ელჩს და დანაბარები შეუსრულა — ბრძანება გამოიცა იმერეთში ისევ ალექსანდრეს გამეფებისა.² ახალციხეში მყოფი გიორგი XI დააბატიპრეს. ამ ამბის მცნობი არჩილი ამხედრდა თურქების წინააღმდეგ. მან პირველ რიგში ქუთაისის ციხეში ჩაბუღებულ თურქთა გარნიზონს შემოარტყა ალყა და ისეთ მდგომარეობაში ჩააყენა, რომ „ჯლანთა ხარშვიდიან და სკამდნენ სიშშილისთვის და ლამობდენ მოცემასა ციხისას“,³ მაგრამ აქაც ისევ გიორგი ლიპარტიანის დალატმა იჩინა თავი.

კრიტიკულ მომენტში ლიპარტიანმა მეფეს ლეჩხუმი მოსთხოვა. მეფე დაპირდა ბრძოლის დამთავრების შემდეგ მიცემას, მაგრამ ლიპარტიანმა ასეთი პასუხი უარის ნიშნად მიიჩნია და დალატი გადაწყვიტა. მან „გამოიყვანა ღამით ოსმალნი ციხიდან, მისცნა ყოველნი საზრდელნი თვისნი და განამაგრა ციხე და თვით მასვე ღამესა ივლტოდა სპითა ოდიშს“.⁴ ამის შემდეგ გათამამებული თურქები გამოვიდნენ ციხიდან და დაანგრეს დიდებული ბაგრატის ტაძარი. ეს მოხდა 1691 წელს.

ვახუშტი ბატონიშვილი ამ ფაქტს ასე აღწერს: „იქმნა საგლოველი, რამეთუ გამოვიდნენ ციხიდან ოსმალნი და შემუსრეს ქუთათისის ეკლესია ყოვლად წმიდისა, დიდ შუენიერად გებული“.⁵

1691 წელს ალექსანდრე IV თურქთა ჯარის თანხლებით ახალციხიდან გადმოვიდა დასავლეთ საქართველოში და იმერეთის სამეფო ტახტი დაიკავა, ხოლო არჩილ მეფე იძულებული გახდა უომრად დაეტოვებინა ქუთაისი (ვინაიდან იმერნი ალექსანდრე მეფეს ეახლნენ).

¹ ფარსადან გორჯიჯანიძის ისტორია, გვ. 78.

² იქვე.

³ ქართლის ცხოვრება, IV, გვ. 854.

⁴ იქვე.

⁵ იქვე.

როგორც ზემოთ აღვნიშნეთ, გიორგი XI ახალციხის ფაშას ციხეში ჰყავდა გამოკეტილი, მაგრამ ახალციხეში მცხოვრებმა ქართველებმა მოახერხეს და გიორგი მეფე პატიმრობიდან გაათავისუფლეს.

გიორგი XI ქართლში მოვიდა და ტახტისათვის ბრძოლა დაუწყო ერეკლე I-ს, რომლის მომხრეთა რიცხვი ყოველდღე კლებულობდა. საკმარისი იყო გიორგი მეფე ქართლის მიწაზე გამოჩენილიყო, რომ თავადთა უმრავლესობა მას მისვლოდა. ერეკლე მეფე თბილისის ციხეში შეიკეტა და გარეთ ველარ გამოდიოდა გიორგის შიშით.

ალექსანდრე იმერთა მეფე შეუთანხმდა ერეკლე მეფეს და იმერთა ჯარით გადავიდა აღმოსავლეთ საქართველოში, ააოხრა სოფელი ალი და ნადავლით და ტყვეებით დატვირთული უკან მობრუნდა.

ეს რომ ტაშისკარს მდგომმა არჩილ მეფემ შეიტყო, სწრაფად დაედევნა მარბიელთ, ტყვეები და ალაფი დააყრვეინა, თვით იმერთა მეფემ ჰკანდის ციხეს შეაფარა თავი.

არჩილ და გიორგი მეფეებმა იმერეთის გავლენიან თავადებს უსაყვედურეს ალექსანდრეს მიერ სოფ. ალის დარბევა. თვით იმერეთის თავადებიც არ იყვნენ კმაყოფილნი მეფისა; ვახუშტის დახასიათებით იგი იყო „ხელად-შქევევი, ცუნდრუკი, უღმრთო, ტყვის მყიდველი“,¹ ამ მიზეზის გამო მეფე თვით მისმა ცოლმა თამარ აბაშიძის ასულმაც შეიძულა და საბაბს ეძებდა, რომ გაეყოლა. თამარმა სთხოვა შამას იმერთა მეფე გადაეცა გიორგისათვის. შეიღობის თხოვნა რომ შეესრულებინა, გიორგი აბაშიძემ შეთქმულება მოაწყო მეფის წინააღმდეგ. ვინაიდან, ზნითა და წინ თქმულთა სძულობდნენ ალექსანდრეს წარჩინებულნი, შეიკრიბნენ კათალიკოზი, ეპისკოპოსნი, ერისთავი პაპუნა და სრულიად წარჩინებულნი იმერეთისანი და მოადგნენ სკანდას მყოფსა ალექსანდრეს, შეიპყრეს და წარგზავნეს მღვიმეს. მერმე სვერს; შემდგომად მისცეს გიორგი მეფესა, მიიყვანეს რუისს; მოაშთვეს და დაფლეს მუნვე ეკლესიასა შინა.²

1695 წელს არჩილი ისევ გამეფდა (უკვე მეოთხედ) იმერეთში, ზოლო ყოფილმა იმერეთის დედოფალმა თამარ აბაშიძის ასულმა გიორგი XI-ს თავისი თავი ცოლად შესთავაზა და სამაგიეროდ

¹ ქართლის ცხოვრება, IV, გვ. 857.

² იქვე.

იმერეთში გამეფებას შეჰპირდა¹. მაგრამ გიორგი მეფემ მისი წინადადება არ მიიღო. გიორგი აბაშიძემ ახლა არჩილ-მეფეს შესთავაზა თავისი ასული ცოლად, სამაგიეროდ ტახტის შემომტკიცებას შეჰპირდა, მაგრამ არჩილმაც უარი უთხრა². ამიტომ მეფეთაგან უარყოფითი პასუხით შეურაცხყოფილი და განაწყენებული აბაშიძე შეუთანხმდა გიორგი ლიპარტიანს, მათ გამონახეს ბაგრატიონთა გვარის შთამომავალი ვინმე გიორგი, დაცინვით „გოჩიად“ წოდებული, და 1696 წელს იმერეთში გაამეფეს.

ვახუშტის დახასიათებით, ახალი მეფე იყო „უმსგავსო ყოვლითურთ და შეუგუანი მეფობისა, უზნეო, გამოუცდელი, თვინიერ გლეხთა მუშაკობისა და იყო ხეიბარიცა“³. ამ გიორგის, IV-დ წოდებულს, ცოლად შერთეს აბაშიძის ასული დედოფალი თამარი. იმერეთში ფაქტიურად გიორგი აბაშიძე გაბატონდა, მასვე მორჩილებდნენ დადიანი, გურიელი და წარჩინებულნი.⁴

ერთი წლის შემდეგ თამარ-დედოფალმა ისევ შეიძულა მეფე და მისი გაშვება გადაწყვიტა. შეითქვენენ იმერნი გიორგი აბაშიძის და შოშიტა რაჭის ერისთავის მეთაურობით (შოშიტა III—1696—1731 წ.წ.)⁵ და 1698 წელს გიორგი IV „გოჩიად“ წოდებული, იმერეთის ტახტიდან გააძევეს.

ამ დროს არჩილ-მეფე დიგორს იმყოფებოდა და რუსეთში წასასვლელად იყო გამზადებული, როცა იმერეთის თავადებმა ისევ ტახტზე მიიწვიეს, არჩილი დიდ უარზე იდგა, რადგან, ერთი მხრივ, იცოდა, რომ დიდხანს ვერ იმეფებდა, მეორე მხრივ, იცოდა „რამეთუ არღარა იყო პირმტკიცეობა, არამედ განრყუნილნი, ფიცისმტეხელნი, ტყვის-მყიდველნი, მხდომნი, მკრეხელნი, უკეთურნი, არათუ წარჩინებულნი, გარნა მდაბიურნიცა“⁶.

არჩილ მეფე შაინც დაითანხმეს და 1698 წელს იგი მეხუთედ გამეფდა იმერეთში;⁷ მაგრამ ეს მეფობა ყველაზე ხანმოკლე აღმოჩნდა (არჩილმა 6 თვე დაჰყო ტახტზე). მისი წინათგრობა გაშართლდა. ამჟამადაც ახალციხის ფაშა ჩაერია იმერეთის საშინაო საქმეებში და არჩილის გამეფება ხონთქარს მოახსენა; მან ბრძანება

¹ ქართლის ცხოვრება, IV, გვ. 858.

² იქვე.

³ იქვე.

⁴ იქვე.

⁵ ო. სოსელია, ნარკვევები ფეოდალური ხანის დასავლეთ საქართველოს სოციალურ-პოლიტიკური ისტორიიდან, თბ., 1973, გვ. 119.

⁶ ქართლის ცხოვრება, IV, გვ. 859.

⁷ იქვე.

გამოსცა ტახტიდან არჩილის გადაგდების და მის მაგივრად ალექსანდრე IV-ის ძის სვიმონის გამეფების შესახებ, რომელიც ქართლში, ნაზარალი-ხანის კარზე იმყოფებოდა. ახალციხის ფაშამ იგი ჯერ ახალციხეში მიიყვანა ქართლიდან, შემდეგ იმერეთში გადაიყვანა და 1699 წ. ქუთაისში გაამეფა.¹

ამრიგად, არჩილ მეფემ საბოლოოდ დაკარგა იმერეთის ტახტი, რუსეთში გადასახლდა და იქვე გარდაიცვალა 1713 წელს.

იმერეთიდან მიმავალმა პოეტმა-მეფემ ნაღვლიანი ლექსი წარმოთქვა:²

„ღავჯღე ქაქთა ქვეყანა
ღეთისაგან დაწყველილისა;
ვინც გახდეს მათი მოყვარე,
იქმნეს მამადის სჯულისა“.

მარი ბროსეს დახასიათებით: „არჩილი შეუდარებლად მალა იდგა ყველა იმათზედ, რომელთაც... ედავებოდა გვირგვინს კახეთილამ წამოსვლის შემდეგ“.³

გიორგი აბაშიძემ სვიმონის გამეფებით ისარგებლა და თავისი შვილი ანიკა, რომელიც ნასყიდა იაშვილზე იყო დანიშნული, გაჰყარა მას და სვიმონს ცოლად შერთო. ამ მოყვრობით აბაშიძე ისევ პირველი კაცი გახდა დასავლეთ საქართველოში.

თამარს შეშურდა თავისი დის დედოფლობა, მან გიორგი ლიპარტიანს გააშვებინა ცოლი — შვიდი შვილის დედა და თვითონ გაჰყვა ცოლად. ამის შემდეგ თამარი იწოდებოდა იმერეთისა და ოდიშის დედოფლად, ვინაიდან სახელმწიფო საქმეებს მამასთან ერთად ისიც განაგებდა. სვიმონ მეფე, რომელიც ამ გარემოებას ვერ შეურიგდა, ქართლში გაიქცა ნაზარალი-ხანთან.⁴

საქმეში მამია გურიელი ჩაერია, იგი ახალციხის ფაშას შეუთანხმდა, ქართლიდან მოიყვანა სვიმონ-მეფე, გააშვებინა ცოლი ანიკა, თავისი და ცოლად შერთო და იმერეთში გააბატონა.

ამ ამბით შეურაცხყოფილმა აბაშიძემ დახმარება თავის სიძეს — გიორგი ლიპარტიანს თხოვა. ორთავე მამია გურიელს ეთათბირნენ და შეუთანხმდნენ, თუ მამია სვიმონ მეფეს მოკლავდა, მას გაამეფებდნენ იმერეთში. მამია დათანხმდა ამ წინადადებას და შეთქმულებმა ღალატით მოკლეს სვიმონ მეფე 1701 წელს.⁵

¹ ქართლის ცხოვრება, IV, გვ. 859.

² მარი ბროსე, საქართველოს ისტორია, მეორე ნაწილი, ტფ., 1900, გვ. 215.

³ იქვე.

⁴ ქართლის ცხოვრება, IV, გვ. 860.

⁵ იქვე; ს. კაკაბაძე, დასახ. ნაშრ., გვ. 69.

ნ ა წ ი ლ ი მ ე ს ა მ ე

XVIII საუკუნე

იმერეთის სამეფო XVIII საუკუნის მიჯნაზე

XVII საუკუნის მეორე ნახევარი დასავლეთ საქართველოში მკაცრი შინაფეოდალური ომებით აღინიშნა. სულ 40 წლის მანძილზე (1660—1701 წწ.) იმერეთში ჩვიდმეტჯერ გადაადგეს ტახტიდან მეფე, ამათგან ოთხი მოკლეს, ხოლო ცამეტი გააძევეს.

კერძოდ, ჩვენი სახელოვანი პოეტი არჩილ-მეფე ხუთჯერ დასვეს და ხუთჯერვე გადმოადგეს იმერეთის ტახტიდან.

XVIII საუკუნის პირველ ნახევარში დასავლეთ საქართველოში ფეოდალური ანარქია შეუნელებლად გრძელდებოდა, სათავადოების სისტემა შეუზღუდველად ბატონობდა. მეფის ხელისუფლება უკიდურესად დაცემულიყო. სამეფო-სახასო ქვეყნები, ციხესიმაგრეები მთავრებსა და თავადებს მიეტაცნათ.¹ ძლიერდებოდა ოსმალთა გავლენა იმერეთში... ოსმალთა ეს გაძლიერება მეტისმეტად სახიფათო გახდა. ციხეები ტყვისმყიდველთა ბუნაგებად გადაქცეულიყო. ციხისა და მის გარშემო მდებარე სოფლების მოსახლეობა თანდათან მაჰმადიანდებოდა. ოსმალები ამ ციხეებიდან ადვილად ერეოდნენ ფეოდალების ურთიერთობაში და ქვეყნის საბოლოოდ დასაპყრობად თანდათან გზას იკვლევდნენ².

ქვეყნის ბატონ-პატრონად მთავართა და თავადთა „სახლები“ მოგვევლინენ; უპირველესნი იყვნენ: ლიპარტიან-დადიანი, გურიელი, აბაშიძე, რაჭის ერისთავი, ამათ მისდევდნენ: მიქელაძე, წერეთელი, წულუკიძე, ჩხეიძე, ჩიჭავაძე და სხვანი.

¹ „ერისთავს — რაჟა — გლოლა ჭაფარიძითურთ, იაშვილს კვარა, წულუკიძეს ზორევი, აბაშიძეს სვერი, ლიპარტიანს ლეჩხუმი და საკილაო სამიქელაოთურთ, გურიელს საჭავახო და ჩიჭავაძენი მარადის იყუნენ წინაშე მისსა“ (ქართლის ცხოვრება, ტ. IV, თბ., 1973, გვ. 866—867).

² ნ. ბერძენიშვილი, ივ. ჭავჭავაძის შვილი, ს. ჭანაშია, საქართველოს ისტორია, თბ., 1946, გვ. 389.

ამ „სახლებს“ შორის გრძელდებოდა ბოლომოუღებელი მიხედვით-მოხდომა. არც თითოეული „სახლის“ შიგნით იყო მშვიდობა, „სახლიშვილები“ ხშირად არბევ-აოხრებდნენ ურთიერთს. „მოწინააღმდეგენი ყოველად დაუნდობელნი იყვნენ: აქცევდნენ ციხეებს, სასახლეებს, ძარცვავდნენ ეკლესია-საგანძურებს, ბუგავდნენ ურთიერთის სოფლებს, ატყვევებდნენ მოსახლეობას და ჰყიდდნენ ოსმალეთში. საუკუნოვან ანარქიაში გახვეულ საზოგადოებას მორალური გადაგვარების საშიში ნიშნები ახლდა“...¹

„ამ საყოველთაო დაცემა-გაველურებისას ტყვის სყიდვა უკიდურესობამდის მისულიყო. ტყვეებს ყიდდნენ ყველანი: მეფეები, მღვდელმთავრები, მთავრები, თავადები, აზნაურები და გაყაზახებული გლეხებიც“.²

ამ ურთიერთ ხოცვა-ჟლეტაში, მეფე-მთავართა დასმა-გადაყენებაში აშკარად ჩანდა ოსმალეთის მზაკერული ხელი. ოსმალთა აგენტი ახალციხის ფაშა სულ იმას ცდილობდა, რომ დასავლეთ საქართველოში მტკიცე ხელისუფლება არ შექმნილიყო; შედეგიც ჩანდა — რაღაც ოცდაათი წლის მანძილზე (1690—1720 წწ.) დადიანმა, გურიელმა, აბაშიძემ და რაჭის ერისთავმა თერთმეტჯერ გამოცვალეს მეფე იმერეთის ტახტზე, ამათგან სამი მოკლეს, დანარჩენები განდევნეს.

შინაფეოდალური ომები იმერეთის სამეფოში და თურქი ინტერვენტები

სვიმონ მეფის მოკვლის შემდეგ (1701 წ.) იმერეთის დიდმა თავადებმა შეთანხმებისამებრ სამეფო ტახტზე მამია III გურიელი დასვეს, მაგრამ მისი მეფობაც ხანმოკლე აღმოჩნდა. გიორგი აბაშიძემ სამეფო შემოსავალი არ უწილადა იმერეთის ტახტზე მეფედ დასმულ გურიელს, რის გამოც ახალი მეფე იძულებული გახდა გურიიდან ტყვეები გაეყიდა ოსმალეებზე და ამით გაესწორებინა ხარჯები. ბოლოს გურიელს მობეზრდა ასეთი ყოფა, 1702 წელს მეფობას თვითონვე დაანება თავი და ისევ გურიაში დაბრუნდა. იმერეთის გამგებლობა გიორგი აბაშიძის ხელში გადავიდა. მან შემომოიტყია იმერეთი³ და 1703 წელს უარს აცხადებს თურქეთის

¹ ნ. ბერძენიშვილი, საქართველოს ისტორიის საკითხები, ტ. VI, თბ., 1973, გვ. 342—343.

² იქვე.

³ ქართლის ცხოვრება, ტ. IV, თბ., 1973, გვ. 862—863.

მორჩილებაზე და ახალციხის ფაშას უარს ეუბნება ყოველწლიური „ქრთამის“ გაგზავნაზე¹. მის მაგალითს მიბაძეს დადიანმა და გურიელმა, ხოლო აფხაზებმა თურქი ვაჰკრების გაძარცვაც კი გაბედეს.

რამ განაპირობა დასავლეთი საქართველოს სამეფო-სამთავროების შეთანხმებული გამოსვლა ოსმალეთის წინააღმდეგ?

ეს გამოწვეული იყო ოსმალეთის მძიმე შინა და საგარეო მდგომარეობით². ოსმალეთი იმ დროს მწვავე ეკონომიურ გაქირვებას განიცდიდა, ჯარი უჭამაგიროდ რჩებოდა, რაც მთავრობის საწინააღმდეგო გამოსვლებს იწვევდა. ოსმალეთის საგარეო მდგომარეობის ვართულება კი რუსეთის საგარეო პოლიტიკის გააქტიურებამ გამოიწვია.

XVIII საუკუნის დასაწყისში რუსეთი კიდეც უფრო მეტად დაინტერესდა საქართველოთი, რადგან რუსეთ-საქართველოს მკიდრო კავშირი ხელს შეუწყობდა შავ ზღვაზე რუსეთის ფეხისმოკიდებას.

ამ დროისათვის საქართველოს მესვეურთ უკვე დამყარებული ჰქონდათ ერთმორწმუნე რუსეთთან მეგობრული კავშირი და მისი შეშვეობით ფიქრობდნენ თავის გამოსხნას აგრესორისაგან.

რუსეთის იმპერატორი პეტრე პირველი 1699 წელს იმერეთიდან გაძევებულ და რუსეთს მეორედ ჩასულ არჩილ მეფეს დაკარგული სამფლობელოს დაბრუნებას პირდებოდა.

რუსეთისათვის აუცილებელი იყო შავ ზღვაზე გასასვლელის პოვნა, რაც ოსმალეთთან ომს გარდუვალად სახავდა. ხმები იმის შესახებ, თითქოს იმპერატორ პეტრეს ეთქვას: „წმ. სოფიოს ტაძარში წირვას გადავიხდიო“³, ოსმალეთშიც და საქართველოშიც აღწევდა. ხოლო ავსტრიის ელჩი რუსეთში პლეიერი 1702 წელს ავსტრიის იმპერატორს მოახსენებდა: „აქ ყველანი ლაპარაკობენ, რომ შეედებთან ომის დამთავრების შემდეგ პეტრე გემებით გაემგზავრება საქართველოში, რათა იმერეთის პრინცი (ალექსანდრე არჩილის ძე), რომელიც რამდენიმე წლის წინ თავისი ქვეყნიდან განდევნეს (თურქებმა) და ახლა შეედებს ჰყავთ ტყვედ, კვლავ თა-

¹ „საურს“ ანუ „სათათრო გამოსაღებს“, რომელიც მოსახლეობაში იკრიბებოდა და თურქეთში იგზავნებოდა, ქართველები „ქრთამს“ ეძახდნენ.

² უფრო დაწვრილებით იხ. ქ. ჩხატარაიშვილი, საქართველოს საგარეო ურთიერთობათა ისტორიიდან. წიგნში საქართველოს ფეოდალური ხანის ისტორიის საკითხები, თბ., 1972, გვ. 43—70.

³ ქ. ჩხატარაიშვილი, დასავლეთი საქართველო XVIII ს. პირველ ნახევარში. საქართველოს ისტორიის ნარკვევები, ტ. V, თბ., 1973, გვ. 456.

ვის ქვეყანაში გაამეფოსო¹... სწორედ ამ მიზანს ემსახურებოდა რუსეთის ელჩის პ. ტოლსტოის მიერ 1702 წ. სტამბოლიდან გამოგზავნილი „შავი ზღვის აღწერილობა“, რომელშიც, სხვათა შორის, აღწერილია ნავსადგურები: რიზე, ფასი (ფოთი), ანაკრა (ანაკლია) და პიკსონტა (ბიჭვინთა)².

1701 წელს ვორონეჟთან რუსეთს 100-მდე დიდი და პატარა ხომალდისაგან შემდგარი ფლოტი ჰყავდა გამზადებული შავ ზღვაში შემოსასვლელად. ამასთან დაკავშირებით რუსეთის ელჩი პ. ტოლსტოი კონსტანტინოპოლიდან მოსკოვს მოახსენებდა ქართველთა განწყობილების შესახებ: „თუ მოსკოვის ფლოტი ევქსინის პონტში (შავ ზღვაში) გამოვა, ჩვენ (ქართველები) რამდენადაც კი შეგვიძლია, მას დავეხმარებით, და თავადაც თურქეთს დავარტყამთო“³.

თავის მხრივ, თურქეთის მთავრობაც საიდუმლო დაზვერვის მონაცემებით ვარაუდობდა, რომ თუკი რუსეთ-თურქეთს შორის ომი დაიწყებოდა, რუსეთის ფლოტი საქართველოს ნავსადგურებს გამოიყენებდა. როცა 1703 წელს დასავლეთ საქართველოს მეფე-მთავრებმა თურქეთს ხარკის გადახდა შეუწყვიტეს, ამან ნათელი გახადა ზემოაღნიშნული ვარაუდი და თურქეთმა დასწრება ამჟობინა — საქართველოში დიდი დამსჯელი ექსპედიციის მოწყობა გადაწყვიტა, რათა მომავალ ომში მოსკოვისათვის საყრდენი ბაზა მოესპო⁴ როცა გიორგი აბაშიძე იმერეთს გამგებლობდა, იმერეთისა და სამეგრელოს დიდი ფეოდალები: ლიპარტიანი, რაჭის ერისთავი, წულუკიძე, მიქელაძე, კილაძე, ჩიჯავაძე; ჩხეიძე; აბაშიძე; იაშვილი, მხეიძე, წერეთელი, ლორთქიფანიძე, ნიყარაძე, ქვარიანი და სხვები აფხაზეთის კათალიკოსის გრიგოლის, ქუთათელი ევდემონის და გენათელი ნიკოლოზის თაოსნობით ფიცს დებენ, რომ ამიერიდან გაერთიანებული ძალით იბრძობებენ საერთო მტრის — თურქეთის წინააღმდეგ.⁵

1702 წელს თურქეთის უღელქვეშ მგმინავი ბალკანეთის ხალხებიც აჯანყებისათვის მზად იყვნენ და პეტრე I-ს სამხედრო გეგ-

¹ აღუქსანდრე არჩილს ძე შეეღებმა ნარჯასთან ბრძოლის დროს 1700 წელს ტყვედ ჩაიგდეს. როცა ტყვეობიდან ბრუნდებოდა, 1711 წ. გარდაიცვალა რიგაში.

² ქ. ჩხატარაიშვილი, საქ. საგარეო ურთიერთობის ისტორიიდან (XVIII ს. პირ. მეოთხედი), სპ. ფეოდ. ხანის ძტ. საკითხები, თბ., 1972, გვ. 53.

³ საქართველოს ისტორიის ნარკვევები, ტ. IV, თბ., 1973, გვ. 457.

⁴ იქვე.

⁵ საქართველოს სიძველენი, ტ. I, თბ., 1920, გვ. 44—45, ს. თაყაიშვილის რედაქციით.

მაც კი შესთავაზეს, თუკი რუსეთი ომს დაიწყებდა თურქეთის წინააღმდეგ¹.

საქართველოს პოლიტიკური ხელმძღვანელები აჩქარდნენ და რუსეთის იმედით თურქეთის მოსალოდნელ დამარცხებას საქვეყნოდ აცხადებდნენ.²

ბალკანეთის ხალხების, რუსებისა და ქართველების ანტითურქული მოძრაობა „ბრწყინვალე პორტას“ თავისი აგენტების მეშვეობით მხედველობიდან არ გამოპარვია. ამიტომ მან პირველ რიგში ქართველების სამაგალითოდ დასჯა გადაწყვიტა.

* * *

როგორც ზემოთ აღვნიშნეთ, ქართველი მეფე-მთავრების მოქმედებით გაჯავრებულმა თურქეთის სულთანმა 1703 წლის იანვარში ბრძანა დიდი დამსჯელი ექსპედიცია — „დიდი თურქობა“ — მოეწყობოდა დასავლეთ საქართველოში. მთავარსარდალად დაინიშნა არზრუმის ბეგლარბეგი ქოსა ხალილ-ფაშა...³

ერთი ქართული ცნობით ხალილ-ფაშას ლაშქარში 80 ათასა მებრძოლი ირიცხებოდა⁴. ამასვე ადასტურებს ვახუშტი ბაგრატიონიც. — ფაშა მოვიდა საქართველოში „სპითა დიდითა“⁵.

თურქეთის ლაშქარს იმერეთში გასამეფებლად თან მოჰყავდა მოკლული სიმონ მეფის ძმა გიორგი ალექსანდრეს ძე, რომელიც ჯერ ქართლში და შემდეგ ახალციხეში იზრდებოდა. ხალილ-ფაშას ებრძანა, რომ საქართველოში ოსმალთა ჯარი ჩაეყენებინა შვიდი წლის ვადით, განემტკიცებინა ახალი მეფის ხელისუფლება, აეშენებინა ციხეები, სადაც თურქთა მეციხოვნეები ჩადგებოდნენ, ხოლო დანარჩენი ციხესიმაგრეები დაენგრია.

თურქთა ჯარი 1703 წლის აგვისტოს თვეში საქართველოს სამი მხრიდან მოადგა: მთავარსარდალი ქოსა ხალილ-ფაშა გურიის შიშველში, ბათომი დაიკავა და ახალი ციხესიმაგრის მშენებლობას შეუდგა. მისი ქეპაია (მოადგილე) და ახალციხის ფაშა ზეკარის გადასასვლელით იმერეთს მოადგნენ, ხოლო ოსმალეთის ფლოტმა სამეგრელოს სანაპიროზე გადმოსხა ჯარი. აფხაზეთის მთავარი შერვაშიძე, რომელიც განაწყენებული იყო როგორც ლიპარტიანზე,

¹ ქ. ჩხატარაიშვილი, დასახ. ნაშრ., გვ. 53—54.

² იქვე, გვ. 55.

³ დაწვრილებით იხ. ქ. ჩხატარაიშვილის დასახ. ნაშრ., გვ. 56—57.

⁴ დ. ბაქრაძე, არქეოლოგიური მოგზაურობა საქართველოსა და აჭარაში.

⁵ ქართლის ცხოვრება, ტ. IV, თბ., 1973, გვ. 863.

ისე გიორგი აბაშიძეზე, თურქებს ეახლა და ქართველების წინააღმდეგ გამოილაშქრა.

თურქეთის ამ დიდმა ლაშქრობამ დასავლეთი საქართველოს დასაპყრობად უდიდესი საფრთხის წინაშე დააყენა მთელი ეს მხარე. დამხმარე ძალა არსაიდან ჩანდა. ასეთ მძიმე პირობებში იმერეთას „მეფემ“ გიორგი აბაშიძემ დიდი მხნეობა გამოიჩინა: „შემოიფიცნა სრულიად იმერნი, გურიელ-დადიანითურთ და დახიზნა იმერეთი. მერმე შემოიკრიბნა სპანი და შეკრა გზანი“¹.

პირველ ხანებში ქართველებმა შეძლეს მტრის ძალების შებოჭვა, ხალხი უომრად არც ერთ მტკაველ მიწას არ თმობდა, მაგრამ რიცხოვნობა და სამხედრო-ტექნიკურმა უპირატესობამ თავისი გაიტანა. ამას დაემატა ფეოდალური განკერძოებულობა — პირველ რიგში გურიის მთავარი მამია III ეახლა ხალილ-ფაშას და მორჩილება განუცხადა. თურქებმა გურია დაიმორჩილეს, ბათუმის ციხე ააგეს და შიგ თავიანთი მეციხოვნეები ჩააყენეს. თურქებს ეახლა გიორგი ლიპარტიანზე განაწყენებული თავადი შიქელაძეც, იმერეთისაკენ მეგზურობა გაუწია მათ და გურიაში მდგომ ჯარს ქეპაიის ჯარის ამბავი შეატყობინა. ზეკარის გზით გადმოსულმა ოსმალებმა გამოვლეს ხანისწყლის ხეობა, ბრძოლით აიღეს კაკას ხიდთან ნაჩქარევად აგებული სიმაგრე და ბაღდათში შევიდნენ. იქ თხმელის ციხე ააგეს და შიგ თავიანთი გარნიზონი ჩააყენეს.

თურქთა ჯარმა სამეგრელოშიც დიდ წარმატებას მიაღწია. აიღო რუხის ციხე, ააშენა ანაკლიის ციხე და შიგ თავიანთი მეციხოვნეები ჩააყენა, რითაც შავი ზღვის პირას ახალი დასაყრდენი პუნქტი გაიჩინა.

სამი მხრიდან შემოსეულმა მტრის ჯარმა თითქოს მოამთავრა მთელი დასავლეთი საქართველოს დაპყრობა, მაგრამ ვახუშტი ბაგრატიონის სიტყვით რომ ვთქვათ, „შეიწყალა ღმერთმან კუალად ქუეყანა ესე“².

1703 წელს თურქეთის მთავრობა დამატებით ჯარს გზავნიდა, რათა საბოლოოდ დაემთავრებინა დასავლეთი საქართველოს დაპყრობა, მაგრამ იმ ჯარში, რომელიც საქართველოში გამოსაგზავნად იყო გამზადებული, მოხდა დიდი აჯანყება. აგვისტოს თვეში აჯანყებულებმა კონსტანტინოპოლი აიღეს, სულთანი მუსტაფა II ტახტიდან გადააყენეს და სულთანად მისი ძმა აჰმედ III დასვეს.

¹ ვახუშტი, გვ. 863.

² იქვე, გვ. 364.

ახალმა სულთანმა, თუმცა აჯანყება ჩაახშო, მაგრამ იძულებული გახდა, ისედაც ღარიბი ხაზინიდან რამდენიმე წლის გადაუხდელი ჯამაგირი მიეცა აჯანყებული ჯარისათვის.

ამის შემდეგ ოსმალეთის მთავრობას ძალა აღარ შესწევდა ლაშქრობის გაგრძელებისა, ამიტომ საქართველოში მყოფ სერასკირს ბრძანება მოუვიდა ლაშქრობის მოშლისა და თურქეთში დაბრუნების შესახებ.

გურიის მდგომმა ოსმალთა ჯარის მთავარსარდალმა მოლაპარაკება გამართა გიორგი აბაშიძესთან თავისი ქეპაიის საშუალებით. წინასწარი შეთანხმების შემდეგ გიორგი აბაშიძე 500 ჩრეული მხედრით გამოცხადდა ფაშასთან. რადგან თურქთა ლალატისა ეშინოდათ, მხედრობის ნახევარი კარავში შეჰყვა აბაშიძეს, ნახევარიც კარვის კარებთან დაჰლოდა.

საზავო მოლაპარაკებამ წარმატებით ჩაიარა. თურქებმა მოითხოვეს: შორაპნის ციხის დანგრევა,¹ მძევლების მიცემა, სიმონ მეფის ძმის — გიორგის გამეფება, „ქრთამის“ მიცემა — ხოლო გიორგი აბაშიძე გიორგი მეფის მეურვედ უნდა დანიშნულიყო.

გიორგი აბაშიძე ამ პირობებზე დასთანხმდა. მან დაანგრია შორაპნის ციხე, ოსმალებს მისცა მძევლები და ისინი უკან გაბრუნდნენ. გიორგი VI ალექსანდრეს ძემ ქუთაისის ტახტი დაიკავა, ხოლო სამეფოს ფაქტიურ გამგებლად გიორგი აბაშიძე დარჩა.

როგორც ჩანს, ოსმალეთში მომხდარი ამბები ქართველებისათვის ცნობილი გახდა; უკან დაბრუნებულ თურქებს გიორგი აბაშიძის ბრძანებით ფერსათში ქართველები დახვდნენ და სამშობლოში მიმავალნი სასტიკად დაამარცხეს. მოკლეს კოლის ფაშა და დაჭრეს ისაყ-ფაშა. თურქთა მხოლოდ მცირე ნაწილმა მიაღწია ახალციხეს, ხოლო ქართველებმა მტერს ტყვეებისა და საქართველოდან წაღებული ნადავლის უმეტესი ნაწილი დაატოვებინეს.

მიუხედავად იმისა, რომ გურიის სამთავროს ბათომის მხარე საბოლოოდ წაართვეს, ხოლო ქუთაისის, ფოთის, ანაკლიის, რუხისა და ბაღდათის (თხმელის) ციხეებში ოსმალთა გარნიზონები ჩააყენეს, 1703 წლის თურქთა დიდმა ლაშქრობამ მიზანს ვერ მიაღწია — დასავლეთი საქართველო თურქთაგან დაპყრობას გადაურჩა.

გიორგი VI-ის გამეფებამ და ოსმალთა წასვლამ იმერეთის სამეფოს მშვიდობა ვერ მოუტანა. გიორგი VI ქუთაისის ციხეში იყო

¹ იმდროინდელ ვითარებაში ოსმალეთს შორაპნის ციხეში მეცხოვნების ჩაყენება არ შეეძლო, ხოლო ამ ციხის დატოვება იმერეთის თავდაცვას დიდად შეუწყობდა ბელს.

ჩაკეტილი, ქვეყნის საქმეებისა არაფერი ეკითხებოდა, ყველაფერს გიორგი აბაშიძე განაგებდა და მეფედაც ის იწოდებოდა.

გიორგი აბაშიძის აღზევებით უკმაყოფილონი მეფეს მიემხრნენ: იმერეთის თითქმის ყველა გავლენიანი თავადი, აფხაზ-იმერეთის კათალიკოსი გრიგოლ ლორთქიფანიძე, გენათელი, რაჭის ერისთავი პაპუნა, გიორგი ლიპარტიანის შვილები და თვით გიორგი აბაშიძის ძმისშვილები — ზურაბ, სვიმონ და ვახუშტი. ამაში გარკვეული როლი შეასრულა ქართლის ჭანიშინმა ვახტანგმაც, რომლის ძმის ასული იყო გიორგი VI-ის ცოლი.

აღნიშნულ თავადთა მიერ ზურგგამაგრებულმა გიორგი მეფემ 1707 წელს გიორგი აბაშიძეს სამეფოს მმართველობის უფლება ჩამოართვა და თვითონ შეუდგა დამოუკიდებელ მოღვაწეობას.

გიორგი აბაშიძე ვერ ურიგდებოდა იმერეთის სამეფო ტახტის დაკარგვას და ეურჩებოდა მეფეს, ამავე დროს ლიპარტიანსაც არ მოსწონდა მეფის გაძლიერება, ამიტომ რაჭის ერისთავი დაითანხმა, რომ ერთობლივი ძალით ებრძოლათ მეფის წინააღმდეგ.

1709 წელს ლიპარტიანის და რაჭის ერისთავის ჯარი ფარცხანაყანებში შეიყარა და აბაშიძის ჯარს დაელოდა, რათა მოულოდნელად დასხმოდა თავს მეფეს.

მეფემ, როგორც კი ეს ამბავი გაიგო, ღამით სწრაფად წაიყვანა იმერთა ჯარი, მოულოდნელად დაესხა თავს მოკავშირეებს და სასტიკად დაამარცხა, ტყვედ ჩავარდნილნი კი თათრებზე დაჟიდა. ამის მცნობი აბაშიძე უკან მიბრუნდა და ზვერის ციხეში ჩაიკეტა¹

გამარჯვებული იმერთა მეფე კაცხის ციხეს შემოადგა, მაგრამ იგი აბაშიძის შვილმა პაატამ უომრად ჩააბარა და თვითონაც ჩაბარდა, მაგრამ მეფემ დაპირება არ შეასრულა და ხიზანნი ვერცხლზე დაჟიდა. შედეგ იგი სვერის ციხეს შემოადგა, სადაც აბაშიძე იყო გამაგრებული, მაგრამ მისი აღება ვერ შეძლო. აქედან მეფე სასწრაფოდ გადავიდა რაჭაში და ხოტევის ციხის აღებას შეეცადა, მაგრამ ციხის სიმტკიცის გამო იძულებული გახდა უკან მობრუნებულიყო. ამის შემდეგ მეფე აბაშიძის კუთვნილ ნავარძეთის ციხეს შემოადგა. ამ დროს მას ეახლნენ ლიპარტიანის შვილები კაცია და ბეჟანი, რომლებმაც მეფეს სთხოვეს, რომ ოდიში დაეღაშკრა, გიორგი ლიპარტიანი გადაეგდო და კაცია დაესვა ოდიშის სამთავრო ტახტზე². მეფე დასთანხმდა და იმერეთის ჯარით ოდიში დაღაშკრა, გიორგი ლიპარტიანი აფხაზეთში გაიქცა, მეფემ ოდიშის მთავრად

¹ ვახუშტი, თბ., 1973, გვ. 869.

² იქვე.

კაცია დასვა; აფხაზეთის მთავარ შერვაშიძესთან ზავი დადო, უკან დაბრუნდა, ისევ ნაეარქეთის ციხეს შემოადგა და აიღო იგი.

როცა მეფე ოდიშში იმყოფებოდა, რაჭის ერისთავი შოშიტა თავს დაესხა იმერეთს, ქალაქე და სხვა სოფლები მოსწვა, ააოხრა და ისევ სასწრაფოდ გაბრუნდა რაჭას¹. იმერთა მეფე კი ოდიშიდან გურიამი გადავიდა, იგი უკმაყოფილო იყო გურიელთ, — აბაშიძის წინააღმდეგ ბრძოლაში რომ არ დაეხმარა, ამიტომ მთელი გურია დალაშქრა და ააოხრა.

კაცხისა და ნაეარქეთის ციხეების დაკარგვის და ტახტზე იმერთა მეფის მომაგრების შემდეგ გიორგი აბაშიძეს იმერეთში აღარ ედგომებოდა. 1711 წელს იგი ქართლის ჯანიშინს ვახტანგს მიენდო.

კაცია დადიანი 1714 წელს გარდაიცვალა და ოდიშის სამთავრო ისევ ლიპარტიანმა დაიკავა. ლიპარტიანი და მეფე დაზავდნენ.

1711 წელს ჯავრის ამოყრის შიზნით ამერთა მეფე ლიპარტიანის მეკავშირობით რაჭაში ილაშქრებს და თითქმის სხვაგვამდე იპყრობს მას². მაგრამ ისევ ლიპარტიანის ლაღატის შედეგად გიორგი მეფე იძულებული ხდება უკან დაბრუნდეს.

დასავლეთ საქართველოში არეულობას ბოლო არ ეღება. ვინაიდან გიორგი VI იყო „ცუნდრუკი, მომხუეკელი, ანგაარი, ვერცხლის მოყუარე“³, ისევ შეთქმულებამ იჩინა თავი — ლიპარტიანი, გურიელი, რაჭის ერისთავი, ბეჟან ლეჩხუმის ბატონი და ზურაბ აბაშიძე შეითქვენენ და 1711 წელს მეფე გიორგი VI იმერეთიდან განდევნეს, ხოლო იმერეთის სამეფო ტახტზე მამია III გურიელი დასვეს. ლტოლვილ მეფეს იმერეთში თავშესაფარი აღარ ჰქონდა და ერთ ხანს საღლატ მთებში იმყოფებოდა⁴, შემდეგ ქართლში გადავიდა და ქართლის მეფე ვახტანგ VI-ის სარეკომენდაციო წერილით ახალციხის ფაშას ეახლა.

გიორგი აბაშიძე, რომელიც ქართლში იმყოფებოდა, ვახტანგ VI-ის შუამდგომლობით ისევ იმერეთში დაბრუნდა. ზურაბ აბაშიძე კვლავ უკმაყოფილო იყო გურიელის მეფობით, გიორგი მეფეს ეწვია ახალციხეში, — იქიდან ლეჩხუმის „მთავარს“ — ბეჟანს შეუკავშირდნენ და ისაყ-ფაშას ჯარით ზურაბი და ყოფილი მეფე არგვეთზე გავლით ლეჩხუმში მოვიდნენ⁵. ბეჟანმა შეკრიბა ჯარი და მეფე გურიელის წინააღმდეგ წავიდნენ. გურიელიც მომზადებული

¹ ვახუშტი, გვ. 870.

² იქვე.

³ იქვე.

⁴ საქართველოს ცენტრ. არქივი (ს. ც. ი. ა.). ფონდ. 1449, საქ. 5; დ. ფურცლაძე, ქართველ თავადაზნაურთა სიგელ-გუჯრები, 1881, გვ. 42 (რუს.).

⁵ ვახუშტი, 1973, გვ. 871.

დახვდა. ბრძოლა მოხდა 1712 წელს ჩხარში¹. ამ ბრძოლაში მამია III გურიელი დამარცხდა, გიორგი მეფემ კვლავ დაიკავა სამეფო ტახტი.

ცოტა ხნის შემდეგ ისევ მოხდა შეთქმულება მეფის წინააღმდეგ. მასში მონაწილეობდნენ: გურიელი, დადიანი, ერისთავი, აბაშიძე და ლეჩხუმის „მთავარი“ ბეჟანი. 1713 წელს გაიმართა ბრძოლა ოკრიბაში მეფესა და მოკავშირეებს შორის. ამ ბრძოლაში გიორგი დამარცხდა, მეფედ ისევ მამია III გურიელი დასვეს.

1714 წლის იანვარში, ორი თვის მეფობის შემდეგ, მამია გარდაიცვალა, ამით ისარგებლა გიორგი მეფემ და ოსმალების დახმარებით კვლავ დაიკავა იმერეთის ტახტი, რასაც მოჰყვა მოწინააღმდეგეებთან ანგარიშის გასწორება.

გიორგი მეფე რაჭის ერისთავის თანხლებით მოულოდნელად დაესხა თავს ზურაბ აბაშიძეს და მამული დაულაშქრა. ბეჟან დადიანი და ზურაბ აბაშიძე შეევედრნენ ახალციხის ფაშას, რათა იგი ჯარით დახმარებოდა მათ გიორგი მეფის განდევნაში და აღუთქვენს დიდი ქრთამი. †

ოსმალეთი ყოველთვის დიდი ზალისით ეხმარებოდა ურთიერთ-ბრძოლაში დამარცხებულ ამა თუ იმ მეფეს, მთავარსა და თავადს, რადგან დამარცხებული თუ გადაადებული მეფე-მთავარი „სამართალს“ ფაშასთან ეძიებდა, რასაკვირველია, სათანადო „ქრთამით“, ფაშაც ხელს უწყობდა „სამართლის მაძიებელთა“ მომრავლებას დასავლეთ საქართველოში. ამჟამადაც ისაყ-ფაშა ოსმალთა ჯარით იმერეთს ესტუმრა. გიორგი მეფე კი რაჭის ერისთავთან გაიქცა ჯარის შესაკრებად.

დადიანი და აბაშიძე ფაშას მიეგებნენ. რაჭის ერისთავის ჯარით მეფე მოკავშირეებს შეებრძოლა სოფელ სიმონეთში 1716 წელს², მაგრამ დამარცხდა და ლტოლვილმა მესამედ დატოვა იმერეთის ტახტი; მან ქართლის სამეფოს შეათარა თავი, ხოლო მოკავშირეებმა იმერეთის ტახტზე მამია გურიელის ძე — გიორგი გურიელი დასვეს. შემდეგში ბეჟანმა და ზურაბმა თავისკენ გადაიბირეს შოშიტა რაჭის ერისთავი, რაც მოყვრობით განამტკიცეს — შოშიტას ასული ცოლად შერთეს ბეჟანის შვილს ოტიას. ამის შემდეგ ერთხანს მშვიდობა დამყარდა; ოსმალები ისევ უკან გაბრუნდნენ.

გიორგი გურიელმა მხოლოდ სამი თვე იმეფა. მან გურიიდან თავისი სიმდიდრის ჩამოტანა განიზრახა, მაგრამ რაჭველები მოუ-

¹ ვახუშტი, გვ. 871.

² იქვე. გვ. 877.

ლოდნელად თავს დაესხნენ მის მებარგულებს სოფელ სალომინაოში, გაძარცვეს ისინი და შემდეგ ტყვედ დაყიდეს. ეს რომ გურიელმა შეიტყო, იმერეთი მიატოვა და გურიაში გაიქცა, ხოლო იმერეთის სამეფო დარჩა სამ თავადს: ზურაბ აბაშიძეს, ბეჟან დადიანს და შოშიტა რაჭის ერისთავს. მათ სამად გაიყვეს სამეფო და თავიანთ სამფლობელოებს შეუერთეს¹.

იმერეთის ლტოლვილი მეფე გიორგი VI ჯერ ქართლში გადავიდა, შემდეგ ახალციხეში, იქიდან რომ დახმარება ვერ მიიღო, ჰტამბოლში წავიდა ხონთქართან საშუამდგომლოდ; ისაყ-ფაშას ხონთქარის ბრძანება მოუვიდა — გიორგი იმერეთში ისევ გაამეფეო.

1719 წელს ახალციხის ფაშის ჯარით გიორგი მეფე იმერეთში ჩამოვიდა. ქუთაისში, გარდა მდამიო ხალხისა, არავინ მიჰკვებებია. იმერეთის წარჩინებული თავადები წინააღმდეგნი იყვნენ მისი გამეფებისა. აბაშიძის, ერისთავის და დადიანის ჯარი ოკრიბაში იდგა. მეფემ თავადებს ზავი შესთავაზა და მოსთხოვა, რომ მეფედ ცნონ და დაემორჩილონ, მაგრამ უარი მიიღო. ამის შემდეგ ოსმალთა ჯარით მეფე თავს დაესხა ოკრიბაში შეკრებილთ, დაამარცხა, გაფანტა ისინი, ააოხრა ოკრიბა და იქიდან სამეგრელოში წავიდა. დადიანმა წინააღმდეგობის გაწევა ველარ შეძლო, დიდი საჩუქრებით შეაჩერა ოსმალები და ბოლოს მოურიგდა მათ. სამივე თავადი მეფეს დაემორჩილა², მეოთხეჯერ ავიდა გიორგი VI იმერეთის ტახტზე, მაგრამ მხოლოდ ნახევარი წლით.

მცირე ხანში — 1720 წელს, ზურაბ აბაშიძის, ერისთავისა და დადიანის შეჩენით სიმონ აბაშიძემ გიორგი მეფე თხმელისციხეში დაპატიჟა, ნადიმის დროს მსახურებს მოაკვლევინა³, ხოლო მისი ყველა მხლებელი დაიჭირა და ტყვედ დაყიდა.

იმერეთი ისევ დარჩათ ზურაბ აბაშიძეს, შოშიტა რაჭის ერისთავს და ბეჟან დადიანს, კვლავ სამად გაიყვეს. იგი — ერისთავმა აიღო კაცხის ციხე, გამოიღო მეფის საგანძური და მიისაკუთრა.

დასავლეთი საქართველოს პოლიტიკური ბედ-იღბალი დიდად იყო დამოკიდებული ამ წარჩინებულ თავადთა ნება-სურვილზე, როგორც ვახტანგ VI აღნიშნავს საქართველოს მეფეთა შესახებ, ისინი „უამთა და დროთა წყალობით ასრე დამდაბლებულან, რომე ოდენ სახელი მეფე რქმევიათ, თორემ მართებული არა უქნევიანებიათ რა, როგორც ყმათა სდომებიათ, ისრე უსამართლებიათ და ურიგებიათ“⁴.

¹ ვახუშტი, გვ. 877.

² იქვე, გვ. 880.

³ იქვე, გვ. 881.

⁴ ვახტანგის სამართალი, მუხლი. 2.

სამთა კავშირსაც შეეპარა ბზარი — შოშიტა და ზურაბი ერთ-მანეთს დაემდურნენ, ამ დროს ხონთქარმა ახალციხის ფაშას გიორგი VI-ის შვილის — ალექსანდრეს გამეფება უბრძანა იმერეთში.

ისაყ-ფაშამ ქართლის მეფეს ვახტანგ VI-ს გამოსთხოვა იმერთა უფლისწული, რომელიც ქართლში იზრდებოდა — ვახტანგის სამეფო კარზე. იგი ჯერ ახალციხეს მოიყვანა, შემდეგ 1720 წელს¹ იმერეთში გადაიყვანა და სამეფო ტახტზე დასვა თავისი ჯარის შემწეობით.

ბეჟან დადიანი და ზურაბ აბაშიძე წინააღმდეგნი იყვნენ ალექსანდრეს გამეფებისა, ხოლო რაჭის ერისთავი შოშიტა ეახლა მეფე ალექსანდრეს, მიართვა კაცხის ციხის გასაღები და ის სამეფო საგანძური, რომელიც ამ ციხის აღებისას მიისაკუთრა; ალექსანდრემ ეს საგანძური ფაშას აჩუქა, შემდეგ ზურაბ აბაშიძის კუთვნილი ცუცხვათის ციხე აიღო, იქ ოსმალთა მეციხოვნენი ჩააყენა და ოსმალთა ჯარით ბეჟან დადიანის მამულს — ლეჩხუმს დაეცა თავს, გაძარცვა და ისევ ქუთაისში მიბრუნდა.

ბეჟან დადიანს შეშურდა რაჭის ერისთავის თანადგომა ალექსანდრე მეფესთან, ამიტომ ფაშას თორმეტი ქისა ქრთამი მისცა, ფაშამ ქრთამი აიღო და მეურვედ მეფეს ბეჟანი დაუნიშნა, თვითონ კი ახალციხეში გაბრუნდა.

ალექსანდრე მეფე, როგორც ვახტანგ VI-ის სამეფო კარზე აღზრდილი, მის პოლიტიკას იზიარებდა და ქვეყნის გაძლიერებისათვის იბრძოდა, მაგრამ იგი იძულებული იყო თვალთმაქცურად ორგვარი პოლიტიკა გაეტარებინა. მას თურქეთისათვის უნდა ეამებინა, წინააღმდეგ შემთხვევაში მეფობას დაკარგავდა. მეორე მხრივ, ქართლის მეფის გეგმებსაც უნდა გამოხმაურებოდა, რაც ნაწილობრივ რუსეთთან კავშირით უნდა გამოხატულიყო. ამიტომ იყო, რომ ვახტანგ VI-ის ჯართან ერთად განჯაში ლაშქრობის დროს იმერეთის ჯარიც იღებდა მონაწილეობას, ხოლო 1722 წელს ქართლთან ერთად ალექსანდრემაც დაამყარა რუსეთთან დიპლომატიური კავშირი².



ოსმალეთმა XVIII საუკუნის დასაწყისში უფრო ინტენსიურად დაიწყო შავი ზღვის სანაპიროს შემომტყიცება. მან 1723 წელს დაიკავა შავი ზღვის აღმოსავლეთ სანაპიროზე მდებარე ციხეები და საქართველო ზღვას მოსწყვიტა. დასავლეთი საქართველოსათვის მძიმე

¹ ვახუშტი, გვ. 881.

² ქ. ჩხატარაიშვილი, დასავლეთ საქართველო XVIII საუკუნის პირველ ნახევარში, წიგნში — „საქართველოს ისტორიის ნარკვევები“, ტ. IV, თბ., 1973, გვ. 461—462.

პერიოდი დაიწყო. ოსმალებმა გარნიზონები ჩააყენეს ციხისძირის, ქობულეთის, სეფის, გრიგოლეთისა და ანაკლიის ციხეებში, გაამაგრეს ადრევე მათ ხელში მყოფი ბათუმის, ჩაქვის, ფოთის, ბიჭვინთისა და ანაკოფიის ციხეები¹. ოსმალთა გარნიზონები იდგა ქუთაისის, ბაღდათის (თხმელისციხე), ცუცხვათის ციხეებში. თურქთა ხელში გადავიდა სუჯუკის (ახლანდელი ნოვოროსიისკის ადგილას) ციხეც.²

განსაკუთრებით გააქტიურდნენ ოსმალები 1725 წელს; მათ ფოთში ორთულდიანი ფაშა დასვეს და მას შავი ზღვის აღმოსავლეთი სანაპიროს გამგებლობა ჩააბარეს. რუხის ციხე, რომელიც დაშორებული იყო ზღვას და ოდიშის უმთავრეს სიმაგრეს წარმოადგენდა, დაანგრეს და მისი ქვით ანაკლიის ციხე ააშენეს, რომელსაც რედუთკალე უწოდეს.³

1725 წელს თურქები იმერეთში ახალი ციხეების ასაგებად ემზადებოდნენ (საჩინოში, — ეკალში) და ჯარის ჩაყენებას აპირებდნენ შორაპნის ციხესა და გეგუთის ციხე-დარბაზში.⁴

პირობები დასავლეთ საქართველოს დაპყრობისათვის მეტად ხელსაყრელი იყო. მეფესა და თავადებს თვით შემოპყავდათ ოსმალები. ჯერ კიდევ 1666 წელს ქუთაისის ციხეში სეზნია ჩხეიძემ ჩააყენა იანიჩარები, ხოლო 1721 წელს ცუცხვათის ციხეში, რომელიც ალექსანდრე V-მ ოსმალების დახმარებით წაართვა ზურაბ აბაშიძეს, ოსმალთა გარნიზონი იდგა.

1728 წელს ზურაბ აბაშიძემ იმის შიშით, რომ ალექსანდრე მეფე მას შორაპნის ციხეს წაართმევდა, შიგ ოსმალთა მეციხოვნეები ჩააყენა. ამავე ხანებში ჩაიგდეს ხელთ ოსმალებმა ბაღდათის ციხეც.

თურქთა წარმატებას თვით ქართველ ფეოდალთა შუღლი უწყობდა ხელს. გურიის სამთავროში თურქთა ხელშემწყობად თავადი ნაკაშიძე გამოვიდა. საერთოდ, საქართველოს ტერიტორიაზე არსებულ ციხეებში ყველგან გამაჰმადიანებული, რენეგატი ქართველები იდგნენ.

შუღლის ნიადაგზე ზურაბ აბაშიძემ დადიანის საწინააღმდეგოდ მოიწვია ისაყ-ფაშა, რომელმაც იმერეთში თავისი შვილი უსუფი გამოგზავნა. ეს უკანასკნელი ეთათბირა ალექსანდრე მეფეს და მისი თანხმობით 1728 წელს გეგუთის სასახლეში ბეჟან დადიანი მიიპა-

¹ ქ. ჩხატარაიშვილი, დასახ. ნაშრ., გვ. 462.

² შ. ბურჯანაძე, ლიხთ-იმერეთის 1737 წლის რუკა, როგორც საქართველოს ისტორიის პირველწყარო, საქ. მეცნ. აკადემიის ხელნაწერთა ინსტიტუტის მოამბე, I, 1959, გვ. 192 — 197.

³ ეახუშტი, გვ. 883.

⁴ გ. პაიკაძე, რუსეთ-საქართველოს ურთიერთობა, 1725—1735 წწ., 1967, გვ. 39 (რუს.).

ტიუა, იგიც თამამად გამოცხადდა უსუფთან, რადგან „ფაშას ალექსანდრე უვანბლობა“, მაგრამ შესვლისთანავე უსუფის საჭურველმეტყვერთველმა მაჰმად-ბეგმა ხანჯლით განგმირა ბეჟანი,¹ მისმა შვილმა ოტიამ კი გაქცევით უშველა თავს.

მიუხედავად ყოველივე ამისა, ოსმალები ქვეყნის დაპყრობის საქმეში საკმაო ენერგიას ვერ იჩენდნენ. არც იმერეთის მეფესა და თავადებს წარმოედგინათ უშუალო საფრთხედ ოსმალთა მიერ ქვეყნის დაპყრობა; მაგალითად, 1738 წელს ალექსანდრე მეფე დარწმუნებული იყო, რომ იმერეთში შემოსვლა „თათართ“ კეჟაში არა ჰქონდათ, თუმცა მოსახლერენი იყვნენ, მაგრამ იმერეთში ვერ შეძლებდნენ შემოსვლას, რადგან იგი ყოველმხრივ გამაგრებული და გზებიც მეტად ცუდი იყო. ო

უფრო ენერგიულად იბრძოდნენ თურქები შავი ზღვის ზოლის დასაპყრობად; მათ გეგმაში შედიოდა ბათომიდან აზოვამდე ზღვის სანაპიროს დაპყრობა და მთიელთა ტომის (ჯიქების) დამორჩილება; ამ მიზნით 1730 წელს² დიდი ლაშქრობა წამოიწყეს ახლად დანიშნული ფოთის ფაშას სარდლობით.

ამ ლაშქრობაში ფაშას მოწოდებით იმერთა მეფე ალექსანდრეც იღებდა მონაწილეობას, რათა ოსმალთათვის ერთგულება ეჩვენებინა, ამით დასავლეთი საქართველოს ფეოდალები დაეთრგუნა და ოდიშისათვის ზიანი მიეყენებინა. ოტია დადიანმა უარი განაცხადა ამ ლაშქრობაში მონაწილეობაზე, იგი ალექსანდრე მეფეს ურჩევდა, არ დახმარებოდა ოსმალთ, „ვინაითგან არა კეთილ არს დაპყრობა მათგან ზღვის კიდისა ჩუენთვის“.³ ალექსანდრემ არ მოუსმინა დადიანს, პირიქით, თურქებთან ერთად იმერეთის ლაშქარიც მონაწილეობდა ოდიშის დასალაშქრავად (რადგან ოტია დადიანი განელტვო თურქთ), მათ დაარბიეს, გაძარცვეს და ცეცხლი წაუკიდეს ილორის ეკლესიას, შემდეგ გადავიდნენ აფხაზეთში. შერვაშიძემ წინააღმდეგობა გაუწია ოსმალთ, მაგრამ დამარცხდა და იძულებული გახდა, ქედი მოეხარა მათ წინაშე. ფაშამ იგი თავის ამაღასთან ერთად იძულებით გაამაჰმადიანა.

ამ ლაშქრობის დროს იმერეთის მეფე ალექსანდრე V დარწმუნდა, რომ თუკი ფაშა გაიმარჯვებდა, იმერეთის საშინაო და საგარეო მდგომარეობა გართულდებოდა, თურქთა უღელი უფრო მძიმე გახ-

¹ ვახუშტი, გვ. 884.

² ს. კაკაბაძე, საისტორიო მოამბე, I, 1925, გვ. 162. დოკუმენტი, სადაც ამ ლაშქრობაზეა ლაპარაკი, დათარიღებულია 1730 წლის მარტით. ვახუშტის ცნობით, ეს ლაშქრობა 1733 წელს იყო. იხ. ქართლის ცხოვრება, ტ. IV, თბ., 1973, გვ. 886—887.

³ ვახუშტი, გვ. 886.

დებოდა. ამიტომ, როცა ფაშამ მეფეს ჩიქეთზე და შემდეგ აზოვამდე ლაშქრობა მოსთხოვა, იგი თურქთა ბანაკიდან გამოიპარა. აფხაზები ფაშას აუჯანყდნენ და პარტიზანული თავდასხმებით ლაშქრის დიდი ნაწილი გაუჟლიტეს, ლაშქარს მოწყვეტილმა ფაშამ მხოლოდ გაქცევით უშველა თავს.

ამრიგად, ოსმალთა ეს ლაშქრობა მარცხით დამთავრდა, მაგრამ საფრთხეს მაინც არ გაუვლია, შავი ზღვის აღმოსავლეთი სანაპირო, რუსეთთან მეტოქეობაში სულ უფრო და უფრო მნიშვნელოვანი ხდებოდა.

1723 და 1730 წლებში ოსმალთა ორი ლაშქრობა დასავლეთ საქართველოში იმითაც იყო გამოწვეული, რომ აღმოსავლეთ საქართველოსთან ერთად იმერეთის მეფე ალექსანდრე V კავშირს ამყარებდა რუსეთთან, იქიდან ესახებოდა მას ოსმალთაგან ხსნის იმედი. ამავე დროს, ვახტანგ VI-ს დიდი გავლენა ჰქონდა, როგორც იმერთა მეფეზე, ასე პროგრესულად მოაზროვნე იმერეთის ფეოდალებზეც. და უდიდესი ავტორიტეტით სარგებლობდა მთელ საქართველოში, მეფე-მთავრები ხშირად რჩევა-დარიგებას ვახტანგისაგან ითხოვდნენ. იგი საქართველოს დაშლილობის პერიოდში ქვეყნის პოლიტიკური გაერთიანებისათვის მებრძოლ პროგრესულ ელემენტთა წინამძღოლი იყო. ეს კარგად ესმოდათ ოსმალეთის ხელისუფალთ — აგრეთვე ისიც, რომ რუსეთი ძლევამოსილად მოემართებოდა ამიერკავკასიისაკენ და საქართველოც მის მხარეზე იყო, მაგრამ მათ ძველი ძლიერება დაკარგული ჰქონდათ, საქართველოც ძნელად მისადგომ ქვეყანას წარმოადგენდა, ამდენად, თავიანთ მგლურ პოლიტიკას ახალციხისა და ტრაპიზონის გამაჰმადიანებული ქართველი ფეოდალების მეშვეობით ახორციელებდნენ. ამ ფეოდალებს კი საკუთარი მოსაზრება გააჩნდათ დასავლეთი საქართველოს შესახებ.

„საქართველოს საბოლოოდ დაპყრობა და ჩილდირის საბეგლარბეგოს თურქეთის მონაპირე პროვინციიდან შიდა პროვინციად გადაქცევა ახალციხის ფაშებისათვის ხელსაყრელი არ იყო: ასეთ შემთხვევაში ახალციხის ლაშქარი ვალდებული იქნებოდა, მონაწილეობა მიეღო თურქეთის ლაშქრობაში აფრიკის, წინა აზიისა და ბალკანეთის ტერიტორიაზე, ისევე, როგორც ეს ოსმალეთის სხვა პროვინციების მოლაშქრეებს ევალებოდათ. ამ გარემოების გამო ახალციხის გამგებლები არ ცდილობდნენ დასავლეთ საქართველოში ადგილობრივი ხელისუფლების მოსპობას და ხშირად საგანგებოდ იწვევდნენ კონფლიქტს საქართველო-თურქეთის საზღვარზე, რათა ამ მხრიდან უშიშროების დაცვის საბაზით შორეულ ლაშქრობაში გაწვევა თავიდან აეცილებინათ. საქართველოს სამეფო-სამთავრო-

ბის არსებობა თურქეთის იმპერიას საფრთხეს არ უქმნიდა, ამის გამო მისი ყურადღება ძირითადად სხვა მხარეებისაკენ (ბალკანეთი, აფრიკა, ყირიმი...) იყო მიმართული. ეს გარემოება — თურქეთის საშინაო ცხოვრებაში იმ დროს არსებული გართულებები — მნიშვნელოვნად განაპირობებს იმ ფაქტს, რომ XVII საუკუნის პირველ ნახევარში ფეოდალური შინაომებით უალრესად დასუსტებული დასავლეთი საქართველო აღმოსავლეთის იმპერიის პროვინციად არ იქცა¹.

1579 წლიდან — ახალციხის საფაშოს დაარსების დღიდან 1628 წლამდე ქართველი ათაბაგები იბრძვიან სამცხიდან ოსმალთა განდევნისა და ათაბაგის ხელისუფლების აღსადგენად, მაგრამ მიზანს ვერ აღწევენ.

1628 წელს სულთანმა მურად IV-მ (1623 — 1640 წწ.) ათაბაგი ბექა III (1628 — 1651 წწ.) ფაშად დანიშნა, შემდეგში მას საფარ-ფაშა ეწოდა. ამით სულთანმა მოსპო სამცხეში ათაბაგის სახით შემორჩენილი ადგილობრივი ხელისუფლება, რის შემდეგ ქართულმა ფეოდალურმა სამთავრომ პოლიტიკური არსებობა შეწყვიტა და ათაბაგის ადგილი სულთნის მოხელე ფაშამ დაიკავა. ამ დროიდან მოყოლებული სამცხეში სწრაფად ვრცელდება მაჰმადიანობა.

ახალციხის საფაშოს მართვა-გამგებლობა და ადმინისტრაციული დაყოფა ოსმალურ საფუძველზე იყო მოწყობილი, მაგრამ მიუხედავად ამისა, იგი მაინც ინარჩუნებდა მთელ რიგ თავისებურებებს და განსხვავდებოდა ოსმალეთის იმპერიის სხვა პროვინციებისაგან, მაგალითად: ოსმალეთში კანონით დაუშვებელი იყო პროვინციების მართვა-გამგებლობა მემკვიდრეობის წესით; ფაშას ირჩევდნენ ჯერ სამი, შემდეგ — ორი და შემდეგ ერთი წლით; თუ ფაშა სულთნის იმედებს ვერ გაამართლებდა, იგი კარგავდა ძალაუფლებას, ამით სულთნის ხელისუფლებას მორჩილებაში ჰყავდა პროვინციის გამგებლები და მათ გაძლიერების საშუალებას არ აძლევდა. სულთანი მურად IV იძულებული გახდა, სამცხის მიმართ გარკვეულ კომპრომისზე წასულიყო და ბექა III-ს სამცხის ფაშობა მემკვიდრეობით უბოძა (1628 წელს). ამიერიდან სამცხეს გამაჰმადიანებული ჯაყელები (ათაბაგები) განაგებდნენ და მათ მემკვიდრეობის უფლება XVIII საუკუნის მეორე ნახევრამდე შეინარჩუნეს². მართალია, ოს-

¹ ქ. ჩხატარაიშვილი, დასახ. ნაშრ., გვ. 464.

² მ. სვანიძე, საქართველო-ოსმალეთის ურთიერთობის ისტორიიდან, XVI—XVII სს., თბ., 1971, გვ. 300—305.

მალეთი დასავლეთ საქართველოს თავის ვასალ ქვეყნად თვლიდა და აქტიურად ერეოდა მის საშინაო საკმეიძი, ძაგრამ ქრისტიანულ სარწმუნოებას ხელს არ ახლებდა და გამაჰმადიანებას არ მოითხოვდა. (გამონაკლისს აფხაზეთი წარმოადგენდა, სადაც მაჰმადიანობა ფეხს იკიდებდა, თუმცა ოსმალები ოფიციალურად არც აფხაზეთისაგან მოითხოვდნენ სჯულის შეცვლას).

დასავლეთი საქართველოს ყველა მეფე-მთავარი ქრისტიანი იყო და ოსმალებს არც უცდიათ მათი გამაჰმადიანება, მიუხედავად იმისა, რომ მეფე-მთავრებს სულთნები ამტკიცებდნენ ტახტზე და ხშირ შემთხვევაში პოლიტიკურ თავშესაფარსაც ქართველი გამგებელნი ახალციხეში პოვებდნენ და იქიდან ფაშის დახმარებით იღებდნენ სამეფო თუ სამთავრო ტახტს.

აღმოსავლეთი საქართველოსაგან განსხვავებით, დასავლეთი საქართველოს გამგებელნი თურქეთის მოხელედ („ვალი“, „ხანი“) არასოდეს არ გამხდარან, ჩვეულებრივ, ისინი „მელიქებად“ მოიხსენიებოდნენ და მათ თურქეთის სულთნისათვის არც ლაშქრის გაზაენა და არც ოსმალეთის ტერიტორიაზე სამსახური ვეალებოდათ. „საური“ ან „სათათრო“ გადასახადი, რომელსაც ოსმალეთს უგზავნიდნენ (ქართველები მას „ქრთამს“ ეძახდნენ), ძირითადად იყო ახალგაზრდა ქალ-ვაყები; ისინი პირველად ახალციხეში იგზავნებოდნენ და იქიდან კი ოსმალეთში — სულთანთან¹.

• •

1728 წელს ოსმალების მიერ ბეჟან დადიანის მოკვლის შემდეგ მთელი ძალაუფლება ალექსანდრე V-ის ხელში გადავიდა, მაგრამ უთანხმოება მეფე-მთავრებს შორის და ფეოდალური შინაომები შემდეგშიც გრძელდებოდა. ალექსანდრე V ცდილობდა მთავრების დამორჩილებას და თავისი უფლებების განმტკიცებას, მაგრამ, რადგან ეს მის ძალას აღემატებოდა, იგი ოსმალების დახმარებით ცდილობდა ყოველივე ამის განხორციელებას. დადიანი, რაჭის ერისთავი და აბაშიძე ჩვეული მზაკვრობით და ურთიერთლატის პირობებში განაგრძობდნენ მეფესთან ბრძოლას. ასეთ მდგომარეობაში მეფეც იძულებული ხდებოდა, ოსმალებს დაყრდნობოდა და მათგან ზურგის მომაგრებით ცდილობდა მეფობის შენარჩუნებას.

ოტიამ (რომელიც მამის სიკვდილის შემდეგ გადადიანდა) განიზრახა მეფის ჩამოგდება ტახტიდან. მან მიიმხრო რაჭის ერისთავი

¹ ქ. ჩხატარაიშვილი, საქართველოს საგარეო ურთიერთობათა ისტორიიდან, წიგნი — საქართველოს ფეოდალური ხანის ისტორიის საკითხები, თბ., 1972, გვ. 43 — 45.

და ზურაბ აბაშიძე, მეფის ძმას — მამუკა ბატონიშვილს ცოლად შერთო თავისი და და მისი მეფედ დასმა განიზრახა.

დადიანმა გეგუთს მოიყვანა ოდიშ-აფხაზეთის ლაშქარი, მას შეუერთდნენ ერისთავი და აბაშიძე. მეფე ქუთაისის ციხეში ჩაიკეტა. ამბოხებულნი შემოადგნენ ციხეს, მაგრამ ოსმალთა შიშით მისი აღება ვერ გაბედეს¹ და ლაშქრობა მოშალეს, მეფე გამოვიდა ციხიდან და ისევ შემოიბრტყია იმერეთი.

1732 წელს მეფემ ახალი მოყვრობით ერთგვარად განიბრტყია სამეფო ტახტი. მან ცოლად შეირთო ლევან აბაშიძის ასული, ხოლო თავისი ქალიშვილი პირველი ცოლისაგან მამია გურიელს მიათხოვა².

ოტია დადიანმა არ აპატიო ალექსანდრე მეფეს ოდიშის დარბევაში მონაწილეობა. იგი შეთქმულებას (მეორედ) უდგება სათავეში მეფის წინააღმდეგ. მისი თანამზრახველნი არიან გრიგოლ რაჭის ერისთავი (შოშიტა 1731 წელს გარდაიცვალა) და ზურაბ აბაშიძე. მათ მეფის მოკვლა ან გადაადგება და მის ადგილზე მეფის ძმის მამუკა ბატონიშვილს (მეორედ) გამეფება გადაწყვიტეს. მეფის მხარეზე იყვნენ: მამია გურიელი, ლევან აბაშიძე, დადიანის ძმა კაცია, ბარის ერისთავი გედევანი, მერაბ წულუკიძე და სხვანი.

ბარის ერისთავი გედევანი იყო შოშიტა რაჭის ერისთავის ძმა, გენათელი ეპისკოპოსი. მას ვახტანგ მეფის ასული ცოლად უნდოდა თავის ძმისწულ პაპუნასათვის, მაგრამ სარძლო შეუყვარდა, მღვდელმთაფრობას თავი გაანება და თვითონ შეირთო ცოლად, ამიტომ რაჭაში ველარ წავიდა, იმერთა მეფესთან მივიდა თხოვნით. მეფემ შეიწყალა. რაჭის ერისთავის საწინააღმდეგოდ მისცა მას „საერისთავო მამული იმერეთს და უწოდა ბარის ერისთავი“ (საერისთავოში შედიოდა სოფლები: ამაღლება, ძულუხი, სიმონეთი და ნაწილობრივ ბზვანი, რომელთაც ბარის ერისთავები ფლობდნენ XIX საუკუნეშიც).

ამრიგად ალექსანდრე V-მ ბარის საერისთავო შექმნა რაჭის ერისთავთა საპირისპიროდ, მაგრამ ამ ღონისძიებას მეფისათვის რაიმე მნიშვნელოვანი სარგებლობა არ მოუტანია. მართალია, ბარის ერისთავები მეფის ერთგულნი იყვნენ, მაგრამ ამან ვერ იხსნა რაჭის ერისთავთა მძლავრობისაგან და რაჭის საერისთავოს შემდგომ გაძლიერებას ხელი ვერ შეუშალა.

ორი კოალიცია ერთმანეთს შეხვდა ჩიხორში. ბრძოლა მოხდა 1732 წელს, მეფის ლაშქარმა გაიმარჯვა. ოტია დადიანი დაქრილი

¹ ვახუშტი, გვ. 885—886.

² იქვე, გვ. 885.

ტყვედ ჩაუვარდა მეფეს, ხოლო კაცია დადიანი მოკლეს. მიუხედავად დიდი თოვლისა, იმერლები გამოუდგნენ გაქცეულთ, მრავალი შეიპყრეს და ოსმალებზე დაყიდეს¹.

მეფემ განკურნა დადიანი და განთავისუფლება დაუპირა, სამაგიეროდ ლეჩხუმის დათმობა მოსთხოვა, მაგრამ უარი მიიღო. საქმეში ჩაერივნენ ოსმალები; მათ არ სურდათ მეფის გაძლიერება — ეს მათ გეგმაში არ შედიოდა და ალექსანდრე V-ს მოსთხოვეს დადიანის გაშვება. მეფე იძულებული გახდა, დათანხმებულიყო, რადგან სხვა გზა არ ჰქონდა: ისაყ-ფაშამ დიდი ქრთამის ფასად (დადიანისაგან) ოსმალთა და ქართველთა ჯარი² გამოგზავნა მამედბეგისა და გივი ამილახორის სარდლობით დადიანის გასათავისუფლებლად. მეფემ მხოლოდ იმას მიაღწია, რომ დადიანს წაართვა საჭილაო-სამიქელაო, მამედბეგს მიათხოვა თავისი და, დადიანთან ზავი დადო და ამით ისევ შემომტყიცა იმერეთი. ხოლო მამუკა ბატონიშვილს საუფლისწულოდ მისცა საჭილაო-სამიქელაო. ამ მამულს მამუკამ საჩიჩაევადო მამულიც მიუმატა.

ამდენი ომიანობა, არევე-ღარევა, ამასთან გახშირებული ტყვეთა სყიდვა სასოწარკვეთილებაში აგდებდა ქვეყანას; შინაომებმა სამეფო სალარო დააცარიელა, მეფეს სათურქო ხარკის გადახდაც კი აღარ შეეძლო, ამიტომ ამ ვალდებულებას მხოლოდ ტყვის სყიდვის მეშვეობით ასრულებდა³. გამოსავალი არსაიდან ჩანდა. მხოლოდ ეკ-

¹ სე ხ ნ ი ა ჩ ხ ე ი ძ ე, ცხოვრება მეფეთა, გვ. 60; ვ ა ხ უ შ ტ ი, ქართლის ცხოვრება, ტ. IV, გვ. 888, ვახუშტი ამ ბრძოლის თარიღად 1734 წელს აჩვენებს, ხოლო ე. წ. „აბაშიძის ქრონიკა“ ანუ „იმერეთის ქრონიკები“ და „ანთაძის ქრონიკა“ 1731 წელს (იხ. თ. ვორდანიანი, ქრონიკები, ტ. III, თბ., 1967, გვ. 127, 639).

ერთი ქრონიკა ჩიხორის ომს 1708 წლით ათარიღებს (იხ. ქრონიკები, III, თბ., 1967, გვ. 638). ერთი ქრონიკის ცნობით კიდევ 1728 წელია ნაჩვენები (იხ. ქართულ ხელნაწერთა აღწერილობა ახალი (Q) კოლექციისა, ტ. II, თბ., 1958, გვ. 537).

„მცირე ქრონიკები“ ამ ბრძოლის თარიღად 1732 წელს აღნიშნავენ (იხ. მცირე ქრონიკები, თბ., 1968, გვ. 70).

ქ. ჩ ხ ა ტ ა რ ა ი შ ვ ი ლ ი ჩიხორის ბრძოლას 1732 წლით ათარიღებს (იხ. ნარკვევები საქ.: ისტორიიდან, ტ. IV, გვ. 465).

ამ ბრძოლაში მონაწილეობდა გრიგოლ რაკის ერისთავი, ვ ა ხ უ შ ტ ი ს ცნობით კი — გრიგოლი ერისთავად დაჯდა 1731 წელს. ამ საწინააღმდეგო ცნობათა შორის სეხნია ჩხეიძის ცნობა უფრო სანდოა, რადგანადაც ის ამ ომის თანამედროვეა. ამდენად ჩიხორის ბრძოლა 1732 წელს უნდა მომხდარიყო.

² რადგან 1724—1735 წლებში მთელი საქართველო ოსმალეთის შორჩილებაში იყო, აღმოსავლეთ საქართველოს ჯარი ფაშის ბრძანებით გადმოვიდა იმერეთში.

³ ცნობა მეფის ფინანსურ (ხელნაწერთა ინსტიტუტი SD — 1168) სიძნელეთა შესახებ; ქართლის ცხოვრება, ტ. IV, თბ., 1973 წ., გვ. 889.

ლესიის ზოგიერთი მესვეური, მაგალითად, კათალიკოსი გრიგოლ ლორთქიფანიძე (1696 — 1742 წწ.) და სხვა მღვდელმთავრები ცდილობდნენ ზნეობრივი ზემოქმედებით აღვირახსნილობის შეჩერებას, მაგრამ მათი მიმართვა რჩებოდა ხმალ მლალადებლისა უდაბნოსა შინა¹.

ურთიერთობევა და დალატი მაინც გრძელდებოდა. ალექსანდრე V-მ თავისი დის ქმარს — ზურაბ აბაშიძის შვილს დავითს და პაპუნა წერეთელს დალატით თავები მოჰკვეთა ვარციხის სასახლეში². თვითონ სწრაფად გაილაშქრა საჩხერის („მოღინახეს“) ციხის ასაღებად, მაგრამ წერეთლის ქვრივმა და მისმა ძემ ციხის გამაგრება მოასწრეს, მეფე საწადელს ვერ ეწია და ხელმოცარული უკან მობრუნდა.

იმერეთის დიდებულები მეფისაგან ასეთ მოქმედებას არ ელოდნენ, შურისძიების მიზნით ზურაბ აბაშიძე, გრიგოლ რაჭის ერისთავი და ოტია დადიანი კვლავ შეითქვენენ და საბრძოლველად ემზადებოდნენ, მაგრამ მეფემ შეიტყო მათი სამზადისი და დასწრება ამჯობინა. მან დახმარებისათვის შანშე ქსნის ერისთავს მიმართა. ერისთავმა ქართლის ჯართან ერთად 500 ლეკიც იახლა. ამ ლაშქარმა მეფე ალექსანდრეს წინამძღოლობით „შემუსრნეს ციხენი და მრავალნი კოშკნი, მოსწვეს და მოსტყუენენეს და შთავიდნენ ოდიშს და უძვირესნი ბოროტნი ყვნეს“³.

ხედავდა რა „ქვეყნის დაქვევას“, ლევან აბაშიძემ მეფეს ურჩია: — „არა კეთილ არს ლეკთაგან შემუსრვა ქუეყანისა ჩუენისა, რაჟამს სცნან ადგილნი, თვითვე მრავალსა ბოროტსა შეგვაჩუენებენ, ვითარცა უყვეს სხუათა“⁴. მეფემ შეისმინა აბაშიძის რჩევა, ლეკებს ტყვეები არ გაატანა, მაგრამ ალაფით დატვირთულები კი გაისტუმრა უკან.

იმერეთისა და ოდიშის დარბევის შემდეგ მეფემ თავისი ნახევარძმა გიორგი და ლევან აბაშიძე წარგზავნა ქართლს ვახუტი აბაშიძის (ზურაბ აბაშიძის ძმის) შესაპყრობად. ისინი მოულოდნელად დაესხნენ თავს ტეძერს მყოფ ვახუშტის, შეიპყრეს და მეფეს მოკვარეს. მეფემ იგი ნავარძეთის ციხეში გამოკეტა, 500 ჭისა თეთრი

¹ ს. კაკაბაძე, საქართველოს ისტორია, ახალი საუკუნეების ეპოქა, თბ., 1920, გვ. 73.

² ნიკო დადიანი, ქართველთ ცხოვრება, თბ., 1962, გვ. 176; ვახუშტი, 890.

³ იქვე.

⁴ იქვე.

და ვახანის ციხის მოცემა მოსთხოვა, მაგრამ ვახუშტი ამ მოთხოვნაზე არ დასთანხმდა¹.

ქართლის კათალიკოსი დომენტი ეახლა მეფეს და პატიმრის განთავისუფლება სთხოვა; მეფემ უარი აკადრა და უპატივცემლოდაც მოექცა². შემდეგ იუსუფ-ფაშამ გამოუგზავნა „აღკაზმული ცხენი, ქულაჯი და ოცი ქისა თეთრი“³, რათა გაათავისუფლოს ვახუშტი, მაგრამ ამჯერადაც მეფემ იუსუფ-ფაშას თხოვნა არ შეასრულა და ამით მისი უკმაყოფილება გამოიწვია.

როგორც კი მეფის უარი იუსუფ-ფაშისადმი და მათ შორის ჩამოვარდნილი სამდურავი შეიტყვეს, სამეული კვლავ წამოიშალა; „ვიტომც ფაშას საამებლად“ ოტია დადიანმა იშოვა „სპანი აფხაზთა“, მას შეუერთდნენ ზურაბ აბაშიძე, გრიგოლ ერისთავი და მარბიელი ჯარი იმერეთისკენ გამოუშვეს, რომელიც მოულოდნელად თავს დაესხა ვარციხის სასახლეში მყოფ მეფეს. მეფემ და დედოფალმა ძლივს მოასწრეს გაქცევა. სხვანი — სასახლეში მყოფნი — ერთბაშად დაატყვევეს, სასახლე დაწვეს და ციხე დააქციეს. ეს მოხდა 1740 წელს⁴.

განაწყენებულმა იუსუფ-ფაშამ 1741 წელს ოსმალთა ჯარიც გამოგზავნა ალექსანდრე მეფის წინააღმდეგ. ოსმალებს დადიანი, აბაშიძე და ერისთავი შეუერთდნენ. მეფეს ძალა არ შესწევდა წინააღმდეგობის გასაწევად, უბრძოლველად დათმო მეფის ტახტი და ქართლში გადაიხვეწა.

გამარჯვებულებმა იმავე 1741 წელს სამეფო ტახტზე ალექსანდრე V-ის უმცროსი ნახევარძმა გიორგი გაამეფეს⁵.

ლტოლვილ მეფეს თან გაჰყვნენ ლევან აბაშიძე (სიმამრი), ძმა მამუკა ბატონიშვილი, ბარის ერისთავი და სხვა დიდებულები. მათ თან წაიყვანეს პატიმარი ვახუშტი აბაშიძე.

ქართლის ხანმა მეფე დიდი პატივისცემით მიიღო, ისე, როგორც მეფეს ეკადრებოდა, მაგრამ შემდეგ დაატყვევა. ამის მხილ-

¹ ვახუშტი, გვ. 890.

² იქვე.

³ იქვე, გვ. 891.

⁴ ხელნაწერთა ინსტიტუტი, ფ. Sd ნაბ. 1563; ქართლის ცხოვრება, ტ. IV, გვ. 891. სიგელი იმერთა მეფის სოლომონ II-ისა 1805 წლისა ზურაბ და ქაიხოსრო წერეთლებისადმი. ს. კაკაბაძე, წერილები და მასალები. საქ. ისტ. გვ. 91.

⁵ დადიანი, ქართველთა ცხოვრება, თბ., 1962, გვ. 167; ქართლის ცხოვრება, ტ. IV, გვ. 892.

ველი ბარის ერისთავი ეახლა დარუბანდში მყოფ ირანის მბრძანებელს — ნადირ-შაჰს და მეფის თხოვნა მიართვა¹.

ნადირ-შაჰმა შეიწყალა მეფე და ახალციხის ფაშას იმერეთიდან გამოძევებული მეფის თაობაზე სთხოვა „ჩემი შემოხვეწილი არის და ისევ თავისი ქვეყანა დაანებე და რასაც იმას პატივს მისცემთ ჩემად პატივად ჩაივიღებო“². იუსუფ-ფაშამ ნადირ-შაჰის თხოვნას ანგარიში გაუწია და ალექსანდრე იმერთა მეფე ისე დააბრუნა ტახტზე, რომ თურქეთის ცენტრალური ხელისუფლებისათვის არც კი უკითხავს (1741 წელს).

იუსუფ-ფაშამ დასავლეთი საქართველოს დიდებულები შეარიგა მეფესთან და ისევ უკანვე გაბრუნდა, მაგრამ მოკლე ხანში დადინი, აბაშიძე და ერისთავი ისევ გამოუღვნენ მეფეს. ეს ამბავი მეფემ თავის დედინაცვალს — თაჰარს (მეტსახელად კოჭიბროლას) დააბრალა და თავი მოჰკვეთა³. შემდეგ გიორგის მომხრენი დააწიოკა და დედობუდიანად ოსმალეთში დაყიდა.

ზურაბ აბაშიძის მიმართ სახლიკაცთა შორის უკმაყოფილება გაჩნდა, ამით ისარგებლა მეფემ და მას მისივე ბიძაშვილი ლევანი დაუპირისპირა. ამის შემდეგ ზურაბს იმერეთში აღარ ედგომებოდა და იგი ქართლში გადაიხვეწა. სახლის უფროსად კი აბაშიძეებმა ლევანი დასვეს⁴.

ლევანი გიორგი აბაშიძის (იმერთა მეფედ ყოფილის) შვილი იყო, როცა მისი მამა ქართლში გადაიხვეწა, ერთხანს იგი შეეცწრობულ მდგომარეობაში იმყოფებოდა, მაგრამ როცა მეფე ალექსანდრემ მისი ასული ცოლად შეირთო და იმავე დროს მეფესთან ზრძოლაში ზურაბ აბაშიძე დაამარცხა, ლევანი მნიშვნელოვნად გაძლიერდა და მასაც ისეთივე პრეტენზიები გაუჩნდა, როგორც თავის დროზე მამამისს — გიორგი აბაშიძეს ჰქონდა.

1743 წელს ალექსანდრე V-ს კვლავ აუჯანყდნენ დადიანი და რაქის ერისთავი, მეფემ ქუთაისის ციხეს შეაფარა თავი⁵ და იქიდან ახალციხეს გაგზავნა თხოვნა დახმარების შესახებ. მოკავშირეები

¹ ქართლის ცხოვრება, ტ. IV, გვ. 891.

² იქვე.

³ ვ ა პ უ ნ ა ო რ ბ ე ლ ი ა ნ ი, „ამბავნი ქართლისანი“ [წიგნში „ქართლის ცხოვრება დასაბამითან მეცხრამეტე საუკუნემდის, ნაწილი მეორე, გამოცემული უ. ჩუბინოვისაგან, „სანკტ-პეტერბურგი, 1854,] გვ. 349.

⁴ ო. ს ო ს ე ლ ი ა, ნარკვევები ფეოლ. ხანის დასავლ. საქ. სოც.-პოლიტ. ისტორიიდან, თბ., 1973, გვ. 188—189.

⁵ სიგელი იმერთა მეფის სოლომონ II-ისა, იხ.; ს. კ ა კ ა ბ ა ძ ე, წერილები და მასალები საქ. ისტორიისათვის, გვ. 91.

გეგუთს¹ იდგნენ ჯარით, როცა ამბის გასაგებად და მოწინააღმდეგის დასაზვერავად მათევენ გაემართნენ აბაშიძე და ბარის ერისთავი. მოხდა მცირე შეტაკება, მოკავშირეთ ეგონათ, ოსმალთა მოწინავე ჯარი მოდისო და გაიქცნენ. ამ მცირე შეტაკებაში მოკლეს გრიგოლ რაჭის ერისთავი. გამარჯვება მეფეს დაჩა. გრიგოლის ნაცვლად ერისთავად მისი ძმა ვახტანგი დასვეს, რომელთანაც მეფემ ზავი დადო და ერთხანს მშვიდობა დამყარდა, მაგრამ ვახტანგ ერისთავიც იყო ალექსანდრე მეფის „ორგულობასა და წინააღმდეგობასა შინა“².

მოკავშირეებმა 1746 წელს ერთხელ კიდევ მოახერხეს ალექსანდრე მეფის ტახტიდან გადაგდება. ამჯერად იმერთა ტახტზე მეფედ მამუკა ბატონიშვილი დასვეს, მაგრამ 1749 წელს მეფე ალექსანდრემ ახალციხის ფაშის ლაშქრით კვლავ დაიბრუნა სამეფო ტახტი.

1752 წელს ალექსანდრე V გარდაიცვალა და ტახტი მისმა შვილმა ჩოლომონ I-მა დაიკავა.

თუმცა ალექსანდრე V თურქებზე დაყრდნობით ცდილობდა შეექმნა მტკიცე სამეფო ხელისუფლება, მაგრამ სიძნელეებს თავი ვერ გაართვა, მთავრები და ფეოდალები ვერ დაიმორჩილა და ძალუწებურად თვით გახდა დამხმარე ძალა ოსმალებისა შინაგანი ურთიერთბრძოლის გაღვივებისა და ამის შედეგად ქვეყნის დასუსტების საქმეში.

• •

XVIII საუკუნის დასაწყისში ოსმალების გააქტიურება საქართველოს მიმართ თანდათანობით სახიფათო ხდებოდა, საქართველოს მესვეურნი ამას კარგად ხედავდნენ და ამიტომ ისევ რუსეთისაკენ ეკირათ თვალი და იქიდან ელოდნენ ხსნას. ამას ის ფაქტიც ადასტურებს, რომ განჯის ლაშქრობაში ვახტანგ VI ჯართან ერთად იმერეთის ლაშქარიც იღებდა მონაწილეობას. ვახტანგ VI-ის

¹ ქართლის ცხოვრება, ტ. IV, გვ. 813.

² ხელნაწერთა ინსტიტუტი, ფ. Sd საბ. № 1563; ქართლის ცხოვრება, ტ. IV, გვ. 893. ვახტანგის ერისთავობა გავრძელდა დაახლოებით 1749 წლამდე. 1750 წლის 29 ივლისს რაჭის ერისთავად როსტომი იხსენიება. იხ. ხელნაწერთა ინსტიტუტი, ფ. Sd საბ. № 1563, შეადარე საქუცენტრარქივი, ფ. 226 (1), საბ. № 1181; (იხ. აგრეთვე სიგელი იმერთა მეფის სოლომონ II-ისა) 1805 წლისა (ზურაბ და ქაიხოსრო წერეთლებისადმი): წერილები და მასალები საქ. ისტორიისათვის ს. კაკაბაძისა, 1914, გვ. 91.

ელჩს რუსეთის მთავრობასთან ალექსანდრე V-მ თავისი სახელითაც დააავალა მოლაპარაკების წარმოება¹.

1723 წლის დიდი კამპანიის შედეგად ოსმალებმა შავი ზღვის ზოლი დაიპყრეს. როცა ვახტანგ VI-მ საქართველო დატოვა (1724 წ.) და ქართლ-კახეთს ოსმალები დაეპატრონენ, ალექსანდრე V-მ ისევ მიმართა რუსეთის მთავრობას წერილით კაპიტან-პორუჩიკ გიორგი დადიანის მეშვეობით. მეფე რუსეთის საიმპერატორო კარს იმერეთის გაჭირვებულ მდგომარეობას ატყობინებდა, რუსეთისაგან ფულად დახმარებას ითხოვდა და საჭიროდ მიაჩნდა საქართველოში პეტრე I-ის ჩამოსვლა². მაგრამ მოხდა ისე, რომ 1724 წლის ხელშეკრულებით რუსეთი იძულებული გახდა, მთელი საქართველო ოსმალეთის გავლენის-სფეროდ ეცნო. მიუხედავად ამისა, ქართველი პოლიტიკური მოღვაწენი მაინც რუსეთისაგან მოელოდნენ ხსნას, რადგან ჯერ ერთი, დასავლეთი ევროპა შორს იყო და მისი დახმარება საეჭვო, ხოლო რუსეთი, გარდა გეოგრაფიული სიახლოვისა, ამიერკავკასიაში იმთავითვე ისახავდა პოლიტიკურ მიზნებს: — „მესამე რომის“ სახელით ის აღმოსავლეთის ქრისტიანობის მფარველობას იჩემებდა და ამით ამიერკავკასიაში მუსლიმან სახელმწიფოთა მოწინააღმდეგედ გამოდიოდა³. თუმცა XVII საუკუნის მანძილზე რუსეთმა არაერთხელ გამოამჟღავნა ავისი სისუსტე ამიერკავკასიაში, მაგრამ 1714 და 1722 წლებში აღმოჩნდა, რომ დასავლეთი ევროპის სახელმწიფოები კიდევ უფრო ნაკლებრეალური მოკავშირეები იყვნენ საქართველოსი, ვიდრე რუსეთი.

რუსეთის გამოჩენამ ამიერკავკასიაში შეცვალა ქართველ პოლიტიკურ მოღვაწეთა დასავლეთეევროპული გეგმები; „რუსეთი პეტრეს სახით პირველი დიდი სახელმწიფო იყო, რომელიც ამიერკავკასიის მიწაზე მოვიდა, ირანსაც და ოსმალეთსაც დაუპირისპირდა და კავკასიის ქრისტიან ხალხებს კავშირი და მფარველობა შესთავაზა...“⁴ ქართველებს სწამდათ, რომ „რუსეთი მაინც ერთადერთი დიდი ქრისტიანული სახელმწიფოა, რომელსაც ამიერკავკასიაში რეალური პოლიტიკური ინტერესები აქვს და რომ ეს ინტერესები

¹ მ. ბ. როსენს რედაქციით, ქართველ მეფეთა მიმოწერა რუსეთის ხელმწიფეებთან, სპბ, 1861; გვ. 30—31, 147. შემდეგში — მ. ბ. როსენი, მიმოწერა (რუს.).

² ტიმოთე გაბაშვილი, მიმოსლეა, თბ., 1956, გვ. 080, ტექსტი გამოსაცემად მოაშხადა, გამოკლევა, ლექსიკონი და საძიებელი დაურთო ელ. პეტრეველმა.

³ ნ. ჯერძენიშვილი, საქართველოს ისტორიის საკითხები, ტ. II, თბ., 1965, გვ. 160.

⁴ იქვე, გვ. 161.

ქართველი ხალხის პოლიტიკურ მისწრაფებას არ ეწინააღმდეგება¹.

პეტრე I-ის სიკვდილის შემდეგ (1725 წ.) საქართველო-რუსეთის ურთიერთობა თანდათან შენედა. პეტრეს მემკვიდრეებმა ოსმალეთის დასუსტებით ვერ ისარგებლეს, რადგან რუსეთის საშინაო მდგომარეობა იმ დროს გაართულებული იყო და საქართველოს დახმარებაზე არავინ ზრუნავდა². პირიქით, 1730 წელს, ვახტანგ VI-ს ურჩიეს, საქართველოში შეეთვალა, რომ ქართველები თურქთა წინააღმდეგ ბრძოლაში მხოლოდ საკუთარ ძალებს მინდობოდნენ³.

ასეთი კატეგორიული უარის შემდეგ იმერეთის მეფე ალექსანდრე V შინც რუსეთისაკენ იშვერდა ხელს და რუსეთის მთავრობას მოაგონებდა 1651—1652 წლებში დადებული რუსეთ-იმერეთის ხელშეკრულების განხორციელებას, რომლის ძალითაც იმერეთი რუსეთის ხელდებულად ითვლებოდა⁴. 1732 წელს ალექსანდრე V-მ რუსეთში კვლავ გაგზავნა ელჩად არქიმანდრიტი ნიკოლოზი⁵. მეფე „ძველი წყალობის“ შენარჩუნებას ითხოვდა⁶, მაგრამ ამ თხოვნიდანაც არაფერი გამოვიდა — რუსეთის საიმპერატორო კარს ამჯერადაც არ ეცალა იმერეთისათვის.

XVIII საუკუნის დასაწყისში, განსაკუთრებით 20-იან წლებში თურქმა დამპყრობლებმა სამხედრო ინტერვენცია გააძლიერეს შავი ზღვის სანაპიროზე და იმერეთის სამეფოს შიგნით. ამან ფრთები შეასხა იმერეთის მეფის მოწინააღმდეგე ფეოდალებს. დადიანი, რაჭის ერისთავი და აბაშიძე სისტემატურად გამოდიოდნენ იმერეთის მეფის წინააღმდეგ. იმერეთის სამეფოს პოლიტიკური ისტორია XVIII საუკუნის პირველ ნახევარში, ძირითადად, ეს არის შინაფეოდალური ომები, თავადებისა და მთავრებისა იმერეთის მეფეების წინააღმდეგ. ფეოდალურ რეაქციას ზურგს უმაგრებდნენ თურქი დამპყრობლები, რომლებიც იმერეთის მთავარ ციხე-

¹ ნ. ბერძენიშვილი, საქართველოს ისტორიის საკითხები, ტ. II, თბ., 1965 გვ. 161.

² გ. პაიჭაძე, კონსტანტინე კახთა მეფის ელჩები რუსეთში (1724—1725 წლებში), გვ. 140.

³ იქვე.

⁴ მარი ბროსე, მიმოწერა, გვ. 196 (რუს.).

⁵ ეს არქიმანდრიტი ნიკოლოზი რუსეთში ელჩად გაგზავნა იმერთა მეფემ 1732 წელს, მაგრამ ასტრახანიდან, სადაც მას ყველა წერილი ჩამოართვეს, იმერეთში დაბრუნდა. მოგვიანებით ტიმოთე გაბაშვილი საყვედურს აცხადებდა, ნიკოლოზვილაცამ ყველა წერილი და ქაღალდი ჩამოართვა, რის გამოც იმერეთში არაფერი იცოდნენ იმპერატორის პასუხის შესახებო. იხ. გ. პაიჭაძე, ტიმოთე გაბაშვილის ელჩობა რუსეთში (1737—1740 წწ.) წიგნში „ქართული სამეფო-სამთავროების საგარეო პოლიტიკის ისტორიიდან“, I, 1970, გვ. 153.

⁶ მარი ბროსე, მიმოწერა, გვ. 196. (რუს.)

ებში იდგნენ არტილერიით შეიარაღებულნი; შეელოდა რა თავადებს, ამით თურქეთი ხელს უწყობდა ქვეყნის დაშლასა და მეფის ცენტრალური ხელისუფლების დაუძლურებას¹.

მართალია, ალექსანდრე V თურქეთის ძლიერებას ემყარებოდა მთელი თავისი მეფობის პერიოდში და მისი დანშარებით ცდილობდა სამეფო ტახტზე მომაგრებას, მაგრამ იგი დარწმუნებული იყო, რომ საბოლოოდ თურქეთს მისი ერისთვის სასიკეთო არაფერი მოჰქონდა. ამიტომ მან იმერეთის სამეფოს ერთიანობის იმედი რუსეთის სამხედრო დანშარებაზე დაამყარა. რუსეთი იყო ერთადერთი სერიოზული ძალა, რომელიც წარმატებით მოიწვედა შავი ზღვისა და კავკასიისაკენ და უპირისპირდებოდა შავ ზღვაზე და კავკასიაში გაბატონებულ თურქეთს. *

1730 — 1735 წლებში ირან-თურქეთის ბრძოლაში აღმოსავლეთი საქართველო ირანს მიემხრო და ქართლ-კახეთიდან ოსმალები განდევნეს. ირანის ბატონობა მათ უფრო ნაკლებ ბოროტებად მიიჩნდათ, ვიდრე ოსმალთა. მაგრამ ნადირ-შაჰმა ქართლ-კახეთში ირანული გადასახადები და ყიზილბაშური წყობილება შემოიღო, ეს არანაკლებ მძიმე გამოდგა, ვიდრე ოსმალთა იყო. მაშინ ქართლსა და კახეთში აჯანყებები დაიწყო². ქართლის აჯანყებას სხვებთან ერთად შანშე ქსნის ერისთავიც მეთაურობდა.

1737 წელს ნადირ-შაჰმა აჯანყებულების წინააღმდეგ თავისი ძმა იბრაჰიმ-ხანი გამოგზავნა დიდი ლაშქრით³; აჯანყების ხელმძღვანელები მიმოიფანტნენ, ხოლო შანშე ქსნის ერისთავი იმერეთში გადაიხვეწა. მან ალექსანდრე V-თან ერთად რუსეთის მთავრობაზე დაყრდნობით ოსმალთა მონობისაგან საქართველოს გათავისუფლების ფართო გეგმები დასახა⁴.

36-კაციანი ამალით შანშე ერისთავი რუსეთს გაემგზავრა. შან-

¹ ნ. ბერძენიშვილი, ივ. ჯავახიშვილი, ს. ჯანაშია, საქართველოს ისტორია, 1946, გვ. 375.

² შ. ბურჯანაძე, ლიხთ-იმერეთის 1733 წლის რუკა როგორც ფეოლ. საქ. ისტორიის პირველწყარო, ხელნაწ. ინსტ. მოამბე, I, თბ., 1959, გვ. 191.

³ ნ. ბერძენიშვილი საქართველოს ისტორიის საკითხები, ტ. II, თბ., 1965, გვ. 170.

⁴ იქვე.

შესთან ერთად თავისი ამალით¹ რუსეთს გაემგზავრა ალექსანდრე V-ის ელჩი მიტროპოლიტი ტიმოთე გაბაშვილიც².

იმერეთიდან შანშე და ტიმოთე გაბაშვილი 1737 წლის სექტემბრის ბოლოს გაემგზავრნენ, ხოლო 1738 წლის მარტის პირველ რიცხვებში მოსკოვში ჩავიდნენ³.

ირანის ხელმწიფის წინააღმდეგ აჯანყებული ქართველი თავადის გამოჩენამ მოსკოვის პოლიტიკური წრეები შეაშფოთა. შანშეს თამამ პოლიტიკურ გეგმებს რუსეთის მთავრობამ მხარი არ დაუჭირა და ირანთან ურთიერთობის გაფუჭების შიშით მოსთხოვა მას სასწრაფოდ დაეტოვებინა რუსეთი და საქართველოში იმ გზით დაბრუნებულიყო, რა გზითაც მოვიდა⁴.

1738 წლის აპრილში ტიმოთე გაბაშვილმა პეტერბურგში ჩასვლის უფლება მიიღო. თარჯიმნად მას ვახუშტი ბატონიშვილთან მყოფი დავით ფანჩულიძე დაუნიშნეს⁵.

ტიმოთე გაბაშვილს თან მიჰქონდა ორი წერილი და იმერეთის რუკა⁶; პირველი წერილი რწმუნების სიგელს წარმოადგენდა, რომ იგი იმერეთის მეფის ალექსანდრე V-ის ელჩი იყო, ხოლო მეორე წერილს საქმიანი ხასიათი ჰქონდა — მასში იმერთა მეფე აცხადებდა, რომ ისიც ისევე, როგორც მისი წინაპრები, რუსეთს ერთგულებდა და ყველა თავისი ქვეშევრდომით მზად იყო რუსეთის იმპერატორის სამსახურისათვის. შემდეგ აღნიშნავდა, რომ იმერეთი თურქეთისაგან შევიწროებული იყო, მაგრამ ხარკს მაინც არ უხდებდა და ქრისტიანულსჯულზე იდგა. მართალია, იმერეთის სამეფო თურქეთს ემორჩილებოდა, მაგრამ ალექსანდრეს იძულება მათ არაფერში არ შეუძლიათ⁷ — იყო აღნიშნული წერილში.

შემდეგ იმერეთის მეფე რუსეთის ხელმწიფეს აცნობებდა, რომ მან თურქებზე რუსთა გამარჯვების ამბავი და მათ მიერ აზოვის

¹ ტიმოთე გაბაშვილს ახლა იღუმენი, დიაკონი და ოთხი მსახური.

² საქართველოს საქმეები, 1738, № 1 (რუს.), პირები დატულია ივ. ჯავახიშვილის სახელობის ინსტიტუტის ბიბლიოთეკაში; იხ. აგრეთვე, ნ. ბერძენიშვილი, დასახ. ნაშრ., გვ. 180.

³ გ. პაიჭაძე, ტიმოთე გაბაშვილის ელჩობა რუსეთში (1737—1740 წლებში) წიგნში — „ქართული სამეფო-სამთავროების საგარეო პოლიტიკის ისტორიიდან“, I, თბ., 1970, გვ. 153.

⁴ საქართველოს საქმეები, 1738, № 1, ფურც. 61 (რუს.); ნ. ბერძენიშვილი, დასახ. ნაშრ., გვ. 170.

⁵ გ. პაიჭაძე, დასახ. ნაშრ., გვ. 153.

⁶ რუკაზე ნაჩვენებია ციხე-სიმაგრეების განლაგება, თურქების ხელში მყოფი ციხეები, მათი შეიარაღება და მათში განლაგებული ჯარები. ნაჩვენებია რელიეფი, ტყე, მღინარეები, სამეფო საზღვრები და ა. შ. ვრცლად იხილე მ. რეზვიაშვილი, იმერეთი VIII ს-ში, თბ., 1982, გვ. 37 — 41.

⁷ გ. პაიჭაძე, დასახ. ნაშრ., გვ. 153.

აღება შეიტყო, ხოლო შავ ზღვაზე კარგი ამინდის შემთხვევაში აზოვიდან იმერეთამდე ექვს დღე-ღამეში შეიძლება ხომალდებით მოღწევაო. წერილში ხაზგასმული იყო, რომ საქართველოს სანაპიროებზე განლაგებული ნავსადგურების შესახებ დაწერილებითო ცნობები გეოგრაფიულ რუკაზეა ნაჩვენები, და რომ აზოვიდან შავ ზღვამდე მიმავალი გზა უშიშარია, ვინაიდან თურქებს არცერთი ციხესიმაგრე არ უკავიათ და არ შეუძლიათ გემებს ხელი შეუშალონ, აგრეთვე აცნობებდა — ზღვის სანაპიროდან იმერეთის შიგნით მიმავალი გზა თავისუფალიაო¹. ამასთან დაკავშირებით, წერილში დაწერილებით იყო მოცემული დასავლეთი საქართველოს ციხეების და საერთოდ იმერეთის სამხედრო-სტრატეგიული აღწერა — თუ რომელ ციხეში რამდენი ოსმალო მეციხოვნე იყო, რომ ისინი მარაგს მხოლოდ ზღვიდან იღებდნენ, უზრუნველად ცხოვრობდნენ და სულ აღვილად შეიძლებოდა მათი შეპყრობა.

წერილში აღნიშნული იყო, რომ იმერეთი მაღალი მთებით არც შემოზღუდული და მეზობელი ხალხებისაგან თავდასხმა მოსალოდნელი არაა. იმერეთისა და თურქეთის დამაკავშირებელი სახმელეთო გზების გადაკეტვა კი აღვილი იყო, რადგან თურქებს იმერეთის ახლოს, ახალციხის გარდა, სადაც ორთულნიანი ფაშა ზის, სხვა ქალაქი და ციხესიმაგრე არ გააჩნიათ, იქიდან იმერეთში მხოლოდ ერთი ვიწრო გზა მიდის, რომლის გადაკეტვა ყოველთვის შეუძლიათ, მტერი რაგინდ დიდი ჯარით მოდიოდესო. ამასთან, ამ გზით მხოლოდ ზაფხულობით შეიძლება მიმოსვლა². თვით იმერეთში თურქებს ოთხი ციხესიმაგრე ეჭირათ, რის შესახებაც თვით ტიმოთე გაბაშვილს უნდა შეეტყობინებინა. ამასთან ერთად, იმერთა მეფე ცდილობდა, რუსეთი დაეინტერესებინა არა მარტო სამხედრო-სტრატეგიული, არამედ ეკონომიური თვალსაზრისითაც, ამ მიზნით წერილში ხაზგასმული იყო, რომ მისი სამფლობელო მდიდარია წიაღისეულით: ოქროთი, ვერცხლით, სპილენძით, რკინით, თუთიით, ტყვიით და სხვ. რამდენიმე მადნის ნიმუში გაბაშვილს თან მიჰქონდა³.

იმერეთის მეფე იმპერატორს სთხოვდა დახმარებას 20 ათასკაციანი ჯარით. ამ შემთხვევაში იგი თავისი ლაშქრით იმპერატორის მხარეზე იომებდა თურქების წინააღმდეგ⁴. ალექსანდრე რუსეთის იმპერიის მფარველობაში შევიდოდა და მაშინ ყველა ქრის-

¹ გ. პაიჭაძე, დასახ. ნაშრ., გვ. 153.

² იქვე.

³ მარი ბროსე, მიმოწერა, გვ. 225 (რუს.). გ. პაიჭაძე, დასახ. ნაშრ., გვ. 156.

⁴ მარი ბროსე, მიმოწერა, გვ. 225—226 (რუს.).

ტიანი ხალხი ოსმალეთის წინააღმდეგ ბრძოლისათვის აღსდგებოდა. შავი ზღვის სანაპირო ზოლი და ფოთის ციხესიმაგრე უშტკივნეულად დაექვემდებარებოდა რუსეთს¹.

დასასრულ, ალექსანდრე მეფე სთხოვდა რუსეთის იმპერატორს მისი ელჩის ყველა სიტყვა სარწმუნოდ მიეღოთ, დიდხანს არ დაეყოვნებინათ იგი და იმერეთში გარკვეული პასუხით დაებრუნებინათ².

ტიმოთე გაბაშვილი სიტყვიერად მოახსენებდა რუსეთის საიმპერატორო კარს — თუ რუსეთის ჯარის გაგზავნა იმერეთში არ მოხერხდებოდა, მაშინ რუსეთს თურქეთთან ზავის დადების დროს იმერეთი თავის მფარველობაში მაინც აეყვანა, რაც თურქეთს იმერეთზე ბატონობის საშუალებას მოუსპობდა. {

ამ ელჩობაზე იმერეთის მეფე ალექსანდრე V დიდ იმედს ამყარებდა ორი მოსაზრებით: პირველი მოსაზრება ის იყო, რომ თვით ელჩის კანდიდატურა კარგად იყო შერჩეული³ — ტიმოთე გაბაშვილს, დიდად განათლებულ ადაშიანს⁴, მშობლიური კუთხის კარგ მცოდნეს, იმერეთის რუკის ავტორს, ყველაზე უკეთ შეეძლო რუსეთის მთავრობისათვის იმერეთის სამეფოს სამხედრო-სტრატეგიული მნიშვნელობის ახსნა⁵, გაბაშვილი საუცხოოდ ერკვეოდა პოლიტიკის საკითხებში და ფლობდა რამდენიმე ენას⁶.

მეორე მოსაზრება შემდეგში მდგომარეობდა. ამ დროს რუსეთ-თურქეთის (1735 — 1739 წლების) ომი მიმდინარეობდა. 1737 წლის გაზაფხულსა და ზაფხულში რუსეთის არმიამ ოჩაკოვის ციხესიმაგრე აიღო, ხოლო რუსეთის მეორე არმია ყირიმში შეიჭრა. ასეთ ვითარებაში დასავლეთი საქართველო, რომელიც თურქეთის ბატონობისაგან გათავისუფლებას ესწრაფვოდა, მეტად საინტერესო და სასარგებლო უნდა ყოფილიყო რუსეთისათვის, მით უფრო, რომ მას ხელსაყრელი სტრატეგიული პოზიცია ეკირა შავი ზღვის აღმოსავლეთ სანაპიროზე.

ტიმოთე გაბაშვილი ყოველნაირად ცდილობდა, რუსეთის მთავრობისაგან ოფიციალური პასუხი მიეღო ისე, რომ იმერეთში ხელცარიელი არ დაბრუნებულყო, მაგრამ რუსეთის მთავრობამ ამ-

¹ გ. პაიჭაძე, დასახ. ნაშრ., გვ. 156.

² იქვე.

³ იქვე, გვ. 158.

⁴ ტიმოთე გაბაშვილის პიროვნების შესახებ დაწერილებით იხილე ე. ლ. მეტრეველის პუბლიკაცია: ტიმოთე გაბაშვილი, მიმოსვლა, თბ., 1956; კ. კეკელიძე, ძველი ქართული მწერლობის ისტორია, ტ. I, თბ., 1951, გვ. 334—338.

⁵ დაწერილებით იხილე, გ. პაიჭაძის დასახ. ნაშრ., გვ. 158—161.

⁶ იქვე.

ჯერადაც იმერეთის მეფის წინადადება — შორეულ იმერეთში ჯარის გაგზავნისა და იქ ფრონტის გახსნის შესახებ, არ მიიღო, იმავე დროს, უარყოფითი პასუხით ელჩის სასწრაფოდ უკან გასტუმრებაც სასურველად არ ცნეს, რადგან იმერთა მეფის წინადადებამ გარკვეული ინტერესი აღუძრა რუსეთის მთავრობას პერსპექტივის თვალსაზრისით, ამიტომ, დროის მოგების მიზნით, იმერეთის ელჩი დააყოვნეს.

1739 წელს ბელგრადში რუსეთ-თურქეთის საზავო ხელშეკრულება დაიდო. ამ ზავით რუსეთმა შავსა და აზოვის ზღვებზე ფლოტის ყოლის უფლება დაკარგა¹. იქ საქართველოს შესახებ არაფერი იყო ნათქვამი, თვით ბელგრადის ხელშეკრულების შინაარსი ასეთ შესაძლებლობას გამორიცხავდა².

1740 წელს იმერეთის ელჩმა რუსეთის მთავრობისაგან ოფიციალური პასუხი მიიღო, რომ იმერეთის მეფის თხოვნას რუსეთის მფარველობაში მიღების შესახებ საერთოდ კეთილ განწყობილებით შეხვდნენ, მაგრამ, რადგანაც თურქეთთან ზავი დადებულია, ამიტომ ამჯერად დახმარების გაწევა არ შეუძლიათ³. ამგვარად, 1733 — 1740 წლების იმერეთის ელჩობაც უშედეგო აღმოჩნდა⁴. იმედგაცრუებულმა ტიმოთე გაბაშვილმა 1740 წელს დატოვა რუსეთის საიმპერატორო კარი და საქართველოსაკენ გამოემგზავრა.

სოლომონ I-ის გამეფება და მისი პირველი ღონისძიებანი

როგორც აღვნიშნეთ, 1752 წელს ალექსანდრე V გარდაიცვალა. სამეფო ტახტზე მისი უფროსი შვილი — მტკიცე ნებისყოფის, მხნე და მამაცი ახალგაზრდა სოლომონი დაჯდა. სოლომონმა მემკვიდრეობად მიიღო დაუძღვრებელი, სათავადოებად დაფლეთილი სამეფო იმერეთის მთავარი ციხეები: ქუთაისი, ბაღდათი, შორაპანი და ცუცხვათი თურქებს ეპყრათ. მათ ხელში იყო შავი ზღვის სანაპირო ზოლის მთავარი ციხეებიც: გონია, ბათომი, ფოთი, რუხი, ანაკლია. ფოთისა და სოხუმის ციხეებში ორთულიანი ფაშები იხდნენ, რომელნიც შავი ზღვის მთელ აღმოსავლეთ სანაპიროს განაგებდნენ და დასაყრდენს წარმოადგენდნენ თურქეთისათვის, ამასთან ერთად, გურია, ოდიში და აფხაზეთი ფაქტიურად მეფისაგან

¹ გ. პაიქაძე, დასახ. ნაშრ., გვ. 172.

² იქვე, გვ. 171.

³ მარი ბროსე, მიმოწერა, გვ. 40 (რუს.).

⁴ გ. პაიქაძე, დასახ. ნაშრ., გვ. 174.

დამოუკიდებელ სამთავროებს წარმოადგენდნენ და გადაქცეული იყვნენ თურქების იარაღად იმერეთის სამეფოს წინააღმდეგ¹.

თვით სამეფოს შიგნით ანარქია სუფევდა, მოსახლეობა მოკლებული იყო ხელისუფლების მფარველობასა და უშიშროებას, ირგვლივ ძარცვა-გლეჯა, დატყვევება და ოსმალებზე გაყიდვა, მკვლელობა, ძალმომრეობა და სილატაკე სუფევდა.

ოსმალებთან წარმატებით ბრძოლა და ქვეყნის გადარჩენა მეფის ხელისუფლების განმტკიცების, ეკონომიკური აღორძინების გარეშე შეუძლებელი იყო, ამის განხორციელებას კი სათავადოების სისტემა ელობებოდა წინ. სეპარატისტული ტენდენციები და შინაფეოდალური ომები, რაც სათავადოების სისტემას სდევდა თან, საერთო ძალას თიშავდა და აუძლურებდა. მეფისაგან დამოუკიდებლობის მოპოვების სურვილი სათავადოებს სამშობლოს მოღალატედაც კი აქცევდა, რადგან გაძლიერებული სამეფო ხელისუფლებისაგან თავის დაღწევის საშუალებას ისინი უცხო, გარეშე ძალაში ხედავდნენ. ამიტომ ქვეყნის დამოუკიდებლობისათვის ბრძოლა, მეფის ცენტრალური ხელისუფლების განმტკიცება, ქვეყნის ეკონომიკური აღორძინება სათავადოების სისტემის წინააღმდეგ ბრძოლას ითხოვდა. ეს კარგად ესმოდა ახალგაზრდა მეფეს, მაგრამ მან ისიც კარგად იცოდა, რომ ქვეყნის მოწინავე ძალებს მხარდაჭერის გარეშე სამეფო ხელისუფლება და თვით იმერეთი სერიოზულ ძალად ვერ გადაიქცეოდა თურქთა წინააღმდეგ ბრძოლისათვის. სამწუხაროდ, ყოველივე ეს ჯერჯერობით განუხორციელებელი იყო, რადგან სამეფო ტახტზე ასვლისთანავე ფეოდალურმა შინაომმა იჩინა თავი, სოლომონიც ხომ მამის კვალს მიჰყვებოდა და ძლიერი თავადების დამორჩილებას ცდილობდა. საერთოდ, მას ფართო სამოქმედო გეგმა ჰქონდა: მტკიცე სამეფო ხელისუფლების შექმნა, დასავლეთი საქართველოს გაერთიანება და ოსმალთა ბატონობის მოსპობა². ამრიგად, სოლომონ I-ის მიზნები ერეკლე მეორის განზრახვებს ემსგავსებოდა. მაგრამ სოლომონის ასეთი გეგმა დასავლეთი საქართველოს მთავრებსა და დიდ ფეოდალებს სრულებით არ მოსწონდათ, ამიტომ ტახტზე ასვლისთანავე მის წინააღმდეგ შეთქმულებამ იჩინა თავი. ლევან აბაშიძე — სო-

¹ შ. ბურჯანაძე, სოლომონ I-ის მეფობის პირველი პერიოდი, თსუ შრომები, ტ. 41, 1950, გვ. 71; ქ. ჩხატარაიშვილი, დასავლეთი საქართველოს განთავისუფლება ოსმალეთის ბატონობისაგან, წიგნში ნარკვევები საქართველოს ისტორიიდან, ტ. IV, თბ., 1973, გვ. 636; ნ. ბერძენიშვილი, საქართველოს ისტორიის საკითხები, II, თბ., 1965, გვ. 213, ს. კაკაბაძე, საქართველოს ისტორია, ახალი საუკუნეების ეპოქა, თბ. 1920, გვ. 109, ნ. დადიანი, ქართულთ ცხოვრება, თბ., 1962, გვ. 178.

² ნ. ბერძენიშვილი, დასახ. ნაშრომი, გვ. 214.

ლომონის ბაბუა (დედის — თამარის მამა), როსტომ რაჭის ერისთავი, მეფის ორი ბიძა — ალექსანდრეს უმცროსი ძმები მამუკა და გიორგი ბატონიშვილები და თვით მეფის დედა თამარი ახალგაზრდა მეფეს აუჯანყდნენ და ტახტიდან გადააგდეს: სოლომონმა ახალციხეში გაქცევით უშველა თავს.¹

ავსტრიის ელჩი კონსტანტინოპოლში პენკლერი 1752 წლის ოქტომბრის რაპორტში სოლომონ მეფის შესახებ წერს: „იმერეთის ახალგაზრდა მთავარი... რომელიც თავისი ბიძისა და დედისაგან გაძევებულ იქნა, ახალციხეში აღმოჩნდა, მთხოვნელი ოსმალეთის მფარველობისა“.²

მამუკა და გიორგი ბატონიშვილები თავის ძმას ალექსანდრე V-ს რამდენჯერმე აუჯანყდნენ ტახტის შიტაცების მიზნით,³ და როგორც ჩანს, ეხლაც შესაფერისი მომენტი ნახეს ამისა.

აჯანყებულთა მხარეზე იყო აგრეთვე მამია IV გურიელი და როსტომ ერისთავის ძმა — აფხაზ-იმერთა კათალიკოსი ბესარიონიც.⁴

იმერეთიდან დევნილმა მეფემ დახმარებისათვის ახალციხის ფაშას მიმართა. როგორც ყოველთვის, ამ შემთხვევაშიც ფაშამ სიამოვნებით იკისრა იმერეთის საქმეების მოწესრიგება და სოლომონის გამეფება, რადგან ფაშა ფიქრობდა, რომ ამ დახმარებით ახალგაზრდა მეფეს თავის გავლენაში მოაქცევდა და, თავის ნება-სურვილს უკარნახებდა, რასაკვირველია, ოსმალთა სასარგებლოდ. სოლომონმა ეს კარგად იცოდა, მაგრამ სხვა გამოსავალი არ ჰქონდა, იგი ფაშას დახმარების გარეშე სამეფო ტახტზე ვერ აღდგებოდა.

დამპყრობლის ძალით ტახტზე გამაგრება სოლომონის შენიღბული პოლიტიკური ნაბიჯი იყო, რაც არსებითად თვით ამ დამპყრობლის წინააღმდეგ იყო მიმართული. შემდგომმა ამბებმა ყოველივე ეს დაადასტურეს კიდევ.

სოლომონ მეფემ „ფაშა ჩამოიყვანა და დაიპყრა კვალად იმერეთი“⁵, აღნიშნავს ვახუშტი ბაგრატიონი.

პირველ რიგში სოლომონ მეფემ აჯანყების მოთავეები დასაჯა. აჯანყების მონაწილე ღვიძლი დედა „იმერეთიდან გააძევა, რომე-

¹ ს. კაკაბაძე, წერილები და მასალები საქართველოს ისტორიისათვის, თბ., 1914, გვ. 91.

² პამერი, ოსმანთა სახელმწიფოს ისტორია, ტ. IV, გვ. 476, 1836. (გერმ.). შემდეგში — ჰამერი, ისტორია. ვახუშტი ბაგრატიონი სოლომონის განდევნას 1753 წლით ათარიღებს, რაც არასწორია. იხ. ქართლას ცხოვრება, ტ. IV, 1973 წ., გვ. 914.

³ ქართლის ცხოვრება, თბ., 1973, გვ. 888, 913—914.

⁴ პაპუნა ორბელიანი, „ამბავნი ქართლისანი“ წიგნი ქართლის ცხოვრება დასაბამიდან მეცხრამეტე საუკუნემდის, ნაწილი მეორე, გამოცემული უ. ჩუბინოვისაგან, სანკტ. პეტ., 1854, გვ. 468—469.

⁵ ვახუშტის ქორონიკონი, ქართლის ცხოვრება, ტ. IV, გვ. 913.

ლიც დღემდე (ე. ი. 1772 წლამდე, მ. რ.) სამეგრელოში ცხოვრობს“, წერს იმერეთის საქმეების კარგად მცოდნე კაპიტანი ლვოვი¹

თავისი ბიძა მამუკა ბატონიშვილიც მეფემ იმერეთიდან გააძევა,² ხოლო ყველაზე მეტად, „დაამდაბლა სახლი თავადთა აბაშიძეთა“³. მეფემ თავის ბაბუას — ლევან აბაშიძეს სამკვიდრო სოფელი — კაცხი ციხესიმაგრით და მონასტრითურთ ჩამოართვა და იმერეთის მეფის საკუთრებად გამოაცხადა (რაც ძალაში დარჩა იმერეთის სამეფოს გაუქმებამდე).⁴



სოლომონმა აჯანყებაში მონაწილე მამია IV გურიელიც დასაჯა — ოსმალთა ჯარის დახმარებით გურია დალაშქრა, მამია იქიდან გააძევა და მის ნაცვლად გურიელად მისი უმცროსი ძმა გიორგი დასავა,⁵ თუმცა მამიამ მოკლე დროში გურიელობა ისევ დაიბრუნა ახალციხის ფაშის დახმარებით, მაგრამ იძულებული გახდა სოლომონის მორჩილი ყოფილიყო.

რაც შეეხება გიორგი ბატონიშვილს, თუმცა მისი დასჯის შესახებ პირდაპირი საბუთი არ გავაჩნია, მაგრამ სავარაუდებელია, რომ მეფე მასაც დასჯიდა. ლვოვის აღნიშვნით, მეფემ „ახლობელი ნათესავები... ყოველგვარი მოწყალების გარეშე, საპყრობილეში ჩამწყვდევით დასაჯა მათი ურჩობის გამო“.⁶ ამ ურჩების რიცხვში გიორგი ბატონიშვილიც სავარაუდებელია.

მემამბოხეთაგან დასჯას გადაურჩნენ როსტომ რაჭის ერისთავი და მისი ძმა — კათალიკოსი ბესარიონი⁷: „შეიწყალა ერისთავი როს-

¹ Грамоты и другие исторические документы XVIII столетия, относящиеся к Грузии. под редакцией А. Цагарели. შემდეგში А. Цагарели. Грамоты, т. I, СПб 1891, стр. 362.

² პაპუნა ორბელიანი, დასახ. ნაშრ., გვ. 451.

³ ნ. დადიანი, ქართველთა ცხოვრება, თბ., 1862, გვ. 178; ს. კაკაბაძე, წერილები და მასალები საქართველოს ისტორიისათვის, გვ. 85; შ. ბუჩაძე, დასახ. ნაშრ., გვ. 75.

⁴ საქართველოს სიძველენი. ტ. III, ე. თაყაიშვილის რედაქციით, სოლომონ II. 1804 წ. წყალობის წიგნი, მიცემული სოლომონ ლიონიძისათვის. გვ. 569.

⁵ აბაშიძეთა სათავადოს შესახებ დაწვრილებით იხილეთ წიგნში: ო. სოსელია, ნარკვევები ფეოდალური ხანის დასავლეთი საქართველოს სოციალურ-პოლიტიკური ისტორიიდან, თბ., 1973, გვ. 153 — 209.

⁶ ა. ცაგარელი, I, გვ. 362 (რუს.).

⁷ ქ. ჩხატარაიშვილი, დასახ. ნაშრ., გვ. 636—637.

ტომ და დაადგინა ერისთავად¹ — აღნიშნავს სოლომონ II სოლომონ I-ის შესახებ, მაგრამ ეს შეწყალება მეფის სისუსტით იყო გამოწვეული.²

მეამბოხეებთან ანგარიშსწორების შემდეგ მეფე მეტი სიფრთხილით შეუდგა თავისი პოლიტიკის წარმოებას. უპირველეს ყოვლისა საჭირო იყო ფეოდალთა შორის ძლიერი მოკავშირის მოპოვება. ამ მიზნით იგი გაეყარა თავის ცოლს, აფხაზეთის მთავრის შერვაშიძის³ ასულს თინათინს და ჯვარი დაიწერა სამეგრელოს მთავრის ოტია დადიანის ასულ მარიამზე; ამავე დროს, მეფემ მოხერხებულად, შემოირიგა მამია გურიელიც და ამ ორი მთავრის შემომტკიცებით უფრო ენერგიული მოქმედების საშუალება მოიპოვა. ამათ მოპყვა წერილი ფეოდალების მომხრობა თუ განეიტრალება. როგორც ნ. ბერძენიშვილი აღნიშნავს, „თავისი მოღვაწეობა მეფემ მაჰმადიანობის გავრცელებისა და ტყვის სყიდვის წინააღმდეგ ბრძოლით დაიწყო... მეფემ თავის მოღვაწეობას ამით მტკიცე იდეური დასაყრდენი მოუპოვა: ის ქართველობისათვის მეზღოლის მეთაურად გამოდიოდა“.⁴

ტყვის სყიდვისა და მაჰმადიანობის წინააღმდეგ ბრძოლა ქართული ფეოდალური საზოგადოების მოწინავე ნაწილს, მთელ ხალხს აუცილებელ საქმედ მიაჩნდა. ამით იქმნებოდა მტკიცე ნიადაგი იმისა, რომ იმერეთის ხალხი მეფის ირგვლივ დარაზმულიყო.

სოლომონის გამეფებამდე და მისი მეფობის დასაწყისში იმერეთი თურქეთს ხარკის სახით უხდიდა ფულად გადასახადს, ზონთქრისათვის გზავნიდა გოგო-ბიჭებს და, რაც ყველაზე მთავარია, სრულ თავისუფლებას ანიჭებდა ტყვეებით მოვაჭრეებს.

„გადასახადი, რომელსაც იმერეთის მცხოვრებნი პორტას უხდიდნენ, გამოიხატებოდა სამასი ქისის⁵ გაღებასა და ტყვეების გაყიდვაში, რომელთა რიცხვს ახალციხის ფაშა აწესებდა“⁶. — წერს პამერი.

სოლომონის წინაპრები, „ხარკის გარდა, თურქეთს უხდიდნენ ყოველ სამ წელიწადში თითოეული კომლიდან... თითო სახალათე

¹ ხელნაწერთა ინსტიტუტი, ფონდი 5, საბ. № 1563; ს. კაკაბაძე, წერილები და მასალები საქართველოს ისტორიისათვის, თბ., 1914, გვ. 91.

² ქ. ჩხატარაიშვილი, დასახელ. ნაშრ., გვ. 637, შ. ბურჯანაძე, დასახ. ნაშრომი, გვ. 75.

³ სამეცნიერო ლიტერატურაში სოლომონის პირველ ცოლს შეცდომით თვლიან ინალოსვილის ასულად. იხ. შ. ბურჯანაძე, დასახ. ნაშრ., გვ. 82.

⁴ ნ. ბერძენიშვილი, საქართველოს ისტორიის საკითხები, წ. II, თბ., 1965, გვ. 214.

⁵ ერთი ქისა უდრის 30 თუმანს, აქედან 300 ქისა — 90000 მანეთს.

⁶ პამერი, ისტორია, IV, გვ. 545.

ტილოს ან 20 — 20 კაპიკს; არ უკრძალავდნენ თავიანთ ქვეშევრდომებს ქართველების გაყიდვას თურქეთში... და თურქები ამით უფრო იყვნენ კმაყოფილი, ვიდრე თვით ხარკით“.¹

სოლომონის გამეფებისას იმერეთი ფულის სახით ხარკს აღარ იხდიდა: „უკვე რამდენიმე ხანია — აღნიშნავს ჰამერი — ამ ხალხს ფულადი გადასახადი არ ჰქონია“.² როგორც ჩანს, ქვეყანას აღარც ფული გააჩნდა და აღარც ტილო, ამიტომ თურქებს იმას აძლევდნენ, რაც ქვეყანაში მოეპოვებოდათ — ადამიანებს.

რუსულ დოკუმენტებში აღნიშნულია, რომ „იმერეთი პორტას ხარკში უხდიდა ადამიანებს, განსაკუთრებით ქალთა სქესიდან“.³

როგორც შ. ბურჯანაძე აღნიშნავს, „თურქი ჩამოსახლდა იმერეთში, დაიპყრო ციხე, გახდა ქვეყნის ბატონი, მოიშალა მეფის ცენტრალური ხელისუფლება, ატყდა თავადთა ქიშპობა, დაეცა ეკლესია. ქვეყანა გაუთავებელმა ბრძოლებმა მოიცვა. შეწყდა ვაჭრობა, მინელდა შრომა. გამეფდა შიში, შიმშილი და სიღატაკე. აიყარა ყმა-გლეხობა და ყაჩაღობას მიჰყო ხელი. ტყვეების დატაცება და გაყიდვა ჩვეულებრივ მოვლენად იქცა“.⁴

მაჰმადიანობის გავრცელების და ტყვის სყიდვის წინააღმდეგ ბრძოლა ქრისტიანობის განმტკიცებას მოითხოვდა, ეს საქმე კი ეკლესიას უნდა ეკისრა, მაგრამ ამ დროს ეკლესიაც უნუგეშო მდგომარეობაში იმყოფებოდა⁵, ყმა-მამულის დიდი ნაწილი საერო ფეოდალებს მიეტაცნათ, მრავალი მონასტერი და საეპისკოპოსო კათედრა გაუქმებულ-დაღუმებული იყო. თურქები არამც თუ ახალი მონასტრების აგებას, არამედ შეკეთებასაც კი კრძალავდნენ, ხოლო თვით სამღვდლოებაში უღირსნი და უვიცნი მოკალათებულიყვნენ.⁶ ამიტომ სოლომონ მეფემ განსაკუთრებული ყურადღება მიექცია ეკლესიის ავტორიტეტის აღდგენას. უპირველეს ყოვლისა, წინა მეფეების მიერ საერისკაცოდ გაცემული საეკლესიო ყმა-მამულები მან ისევ ეკლესიას დაუბრუნა (თუმცა „ერისკაცნი“ მინატაცებს არც თუ ისე იოლად თმობდნენ), ამავე დროს საეკლესიო

¹ სიგელ-გუჯრები, გვ. 14—15 (რუს.).

² ჰამერი, ისტორია, IV, გვ. 545.

³ სიგელ-გუჯრები, I, გვ. 39 (რუს.).

⁴ შ. ბურჯანაძე, დასახ. ნაშრ. გვ. 77.

⁵ ზ. ცქიტიშვილი, საქართველოს სახელმწიფო მოღვაწენი, XVIII ს. II ნახევარი — XIX საუკუნის დაშლემდე, თბ., 1980, გვ. 4 — 6.

⁶ ნ. ბერძენიშვილი, საქართველოს ისტორიის საკითხები, ტ. VI, თბ., 1973, გვ. 410 — 411.

გლეხები ყოველგვარი (საური, საუდიერო, სამეფო) გადასახადებისაგან გაათავისუფლა, გარდა ლაშქრობა-ნადირობისა.

ასეთი ზომებით ეკლესიის ავტორიტეტი თანდათანობით მტკიცდებოდა, მეფე ძლიერ თავადებს ასუსტებდა და თავის მომხრეთა რიგებს იმრავლებდა. მაგრამ ყველაზე დიდი უბედურება მაინც მაკმადიანობის გავრცელება და ტყვეთა სყიდვა იყო და მეფემ სწორედ ამ ორი მოვლენის წინააღმდეგ გააჩაღა ბრძოლა. „სოლომონ მეფემ, გარდაიცვალა თუ არა მამამისი, ყველა თავის ქვეშევრდომს მკაცრი ჯარიმით და თვით სიკვდილის სასჯელით აუკრძალა ტყვეების მიყიდვა თურქებისათვის“.¹ ამ ღონისძიებამ იმერეთის თავადების დიდი უკმაყოფილება გამოიწვია, რადგან მათ ხელიდან ეცლებოდათ შემოსავლის დიდი წყარო. „ტყვის სყიდვის აკრძალვის გამო სოლომონ მეფე გადაიქცა თავადებისათვის არასასიამოვნო პირად, რადგან მათ ამით თავიანთი შემოსავალი მოაკლდათ“.²

ფეოდალთა იმ ნაწილის წინააღმდეგ, რომელიც უარს ამბობდა ბრძანების შესრულებაზე, სოლომონი მიმართავდა სიმკაცრეს,³ ამ შემთხვევაში მეფე ფეოდალური საზოგადოების იმ ფენებს ემყარებოდა, რომელთათვისაც ტყვის სყიდვის აკრძალვას სარგებლობა მოჰქონდა — ესენი იყვნენ: აზნაურები, ეკლესია, ყმა-გლეხობა.

საზოგადოების დაბალი ფენები მეფეს უდგნენ მხარში ფეოდალების წინააღმდეგ ბრძოლაში.

ყმა-გლეხობის ასაღორძინებლად სოლომონ-მეფეს აუცილებელ საპირობებად მიიჩნდა მთელ რიგ ღონისძიებათა გატარება. ყმა-გლეხი მონის მდგომარეობამდე იყო დასული: ერთი მხრივ, იგი ვაჭრობის საგანს წარმოადგენდა, მეორე მხრივ, ფეოდალისაგან შეუზღუდველ ჩავკრას განიცდიდა.)

ყმა-გლეხის თავის უფლებაში აღდგენა ნიშნავდა იმას, რომ ჰქონოდა სახლ-კარი და ბატონისათვის გადაეხადა ადათითა და კანონით დადგენილი გადასახადი და სამსახური. მეფეს კონტროლი უნდა დაეწესებინა ამ ურთიერთობაზე.

ეპქს არ იწვევს, რომ XVIII საუკუნეში გლეხთა გადასახადები კიდევ უფრო იზრდება, ამას თვით დოკუმენტები ლაღადებენ: „უამთა ვითარებისაგან დიდი ბეგარა დაგდებოდათ“⁴ — აღნიშნულია წყაროებში.

¹ ცაგარელი, I, გვ. 15 (რუს.). ზ. ცქიტიშვილი, დასახ. ნაშრომი, გვ. 6—7.

² იქვე, I, გვ. 191—192 (რუს.).

³ იქვე, I, გვ. 34 (რუს.).

⁴ დოკუმენტები, II, გვ. 286, № 448.

საბატონო ვალდებულების გარდა, გლესს ევალებოდა გადაეხადა სახელმწიფო ვადასახადი, რისაც „საური“ და „საუდიერო“¹ ეწოდებოდა. მეფე კარგად ხედავდა, რომ პირველ რიგში აღსაკვეთი იყო „საძალადო“ ვადასახადი.

1755 წელს სემონ წერეთლისათვის მიცემულ წყალობის წიგნში სოლომონ მეფე აღნიშნავს, რომ ჩვენს ქვეყანაში აგარიანი ძალდატანებისაგან საურავი გაჩნდა და ჩვენი ქვეყანა ნამეტნავად შეაწუხა. ახლა შენ წყალობა გიყავით და საცა შენი გლესები გყავს, არცერთს საურავი და საუდიერო სახორცე არაფერი არასოდეს სათხოვარი ჩვენგან გეთხოვოს.²

ერთი ხელის დაკვრით „საძალადო“ ვადასახადის გაუქმება შეუძლებელი იყო,³ მაგრამ გლესი ხედავდა, რომ სოლომონ მეფე მის სასარგებლოდ მოქმედებდა. ამიტომ ყმა-გლესობა მეფის მხარეზე დადგა. ასევე დიდ შეღავათებს ავრცელებდა მეფე აზნაურებზეც,⁴ რადგან შევიწროებული იყვნენ დიდი ფეოდალებისაგან, ამიტომ ისინიც მეფის მხარეზე იდგნენ, მასში ხედავდნენ მფარველსა და დამცველს მოძალადე თავადებისაგან. მეფეც ერთგულ მოსამსახურე აზნაურებს ფულად ჯამაგირს უნიშნავდა.⁵

მეფემ თანდათანობით წვრილი თავადებიც შემოიკრიბა, ამავე დროს ის მოხერხებულად სარგებლობდა დიდი სათავადოების შიგნით „სახლისკაცთა“ ქიშპობით და მათ შორის თავის მომხრეებს იჩენდა.

ფეოდალურ საზოგადოებაში ფეოდალის ძლიერებას ცინესი-მაგრე უწყობდა ხელს. ცინის მფლობელი მბრძანებელი იყო ადგილობრივი მოსახლეობისა.⁶

¹ საურის ვადასახადი მონღოლების დროინდელია, აღმოსავლეთ საქართველოში მას „სათათრო“, ხოლო დასავლეთ საქართველოში „სახვანტქრო“ ეწოდებოდა. „საუდიერო“ კი დასავლეთ საქართველოში თურქების ბატონობის დროიდან გაჩნდა და „საძალად სათხოვარს“ ნიშნავდა, „საური“ და „საუდიერო“ ვადასახადს დასავლეთ საქართველოს სხვადასხვა კუთხეში სხვადასხვა რაოდენობით იხდიდნენ. ს. კაკაბაძე, საისტორიო მოამბე, V, 1950, გვ. 210—211, 251. ბატონყმობა სამეგრელოში, გვ. 90, იონა მეუნარგია, სამეგრელოს სამთავროს უკანასკნელი პერიოდი, თბ., 1939, გვ. 90.

² საქართველოს მუზეუმი, Hd 2, 308, ე. თაყაიშვილი, საქართველოს სიძველენი, ტ. III, თბ., 1910; გვ. 150; ქუთაისის პედინსტიტუტის შრომები, ტ. VIII, №48, გვ. 122—123.

³ შ. ბურჯანაძე, დასახ. ნაშრ., გვ. 80.

⁴ იქვე, გვ. 81.

⁵ საქ. ცენტრ. არქივი, ფ. 231, კარბელაშვილის არქივი, მე-6 რკ. № 4.

⁶ შ. ბურჯანაძე, დასახ. ნაშრ., გვ. 82.

აღნიშნული დროისათვის იმერეთის ციხეები დიდი თავადების და თურქების ხელში იყო. ამიტომ მეფე ჰირველ რიგში შეუდგა სტრატეგიულად მნიშვნელოვანი ციხეების ხელში ჩაგდებას. მან ისარგებლა აბაშიძეებს შორის ატეხილი მტრობით და 1754 წელს გიორგი აბაშიძე-მამუკაშვილისაგან იყიდა ხარაგაულის ციხე მისი მამულითა და მასში შემავალი აზნაურით, მსახურითა და გლეხით¹. სვერის ციხე ჯერ კიდევ სოლომონის მამამ — ალექსანდრე V-მ მისაკურთრა, კაცხის ციხეც 1753 წლიდან მეფის ხელში ჩანს.² უფრო მოგვიანებით — 1762 წელს მეფემ ნიკო ფინეზიშვილი-აბაშიძისაგან ჩხერის ციხეც შეისყიდა.³ მეორე მხრივ, მეფემ აბაშიძეების მეზობელი წერეთლები გაიერთგულა და ასე თანდათან უკუ-მდგარი თავადის წინააღმდეგ გადამჭრელი ბრძოლისათვის ემზადებოდა. როგორც დავინახეთ, ყველა ღონისძიება, რაც მეფემ გაატარა, პირველ რიგში ლევან აბაშიძის წინააღმდეგ იყო მიმართული, მაგრამ აბაშიძეს ძლიერი მოკავშირე ჰყავდა როსტომ რაქის ერისთავის სახით; მეფემ ერისთავის მოწინააღმდეგე ჯაფარიძეები და წულუკიძეები გაიერთგულა. და საერთოდ სოლომონმა დაიახლოვა იმერეთის წარჩინებული თავადაზნაურობა: აგიაშვილები, იაშვილები, ლორთქიფანიძეები, მაჭავარიანები და სხვანი.

რამდენადაც აბაშიძის და ერისთავის კოალიცია ძლიერ მოწინააღმდეგეს წარმოადგენდა, მეფე გადამჭრელი ბრძოლისათვის ასევე ძლიერ მოკავშირეს საჭიროებდა, ასეთები კი მაშინდელ ვითარებაში იყვნენ დადიანი და გურიელი. როგორც ზემოთ აღვნიშნეთ, პოლიტიკური მოსაზრებით მეფემ დაიმოყვრა დადიანი,⁴ ხოლო გურიელი შემოირიგა; ამრიგად, მან ორი დიდი მოწინააღმდეგე — აბაშიძე და ერისთავი გაიმართოვა. ამიერიდან მათ მხოლოდ ახალციხის ფაშის იმედოვანი ჰქონდათ. თუმცა გადამჭრელი ბრძოლა თავადებსა და მეფეს შორის ჯერ არ დაწყებულიყო, მაგრამ ორივე მხარე შესაფერის მომენტს უცდიდა და გარეგნულად სიმშვიდეს იცავდა. 1755 წელს როსტომ ერისთავიც და ლევან აბაშიძეც მეფის დარბაისლებად იხსენიებიან სხვა თავადებთან ერთად. მაგრამ ამ

¹ ს. კაკაბაძე, დასავლეთ საქართველოს საეკლესიო საბუთები, II, ვ. 1921, გვ. 3.

² ო. სოსელია, ნარკვევები ფეოდალური ხანის დასავლეთ საქართველოს სოციალ-პოლიტიკური ისტორიიდან, თბ., 1973, გვ. 165.

³ ს. კაკაბაძე, დასავლეთ საქართველოს საეკლესიო საბუთები, II, თბ., 1919, გვ. 17.

⁴ ნიკო დადიანი, ქართველთ ცხოვრება, თბ., 1962, გვ. 178. ს. კაკაბაძე, დას. საქ. საეკლესიო საბუთები, II, გვ. 5.

ორი დიდი სათავადოს მეთაურები მთავრული განკერძოებისაკენ ილტვიან და ურთიერთ შეთანხმებულნი, XVII საუკუნის II ნახევრიდან აქტიურად ებრძვიან მეფეს¹.

* * *

სოლომონ მეფემ საქართველოს ისტორიაში მანამდე უცნობი, მეფის ხელისუფლების განმტკიცების ხელშემწყობი ინსტიტუტი შექმნა, რომელსაც „ფიცის კაცნი“ ეწოდებოდა.

„ფიცის კაცნი“ იყვნენ შემდეგი გვარების წარმომადგენელნი: თავადი ლორთქიფანიძეები, აზნაურნი: მესხები, ავალიანები, იოსელიანები, ლოღობერიძეები, მიქაბერიძეები, ყიფიანები, ქორქაშვილები, იაშვილები, უგრეხელიძეები, გრიგალაშვილები და ჭაბუკიანები. ისინი ცხოვრობდნენ შემდეგ სოფლებში: ახალბედისეულში, დედალოურში, ცხუნკურში, გვიშტიბში, ჩუნეშში, წყალტუბოში, ქვილიშორში, გუმათში, ჯიმისტაროში, ოფურჩხეთში, ნამახვანში და რიონში. ფიცის კაცნი, ვიდრე თხუთმეტი წლისა გახდებოდნენ, თავისი ყმებით, სამღვდელოებით და ხატებით შეიკრიბებოდნენ ერთ-ერთ ამორჩეულ ადგილს (ლეკერწას) ყოველწლობით. 15 მაისს და ფიცს ღებდნენ, რომ „მეფის ერთგულნი იქნებოდნენ“².

ხრესილის ომი

სოლომონ მეფის მოქმედებას თვალყურს ადევნებდა ახალციხის ფაშა. იგი დარწმუნდა მეფის ორგულობაში და თავისი დახმარება მის მიმართ დიდ შეცდომად ჩათვალა³. მისთვის განსაკუთრებით მიუღებელი იყო მეფის ბრძოლა ტყვეთა სყიდვის წინააღმდეგ. ახალციხის ფაშამ არაერთგზის შემოუთვალა მეფეს, რათა ტყვის სყიდვა იმერეთში ძველებურად ნებადართული ყოფილიყო. სოლომონმა ეს მოთხოვნა არ შეასრულა, პირიქით, ტყვის სყიდვა სასტიკად აკრძალა და დამნაშავეისათვის მძიმე საერო და საეკლესიო სასჯელი დააწესა. ამან შედეგი გამოიღო. ეს საშინელი მოვლენა იმერეთში თითქმის საესებით აღიკვეთა.

¹ ხელნაწერთა ინსტიტუტი, ფ. სდ, საბ. № 1563.

² სოლომონ მეფე და როსტომ ერისთავი, გვ. 44; მ. რეხვიაშვილი, ამერეთი. XVIII ს-ში, თბ., 1982, გვ. 54—55.

³ შ. ბურჯანაძე, დასახ. ნაშრ., გვ. 83.

ფაშამ ერთგული თავადების ძებნა დაიწყო იმერეთში. მეფის ბიძა მამუკა ბატონიშვილი, რომელიც სოლომონმა ამბოხებისათვის იმერეთიდან გააძევა, ფაშამ კვლავ იმერეთში დააბრუნა,¹ ასევე დააბრუნა მან გურიელის ტახტზე მამია,² რომელიც მეფემ განდევნა ამბოხებაში მონაწილეობისათვის (თუმცა მამია გურიელი მთავრის უფლებებში აღდგენის შემდეგ ბოლომდე მეფის ერთგული დარჩა).

სოლომონ მეფის წინააღმდეგ ასამხედრებლად თურქებს ძალიან ბევრი მიზეზი ჰქონდათ: მეფე-მთავრების შეთანხმება, მეფის ხელისუფლების გაძლიერება, ძლიერი ეკლესიის აღდგენის ცდა, ბრძოლა მაჰმადიანობის გავრცელებისა და ტყვეთა სყიდვის წინააღმდეგ — არცერთი ეს ღონისძიება თურქებისათვის მისაღები არ იყო, ამიტომ ახალციხის ფაშამ ურჩი ქვეშევრდომის დასჯა ბრძანა.

როგორც ზემოთ ითქვა, პოლიტიკური დაშლილობისა და ტყვეთა სყიდვის წინააღმდეგ მებრძოლი მეფე და მისი პოლიტიკა მიუღებელი იყო არგვეთისა და რაჭის დიდი თავადებისათვის, ამიტომ, რაკი სოლომონის ღონისძიებები, პირველ რიგში, ოსმალეთის ინტერესებს ეწინააღმდეგებოდა, ამან მეფის შინა და გარეშე მტრები გააერთიანა. ლევან აბაშიძე და როსტომ რაჭის ერისთავი ახალციხის ფაშას დაუკავშირდნენ.³

იმერეთის ასაოხრებლად გამზადებულ ოსმალთა ჯარს ახალციხეში ლევან აბაშიძე ეახლა, მეგზურობა გაუწია და დასავლეთ საქართველოში გადმოიყვანა.

იმერეთში შემოჭრილი მტერი ოკრიბაში (ამჟამად ტყიბულის რაიონი) — ხრესილის მინდორზე დაბანაკდა⁴. ამ დროს თურქებს იმერეთში ეკავათ: ცუცხვათის, ბაღდათის, შორაპნისა და ქუთაისის ციხეები.

მეფის მდგომარეობა მძიმე იყო: მთელი ზემო იმერეთი ლევან აბაშიძეს გადაებირებინა, ზოგი სულმოკლე თავადიც (წულუ-

¹ კაკუხა ორბელიანი, დასახ. ნაშრ., გვ. 451—452.

² იქვე, გვ. 468—469.

³ ხელნაწერთა ინსტიტუტი, ფ. Sd საბ. № 1563; კ. ორბელიანი, დასახ. ნაშრ., გვ. 473; ნ. დადიანი, ქართველთა ცხოვრება, თბ., 1962, გვ. 178.

⁴ კ. ორბელიანი, დასახ. ნაშრ., გვ. 473;

ნ. დადიანი, ქართველთა ცხოვრება, გვ. 178.

შ. ბურჯანაძე, დასახ. ნაშრ., გვ. 84.

ნ. დადიანი, ქართველთა ცხოვრება, გვ. 178, ს. კაკაბაძე, წერილები და მასალები საქართველოს ისტორიისათვის, I, თბ., 1974, გვ. 85.

⁴ ხრესილის ომის თარიღთან დაკავშირებით წყაროებსა და სამეცნიერო ლიტერატურაში აზრთა სხვადასხვაობაა. დღეს დადგენილად ითვლება, რომ ხრესი-

კიძე რაჭის საერისთაოდან) მტერს მიეკედლა. მეფე იმერთა ჯარის მცირე ნაწილის აპარა დარჩა. მან თავის სიმამრს ოტია დადიანს სთხოვა დახმარება. ოტიამ მოხუცებულობის გამო წამოსვლა ვერ შეძლო, მაგრამ საბრძოლველად თავისი შვილი კაცია გამოგზავნა ოდიშ-ლეჩხუმ-აფხაზთა ჯარით.

მეფის დასახმარებლად გამოეშურა აგრეთვე მამია გურიელიც. იმერთა მეფისათვის მოულოდნელი არ იყო მტრის შემოსევა, ამას იგი ელოდა. მან 1757 წლის ბოლო თვეებში ფარულად დიდი სამზადისი დაიწყო იმერთიდან თურქების გასადევნად. ახალგაზრდა მეფე შესანიშნავი სარდალი და უშიშარი მეომარი გამოდგა.

მან თავადაზნაურობიდან ბრძოლაში გაიწვია ყველა, ვისაც იარაღის ტარება შეეძლო, ხოლო ყმა-გლეხობიდან — კომლზე კაცი. მეფის ლაშქარი ძლიერდებოდა; ყველა ერთსულოვნად გამოვიდა მოძულე მტრის წინააღმდეგ საბრძოლველად.

1757 წლის 14 დეკემბერს სოლომონ მეფე თავს დაესხა მტრის ლაშქარს. მტერი არ დაბნეულა, რადგან ამას ელოდა. მან ჰირველ ხანს წარმატებასაც კი მიაღწია. ოსმალებმა ხელთ იგდეს სამეფო დროშა, მაგრამ ქართველთა ლაშქრის სულიერმა სიმტკიცემ ომის ბედი შეაბრუნა. თვით როსტომის და ლევან აბაშიძის ჯარიდან ცალკეულმა რაზმებმა მეფის მხარეზე იწყეს გადმოსვლა.

ლის ბრძოლა მოხდა 1757 წლის 14 დეკემბერს: ხელნაწერთა ინსტიტუტი, ფ. Sd, საბ. №1563; ე. თაყაიშვილი, ძველი საქართველო, II, განყ. III, გვ. 72. პ. ორბელიანი, დასახ. ნაშრ., გვ. 473. მეფე სოლომონ I-ისა და რაჭის ერისთავის როსტომის ურთიერთობიდან XVIII ს. მეორე ნახევარში, გაზეთი „კომუნარი“ (ამბროლაური), 1959 წ., 14 აგვისტო., № 95; ქრონიკები, III, გვ. 639; მცირე ქრონიკები, გამოს. ჯ. ოდიშელმა; გვ. 70, მონაწ. 21, გვ. 75, მონაწ. 49.

ზოგი ქრონიკის ცნობით ბრძოლა 1756 წელს მოხდა. ქართულ ხელნაწერთა აღწერილობა ახალი (Q) კოლექციისა, ტ. II, თბ., 1958, გვ. 337, ქრონიკების (III) ცნობით — 1756 წ., გვ. 638, მცირე ქრონიკებით — 1758 წ., გვ. 59. მონაწ. 45.

პაპუნა ორბელიანი და ლეონი ამ ომის თანამედროვენი იყვნენ, ამიტომ მათი ცნობები უფრო სარწმუნოა (1757 წ.). ამ ომის თარიღად ეპნგულანიც 1757 წ. აღიარებს, სადაც 14 დეკემბერი კვირა დღითაა აღნიშნული, როგორც ჯ. ოდიშელმა გაარკვია, 14 დეკემბერი მართლაც კვირა ყოფილა. იხ. მცირე ქრონიკები, გვ. 70, მონაწ. 21, „კომუნარი“, 192; შ. ბურჯანაძე ომს 1756 წლით ათარიღებს, იხ. შ. ბურჯანაძე, დასახ. ნაშრ., გვ. 85.

ქვემოთ მოტანილი თხრობა მომაქვს შემდეგი ქართული ხალხური საისტორიო სიტყვიერებიდან: ე. თაყაიშვილი, ძველი საქართველო, ტ. II, განყ. IV, გვ. 36 — 42; სოლომონ-მეფე და როსტომ ერისთავი, 1936, გვ. 21 — 28; ქ. სიხარულიძე, ქართული ხალხური საისტორიო სიტყვიერება, თბ., 1964, გვ. 154 — 162.

მტრის ჯარის დიდი ნაწილი გაიქცა, ნაწილი დაატყვევეს, მცირე ნაწილმა გაქცევით უშველა თავს, მაგრამ იმერეთის ტერიტორიას მაინც ვერ გაცილდა — მათ გზადაგზა ხოცავდნენ ან ატყვევებდნენ.

ამ ბრძოლაში დახოცეს თურქეთის ჯარის მხედართმთავრები: გოლა-ფაშა, ქემხა ახალციხის ჭაშა და ბაშა-ალა¹.

მტრის რაოდენობა ნ. დადიანის თქმით რამდენჯერმე აღემატებოდა მეფისა და დადიანის ლაშქარს².

ბრძოლაში მოკლეს მეფის მოლაღატე ბაბუა — ლევან აბაშიძე, ხოლო რაჭის ერისთავმა როსტომმა გაქცევით უშველა თავს. ზარალი მეფის მხრიდანაც დიდი იყო. დაიღუპა კაცია დადიანის თანმხლები სამურზაყანოს მფლობელი ხუტუნია შერვაშიძე, რომელმაც ხმლით 16 თურქი ჯარისკაცი აკლწა³.

ხრესილის ბრძოლა დასაწყისი იყო დასავლეთი საქართველოს გამათავისუფლებელი ომისა. სოლომონ მეფე პირველად აქ შეხვდა აგრესორებს⁴, აქედან მოყოლებული, მეფეს ხმალი არ ჩაუგია ქარქაშში იმერეთის დამოუკიდებლობისათვის ბრძოლაში.

სოლომონ მეფემ გადამწყვეტი ზომები მიიღო მოლაღატეთა დასათრგუნავად: აბაშიძეებს ჩამოართვეს ლევან აბაშიძის წილი მამული და სამეფო საკუთრებად გამოაცხადა, ხოლო დანარჩენი აბაშიძეები ფიცით შემოიმტკიცა და სააბაშიოს ნაწილი მათ წყალობად მისცა. ამიერიდან აბაშიძეთა სათავადო მეფის ხელისუფლების წინააღმდეგ ბრძოლისათვის უძლეური იყო. !

ახლა როსტომ რაჭის ერისთავის დათრგუნვა იყო საჭირო, რათა მეფეს გარეშე მტერთან ბრძოლაში ზურგი საიმედო ჰქონოდა.

საეკლესიო კრება

ხრესილის ომში გამარჯვების შემდეგ სოლომონ მეფესა და ოსმალებს შორის ორჯერ მოხდა ბრძოლა — 1758 წელს. პირველად ოსმალებმა გაიმარჯვეს, მეორედ კი სასტიკად დამარცხდნენ. სოლო-

¹ ე. თაყაიშვილი, ძველი საქართველო, II; განუ. III, გვ. 72.

² ს. კაკაბაძე, წერილები და მასალები საქართველოს ისტორიისათვის, I, თბ., 1914. გვ. 85.

³ ნ. დადიანი, ქართველთ ცხოვრება, გვ. 108, ს. კაკაბაძე, საქართველოს ისტორია, ახალი საუკუნეების ეპოქა, თბ., 1920, გვ. 110, მისივე, წერილები და მასალები საქ. ისტორიისათვის, გვ. 85; პ. ორბელიანი, დასახ. ნაშრ., გვ. 473; ქ. სიხარულიძე, დასახ. ნაშრ. გვ. 155—161.

⁴ შ. ბურჯანაძე, სოლომონ I-ის მეფობის პირველი პერიოდი (1752—1768 წწ.). თსუ შრომები XV ს. 1950, გვ. 85.

მონ მეფის სახელი და გავლენა დასავლეთ საქართველოში კიდევ უფრო გაიზარდა და გაძლიერდა.

სოლომონმა ისარგებლა ამ გამარჯვებით და მეფის ხელისუფლების გაძლიერების მიზნით ახალი ნაბიჯი გადადგა: 1759 წლის დეკემბერში მეფემ დასავლეთ საქართველოს საეკლესიო და საერო ფეოდალების საგანგებო კრება მოიწვია. მასში მონაწილეობდნენ: მეფე, კათალიკოსი და მთელი დასავლეთი საქართველოს მაღალი სამღვდლოება, იმერეთის ბატონიშვილები და თავადაზნაურობა, დადიანი ოდიშის ბატონიშვილებით და თავადაზნაურობით, გურიელი ბატონიშვილებით და თავადაზნაურობით. ეს კრება მთელ თვეს გაგრძელდა და მან განსაკუთრებით მნიშვნელოვანი გადაწყვეტილებები მიიღო. მსჯელობის საგანი მთელი დასავლეთი საქართველოს საერთო საკითხები იყო¹, კერძოდ:

1) ეკლესიის საქმეების მოწესრიგება და

2) ტყვის სყიდვის აკრძალვა².

სოლომონის ტახტზე ასვლის მომენტში ეკლესია უნუგეშო მდგომარეობაში იმყოფებოდა. ყმა-მამულის დიდი ნაწილი საერო ფეოდალებს მიეტაცნათ, მრავალი მონასტერი და საეპისკოპოსო კათედრა გაუქმებულიყო. ოსმალეთი მაჰმადიანობას ნერგავდა, აგებდა შეჩეთებს და ანგრევდა ეკლესიებს, არა თუ ახალი ეკლესიების აგებას, ძველის შეკეთებასაც კი კრძალავდნენ³. ასეთ პირობებში საერო ფეოდალები კიდევ უფრო მეტად აჩანაგებდნენ ეკლესიას, იტაცებდნენ მის მამულებს და ყმებს.

მეფის ხელისუფლების ძლიერებისათვის ბრძოლაში ეკლესია დიდ როლს ასრულებდა. იგი იყო სარწმუნოების, საერთო ენისა და ეროვნული კულტურის შენარჩუნების ერთ-ერთი ბურჯი. შინაპოლიტიკურ ბრძოლაში იგი ძირითადად მეფის ხელისუფლების მხარეზე იდგა, გამოდიოდა თავადების მძლავრობის წინააღმდეგ, ებრძოდა მაჰმადიანობის გავრცელებას, კრძალავდა ადამიანებით ვაჭრობას. ამდენად, ეკლესია მეფეს უდგა მხარში, მაგრამ, ამჟამად დასუსტებულს, თავისი თავისთვისაც ვეღარ მოეწლო. ეკლეს-

¹ ნ. ბერძენიშვილი, საქართველოს ისტორიის საკითხები, ტ. VI, თბ., 1973, გვ. 415.

² ტყვის სყიდვას აქ არ შეეხებოდა, რადგან უფრო ვრცლად სხვა თავში ვაქცნება მსჯელობა.

³ გიულდენშტედტის მოგზაურობა საქართველოში, გერმანული ტექსტი ქართული თარგმანითურთ გამოსცა და გამოკვლევა დაურთო მ. გელაშვილმა თბ., 1962, ტ. I, გვ. 139, 141.

სიის მესვეურთ სწამდათ, რომ დამპყრობელი ძალის გახდევინთ ეკლესია აღსდგებოდა და კვლავინდებურად ჩადგებოდა ჭეფის სამსააურში.

1759 წლის 9 დეკემბერს, საეკლესიო კრებაზე სოლომონ მეფე აღნიშნავდა, რომ ქუთაისის ეკლესია... „ხელთ ეგლო მძვინვარეს აგარიანს და მიზეზითა ამით საქუთათლო მამული და სამრევლო მიმობნეულიყო, და რომელიმე დაშთომილიყო, საეროდ გამხდარიყო და ქუთათელი აღარ იჯდა“¹. ამ სხდომაზე მეფემ დადგენილება მიაღებინა საქუთათლოს აღდგენისა და ქუთათელის დასმის შესახებ. ამავე დროს, ქუთათელს დაუმტკიცა ყველა მისი მამული, რასაც იგი აღრე ფლობდა და რომელიც საერო ფეოდალებს მიეტაცნათ, ამიერიდან, საერო ფეოდალები საერთოდ ვეღარ ჩაერეოდნენ საკლესიო საქმეებში.

მეფეს მტკიცედ ჰქონდა გადაწყვეტილი ეკლესიის წინა პლანზე წამოწევა, ამიტომ საეკლესიო პოლიტიკა მან შემდეგი ღონისძიებებით განახორციელა:

1) ერისკაცთაგან მიტაცებული ყმა-მამულები ეკლესიას დაუმტკიცა;

2) საეკლესიო ყმები გაათავისუფლა ზედმეტი გადასახადებისაგან და საეკლესიო გადასახადები დააკანონა;

3) ერისკაცებს აუკრძალა ეკლესიის სამეურნეო საქმეებში ჩარევა;

4) საეკლესიო თანამდებობიდან უღირსნი გადააყენა და ლარსეული პირები შიიწვია;

5) ეკლესია-მონასტრები ააგო და შეამკო.²

საეკლესიო კრების გადაწყვეტილებები თითქმის მთელი დასავლეთი საქართველოს ეკლესიებს შეეხო.³

1759 წლის კრების დადგენილებებმა დასაბამი მისცა ახალ პერიოდს დასავლეთი საქართველოს პოლიტიკურსა და სოციალურ-

¹ ს. კაკაბაძე, საეკლესიო რეფორმისათვის სოლომონ I-ის დროს, თბ., 1914, გვ. 4.

² შ. ბურჯანაძე, დასახ. ნაშრ., გვ. 87. ს. კაკაბაძე, საეკლესიო რეფორმისათვის, გვ. 4 — 5.

³ შ. ბურჯანაძე, დასახ. ნაშრ., გვ. 88.

ეკონომიკურ ცხოვრებაში — თურქეთის ძალადობისაგან თავდახსნისა და ფეოდალურ ურთიერთობათა მოწესრიგების პერიოდს.¹

1759 წლის ღონისძიებები ხალხის ფართო მასების ინტერესებსაც პასუხობდა. ამან მეფეს დიდი ავტორიტეტი და პოპულარობა მოუპოვა მთელ დასავლეთ საქართველოში. ამ კრებაზე აღდგენილი იქნა ხონის საეკლესიო კათედრა.²

ამრიგად, 1759 წლის საეკლესიო კრებაზე მეფე სოლომონი მთელი დასავლეთი საქართველოს საერთო საქმეებში ხელმძღვანელად გამოდიოდა, ხოლო მთავრები და თავადები მისი „მორჩილნი და ბრძანების აღმსრულებელნი იყვნენ. ეს სოლომონისა და მის მომხრეთა დიდი გამარჯვება იყო. მთავრები და, კიდევ უფრო, იმერეთის თავადები შიშნარევი ექვით უცქეროდნენ მეფის ასეთ გაძლიერებას. განსაკუთრებით მოუსვენრად იყო როსტომ რაჭის ერისთავი; მას ამის საბუთიც ჰქონდა. აბაშიძის სახლის დამდაბლების შემდეგ ჯერი ერისთავზე იყო მიმდგარი. ამის პირველი ნიშანი ის იყო, რომ ერისთავის წინააღმდეგ მეფემ მისი მოქიშპე წულუკიძეები დაიხსლოვა. ამავე დროს, დამდაბლებულ აბაშიძეთა ადგილზე სოლომონმა წერეთლის სახლი წამოსწია“.³

1759 წლის საეკლესიო რეფორმის შემდეგ ეკლესია სათანადო სიმამლზე დადგა. ხალხში გავლენა და ავტორიტეტი აღიდგინა. მაგალითად, 1776 წელს კაცია ჩიჩუას შესახებ, რომელსაც ბიჭვინთის საეკლესიო ყმები მიეტაცა და ოსმალებისათვის მიეყიდა, კათალიკოსი აცხადებდა: „აწ უწყოდეთ ყოველთა, შევაჩვენებ წყეულსა მას კაცია ჩიჩუას და განვახვამ ეკლესიისაგან“.⁴ დიდ სასჯელად ითვლებოდა ეკლესიისაგან გარიცხვა, შეჩვენება.

ამრიგად, ეკლესიის აღორძინების შემდეგ მეფემ ძლიერი მოკავშირე შეიძინა მისი სახით. ;

ბრძოლა თურქებთან 1758 — 1768 წწ.

ხრესილთან თხმალთა ჯარის ამოწყვეტას და სოლომონ მეფის ბრძოლას დამოუკიდებლობისათვის თურქეთის ხელისუფალნი ვერ ურიგდებოდნენ. ახალციხის ფაშას პაჯი-აჰმედს სტამბოლიდან ბრძანება მოუვიდა იმერეთის დამორჩილების შესახებ. სანამ საომრად გამოემართებოდნენ, ახალციხის ფაშამ იმერთა მეფეს მოს-

¹ ქ. ჩხატარაიშვილი, დასახ. ნაშრ., გვ. 461.

² ს. კაკაბაძე, საეკლესიო რეფორმისათვის, გვ. 7.

³ ნ. ბერძენიშვილი, დასახ. ნაშრ., გვ. 417.

⁴ იქვე.

თხოვა ხარკისა და ჯარიმის სახით 300 ქესა¹ ფული და ტყვეებით თავისუფალი ვაჭრობის აღდგენა.

ქვეყნის აოხრების თავიდან აცილების მიზნით სოლომონი პირველ მოთხოვნაზე დასთანხმდა, ხოლო მეორეზე უარი აკადრა. მაშინ დიდძალი ოსმალთა ჯარი, ხუნძახის ბატონთან და ლეკებთან ერთად 1758 წელს იმერეთის დასალაშქრავად გადმოვიდა. მეფე მოუშვადებელი შეხედა ამ შემოსევას. მტერმა მთელი ქვეყანა ააოხრა და გაძარცვა,² მათ შორის გელათის მონასტერიც. მეფე სოლომონი იძულებული გახდა, ყველა პირობაზე დათანხმებულიყო, რაც ოსმალებმა წამოუყენეს.³ ალაფით დატვირთული მძარცველები უკან გაბრუნდნენ. ხოლო ხარკის აკრეფა იმერეთის ციხეებში მდგარ თურქ მეციხოვნეებს დაავალეს. მათ მიერ ხარკის აკრეფამ ძარცვის ხასიათი შიილო. მცხოვრებლებმა ახალციხის ფაშასთან იჩივეს, ამის შესახებ ჰამერი წერს — „ახალციხეში ბატონიშვილი სოლომონი მოვიდა საჩივრებით, რომლებიც იმერეთის მცხოვრებთ ბაღდათისა და ქუთაისის გარნიზონების მიმართ ჰქონდათ“.⁴

მეფე სოლომონი ახალციხის ფაშას ჰაჯი-აჰმედს ეახლა, ფაშამ სოლომონის საჩივარი შეისმინა და იმერთა მეფეს სამი ათასი თურქი მეომარი გამოაყოლა. ამ ჯარით უნდა დაესაჯათ თვითნებური მოქმედებისათვის იმერეთის ციხეებში ჩაყენებული თურქი მეციხოვნეები. მაგრამ, როგორც ჰამერი აღნიშნავს, თურქებს იმერეთამდე არც კი ჩამოუღწევიათ, — სოლომონ მეფემ ისინი გზაშივე გაანადგურა თავისი ფიცის კაცების ჯარით, რომელიც მან იმერეთიდან საიდუმლოდ გამოიწვია.⁵

ამ მარცხის გამო თურქეთის მთავრობამ ჰაჯი-აჰმედ ფაშა ჯერ თანამდებობიდან გადააყენა და შემდეგ სიკვდილით დასაჯა.⁶ ამ

¹ ქისა ანუ „ქესა“ არაბულ-სპარსული სიტყვაა და თავდაპირველად საფულეს ნიშნავდა; შემდეგ ოსმალურში — ფულის ოდენობას. ვახტანგ მეფის განმარტებით „ოცდაათ თუმანს ურუმნი (ოსმალნი — მ. რ.) ერთ ქისას ეძახიან“ (სამართლის წიგნი, კარი თეთრის გარიგებისა, პარაგრ. 16).

² ჰაპუნა ორბელიანი, საქართველოს ცხოვრება, წიგნში „ქართლის ცხოვრება“, ნაწილი მეორე; ჩუბინოვის გამოცემა, სანკტ-პეტერბურგი, 1854, გვ. 474.

³ ჰამერი, ისტორია, IV, გვ. 545.

⁴ იქვე.

⁵ იქვე.

⁶ იქვე. გვ. 546. ს. კაკაბაძე, საქართველოს ისტორია, გვ. 110-111; შ. ბურჯანაძე, დასახ. ნაშრ., გვ. 94.

დროს ქართველი ხალხის ცხოვრებაში ერთი მნიშვნელოვანი პოლიტიკური მოვლენა მოხდა — ქართლ-კახეთის და იმერეთის მეფეებმა ქალაქ გორში 1758 წელს თავდაცვითი კავშირის ხელშეკრულება დადეს — „რომელ ქვეყანაში მტერი შემოვიდესო, ერთმანეთს მივეშველნეთო“.¹ ამ შეთანხმებისათვის მეფეებს რამდენიმე წლის მანძილზე არ უღალატიათ; და საერთოდ ქართლ-კახეთის მეფეებმა სოლომონს რამდენიმეჯერ აღმოუჩინეს დახმარება თურქების წინააღმდეგ ბრძოლაში — „ოსმალნი რომ იმერეთში მივიდნენ, ერეკლე სოლომონს საიდუმლოდ მოეხმარა ორჯერ“.² ეს მოხმარება იმდენად მნიშვნელოვანი ყოფილა, რომ თურქეთში ხმა დავარდნილა, იმერეთში ერეკლე-მეფის ახლო მყოფი რუსი ოფიცრები იბრძვიანო. ასევე, იმერთა მეფეც აშკარად უწევდა დახმარებას ერეკლე მეფეს — ორჯერ ცხრა-ცხრა ათასი კაცით თვითონაც იქ იბრძოდა³ ლეკების წინააღმდეგ ბრძოლაში და კიდევაც გაიმარჯვეს.⁴ მესამედ თავისი ძმა არჩილი გაგზავნა ჯარით ლეკების წინააღმდეგ საბრძოლველად,⁵ ხოლო 1760 წელს სოლომონ მეფე ერეკლე მეფეს ეხმარებოდა განჯის აღებაში 15 000-იანი ლაშქრით. იმერთა მეფეს ამ ბრძოლაში თავიანთი ლაშქრით დადიანი და რაჭის ერისთავი როსტომიც⁶ ახლდნენ.

სამწუხაროდ, ამერ-იმერის მეფეებს სისტემატურად და აშკარად არ შეეძლოთ ერთმანეთს დახმარებოდნენ, რადგან 1555 წლის ამასიის ზავით (რომელიც გადაულახავ ბარიერად იყო აღმართული საქართველოს ერთიანობის წინააღმდეგ) ეს დაუშვებელი იყო.⁷

თურქეთის სულთანმა ახლად დანიშნულ ახალციხის ფაშას დაავალა იმერეთის დამორჩილება. 1758 წელს ჰასან-ფაშა ორჯერ შემოიჭრა იმერეთში, მაგრამ ორჯერვე დამარცხდა.⁸

1759 წელს ჰასან-ფაშა იბრაჰიმ ფაშამ შეცვალა. მას იმერთა მეფემ დედოფალი მარიამი აახლა და ზავი და მშვიდობა შესთავაზა, მაგრამ სანაცვლოდ ფაშამ ტყვეთა სყიდვის თავისუფლება

¹ კაკუნა ორბელიანი, დასახ. ნაშრ., გვ. 474.

² სიგელ-გუჯრები II, გვ. 2 (რუს.).

³ იქვე.

⁴ კაკუნა ორბელიანი, დასახ. ნაშრ., გვ. 489.

⁵ სიგელ-გუჯრები, II, გვ. 2 (რუს.).

⁶ გ. თამარაშვილი, კათოლიკობა ქართველთა შორის, თბ., 1902, გვ. 378.

⁷ გ. რეხვიაშვილი, იმერეთის სამეფო XVI საუკუნეში, თბ., 1976, გვ.

მოითხოვა. ამაზე მან უარი მიიღო და მოლაპარაკებაც ჩაიშალა¹.

1760 წელს თურქებმა ისევ შემოუტიეს იმერეთს, მათი მიზანი იყო სოლომონ მეფის დამორჩილება, ხარკის გადახდევინება და ტყვის სყიდვის აკრძალვის გაუქმება.

სოლომონ შეფე ამ ლაშქრობას მომზადებული შეხვდა და მომხდურნი სასტიკად დაამარცხა².

1761 წელს თურქებმა ისევ სცადეს იმერეთის დამორჩილება, მაგრამ ამაოდ, ოსმალები კვლავ დამარცხდნენ³.

1763 წელს ახალციხის ფაშა 13 000-იანი ლაშქრით ორ ტალღად შემოიჭრა იმერეთში⁴ და წარმატებასაც მიაღწია, მაგრამ მტრის ჯარში უთანხმოება ჩამოვარდა, იანიჩარებს სურდათ ქვეყნის დამორჩილება, ხოლო ქურთები ქვეყნის აოხრება-გაძარცვას მოითხოვდნენ, ამან მთლად მოშალა მტრის საბრძოლო დისციპლინა, რითაც ისარგებლეს ქართველებმა და მუსრი გააღლეს მტერს⁵.

იმავე 1763 წელს თურქთა ლაშქარი კვლავ დაესხა თავს იმერეთს, მაგრამ ამჯერადაც დამარცხდა და უკუიქცა⁶.

ამის შემდეგ თურქებმა აღმოსავლეთიდან სცადეს ზემო იმერეთში შეჭრა, მაგრამ ერეკლე მეფემ, ამოუდგა რა მხარში თავის მოკავშირეს, გზა ჩაუკეტა და თურქები უკან გაბრუნდნენ⁷.

თურქეთის მთავრობა ისევ ნაცად გზას დაადგა და იმერეთის სამეფოს მიმართ მოქმედების გეგმა შეცვალა — ძალის პოლიტიკით რომ ვერაფერს ვახდა, ისევ სოლომონის მოწინააღმდეგეებთან გააბა კავშირი და ციხის გატეხა შეიგნიდან სცადა. ჰამერის გადმოცემით, სოლომონის ერთ ძმას, რომელიც ახალციხეში იყო გაქცეული, როგორც ძმის მოლალატე და მოწინააღმდეგე, აჰმედ-ფაშამ რამდენჯერმე აღმოუჩინა შეიარაღებული დახმარება სოლომონ-მეფის წინააღმდეგ, მაგრამ სასურველ შედეგს ვერც ძმამ და ვერც ფაშამ ვერ მიაღწიეს. შემდეგ იმერეთიდან გაქცეული, ტახტისმძიებელი მეფის ბიძაშვილი — თეიმურაზ მამუკას ძე თურქეთის მთავრობას იმერეთის ტახტზე გამეფებას სთხოვდა და, სამაგიეროდ „ტყვის სყიდვის“ აღდგენას აღუთქვამდა; თურქეთისათვის ეს წინადადება მისაღები აღმოჩნდა. ამდენი მარცხიანი ლაშქრობის შემდეგ — 1764 წელს თურქეთის მთავრობამ დიდი ლაშქრის

¹ А. Цагарели. Грамоты, I стр. 15. შ. ბურჯანაძე, დასახ. ნაშრ., გვ. 95.

² იქვე.

³ ჰამერი, ისტორია, ტ. IV, გვ. 546.

⁴ იქვე.

⁵ ჰამერი, ისტორია, ტ. IV, გვ. 546. შ. ბურჯანაძე, დასახ. ნაშრ., გვ. 95.

⁶ შ. ლომსაძე. დასახ. ნაშრ. გვ. 216—217, 219.

⁷ А. Цагарели. Грамоты, стр. 16.

შეყრა ბრძანა. ახალციხისა და არზრუმის საფაშოებს გარდა, ამ ლაშქრობაში ექვსი საფაშოს ჯარები მონაწილეობდნენ, და თან მოყავდათ პრეტენდენტი თეიმურაზი — იმერეთში გასამეფებლად.

1765 წელს ჰასან-ფაშა დიდი ლაშქრით დასავლეთ საქართველოს დასარბევად წამოვიდა.

სოლომონის მხარეზე იყვნენ გურიისა და ოდიშის მთავრები, ხოლო როსტომ — რაჭის ერისთავი ისევ თურქეთის მხარეზე აღმოჩნდა. ფაშა პირველად გურიას შეესია, მაშინ IV გურიელმა მწვავე ბრძოლები გაუძარტა, ჰაგრამ დამარცხდა. ფაშამ იგი განდევნა და გურიელად მისი ძმა ვიორგი (V) დასვა.

ფაშა ამჯერად ფრთხილად მოქმედებდა, მან იმერეთში სწრაფად შესვლა ვერ გაბედა, იმერეთს გვერდი აუარა და ოდიშის მთავარს ეწვია — თურქების ძალთა სიმრავლით შეშინებულმა დადიანმა სამთავრო გაძარცვისაგან რომ გადაერჩინა, ქედი მოიხარა და მათ მიერ წაყენებულ მოთხოვნას — ჯარისათვის სურსათის მიცემას — დასთანხმდა, ეს წელი თურქთა ლაშქარმა ოდიშში გამოიხამტრა. სოლომონ მეფე იზოლირებული აღმოჩნდა.

1766 წელს ჰასან-ფაშა იმერეთს შეესია. განმარტობული მეფის დამარცხება აღარ გაკვირვებიათ. ერთთვიანი ბრძოლის შემდეგ ფაშამ სვერის ციხე აიღო და იქიდან სოლომონი განდევნა. ბრძოლის გაგრძელება უიმედო იყო. გამარჯვებული ფაშა ქუთაისში შევიდა და თეიმურაზ მამუკას ძე მეფედ გამოაცხადა¹. მეფის მოძულეებს და ტყვეებით მოვაჭრე თავადებს ზეიმის დღე დაუდგათ — „ისინი ქუთაისში მივიდნენ და ხელი მოაწერეს ახალ მბრძანებელ თეიმურაზისადმი მორჩილების აქტს“ — წერს ჰამერი. ¹

ამრიგად, 1765 წელს დაწყებული ლაშქრობა ჰასან-ფაშამ 1766 წელს გამარჯვებით დაამთავრა².

სოლომონ მეფემ ოთხი კაცის თანხლებით თავი შეაფარა თავისი ერთგული წერეთლების საქმო ციხეს — „მოღინახეს“, რომელიც ქაიხოსრო და ნიკოლოზ წერეთლებმა გადასცეს მას³.

მიუხედავად იმისა, რომ ქვეყნის ძირითადი ნაწილი მტერს ჰქონდა დაკავებული, დამოუკიდებლობისათვის მებრძოლთა ლაშქარი თანდათანობით მრავლდებოდა და მტკიცდებოდა. თურქები ციხეებიდან გამოსვლას ვეღარ ბედადნენ. თვით თეიმურაზ მეფეც თურქებთან გადასახლდა ქუთაისის ციხესიმაგრეში და გარეთ ვერ

¹ ჰამერი, ისტორია, IV, გვ. 560.

² შ. ბურჯანაძე, დასახ. ნაშრ., გვ. 97.

³ ს. კაკაბაძე, წერილები და მასალები საქართველოს ისტორიისათვის, I, გვ. 92.

გამოდირადა, ის არც ხალხს სურდა მეფედ, რადგან დამპყრობლებისაგან იყო თავსმოხვეული იმერეთის ხალხისათვის. ტახტიდან გადაგდებული სოლომონი ფაქტიურად მაინც მეფობდა იმერეთში.

1766 წელს თურქეთის მთავრობამ იმერეთში გასალაშქრებლად ისევ ბრძანა დიდი ლაშქრის შეყრა. ამისათვის 300 000 მანეთი (რუსულ ფულზე გადაყვანით) გამოიყო, 45 000 კაცი შეიკრიბა, მაგრამ მალე მიხვდნენ, რომ ეს ლაშქრობაც დიდ სარგებლობას არ მოუტანდა მათ და ისევ ზავის დადება ამჯობინეს. „ოღონდ ზავი ისე უნდა დადებულიყო, რომ გარეგნულად მაინც პორტასათვის საპატიო ყოფილიყო“¹. ზავის დადება სოლომონთან იმის მომასწავებელი იყო, რომ დამპყრობელმა გამარჯვების რწმენა დაკარგა², მაგრამ თვით სოლომონიც არ იყო დარწმუნებული იმაში, რომ იმერეთის ტახტს კვლავ შემოიბტკიცებდა, ამიტომ მან ქართლ-კახეთის მეფეს ერეკლე II-ს მიმართა თხოვნით, რათა თურქეთთან მორიგებაში ეშუამდგომლა.

ერეკლე მეფის შუამდგომლობას თურქეთის მთავრობა დიდოკმაყოფილებით შეხვდა, რადგან იმერეთში გაუთავებელი ომის დამთავრება მასაც სურდა.

საზავო მოლაპარაკებას ერეკლე მეფის ელჩთან ერთად სოლომონ მეფის ძმა გენათელი იოსები ხელმძღვანელობდა. ელჩები, როგორც ზემოთ აღვნიშნეთ, 1766 წელს ჩავიდნენ სტამბოლში. ერეკლეს ელჩმა სტამბოლს აღუთქვა, რომ სოლომონ მეფე მზადაა, ხონთქარს აძლიოს ხარკის ანგარიშში 60 ქალი წლიურად³ (მხოლოდ იმ განსხვავებით, რომ სავალდებულო არ იყო ეს ქალები ქართველები ყოფილიყვნენ), ხოლო ხონთქარი იმერეთის საშინაო საქმეებში არ ჩაერეოდა. ხელშეკრულების დადება გაქვიანურდა ალბათ იმიტომ, რომ ამ დროს იმერეთის ტახტზე ოსმალეთის მომხრე თეიმურაზი იჯდა და ხარკსაც თურქთა მოთხოვნილებისამებრ იხდიდა. ელჩობამ მიზანს მაინც ვერ მიაღწია — 1767 წელს იმერეთ-თურქეთს შორის ზავი დაიდო, ამ ხელშეკრულების ძალით ძველი მოხარკეობა ისევ აღდგა, მაგრამ, როგორც შემდეგ გაირკვა, ეს შეთანხმება სოლომონის მხრიდან მოჩვენებითი იყო, ხოლო თურქეთის მთავრობაც არ ჩქარობდა სოლომონისათვის ტახტის დაბრუნებას.

1768 წელს სოლომონ მეფემ გადამწყვეტი ბრძოლა გაუმართა მის მოწინააღმდეგეებს — დასავლეთი საქართველოს მეფე-მთავ-

¹ ქ. ჩხატარაიშვილი, დასახ. ნაშრ., გვ. 645.

² შ. ბურჯანაძე, დასახ. ნაშრ., გვ. 101.

³ ქ. ჩხატარაიშვილი, დასახ. ნაშრ., გვ. 645 — 646; ნ. ბერძენიშვილი, საქართველოს ისტორიის საკითხები, ტ. VI, თბ., 1973, გვ. 420.

რებს. „ჩხარის მახლობლად ცხრაწყაროსთან... სოლომონ მეფემ თავისი ერთგული იმერლებით და დაქირავებული ლეკებით დაამარცხა თურქები და მათ მიერ მეფედ დაყენებული თეიმურაზი“¹. თეიმურაზის მხარეზე იბრძოდნენ აგრეთვე დადიანი, გურიელი და რაჭის ერისთავი, მაგრამ ყველანი დამარცხებულ იქნენ სოლომონ მეფის მიერ.

ამ გამარჯვებით იმერეთის ტახტი კვლავ სოლომონმა დაიკავა და მთელი იმერეთი შემოიბტკიცა. თეიმურაზ ბატონიშვილი შეიპყრეს და მუხურის ციხეში გამოკეტეს, საიდანაც ცოცხალი აღარ გამოსულა². ასევე დააპატიმრეს და ციხეში ჩასვეს თეიმურაზის ძმა გიორგი ბატონიშვილი³.

ტახტის დაბრუნების შემდეგ სოლომონ მეფეს გასაჭირის დროს სტამბოლისადმი შეთავაზებული მორჩილების პირობები ახლა მიუღებლად მიაჩნდა და ტყვეებით (ადამიანებით) ხარკის გადახდას დაჟინებით უარყოფდა. ახალციხის ფაშასაგან მოთხოვნას (1767 წლის საზავო პირობების თანახმად) ხარკში ადამიანების გაგზავნაზე სოლომონმა უპასუხა — მე სწორედ ასეთი ხარკის წინააღმდეგ ვიბრძოდი და ვიბრძვი და სულთანს ქალების გაგზავნას როგორ აღუუთქვამდით. ფაშამ ეს პასუხი სულთანს აცნობა, მაგრამ რაიმე საწინააღმდეგო ღონისძიება სოლომონის მიმართ არ მიუღიათ. იმერეთის მეფის მიერ რუსეთს წარგზავნილი მაქსიმე ქუთათელი რუსეთის სამეფო კარზე უარყოფდა ადამიანებით ხარკის მიცემას ოსმალთათვის და აღნიშნავდა — სოლომონ მეფეს თურქებთან ომი აქვს სწორედ იმის გამო, რომ თურქეთი ხარკად ადამიანებს მოითხოვს, რასაც მეფე არასდროს არ დაუშვებს⁴.

მიუხედავად იმისა, რომ იმერეთის ციხეებში თურქები კვლავ იდგნენ, სტამბოლის სამეფო მთავრობა მაინც შეშფოთებული იყო, რადგან იმერეთის სამეფო კვლავ ცდილობდა რუსეთთან კავშირის დაჭერას. თუკი იმერეთს დაკარგავდა, თურქეთს ხელიდან ეცლებოდა შავ ზღვაზე და კავკასიაში ბატონობის ერთ-ერთი დასაყრდენი. ამიტომ სულთანი იძულებული იყო, სოლომონისათვის დაეთმო. მხედველობაშია მისაღები ის გარემოებაც, რომ ამ დროს უკვე ახლოვდებოდა რუსეთ-თურქეთის 1768 — 1774 წლების ომი და პორტუსაც კარგად ესმოდა ამ ომში იმერეთის მნიშვნელობა.

¹ გიულდენშტედტი, მოგზაურობა საქართველოში, ტ. I, გვ. 169.

² შ. ბურჯანაძე, დასახ. ნაშრ., გვ. 102.

³ ქ. ჩხატარაიშვილი, დასახ. ნაშრ., გვ. 646.

⁴ უაგარელი, 16—17 (რუს.).

სულთანმა მუსტაფა III 1768 წლის აგვისტოში სოლომონ მეფის მიმართ წყალობის ფირმანი გამოსცა, რომლის ძალითაც „ქრისტიან მფლობელთა შორის სახელგანთქმულ სოლომონს იმერეთის მეფედ აღადგენდა“¹, თუმცა ამ სიგელის გამოცემამდე სოლომონმა ხმლით დაიბრუნა მეფობა, მაგრამ ეს ნაგვიანვეი თანხმობა სტამბოლისაგან მეფის დიდი გამარჯვება იყო. ამ ფირმანის გამოცემამ დააჩქარა მაქსიმე ქუთათელის ელჩობა რუხეთში².

ამრიგად, ათი წლის მანძილზე — 1758 — 1768 წლებში — იმერეთის ხალხი სოლომონ მეფის ხელმძღვანელობით გმირულად ებრძოდა თურქ დამპყრობლებს და მათ დამხმარე იმერელ რენეგატთა ვადებს. სოლომონმა არაერთხელ დაამარცხა და დასაჯა ორგულა შინაური და გარეშე მტერი. იმერეთის ხალხის ქედმძუხვრელმა და გმირულმა ბრძოლამ თავისუფლებისა და დამოუკიდებლობისათვის მტერი აიძულა უკან დაეხია და მეფესთან კომპრომისული ზავი დაედო.

სოლომონ მეფე და როსტომ რაჭის ერისთავი

პირველი წერილობითი წყარო, რომელშიც რაჭის საერისთავოა მოხსენებული, XI საუკუნეს განეკუთვნება³. პროფ. ო. სოსელიას მიხედვით, ამ საერისთავოს არსებობა X საუკუნიდან უნდა ვივარაუდოთ⁵.

თამარ მეფის დროს (1184 — 1213 წწ.) რაჭის საერისთავოს ფარგლებში თაკვერიც (ლეჩხუმი) შედიოდა, ხოლო 1230 წლისათვის იგი მხოლოდ რაჭით განისაზღვრება⁶.

¹ ნ. ბერძენიშვილი, დასახ. ნაშრ., გვ. 420.

² ზ. ცქიტიშვილი, დასახ. ნაშრ., გვ. 10—24.

³ დაწერილებით იბ. თ. ბერძენის მონოგრაფია „რაჭა“, სადაც განხილულია რაჭის უიზიურ-გეოგრაფიული აღწერილობა და ისტორია უძველესი ხანიდან მე-19-ე საუკუნემდე, თბ., 1983.

⁴ გ. ბოჭორიძე, რაჭის ისტორიული ძეგლები, საქართველოს მუზეუმის მოამბე, თბ., 1928, ტ. V, გვ. 210; ე. თაყაიშვილი, არქეოლოგიური მოგზაურობა რაჭაში; თბ., 1963, გვ. 89—90; თ. ქარდანია, ქრონიკები, II, გვ. 44; ს. კაკაბაძე, საისტორიო კრებული, IV, თბ., 1929, გვ. 105.

⁵ ო. სოსელია, ნარკვევები ფეოდალური ხანის დასავლეთ საქართველოს სოციალურ-პოლიტიკური ისტორიიდან, თბ., 1973, გვ. 69. უფრო დაწერილებით იხილეთ იმავე წიგნში „რაჭის ერისთავთა სათაქადო“.

⁶ ქართლის ცხოვრება, II, თბ., 1959, გვ. 180.

რაჭის ერისთავები — კახაბერიძეები — ბალუაშთა გვარის წარმომადგენლები იყვნენ. შემდეგში ჟამთააღმწერელი მათ კახაბერის სახელის მიხედვით კახაბერიძედ თვლის¹. წარმოშობით ეს საგვარეულო არგვეთიდან მოდიოდა და მისი მამაპაპეული რეზიდენცია იყო².

არგვეთიდან იყო კლდეკარის საერისთავოს დამაარსებელი (IX საუკუნის II ნახევარი) ლიპარიტ ბალუაში. არგვეთიდან იყვნენ მხეციძეები, ჩხეტიძეები, შემდეგში — აბაშიძეები. ისტორიიდან ცნობილია, რომ ამ დიდ საგვარეულოთა მეთაურები მუდამყამს (ჯერ კიდევ დავით აღმაშენებლის დროიდან) ებრძოდნენ მეფის ხელისუფლებას.

XIII საუკუნის II ნახევარში დავით ნარინმა (1247 — 1293 წწ.) ლალატისათვის სასტიკად დასაჯა რაჭის ერისთავი — კახაბერიძე, გააუქმა საერისთავო და იგი თავის სახასო მამულად გამოაცხადა.

XIV საუკუნის დასასრულს, იმერეთის მეფეებმა რაჭის საერისთავო ისევ აღადგინეს.

XVI საუკუნის 30-იან წლებში ბაგრატ მეფემ (1510—1565 წწ.) რაჭის ერისთავად დასვა შოშიტა ჩხეტიძის (1534 — 1565 წწ.) მემკვიდრეები, მომდევნო საუკუნის II ნახევრიდან ჩხეტიძეები უკვე „თვისად“ თვლიან საერისთავოს, მაგრამ ძველ საერისთავოსთან შედარებით, ჩხეტიძეთა სამფლობელო ბევრად იყო შეკვეცილი: მასში არც თავკერი შედიოდა და არც მთელი რაჭა.

რაჭის ერისთავები თანდათანობით იწყებენ ყმა-მამულის შემოქცევას. XVII საუკუნის ბოლოს მათი სამფლობელო საგრძნობლად გაღივებულია.

XVIII საუკუნის შუა წლებისათვის ერისთავებს ეკუთვნოდათ 56 სოფელი, მათი ყმების საერთო რაოდენობა 1250 კომლით განისაზღვრებოდა; ამავე საუკუნის 50 — 60-იან წლებში ერისთავები უკვე მთელი რაჭის მფლობელებია. თუ რაჭის მოსახლეობა ამ დროისათვის 5000 კომლით განისაზღვრებოდა, ერისთავების ყმათა საერთო რაოდენობა ამაზე ბევრად ნაკლები არ იყო³.

XVIII საუკუნის II ნახევარში ერისთავთა სამფლობელო — რაჭა მოქცეული იყო კავკასიონის ქედს, სვანეთს, საწერეთლოს, ოკრიბასა და ლეჩხუმს შორის. ასეთი გეოგრაფიული მდებარეობის

¹ ქართლის ცხოვრება, II, თბ., 1959, გვ. 275.

² ს. ქანაშია, შრომები, II, თბ., 1952, გვ. 477.

³ ო. სოსელია, დასახ. ნაშრ., გვ. 79.

გამო რაჟა ძნელად მისადგომი კუთხე იყო, და რაჟის ერისთავე-
ბიც, მის ბუნებრივ სიმაგრეებს მინდობილნი, ყოველთვის მიილ-
ტვოდნენ დამოუკიდებლობისაკენ. ამას ვერ ურიგდებოდნენ იმე-
რეთის მეფენი და იყო მათ შორის ბრძოლა და აშლილობა მარად-
ეჟამს. რაჟის ერისთავები მათ „შინაურ საქმეებში“ მეფის ჩარე-
ვას მტრულად ხედებოდნენ, მეფე კი თავის მხრივ, არ ცნობდა
ერისთავის მემკვიდრეობითს უფლებას საერისთავოზე და ამ მოხე-
ლის დასმა-გადაყენებას საკუთარ უფლებად მიიჩნევდა. ამ ნი-
ადაგზე ერისთავსა და მეფეს შორის დაუნდობელი ბრძოლა იყო.
გაჩაღებული, სადაც ხან ერთი მხარე იმარჯვებდა და ხან მეორე.

ერისთავების რეზიდენცია იყო სოფ. წესი. წესის იმ ნაწილს,
სადაც ერისთავების კარის ეკლესია და სასახლეა, ბარაკონი ეწო-
დება. ბარაკონის მახლობლად მაღალი კლდის თავზე იდგა ერის-
თავების ბატონობის სიმბოლო, ციხესიმაგრე „მინდა“ „მაგარი და
აულბებელი მტრისაგან“, ბარაკონის ეკლესია ამჟამადაც შემონა-
ხულია, ციხისა კი მხოლოდ ნანგრევებია დარჩენილი.

ბარაკონი მტრისათვის შეუვალი და მიუდგომელი იყო. აღმო-
საველეთით მას ციხე „მინდა“ იცავდა, ჩრდილოეთით — კლდიანი
მთა, სამხრეთ-აღმოსავლეთით და სამხრეთ-დასავლეთით — მდ. რი-
ონი.

წესის მისადგომზე, ხიდიკართან, იქ, სადაც, რიონი ვიწრო კალა-
პოტში მოედინება, ხიდი იყო გადებული. ხიდის ორივე თავთან,
გამოკვეთილ სალ კლდეში, კოშკები იყო მიშენებული და თითოეულ
კოშკში მუდმივად 40 შეიარაღებული მცველი იდგა. ასე რომ,
წესის მისადგომიც მტკიცედ ჰქონდა დაცული ერისთავს. თავის უძ-
ლველობაში დარწმუნებული როსტომ-ერისთავი იმერთა მეფეს
სოლომონ პირველს აღარ მორჩილებდა და ოსმალთა და შინა მო-
კავშირეთა მოიმედეს, თვალი გარეთ ეჭირა. ბუნებრივი გეოგრა-
ფიული ზღუდეებით დაცული საერისთავო, იმავე დროს, მოკლე და
მოხერხებული გზებით იყო დაკავშირებული მეზობლებთან.

ერთი გზა — შამისონის, გეზევეცის, კარაგომის, ძედოს, კირტი-
შოს გადასასვლელებით უკავშირდებოდა ჩრდილოეთ ოსეთს (აღ-
სანიშნავია, რომ რუსეთის ელჩები — ტოლოჩანოვი და იველევი
გეზევეცის გადასასვლელით მოვიდნენ იმერთში); მეორე — უკა-
ვშირდებოდა საჩხერეში წერეთლების სათავადოს; მესამე — ნაჭე-
რალას ქედით — ოკრიბას; მეოთხე — ტოლას ხევიდან — სვანეთს;
მეხუთე — ერწოს გადასასვლელით ცხინვალიდან ქართლს. მეექვ-
სე — ვაცის წვერის გადასასვლელით — ქვემო სვანეთს.



იმერეთის სამეფო კარზე რაჭის ერისთავები დიდი პატივით სარგებლობდნენ. ეს იქიდან ჩანს, რომ ალექსანდრე III-ის მიერ 1651 წელს რუსთ ხელმწიფისათვის გაგზავნილ ფიცის წიგნში საერთო ხელისუფალთაგან პირველს პაპუნა რაჭის ერისთავს მოუწერია ხელი; თვით რუსეთის ელჩებიც მას მეფის პირველ „ბოიარს“ ეძახიან. უფრო გვიან, სოლომონ I-იც რაჭის ერისთავს ერთხანს დიდი პატივით იხსენიებს. მაგალითად, 1759 წლის საეკლესიო კრების დადგენილებაში სოლომონ მეფე რაჭის ერისთავს ასეთი ტიტულით ამკობს: „...სპასპეტ-სპასალარი, სტრატილატი და ვიპატოსი... ერისთავი როსტომ“¹.

რაჭის ერისთავები ასეთი ტიტულატურით აღარ კმაყოფილდებიან, ერთ ღროს მეფის მიერ ნაწყალობევი მამული უკვე დაისაკუთრეს და საერისთავო — სათავადოდ გახადეს, ხოლო ერისთავი — სათავადოს უფროსად, მხოლოდ იმ განსხვავებით, რომ აქ სათავადოს უფროსს სახლის წევრები კი არ ირჩევენ, როგორც საქართველოს სხვა სათავადოებში, არამედ უფროსობას მემკვიდრეობით გადასცემენ მამიდან შვილზე უხუცესობის მიხედვით. რაჭის ერისთავად დაჯდომას მეფის სანქცია აღარ ჰქონდა, თვითონვე ღებობიან ერისთავად მეფის ნებართვის გარეშე. მაგრამ აღრე ასე არ იყო — რაჭის ერისთავები წინა საუკუნეებიდან მოყოლებული XVII საუკუნის შუა წლებამდე, იმერეთის მეფეთა ვასალები იყვნენ და ემსახურებოდნენ მათ. მაგალითად, 1669 წელს რაჭის ერისთავმა შოშიტა II-მ მოკლა მეფის მოღალატე სახლთუხუცესი სეხნია ჩხეიძე და იმერთა მეფის — ბაგრატის ხელისუფლება განამტკიცა.

თავადურ გათიშულობას ერისთავები განსაკუთრებით ალექსანდრე III-ის სიკვდილის (1660 წ.) შემდეგ იწყებენ: შოშიტა II (1661—1684 წწ.), პაპუნა II (1684—1696 წწ.), შოშიტა III (1696 — 1731 წწ.), გრიგოლ შოშიტა III-ის ძე (1732—1743 წწ.), ვახტანგ შოშიტა III-ის ძე (1743 — 1749 წწ.), როსტომ შოშიტა III-ის ძე (1749 — 1769 წწ.) ებრძვიან ცენტრალურ ხელისუფლებას და ამ ბრძოლაში მხარდამხარ უდგანან აბაშიძეს, დადიანს, გურიელს და სხვა მთავრებსა თუ თავადებს².

ფეოდალური შინაომების შედეგად იმერეთის მეფის ხელისუფლება მეტისმეტად დასუსტდა. ამ მდგომარეობამ განსაკუთრებით

¹ ს. კაკაბაძე, საეკლესიო რეფორმისათვის, გვ. 5.

² თ. სოსელია, ნარკვევები ფეოდალური ხანის დასავლეთ საქართველოს სოციალურ-პოლიტიკური ისტორიიდან, თბ., 1973, გვ. 119.

იჩინა თავი XVII საუკუნის შუა წლებიდან და XVIII საუკუნის II ნახევრამდე გაგრძელდა. ამ პერიოდში რაჭის ერისთავები სხვა თავადებთან ერთად თავიანთი ნებისამებრ სწყვეტენ იმერეთის მეფის ტახტზე ასვლა-დარჩენის საკითხს. გაძლიერებული რაჭის ერისთავები ლიხთიმერისა და ლიხთამერის მთავრად და მსაჯულად დადგინებულ „რაჭის მპყრობელს“ ეძახიან თავიანთ თავს¹.

რაჭის ერისთავის წინააღმდეგ მრავალჯერ გაულაშქრია იმერეთის მეფეს, მაგრამ ამაოდ. პაპუნასთან ბრძოლაში ალექსანდრე მეოთხემ ორჯერ დაკარგა მეფის ტახტი, ბოლოს პაპუნამ და მისმა მომხრეებმა შეიპყრეს მეფე და ქართლის მეფეს — გიორგი XI გადასცეს; 1695 წელს იგი რუისს მოაშთეს და იქვე დაფლეს.

ერისთავმა და მისმა მომხრეებმა სამჯერ ჩამოაგდეს გიორგი V (1707 — 1720 წწ.) ტახტიდან, ხოლო როცა მეფე დროდადრო მაინც ახერხებდა თავისი უფლების აღდგენას, სამეფოში ისევ რაჭის ერისთავი, დადიანი და აბაშიძე მბრძანებლობდნენ.

1716 წელს მათ იმერეთის სამეფო სამად გაიყვეს, ხოლო 1720 წელს მეფეც მოკლეს.

არც გიორგი VI-ის მემკვიდრეს, ალექსანდრე V-ს ჰქონდა მოსვენება: რაჭის ერისთავმა და მისმა მომხრეებმა იგი რამდენჯერმე გააძევეს იმერეთიდან.

არც როსტომ ერისთავი უდებდა ტოლს სოლომონ პირველს. გაძლიერებული ქვეშევრდომი მეფეს აშკარა ბრძოლას უცხადებდა. აკი ხალხური ლექსი გვეუბნება როსტომის პირით:

„...ხელო აიღე რაჭაზედ,
მისვდი, რომ აღარ გმორჩილობ, სწორია ეიდგაში ძალზედ,
რაჭის ბეგარას ავიღებ, არ გერიდები ამაზედ“.

რაჭის ერისთავებს აღმოსავლეთი საქართველოს მეფეებთან კეთილმეგობრული კავშირი ჰქონდათ დამყარებული. როგორც ცნობილია, სპარსთაგან ლტოლვილმა კახეთის მეფემ, პოეტმა თეიმურაზ პირველმა, რაჭაში შეიღიწილი წელიწადი გაატარა და იქვე დაწერა სომეხ „შამიფარვანიანი“ (1656 წ.).

როდესაც იმერთა მეფე ალექსანდრე III გარდაიცვალა, რაჭის ერისთავმა იმერეთის ტახტზე ქართლის მეფის შაჰ-ნავაზის შვილი ლუარსაბი მოიწვია გასამეფებლად, მაგრამ ხონთქარმა ეს არ შეაიწყნარა. ამის შემდეგ იმერეთის ტახტისათვის ბრძოლას იწყებს არჩილი, რომელიც რაჭის ერისთავთა დახმარებით სამჯერ გამეფდა იმერეთში. დამარცხებული არჩილი თავშესაფარს ისევ რაჭაში პოულობს და აქედან იწყებს ბრძოლას ტახტისათვის.

¹ ს. კ ა ბ ა ძ ე, დასავლეთ საქართველოს საეკლესიო საბუთები, I, გვ. 149.

ერთხანს ლტოლვილი გიორგი XI რაჭას აყოებდა თავს. რაჭის ერისთავს ვახტანგ VI-სთანაც კარგი განწყობილება ჰქონდა. შოშიტა III რუსეთის იმპერატორისადმი 1724 წელს გაგზავნილ წერილში პეტრე I-ს სთხოვდა, ქართლის მეფეს დახმარებოდა ყიზილბაშების წინააღმდეგ ბრძოლაში.

რაჭის ერისთავს ერეკლე მეორესთანაც კარგი ურთიერთობა ჰქონდა დამყარებული. ერისთავს სამასი თუ ოთხასი ცხენოსანი კაცი მუდამ მზად ჰყავდა მის დასახმარებლად. !

აღსანიშნავია ისიც, რომ რუსეთის საიმპერატორო კარზე რაჭის ერისთავს როსტომს იმერეთის მეფისაგან დამოუკიდებელ მფლობელად სცნობდნენ. ეკატერინე II თავის 1769 წლის 16 დეკემბრის სიგელში თანაბრად მიმართავს რაჭის ერისთავს, დადიანსა და გურიელს¹. მაგრამ იმ დროს, როცა აღნიშნული დოკუმენტი იწერებოდა, რაჭის საერისთავო უკვე გაუქმებული იყო სოლომონ მეფის მიერ, ხოლო ერისთავი და მისი შვილები — თვალვადანობრილნი.

შოშიტა III ნათესავი იყო იმერეთის სამეფო სახლისა. მისი მეუღლე მარიამი ბაგრატი IV-ის ასული იყო². ამიტომ იწოდებოდა როსტომ ერისთავი „იესის ძირთა ასულთაგან ნაშობად“³, ხოლო მისი ძმა ბესარიონი — „მეფეთა ტომად“.

* * *

რაჭის ერისთავთა განდიდებას გამოხატავდა მათი ტიტულატურა, რომელიც XVIII საუკუნეში გაჩნდა; „ლიხთ იმერის და ამერის მთავრად და მსაჯულად დადგინებული, მპყრობელი რაჭისა“⁴ ან „ლიხთ იმერთა სარდალი... მპყრობელი რაჭისა“⁵.

აღსანიშნავია რაჭის ერისთავის ბეჭდის წარწერა: „ღვთით რაჭის ერისთავს ომით ხმალი მაქვს“⁶, იმ მხრივ, რომ როსტომს ერისთავობა მეფემ კი არ მისცა, არამედ ხმლით მოიპოვა.

გაძლიერებული ერისთავი რაჭის სათავადოებს „წახდენა-გაღარიბებით“ ემუქრებოდა და მათგან მორჩილებას მოითხოვდა. ამა-

1 ა. ცაგარელი, I, გვ. 82 (რუს.).

2 ს. კაკაბაძე, დასავლეთ საქართველოს საეკლესიო საბუთები. I, გვ. 128.

3 ს. კაკაბაძე, საეკლესიო რეფორმისათვის, გვ. 5.

4 ს. კაკაბაძე, დასავლეთ საქართველოს საეკლესიო საბუთები, გვ. 149.

5 შ. ბურჯანაძე, ისტორიული დოკუმენტები იმერეთის სამეფოსა და გურიის სამთავროებისა, თბ., 1959, გვ. 60.

6 იქვე, გვ. 117.

ვე დროს, რაჭის ერისთავი თამარის დროინდელი რაჭისა და თაკურის (ლეჩხუმის) ერისთავის კახაბერიძის მემკვიდრეობას იჩემებს და არგვეთის ნაწილზე პრეტენზიას აცხადებს.

XVIII საუკუნის პირველ ნახევარში ერისთავმა წერეთლები კუთვნილი ჭრუჭის ხეობა დაიკავა. წერეთლებმა ვერ შეძლეს ერისთავის განდევნა, დავაში სოლომონ პირველი ჩაერია, აღნიშნული ტერიტორია ერისთავს ჩამოართვა, მაგრამ ჭრუჭისავე მონასტერს შესწირა. ამით მეფემ წერეთლების მხარე დაიკავა, რითაც ერისთავი დიდად უკმაყოფილო დარჩა.

მადაშლილი როსტომ ერისთავი კუთვნილ მიწა-წყალს აღარ დასჯერდა და მთელი რაჭის მოსახლეობის შემომტკიცებას მიჰყო ხელი. მან მიიტაცა ჯაფარიძეების, იაშვილების, ყიფიანების, ლიპარიშვილების, გამრეკელიძეების (გამყრელიძეების) სამფლობელოები, მას მიაყოლა სამეფო მამულებიც და მთელ რაჭას დაეუფლა¹.

ერისთავმა არ დაინდო პაატა წულუკიძეც კი, რომელიც მას მხარში ედგა მეფის წინააღმდეგ ბრძოლაში, გააძევა რაჭიდან და მის მამულს დაეპატრონა. „დაიპყრნა ყოველნი საწულუკიძეო მამული სოფელ-ციხესიმაგრენი სათავისთავოდ, საწულუკიძეო სრულად აღხოცა და ნაცვლად მისა დასვა სახელად სარაჭისერისთავო“.

ერისთავის მსხვერპლი გახდნენ ოსეთის თემები — დვალეთი და მაფსანი, რომლებიც ჯაფარიძეებთან ერთად დალაშქრა და ააოხრა.

მიტაცებული ყმა-მამულის დასაცავად მან წინასწარი ზომებიც მიიღო: ხიდიკარის კოშკები გაამაგრა², ხუთასი შეიარაღებული მეომარი მუდმივ მცველად დაიყენა³.

* * *

როსტომ ერისთავმა დიდ სამშენებლო მოღვაწეობასაც მიჰყო ხელი. 1753 წელს ააგო ბარაკონის ახალი ეკლესია⁴, 1754 წელს — ველტყევის ეკლესია⁵, 1755 წელს იერუსალიმში თავისი ხარჯით

¹ თავად ჯაფარა ჯაფარაშვილის წერილი თავად როსტომ ერისთავისადმი მინაწერი, აკაიის კრებული. 1899, № 7, განყ. II, გვ. 2—7.

² სოლომონ-მეფე და როსტომ ერისთავი, 1959, გვ. 61, 64—65.

³ თავად ჯაფარა ჯაფარაშვილის წერილი თავად როსტომ ერისთავისადმი მინაწერი. აკაიის კრებული, 1899, № 7, განყ. III, გვ. 4.

⁴ გ. ბ. ო. კ. ო. რ. ი. ძე, რაჭის ისტორიული ძეგლები, საქ. მეზ. მოამბე, VII, 1931—1932, გვ. 245—246.

⁵ იქვე, გვ. 292—293.

ააშენა დედათა მონასტერი¹, გარდა ამისა, მრავალი დანგრეული ციხე და ეკლესია გაამაგრა და აღადგინა².

ასეთი სწრაფი და გრანდიოზული მშენებლობა საქართველოს მეფეებსაც კი უჭირდათ. ყოველივე ეს ერისთავის დიდ ეკონომიურ შესაძლებლობაზე მეტყველებს. მართლაც და მისი მარნები „ათასიანი ქვევრები და ბელლები მარცვლეულით საგსე იყო. ხოლო პირუტყვთა ჯოგები ოც ადგილს ეყენა, რომელსაც ვერ იტევდა მთა და ველი“.

კაპიტან იაზიკოვის ჩვენებით, როსტომ ერისთავი სოლომონ მეფეზე გაცილებით უფრო მდიდარი იყო³.

* * *

რაჭის ერისთავის კარი კულტურის ერთ-ერთ ცენტრს წარმოადგენდა იმდროინდელ საქართველოში. როგორც ზემოთ აღვნიშნეთ, თეიმურაზ პირველი აქ შვიდი წელბწადი იმყოფებოდა და ლიტერატურულ მოღვაწეობას ეწეოდა.

თვით როსტომიც დიდად განსწავლული პიროვნება ჩანს: ზეპირად იცოდა სახარება და ვეფხისტყაოსანი⁴. ზოგიერთი ცნობის მიხედვით, მას ჰქონდა მდიდარი წიგნთსაცავი⁵. თუკი ხალხურ ზეპირსიტყვიერებას დავუჭერებთ, აქვე იბეჭდებოდა საღმრთო წერილი⁶.

მ. თამარაშვილის ცნობით, როსტომმა, მისმა ძმამ ბესარიონ კათალიკოსმა⁷ და შვილმა გიორგიმ 1751 წელს კათოლიკობა მიიღეს⁸ და ამ სარწმუნოებაზე დარჩნენ ბოლომდე.

¹ ტ ი მ ო თ ე გ ა ბ ა შ ვ ი ლ ი, მიმოსლვა, ტექსტი გამოსაცემად ს. ააშხადა, გამოკვლევა, ლექსიკონი და საძიებელი დაურთო ელ. მეტრეველმა, თბ., 1956, გვ. 81.

² თავად ჯაფარა ჯაფარაშვილის წერილი თავად როსტომ ერისთავისადმი მინაწერი, აკაკის კრებული, 1899. № 7, განყ. II, გვ. 5.

³ ა. ცაგარელი 4, გვ. 195 (რუს.).

⁴ სოლომონ-მეფე და როსტომ-ერისთავი, გვ. 92—99.

⁵ ქართულ ხელნაწერთა აღწერილობა ახალი (Q) კოლექციისა, II, გვ. 336.

⁶ სოლომონ-მეფე და როსტომ-ერისთავი, გვ. 98.

⁷ ბესარიონი აფხაზეთ-იმერეთის კათალიკოსად იქდა 1742—1769 წწ. ხოლო სოლომონ-მეფის მიერ იმერეთიდან გაძევების შემდეგ 1769—1773 წწ. ოდიშში იყო კათალიკოსად.

⁸ მ. თ ა მ ა რ ა შ ვ ი ლ ი, ისტორია კათალიკობისა ქართველთა შორის, თბ., 1902, გვ. 366.

იტალიელი მისიონერი მწერალი ლუიჯი ამ ფაქტს ასე გად-
მოგვცემს: „როსტომ რაჭის ერისთავმა დაისახა რა მიზნად იმე-
რეთის სამეფოსაგან რაჭის საერისთავოს დამოუკიდებლობის მილ-
წევა, მან შორს მიმავალი მიზნების დასახვით შვილთან გიორგის-
თან და ძმა კათალიკოს ბესარიონთან ერთად მიიღო კათოლიკო-
ბა“¹.

ამის შემდეგ, ბუნებრივია, რომ როსტომ-ერისთავი დიდად შე-
უწყობდა ხელს კათოლიკე მისიონერებს; მათ განკარგულებაში
იყო როსტომის მიერ გადაცემული სახლი ონში.



როგორც ვიცით, სოლომონ პირველი გამეფდა 1752 წელს,
მაგრამ იმერეთის ფეოდალებმა იგი მაშინვე ჩამოაგდეს ტახტიდან
და იმერეთიდან გააძევეს². ამ ამბავს პაპუნა ორბელიანი ასე აღ-
წერს: „რაჭის ერისთავი და ლევან აბაშიძე დიდის ჯარით იმერელ
მეფეზე წამოვიდნენ, სოლომონ მეფეც წამოვიდა ჯარით, შეიყარ-
ნენ, შეიბნენ, დიხოცა ურგნითვე ურიცხვი, ბოლოს რაჭის ერის-
თავსა და ლევან აბაშიძეს გაემარჯვათ: მეფე სოლომონ გაიქცა,
ახალციხის ფაშას შეეხვეწა. მეფის მამული ააოხრეს“³. ამ აჯანყე-
ბაში მონაწილეობას იღებდნენ აგრეთვე თვით მეფის დედა —
ლევან აბაშიძის ასული თამარი და მეფის ბიძები: გიორგი და მა-
მუკა.

როგორც ზემოთ აღნიშნულიდან ჩანს, აჯანყებულთა შორის
ერთ-ერთ მთავარ ფიგურას ლევან აბაშიძესთან ერთად როსტომ
რაჭის ერისთავი წარმოადგენდა. მომდევნო წელს (1753 წ.) ოს-
მალთა ჯარის დახმარებით მეფემ ისევ დაიბრუნა ტახტი და აჯან-
ყების მონაწილენიც მკაცრად დასაჯა, მაგრამ დასჯას გადაურჩა
აჯანყების მთავარი მონაწილე როსტომ რაჭის ერისთავი, „შეიწყა-

¹ გაზ. „კომუნარი“, ამბროლაური, 1959, № 95. იტალიელი მწერალი
ლეონი 31 წელიწადი ცხოვრობდა და მოღვაწეობდა საქართველოში (1742—
1773 წწ.). მან ღრმად შეისწავლა ჩვენი ქვეყნის სოციალურ-პოლიტიკური ვი-
თარება. იგი თავის შრომაში აგვიწერს იმერეთის მეფის სოლომონ I-ის და
როსტომ რაჭის ერისთავის ურთიერთობას. ლეონი პირადად მეგობრობდა
როსტომს და ნამყოფი იყო მის სახლ-ბარაკონში.

² პაპუნა ორბელიანი, ამბავი ქართლისანი, ქართლის ცხოვრება,
II, გამოც. ჩუბინაშვილისა, გვ. 443; შ. ბურჯანაძე, სოლომონ I-ის მეფო-
ბის პირველი პერიოდი (1752—1768 წწ.), თბ., სახ. უნივერსიტეტის შრომები,
41, 1950, გვ. 73; IV, პამერი, ისტორია, 1836, გვ. 476.

³ პაპუნა ორბელიანი, ამბავი ქართლისანი, ქართლის ცხოვრება,
II, დ. ჩუბინაშვილის გამოცემა, სანკტ-პეტერბურგი, 1854, გვ. 443. მეფის ხელი-

ლა ერისთავი როსტომ, — წერს სოლომონ II, სოლომონ I-ის შე-სახებ — და დაადგინა ერისთავად¹. ეს მოწყალება მეფის მხრივ ნაკარნახევი იყო მისი პოლიტიკური სისუსტით.

მეფობის პირველ ხანებში სოლომონს ოსმალების გარეშე არ შეეძლო ხელისუფლების შენარჩუნება, მაგრამ იგი თანდათან ძლიერდებოდა; იმერეთის თავადები ახლა უკვე მეფეს უჭერდნენ მხარს; მასთან მოეყარათ თავი როსტომის მიერ შევიწროებულ და განდევნილ თავადებს: წულუკიძეებს, ჯაფარიძეებს, იაშვილებს, წერეთლებს, აგიაშვილებს და ხსნას მისგან ელოდნენ. ამ პერიოდში დადიანიც მეფის მოკავშირე იყო, მაგრამ როსტომ ერისთავს მხარს უჭერდა იმერეთის ყველაზე ძლიერი ფეოდალი — არგვეთის დიდი თავადი ლევან აბაშიძე — სოლომონის ბაბუა.

როსტომ ერისთავი სოლომონის გამეფების დღიდან ბოლომდე, იბრძოდა მეფის ხელისუფლების წინააღმდეგ. მისი მიზანი იყო რაქის საერისთავოს გაფართოება და მეფის ხელისუფლებისაგან სრული დამოუკიდებლობის მოპოვება.

ტყვის სყიდვის წინააღმდეგ მებრძოლი მეფის საპირისპიროდ იყო მიმართული ოსმალეთიც, რომელიც მეფის დალაშქვრას აპირებდა. ასეთ ვითარებაში აბაშიძე და ერისთავი დამპყრობელს დაუკავშირდნენ.

იმერეთის მეფე-მთავრების შეთანხმება ოსმალეთს არ ესიამოვნა, მას არც ის მოსწონდა, რომ მეფემ ტყვის სყიდვა აკრძალა. ახალციხის ფაშამ რამდენჯერმე შემოუთვალა იმერთა მეფეს, რათა ტყვის სყიდვა ძველებურად ახსნილიყო, მაგრამ სოლომონ მეფე მათ მოთხოვნას არ ასრულებდა. მაშინ ოსმალეთის ხონთქარმა სოლომონის დასჯა ბრძანა.

იმერთა მეფეს დადიანი და გურიელი მხარში ამოუდგნენ, ხოლო როსტომ ერისთავი და ლევან აბაშიძე ოსმალთა ჯარის მთავარსარდალს ეახლნენ და თავიანთი რაზმები დაახმარეს. მაგრამ როგორც ვიცით, 1757 წელს ხრესილის მინდორზე მტერი სასტიკად დამარცხდა, აბაშიძე ამ ბრძოლაში მოკლეს, ხოლო როსტომ ერისთავმა გაქცევით უშველა თავს.

სუფლების წინააღმდეგ ბრძოლაში რომ ერისთავს ყოველთვის მხარში ედგა არგვეთის მფლობელი აბაშიძე, ეს იმიტაც შეიძლება აიხსნას, რომ ეს ორი საგვარეულო სახლი ნათესაურადაც იყო დაკავშირებული ერთმანეთთან: (როსტომ ერისთავი და ლევან აბაშიძე დედით ძმები იყვნენ) შოშიტა III-ის გარდაცვალების შემდეგ მისი მუდლუე მეორედ გათხოვდა არგვეთის მფლობელზე.

¹ ს. კაკაბაძე, წერილები და მასალები საქართველოს ისტორიისათვის, თბ., 1914, გვ. 91.

მართალია ხრესილის ბრძოლაში მეფემ ბრწყინვალე გამარჯვებას მიაღწია, მაგრამ იმერეთიდან აგრესორების განდევნა და მათი საბოლოო დამარცხება ჯერ კიდევ შორს იყო. ამიტომ მეფემ გადაწყვიტა, თავისი ურჩი და ძლიერი ფეოდალი როსტომ ერისთავი ჯერჯერობით შემოერიგებინა. როსტომიც ხედავდა, რომ მეფე საკმაოდ მომძლავრდა, ამიტომ დათმობა ამჯობინა, დაუზავდა და მეფეს ერთგულება შეჰფიცა. ერთხანს მათ შორის კეთილგანწყობილება დამყარდა¹.

ეს მართო მეფის პოლიტიკური სისუსტით არ იყო გამოწვეული, ყურადღება იმასაც უნდა მიექცეს, რომ ამ დროს იმერეთის კათალიკოსად როსტომის ძმა ბესარიონი ზის. როსტომთან ბრძოლა ბესარიონთან ბრძოლასაც ნიშნავდა. ამიტომ მეფე კათალიკოსის ავტორიტეტს ანგარიშს უწყევდა და ერისთავის წინააღმდეგ სამხედრო მოქმედებისაგან თავს იკავებდა.

ხრესილის ბრძოლიდან მოყოლებული (1757 წ.) 1761 წლამდე მეფესა და ერისთავს შორის უთანხმოების ნაკვალევი არ ჩანს. 1759 წელს საერო და საეკლესიო კრების დროს სოლომონ მეფე დიდი პატივისცემით იხსენიებს როსტომ ერისთავს. ხოლო 1760 წელს განჯაში ერეკლე მეფის ლაშქრობის დროს სოლომონ მეფე, როგორც სამოკავშირეო ხელშეკრულების შემსრულებელი, 15 000-იანი ლაშქრით ეხმარება ქართლ-კახეთის მეფეს. ამ ლაშქრობაში სოლომონ მეფეს თან ახლდა როსტომ ერისთავიც².

ხრესილის ბრძოლაში დამარცხებას ვერ ივიწყებდნენ ოსმალები; მათ იმერეთზე თავდასხმები გააზიარეს, მაგრამ ყოველთვის დამარცხებულნი ბრუნდებოდნენ უკან.

სოლომონთან შემორიგებული რაკის ერისთავი ერთ ხანს თავს იკავებდა მეფის ლალატისაგან, მაგრამ „ცდუნებას“ ვერ დასძლია და 1761 წელს ოსმალთა მორიგი შემოსევის დროს „კვალად-ცა მსგავსებითა იუდასითა აღიღო მახვილი მეფესა თვისსა ზედა, და მრავალგზის შემოება ჯარსა მეფისასა, და ესე ვითარ დაუტყბ-რომელითა ორგულებითა მისითა, მრავალნი ქრისტიანენი სამღვდელონი და საერონი დააკლდენ სიცოცხლესა“³.

ამ დროიდან მოყოლებული, როსტომ ერისთავი განუხრელად იბრძვის სოლომონ მეფის წინააღმდეგ. იგი ოსმალთა ლაშქრობების პერიოდში ან მათი მეგზურია, ან იმერეთში მათი შემოსევის-

¹ ო. ს. ს. ელია, ნარკვევები ფეოდალური ხანის დასავლეთ საქართველოს სოციალურ-პოლიტიკური ისტორიიდან, თბ., 1973, გვ. 97.

² მ. თამარაშვილი, დასახ. ნაშრ., გვ. 378.

³ საქართველოს სიძველენი, ტ. III, გვ. 570.

თანავე მტრის მხარეზე დგება და მეფეს¹ ებრძვის. მასთან ერთად იბრძვის მეფის წინააღმდეგ ოდიშის მთავარი კაცია II დალიანი².

1765 წლამდე სოლომონ მეფე ინტერვენტებს ყოველთვის ამარცხებდა, მაგრამ როსტომ ერისთავი მაინც დაუსჯელი რჩებოდა, რადგან საშინაო და საგარეო ვითარება მეფეს ამის საშუალებას არ აძლევდა. მეფეს ერისთავის „შეწყალების“ გარდა სხვა გზა არ ჰქონდა, (რადგან იმერეთის სამეფოში ერისთავს ბევრი ფეოდალი უჭერდა მხარს)³.

იმერეთის თავადებიც შიშნარევი ეჭვით უცქეროდნენ მეფის გაძლიერებას. აბაშიძის სახლის დამდაბლების შემდეგ ჯერი როსტომ რაჭის ერისთავზე მიდგა. ამის პირველი ნიშანი ის იყო, რომ მეფემ როსტომის მოწინააღმდეგე რაჭის თავადები დაიხლოვა, ამავე დროს დამდაბლებული აბაშიძეების ადგილზე მეფემ წულუკიძეები და წერეთლები წამოსწია.

მეფის საპირისპიროდ ერისთავმა ძველ ფანდს მიმართა — მან თავისი სიძე — მეფის ბიძაშვილი თეიმურაზ მამუკას ძე გადაიბირა და სოლომონის წინააღმდეგ აამხედრა. ახალციხეში გაქცეული თეიმურაზ ბატონიშვილი 1765 წელს თურქთა ჯარით იმერეთში შემოვიდა, რაჭის ერისთავი მას ეახლა და ბრძოლაში ჩაება მეფის წინააღმდეგ. ამჯერად გაუმართლდა ერისთავს. 1766 წელს იმერთა მეფე სოლომონ პირველი ორი წლით ტახტიდან გადააგდეს⁴.

მიუხედავად იმისა, რომ სოლომონ მეფე იმერეთის ტახტიდან განიდევნა, მაინც შიშის ზარს სცემდა თეიმურაზსაც და სხვა მის მომხრე თავადებსაც. 1767 წელს სოლომონმა ლეკები დაიქირავა და რაჭას შეუსია. „იხმო კვლავ მეფემან მხედრიონი ლეკთა და წარტყვევნა რაჭაი და ალაფითა და ტყვითა სავსენი უკუიქცნენ თვისად ლეკნი. მაშინ მცნობმან ამა ამბისამან მეტემან ირაკლიმ შეუკრნა გადასავალი იორისა, სადაც მოსწყვიტნა სამასი ლეკნი და მოუღო ყოველივე წატყვენანნი და ტყვენიცა და რაჭველთაგა-

¹ საქართველოს სიძველენი, ტ. III, გვ. 570.

² ო. ს. ო. ს. ე. ლ. ი. ა., დასახ. ნაშრ., გვ. 99.

³ იქვე.

⁴ დავით ბატონიშვილი, ახალი ისტორია, ბაგრატი ბატონიშვილი, ახალი მოთხრობა, გამოსცა, თ. ლომოურმა, თბ., 1941, გვ. 10, 53; შ. ბურჯანაძე, სოლომონ პირველის მეფობის პირველი პერიოდი. თბ. სახ. უნივერსიტეტის შრომები. ტ. 41, 1950, გვ. 96—102; საქართველოს სიძველენი, ტ. III, გვ. 569—570; გაზეთი „კომუნარი“ (ამბროლაური). 1959, № 96.

ნი, რომელიცა დაასახლნა კახეთს სოფელსა შალურსა¹. მანამდე მტრისაგან შეუვალი და მიუწვდომელი რაჟა ლეკებმა ააოხრეს.

იმერეთი ორად იყო გაყოფილი, ერთ მხარეს თეიმურაზ მეფე, როსტომ ერისთავი თავიანთი მომხრეებით და მეორე მხარეს — სოლომონ მეფე და იმერთა უმრავლესობა. არეულობა გრძელდებოდა.

* * *

ქართულ ხალხურ საისტორიო სიტყვიერებაში კარგადაა გაშუქებული სოლომონ მეფისა და როსტომ ერისთავის ურთიერთობა. აქ ასახულია სხვათა შორის ამ ურთიერთობის ერთი მომენტი, რომელიც დროის მიხედვით 1760—1761 წლებს უნდა მოიცავდეს.²

ხრესილის ბრძოლიდან მოყოლებული სოლომონ მეფე თანდათანობით ძლიერდებოდა, როსტომ ერისთავსაც შიში დასჩემდა და დროებით მაინც, მეფესთან შერიგება ამჯობინა, ამიტომ შეიღებითურთ მეფეს ეახლა — წყვილი ირემი და მეფური მოსაკითხი წინა დღით მიართვა, მეორე დღეს მეფემ ერისთავი და მისი შვილები სადარბაზოდ მიიწვია. „ისეთი რამ სანახავეები იყვნენ ერისთავები, რომ უცნობი ვინმე როსტომს მეფედ ჩათვლიდა, ხოლო მის შვილებს — მეფისწულებად“³ — გვიამბობს ხალხური შემოქმედების ავტორი.

როსტომ ერისთავმა იგრძნო, რომ მეფე ხრესილის ომში დალატს არ აპატიებდა მას და, ახლა სამაგიეროს გადახდას უპირებდა. მეფის სასახლიდან მობრუნებულმა როსტომმა თავის შვილებს უთხრა: „თუ ჩვენ თავი დღეს არ დავიძვრინეთ როგორმე, ცუდად არის ჩვენი საქმე“⁴.

¹ მასალები საქართველოს ისტორიისათვის შეკრებილი ბატონიშვილის დავით გიორგის ძისა და მისი ძმებისა, გვ. 16; თბ., აგრეთვე დავით და ბაგრატ ბატონიშვილები, თ. ლომოურის გამოცემა, თბ., 1941. გვ. 10.

² უკანასკნელად ერისთავი და მეფე 1760 წელს იყვნენ ერთად განჯაში ერეკლეს დასახმარებლად; 1761 წელს ერისთავი ისევ განუდგა მეფეს. გამოდის, რომ ის ამბავი, რომელსაც ხალხური სიტყვიერება მოგვითხრობს, 1760—1761 წლებში უნდა მომხდარიყო, რადგანაც შემდეგ 1769 წლამდე მეფე და ერისთავი ერთმანეთს აღარ შეხვედრიან.

^{3, 4} ცნობები ამოღებულია წიგნიდან „სოლომონ-მეფე და როსტომ-ერისთავი“, თბ., 1936.

შორსმჭვრეტელმა ერისთავმა პაპუნა წერეთელი და ორი დიდებული გაუგზავნა მეფეს და სთხოვა: რადგანაც სიშორისა გამო თქვენთან ხშირად ხლება, სამსახური და ერთგულების გამოჩენა არ შემძლია, გთხოვთ, მიიღოთ ჩემი ყოველივე სამკვიდრო: ბარაკანში ციხე და სასახლე, ამბროლაურში — კოშკები და სასახლე, სევას — ციხე და სასახლე, ონში — ციხე, სასახლე და თვით პატარა ქალაქიც, ერთის სიტყვით, მთელი ჩემი რაჟის სამფლობელო აზნაურ-გლეხებით, და სამაგიეროდ აქ მახლობლად სადმე მიბოძოთ მამულიო¹.

მეფეს ეს ამბავი დიდად იაძა, აღუთქვა სამაგიეროს ბოძება — როსტომს ვეზირობა მისცა, მის პეილს — გიორგის სარდლობა, ხოლო მეთოდეს — მდივანბეგობა. შემდეგ შემოიკრიბა ვეზირნი და შესაფერისი ყმა-მამული უბოძა. ერისთავმა დიდი მადლობა შესწირა და სთხოვა, მეციხოვნეები გაეტანებინა რაჭაში და ციხეები ჩაებარებინა. შინ წასვლის ნებაც გამოითხოვა.

მეფე დასთანხმდა და ციხეების მისაღებად ბასილა და კვირიკა იამანიძეები გაატანა. ერისთავი რაჭაში წავიდა.

გზაზე ერისთავმა შვილებს უთხრა: ასე რომ არ მოგვეხერხებიან, ჩვენი საქმე ცუდად იყო და უთუოდ დაგვამარცხებდნენო. ვერ შენიშნეთ, როგორ წვრილ-წვრილად იკრიბებოდნენ ფიცის კაცები. ზოცა ბარაკონს მიადწიეს, ერისთავმა იამანიძეებს ციხის გასაღების მაგიერად შემდეგი წიგნი გაატანა მეფესთან:

„ესე ასრე არ იქნების, ბასილა და კვირიკაო,
ციხეს მართმევს, მინდორს მაძლევს, დავჯდე, უნდა ვიბიკაო?...
წადით, უთხარო თქვენსა მეფეს:
მე გახლავარ დიდი როსტომ,
მე ერთგულად გეახელს,
მიპირებდი ღალატს რატომ?“

ჩემი წინაპარი იყო ერისთავი კახაბერი,
თამარ მეფის მამობილსა ყმანი ჰყავდა ორად ბევრი,
მე ვარ მისი ტომისაგან, ვერ მატირებ, ტყვილა მღვრი,
გემორჩილო, არ გახლავარ ქაჯაია შენი გერი“.

სოლომონ მეფე სასტიკად გაჯავრდა და დაუყოვნებლივ რაჭაზე ვალაშქრება დააპირა, მაგრამ სამეფო დარბაზის სხდომაზე, სადაც ეს საკითხი განიხილეს, დიდებულები ორ ჯგუფად გაიყვნენ: ერთნი ლაშქრობას მოითხოვდნენ, მეორენი კი წინააღმდეგნი იყვ-

¹ ცნობები ამოღებული წიგნიდან „სოლომონ-მეფე და როსტომ-ერისთავი“, თბ., 1936.

ნენ — ლოდინს და სათანადო შემთხვევის გამოყენებას ამჯობინებდნენ. ვაცალოთ რამდენსამე ხანს და მერე მოვიტყუოთ რამენაირადო — ამ გადაწყვეტილებით დამთავრდა მეფის თათბირი.

ცხრაწყაროსთან გამარჯვების შემდეგ მეფის საშინაო მდგომარეობა მაინც რთული იყო. ოსმალეთის წინააღმდეგ მებრძოლ მეფეს კარგად ესმოდა, რომ სათავადოების სისტემის წინააღმდეგაც უნდა ებრძოლა. პირველ რიგში თავადების ბურჯის როსტომ რაქის ერისთავის¹ დამორჩილება იყო საჭირო, ეს არც ისე იოლ საქმეს წარმოადგენდა.

რაქის დაპყრობაში ოდიშის მთავარი კაცია დადიანი თავის საფრთხეს ხელავდა და მართალიც იყო. რაქის დაპყრობის შემდეგ სოლომონი უეჭველად დადიანების მიერ მიტაცებული ლეჩხუმის უკან დაბრუნებას შეუდგებოდა. უფრო მეტიც, სოლომონის გეგმა ხომ მთელი დასავლეთი საქართველოს გაერთიანება იყო ერთი სკიპტრის ქვეშ, ამიტომ ოდიშის მთავარი დადიანი გადაჭრით გამოდიოდა რაქის ერისთავის — როსტომის მხარეზე. ამ ბრძოლაში აფხაზეთის მთავარიც დადიანს უჭერდა მხარს, ხოლო გურიაში ოსმალებს იმერთა მეფის მოწინააღმდეგე მთავარი ჰყავდათ დასმული.

1768 წელს, ხელახლა გამეფებისთანავე, სოლომონ მეფე მთელი თავისი ძალებით რაჭაში შეიჭრა, მას თან ახლდნენ ლეკთა დაქირავებული რაზმები. თუმცა მეფემ ერისთავი ვერ შეიპყრო, მაგრამ სოფლები გადაწვა, პირუტყვი წამოასხა და აზნაურები მძევლებად წამოიყვანა. ერისთავი დადიანთან გაიქცა². მომდევნო წელს, 1769 წ. 28 იანვარს კვლავ ააოხრა მეფემ რაჭა, მაგრამ ერისთავი ვერ შეიპყრო. მეფემ ლეკთა რაზმებით რაჭაზე თავდასხმას მოუხშირა, მაგრამ ერისთავის შეპყრობას ვერ ახერხებდა. ბოლოს იგი დარწმუნდა, რომ როსტომს ვერ ჩაიგდებდა ხელში და შერიგება არჩია.

სანამ მეფე და ერისთავი დაზავდებოდნენ, როსტომმა ყველგან მოსინჯა ნიადაგი დახმარების მისაღებად. როგორც ლეონი გვამცნობს, როსტომ ერისთავმა და კაცია დადიანმა ჩუმად გაგზავნეს კათალიკოსი ბესარიონი და ქაიხოსრო აბაშიძე, რათა ახალციხის ფაშასათვის ეთხოვათ ჯარი იმ მიზნით, რომ სოლომონი გადაეგდოთ ტახტიდან, ფაშა სიამოვნებით დასთანხმდა ჯარის მიცემაზე. ამ დროს სოლომონმა ფარულად გაგზავნა თავადი წერეთელი და-

¹ უფრო დაწვრილებით „რაქის ერისთავთა სათავადოს შესახებ“ იხ. წიგნში, ო. ს. ო. ს. ე. ლ. ი. ა., ნარკვევები ფეოდალური ხანის დასავლეთ საქართველოს სოციალ-პოლიტიკური ისტორიიდან. თბ., 1973.

² ო. ს. ო. ს. ე. ლ. ი. ა., იქვე.

დესტანში და მრავალი ლეკი ჩამოაყვანიანა. ჩამოვიდნენ რა ლეკები მთებით იმერეთის სამეფოს ყველაზე მეტად გამაგრებულ ადგილებში — რაჭაში, „მათ დააქციეს და გაანადგურეს ის საძირკვლიანად“¹, ერისთავმა თავი შეაფარა დადიანს. „ამ დროიდან მოყოლებული, სოლომონი დაეპატრონა მთელ იმერეთს, ყველა დაიმორჩილა, დადიანის გარდა“.²

ამ ამბის გაგების შემდეგ ბესარიონი ფაშას აჩქარებდა ჯარის გამოგზავნას იმერეთში, მაგრამ ამ დროს ახალციხეში ფარულად ჩამოვიდა სოლომონის ძმა იოსები. იგი მეფისაგან იყო გამოგზავნილი ფაშასთან დასაზავებლად მხოლოდ იმ პირობით, თუ პატრიარქ ბესარიონს დაპატიმრებულს გაგზავნიდა იმერეთში.³ ამ დროს რუსეთ-თურქეთის ომი მიმდინარეობდა, რუსეთი კავკასიის ხალხებს თურქეთის წინააღმდეგ საბრძოლველად მოუწოდებდა; ასეთ ვითარებაში ახალციხის ფაშამ სოლომონ მეფეს არ აწყენინა, რათა იგი რუსებს არ მიმხრობოდა, ამავდროს, ანგარიში გაუწია იმერთა მეფის სიძლიერეს და კათალიკოსი ბესარიონი ჯარის მიცემისა და დახმარების მაგიერ, დააპატიმრა და ციხეში შეამწყვდილა.⁴

კათალიკოსმა ბუხრის კედელი გაარღვია და თავი დააღწია პატიმრობას, მას იმერეთში მისასვლელი პირი აღარ ჰქონდა და თავის დისშვილთან — კაცია დადიანთან გადავიდა ოდიშში. 1769 წლის 10 მაისს მეფემ ბესარიონ-კათალიკოსი გადააყენა და მის მაგივრად თავისი ძმა იოსები დანიშნა.

ერისთავმა თავისი შვილი გიორგი ყაბარდოს მთავართან გაგზავნა დახმარების სათხოვნელად, მაგრამ ამოდ — ამისათვის არც ფული ჰქონდა და ვერც ყაბარდოს მთავარი დაიყოლია.

რაჭის ერისთავმა, დახმარებისათვის ერეკლე მეფესაც მიმართა, რათა ის საქმეში ჩარეულიყო, მაგრამ ერეკლე მეფემ დახმარება ვერ აღმოუჩინა, რადგან სოლომონთან 1758 წლიდან სამოკავშირეო ხელშეკრულება ჰქონდა დადებული. ასეთ გამოუვალ მდგომარეობაში მოქცეული რაჭის ერისთავი მაინც გადარჩა — აღნიშნულ პერიოდში რუსეთ-თურქეთის ომი მიმდინარეობდა, იმერთა მეფე რუსეთის მხარეზე აპირებდა გამოსვლას, ამას დაემთხვა რუსეთის წარმომადგენლის ჩამოსვლა საქართველოში, რომელმაც სოლომონი სამხედრო კავშირის დასადებად მიიწვია ერეკლე მეფესთან ერთად, რათა საქართველოს მეფეებს ომი გაეჩაღებინათ

¹ გაზეთი „კომუნარი“ (ამბროლაური), 1959, № 96. (ბ. გორგაძის სტატია).

² იქვე.

³ იქვე.

⁴ იქვე.

თურქეთის წინააღმდეგ. შექმნილ ვითარებაში შეუძლებელი იყო შინაომის გაჩაღება და ურჩი თავადის დასჯა—სოლომონ მეფემ როსტომ ერისთავს ისევ ზავი დაუდო და მორჩილების ფიცი ჩამოართვა. ეს მოხდა 1769 წლის მაისში.

* * *

1769 წელს ერისთავთან დაზავებიდან რამდენიმე ხნის შემდეგ კარისკაცთა რჩევით მეფემ მოიხმო თავისი ძმა იოსებ-კათალიკოსი და როსტომ ერისთავთან შუამავლობა დაავალა მისი საბოლოო შემორიგების მიზნით. იოსებმა ეს შუამავლობა იკისრა და ერისთავთან ბარაკონში გაემართა.

ბარაკონში მეფური პატივით მიღებულმა იოსებ-კათალიკოსმა ერისთავს მეფესთან შერიგება აღუთქვა და ეკლესიაში ბარძიშზე დაიფიცა (რაკი სოლომონისაგან პირობა ჰქონდა მიღებული — ერისთავებს საარაკოდ მოვეპყრობიო).

მეფის უღალატობაში დარწმუნებული ერისთავი თავისი შვიდი ვაჟიშვილით მეფესთან გაემგზავრა ვარციხეში. მაინც, სიფრთხილის გამო, თან საკმაო ჯარი იახლა.

საინტერესოა ერისთავის მგზავრობა (ქართველ ფეოდალთა მგზავრობის შესახებ ცნობები სხვა წყაროებში არ გვხვდება). ბარგს, სამზარეულოს ხელსაწყოს, პურს და ღვინოს ასი ცხენი და ჯორი მიეზიდებოდა. სადაც დაბინავდებოდნენ, სადღილი თუ ვახშაში იქ უნდა გაკეთებულიყო. თანვე მიჰქონდათ შუაზე გახერხილი თონეები და სახელდახელოდ გამართავდნენ ხოლმე. ჯოგად მიერეკებოდნენ საკლავს (მთელი ეს ამბავი მოტანილია წიგნიდან „სოლომონ მეფე და როსტომ ერისთავი“, თბ., 1936).

მეფე დიდი ჯარით მიეგება, რამაც გააკვირვა ერისთავი. ზემოთ და სიხარულით მიაღწიეს ვარციხეს. ლხინი იქ გაგრძელდა მთელი 20 დღე-ღამე.

ერისთავი კურდღლებზე ნადირობის დიდი მოყვარული იყო და მეფემ მას გეგუთში იაშვილების მამულში ნადირობა შესთავაზა. როსტომი დიდი სიხარულით დასთანხმდა. მეფემ განაზრახა პაპუნა წერეთელი და წინდაწინ გაგზავნა იაშვილისას. თვითონაც მალე მივიდა სანავოზე, რადგან რიონი მეფის სასახლის წინ მიედინებოდა. გაღმა ნავით უნდა გასულიყვნენ; პირველად მეფე გავიდა ყველა მისი მხლებელითურთ და მაშინვე იაშვილისაკენ გაემართა. შემდეგ როსტომი, მისი შვიდი შვილი და რვა აზნაური, რომელთაც ბატონების თოფები ეჭირათ, ნავში ჩასხდნენ და გაღმა გავიდნენ. ისინიც იაშვილის მამულისაკენ გაემართნენ, ხოლო

ერისთავის ჯარის რიონგალმა გადაყვანა ნავეებით დააბრკოლეს, რათა ერისთავები დაემარტოხლებინათ. იაშვილის მამულში ერისთავებს რამდენიმე კაცი მიეგება, ვითომცდა პატივის საცემად, მაგრამ დამხდურები უკან მოექცნენ სტუმრებს და მოულოდნელად თითოს ოთხ-ოთხი კაცი ეცა, დაიმორჩილეს და ხელფეხშეკრულნი ეზოში დაყარეს. მეფის განკარგულების თანახმად მამა-შვილებს თვალები დათხარეს. ასე სასტიკად დასაჯა სოლომონ მეფემ რაჭის ერისთავი როსტომი.

მეფემ ერისთავი მაშინ დასაჯა, როცა რუსეთის ჯარი საქართველოში შემოვიდა; ყველა დარწმუნებული იყო, რომ რუსები სოლომონის დასახმარებლად მოდიოდნენ და ამიტომ ერისთავის გამოსარჩლება ვერავინ გაბედა. სწორედ ამან განაპირობა სოლომონის აქტიურობა ერისთავის მიმართ.

მეფემ რაჭის საერისთავო გააუქმა, ადგილ-მამულის უდიდესი ნაწილი სამეფო საკუთრებად გამოაცხადა, ციხეებში თავისი ხალხი ჩააყენა, ხოლო ნაწილი სოფლებისა, თავის ძმას — იოსებს გადასცა.

მეფემ როსტომ ერისთავის მიერ რაჭიდან გამოძევებულ ძმებს — პაატას, ბერის და გიორგის წულუკიძეებს თავიანთი მამაპაპური „საწულოები“ აღუდგინა, რაჭის მამულებში წილი დაუდო თავის ერთგულ წერეთლებს, რომლებიც დიდ ღვაწლს უწყევდნენ მეფეს ერისთავის დამარცხებაში.

მეფემ ანდერძი დატოვა, რომ როსტომ ერისთავის შთამომავლობას აღარასდროს მიცემოდა რაჭის მემკვიდრეობა.

ამრიგად, სოლომონ მეფემ ორი დიდი სათავადო გააუქმა (აბაშიძეებისა და ერისთავის) და მათ ადგილზე ისევ ორი სათავადო შექმნა (წულუკიძეების და წერეთლების), მაგრამ ეს ორი სათავადო დიდად განსხვავდებოდა ძველი სათავადოებისაგან იმით, რომ ახლა მთავარი ციხეები მეფის განკარგულებაში იყო და ტერიტორიის უდიდესი ნაწილიც მეფეს ეკუთვნოდა. ამით მეფემ უზრუნველყო თავისი ბატონობა წერეთლებსა და წულუკიძეებზე. ეს პოლიტიკა სწორი გამოდგა, რადგან ეს ორი სათავადო ბოლომდე მეფის ერთგული დარჩა და მასთან ერთად იბრძოდა მეფის ცენტრალური ხელისუფლების განმტკიცებისათვის.

ამრიგად, 17-წლიანი ბრძოლა, რომელიც ხან ფარულად და ხან აშკარად მიმდინარეობდა მეფესა და ერისთავს შორის, სოლომონ მეფის გამარჯვებით დამთავრდა.



რაქის საერისთავოს გაუქმებამ დააფრთხო დადიანი, რომელსაც ეზინოდა, რომ სოლომონს ახლა ოდიშის სამთავრო არ დაეპყრო. ამის გამო დადიანსა და სოლომონს შორის ურთიერთობამ შწვევე ხასიათი მიიღო. კაცია დიდიანი არ ცნობდა იმერეთის მეფის უპირატესობას, იგი ისევ შველ გზას ადგა და იბრძოდა ოდიშის სამთავროს დამოუკიდებლობისათვის. ორივე მოწინააღმდეგე ცდილობდა, ამ ბრძოლაში თავიანთ სასარგებლოდ გამოეყენებინათ როგორც ოსმალეთი, ისე რუსეთი.

მეფე-მთავარს შორის უთანხმოება ისე გაღრმავდა, რომ კაცია დადიანმა ოდიში ეკლესიურადაც ცალკე გამოყო.

ბესარიონი, რომელიც სოლომონ მეფემ იმერეთის კათალიკოსობიდან გადააყენა 1769 წლის 10 მაისს, ოდიშში გაიხიზნა. კაცია დადიანმა იგი ოდიშის კათალიკოსად დანიშნა. ამგვარად, დასავლეთ საქართველოში ორი კათალიკოსი გაჩნდა — იმერეთში მეფის ძმა იოსები და ოდიშში — როსტომ ერისთავის ძმა ბესარიონი, მაგრამ ორხელისუფლებიანობა დიდხანს არ გაგრძელებულა — 1773 წელს ბესარიონ-კათალიკოსი გარდაიცვალა. ამის შემდეგ ოდიშში კათალიკოსი არ აღრჩევიათ.

რუსეთ-თურქეთის ომის დროს ერთ ხანს დადიანმა თურქეთსაც ზურგი შეაქცია და რუსეთთან დიპლომატიური კავშირის დამყარება სცადა; 1773 წელს დადიანი ერეკლესა და სოლომონის სამეგობრო ხელშეკრულებას არ შეუერთდა, რაც სოლომონის წინააღმდეგობას მოასწავებდა, მაგრამ საბოლოოდ იმერთა მეფემ მაინც გატეხა დადიანის წინააღმდეგობა და 1776 წელს მორიგების საფუძველზე იგი სოლომონს დაემორჩილა.



სასტიკი სასჯელის შემდეგ ერისთავის შვიდი შვილიდან ოთხი ცოცხალი დარჩა (ყველანი სტამბოლში გადაიხვეწნენ); როსტომ ერისთავი 1770 წლამდე ციხეში იყო გამოკეტილი, შემდეგ გაათავისუფლეს და მან 1790 წლამდე იცოცხლა.

იტალიელი მისიონერის ლეონის ცნობით, ვინც ერისთავებს „თვალებს უწვავდა, ძალიან სიბრალულით ეპყრობოდა მათ, თვალის სიდრამეში ყოველთვის რაიმე სინათლეს უტოვებდა, რათა შეძლებოდათ გაერჩიათ სხვა თუ არა, გზა მაინც, ისე, რომ ძირს არ დაცემულიყვნენ“¹.

¹ გაზეთი „კომუნარი“ (ამბროლაური), 1959, № 96.

იმავე ლეონის ცნობით, იმ დროს იმერეთში იმყოფებოდა კაპუჩინელი მკურნალი ბერი დიონიზიო, რომელიც საექიმო ხელოვნებით იყო განთქმული. მან უმკურნალა ერისთავებს და როსტომის უფროს შვილს მეთოდეს ორივე თვალში აღუდგინა სინათლე, ხოლო გიორგის — ცალ თვალში; კიდევ სხვა ორ ძმას სინათლე რომ არ ჰქონოდათ, ციხიდან ვერ გაიქცეოდნენ.

* * *

მეთოდე ერისთავმა ოსმალთა და ლეკთა ჯარით ორჯერ ილაშქრა იმერეთში მეფის ტახტიდან ჩამოსაგდებად (1772, 1774 წწ.), მაგრამ ორჯერვე ჩხერთან ბრძოლაში დამარცხდა, ტყვედ ჩაუვარდა სოლომონს და რასაც 1769 წელს გადაურჩა, ახლა თავი ვერ დააღწია — მეფემ მას ისევ დათხარა ორივე თვალი და იმერეთიდან გააძევა. თვალებდამწვარი მეთოდე ერეკლე მეფემ შეიფარა, ხოლო ერეკლეს სიკვდილის შემდეგ იგი იმერეთში დაბრუნდა (1799 წ.) და სოლომონ II-ს „სარჩო-მამული“ სთხოვა. სოლომონმა მას ბარაკონის ყმა-მამული დაუბრუნა.

როსტომის მეორე ვაჟი გიორგი, რომელიც 1769 წელს ცალი თვალით იქნა დაბრმავებული, ოსმალეთში სულთანის სამსახურში იმყოფებოდა ქიორბეის სახელით.

1784 წელს სოლომონის გარდაცვალების შემდეგ სულთანმა იგი იმერეთში გამოგზავნა გასამეფებლად, მაგრამ როდესაც მან გაიგო დავით გიორგის ძე იმერეთის ტახტზე ზისო, უკან გაბრუნდა (დავით მეფის და ელენე ცოლად ჰყავდა გიორგის).

როგორც კი დავით გიორგის ძე სამეფო ტახტზე ავიდა, სოლომონის მიერ გაუქმებული რაჭის საერისთავო მან ისევ აღადგინა და იგი როსტომ ერისთავის შვილიშვილებს — თავის დისშვილებს ანტონ და ლევან გიორგის ძეებს უწყალობა. ერისთავობა ანტონს ჩააბარა, მაგრამ ანტონი სუსტი მმართველი აღმოჩნდა, ამიტომ დავით მეფემ ოსმალეთში მყოფი სიძე გიორგი გამოიძახა და რაჭის ერისთავობა მას ჩააბარა. გიორგის დიდხანს აღარ უცოცხლია — იგი ოსებთან შეტაკების დროს დაიღუპა გლოლაში 1787 წელს.

გიორგის სიკვდილის შემდეგ ერისთავად ისევ მისი ძე ანტონი დაჯდა, მაგრამ, როდესაც იმერეთში სოლომონ II გამეფდა, მან აღარ ინება ანტონის ერისთავობა რაჭაში როგორც დავით გიორგის ძის ნათესავისა, და მას სხვა მამულები უბოძა.

რუსეთ-თურქეთის ომი 1768—1774 წლებში
და იმერეთის საზღვრო

როგორც ზემოთ აღინიშნა, სოლომონ I-მა, მართალია, სამეფო გვირგვინი ისევ დაიბრუნა და თურქეთთან დამოუკიდებლობისათვის ბრძოლაში დიდ წარმატებასაც მიაღწია, მაგრამ ეს წარმატება მყარ ნიადაგზე არ იდგა. იგი გაპირობებული იყო თურქეთში დროებით შექმნილი რთული ვითარებით, ამიტომ საჭირო და აუცილებელი გახდა ძლიერი მოკავშირის ძებნა, რომელიც თურქთა აგრესიისაგან დაიცავდა ქვეყანას.

იმერთა მეფეს ორიენტაცია ისევ და ისევ რუსეთისაკენ ჰქონდა აღებული, მიუხედავად იმისა, რომ რუსეთმა არაერთხელ გაუცრუა მას იმედები, მაგრამ საქართველოს პოლიტიკური მესვეურები კარგად ხედავდნენ, რომ რუსეთი თუმცა ნელ-ნელა, მაინც თანმიმდევრულად მოიწევედა კავკასიისაკენ და ღლეს თუ არა ხვალ უთუოდ გადაეღობებოდა თურქეთს და გაქრობისაგან გადაარჩენდა ქრისტიანულ სახელმწიფოებს. ამ დროს ბალკანეთისა და კავკასიის ქრისტიანული სახელმწიფოები, რომელნიც თურქეთის უღელქვეშ გმინავდნენ, თურქეთის წინააღმდეგ მებრძოლ რუსეთში ხედავდნენ „თავიანთ ბუნებრივ დამცველსა და გამათავისუფლებელს“ (მარქსი).

ქართველი მეფეების მიერ ადრე შემუშავებული იდეა, რომ თავისუფლება მხოლოდ ჩრდილოეთიდან მოვიდოდა და საქართველოს „აღდგომა-გამოხსნა“ მხოლოდ ამ გზით შეიძლებოდა, ახლა უფრო გაცოცხლდა, ჩადგან სოლომონ მეფისათვის ცნობილი იყო რუსეთ-თურქეთის ურთიერთობის გამწვავება; აღმოსავლეთის საკითხით დაინტერესებული რუსეთის იმპერია კავკასიონის ქედს აქეთ საიმედო დასაყრდენს ეძებდა და საქართველოსთან ახალ დიპლომატიურ ურთიერთობაში ებმებოდა.

XVIII საუკუნეში შესამჩნევად დასუსტებული თურქეთის იმპერია თვალს ადევნებდა რუსეთის პოლიტიკურ საქმიანობას როგორც ბალკანეთში, ისე კავკასიაში; რუსეთ-საქართველოს ურთიერთობის გააქტიურებას თურქეთისათვის საშიშ მოვლენად მიიჩნევდნენ. ამიტომ იყო რომ სოლომონ მეფის მიმართ პორტა დათმობაზე წავიდა და დროებით უკან დაიხია, თორემ იმერეთის სამეფოს გასრესა მას არასოდეს არ გაუჭირდებოდა; გავიხსენოთ, რომ თურქეთმა 1769 წელს მარტო დუნაის ფრონტზე 400 000 მეომარს მოუყარა თავი, ნოლო დასავლეთი საქართველოს მოსახლეობა აქარისა და აფხაზეთის გამოკლებით 31 000 კომლს ანუ 155 000

სულს აღწევდა; იმერეთში 8000 კომლიდა იყო, საიდანაც 6000 მეომრის გამოყვანა ძლივს ხერხდებოდა¹. ამდენად, იმერეთის სამეფო თურქთა მოსალოდნელი გამანადგურებელი შემოსევისაგან მხოლოდ რუსეთ-თურქეთის ურთიერთობის გამწვავებამ იხსნა.

მიუხედავად მოპოვებული წარმატებისა, სოლომონ მეფის მდგომარეობა მაინც არ იყო მტკიცე, რადგან, ჯერ ერთი, ქვეყნის შიგნით კაცია დადიანი, გიორგი გურიელი და როსტომ რაჭის ერისთავი მეფეს ეწინააღმდეგებოდნენ, მეორეც, სტამბოლმა დროებით დათმო თავისი პოზიციები, თორემ მომავალში იგი იმერეთს არაფერს დაუთმობდა, როგორც კი ამისათვის სასურველი მომენტი დაუდგებოდა. სოლომონ მეფემ ეს კარგად იცოდა, ამიტომ გაბოროტებული აგრესორი რომ დროებით შეეჩერებინა, ხარკის სახით 30 000 მანეთის გადახდა იკისრა².

თურქეთის მიმართ საკუთარი ძალებით რომ ვერაფერს გახდებოდა, ეს იმერთა მეფემ კარგად იცოდა, ამიტომ იგი დამხმარე ძალას ეძებდა. ამ მიზნით მან ერთხელ კიდევ სცადა რუსეთის ძლიერების გამოყენება თავისი ქვეყნის სასარგებლოდ — 1768 წლის 23 ივნისს კვლავ გაგზავნა რუსეთში საგანგებო უფლებით აღჭურვილი ელჩი მაქსიმე ქუთათელი. ელჩს უნდა მოეგვარებინა რუსეთის მფარველობა იმერეთის სამეფოზე ვასალიტეტის საფუძველზე; თუ ეს არ მოხერხდებოდა, იარაღით და ფულით დახმარება უნდა გამოეთხოვა, და თუ არც ეს მოხერხდებოდა და თურქეთთან ბრძოლის გაგრძელებას იმერთა მეფე ვეღარ შეძლებდა, ნებართვა გამოეთხოვა რუსეთში მეფისა და მისი ოჯახის გადასახლებისა³. ელჩის წერილობითი მოხსენებიდან ჩანს — სოლომონ I-ს გათვალისწინებული პირობა ის ფაქტი, რომ ქველმოქმედების მიზნით რუსეთი იმერეთს არ დაეხმარებოდა და ამიტომ მაქსიმე ქუთათელს იმერეთის ბუნებრივი სიმდიდრე (როგორც ადრე ალექსანდრე V-ს აღუწერია)⁴ ისე უნდა გაეცნო რუსეთისათვის, რომ რუსეთს იმერთა მეფის „ყმად“ მიღებაზე ყოყმანი არ დაეწყო. ერთი სიტყვით, ამ ელჩობაზე დიდ იმედებს ამყარებდა იმერთა მეფე და იქიდან მოელოდა ან მფარველობას, რასაც ჯარის გამოგზავნა უნდა მოყოლოდა, ან იარაღსა და ფულს, ან არა და თურქეთთან ბრძოლაში მოსალოდნელი დამარცხების შემდეგ რუსეთში გადასახლების ნებართვას.

¹ ი. ცაგარელი, ტ. I, გვ. 72—73 (რუს.).

² იქვე, გვ. 74 (რუს.).

³ იქვე, ტ. II, გ. I, გვ. 1—2 (რუს.).

⁴ იქვე, ტ. II, გ. II, გვ. 3 (რუს.).

1768 წლის 4 ოქტომბერს იმერეთის ელჩი ყიზლარში ჩავიდა.

რუსი მოხელეები მაქსიმე ქუთათელის ელჩობას ცივად შეხვდნენ, ყიზლარის კომენდანტი პოტაპოვი ელჩს მოსკოვში წასვლის ნებას არ აძლევდა და უკან დაბრუნებას ურჩევდა, რადგან იცოდა, რომ რუსეთს ნაადრევად მიაჩნდა სოლომონ მეფის თხოვნის დაკმაყოფილება, რუსეთის მთავრობა ერიდებოდა საქართველოსთან ოფიციალურ ურთიერთობას თურქეთის გაღიზიანების შიშით.

მდგომარეობიდან გამოსავალი რომ ეპოვნა, ელჩმა კომენდანტს განუცხადა, თუ რუსეთის მეფე იმერეთის მეფეს ფარულად მაინც აღმოუჩენს სამხედრო დახმარებას, როდესაც რუსეთი ამას მოითხოვს, მეფე სოლომონი თურქებს წაართმევს შავი ზღვის სანაპიროზე მდებარე სიმაგრეებს და რუსეთთან ომის შემთხვევაში არ მისცემს მათ იქიდან ჯარის მიღების საშუალებას¹. ელჩისგან ასეთი ცნობების მოღების შემდეგ პოტაპოვმა შეატყობინა მოსკოვს იმერთა მეფის ელჩის სათხოვარი.

XVIII საუკუნის 60-იანი წლებიდან აღმოსავლეთი ევროპის საკითხი საფრანგეთის, პრუსიის, ავსტრიის და რუსეთის საგარეო პოლიტიკის ყურადღების ცენტრად იქცა. რუსეთის აქტივობის შესაჩერებლად საფრანგეთის დიპლომატიამ შეძლო ამ საკითხში თურქეთის ჩარევა და იგი რუსეთის წინააღმდეგ აამხედრა. თავის მხრივ, თურქეთს აშინებდა რუსეთის გაბატონება შავი ზღვის ჩრდილო ნაპირებზე და ამავე დროს თურქეთის მორჩილებაში მყოფი ბალკანეთის ქვეყნებიც დაზღვეული არ იყო რუსეთის ხელყოფისაგან.

თუმცა XVIII საუკუნეში თურქეთს ძველი ძლიერება აღარ გააჩნდა, მაგრამ მან მაინც გადაწყვიტა რუსეთთან ომის დაწყება.

რუსეთი, გარდა იმისა, რომ ჯარს ამზადებდა თურქეთში შესატყურელად, ცდილობდა ესარგებლა თურქეთში შეშავალი ქრისტიანული მოსახლეობის მტრული განწყობილებით თურქეთისადმი და მათი აჯანყებები მოეწყო.

რუსეთი, რომელიც აქამდე თითქმის არავითარ ყურადღებას არ აქცევდა საქართველოს ტერიტორიაზე არსებულ სამეფო-სამთავროებს, ახლა დაინტერესდა საქართველოთი. 1768 წელს სამხედრო საგარეო კოლეგიაზე, როცა თურქეთთან ომის დაწყება გადაწყდა, საგანგებო მოხსენება მომზადდა იმასთან დაკავშირებით, თუ რამდენად სასარგებლო და შესაძლებელი იქნებოდა თურქეთის წინააღმდეგ ომში ქართველების ჩაბმა.

რუსეთის ხელმძღვანელობას იმერეთის მეფის სოლომონ I-ის

¹ ა. ცაგარელი, ტ. I, გვ. 1, 3 (რუს.).

ჩაბმა ამ ომში უფრო მარტივად ესახებოდა, ვიდრე ქართლ-კახეთის მეფის ერეკლე II-ისა, მაგრამ მაინც გადაწყდა ერეკლე II-ის გამოყენება ომში.

რუსეთის სამეფო კარი დარწმუნებული არ იყო, რომ საქართველო იოლად ჩაერეოდა რუსეთ-თურქეთის ომში, და თუკი ჩაერეოდა, რუსეთის პოლიტიკურ მესვეურთ სიც კარგად ესმოდათ, რომ ქართველები მარტო თავიანთი ძალებით თურქეთს ვერ გაუმკლავდებოდნენ და ვერც თურქეთის დიდ სამხედრო ძალებს მიიზიდებდნენ, ამიტომ საგარეო საქმეთა კოლეგიამ რუსეთის მთავრობას შემდეგი გეგმა წარუდგინა (რომელიც საქართველოს სამეფო-სამთავროებსაც უნდა სცნობოდა):

1. თუკი საქართველო თურქეთის წინააღმდეგ ომში ჩაებმებოდა, თურქეთთან ზავის დადების დროს ქართველები დაეიწყებულა არ იქნებოდნენ.

2. ქართულ სამეფო-სამთავროებს გაეწეოდათ ფულადი დახმარება და

3. თუ ქართველებს არტილერია არ გააჩნდათ, საქართველოში გაიგზავნებოდა ქვემეხები არტილერიისტებით.

ასეთი გეგმის შემუშავებისა და სამზადისის დროს პეტერბურგში მიიღეს ცნობა იმერეთის მეფის ელჩის ყიზლარში ჩასვლის შესახებ — ელჩი დიდი რწმუნებით იყო აღჭურვილი და თან ჰქონდა სანელმწიფო ბეჭედიც.

თურქეთთან ომის სამზადისში იმერეთის ელჩის გამოჩენა რუსეთის ტერიტორიაზე ფრიად სასურველი და სასიამოვნო იყო პეტერბურგის საიმპერატორო კარისათვის. ამიტომ ყიზლარის კომენდანტ პოტაპოვს დაავალეს ელჩი სასწრაფოდ გაეგზავნათ პეტერბურგში¹, ელჩის ამალიდან გამოეყოთ არქიმანდრიტი და ყიზლარიდანვე უკან დაებრუნებინათ საგანგებო ცნობების მისატანად სოლომონთან, ხოლო საქართველოს მდგომარეობის შესასწავლად არქიმანდრიტთან ერთად საიმედო და უნარიანი პირი გაეგზავნათ, რომელიც დაადგენდა, იყო თუ არა სოლომონ მეფე ძლიერი და შეიძლებოდა თუ არა მისი დაკავშირება ერეკლე მეფესთან თურქეთის წინააღმდეგ ატეხილ ომში.

კანცლერი ნიკიტა პანიინი იმერეთის მეფე სოლომონ I-ს წერილობით აცნობებდა რუსეთ-თურქეთის ომის დაწყებას, მისი თხოვნის შეწყნარებას და მოუწოდებდა დაუყოვნებლივ გამოსვლას თურქეთის წინააღმდეგ. იმერეთს ისეთი დახმარება გაეწეოდა, როგორც შესაძლებელი იქნებოდა, ხოლო თუ რუსეთის იარაღს წარმატება

¹ ზ. ცქიტიშვილი, დასახ. ნაშრ., გვ. 15.

ექნებოდა, მაშინ ტრაქტატში იმერეთის სასარგებლო მუხლებიც იქნებოდა შეტანილი. ამასთან ერთად, პანინი სოლომონ მეფეს ამ ომში ერეკლე II-ის გადაბირებასაც თხოვდა.¹

როლები შეიცვალა — თუკი აქამდე იმერთა მეფე რუსეთს საიდუმლო დახმარებას ეხვეწებოდა, ახლა იგი აცხადებდა — რუსეთიდან დამხმარე ჯარის მიღების გარეშე ომის დაწყება თურქეთის წინააღმდეგ არ შემიძლია, ხოლო თუკი დამხმარე ჯარს მიიღებდა, თავის მხრივ 20.000 ჯარისკაცის გამოყვანის პირობას დებდა².

ერეკლე მეფემ შორს განჭვრიტა შექმნილი მდგომარეობა, მართალია, ამ დროს ქართლ-კახეთი ირანის ვასალი იყო, მაგრამ თუკი იგი ომში ჩაებმებოდა და ამით ადრე დაკარგულ ქართულ მიწა-წყალს შემოიერთებდა, სუსტი ირანი ამის წინააღმდეგი ვერ იქნებოდა და პასუხსაც არ აგებდა ოსმალეთის წინაშე „გურჯისტანიშ ვალის“ მოქმედებაზე. ამ ანგარიშით ქართლის მეფემ თანხმობა განაცხადა თურქეთის წინააღმდეგ ომში ჩაბმაზე, მხოლოდ იმ პირობით, თუ რუსეთი დამხმარე ჯარს გამოგზავნიდა საქართველოში.

თუმცა 1768 წელს რუსეთი საქართველოში ჯარის გამოგზავნილ წინააღმდეგი იყო, მაგრამ 1769 წელს პეტერბურგს ჩასულმა იმერეთის ელჩმა მაქსიმე ქუთათელმა დაარწმუნა რუსეთის პოლიტიკური შესვეურნი საქართველოში ჯარის გამოგზავნის სარგებლობაში და დაითანხმა ისინი იმერეთში სამხედრო ძალის გამოგზავნაზე.

1769 წლის 27 მარტს ეკატერინე II-მ ხელი მოაწერა იმერეთში სამი ასეულისაგან შემდგარი ჯარისა და არტილერიის ექვსი საამგირანქიანი ქვემეხის გამოგზავნის ბრძანებას³. კორაუსის უფროსად დაინიშნა გენერალი ტოტლებენი. ამასთან ერთად, საგარეო საქმეთა კოლეგიამ სათანადო ინსტრუქციით რწმუნებულად გამოგზავნა საქართველოში⁴ თავადი ანტონ მოურავოვი (თარხან-მოურავი), რომელიც ვახტანგ VI-ის დროს რუსეთში გადასახლებული თარხან-მოურავების შთამომავალი იყო.

მოურავოვს დავალებული ჰქონდა ქართველ მეფეებთან საქმის სასურველად წარმართვა; ყველა მეფე-მთავრის ძალების გაერთიანება და თურქეთის საზღვრებში შეჭრა⁵. ამ მიზნით მას 50 000 მანეთი გამოუყვეს.

¹ ა. ცაგარელი, ტ. I, გვ. 22—26 (რუს.).

² იქვე, I, გვ. 426—427 (რუს.).

³ ვ. შაქარაძე, ასპინძის ბრძოლა, თბ., 1957, გვ. 32.

⁴ ა. ცაგარელი, I, გვ. 39 (რუს.).

⁵ იქვე, I, გვ. 39—50 (რუს.).

ამრიგად, საიმპერატორო კარმა თვითონ გაიხსენა კავკასიის ქრისტიანული სამეფო-სამთავრონი და ვადაწყვიტა მათი გამოყენება კავკასიაში თურქთა გარკვეული სამხედრო ძალის დაბანდების მიზნით. მიზანშეწონილად ჩათვალეს ეს ომი რელიგიურ სამოსელში გაეხვიათ და ოსმალეთის მფლობელობაში მოქცეული ქრისტიანების ღაცვის დროშით წარემართათ.

თუკი თურქეთი ამ ომში დამარცხდებოდა, სოლომონ მეფის უპირველეს მიზანს შეადგენდა ფეოდალური შინაომების მოსპობა, გაორგულებული ვასალების დამორჩილება, გურია-სამეგრელოსა და აფხაზეთის შემომტკიცება და დასავლეთი საქართველოს ერთი ხელისუფლების ქვეშ მოქცევა. ამასთან ერთად, ბრძოლის მეორე ეტაპისათვის იმერთა მეფეს თურქეთთანაც ჰქონდა სადავო ტერიტორიული საკითხები. ეს მაქსიმე ქუთათელის მიერ რუსეთის სამეფო კარზე გაკეთებული განცხადებიდან ჩანს — „ყოველს ოსმალს ალაგებში, მეტადრე ახლო იმერეთში, გარშემო ბევრი საქართველოს კაცნი არიან, უთუოდ შემოეყრებიან ამისთანას საქმეს რომ გაიგონებენ... და რაც იმერეთის გარშემო ოსმალს ალაგები არის (ჩემი მეფე) დაიჭერს“¹.

იმერეთის გარშემო „ოსმალს ალაგები“ იყო აჭარა, ქობულეთი, ფოთი, და სამცხის დასავლეთი ნაწილი, ზეკარის უღელტეხილის მიმდგომი ადგილები. მაგრამ, როგორც ქვემოთ დავინახავთ, ახალციხის ტერიტორიაზე ქართლ-კახეთის მეფე აცხადებდა პრეტენზიას, ამდენად, შესაძლებელია ცოტა მოგვიანებით სოლომონსა და ერეკლეს შორის ურთიერთდამოკიდებულების გაუარესებაში ამ ამბავმაც იქონია გავლენა. თუმცა უნდა აღინიშნოს, რომ ამ საკითხებთან დაკავშირებით მეფეებს შორის არავითარი დავა არ ყოფილა. მაგრამ ისიც ანგარიშგასაწევია, რომ იმერეთის სამეფო დროდადრო, როგორც კი მოდონიერდებოდა, პრეტენზიას აცხადებდა სამცხეზე. გავიხსენოთ, რომ 10 წლით იგი (1535—1545 წ.) იმერთა მეფემ ბაგრატ III-მ თავის სამეფოს შეუერთა.

რუსეთ-თურქეთის ომის წინ ქართლ-კახეთის მდგომარეობა (განსხვავებით იმერეთისაგან) შედარებით მტკიცე იყო. ქვეყანა გაერთიანებული, სათავადოები დამორჩილებული იყო, ქერიმ-ხანთან მშვიდობიანობა სუფევდა, განჯა-ერევანი მოხარკენი იყვნენ, ოსმალეთთან და მის საფაშოებთან კეთილმეზობლური დამოკიდებულება არსებობდა. მაგრამ რუსეთის ძალაზე დაყრდნობით ერეკლე მეფეს ორი პროექტი ჰქონდა შედგენილი — დიდი და მცირე. მცირე პროექტი ითვალისწინებდა სამცხე-საათაბაგოს გათავისუფლებას

¹ ა. ცაგარელი, ტ. II, გვ. 4 (რუს.).

და ქართლის სამეფოსათვის მის შემოერთებას, ჭარ-ბელაქანის დაპყრობას და ლეკიანობის ლიკვიდაციას. უფრო მეტიც, რუსეთთან მფარველობაში შესვლით საქართველო ამიერიდან მასთან პოლიტიკურ კავშირში იქნებოდა, ეს კი ირანისა და ოსმალეთის აგრესიისაგან დაიცავდა საქართველოს, რაც მას კავკასიაში ქრისტიანთა მედროშეობის საშუალებას მისცემდა.

მეორე ეტაპი, ანუ დიდი პროექტი ითვალისწინებდა: არარატის მთის გარშემო სომეხთა მიერ დასახლებული ადგილების — ყარს-არზრუმის რაიონების, აღმოსავლეთი კახეთის, სამცხე-საათაბაგოსა და ტრაპიზონის მხარის გათავისუფლება-შემოერთებას.

„ყარსისა გარშემო ქრისტიანები არიან, და იგინი ოსმალთა ჭონებასა ჭვეში იშყოფებიან, და კულად, რომელნიცა შავის ზღვის გარშემო ჩვენი კერძო ადგილნი უჭირავს, შესაძლებელი არს, რომ ყოველივე ძალითა ღვთისადა მიუღოთ“.¹ ამავე წელს ერეკლე მეფემ ხვაბულოვთან საუბარში განაცხადა, რომ თუკი რუსეთი ჯარს მოგვახმარს, მაშინ რეალური საშუალება გვექნება, დავიპყროთ თურქეთში მრავალი ქალაქი თვით ცარგრადამდეო.

ძველი ქართული ტერიტორიების შემოერთებას, რომელიც ადრე დამპყრობლებმა (თურქეთმა და ირანმა) მიიტაცეს, ერეკლე აუცილებლად და სამართლიანად თვლის, ხოლო დავით აღმაშენებლის მსგავსად, ისტორიული ქართული ტერიტორიების შემოერთების შემდეგ ამ ტერიტორიაზე მცხოვრებს სხვა რწმენის ხალხებს იგი შეიწყნარებს და მფარველობას გაუწევს.

ამ პროექტების განხორციელების შემთხვევაში ერეკლე მეფე ალბათ არ დაუშვებდა საქართველოში ორი სამეფოს არსებობას და ადრე თუ გვიან დასავლეთი საქართველოს სამეფო-სამთავროებსაც შეიერთებდა. ასეთი პროექტების შემდეგ სოლომონის ექვინობა და ერთგვარი შიში ერეკლეს მიმართ ალბათ საფუძველს არ იყო მოკლებული.

ამრიგად, ერეკლე მეფე კავკასიისა და წინა აზიის ქრისტიანი ხალხების გამათავისუფლებლის როლში გამოდიოდა.

სამწუხაროდ, სულ სხვა იყო რუსთ ხელმწიფის მიზნები. რუსეთს სურდა, ქართველებს კავკასიის ფრონტზე ოსმალთა დიდი ძალები დაეხანდებინათ, რომ ამით მთავარ ფრონტზე მტერს ხელი შეშლოდა. ბრძოლის მთელი სიმძიმე ქართველებს უნდა ეტვირთათ, თვითონ კი ნაკლები მსხვერპლი გაეღოთ და საერთო ხელმძღვანელის როლში გამოსულიყვნენ. ამჯერად რუსეთი საქართველოში რაიმე პოლიტიკურ მიზანს არ ისახავდა.

¹ ა. ცაგარელი, ტ. II, გ. I, გვ. 14 (რუს.).

ოსმალთა წინააღმდეგ ამხედრებული იმერთა მეფის საბრძოლო გადაწყვეტილება დიდ იმედს აძლევდა რუსეთის მთავრობას, რომ იმერეთთან ერთად მთელი საქართველო ჩაებმებოდა თურქეთის წინააღმდეგ ომში. ამით რუსეთს სურდა მაქსიმალურად გამოეყენებინა ქართველები.

1769 წლის აგვისტოში მოზდოკიდან და ყიზლარიდან საქართველოსაკენ დაიძრა სპეციალურად შერჩეული რუსეთის ჯარის 480-კაციანი რაზმი.

რუსეთის ჯარის გადმოსაყვანად სოლომონმა, ერეკლემ და ხვაბულოვმა დარიალის გზა შეარჩიეს, ხოლო გზის გაწმენდა და ხიდეების მოწესრიგება ერეკლემ ითავა. ამისათვის კიდეც გაგზავნა სპეციალურად შერჩეული რაზმი.

აგვისტოს ბოლო რიცხვებში კორპუსის უფროსი, რუსეთის სამსახურში მყოფი გერმანელი გენერალი ტოტლებენი ასკაციანი ავანგარდით საქართველოში შემოვიდა და ერეკლეს შემოუთვალა — რუსეთის იმპერატორის სახელით მოვედი სტეფანწმინდას და გთხოვთ, თქვენს სამეფოზე გამატაროთ იმერეთში გადასასვლელად¹. ერეკლე მეფე თვით შეხვდა ნევში გენერალს და იმერეთში გაისტუმრა. ტოტლებენთან საუბარში ფრთხილმა და წინდახედულმა ქართლ-კახეთის მეფემ ომში ჩაბმაზე და სოლომონის დახმარებაზე თანხმობა განაცხადა მხოლოდ იმ პირობით, თუ რუსეთი გამოგზავნიდა არტილერიით აღჭურვილ 5000 მეომარს. თუ ეს 5000 მეომარი დაზამთრებამდე გადმოსვლას ვერ მოახერხებდა, მაშინ ჯერ 1500 ჯარისკაცი მაინც უნდა გამოეგზავნათ, ხოლო დანარჩენი — გაზაფხულზე. ტოტლებენი დათანხმდა 1500 ჯარისკაცის შემოყვანას, ხოლო დანარჩენზე რუსეთის მთავრობასთან შუამდგომლობას შეპირდა².

ინსტრუქციით რუსეთის წარმომადგენლებს ეკრძალებოდათ საექსპედიციო ჯარის გადიდებაზე თანხმობის მიცემა საქართველოს მეფეებისათვის, მაგრამ ამ თანხმობას ისინი ასაბუთებდნენ იმით, რომ იმერეთის მეფე სოლომონი ძალზე სუსტია და თურქეთთან ომში არსებითი როლის თამაში არ შეუძლია, ხოლო ერეკლე მეფე ძლიერია და თუ გვსურს, თურქეთის ომში ჩავეთრიოთ, მის წინადადებას ანგარიში უნდა გაეწიოსო.

1769 წლის 3 სექტემბერს მოურავოვი პანინს უპატაკებდა — „სოლომონ-მეფე ძალზე სუსტია, ერეკლეს გარეშე არავითარი

¹ კაბიტანი დე გრაი-დე-ფუა, დსახ. ნაშრ., გაზეთი „წითელი დროშა“, № 114, 1964.

² ვ. მაჭარაძე, ასპინძის ბრძოლა. თბ., 1957, გვ. 42.

მოქმედების წარმოება არ შეუძლიაო“, ხოლო ჯარის გადიდების მოტივად ტოტლებენიც ამასვე აყენებდა — „საჭიროა ჯარები გადიდდეს იმის გამო, რომ სოლომონ მეფის ჯარების დახმარების არაავითარი იმედი არა მაქვს“.¹

რუსეთის საიმპერატორო კარი ინფორმირებული იყო, რომ სოლომონ მეფეს საკუთარი ძალებით კავკასიის ფრონტზე რაიმე წარმატების მიღწევა არ შეეძლო ქართლ-კახეთის მეფის დახმარების გარეშე, ამავდროს ეკატერინე II დიდად იყო დაინტერესებული კავკასიაში ფრონტის გახსნით, ამიტომ მან ანგარიში გაუწია ტოტლებენის მოთხოვნას ჯარის გადიდების შესახებ და 1769 წლის 22 ოქტომბერს ხელი მოაწერა ბრძანებას საქართველოში 3700 მეომრის გაგზავნაზე.²

როგორც ზემოთ აღვნიშნეთ, ტოტლებენს ევალებოდა, მხოლოდ შეტევითი ბრძოლის მაგალითი მიეცა ქართველებისათვის, წახალისებინა და დიდი რაოდენობით ჩაება ისინი თურქეთის წინააღმდეგ საონარ მოქმედებაში. საილუმლო ინსტრუქცია ავალებდა ტოტლებენს, რომ ქართველ მეფეებს ვერ გამოეყენებინათ იმპერატორის სამხედრო ძალა თავიანთი მიზნებისათვის, ამიტომაც გამოგზავნილი სამხედრო კორპუსი საქართველოში ისე უნდა მოქცეულიყო, რომ თვითონ ქართველებს საკუთარი ძალებით შეეტიათ თურქებისათვის.³

ერეკლე მეფესთან მოლაპარაკების დამთავრების შემდეგ ტოტლებენი იმერეთში წავიდა. 1769 წლის 26 სექტემბერს იგი იმერეთის საზღვარს მიადგა; 27 სექტემბერს სოლომონ მეფე თანმხლები დიდებულებით ტოტლებენს შეხვდა. 28 სექტემბერს გენერალმა სოლომონ I-ს განუცხადა, რომ მას დავალებული აქვს იმპერატორისაგან იმერეთის ციხეებიდან თურქების განდევნა და სოლომონ მეფისათვის ქვეშევრდომების დამორჩილება, ხოლო თუ ამას ვერ მოახერხებს, სოლომონს თავისი ოჯახით წაიყვანს რუსეთში, სადაც მეფე დიდი პატივით იქნება მიღებული.⁴

რუსეთის მთავრობას გადაწყვეტილი ჰქონდა დამხმარე ჯარით და 50 ათასი მანეთი სესხით განემტკიცებინა იმერეთის სამეფოს მდგომარეობა, რათა მას თურქეთთან აქტიური ბრძოლის უნარი ჰქონოდა, ამიტომ ინსტრუქცია დასაშვებად თვლიდა, ქართველებს რუსი ოფიცრებისაგან ესწავლათ ჯარის სამხედრო წყობა, იარა-

¹ ვ. მაკარაძე, ასპინძის ბრძოლა, გვ. 44.

² იქვე, გვ. 46—47.

³ შ. ბურჯანაძე, იმერეთის სამეფო 1768—1784 წლებში, ხელნაწერთა ინსტიტუტის მოამბე, ტ. III, თბ., 1961, გვ. 117.

⁴ ვ. მაკარაძე, ასპინძის ბრძოლა, გვ. 37.

დის, თოფის წამლის ხმარება, ქვემეხების ჩამოსხმა, ლაფეტზე მათი გაწყობა, ადგილების „ევროპულად“ გამაგრება და სხვა. თუ იმერეთში რეგულარული ჯარის შექმნა არ მოხერხდებოდა, იქნებ ჯარში გასვლის მორიგეობის დაწესება გამხდარიყო შესაძლებელი, რათა მთელი ერი რიგიან ჯარად ქცეულიყო.¹

ინსტრუქციის შედგენის დროს რუსეთის მთავრობა ვარაუდობდა, რომ გაძლიერებული სოლომონ მეფე — თურქეთის შეურიგებელი ვასალი — ქართლ-კახეთის მეფის მომხრობასაც შეძლებდა და რუს-ქართველთა გაერთიანებული ძალა თურქეთის მთავრობას აიძულებდა, მეტი ძალები დაებანდებინა კავკასიაში, ამით მთავარი ფრონტის ძალები შესუსტდებოდა და ეს თავის მხრივ, ღუნაის ფრონტზე მოქმედი რუსეთის არმიის მდგომარეობას გააუმჯობესებდა.

ამ გეგმას იმერეთის სამეფოსათვისაც უდიდესი მნიშვნელობა ჰქონდა.

საქართველოში რუსეთის ჯარის შემოსვლამ მთელი კავკასიის მაჰმადიანობა შეაშფოთა. ახალციხის ფაშამ ნამანმა ელჩი გამოგზავნა ერეკლესთან. იგი მოაგონებდა ერეკლეს, რომ „მას შემდეგ, რაც მე ჩილდირის ფაშობა მომეცა, ჩვენი ურთიერთობა წმინდა და ანკარა იყო, რომ ერთი რამ წყენა არ მომხდარა არც თქვენთან ჩვენი და არც ჩვენიდან კვალად თქვენთან“.² ფაშა ერეკლეს ისევ მეგობრობისაკენ მოუწოდებდა, თან რუსეთის ჯარის შემოსვლის ფაქტზე მიუთითებდა და დასძინდა: „თქვენს მიწაზე, რომ ის ურჯულოები თქვენს შეუტყობრად და უნებურად გარდმოსულ იყუნენ — ეს ხომ არ იეჭვება, ზუთსა ან ათს დღესა თქვენს ქვეყანაში უვლიათ, ამასუკან იმერეთს გარდასულან“.³ ნამან-ფაშა ერეკლეს თხოვდა და თანაც შეპარვით აფრთხილებდა: „მაგ ურჯულოების თქვენს ქვეყანაში ყოფნა და დგომა მალლის, საუკუნოდ მყოფის ხელმწიფის დოვლათისათვის და პერანის დოვლათისათვის სხვადასხვა ფიქრია და თქვენის სისწორისა და მეგობრობის ყოფნის ვითარებისა დიდი ზარალი და დანაკლისი იქნება ჩვენსა და თქვენში“.⁴

აღნიშნულ წერილში ნამან-ფაშა ერეკლე მეფეს რუსეთთან კავშირის გაწყვეტას თხოვდა, წინააღმდეგ შემთხვევაში მუქარა-შეპარული კილოთი აცნობებდა, რომ მეზობელი სახელმწიფოები

¹ ვ. მაკარაძე, დასახ. ნაშრ., გვ. 57.

² ა. ცაგარელი, ტ. II, გ. 1, გვ. 15 (რუს.).

³ იქვე, გვ. 16.

⁴ იქვე.

მასთან კავშირს გაწყვეტდნენ. რაც შეეხება სოლომონ მეფეს, ახალციხის ფაშა წერდა, რომ ერეკლე მეფე მას არ აყოლოდა, რადგან სოლომონმა ფაშას ერთგულება „დაიფიცა და გულში ჩადებული ორგულობა, სიავე, სიფინთე, ღალატი, მუხანათობა და ჰარამზადობა გამოაცხადა, მოსკოვს უსჯულობთან, ღმერთთან იმათი ბოლო დააქციოს, სოლომონს კაცი გაეგზავნა და რამდენიმე ასი კაცი მოუყვანივნებია“.¹ ამავე დროს, ოსმალეთმა ქერიბხანს მიმართა და სთხოვა, რათა ერეკლესათვის ოსმალეთის მტრობა აეკრძალა. გარდა ამისა, ოსმალეთმა ქართლ-კახეთის წინააღმდეგ დაღესტნელების ასამოქმედებლად დიდძალი ფული გაიღო.

1769 წლის 3 ოქტომბერს რუსეთისა და იმერეთის ლაშქარი შორაპნის ციხეს ასაღებად შემოადგა, სადაც 25 თურქი მეციხოვნე იყო გამაგრებული. ტოტლებენმა ციხის უბრძოლველად გადაცემა მოითხოვა, მაგრამ უარი მიიღო.

როგორც კი ახალციხის ფაშამ საქართველოში რუსეთის ჯარის შემოსვლა შეიტყო, მაშინვე გააბა კავშირი კაცია დადიანთან (რომელიც ამ დროს თურქეთის კალთებს შეფარებული სოლომონ მეფის ყველაზე დიდი მოწინააღმდეგე იყო) და აფხაზეთის მთავარ შერვაშიძესთან. მოწოდებისთანავე დადიანმა და შერვაშიძემ შეკრიბეს ლაშქარი და თურქეთიდან მიღებული დამხმარე ძალით — 9000-კაციანი ლაშქრით იმერეთის სამეფოს შეესივნენ.

სოლომონ მეფემ ცნობის მიღებისთანავე — 3 ოქტომბერს მოხსნა იმერეთის ლაშქარი შორაპნის ციხის ალყიდან და მომხდურ მტერს შეეგება, ხოლო შორაპნის ციხის ასაღებად ტოტლებენის ასეულები დატოვა. მეფემ მომხდურნი დაამარცხა და იმერეთიდან გარეკა.² ტოტლებენმა სოლომონის ბრძოლა დადიანთან და შერვაშიძესთან მის კერძო საქმედ ჩათვალა, შორაპნის ციხეს ოთხი დღის ბრძოლის შემდეგ ალყა მოხსნა, ქართლში გადავიდა და ცხინვალს დაბანაკდა.

ტოტლებენის მიერ იმერეთის დატოვებით სოლომონ მეფე შეშფოთებული იყო. ამ საქმეში იგი ერეკლესაც დებდა ბრალს, რადგან ერეკლე მეფე რუსეთის ჯარს ახალციხეზე სალაშქროდ იწვევდა. სოლომონის მიზანი პირველ რიგში ოსმალებისაგან სამეფოს გაწმენდა იყო. მას არც ის მოსწონდა, რომ ერეკლე მესხეთის დაპყრობას საკუთრად აპირებდა, ამ ქვეყანას სოლომონიც თავისად თვლიდა. როცა ერეკლემ და ტოტლებენმა იმერთა

¹ ა. ცაგარელი, ტ. II, გ. I, გვ. 16.

² იქვე, გვ. 21—22 (რუს.).

მეფეს ახალციხეზე სალაშქროდ მოუწოდეს, სოლომონმა ეს არ ინება. ერეკლე მეფის გეგმაში შედიოდა ჯერ ახალციხის დამორჩილება და შემდეგ იმერეთში მდგარი თურქი გარნიზონების მოსპობა, ტოტლებენიც ამ აზრისა იყო.

რუსეთის საიმპერატორო კარისაგან ტოტლებენს წინასწარ შემუშავებული ოპერატიული გეგმა არ მიუღია, მას ევალებოდა ისე ემოქმედა, როგორც ამას ადგილობრივი პირობები უკარნახებდა. როცა ტოტლებენისათვის ცნობილი გახდა იმერეთის მეფის სისუსტე და ქართლ-კახეთის მეფის სიძლიერე, მისთვის მისაღები შეიქნა ერეკლეს მიერ შეთავაზებული ყველა გეგმა, რამდენადაც ეს კავკასიაში თურქთა ძალების დაბანდებას გამოიწვევდა. ასეთი გეგმა იყო ერეკლეს მიერ შეთავაზებული ახალციხეზე ლაშქრობა. ტოტლებენმა ეს გეგმა შიილო, მაგრამ დამხმარე ძალა არ ჩანდა, ერეკლე მეფე კი ამის გარეშე ომს არ იწყებდა. ამიტომ დეკემბერში ტოტლებენი თვითონ წავიდა რუსეთში იქიდან ჯარის გადმოსაყვანად. ამგვარად, 1769 წელს ლაშქრობა ახალციხეზე არ მოხერხდა.

1770 წლის დასაწყისში, დამხმარე ძალის მიღების შემდეგ, ტოტლებენმა და ერეკლემ სამხადისი დაიწყეს ახალციხეზე გასალაშქრებლად.

ეს ლაშქრობა ორ ამოცანას ისახავდა მიზნად: მტრისათვის ქართლზე თავდასხმის შარჯვე ვლაცდარმის (რასაც ახალციხე წარმოადგენდა) მოშლას და ქართული მიწა-წყლის შემოერთებას¹. ლაშქრობის წარმატებით დამთავრების შემთხვევაში ქართლს თურქეთისაგან თავდასხმის საფრთხე მოეხსნებოდა, ისპობოდა ლეკთა თავშესაფარი ბუდე, ამავე დროს, ახლა ქართული მიწა-წყლის დაბრუნების იმედიც ისახებოდა. ამ ლაშქრობის წარმატებით დამთავრებას ასევე დიდი მნიშვნელობა ჰქონდა იმერეთის სამეფოსათვის. ჯერ ერთი, იგი იმერეთზე თავდასხმის პლაცდარმს მოშლიდა, მეორეც, ახალციხის დაკავება ერეკლეს მიერ იმერეთის თავადებს გარედან დახმარების იმედს მოუსპობდა და ისინი განმარტოებული დარჩებოდნენ. მართალია, სანამ იმერეთის ციხეებში თურქი მეციხოვნეები იდგნენ, სოლომონ მეფეს ერთგვარი სიძნელეები ექნებოდა, მაგრამ წარმატებანი ახალციხის მიმართულებით იმერეთის ციხეების გათავისუფლების საწინდარიც იყო, რადგან იმერეთის ციხეებში გამოკეტილ თურქ მეციხოვნეებს

¹ ვ. მაკარაძე, დასახ. ნაშრ., გვ. 56.

აქტიური მოქმედების საშუალება აღარ ექნებოდათ და ამას, ბუნებრივია, მათი დანებება უნდა მოჰყოლოდა.¹

ერეკლე მეფეს იმედი ჰქონდა, რომ დადიანთან ზავის დადების შემდეგ² ახალციხეზე ლაშქრობაში სოლომონ მეფეც მიიღებდა მონაწილეობას, მაგრამ ერეკლე შეცდა, რადგან იმერეთის პოლიტიკურმა მესვეურმა ამ შემთხვევაში საღად ვერ განსაჯა. მას თვით სურდა საათაბაგოს შეერთება იმერეთთან³, თუმცა ამისი ძალღონე სრულებით არ შესწევდა; ამიტომ ტოტლებენისა და ერეკლეს მომავალი ლაშქრობა ახალციხეზე მან მიუღებლად ჩათვალა და მასში მონაწილეობაზე უარი განაცხადა.

სურამში ჩასული სოლომონ მეფის მრჩეველი ქაიხოსრო აბულაძე ერეკლე მეფეს ეუბნებოდა: „ესე ცოტას რუსეთის ხელმწიფის ჯარს როგორ აპყევი და ხვანთქარს აეშალე. ამით ხვანთქარს რა უნდა დააკლო შენა, ხვანთქარმა რომ ერთი სერასკირი წამოაყენოს და იქიდან დაღესტანს უბრძანოს, მას უკან რაღათი შეიძლებ იმათ წინააღმდეგ ომსა“.⁴ საფიქრებელია, რომ მეფის მრჩეველ ქაიხოსრო აბულაძესაც არ მოსწონდა ერეკლეს მიერ განზრახული ახალციხის დაპყრობა და ცდილობდა, ხელი შეეშალა მისთვის.

ერეკლე მეფე შეაფიქრინა სოლომონის უარმა და სურამში მიუსვლელობამ.

სამწუხაროდ, დასავლეთი საქართველოს პოლიტიკური მესვეურნი ვერ გრძნობდნენ, ანდა თუ გრძნობდნენ, კერძო ინტერესებით დაბრმავებულნი, ვერ ითვალისწინებდნენ, რომ ახალციხის აღებით წყდებოდა თურქეთ-საქართველოს ურთიერთობის ერთ-ერთი უმნიშვნელოვანესი საკითხი. იზღუბოდა საფაშოს ცენტრი, სადაც ყოფილი ქართველები, შემდგომში რენეგატი ათაბაგები ისხდნენ და ხონთქრის მითითებით ოსმალთა პოლიტიკას ატარებდნენ. ახალციხის აღებით ისპობოდა თურქთა შემოტევის ძლიერი პლაცდარმი, იზღუბოდა ქართველ პოლიტიკურ ემიგრანტთა და ავანტიურისტთა ბუდე. ახალციხის საფაშოს მოსპობით დასავლეთი საქართველოს სამეფო-სამთავროები ფაქტიურად თავისუფლდებოდნენ თურქეთის უშუალო ვასალური დამოკიდებულებისაგან.

¹ ე. მაქარაძე, დასახ. ნაშრ., გვ. 57.

² ა. ცაგარელი, ტ. I, გვ. 219 (რუს.).

³ იქვე, ტ. I, გვ. 20 (რუს.).

⁴ იქვე, ტ. II, გ. I, გვ. 63 (რუს.).

1770 წლის 17 აპრილს რუს-ქართველთა ლაშქარი აწყურის ციხეს შემოადგა; ერეკლეს 7000 მეომარი ჰყავდა, ხოლო ტოტლებენს 600 ჯარისკაცი და ექვსი ზარბაზანი. 19 აპრილს ტოტლებენმა მოულოდნელად ციხეს ალყა მოხსნა და უკან გაბრუნდა. ამან ქართველთა ჯარში დიდი არევე-დარევეა შეიტანა, მაგრამ ერეკლე მეფემ სწრაფად აღადგინა წესრიგი. „უფლისწული გიორგი ერეკლეს ძე ტოტლებენთან მიიჭრა და შესძახა: „ლენერალო სირცხვილია, ამის-თანა დროსა დალატი მეფისა“; „არა მაქვს ბრძანება—უპასუხა ლენერალმა— იმპერატორისა, რომ შევება ჯარითა ესრეთ მცირითა პტერსა დიდსა უსარგებლოდ“, — „მაგითი, ლენერალო, არცხვენ რუსეთის ჯარსა, — ეტყოდა მეფის ძე გიორგი — და უტეხ სახელსა დიდსა რუსეთსა“¹. როგორც ირკვევა, იმერთა მეფეს 5000-კაციანი ლაშქარი ჰყავდა მომზადებული რუსთა და ქართლ-კახეთის ლაშქრის დასახმარებლად, მაგრამ როცა აწყურიდან ტოტლებენის უკან გამობრუნების ამბავი შეიტყო, ადგილიდან აღარ დაიძრა².

ბრძოლის ველიდან ტოტლებენის წასვლის შემდეგ, აწყურთან ქართველთა ლაშქრის ყოფნას აზრი აღარ ჰქონდა და ერეკლე მეფემაც ციხეს ალყა მოხსნა. თურქებმა ამ მომენტის გამოყენება სცადეს, მოულოდნელად ციხიდან გამოიჭრნენ და ქართველთა ლაშქარს თავს დაესხნენ, მაგრამ დამარცხდნენ და ისევ ციხეს შეაფარეს თავი³.

ასპინძისაკენ მიმავალ ქართველთა ლაშქარს ახალციხის ფაშამ ახალქალაქისა და ხერთვისის ციხეებიდან სასწრაფოდ გამოყვანილი 1500-კაციანი ლაშქრით გზა გადაუჭრა⁴, მაგრამ ქართლ-კახეთის ლაშქარმა ისიც დაამარცხა და უკუუაქცია. ქართველთა ჯარს დამარცხებული მტრის დევნა დამთავრებული არ ჰქონდა, როცა ასპინძისთან თურქთა ახალი ლაშქარი გამოჩნდა.

ქართული ცნობების მიხედვით, ეს იყო თურქთა და ლეკთა 4000 კაცისაგან შემდგარი ჯარი, მაგრამ ამ ბრძოლაში ტყვედ ჩავარდნილთა ცნობების მიხედვით, მტრის ჯარის რაოდენობა 8000 კაცამდე აღწევდა,⁵ ხოლო ქართველთაგან ამ ბრძოლაში მხოლოდ 3000 მეომარი მონაწილეობდა.⁶

¹ პლატონ იოსელიანი, ცხოვრება მეფისა გიორგი მეცამეტისა, თბ., 1978, გვ. 9.

² ა. ცაგარელი, II, გვ. 227 (რუს.).

³ იქვე, ტ. II, გ. I, გვ. 29 (რუს.).

⁴ იქვე (რუს.).

⁵ ვ. შაქარაძე, დაახ. ნაშრ., გვ. 67.

⁶ იქვე, გვ. 69.

1770 წლის 20 აპრილს მოხდა ასპინძის ცნობილი ბრძოლა — მტერი ისე მოისრა, რომ რვა-ათასიანი ლაშქრიდან მხოლოდ 20—25 კაციღა დარჩა ცოცხალი,¹ ხოლო ქართველთაგან მსხვერპლი უმნიშვნელო იყო.

ერეკლე II-ის უზადო სამხედრო ნიჭმა ქართველი ხალხის გამირულ ისტორიაში ახალი ბრწყინვალე ფურცელი ჩაწერა.

ასპინძასთან გამარჯვების შემდეგ, თუმც თურქთა მთავარი ძალები განადგურდა, მაგრამ ერეკლე მეფემ ახალციხეზე გალაშქრებისაგან თავი შეიკავა და რაკი ტოტლებენის იმედი აღარ ჰქონდა, ქართლში დაბრუნდა. ეს უკანასკნელი აწყურიდან ანანურში ავიდა და იქ დაბანაკდა. იგი ქართლში ციხეების დაჭერას, მოსახლეობის რუს-ხელმწიფის ერთგულებაზე ძალით დაფიცებას და ძარცვას შეუდგა. 12 მაისს ტოტლებენი წერდა, რომ ტომსკის პოლკის შემოერთებისთანავე განზრახული აქვს, დაუყოვნებლივ თბილისზე დაიძრას... მთელი საქართველო რუსეთის ხელისუფლებას დაუმორჩილოს, ერეკლეს ამას წინათ ბოძებული ანდრიას ორდენი ჩამოართვას და მეფე პეტერბურგს გაგზავნოს ან შავი ზღვისაკენ განდევნოს“.²

ამრიგად, ტოტლებენმა და მისმა თანამზრახველებმა მიზნად დაისახეს ქართლ-კახეთის დაპყრობა, ერეკლეს ტახტიდან ჩამოგდება, მისი დაპატიმრება და რუსეთში გაგზავნა ან განდევნა; ეს საქმე, მათი აზრით, მეტად ადვილი იყო 3000 რუსი ჯარისკაცისათვის, მაგრამ, რადგანაც ეს 3000 კაცი ტოტლებენს ჯერ არ ჰყავდა, ამიტომ იგი ელოდა მოზღოკიდან მომავალ ტომსკის პოლკს.³

ტოტლებენის ოფიცერი პოდპოლკოვნიკი ჩოგლოკოვი წერდა, რომ „ტოტლებენი ან ჭკუაზე შეიშალა, ან გამცემლობას სჩადის, როდესაც რუსეთის სამეფო კარის ინტერესების საწინააღმდეგოდ მოქმედებს: მეფეები ერთმანეთს გადაამტერა, თავადებს ცუდად ექცევა, სოფლები ააწიოკა — უსასყიდლოდ ართმევს საქონელს, ახალციხის ფაშასთან მოლაპარაკება გამართა, 12 საუკეთესო ოფიცერი რუსეთში გაგზავნა, აზავის არ იტოვებს, გარდა გერმანელებისა და უსაქციელო რუსებისა“.⁴

ტოტლებენის ავანტიურას ერეკლე მეფემ ენერგიული ღონისძიებით უპასუხა, რითაც გააქარწყლა გერმანელის ჩანაფიქრი, მაგრამ სანამ ეს მოხდებოდა, ტოტლებენმა ბევრი უსიამოვნება მიაყენა ქართველ ხალხს და მეფე ერეკლეს.

¹ ა. ცაგარელი, ტ. II, გ. 1, გვ. 30 (რუს.).

² ვ. მაქარაძე, დასახ. ნაშრ., გვ. 73.

³ იქვე.

⁴ იქვე, გვ. 74.

პირველ ხანებში, რუსეთთან ურთიერთობა რომ არ გაემწვავებინა, ერეკლე დიდ ყურადღებას არ აქცევდა ტოტლებენის მოქმედებას; ამით გათამამებულმა, მან დუშეთში, ანანურში, ცხინვალში და გორში ხალხი იძულებით დააფიცა რუსეთის მთავრობის ერთგულებაზე, მანვე დაიკავა დუშეთის, ანანურის და გორის ციხეები. მაგრამ ტოტლებენის ეს ავანტიურისტული მოქმედება ერეკლე მეფისა და ქართველთა ჯარის წინააღმდეგ უშედეგოდ დამთავრდა, რადგან რუსმა ოფიცრებმა ტოტლებენის წამოწყებას მხარი არ დაუჭირეს.¹

ტოტლებენის ავანტიურასთან დაკავშირებით ქართულ ისტორიოგრაფიაში გაბატონებული იყო შეხედულება, თითქოს იგი რუსეთის მთავრობის საიდუმლო მითითებით მოქმედებდა, როდესაც მიზნად დაისახა ერეკლე მეფის ტახტიდან გადაგდება და საქართველოს რუსეთთან შეერთება. მაგრამ ამ აზრს მხარს არ უჭერდნენ რუსეთ-საქართველოს ურთიერთობის დოკუმენტებზე უშუალოდ მომუშავე ისტორიკოსები: ა. ცაგარელი და ი. ცინცაძე. ა. ცაგარელის აზრით, რუსეთის მთავრობა მაშინ საქართველოს შემოერთებას მიზნად არ ისახავდა,² ხოლო ი. ცინცაძე წერს, რომ „1768—1774 წლებში, საქართველოს სამეფო-სამთავროების თურქეთის წინააღმდეგ ომში გამოყენება ძირითადი ამოცანაა რუსეთის პოლიტიკისა აძიერკავკასიაში... რუსეთს, მიმდინარე ომში საქართველოს გამოყენება დაუსახავს მიზნად და არა საქართველოს შემოერთება“.³

ყურადღება უნდა მიექცეს იმ გარემოებას, რომ რუსეთის საიმპერატორო კარმა საქართველოში სამი ასეული ჯარისკაცი და რ ქვემეხი გამოგზავნა. ამ ჯარით რომ საქართველოს დაპყრობა არ შეიძლებოდა, ეს ყველასათვის ნათელი იყო, ხოლო საექსპედიციო კორპუსის გადიდების შემდეგ 1769 წლის 16 დეკემბერს მიწისტი გრაფი პანინი საგარეო კოლეგიის რწმუნებულს საქართველოში ა. მოურავოვს აცნობებდა რა ჯარის გადიდებას, სწერდა, რომ ამოცანა ახლაც იგივე რჩება — ძალიან გვეჭირდება, რომ ქართველებმა ჩქარა დაიწყონ ბრძოლა თურქების წინააღმდეგ.⁴ ხოლო ამავე დროს ეკატერინე II ტოტლებენს სწერდა (როცა ერეკლემ რუსის ჯარის გადიდება მოითხოვა, ილო ამის გარეშე

¹ უფრო დაწვრილებით იხ. ვ. მაკარაძე, ასპინძის ბრძოლა, თბ., 1957. გვ. 70—80.

² ა. ცაგარელი, I, გვ. 18—24 (რუს.).

³ ენციკლის მოამბე, V—VI, თბ., 1940, გვ. 340—341.

⁴ უფრო დაწვრილებით იხ. ვ. მაკარაძე, ასპინძის ბრძოლა, თბ.,

იგი ოსმალეთთან ომზე უარს ამბობდა): ერეკლე მეფე ისე ძლიერია, რომ მან შეძლო არა თუ ლეკების მოგერიება, არამედ სპარსეთის ქალაქების დამორჩილება, რომელთაც ახლა ფლობსო და რომ მას 40-ათასიანი ჯარი შეუძლია გამოიყვანოს, ასეთი ჯარი კი საკმარისია არა მარტო ქვეყნის დასაცავად, არამედ თურქეთის წინააღმდეგ სამოქმედოდაცო. ეკატერინე ტოტლებენს სთხოვს, დაარწმუნოს ერეკლე მეფე, რომ მის მიერ წამოყენებული მოთხოვნები იმპერიის მხრივ დახმარებაზე გადაჭარბებულია და ახლანდელ პირობებში რუსეთს საქართველოში დიდი ჯარის გაგზავნა არ შეუძლია.¹ როცა ტოტლებენმა სიმართლე არ გაამხილა და რუსეთის საიმპერატორო კარს აცნობა რუსეთის ერთგულებაზე ქართველების დაფიცების ამბავი, პანინი ტოტლებენს სწერდა: რუსეთის ერთგულებაზე დაფიცება თუ ძალდატანების გარეშე წარმოებს და ეს ხელს შეუწყობს ქართველების მონაწილეობას თურქეთის წინააღმდეგ ომში, შეიძლება გაგრძელდეს, რაც შეეხება სხვა სარგებლობას (ქვეყნის სიმდიდრის გამოყენება), ეს შეიძლება მართლაც დიდი იყოს, მაგრამ ამის განხორციელება ბევრ სხვა ამბებსაც მოითხოვს, რაც ახლანდელ ვითარებასთან შეუთავსებელია.² ამ წერილის შემდეგ, როდესაც რუსეთში გაიგეს საქართველოში მომხდარი ამბები და როდესაც კაპიტან იაზიკოვს აგზავნიდნენ საქართველოში საქმეების მოსაგვარებლად, ასეთი დავალება მისცეს: თუ ტოტლებენმა ნამდვილად ჩამოაგდო ტახტიდან ერეკლე და ეს საქმე ქართველების ომში მონაწილეობას აფერხებს, იგი კვლავ აღადგინე ტახტზეო.³

ზემოთ აღნიშნულიდან ნათლად ჩანს, რომ რუსეთის საიმპერატორო კარი ამჯერად საქართველოს შეერთებას რუსეთთან არ აპირებდა, რადგან ამისათვის არც საგარეო და არც საშინაო პირობები არ გააჩნდა.

ტოტლებენის თავგზააბნეული მოქმედება მრავალი გაუგებრობის წყარო გახდა. არც ერთი საბუთიდან არა ჩანს, რომ ტოტლებენს იმპერატრიცასა ან სამხედრო კოლეგიისაგან რაიმე საგანგებო საიღუმლო მითითება მიეღოს, გარდა იმისა, რომ საიღუმლო ინსტრუქციით ქართველ მეფეებს ვერ უნდა გამოეყენებინათ რუსეთის სამხედრო ძალა თავიანთ შინაომში საკუთარი მიზნებისათვის. ამიტომ საქართველოში გამოგზავნილი სამხედრო კორ-

¹ უ ა გ ა რ ე ლ ი, I, გვ. 85—87 (რუს.).

² იქვე, გვ. 155 (რუს.).

³ იქვე, გვ. 139—145 (რუს.).

პუსი ქართულ ჯართან ერთად მხოლოდ თურქეთის საწინააღმდეგოდ უნდა ყოფილიყო გამოყენებული¹.

ტოტლებენი ქართველი მეფეების — ერეკლესა და სოლომონისაგან მხოლოდ უსიტყვო მორჩილებას მოითხოვდა, იმავე დროს, ტოტლებენმა წყალობის თვალთ შეხედა სოლომონის მოწინააღმდეგეებს — დასავლეთ საქართველოს გაერთიანების მოწინააღმდეგე დადიანსა და გურიელს; მან დაიახლოვა აგრეთვე ერეკლეს მოწინააღმდეგე ქართლის თავადები — დავით ქსნის ერისთავი, ზაალ ორბელიანი, მაჩაბელი, ამირეჯიბი და სხვანი, თუმცა უნდა ითქვას, რომ ამ თავადებმა ტოტლებენის ავანტიურის დროს თავი შეიკავეს ერეკლეს წინააღმდეგ გამოსვლისაგან.

მიუხედავად იმისა, რომ ერეკლესა და ტოტლებენს შორის უთანხმოება ძალზე გამწვავდა, მეფე მაინც ცდილობდა ტოტლებენის შემორიგებას და რაიმე სანარგებლო საქმის წამოწყებას. როცა ტოტლებენმა ერეკლეს აცნობა, რომ იმერეთში მივდივარ და იქიდან ახალციხეზე გავილაშქრებო, მეფე ერეკლე ენერგიულად შეეცადა, განეახლებინა ერთობლივი მოქმედება ახალციხის მიმართულებით და წინადადება მისცა ტოტლებენს, თუ იგი არ ინებებს მასთან ერთად მოქმედებას, მაშინ თუნდაც 5—6 გერსის დაშორებით იმოქმედოს იმავე მიმართულებით². მაგრამ ყოველი ცდა ტოტლებენთან ერთად საომარი მოქმედების განახლებისა მარცხით დამთავრდა — ტოტლებენი იმერეთისაკენ დაიძრა 1770 წლის ივნისში.

* * *

ცენტრალურ ფრონტზე რუსეთის არმიამ წარმატებებს მიაღწია; დამარცხების წინაშე მდგომმა თურქეთის მთავრობამ თავისი პროვინციებიდან უკანასკნელი რეზერვები გამოიწვია და ამის გამო იმერეთშიც შეამცირა ციხესიმაგრეთა გარნიზონები; იმავე დროს, ისინი სპჭიროების შემთხვევაში დახმარებასაც ვეღარ მიიღებდნენ თურქეთიდან. ამასთან ერთად, ასპინძის ბრძოლაში ქართლ-კახეთის ჯარების გამარჯვების შემდეგ სოლომონ მეფეს ხელსაყრელი მდგომარეობა შეექმნა იმერეთის ციხეებიდან თურქების განსადევნად.

1770 წლის 15 მაისს იმერთა მეფემ ცუცხვათის ციხე გაათავისუფლა თურქებისაგან;³ შემდეგ ჯარით შევიდა ქუთაისში, სადაც

¹ ა. ცაგარელი, გვ. 87 (რუს.).

² იქვე, ტ. I, გვ. 238—241 (რუს.).

³ იქვე, ტ. II, გვ. 47 (რუს.).

500 კომლი თურქი ცხოვრობდა, დაანგრია მეჩეთები, დახოცა მოღლები და თურქი შეიარაღებული მოხელენი, გააქრისტიანა მაჰმადიანები, ხოლო ვინც გაქრისტიანებაზე უარი თქვა, ჩრდილოეთ კავკასიაში გაასახლა.¹ რადგან სოლომონს ქუთაისის ციხის ასაღებად საჭირო ზარბაზნები არ გააჩნდა, ამიტომ ალყა შემოარტყა ციხეს და ვარაუდობდა, რომ თურქი მეციხოვნენი მას დანებდებოდნენ.² იმავე დროს მან აიღო შორაპნის ციხეც³.

კუცხვათის, შორაპნისა და ქალაქ ქუთაისის აღების შემდეგ ტოტლებენი 4000-კაციანი არმიით იმერეთში გადავიდა და რუს-ქართველთა ლაშქარი ბაღდათის ციხეს შემოადგა. იქ მხოლოდ 30 თურქი მეციხოვნე იყო გამაგრებული.

ბაღდათის ორკომეიანი ციხე ხანისწყლის მარცხენა ნაპირზე იდგა და ახალციხიდან იმერეთში შემოსასვლელ გზას დარაჯობდა. აუცილებელი იყო ამ ციხის აღება, რათა ქუთაისის ციხეში მომწყვდეულ თურქებს დამნმარე ძალა არ მიეღოთ.

ტოტლებენმა ციხეს ზარბაზნები დაუშინა, თურქებმაც საარტილერიო სროლით უპასუხეს, მაგრამ ცეცხლი მალე შეწყვიტეს, რადგან სრული გარემოცვის პირობებში ახალციხიდან დახმარების იმედი დაეკარგათ და სხვა გამოსავალი აღარ ჰქონდათ. თურქებმა ითხოვეს დედოფლის პირით გარანტია მიეღოთ სიცოცხლის შენარჩუნებისა. დედოფალიც შორიდან მოიყვანეს და 2 ივლისს მეციხოვნე თურქებმა მას ბაღდათის ციხე ჩააბარეს.

რადგან იმერთა მეფეს არტილერია არ ჰქონდა და ციხეებში ჩამდგარი თურქები ყოველთვის ჯობნიდნენ მას არტილერიით, სოლომონ მეფემ ტოტლებენს ციხე დაანგრევიანა, რითაც თურქებს ეს უპირატესობა წაართვა. როგორც ჩანს, მაშინდელ ვითარებაში მეფის ასეთი მოქმედება სწორი იყო.

ბაღდათის ციხის აღების შემდეგ რუს-ქართველთა ლაშქარი ქუთაისის ციხეს შემოადგა. ტოტლებენმა ეს წარმატებები მხოლოდ თავის თავს მიათვალა და რუსეთში აცნობა: „იმპერატორის ჯარით ორი სიმაგრე — ბაღდათი და შორაპანი თურქებს წაუვართვი, არ დამიკარგავს არც ერთი ჯარისკაცი... ქალაქი ქუთაისი მთლიანად დაკავებულია და სიმაგრე ბლოკადაშია“.

ტოტლებენის წერილის სიყალბეს ამჟღავნებს სოლომონ მეფის მიერ გრაფ პანინისათვის გაგზავნილი 1770 წლის 14 ივლისის წერილი:

¹ ა. ცაგარელი, ტ. II, გვ. 47 (რუს.).

² იქვე (რუს.).

³ იქვე (რუს.).

„სანამ ბრწყინვალე ღრაფი იმერეთს მოვიდოდა, ცუცხვათის ციხე ავიღეთ, შორაპანს ჯარი შემოვაყენეთ და ჩვენი ურჩეულების ჯარითა ქუთაისის ქალაქს მოვაღდექით და ქალაქი ყოველივე, გარდა ციხისა, ავიღევით, და მრავალნი სულნი გამოვიყვანეთ... ამასობაში ტოტლებენი იმერეთის საზღვარზე მოვიდა და ერთად ბაღდათის ციხეს შემოვაღდევით, ბაღდათის აღების შემდეგ... ქუთაისის ქალაქისა დანაშთენსა ციხესა მოვაღდევით, და შორაპანს, რომელი ჩემი ჯარისა მიერ აღრიდგან მოცული იყო, გამორჩეულის ჩემის კაცით წაველ და იგიცა მისვლისავე ჩემისა ავიღე“¹.

ანალოგიური წერილით სოლომონი იმპერატრიცა ეკატერინესაც აცნობებდა, რომ „შორაპანს ჩემი ჯარი აღრიდანვე ადგა, და მათი მოუძღურება ვისმინე, წაველ სწრაფათ მხოლოდ ჩემის ჯარით და იგიცა დაუყოვნებლად ავიღე“².

ტოტლებენი სიყალბეს დანაშაულსაც უმატებს. ერთთვიანი ალყის შემდეგ დაუძღურებულმა თურქმა მეციხოვნეებმა ფარხმალი დაყარეს. ქუთაისის ციხეში 60-მდე თურქი ჯარისკაცი და 220 ორივე სქესის მცხოვრები იყო შეფარებული; ტოტლებენმა თურქების გარნიზონთან მოლაპარაკება გამართა და ციხის ჩაბარება მოითხოვა³. თურქები მზად იყვნენ, ციხე ჩაებარებინათ, მხოლოდ ითხოვდნენ თურქეთში გაშვებას. ტოტლებენს აცნობეს, რომ 6 აგვისტოს, ღამით, თურქები ციხიდან გაპარვას აპირებდნენ; მან სადარაჯო პუნქტების დაცვა გერმანელ ოფიცრებს მიანდო (8 ოფიცრიდან — 7 გერმანელი იყო)⁴. 6 აგვისტოს ღამით თურქები ციხიდან გამოვიდნენ და რუს „პიკეტებს“ შორის „გაიპარნენ“. კაპიტანი ლოვი აღნიშნავს, ჩვენ ოთხი ათასი კაცი გვყავდა და მშვიერი თურქების შეკავება ადვილი საქმე იყო, მაგრამ ტოტლებენის მიერ პიკეტებად გამოყოფილი გერმანელი ოფიცრები, მტრის შეპყრობის ნაცვლად, ციხეში შეიჭრნენ და ძარცვა-გლეჯას შეუდგნენ⁵. ამ ცნობას იაზიკოვიც ადასტურებს. მისი ცნობით, ქუთაისის ციხეში 60 თურქი ჯარისკაცი იყო, რომლებიც ტოტლებენის მიერ დაყენებულ „პიკეტებს“ შორის გაიჭრნენ და თავს უშველეს, ხოლო ციხის აღებისას 70 რუსი ჯარისკაცი დაიღუპა.⁶ ტოტლებენმა გვიან აცნობა სოლომონ მეფეს თურქ-

¹ ა. ცაგარელი, ტ. II, გვ. 47—48 (რუს.).

² იქვე, გვ. 48—49.

³ ვ. შაქარაძე, დასახ. ნაშრ., გვ. 97.

⁴ იქვე.

⁵ ა. ცაგარელი, ტ. I, გვ. 257—261 (რუს.).

⁶ იქვე, გვ. 179 (რუს.).

ების გაქცევის ამბავი¹. მეფემ ზომები მიიღო, მაგრამ ამასობაში თურქებმა გაასწრეს და მიიმაღლნენ, მხოლოდ ერთი თურქი შეიპყრეს და ერთიც მოკლეს².

სოლომონმა ქუთაისის ციხეც დაანგრევინა ტოტლებენს. საფიქრებელია, ტოტლებენმა შეგნებულად გაატარა თურქი მეციხოვნენი, ხოლო რუსეთის მთავრობას ყალბი ცნობა მიაწოდა, რომ 7 აგვისტოს ქუთაისის ციხე იერიშით ავიღე, მტრის ჯარისკაცების ნაწილი ტყვედ ჩავიგდე, სხვები დავხოცე, თავი თითქმის არავის დაუღწევია, ჩვენი ზარალი კი სრულიად უმნიშვნელოა, თითქმის არაფერიო³.

პროფ. ვალერიან მაჭარაძე სამართლიანად ასკვნის, რომ „იმერეთის ციხეების შედარებით იოლი გათავისუფლება უთუოდ ასპინძის ბრძოლაში თურქთა დამარცხებამ განაპირობა... რომ სოლომონ პირველი რუსეთის ჯარის დაუხმარებლადაც ადვილად იკავებს ცუცხვათისა და შორაპნის ციხეებს, ქალაქ ქუთაისს და ალყაში აქცევს ქუთაისის ციხეს. ცხადია, ეს ციხეები ასე ადვილად არ იქნებოდა აღებული, მით უმეტეს, რუს-ქართველთა ჯარს სააღყო ქვემეხები არ გააჩნდა, რომ იმერეთში მყოფ თურქ მეციხოვნეებს ახალციხის ფაშის დახმარების იმედი ჰქონოდა... რა თქმა უნდა, ასევე შეცდომა იქნებოდა ასპინძის ბრძოლაში ბრწყინვალე გამარჯვება და იმერეთის ციხეების შედარებით იოლი განთავისუფლება, რუსეთ-თურქეთის ომის საერთო მსვლელობისაგან იზოლირებულად წარმოგვედგინა და დაგვევიწყებინა, რომ ამ დროს რუსეთის არმია ღუნაის რაიონში თურქთა ძირითად ძალებს (400-ათასიან არმიას) აბანდებდა“⁴.

ერეკლე მეფეც საღად აფასებდა მაშინდელ პოლიტიკურ ვითარებას და პანიხს სწერდა, რომ თუ ტოტლებენი ახალციხის მიმართულებით ლაშქრობას გააგრძელებს, წარმატების შემთხვევაში იმერეთის ციხეებში მდგომი ჯარი თავისთავად დაგვენებდება, რადგან ახალციხიდან დახმარების იმედი აღარ ექნებათ.

ამგვარად, ოსმალები სრულიად განიდევნენ იმერეთიდან. როგორც ზემოთ ითქვა, სოლომონ მეფის ბრძანებით, ციხეები მთლიანად დაანგრიეს, რათა მომავალში ოსმალთ ფეხი არ მოემთავრებინათ. ეს იყო იმერეთის სამეფოს დიდი გამარჯვება განმათავისუფლებელ ბრძოლაში.

¹ ვ. მაჭარაძე, დასახ. ნაშრ., გვ. 97.

² ა. ცაგარელი, ტ. I, გვ. 260 (რუს.).

³ ვ. მაჭარაძე, დასახ. ნაშრ., გვ. 98.

⁴ იქვე.

რუსეთის არმიის დახმარებით იმერეთიდან თურქების განდევნის შემდეგ სოლომონ მეფემ დასავლეთი საქართველოს გაერთიანება დაისახა მიზნად. იგი თვლიდა, რომ უამისოდ თურქების განდევნას აზრი არ ჰქონდა, რადგან თურქებს შეეძლოთ, ისევ ესარგებლათ შინაფეოდალური უთანხმოებით და იმერეთი დაეკავებინათ; ამიტომ, პირველ რიგში, დადიანისა და გურიელის შემუსვრა იყო საჭირო. იგი შეუდგა კიდევაც ამის სამზადისს, მაგრამ სწორედ აქ წააწყდა რუსეთის მხრივ წინააღმდეგობას.

სოლომონ მეფემ წინადადება მისცა ტოტლებენს, დადიანის წინააღმდეგ გაელაშქრათ, მაგრამ მან ეს წინადადება უარყო. სოლომონის მოქმედებამ კანცლერ პანინის უკმაყოფილება გამოიწვია, დადიანის წინააღმდეგ მეფის ბრძოლას მან „კერძო ჩხუბი“ უწოდა და მოითხოვა სამეფო-სამთავროების შეკავშირება და ერთიანი ძალებით ბრძოლა თურქეთის წინააღმდეგ.

პანინი იმერთა მეფეს ატყობინებდა, რომ რუსეთის მთავრობის მიზანია მთელი საქართველოს გამოსვლა ომში თურქეთზე გამარჯვებისათვის, ამიტომ იგი არ სცნობდა ქართველი მეფის შინაბრძოლას სამთავროების შემოერთებისათვის.

რასაკვირველია, გაერთიანებულ დასავლეთ საქართველოს უფრო მეტი სარგებლობის მოტანა შეეძლო რუსეთისათვის თურქეთთან ომში, ვიდრე დაქუცმაცებულს, როცა სამთავროების მფლობელნი ცალი თვალთ თურქეთისაკენ იქცირებოდნენ და მის მოკავშირეებად შეიძლება გამხდარიყვნენ. მაგრამ ეს უფრო შორეული პერსპექტივა იყო.

არსებული ვითარება კი რუსეთის ინტერესების თვალსაზრისით არა შინაომს, არამედ თურქეთის წინააღმდეგ დაუყოვნებლივ მოქმედებას ითხოვდა, ამიტომ იმერეთის ელჩს იმპერატორის კარზე — კვინიხიძეს განუცხადეს: „ძალიან უსამართლო იქნებოდა, რათა რუსეთის საიმპერიო ჯარებს იმერეთში უშიშროება და სიმშვიდე დაემყარებინათ, მაშინ როცა საკუთარი მფლობელი მასში არ მონაწილეობს“¹.

მაშინ იმერთა მეფემ წინადადება მისცა ტოტლებენს, შავი ზღვის სანაპიროზე ელაშქრათ, მაგრამ ტოტლებენმა ეს წინადადება უარყო და თავის მხრივ (მოჩვენებით) სამზადისი დაიწყო ახალციხეზე გასალაშქრებლად. სოლომონ მეფე მზად იყო ამ ლაშქრობაშიც მიეღო მონაწილეობა, მაგრამ ტოტლებენმა მას ამის საშუალება არ მისცა.

სოლომონის გვერდის ავლით ტოტლებენმა გაილაშქრა ახალ-

¹ ა. ცაგარელი, ტ. I, გვ. 273 (რუს.).

ციხის მიმართულებით, მაგრამ სოფელ ფერსათის რაიონში გზები დაიწუნა და უკან გამობრუნდა; შემდეგ ქართლის გზითაც დააპირა ლაშქრობა, მაგრამ ამ დროს რუსეთიდან იაზიკოვის ჩამოსვლამ შეაჩერა.

სოლომონს შემომწყვრალი ტოტლებენი 1769 წელს თურქების ყოფილ მოკავშირეს, იმერთა მეფის მტერს, დადიანს დაუახლოვდა და მისი მოკავშირეობით შავი ზღვისაკენ სალაშქროდ დაიძრა.

რუსეთის ჯარის მოახლოებისთანავე ანაკლიისა და რუხის ციხეები, რომლებშიც ოც-ოცი მეციხოვნე იდგა, თურქებმა დაცალეს და ტოტლებენი ცარიელ ციხეებს დაეუფლა. 1770 წლის 3 ოქტომბერს ტოტლებენი ფოთის ციხისაკენ დაიძრა და ამ ოთნკოშვიან სიმაგრეს ალყა შემოარტყა.

გენერალმა ფოთის ციხე ვერ აიღო, იგი ძლიერ გამაგრებული აღმოჩნდა. მოკავშირე მთავრებიც: დადიანი, გურიელი და შერვაშიძე მეტად საეჭვოდ მოქმედებდნენ. დეკემბრის თვეში თურქებმა ბათუმში ძალებს მოუყარეს თავი და ფოთის დასახმარებლად წამოვიდნენ. ეს სოლომონ მეფემ ტოტლებენს აცნობა, მაგრამ გენერალმა არ დაუჯერა, სანამ მტრის ავანგარდი არ გამოჩნდა. იაზიკოვისა და ლვოვის თხოვნით სოლომონმა სასწრაფოდ გასწია გურიისაკენ საფრთხეში ჩავარდნილი რუსის ჯარის დასახმარებლად. 1771 წლის იანვარში მან გზა მოუქრა თურქებს და აიძულა უკან გაბრუნებულიყვნენ. ამით იმერთა მეფემ ორი საქმე გააკეთა: განადგურებისაგან იხსნა რუსეთის კორპუსი და გადააყენა ოსმალთა მიმდგომი გიორგი გურიელი; ისევ მისი უფროსი ძმა მამია გაამთავრა, გურიის თავადაზნაურობა ერთგულებაზე შემოიფიცა, მძევლები გამოართვა და უკან დაბრუნდა. ამით სოლომონმა გურიის სამთავრო ისევ დაუმორჩილა იმერეთის სამეფოს.

ფოთის ციხის ალყა გაჭიანურდა, რუსეთის ჯარში მასობრივმა დაავადებამ იჩინა თავი, კორპუსმა ბრძოლის უნარი დაკარგა.

ფოთის კაპუანის მარცხი გენერალმა ქართველ მეფეებს გადააბრალა — ხელს არ მიწყობენო. მაგრამ ამის პასუხი კაპიტან იაზიკოვის მოხსენებიდან ჩანს: „ტოტლებენს არ სურდა მეფეებთან ერთად მოქმედება, თავიდან იცილებდა მათ; შეურაცხყოფდა მეფეებს — სოლომონს „თურქს“ ეძახდა, ერეკლეს — „მოლალატეს“; ასეთ პირობებში მეფეებიც გულგრილად ექცეოდნენ საქმეს“¹.

ტოტლებენის ასეთი დამოკიდებულება მეფეებთან იწვევდა რუსეთის სამხედრო კორპუსის იზოლირებას, რაც საზიანო იყო

¹ ა. ცაგარელი, ტ. I, გვ. 180—183 (რუს.).

თვით რუსეთისათვის. სათანადო ცნობების მიღების შემდეგ იმპერატორისათვის ცხადი გახდა, რომ ტოტლებენი სისუსტეს იჩენდა თავისი მისიის შესრულებაში და ვერ ახერხებდა საქართველოს ძალების გამოყენებას რუსეთის იმპერიის სასარგებლოდ. ამიტომ მან ტოტლებენის მოქმედების შესასწავლად გამოგზავნა კაპიტანი იაზიკოვი, რომელმაც ჩამოსვლისთანავე დააპატიმრა გენერლის მრჩეველი მოურავოვი და ტოტლებენის საქმიანობის შესწავლას შეუდგა. მისი დაკვირვებით, ტოტლებენი საქართველოში იჩენდა უხეშობასა და სიმკაცრეს, რაც აფრთხობდა ქართველებს, რომელთა გამოყენება შეიძლებოდა მხოლოდ მოფერებით.¹

• • •

იმერეთიდან თურქი ოკუპანტების გაძევებამ დააფრთხო ოდიშის მთავარი კაცია დადიანი; იგი ფიქრობდა, რომ მოკლე ხანში სოლომონის სიძლიერე მასაც და მის სამთავროსაც მოუღებდა ბოლოს, ამიტომ დადიანმა გამოიყენა ტოტლებენისა და სოლომონის უთანხმოება და რუსეთის მხარეზე დადგა იმ მიზნით, რომ რუსეთის მთავრობას დაეცვა მისი დამოუკიდებლობა იმერეთის მეფისაგან; თავის მხრივ, დადიანი ტოტლებენს შავი ზღვის სანაპიროზე თურქების წინააღმდეგ დახმარებას პირდებოდა.²

სოლომონ მეფეს მტკიცედ ჰქონდა გადაწყვეტილი ოდიშის დაქვემდებარება იმერეთის სამეფოსადმი. „სანამ ცოცხალი ვართ, ცდას არ მოვშლით, რათა იგი ჩვენს სრულს ქვეშევრდომობაში შემოვიყვანოთ“³ — უცხადებდა სოლომონი რუსეთს.

იმერთა მეფემ თავის ელჩს კვინიხიძეს დაავალა, რომ არ დაეშვა რუსეთის სამეფო კართან დადიანის მიმოწერა და თანაც გამოეთხოვა დასტური სოლომონის პრეტენზიებზე ოდიშისა და ლეჩხუმის მიმართ.⁴

რუსეთის მთავრობა უკმაყოფილოდ შეხვდა იმერთა მეფის მოთხოვნებს და მხარი არ დაუჭირა მათ. მან კავშირი გააბა დადიანთან; ტოტლებენმა ფიციც კი მიაღებინა დადიანს რუსეთის ხელმწიფისადმი ერთგულებაზე.

დადიანს კავშირი რომ არ დაემყარებინა ტოტლებენთან და

¹ ა. ც ა გ ა რ ე ლ ი, გვ. 176.

² იქვე, გვ. 300.

³ იქვე, გვ. 156.

⁴ იქვე, გვ. 93.

ერეკლე მეორესთან¹, სოლომონ მეფემ შეკრა იმერეთის სამეფო საზღვრები, მაგრამ დადიანის „ხმა“ მაინც მისწვდა რუსეთის იმპერიას.

გენერალ-მაიორი პოტაპოვი ყიზლარიდან გაგზავნილ მოხსენებაში საიმპერატორო კარს სწერდა, რომ იმერეთის მეფე სოლომონი მოითხოვს სამეგრელოს სამთავროს მისთვის დამორჩილებას, აგრეთვე დადიანის ელჩებისა და წერილების მიღებაზე უარის თქმას ხელმწიფის კარის მიერ, მაგრამ ამავე დროს, იმერეთის მეფე სოლომონი ოსმალებთან ბრძოლაში მონაწილეობას არ გვპირდება, სამეგრელოს მთავარი კი თვითონ მოგვემართავს — დახმარებას გაგიწევთო, ამასთანავე, სამეგრელოს სამთავრო თავისი ადგილმდებარეობით შავი ზღვის სანაპიროზეა. მას შეუძლია ჩვენთვის დიდი სარგებლობის მოტანა, რის გამოც სასურველია ამ მთავრის კეთილგანწყობილების მოპოვება და განმტკიცება. ამიტომ მისგან გამოგზავნილი პირები დაუყოვნებლივ უნდა იყოს ხელმწიფის კარზე დაშვებულიო. თუ სამეგრელოს მთავრის კაცია დადიანის გამოგზავნილი კაცი მოვა და მოითხოვს ხელმწიფის კარზე გაშვების ნებართვას, მაშინვე დაუბრკოლებლივ უნდა მიიღოთ². სოლომონ მეფე კი თავგამოდებით უმტკიცებდა რუსეთს, რომ იმერეთთან ოდიშის შეერთება დაბრკოლებისაგან გაანთავისუფლებს იმერეთის მეფეს, რომელსაც საშუალება მიეცემა მთელი თავისი ძალებით მიიღოს მონაწილეობა მიმდინარე ომში³. მაგრამ დასავლეთი საქართველოს გაერთიანების აზრს რუსეთმა მხარი არ დაუჭირა. ამ მიზეზის გამო შეუძლებელი აღმოჩნდა ერთიანი სამხედრო ოპერაციების წარმოება ოსმალეთის წინააღმდეგ.

რუსეთის ხელისუფლება სოლომონისა და დადიანის შერიგებას ერეკლე მეფის დახმარებითაც ცდილობდა.

ერეკლე მეორე გრაფ პანინს სწერდა: „უმალღესის ბრძანებით მე და ტოტლებენს დავალებული გვაქვს იმერეთის მეფის სოლომონისა და კაცია დადიანის შერიგება. მეორე წელიწადია, რაც ჩვენ ვცდილობთ მათ შერიგებას, მაგრამ სოლომონს ეს არ სურს — იგი დადიანისაგან მოითხოვს ზოგიერთი ადგილის დათმობას და მისი მორჩილების აღიარებას. წარსულ წელს მისი უმაღ-

¹ კაცია 11 დადიანი იყო ერეკლე მეფის სიძე: მას ცოლად ჰყავდა ერეკლეს დაჲ, თეიმურაზ მეორის ასული ელისაბედი, რომელიც დასაფლავებულია ცაგერის (ლენხუმი) ეკლესიის ეკლდარში (იხ. დაწვრილებით, საქ. მუზეუმის მოამბე, ტ. X, თბ., 1940, გვ. 208).

² ა. ც ა გ ა რ ე ლ ი, ტ. 1, გვ. 66—68 (რუს.).

³ იქვე, ტ. 11, გ. 1, გვ. 70 (რუს.).

ლესობის ბრძანების თანახმად, დადიანს განზრახვა ჰქონდა, ჩვენთან გადმოსულიყო და ხელმწიფის კარზე გაეგზავნა თავისი ძმა, მაგრამ სოლომონმა მას გზა შეუკრა და ამის ნება არ მისცა. ახლა არც ჩვენ კაცებსა და წერილებს უშვებს დადიანთან“¹.

მიუხედავად იმისა, რომ რუსეთის მთავრობა ცდილობდა მათ შერიგებას, სოლომონი მტკიცე უარზე იდგა; რუსეთის ხელმწიფისადმი გაგზავნილ წერილში იგი ამტკიცებდა: „კაცია ჩიქვანს უკანონოდ მიუთვისებია დადიანობა და ჩვენი კუთვნილი ლეჩხუმში და როგორც ძველად ჩვენი მორჩილი ყოფილა დადიანი, ახლაც ისე უნდა დარჩეს“².

1771 წელს პანინისადმი მიმართვაში კაპიტანი იაზიკოვი წერს: „მეფე სოლომონისა და თავადი დადიანის შერიგება შეუძლებელია; თუმცა მეფე სოლომონი დადიანის სიძეა, მაგრამ ისინი ერთმანეთის ვერაგი მტრები არიან. მე რომ იმპერატორის სახელით არ გამეფრთხილებინა სოლომონი, იგი აუცილებლად გაანადგურებდა მთავარ დადიანს, ვინაიდან ახლა სოლომონი გაძლიერდა და მთელი იმერეთი მის ხელშია“³.

კაცია დადიანი თავის მხრივ ეკატერინე II არწმუნებდა თავის ერთგულებაში და სწერდა: „მე მყავს ისეთი მტერი, როგორც სოლომონ მეფეა, რომელიც თქვენთან არ მიშვებს და გზასაც არ მაძლევს. სამსანური და ერთგულება ჩვენზე იყოს. გთხოვთ, არ ერწმუნოთ ჩვენი მტრის სიტყვას“⁴.

ამ მიმოწერიდან ჩანს, თუ როგორ ეჭიშპებოდნენ მეფე-მთავარი ერთმანეთს რუსეთის ხელმწიფის კარზე თავიანთი პრეტენზიების დასაკმაყოფილებლად, მაგრამ რუსეთი სრულებითაც არ იყო განწყობილი, იმერეთს მიმხრობოდა და სამეგრელო მისთვის დაემორჩილებინა.

ამ პერიოდში იმერეთის მეფემ დრო იხელთა და ლეჩხუმში დალაშქრა, დეხვირისა და ჭყვიშის ციხეების ხელში ჩაგდება სცადა, მაგრამ უშედეგოდ — ხელცარიელი უკან გამობრუნდა.

*

როგორც ზემოთ ითქვა, ტოტლებენის წინააღმდეგ მეფეთა მიერ გაგზავნილმა წერილებმა რუსეთის სამეფო კარი აიძულა საქ-

¹ ცაგარელი, გვ. 63 (რუ).

² იქვე, გვ. 68--70 (რუს.).

³ იქვე, ტ. I, გვ. 295 (რუს.).

⁴ ნ. ბრძენიშვილი, საქართველოს ისტორიის საკითხები, ტ. VI, თბ. 1973, გვ. 428.

მის გამოსაძიებლად კაპიტანი იაზიკოვი გამოეგზავნა საქართველოში. გაერკვა რა შექმნილ ვითარებაში, იაზიკოვმა მოხსენებითი ბარათი გაგზავნა რუსეთში და დაარწმუნა სამეფო კარი, რომ ტოტლებენი საქართველოში რუსეთს უფრო სირცხვილს უხვევდა, ვიდრე სახელს, ამიტომ 1770 წლის დეკემბერში ეკატერინე II-ის დასტურით გენერალი ტოტლებენი საქართველოდან გაიწვიეს — იგი გენერალმა სუხოტინმა შეცვალა.

ტოტლებენის მოქმედება საქართველოში მეტად წინააღმდეგობრივი იყო და ამ მოქმედების შეფასებაც მკლევართა მიერ ასევე წინააღმდეგობრივია.

ქართველები ტოტლებენის სახელს უკავშირებდნენ ასპინძის ბრძოლას — ქართული სამხედრო ისტორიის ერთ-ერთ ბრწყინვალე ფურცელს, როცა ამ გენერალმა ვერაგულად მიატოვა მრავალრიცხოვანი მტრის წინაშე მდგარი ერეკლე მეფე. მაგრამ არანაკლებ ვერაგული იყო მისი მოქმედება შემდეგშიც, მთელი მისი „მოღვაწეობის“ მანძილზე. თუმცა ყოველივე ეს არ უნდა გაგვიკვირდეს, თუ გავიხსენებთ ამ გენერლის შევზნეულ ბიოგრაფიას.

ტოტლებენი ცნობილი გერმანელი ავანტიურისტი იყო. მას ფართოდ იცნობდნენ როგორც ამორალურ ადამიანს, მექრთამეს, მფლანგველს და ჯაშუშს. იგი არაერთხელ იყო დაპატიმრებული; ჯერ კიდევ შვიდწლიანი ომის (1757—1763 წწ.) დროს, როცა რუსეთის სამხედრო კორპუსს მეთაურობდა, გამომჟღავნდა მისი ბნელი საქმეები — პრუსიის იმპერატორთან — ფრიდრიხ II-სთან მიმოწერისას, რასაც ტოტლებენი აწარმოებდა; რუსმა ოფიცრებმა ეჭვი შეიტანეს მის ერთგულებაში და შეიპყრეს ტოტლებენის აგენტი, რომელსაც ფრიდრიხ II-სთვის გადასაცემი რუსეთის გენერალური შტაბის საიდუმლო გეგმები აღმოაჩნდა. ტოტლებენი დაპატიმრეს და სამხედრო სასამართლომ მას 1762 წელს სიკვდილის განაჩენი გამოუტანა. იმპერატრიცა ეკატერინე II-მ ტოტლებენი შეიწყალა და 1763 წელს სიკვდილით დასჯა შეუცვალა ჩინების აყრით, რუსეთიდან გაძევებით და კანონგარეშე გამოცხადებით, ე. ი. რუსეთის ტერიტორიაზე გამოჩენისას ყველას შეეძლო მოეკლა იგი, როგორც რუსეთის მოღალატე, ისე, რომ პასუხს არ აგებდა.

1769 წელს ტოტლებენმა შეწყალება სთხოვა იმპერატრიცა ეკატერინეს. მანაც შეიწყალა ტოტლებენი და საქართველოში გამოგზავნილი ჯარის მეთაურად დანიშნა¹. ამით რუსეთის მთავრო-

¹ გავიხსენოთ, რომ რუსეთის იმპერატრიცა ეკატერინე II ეროვნებით ვერმანელი იყო.

ბამ გამოუსწორებელი შეცდომა დაუშვა და დიდი ზიანი მიაყენა როგორც საკუთარ ქვეყანას, ისე საქართველოს¹.

ტოტლებენმა ფაქტიურად ჩაშალა საომარი კამპანია საქართველოს ფრონტზე 1770—1771 წლებში.

საქართველოში მოსული ტოტლებენი ხან იმერეთში იყო და ხან ქართლში, უნდოდა ეჩვენებინა ვითომ ორივეს ეხმარებოდა, სინამდვილეში არც ერთს შეელოდა და არც მეორეს. სამხედრო ნიქს მოკლებულ ტოტლებენს არც დიპლომატიური ნიჭი აღმოაჩნდა და უთავბოლო მოქმედებით უქმყოფილო გახადა ქართველი მეფეები, იმავე დროს, მან გააძლიერა და გაამწვავა მეფეთა და მთავართა შორის არსებული წინააღმდეგობანი და ამით დააბრკოლა ერთიანი ძალით ბრძოლა თურქეთის წინააღმდეგ. ყოველივე ეს ცხადი გახდა, მაგრამ გვიანლა იყო — რუს-ქართველთა გაერთიანებული სამხედრო ძალით ვერც ფოთი გათავისუფლდა, ვერც ახალციხე დაილაშქრა.

საქართველოსათვის რომ სახელი გაეტეხა, ტოტლებენი რუსეთის ხელისუფალთ მოახსენებდა: შეუძლებელია მეფეებისა და მთავართა ძალების გაერთიანება და თურქეთის წინააღმდეგ გამოყენება, რადგან ისინი ერთმანეთს სამკვდრო-სასიცოცხლოდ არიან გადაკიდებულნი, ქართველები ირეგულარული (უწესრიგო) ხალხია, გარდა ძარცვისა, არაფერი ეხერხებათ, მეფეებს ომი თურქეთის წინააღმდეგ არ სურთ; ერეკლეს ერთადერთი სურვილია რუსეთის ჯარი და ხაზინა სპარსეთის წინააღმდეგ გამოიყენოს, სოლომონი კი მხოლოდ დადიანისა და გურიელის წინააღმდეგ იბრძვის².

ტოტლებენის აქტიური და მოურიდებელი მოქმედება რუსთა ერთგულებაზე მოსახლეობის დაფიცებაში გვაფიქრებინებს, რომ წერილობითი ინსტრუქციის საპირისპიროდ, სადაც აღნიშნული იყო, რომ რუსეთის წინაშე იმჟამად საქართველოს შეერთების საკითხი არ იდგა, გენერალს სხვანაირი სიტყვიერი ინსტრუქცია უნდა ჰქონოდა. მძღებელი ამ საკითხში უმაღლეს ღონეზე; ამიტომაც იყო, რომ ტოტლებენის დანაშაულებრივი მოქმედება საქართველოში ასე განუკითხავი და დაუსჯელი დარჩა იმპერიის ხელმძღვანელთა მხრივ.

გენერალ სუხოტინსაც იგივე ამოცანა ჰქონდა შესასრულებელი საქართველოში, რაც გენერალ ტოტლებენს: ქართველ მეფე-

¹ საქართველოდან სასწრაფო წერილი მხოლოდ 40—45 დღეში ჩადიოდა პეტერბურგში.

² ა. ც ა გ ა რ ე ლ ი, ტ. II, გ. I, გვ. 55 (რუს.).

მთავართა ძალების გაერთიანება და თურქეთისათვის მათი შესე-
ვა, საქართველოში მყოფი რუსის ჯარის ნაწილების ისე გამოყე-
ნება, რომ ბრძოლის სიმძიმე რუსის ჯარს არ დასწოლოდა. ამავე
დროს, რუსეთის ხელისუფლებას სურდა სანამ რუსეთ-თურქეთის
ომი მიმდინარეობდა, ფოთის ნავსადგურის ხელში ჩაგდება და მი-
სი გამოყენება რუსეთის შავი ზღვის ფლოტის ბაზად. ამავე დროს
საგარეო საქმეთა კოლეგია სუხოტინს მიუთითებდა, რომ „რუ-
სეთს პირველ რიგში დაუსახავს მიზნად საქართველოს გამოყენე-
ბა მიმდინარე ომში და არა საქართველოს შეერთება. ტოტლებენის
ლონისძიებების გატარებას სუხოტინს იმ შემთხვევაში ურჩევდა,
თუკი ამ გზით უფრო ადვილად და მიზანშეწონილად მოხდება
ქართლ-კახეთის ჩაბმა თურქეთის წინააღმდეგ ომში, თუ არა და
სუხოტინს ეკრძალება ტოტლებენის ლონისძიებათა გატარება (იგუ-
ლისხმება შეერთება); მას გამეორებით მიუთითებენ, რომ ამჟამად
რუსეთის მიზანი არ არის საქართველო შეიერთოსო. ასეთი გეგმე-
ბით და მიზნებით იყო რუსეთი გამსჭვალული საქართველოს მი-
მართ თურქეთთან ომის დაწყების წინ (1768 წ.) და თვით ომის
პერიოდშიც¹.

საინტერესოა 1771 წლის 13 იანვარს ეკატერინე II-ს მიერ
სუხოტინისათვის მიცემული მითითებანი: 1. ჩვენი განზრახვა იყო
და არის ქართველების გამოყენება თურქეთის წინააღმდეგ ომში,
საქართველოს შეერთებას რუსეთთან ჩვენ ამჯერად ამოცანად არ
ვისახავთ, 2. „დივერსია“ უნდა მოეწყოს შემდეგნაირად: კარგი
იყო, რომ ქართველებს შეძლებოდათ ომის წესიერად წარმოება.
რა თქმა უნდა, ამას დიდი შედეგები მოჰყვებოდა; მაგრამ როგორც
ჩანს, ასეთი რამ შეუძლებელია; ქართველებს მტრის ძარცვა, მათ-
ზე ცალკეული თავდასხმები ემარჯვებათ და ასეც იმოქმედონ, რა-
თა თურქები შეაწუხონ. ამიტომ თქვენზეა დამოკიდებული, რო-
მელ მიმართულებით დაინახავთ საჭიროდ ჯარის მიშველებას მათ
გასამხნეველად. შეგიძლიათ, შეუდგეთ ციხეების ალყასაც და
სხვ. ამის უფლებას არ გართმევთ, მაგრამ უნდა გაითვალისწინოთ
თქვენი ძალები და ისიც, რამდენად შეგიძლიათ დაემყაროთ ქარ-
თველების იმედს; 3. ტოტლებენის დაწყებული საქმე — ქართველე-
ბის ძალით დაფიცება რუსეთის ერთგულებაზე თუ ხელს შეუ-
წყობს ქართველების მონაწილეობას ომში, შეგიძლიათ, გააგრძე-
ლოთ, ამის გარეშე კი იგი ზედმეტია. სოლომონისა და დალიანის

¹ ი. ცინცაძე, ორი საბუთი რუსეთ-საქართველო ურთიერთობის ისტო-
რიიდან, ენის, ისტორიისა და მატერიალური კულტურის ინსტიტუტის შოამ-
ბე, V—VI, თბ., 1940, გვ. 311.

ურთიერთობის საკითხში იმოქმედეთ ისე, როგორც რუსეთის ინტერესებისათვის იქნეს სასარგებლო — (დადებით იმის მხარეზე, ვინც უფრო სასარგებლოა თურქეთის წინააღმდეგ საომრად, შეეცადეთ მათ შერიგებას), ასევე მოიქეციეთ გურიის საკითხშიც. საქართველოში ჩასვლისთანავე კონტაქტი დაამყარეთ ერეკლესთან, როგორც უძლიერესთან; თუმცა ტოტლებენი მას საშიშ კაცად ხატავს, მაგრამ იაზიკოვი სხვანაირად უყურებს, იმოქმედეთ საქუთარი შეხედულებისამებრ; 4. გამოიჩინეთ მეტისმეტი სიფრთხილე, იმოქმედეთ მტკიცედ, მიიღეთ სწორი გადაწყვეტილებები, კარგად უხელმძღვანელებთ რუს-ქართველთა ერთობლივ მოქმედებას თურქეთის წინააღმდეგ. 5. თუმცა ჩვენ თავდაპირველად საპიროდ და შესაძლებლად ვთვლიდით, ესწავლათ ქართველებს არტილერიის საქმე, ქალაქების ვერობულად გამაგრება, თოფისწამლის გაუმჯობესება და სხვა, მაგრამ, როგორც ტოტლებენის მოხსენებიდან ჩანს და როგორც საქართველოში მომხდარმა ამბებმა დაგვარწმუნა, ასეთი რამ ზედმეტია¹.

ამ რჩევა-დარიგებიდან ჩანს, ტოტლებენი საქართველოს შესახებ ყალბ ცნობებს აწვდიდა რუსეთის საიმპერატორო კარს და რუსეთის მთავრობას არწმუნებდა, რომ ქართველები საექვეონი იყვნენ, მათზე დანდობა არ შეიძლებოდა.

ასეთსავე ვრცელ დარიგებას აძლევდა სამხედრო კოლეგია სუხოტინს და 1770 წლის 31 დეკემბრის ბრძანებით ავალებდა, ჯარში დაცულიყო მკაცრი დისციპლინა, ალაგმულიყო ყოველგვარი თვითნებობა და ადგილობრივი მცხოვრებლების შევიწროება².

— ასეთი დავალებით ჩამოვიდა სუხოტინი საქართველოში 1771 წელს. იმავე წლის 13 მაისს იგი ქუთაისშია.

პირველ რიგში სუხოტინმა დასავლეთი საქართველოს მეფე-მთავრები დააიშედა და დროებით მაინც ერთმანეთს მოარიგა, იმავე წლის 15 ივნისს ქართველი მეფე-მთავრები ხელთუბანში (ქართლში) შეკრიბა და თათბირი გამართა, თუ როგორი გეგმით უნდა ემოქმედათ იმ წელს თურქეთის წინააღმდეგ.

ეს გეგმა თავიდან ბოლომდე შემუშავებული იყო სუხოტინის მიერ (იხილეთ დანართი № 1) იმ მითითების საფუძველზე, რომელიც ეკატერინე II-მ მისცა საქართველოში გამომგზავრებამდე. მთელი ოპერაციული გეგმა მიზნად ისახავდა ძირითადად ფოთის აღებას (რომელიც ახალი ამოცანა იყო რუსეთის ჯარისათვის საქართველოში). სუხოტინის ჩანაფიქრის მიხედვით, ეს გეგმა ასე

ვ. მაქარაძე, დასახ. ნაშრ., გვ. 114—115.

² იქვე, გვ. 116.

წარმოგვიდგება: თვით სუხოტინი რუსის კორპუსით ალყას შემოარტყამს ფოთის ციხეს ხმელეთიდან, ხოლო ქართველ მეფე-მთავრებს ევალებათ ალყად შემორტყმული რუსეთის კორპუსის დაცვა ზურგიდან. ამისათვის ერეკლე მეორემ 14.300 მეომარი უნდა გამოიყვანოს. ამათგან ორ-ორ ათასიანი კორპუსი კახეთსა და ბორჩალოში უნდა დააყენოს, 300-იანი კი — გორს, რათა ლეკების თავდასხმისაგან დაიცვას სამეფოს საზღვრები, დანარჩენი 10 000 მეომარი თვით ერეკლეს სარდლობით უნდა შეიჭრას ახალციხე-ახალქალაქის მიმართულებით, თარეშობით შეავიწროოს თურქები ისე, რომ არ დაუშვას თურქთა ძირითად ძალებთან შებრძოლება. როგორც კი ერეკლე მეფე გაიგებს, რომ თურქები მასთან შესახვედრად მოდიან, ისევ უნდა გამობრუნდეს თავის საზღვრებში, როცა თურქთა ძალები დამშვიდდებიან და უკან წავლენ, ერეკლე ისევ უნდა შეიჭრას თურქეთის საზღვრებში და გაიმეოროს იგივე, და ასე შემდეგ. ასეთ ვითარებაში, სუხოტინის აზრით, თურქები ვერ დაეხმარებიან ფოთის ციხეში მყოფ გარნიზონს!

იმერთა მეფეს სოლომონ პირველს ამ ოპერაციაში მონაწილეობის მისაღებად ევალებოდა 6000 მეომრის გამოყვანა. ამ ძალებით მას უნდა გაემაგრებინა ახალციხიდან იმერეთში გადმომავალი გზები და ხეობები².

გურიელს ტრაპიზონიდან მომავალი ზღვის პირის გზების შეკვრა და დაცვა დაევალა³.

დადიანს უნდა დაეცვა რუსეთის ჯარი აფხაზეთის მხრივ და უზრუნველყო ქუთაისისაკენ მიმავალი გზის უსაფრთხოება⁴.

როგორც ამ გეგმიდან ჩანს, მთავარი საზრუნავი იყო რუსების მიერ ფოთის ციხის აღება; სუხოტინი ისე წარმოადგენდა ამას, თითქოს ეს მხოლოდ საქართველოს კეთილდღეობისათვის იყო საჭირო: „რუსეთის იმპერია შესამატსა თვისსა არასფერსა აქ არ ეძიებს“⁵ — აღნიშნულია დოკუმენტში.

ასეთი გეგმის გაცნობის შემდეგ საქართველოს მეფე-მთავრები ერთსულოვანნი არ იყვნენ, მათ იგრძნეს. რომ სუხოტინი მათთვის დიდად სასარგებლო გეგმებს არ სახავედა. ამასთან ერთად, თითოეული მათგანი ცდილობდა, რუსეთის კორპუსი საკუთარი ინტერესებისათვის გამოეყენებინა.

¹ ი. ცინცაძე, დასახ. ნაშრ., გვ. 355—356.

² იქვე, გვ. 356.

³ იქვე.

⁴ იქვე.

⁵ იქვე, მუხ. № 10.

ერეკლე მეფე ფოთზე გალაშქრების წინააღმდეგი იყო, ამას იმიტომ ასაბუთებდა, რომ ზაფხულში აქაური ჰავის გამო ჯარს ბრძოლა გაუჭირდებოდა. ამასთან ერთად, ერეკლე თავის საქმეზეც ფიქრობდა. 1771 წლის 21 აგვისტოს წერილში იგი გენერალ სუხოტინს სწერდა: „აქ რომ ყარსიდან, ახალციხიდან და ბაიაზეთიდან და ლეკიც ამათ თან რომ აერიოს და მოვიდნენ ჩემზე, თქვენი მაღალმსვლელობა ნომ დიახ შორს ბრძანდება; და დადიანი და გურიელი მანდემამ და მეფე სოლომონ რომ დღესაც ბაღდათსვე ბრძანდება — არც ერთისაგან არ შეიძლება, რომ მე ისინი მომეშველონ“¹. ნაცვლად ფოთზე გალაშქრებისა, ერეკლე ახალციხეზე ლაშქრობას მოითხოვდა. სოლომონ მეფემ მხარი სუხოტინს დაუჭირა, თუმცა იმერთა მეფემ კარგად იცოდა, რომ ზაფხულში იქაური ჰავის გამო ფოთზე ლაშქრობა არ შეიძლებოდა. რა თქმა უნდა, აქ სოლომონი ცდილობდა, რუსეთის ჯარი ახალციხეზე გასალაშქრებლად არ გამოეყენებინათ და წარმატების შემთხვევაში ეს მხარე ქართლისათვის არ შეეერთებინათ (გავიხსენოთ იმერთა მეფის პრეტენზია ამ მხარეზე).

ამით სოლომონმა ერეკლე მეფეს რუსეთის არმიის დახმარება მოუსპო და ახალციხის მიმართულებით მოსალოდნელი გამარჯვება ხელიდან გამოაცალა. შემდეგში, როცა სუხოტინი უკვე იმერეთში გადავიდა და ფოთზე ლაშქრობის სამზადისს შეუდგა, სოლომონ მეფემ ახლა აზრი შეიცვალა და ამის წინააღმდეგ წავიდა. ფოთთან მარცხის შემდეგ სოლომონი ეკატერინე II-ს სწერდა: „მე დიდის ხეწნით მოუშალე და ვაუწყე (სუხოტინს მ. რ.): ზაფხული არის და ფოთი დიდათ დამცდელი და შხამიანი ადგილი არის, როდესაც დრო იქნება და სნეულების უამრავი დასცხრება; ვაუწყებ, მეც თან გამოგყვები, მივიდეთ, მოვადგეთ და რისაც ღონისძიებით იყოს, ავიღოთ მეთქი“². მაგრამ ფოთზე გალაშქრება წინასწარ იყო გადაწყვეტილი პეტერბურგში და ამჟამად ამის შეჩერება არც ერეკლეს და არც სოლომონს არ შეეძლოთ.

შუა ზაფხულში სუხოტინი ფოთის ციხეს შემოადგა, მაგრამ ამოდ; მას არ გააჩნდა სააღყო ქვემეხები, რომლებიც ციხის აღებას დაჩქარებდა, მათ გარეშე კი ხანგრძლივი ალყით თუ გასტეხდა თურქთა გარნიზონს.

ტოტლებენის მსგავსად სუხოტინმაც შეცდომა დაუშვა: ქართველი მეფეების რჩევას ეჭვით მოეპყრო. გენერალს ამას უკარნა-

¹ ი. ცინცაძე, დასახ. ნაშრ., გვ. 359.

² სიგელ-გუჯრები, ტ. II, გ. I, გვ. 75 (რუს.).

ხებდა 1771 წლის 13 იანვრის ინსტრუქცია¹, გენერლისათვის მიცემული ეკატერინე II-ს მიერ, სადაც იმპერატრიცა ურჩევდა მას ქართველ მეფეებს არ დანდობოდა (ეკატერინე შეცდომაში შეიყვანა ტოტლებენის ყალბმა ცნობებმა მეფეების შესახებ), ხოლო მეფეები არწმუნებდნენ სუხოტინს, რომ ფოთის ჰავის გამო ზაფხულში რუსეთის ჯარს იქ ბრძოლა გაუჭირდებოდა. ამრიგად სუხოტინმა მათი რჩევა არ მიიღო, თვითონ წავიდა, ხოლო ერეკლე მეორეს ახალციხისკენ ლაშქრობა შესთავაზა, რათა ფოთისათვის თურქებს ჯარი არ მიეშველებინათ.

სუხოტინმა მეორე შეცდომაც დაუშვა; ქართველ მეფე-მთავრებს ხელთუბნის თათბირზე მძევლები მოსთხოვა, და მიიღო კიდევ, მაგრამ ამით დიდი შეურაცხყოფა მიაყენა ქართველ მესვეურთ, რაკი ეს უნდობლობის გამოხატულება იყო მისი მხრივ.

საქართველოს სინამდვილის უცოდინარობამ, რუსეთიდან მიღებული ინსტრუქციების უსწორობამ, რომლებიც ტოტლებენის ცილისმწამებლური მოხსენებების საფუძველზე იყო შედგენილი, სუხოტინი გამოუვალ მდგომარეობაში ჩააყენა. მან კავშირი გააბა ქვეყნის მოღალატე გიორგი ბატონიშვილთან (რომელსაც აღრე იმერთა მეფემ სოლომონმა გურიელობა წაართვა და როგორც თურქების მომხრე, სამშობლოდან განდევნა, ხოლო გურიელად მისი უფროსი ძმა მამია IV დასვა) და იგი კვლავ გურიელად დასვა, მაგრამ მოკლე ხანში გიორგი ისევ თურქეთის ბანაკში აღმოჩნდა² (სუხოტინის საქართველოდან წასვლისთანავე იმერთა მეფემ გიორგი გურიელი ისევ განდევნა და კვლავ მისი ძმა მამია IV გაამთავრა).

ამრიგად, სუხოტინმა მარცხიანად დაიწყო ფოთის ციხის ალყა და წარუმატებლობა დადიანს გადააბრალა.

სუხოტინმაც ტოტლებენის ბედი გაიზიარა: არც თვით იცოდა ადგილობრივი პირობები და არც სხვების რჩევას უჯერებდა— შუა ზაფხულში ფოთის ჰავამ უჩვევი ხალხი დასცადა, 800-მდე ჯარისკაცი ციებ-ცხელებისაგან დაიხოცა, დანარჩენიც ბრძოლისათვის უეარგისი გახდა. ამის გამო სუხოტინმა ოქტომბერში ციხეს ალყა მოხსნა და ქუთაისში დაბრუნდა, თვითაც ციებ-ცხელება შეეყარა და იმპერატრიცას ორი წლით შვებულება სთხოვა³.

¹ ვ. მაქარაძე, დასახ. ნაშრ., გვ. 120.

² იქვე, გვ. 355 (რუს.).

³ ნ. ბერძენიშვილი, საქართველოს ისტორიის საკითხები, წიგნი VI, ობ., 1973, გვ. 429.

1771 წლის დეკემბრის თვეში სუხოტინის პატაკის საფუძველზე რუსეთის მთავრობამ გადაწყვეტილება მიიღო, საქართველოდან რუსეთის ჯარი უკან გაეწვია.

1772 წლის 5 მაისს რუსეთის ჯარმა ქუთაისი დატოვა, 26 მაისს ქართლის საზღვარზე მოცილების შემდეგ, თვალცრემლიანი სოლომონი ჯარს გაშორდა. რუსის ჯარმა მალე ქართლიც დატოვა და 1772 წლის ოქტომბერში ცარიცინში მივიდა¹.

* * *

დაახლოებით სამ წლამდე იმყოფებოდა რუსეთის ჯარი საქართველოში, მაგრამ მან თავისი მისია ვერ შეასრულა. რუსი გენერლების დანაშაულებრივი თუ უმეცარი მოქმედების შედეგად რუს-ქართველთა ჯარის ერთობლივი მოქმედება არ მოხერხდა, ამიტომ ფართო ოპერაციების ჩატარება ვერ განხორციელდა. საიმპერატორო კარმა სამხედრო კორპუსის წარუმატებლობა ქართველ მეფეებს გადააბრალა. ეკატერინე II სოლომონ I-ს სწერდა, „ჩვენმა ჯარმა ვერცერთი მნიშვნელოვანი წარმატება ვერ მოიპოვა... ეს მიეწერება ქართველების შინაგან უთანხმოებას“².

რუსეთის იმპერატრიცა ცდებოდა, როცა რუსეთის ჯარის წარუმატებლობას მთლიანად ქართველ მეფეებს აბრალებდა. ამის მიზეზი იყო პასიური საბრძოლო გეგმა. რამაც საქართველოს მეფეებიც პასიურ მდგომარეობაში ჩააყენა და რუსეთის კორპუსიც პარალიზებული გახდა. ამასთან ერთად, როგორც ჩანს, ტოტლებენმა შეცდომაში შეიყვანა გენერალი სუხოტინი, თავის გავლენის ქვეშ მოაქცია იგი და დააჩწმუნა, რომ მთავრები — კაცია დადიანი და იმჟამად გადაგდებული გიორგი გურიელი რუსეთის ერთგულნი იყვნენ, ამიტომ სუხოტინმა თურქეთის აგენტი გიორგი ისევ გააგურიელა. პროფ. ცაგარელის სამართლიანი შენიშვნით, სუხოტინმა თავი ვერ გაართვა ტოტლებენის მიერ ცუდად დაწყებულ საქმეს და ადგილობრივი პირობების უცოდინარობით ბევრი შეცდომა დაუშვა³.

რუსეთის სამხედრო კორპუსის ყოფნამ დასავლეთ საქართველოში სოლომონ მეფეს ვერ შეუსრულა იმედები, მან ვერ დაიმორჩილა მთავრები, ვერ გააერთიანა დასავლეთი საქართველო, ვერ გაათავისუფლა ოსმალთაგან შავი ზღვისპირეთი. მაგრამ, მიუ-

¹ ვ. შაქარაძე, დასახ. ნაშრ., გვ. 124.

² სიგელ-გუჯრები, I, გვ. 335 (რუს.).

³ იქვე, გვ. XXIV.

ხედავად ამისა, სოლომონ მეფის უდიდეს მონაპოვარს წარმოადგენდა 1770 წელს რუსეთის ჯართან კავშირში იმერეთის ციხეების გათავისუფლება თურქი ოკუპანტებისაგან. ამ ფაქტს სოლომონ მეფე მიიჩნევდა რუს-ქართველთა ლაშქრის შეერთებული ძალების ნაყოფად¹.

სოლომონ მეფე იმერეთის სრული მპყრობელი იყო, მაგრამ რეაქციული თავადური ძალები ვერც მეფის სიძლიერეს და ვერც ქვეყანაში მშვიდობიანობას ვერ ეგუებოდნენ, ამიტომ 1772 წელს, რუსთა კორპუსის წასვლის შემდეგ, კვლავ შფოთი დაიწყო — მეფესა და მის ძმებს შორის მტრობა ჩამოვარდა.

იოსებ-კათალიკოსმა მეფეს მოსთხოვა ეკლესიის დამოუკიდებლობა და საერო ხელისუფლებაში წილის დაღება.

შეორე ძმამ არჩილმა მეფეს ციხეები და მამულები მოსთხოვა, მაგრამ მეფემ ორივე ძმას წამოყენებულ პრეტენზიაზე უარი უთხრა. არჩილმა კავშირი გააბა ახალციხის ფაშასა და კაცია დადიანთან და მათ თავისი სამსახური შესთავაზა სოლომონის წინააღმდეგ როდესაც ეს ამბავი მეფემ გაიგო, ორივე ძმას მკაცრად დაემუქრა, ერთგულებაზე დააფიცა და თავიანთ პრეტენზიებზე უარი ათქმევინა².

ახალციხის ფაშა ახალ სამზადისს შეუდგა აფხაზეთის მხრიდან იმერეთზე თავდასასხმელად, დადიანიც გადაიბირა, მაგრამ იმერთა მეფემ ადრე შეიტყო მათი სამზადისი, იმერეთის საზღვარზე დაბანაკებული მათი ჯარი დაამარცხა და ოდიშის სოფლები მოარბია, საპასუხოდ კაცია დადიანი რაქვას შეესია და მეფის კუთვნილი მამულები ააოხრა.

1772 წელს რუსეთ-თურქეთს შორის დროებითი ზავი დაიდო, ამის შესახებ ახალციხის ფაშამ დიდი ვეზირის ბრძანება მიიღო, რის შემდეგაც ახალციხის ფაშასა და ქართლ-კახეთის მეფეს შორის მშვიდობა ჩამოვარდა, მაგრამ იმერეთის მიმართ ფაშამ კვლავ ლეკთა მარბიელი რაზმი გაუშვა; სოლომონ მეფემ კვლავ დაამარცხა ლეკები და საზღვრებიდან გარეკა. ამის შემდეგ დროებითი ზავი იმერეთის სამეფოსთანაც შევიდა ძალაში.

რუსეთის საექსპედიციო კორპუსის წასვლის შემდეგ საქართველოს მეფეებმა დაივიწყეს ურთიერთ წყენინება (რაც ტოტლებენის მზაკვრული მოქმედების შედეგი იყო) და ძველი (1758 წლის) კავშირი განაახლეს.

¹ ისტორიული დოკუმენტები იმერეთის სამეფოსა და გურია-ოდიშის სამთავროებისა, თბ., 1958, გვ. 130., ზ. ცქიტიშვილი, დასახ. ნაშრ., გვ. 24.

² ა. ცაგარელი, გვ. 361—362 (რუს.).

1773 წლის 27 ივლისს სოფ. სანგარში სამხედრო კავშირის ხელშეკრულება¹ დადეს, ანუ როგორც მაშინ ამბობდნენ, „ერთობის წერილი დაწერეს“. ხელშეკრულება შვიდი მუხლისაგან შედგებოდა და ითვალისწინებდა შემდეგს.

პირველ მუხლში აღნიშნული იყო, რომ ურთიერთშორის თუ რაიმე წყენინება ახსოვდათ, საუკუნოდ უნდა დაევიწყებინათ.

მეორე მუხლი ითვალისწინებდა სამხედრო კავშირს, რომელიც მიმართული იყო ოსმალეთისა და ოსმალთა მომხრეების წინააღმდეგ.

მესამე მუხლი ითვალისწინებდა სამხედრო ურთიერთდახმარებას მტრის მიერ მათზე თავდასხმის შემთხვევაში. „გინიცობა არის რასაც დროს ჩვენს ქვეყანაში მტერი შემოვიდეს, ერთმანეთს მსწრაფლად ჯარით მივეხმარნეთ“.

მეხუთე მუხლით თითოეული მხარე ვალდებული იყო არ შეეფარებინა და მოკავშირისათვის გადაეცა მისგან ლტოლვილი თავადი, აზნაური თუ გლეხი².

შექვესე მუხლით თითოეული მხარე ვალდებული იყო, ლაშქრით დახმარებოდა მოკავშირეს, თუ მის ქვეყანაში შინაური შფოთი ატყდებოდა.

მეფეთა ეს ხელშეკრულება დიდი წარმატება იყო მას შემდეგ, რაც ტოტლებენმა (1770 წ.) უთანხმოება ჩამოაგდო მეფეთა შორის. ამ ხელშეკრულების ძალით ყველა შინაურ მტერს განდგომის სურვილი ეკარგებოდა და გზები ეჭრებოდა სამშობლოს საღალატოდ მავალს.

1773 წლის ოქტომბერში ხელშეკრულების ძალით საქართველოს მეფეებმა ერთად გაილაშქრეს ჯავახეთში.

იმერეთ-ქართლ-კახეთის 11-ათასიანი ლაშქარი გორში შეერთდა, ჯავახეთში გადავიდნენ, ახალქალაქის ციხე დაიკავეს; მეფეებთან შესაბამელად ახალციხის ფაშამ გამოსვლა ვერ გაბედა, ქართველთა ლაშქარმა მოარბია მტრის ტერიტორია, მან ყარსსა და არტაანამდე მიიღწია, მაგრამ აქ იმერთა მეფე სოლომონი ციხე-ციხელებით გახდა ავად და ლაშქარი უკან გამობრუნდა.

ამ ლაშქრობამ, ერთი მხრივ, გამოამჟღავნა თურქეთის დაუძლეობა, ხოლო მეორე მხრივ, ნათელი გახადა ქართველი მეფეების

¹ ა. ცაგარელი, ტ. II, I, გვ. 95 (რუს.).

² როგორც ცნობილია, ერეკლე მეფის წინააღმდეგ პაატა ბატონიშვილის შეთქმულებაში მონაწილეობდა ალექსანდრე დიმიტრის ძე ამილახვრის შვილი. შეთქმულების გამოამჟღავნების შემდეგ მეფემ იგი დააპატიმრა, მაგრამ 1771 წელს გაიქცა და იმერეთზე გავლით რუსეთში გააღწია. გაპარვაში მას დაეხმარა სოლომონ მეფე, რითაც შეთანხმება დაარღვია.

შესაძლებლობა შეთანხმებული, ერთობლივი მოქმედების შემთხვევაში.

ჯავახეთის ლაშქრობის საპასუხოდ ახალციხის ფაშამ სოლომონ მეფის წინააღმდეგ 1774 წლის იანვარში 4 000-იანი ლეკ-ოსმალთა ჯარი გამოგზავნა იმერეთის დასარბევად. იგი წინასწარ შეუთანხმდა სამეგრელოს მთავარს, რომელიც ფაშას დახმარებას შეპირდა. მოკავშირეებს ორი მხრიდან უნდა დაერთვათ იმერეთისათვის. ვახანის ციხის მფლობელმა აბაშიძეებმა მეფეს უღალატეს და ლეკ-ოსმალთა სპას გზა გაუხსნეს იმერეთისაკენ. ამავე დროს, დადიანის ჯარიც იმერეთის საზღვარს მოადგა. კრიტიკულ მდგომარეობაში ჩავარდნილმა სოლომონ მეფემ შველა სთხოვა თავის მოკავშირეს — ერეკლე მეფეს. ერეკლემ სწრაფად გაგზავნა სოლომონის დასახმარებლად 2000-კაციანი ქართლ-კახეთის ლაშქარი, ხოლო დადიანი აიძულა, თავისი მუხანათური დაპირება არ შეესრულებინა და უკან გაბრუნებულიყო, რაც ამ უკანასკნელმა შეასრულა.

დადიანის დახმარების იმედით ლეკ-ოსმალთა ლაშქარმა გავლო საბაშიო და ქვეყნის ტყვევნა-რბევით ქუთაისისაკენ გასწია. სოლომონმა, რაკი მის ჯარს ზურგიდან საფრთხე აღარ მოელოდა, გაბედულად შეუტია მტერს. ამასობაში ვახანის ციხეში ქართველი ტყვეები აჯანყდნენ, ოსმალებისათვის ცნობილი გახდა, რომ დადიანი ვეღარ მოეშველებოდათ და რომ ერეკლე მეფის ლაშქარი ზურგიდან უახლოვდებოდათ.

რკალში მოქცევის შიშით მტერმა უკან გაბრუნება გადაწყვიტა, სოლომონმა მტრის განზრახვა შეიტყო, რჩეულ მეთოფეთა რაზმი შეარჩია და ჩხერის ვიწროებში ჩაასაფრა, რადგან თურქთა ლაშქარი ამ გზას ვერ აცდებოდა. 6 თებერვალს მტერი ჩხერის ვიწროებს მიაღწა, მაგრამ იქ მეთოფეთა ძლიერ ცეცხლს წააწყდა; ამ დროს იმერეთის ლაშქარმა ზურგიდან ისე ძლიერად დაჰკრა ლეკ-ოსმალთა ლაშქარს, რომ მათი წინააღმდეგობა და წყობა ერთბაშად მოიშალა¹. მტერი სასტიკად დამარცხდა — 1000 მოკლული ბრძოლის ველზე დატოვა, 600 ტყვედ ჩავარდა², ხოლო ლტოლვილმა ლაშქარმა ჩხერიდან ვახანის ციხემდე კიდევ 1400 კაცი დაკარგა. 700-მა კაცმა ძლივს მიაღწია ახალციხემდე და ფაშას თავზარდამცემი ამბავი აუწყა.

სოლომონის ჯარის ზარალი იყო 50 მოკლული და 100 დაჭრილი³.

¹ საქართველოს ისტორია, დამხმარე სახელმძღვანელო, თბ. 1958, გვ. 359.

² საქართველოს ისტორია, ახალი საუკუნეების ეპოქა, თბ., 1922, გვ. 118.

³ იქვე.

დატყვევებული აღმოჩნდა ლეკთა ცნობილი ბელადი რაჯაბა — ქართლ-კახეთის მრავალგზის დამრბევი. სოლომონ მეფემ იგი საჩუქრად გაუგზავნა ერეკლე მეფეს.

ქართლ-კახეთის ლაშქარმა ბრძოლაში მონაწილეობა თუმცა ვერ მიიღო, მაგრამ მაინც დიდი იყო ერეკლეს დახმარება, რადგან მან ჩამოაშორა თურქებს მოკავშირე დადიანი და სოლომონ მეფეს ხელ-ფეხი გაუხსნა მტრის წინააღმდეგ სამოქმედოდ.

ჩხერის ბრძოლის შემდეგ სოლომონისათვის კიდევ უფრო ნათელი გახდა, რომ თურქეთის გარემოცვას თავს ვერ დააღწევდა, ამიტომ 1774 წლის ნოემბერში საგანგებო ელჩობა გაგზავნა ლ. კვინიხიძის მეთაურობით და ეკატერინე II-ს ოფიციალური თხოვნით მიმართა, რათა იმერეთი რუსეთს მფარველობა-პატრონობაში მიეღო¹.

მაგრამ ამ დროს რუსეთ-თურქეთის ომი დამთავრებული და ზავი დადებული იყო, ამიტომ რუსეთის საიმპერატორო ჯარმა იმერეთის მეფის მოთხოვნას მფარველობა-პატრონობაში აყვანის შესახებ უარით უპასუხა, რაკი იმერეთის სამეფოს საკითხი ამ ხელშეკრულებაში რამდენადმე აისახა და რუსეთის მთავრობას არ სურდა თურქეთთან ურთიერთობის კვლავ გამწვავება.

რუსეთ-თურქეთის ომი დამთავრდა და საზავო ხელშეკრულება დაიდო 1774 წლის 10 ივლისს ქუჩუკ-კაინარჯში. ამ ხელშეკრულების 23-ე მუხლი დასავლეთ საქართველოს ეხებოდა; სოლომონ პირველმა ამ ხელშეკრულების შინაარსი ეკატერინე II-ის მიერ გამოგზავნილი სიგელით შეიტყო, სადაც ნათქვამია:

„საქართველოსა და სამეგრელოში მდებარე ციხეები: ბაღდათი, ქუთაისი და შორაპანი, რომლებიც რუსეთის იარაღით არიან მოპოვებულნი, რუსეთისაგან იმათ კუთვნილად იქნება აღიარებული, ვისაც ისინი ძველთაგანვე ეკუთვნოდნენ; თუ ეს ქალაქები ნამდვილად ძველთაგანვე, ან დიდი ხანია, ბრწყინვალე პორტას ექვემდებარებოდნენ, მის საკუთრებად იქნებიან ცნობილნი; ამ ტრაქტატის გაცვლის შემდეგ, დათქმულ დროს, რუსეთის ჯარები გამოვლენ დასახელებული პროვინციებიდან — საქართველოდან და სამეგრელოდან. ბრწყინვალე პორტა, თავის მხრივ, ტრაქტატის პირველი არტიკულის შესაბამისად ვალდებულიებას იღებს ყველა იმათი სრული ამნისტია გამოაცხადოს, რომლებმაც მას ომის მიმდინარეობის დროს ამ მხარეში რაიმე შეურაცხყოფა მიაყენეს. ბრწყინვალე პორტა საზეიმოდ და სამუდამოდ ამბობს უარს ხარ-

¹ ა. ცაგარელი, ტ. II, გვ. 175 (რუს.); ზ. ცქიტიშვილი, დასახ. ნაშრ., გვ. 50—51.

კად ქაბუკებისა და ქალიშვილების მოთხოვნასა და ყოველგვარ სხვა გადასახადზე, პორტა ვალდებულებას კისრულობს არც ერთი მათგანი არ ჩათვალოს თავის ქვეშევრდომად, იმათ გარდა, რომლებიც მას ძველთაგანვე ეკუთვნოდნენ; ქართველებისა და მეგრელების მფლობელობაში მყოფ ყველა ციხეს და გამაგრებულ ადგილებს დატოვებს მათ გამგებლობასა და დაცვაში; ასევე არავითარი სახით არ შეაფიწროვებს ქართველთა სარწმუნოებას, მონასტრებსა და ეკლესიებს, არ შეუშლის ხელს ძველი ეკლესია-მონასტრების შეკეთებას და ახალთა აგებას, ჩილდირის ვალიმ და სხვა გამგებლობამ თუ ოფიცრებმა არ უნდა შეაფიწროვონ ისინი ისეთი მოთხოვნებით, რომლებსაც შეიძლება მოჰყვეს მათი მამულების დაკარგვა. მაგრამ რადგანაც დასახელებული ხალხები ბრწყინვალე პორტას ქვეშევრდომები არიან, ამიტომ რუსეთის იმპერია შემდეგში მათ საქმეებში სრულიად არ უნდა ჩაერიოს და არც შეაფიწროვოს ისინი“¹.

როგორც ამ 23-ე მუხლიდან ჩანს, 1768—1774 წლების რუსეთ-თურქეთის ომმა იმერეთის სამეფოს დიდი წარმატება მოუპოვა. თუმცა რუსეთი იმერეთის სამეფოს თურქეთის იმპერიის ვასალურ ტერიტორიად ცნობდა და მას უფლებას აძლევდა, ხელახლა დაეჭირა ქუთაისის, შორაპნისა და ბაღდათის ციხეები, მაგრამ თავის მხრივ, თურქეთი ხელს იღებდა ქრისტიანობის დევნაზე და აღარ მოითხოვდა ხარკს ნატურით, სხვადასხვა გადასახადებით და ახალგაზრდა ქალ-ვაჟების სახით. ამასთან ერთად, თურქეთს ეკრძალებოდა რუსეთის მხარეზე მეომარი სახელმწიფოების (იმერეთის, ოდიშის) დასჯა.

თურქეთის მთავრობამ ვერ გამოიყენა 23-ე მუხლში აღნიშნული თანხმობა ქუთაისის, შორაპნისა და ბაღდათის ციხეების დაკავების შესახებ, რადგან სოლომონ მეფის წინდახედულებით ეს ციხეები აღებისთანავე (1770 წ.) დაანგრეეს, ახლა კი, რუსეთთან ომში წელგატეხილ თურქეთს, რომელიც ამ ომმა მეორეხარისხოვან სახელმწიფოდ აქცია, აღარ შეეძლო ამ ციხეების ხელმეორედ აგება; ამავე დროს, ამის ნებას თვით იმერთა მეფე სოლომონ პირველი არ მისცემდა თურქებს უომრად, ხოლო ომის თავი თურქეთს აღარ ჰქონდა.

ეკატერინე II ვოლტერს სწერდა, რომ საქართველო წინ აღუდგა თურქებს და უარი უთხრა ხარკად მისცეს ლამაზი ქალიშვილები, რომლებითაც გავსებულია თურქეთის პარამხანებიო. ვოლტერმა დედოფალს უპასუხა, რომ საქართველოს შესახებ მა-

¹ საქართველოს ისტორიის ნარკვევები, ტ. IV, თბ., 1973, გვ. 662—663.

ნიფესტის გაცნობამ ევროპაში დიდი შთაბეჭდილება მოახდინა. როგორც ჩანს, მუსტაფა იძულებული იქნება, უარი თქვას ქართველი ლამაზმანების მფლობელობაზეო.

ამგვარად, 1768—1774 წლის ომმა სოლომონს თვალსაჩინო წარმატება არგუნა: ოსმალებმა ვერ გამოიყენეს ქუჩუკ-კაინარჯის ზავის 23-ე მუხლი, ვერ დაიმორჩილეს სოლომონ მეფე, ვერ დაიკავეს იმერეთის ციხეები. მეფემ სავსებით მოსპო ტყვეთა სყიდვა, მტკიცე ხელით ალაგმა თავადების აღვირახსნილობა... მეფე შესამჩნევად გაძლიერდა, მისი შიში და პატივისცემა გაუჩნდათ დადიანსა და გურიელსაც. ქვეყანა დამშვიდდა და სწრაფად მოშენება იწყო. ათიოდე წელაწადში მოსახლეობამ თვალსაჩინოდ მოიმატა¹.



საქართველო დიდი სიხარულით შეხვდა ქუჩუკ-კაინარჯის სამშვიდობო ტრაქტატს, რომელიც ადამიანებით ვაჭრობას კრძალავდა, მაგრამ ქუჩუკ-კაინარჯის ტრაქტატმა მოსალოდნელი ეფექტი ვერ გამოიღო, რადგან თურქეთის თითქმის მთელი წარჩინებული წოდება ხელს აფარებდა ტყვეებით ვაჭრობას. ბეგებსა და ფაშებს არ შეეძლოთ ასე ადვილად აეღოთ ხელი ადამიანთა შესყიდვაზე როგორც პარამხანების, ისე „იანიჩართა“ სამხედრო რაზმების შესავსებად, რაც საუკუნეთა განმავლობაში წარმოებდა.

ქუჩუკ-კაინარჯის ზავიდან ნაპიშკრების ბრძოლაზე

იმერეთიდან რუსეთის კორპუსის წასვლის შემდეგ სოლომონ მეფემ მტკიცედ გადაწყვიტა მთავრების — გურიელისა და დადიანის დამორჩილება. გურიელი, რომელიც ხან იმერეთის მეფეს უხარიდა ქედს, ხან ახალციხის ფაშას ეკედლებოდა, რამდენჯერმე დალაშქრა იმერთა მეფემ, კერძოდ, 1775 წელს ორჯერ შეესია გურიას და გურიელის წინააღმდეგობა გატეხა.

1776 წლის დასაწყისში სოლომონ მეფე გურიელის მოკავშირეობით ოდიშში შეიჭრა, რამდენიმე ციხე აიღო, თავისი ცოლისძმა კაცია დადიანი აიძულა, ქედი მოეხარა მეფის წინაშე, შერიგებოდა მას და მეფის უზენაესობა ეცნო. ოდიშის მთავარმა განკარ-

¹ ნ. ბერძენიშვილი, ივ. ჭავჭავაძის შვილი, ს. ჭანაშია, საქართველოს ისტორია, ნაწ. I, თბ., 1946, გვ. 396—397.

გულემა გასცა, რომ ოდიშის საეკლესიო ხელისუფალნი იმერეთის კათალიკოსს დამორჩილებოდნენ.

ოდიშისა და გურიის მთავრები ამის შემდეგ განუხრელად იღვნენ სოლომონის მხარეზე (თუმცა დროდადრო მათ კავშირს უთანხმოების ჩრდილიც ახლდა).

მთავრების დამორჩილებითა და ეკლესიის ერთიანობის აღდგენით იმერეთის სამეფო საგრძნობლად გაძლიერდა. მრავლდებოდა მეფის ლაშქარი, ძლიერდებოდა იმერეთი ეკონომიკურად, იქმნებოდა დასავლეთი საქართველოს სამეფო-სამთავროების პოლიტიკური კავშირი.

სოლომონ მეფის გაძლიერებამ რუსეთის მიერ შევიწროებულ იოსმალეთი აიძულა, შეეცვალა იმერეთის მეფესთან დიპლომატიური ურთიერთობის ხასიათი. 1776 წლის ოქტომბერში იმერეთის მეფეს იოსმალეთის ელჩობა ეახლა და ძვირფასი საჩუქრები მიართვა (რაც იშვიათი შემთხვევა იყო).

იმერეთის ფეოდალების გარკვეულმა ნაწილმა, რომელიც მეფის პოლიტიკით უკმაყოფილო იყო და მორიგ შემთხვევას უცდიდა სოლომონის წინააღმდეგ გამოსასვლელად, ამ შემთხვევით ისარგებლა, მათ თავის მხარეზე გადაიბირეს ტახტის ერთადერთი მემკვიდრე ალექსანდრე ბატონიშვილი და მეფეს განუყენეს.

შეთქმულების ორგანიზატორები იყვნენ სახლთუხუცესი დავით აბაშიძე და მოურავი თამაზა მესხი (რომელნიც სოლომონ მეფეს „ბერი წულუკიძის მოშურნეობისათვის უკუუღდგნენ“).

შეთქმულებაში მრავალი პირი ღებულობდა მონაწილეობას: მერაბ ნიქარაძე, ევგენი აბაშიძე, სვიმონ მიქელაძე, ალექსანდრე უფლისწულის მამიდაშვილები: ბეჟან, ვახუშტი, გიორგი, დოსითეოს და ქველი წერეთლები¹.

შეთქმულებას თანუგრძნობდა სოლომონ მეფის ბიძაშვილი დავით გიორგის ძე.

აჯანყებულებმა დაიკავეს ლომსიანთ-ხევი, ჩხერის ცოხე და მთელი ზემო მხარე, გარდა პაპუნა და ზურაბ წერეთლების მამულებისა, მეტი ტერიტორიის მიტაცება აჯანყებულებმა ვერ შეძლეს, რადგან მეციხოვნეები და ყმა-გლეხობა მეფის მხარეზე აღმოჩნდნენ და წინააღმდეგობა გაუწიეს მემამობხეთ.

სოლომონ მეფემ დიდი ლაშქარი შეკრიბა, ძირითადად წულუკიძეებისა და წერეთლების დახმარებით აჯანყებულები სასტიკად დაამარცხა და მკაცრადაც დასაჯა: დავით აბაშიძე სახლთუხუცესობიდან გადააყენა და ეს სახელო ზურაბ წერეთელს გადასცა, ჩა-

¹ შ. ბუჩანაძე, დასახ. ნაშრ., გვ. 131—132.

მოართვა ყმა-მამული, რომელიც თავის ერთგულ პირთ უბოძა და ღვეითი იმერეთიდან გააძევა. მერაბ ნიჟარაძეს მამულები ჩამოართვა და შემდეგ დააბრმავა. შეთქმული წერეთლები თავისი სამკვიდროდან აყარა, თავის ძეს — ალექსანდრეს გაპყარა ვეგენი აბაშიძის ასული, რომელიც მას შეთქმულებმა შერთეს და მის ნაცვლად ბერი წულუკიძის ასული დარეჯანი მისცა ცოლად, ღვეით გიორგის ძე იმერეთიდან გააძევა¹.

* * *

ერეკლე მეფე კვლავ განაგრძობდა თურქეთის საზღვრების რბევას. სულთანმა ქერიმ-ხანს სთხოვა, შეეჩერებინა იგი. მან თავის მხრივ ერეკლეს მიმართა. ვინაიდან ქართველმა მეფეებმა რუსეთისაგან მრავალგზისი თხოვნის მიუხედავად, ვერც რეალური დახმარება, ვერც მტკიცე შეპირება ვერ მიიღეს, ერეკლე მეფემ გადაწყვიტა, ქერიმ-ხანის თხოვნისათვისაც ანგარიში გაეწია და თურქეთის იმპერიასთან კეთილმეზობლური ურთიერთობა დაემყარებინა. ამ მიზნით, 1777—1778 წლებში ქართლ-კახეთის მეფემ თავისი ელჩი გაგზავნა სტამბოლში, რომელიც დიდი პატივით მიიღეს.

1775 წელს თურქეთსა და სპარსეთს შორის უთანხმოება ჩამოვარდა — ოსმალეთმა ჯარების შეგროვება დაიწყო სპარსეთის წინააღმდეგ სამხედრო მოქმედების დასაწყებად. პორტას ამასთანავე აინტერესებდა აზერბაიჯანის ხანების განწყობილება და აპირებდა მათ გადმობირებას თავის მხარეზე. ამით ისარგებლა ერეკლემ და პორტას ერთგულება აღუთქვა. — პირდებოდა აზერბაიჯანის ხანების გადმობირებას ოსმალეთის მხარეზე სპარსეთთან ომის დროს და თავის მხრივ, ითხოვდა, რომ სპარსეთთან დადებულ ხელშეკრულებაში მოხსენიებული ყოფილიყო საქართველოს სამუდამო განთავისუფლება სპარსეთზე დამოკიდებულებისაგან. ერეკლე ამასთანავე პირობას იძლეოდა რუსეთთან ყოველგვარი კავშირის გაწყვეტის შესახებ და თანხმდებოდა მძევლად რამდენიმე წარჩინებული გვარეულობის წარმომადგენლის გაგზავნაზე ახალციხეში².

¹ შ. ბურჯანაძე, დასახ. ნაშრ., გვ. 131—132.

² ს. კაკაბაძე, საქართველოს ისტორია, ახალი საუკუნეების ეპოქა, თბ., 1922, გვ. 124; შ. ბურჯანაძე აღნიშნავს, 1777—1778 წწ. საზავო მოლაპარაკება საიდუმლოდ მიმდინარეობდა ისე, რომ მისი შინაარსი ახლაც ცნობილ არაა სათანადო მასალების გამოუქვეყნებლობის გამო. (იხ. შ. ბურჯანაძე, იმერეთის სამეფო 1768—1784 წლებში, წიგნში — ხელნაწერთა ინსტიტუტის მოამბე, ტ. III, თბ., 1961, გვ. 133.

ასეთი შეთანხმებით ერეკლე მეფეს იმედი ჰქონდა, რომ ქართლ-კახეთის საერთო მდგომარეობას განამტკიცებდა.

თურქეთის მთავრობა დიდი სიამოვნებით შეხვდა ერეკლეს ასეთ შუამდგომლობას. სულთანის სახელით მას ორჯერ გაეგზავნა დიდი საჩუქრები: 12 ათასი ოქრო, საპატიო ქურქი და ოქროთი აღკაზმული ცხენი¹ (1778 წ.).

სოლომონ მეფეს ერეკლეს ეს დიპლომატიური ნაბიჯი თავის სამტროდ მოეჩვენა, რამაც გადამტერებულ მეფეებს შორის ურთიერთობა უფრო მეტად გაამწვავა. მას შემდეგ, რაც ერეკლესა და ოსმალეთს შორის თანხმობა დამყარდა, სოლომონი ოსმალეთთან შერიგებას არ აპირებდა, რადგან აგრესორი იმერეთის დამონებაზე ხელს არ იღებდა, ერეკლე კი, პირიქით, საქართველოს გაძლიერებას თურქეთთან კავშირით აპირებდა.

იმერთა მეფე 1781 წლის 1 სექტემბერს რუსეთის იმპერატორს ატყობინებდა, რომ ერეკლე მეფემ „თავისი თავი და თავისი სამფლობელო თურქებს ჩააბარა, მათ სთხოვს დახმარებას და მთელ თავის იმედს თურქებზე ამყარებს, იგი ცდილობს... მტრობა და ვნება მოგვყაყენოს ჩვენ“².

ერეკლე მეფის მიერ თურქეთის იმპერიასთან კავშირის დამყარების საპასუხოდ იმერთა მეფემ სოლომონ პირველმა გადაწყვიტა კავშირის დამყარება სპარსეთთან. მეფის ასეთი დიპლომატიური ნაბიჯის გადადგმა განაპირობა აგრეთვე იმან, რომ 1778 წელს თურქეთი ანატოლიაში ჯარს უყრიდა თავს და სოლომონ მეფეს ეჩვენებოდა, თითქოს იგი იმერეთის სამეფოზე ამზადებდა თავდასხმას, ამ პერიოდში რუსეთი თურქების გაღიზიანებისა და 1774 წლის ქუჩუკ-კაინარჯის ზავის დარღვევის შიშით იმერეთის სამეფოსთან ოფიციალურ ურთიერთობას თავს არიდებდა. ასეთ პირობებში იმერეთის სამეფოს რომ დამოუკიდებლობა შეენარჩუნებინა, სხვა გზა უნდა ეძებნა, ეს გზა კი ირანისაკენ მიდიოდა.

თურქეთ-რუსეთის ომში ოსმალთა დამარცხებით ისარგებლა ირანმა — ქერიმ-ხანმა 1775 წელს ომი დაიწყო დაუძლურებული თურქეთის წინააღმდეგ — წაართვა თურქეთს დიდი ეკონომიკური ცენტრი — ქალაქი ბასრა და საფრთხე შეუქმნა ბაღდადს.

იმავე დროს, ყირიმის საკითხის გამო რუსეთ-თურქეთის ურთიერთობა კვლავ დაიძაბა და ისევ ახალი ომი იყო მოსალოდნელი. ასეთ პირობებში ბასრას ინციდენტი ირან-თურქეთის დიდ ომში არ გადაზრდილა, მაგრამ 1775—1779 წლებში ამ ორ აგრესორს შორის საომარი ვითარება ძალაში რჩებოდა.

¹ ს. კ ა კ ა ბ ა ძ ე, დასახ. ნაშრომი, გვ. 124.

² სიგელ-გუჯარები, ტ. II, გამ. II, გვ. 12 (რუს.).

ამეთ რთულ პირობებში იმერთა მეფემ სცადა თურქეთის საგარეო სიძნელეებით ესარგებლა და თავის მოკავშირედ პორტას წინააღმდეგ სპარსეთი გამოეყენებინა. ამ მიზნით, 1778 წლის 10 აგვისტოს იმერთა მეფემ სოლომონ პირველმა რუსეთის გზით ირანში ელჩად გაგზავნა გამოჩენილი პოეტი და დიპლომატი ბესარიონ გაბაშვილი (ბესიკი). მას სამი კაცი გააყოლა: მამუკა ლებელი, გიორგი დავიდოვი (დავითაშვილი) და გიორგი პაპუნოვი (პაპუნაშვილი).

მამუკა ლებელი ასტრახანამდე უნდა გაჰყოლოდა ელჩს და იქიდან მობრუნებულს ასტრახანის გუბერნატორის პასუხი ეცნობებინა მეფისათვის, ხოლო ორნი ირანში უნდა ხლებოდნენ ელჩს.

სოლომონ მეფე ასტრახანის გუბერნატორს სწერდა: ეს ჩვენი ელჩი გეახლებათ, ჩვენს ამბავსაც ეს მოგახსენებთ და გთხოვთ, ვილანამდე მშვიდობით ამგზავროთ წყლით თუ ხმელეთის გზით იქნებაო¹.

ასტრახანის გუბერნატორმა ბესიკი თავისი ორი მხლებლით, უსაფრთხო გზით, გემით გაგზავნა სპარსეთში². მაგრამ იმერეთის ელჩმა ვერ მოასწრო ქერიმ-ხანის ნახვა, რადგან ირანის მბრძანებელი 1779 წლის 22 მარტს გარდაიცვალა და ქვეყანა ტრადიციულმა არეულობამ მოიცვა.

ხელმოცარული ელჩი, რომლის მიზანს, როგორც საფიქრებელია, შეადგენდა სპარსეთის ჩაბმა თურქეთის წინააღმდეგ ომში, რის შედეგადაც იმერეთი დროებით მაინც დააღწევდა თავს თურქეთის მძლავრობას, ქერიმ-ხანის სიკვდილის გამო, უშედეგოდ ისევ იმერეთში დაბრუნდა 1779 წელს.

ქართულ სამეცნიერო ლიტერატურაში გაბატონებულია აზრი, რომ იმერთა მეფემ სოლომონ პირველმა ბესიკი სპარსეთში გაგზავნა იქ მყოფი ვახტანგ VI-ის შვილიშვილის ალექსანდრე ბაქარის ძის ჩამოსაყვანად, რომელიც ქართლის სამეფო ტახტზე პრეტენზიას აცხადებდა და ამრიგად, ერეკლე მეორეს უპირისპირდებოდა.

ჯერ კიდევ 1855 წელს ზ. კიკინაძე წერდა: „1775 წლებში ერეკლესა და სოლომონ მეფეში ერთობ ასტყინდა შფოთები, ორნი ერთმანეთის დამხობას ცდილობდნენ: ამიტომ იმერეთის მეფემ 1779 წელს ბესარიონ გაბაშვილი სპარსეთში გაგზავნა, დასაბარებლად ალექსანდრე ბატონიშვილისა, რომელიც იყო შვილისშვილი

¹ ვ. მაჭარაძე, ბესიკი დიპლომატიურ სარბიელზე, თბ., 1968, გვ. 12—14.

² იქვე, გვ. 17.

ვახტანგ მეფისა. ის ეძებდა სამეფო ტახტსა და ამიტომ ფინს სთხოვდა დახმარებას და შემწეობას. ვახტანგის დინასტია ქართლის იყო, ირაკლისა — კახეთის და ეს ორი სამეფო დინასტია კარგა ხანს იბრძოდნენ თავიანთი თავის ასამაღლებლად, სოლომონმა აცნობა ალექსანდრეს და აღუთქვა, რომ შემწეობას მოგცემ და გაგამეფებო. დაიმედებული ბესარიონი და ალექსანდრე იმერეთში წამოვიდნენ, მაგრამ ქართველთ არ ინდომეს ალექსანდრე¹.

აკად. აღ. ბარამიძე წერს: „1779 წელს მასთან შეხიზნულ ბესარიონ გაბაშვილს სოლომონი საიდუმლოდ სპარსეთში გზავნის ალექსანდრე ბატონიშვილთან. გადმოიყვანს მას იმერეთში და აჩანყების საქმეს მეთაურობს“². უფრო მოგვიანებით იგი წერს: „იმერეთში გადასვლის უმაღლესი პოეტი აქტიურად ჩაება საწინააღმდეგო შეთქმულებაში. 1778 წელს ის გაგზავნეს სპარსეთში, სადაც მამინ იმყოფებოდა შეთქმულების ერთი მეთაურთაგანი, ალექსანდრე ბაქარის ძე ბაგრატიონი, ბესიკმა ალექსანდრე იმერეთში ჩამოიყვანა. მისი ხელშეწყობით ალექსანდრე შეუდგა ერეკლეს დასამხობად აჩანყების ორგანიზაციას“³.

პოეტი-აკადემიკოსი გ. ლეონიძე წერდა: „1778 წელს სოლომონ იმერთა მეფე მას (ბესიკს) გზავნის სპარსეთში ქერიმ-ხანთან ალექსანდრე ბატონიშვილის ჩამოსაყვანად“⁴.

ს. ცაიშვილი წერს: „მალე ბესიკს სოლომონის დავალებით სერიოზული დიპლომატიური მისიის შესრულება დაეკისრა. მას სპარსეთიდან საიდუმლოდ უნდა ჩამოეყვანა ვახტანგ მეექვსის შვილიშვილი ალექსანდრე ბაქარის ძე. სოლომონს იგი ერეკლეს საწინააღმდეგო შეთქმულებისათვის სჭირდებოდა... დაახლოებით ნოემბერში ან დეკემბრის პირველი რიცხვებიდან ბესიკი შირაზში ჩადის და მოლაპარაკებას აწარმოებს ალექსანდრე ბაქარის ძესთან... ბესიკმა პირნათლად შეასრულა სოლომონის დავალება და 1779 წლის ზაფხულისათვის იგი ალექსანდრესთან ერთად უკვე იმერეთში იმყოფება“⁵.

ზოგიერთი მკვლევარი აღნიშნავენ ირანში ბესიკის გაგზავნის ფაქტს, მაგრამ არ ასახელებს, რა მიზნით გაიგზავნა იგი. მაგალი-

¹ ბესიკი, ლექსნი, თქმულნი ბესარიონ გაბაშვილისაგან 1749—1791, ზ. კვიციანიძის გამოცემა, თბ., 1885, გვ. 9—10.

² ბესიკი, თხზულებათა სრული კრებული, აღ. ბარამიძისა და ვ. თოფურიას რედაქციით, თბ., 1932, მესამე გამოცემა, გვ. 36.

³ ბესიკი, თხზულებანი, მეექვსე გამოცემა, აღ. ბარამიძის და ვ. თოფურიას რედაქციით, თბ., 1962, გვ. 9.

⁴ გ. ლეონიძე, ბესიკი, ლიტ-ის მატრიანე, № 3—4, 1942, გვ. 431.

⁵ ს. ცაიშვილი, ბესიკი, თბ., 1962, გვ. 68—69.

თად, ს. გორგაძე წერდა: „1779 წელს სოლომონ მეფე ბესიკს გზავნის სპარსეთის შაჰთან განსაკუთრებული მინდობილობით“¹; ასევე აკად. კ. კეკელიძე აღნიშნავს, რომ „1779 წელს სოლომონი ბესიკს საიდუმლოდ სპარსეთს გზავნის“².

ამრიგად, დასახელებული მკვლევარნი ერთხმად იზიარებენ, რომ სოლომონ მეფის მიერ ბესიკის მივლინებას სპარსეთში მიზნად ჰქონდა ალექსანდრე ბაქარის ძის ჩამოყვანა და მისი დაპირისპირება ერეკლე მეორესთან.

ეს ერთსულოვანი მოსაზრება ემყარება ორ ცნობას, რომელთაგან ერთი მ. ბროსესთანაა დაცული, — აქ ნათქვამია, რომ 1779 წელს სოლომონ იმერთა მეფემ სპარსეთში ქერიმ-ხანთან გაგზავნა ბესარიონ გაბაშვილი, ზაქარია გაბაშვილის შვილი, რომელიც გაძევებული იყო ანტონ კათალიკოსის მიზეზით და ჩამოაყვანიდა ალექსანდრე ბაქარის ძე, რათა იგი ერეკლესათვის დიეპირისპირებინა. მეორე ცნობა მ. ჯანაშვილმა გამოაქვეყნა 1905 წელს, რომელიც დავით ბატონიშვილისეულადაა აღიარებული. აქ ნათქვამია „...ვინაიდან იყო სამღვრავი მეფისა შორის ირაკლისა და მეფისა შორის იმერთა სოლომონისა. და ამასთან სოლომან წარგზავნა სპარსეთს გაბაშვილი ბესარიონ, ზაქარია მოძღვრისა, რომელი ესე იმყოფებოდა ექსორიაქმნილი მამითურთ თავისით იმერთს, ანტონის გამო კათალიკოზისა. მოაყვანიდა ძე ბაქარისა და ძის ძე მეფისა ვახტანგისა ალექსანდრე შირაზით, რომელიც, ესე ალექსანდრე წარსული რუსეთიდან, იყოფოდა ქარიმ-ხანისა წინაშე და ლამობდა დაპყრობას ქართლისას, და ამის გამო აბირა მეფემ სოლომან და აღქუთქმიდა შეწვევნასა და დაპყრობასა ქართლისასა. ხოლო ვინაიდან ქართველთა არა თავს იდეს მეფობა მისი და მტკიცედ ჰსდგნენ ერთგულებასა ზედა მეფის ირაკლისას, ამად ალექსანდრე უღონო წარვიდა რაჭის გზით და გარდავლო დიგორი“³.

როგორც გაირკვა, მ. ბროსესეული ცნობის წყაროა მეორე ცნობა (ე. წ. დავით ბატონიშვილისეული); მასასადაშე, მკვლევართა განკარგულებაში რჩება ეს ერთი ცნობა⁴.

¹ ბესიკი, (ბესარიონ გაბაშვილი), ს. გორგაძის რედაქციით, თბ., 1912, გვ. XII.

² კ. კეკელიძე, ქართული ლიტერატურის ისტორია, ტ. II, თბ., 1941, გვ. 614.

³ მასალები საქართველოს ისტორიისათვის, შეკრებილი ბატონიშვილის დავით გორგის ძისა და მისი ძმებისა, 1744—1840 წწ. თბ., 1905, გვ. 25—26.

⁴ ვ. შაქარაძე, ბესიკი დიპლომატიურ სარბიელზე, თბ., 1968, გვ. 26—30.

დავით ბატონიშვილი, როდესაც ეს ამბები ხდებოდა 10—12 წლისა იყო და ამიტომ თანამედროვედ ვერ ჩაითვლება, ამიტომ, ვ. მაჭარაძის აზრით, ბატონიშვილის წყარო ზეპირი გადმოცემიდან უნდა მომდინარეობდეს¹.

თვით ბესიკი თავის მოგონებაში წერს, რომ იგი სოლომონ მეფემ გაგზავნა „ერანად-შირაზს ქალაქად ქარიშხან ზანდისა თანა“². გაგზავნის მიზანს პოეტი არ ასახელებს. იმერთა მეფე სოლომონი ასტრახანის გუბერნატორს ორ სათხოვარს ევედრება: 1) ნება დაგვრთეთ რუსეთის იმპერატორს კაცი გავუგზავნოთო³ და პასუხი სასწრაფოდ ჩემივე კაცით მაცნობეო და 2) ჩვენი „კნიაზი“ ბესარიონი ჩვენს ამბავსაც მოგახსენებს და გილანშიც უშიშრად გაამგზავრეთო.

ბესიკის ელჩობის შესახებ 1961 წლის 17 ნოემბრის გაზეთ „სტალინელის“ ფურცლებზე დავით ჭანელიძემ გამოაქვეყნა სტატია „ახალი საარქივო საბუთები ბესიკის შესახებ“.

სხვა მკვლევართა მსგავსად, დ. ჭანელიძესაც ჰგონია, რომ ბესიკი სპარსეთში აღექსანდრე ბაქარის ძის ჩამოსაყვანად წავიდა, მაგრამ იქვე, პირველად აღნიშნავს, რომ ბესიკი მარტო აღექსანდრეს ჩამოსაყვანად არ უნდა წასულიყო სპარსეთში⁴.

დ. ჭანელიძის სტატიიდან აღსანიშნავია ის, რომ სოლომონ მეფის წერილი ასტრახანის გუბერნატორს 1778 წლის 6 სექტემბერს მიუღია. გუბერნატორი ორივეს წერილსა და თარგმანს — საიმპერატორო კარზე გზავნის და თან წერილს ურთავს, სადაც აღნიშნულია, რომ „ამა წლის 6 სექტემბერს შადრინის სტანიცაში, სადაც ჩემი ადგილსამყოფელია, მივიღე იმერეთის მეფის სოლომონის წერილი — იგი გვილოცავს მისი საიმპერატორო უმაღლესობის კეთილმოსურნე ხელმწიფის დიდი მთავრის აღექსანდრე პავლეს ძის დაბადებას და ითხოვს ნებართვას, რომ რუსეთის კარზე საგანგებო შიკრიკი გაგზავნოს და მისი მეოხებით

¹ ვ. მაჭარაძე, ბესიკი დიპლომატიურ სარბიელზე, თბ., 1968, გვ. 33.

² ბესიკი, თხზულებანი, 1932, გვ. 104.

³ თუმცა იმპერატორის 1769 წლის 19 სექტემბრის რუსკრიპტში ნათქვამი იყო, რომ ქართველთა ელჩები დაუყოვნებლივ გაეგზავნათ პეტერბურგში სამეფო კარზე, რუსეთ-ოსმალეთის ომის დამთავრების და ქუჩუკ-კაინარჯის ზავის შემდეგ საიმპერიო მთავრობა უკვე ერიდებოდა ქართველი ელჩების ჩასვლას დედაქალაქში და მათ ზანგრძლივად აჩერებდა ჩრდილო კავკასიისა თუ ასტრახანში. მაგალითად, 1775 წელს იქ ჩასული იმერეთის ელჩი დ. კვინიხიძე დიდხანს ალოდინეს და წლის ბოლოს მიუღებლად უკანვე გამოისტუმრეს.

⁴ დ. ჭანელიძე, ახალი საარქივო საბუთები ბესიკის შესახებ, გაზ. „სტალინელი“, ქუთაისი, 1961, 17 ნოემბერი.

ეს მილოცვა თვითონ ეკატერინეს მოახსენოს. იმასაც გვეაჩება, რომ გილანის ხან ჰელდაისთან წყლით თუ ხმელეთის გზით გავუშვათ მისი თავადი ბესარიონ გაბაონოვი, რომელმაც აქ ის მოსალოცი წერილი ჩამოიტანა. ამ წერილის დედანსაც და თარგმანსაც აქვე ვურთავ, რათა საგარეო საქმეთა სახელმწიფო კოლეგიას საშუალება მივცეთ, კარგად აწონ-დაწონოს ამ ქალღღების შინაარსი. გვევდრებით, მაცნობოთ, თუ რა ვუპასუხო იმერეთის მეფეს რუსეთში საგანგებო შიკრიკის გაგზავნის საკითხზე. მე თავაზიანი ფორმით უკვე მივწერე სოლომონს, რომ ამ საქმეს თქვენი ბრძანებულება სჭირდება, რაც შეეხება სპარსეთს მისი თავადის ბესარიონის გაგზავნას, ხმელეთით მის იქით გაგზავნას ვერ ვებედავ, ვინაიდან ხმები დაირხა, ქერიმ-ხანი მიიცივალა და გილანი აირ-დაირიოა; ამას ზედ დაერთო მტაცებელი მთიელი მოსახლეობის საომარი თადარიგიც საქართველოს წინააღმდეგ. ამიტომ ის თავადი გაბაონოვი ასტრახანის საგუბერნიო კანცელარიას გავუგზავნე და ბრძანება გავეცი — სპარსეთისაკენ გააყოლონ ვაჭართა ხომალდს... ხსენებულმა თავადმა იმერეთის მეფის ბრძანების ამბავი ზეპირი ჩამომიტანა — ანატოლიელი ჰაჯი-ალი-ფაშა ჯარებს აგროვებს და განზრახვა უნდა ჰქონდეს, 80 ათასი მხედარი რუსეთის წინააღმდეგ გამოიყვანოს; მეორე მხრივ, ხმა გავარდნილა, თითქოს, ანატოლიის ეს ლაშქარი იმერეთის ასაკლებად დარაზმულიყოს, ამიტომ სოლომონი გვთხოვს, გადავარჩინოთ მისი სამეფო ოსმალთა შემოსევისაგან; შევლას ამ შემთხვევაში იგი, უწინარეს ყოვლისა ჩვენგან მოელის, ვინაიდან, როგორც მის უსტარშია ნათქვამი, ამ რამდენიმე წლის წინათ იმერეთი ოსმალების უღლისაგან სწორედ რუსეთმა გამოიხსნა. ასეთ ვითარებაში, როდესაც იმერეთის მეფე ჩვენს საფარქვეშ დადგომას ეპირება, უცილობელია, ხელთ მეპყრას თქვენი ბრძანებულება შესახებ იმისა, თუ რა პასუხი გავცე სოლომონს, მან რომ თავშესაფარი გვთხოვოს“¹.

პირველ სათხოვარს მეფე ასე განმარტავს: გავიგეთ დიდი თავადის ალექსანდრე პავლეს მის დაბადება (დაიბადა 1777 წლის დეკემბერში), ამიტომ თუ ნებას დაგვრთავს რუსეთის სამეფო კარი, ჩვენც მივულოცავთ ამ დიდ სიხარულსო. „ამ კნიაზ ვისარიონთან ღებელი კაცი, მამუკა გაიხლებათ. ამისის ხელის წიგნი ადრე გვიბოძეთ“² — წერს მეფე.

მეორე თხოვნას თავის წერილში მეფე გვერდს უვლის და არ აღნიშნავს, თუ რატომ გზავნის თავის ელჩს გილანში: „ალა-

¹ დ. ქანელიძე, დასახ. სტატია.

² ვ. მაჭარაძე, დასახ. ნაშრომი, გვ. 35.

იად-ხანს (გილანის ხანს) ზოგიერთი რამ ვსთხოვე და წიგნი მაგ ჩვენს კნიაზს გამოვატანე იმასთან და, რაც მითხოვნია, ვიცი, გამომიგზავნის; და გვედრები სიყვარულისა და მეგობრობისათვის, წყლით იყოს თუ ხმელით, გაისტუმრეთ და მშვიდობით იქამდინ მივიდეს და როდესაც რომ იქილამ მანდ გიახლებათ, აქეთაც კეთილი გზის წყალობა უყოთ, რომ რაც წამოილოს აქ, ჩემამდინ მოაწვიენოთ, დიდად მმადლობელი და მოსამსახურე მამყოფეთ“¹.

რუსეთის საარქივო მასალებზე დაყრდნობით პროფ. ვ. მაჰარაძე ასეთ დასკვნებს აკეთებს: 1) 1778 წლის ზაფხულში თურქეთის მთავრობამ დაიწყო ჯარების თავმოყრა ანატოლიაში; საფრთხე შეიქნა მათი იმერეთში შეჭრისა ურჩი ვასალის (იმერეთის მეფის) დასასჯელად, რათა აღდგენილიყო თურქეთის ბატონობა იმერეთის სამეფოზე; 2) იმერეთის მეფემ, მოსალოდნელი საფრთხის თავიდან აცილებისა და ქვეყნის გადარჩენის მიზნით, საგანგებო ელჩი გაგზავნა ირანში, რათა ესარგებლა ირან-თურქეთის წინააღმდეგობით და იმერეთისათვის დარტყმა თავიდან აეცილებინა; 3) რაკი იმერეთის მეფემ იცოდა, რომ რუსეთი 1775 წლიდან იმერეთის ელჩის მიღებას თავს არიდებდა და ასტრახანის გუბერნატორს განკარგულება ჰქონდა გაცემული, სამეფო კარის დაუკითხავად იმერეთის ელჩი პეტერბურგში არ გაეგზავნა, ირანში მიმავალ ელჩს თერგის ხაზამდე გაატანა მამუკა ლეხელი, რათა ალექსანდრე პავლეს ძის დაბადების მილოცვის საბაბით გამოეთხოვა საგანგებო ელჩობის პეტერბურგში გაგზავნის ნებართვა; 4) რაკი იმერეთის მეფეს ზავის პირობებში საეჭვოდ მიაჩნდა რუსეთის გამოსვლა თურქეთის წინააღმდეგ იმერეთის დასაცავად, ბესიკს² დაავალა, სიტყვიერი მოლაპარაკება გაემართა ასტრახანის გუბერნატორთან და მოესინჯა ნიადაგი, როგორი იქნებოდა რუსეთის მთავრობის პოზიცია თურქების იმერეთში შეჭრის შემთხვევაში; 5) ასტრახანის გუბერნატორმა იმერეთის მეფის წინადადებებზე პირდაპირი პასუხის გაცემას თავი აარიდა და რუსეთის მთავრობისაგან მოითხოვა განკარგულება.

მიუხედავად იმისა, რომ ირანის მთავრობასთან იმერეთის ელჩების მოლაპარაკების მასალები არა გვაქვს, აღნიშნავს ვ. მაჰარაძე², იმერეთის ელჩის ამოცანა უნდა ყოფილიყო თურქეთის წინააღმდეგ მებრძოლ ირანთან კავშირის დამყარება. მაგრამ ბესიკის შირაზში ჩასვლის შემდეგ, ქერიმ-ხანი მალე გარდაიცვალა. ირანი არეულობამ მოიცვა, მისმა ჯარებმა შეწყვიტეს საომარი მოქმე-

¹ ვ. მაჰარაძე, დასახ. ნაშრომი, გვ. 36.

² იქვე, გვ. 45—46.

დება ბასრა-ბაღდადის მიმართულებით და თურქეთის წინააღმდეგ ირანის გამოყენების საკითხი მოიხსნა. ხელცარიელი იმერეთის ელჩი თურქეთის სამფლობელოების გზით სამშობლოში დაბრუნდა.

ირანში დაწყებული შინაბრძოლებით ისარგებლა ალექსანდრე ბაქარის ძემ, რომელიც ადრე ქერიმ-ხანს შინაპატიმრობაში ჰყავდა და ირანიდან გამოპარული, 1779 წლის შემოდგომაზე იმერეთს მოვიდა; სოლომონ მეფემ შეიფარა ლტოლვილი ბატონიშვილი¹, რადგანაც ერეკლე-სოლომონის ურთიერთობა იქამად საკმაოდ გამწვავებული იყო და ურთიერთშორის განაწყენებული მეფეები ერთმანეთის მტრებს ფართოდ უღებდნენ კარებს. მამის წინააღმდეგ ამბოხებული სოლომონ მეფის შვილი ალექსანდრე ბატონიშვილი თავისი მომხრეებით მეფე ერეკლე მეორის კარს აფარებდა თავს²; თავის მხრივ, სოლომონმა შეიფარა აჯანყებული ქსნის ერისთავის შვილი ელიზბარა. სოლომონის კარზე პოვა თავშესაფარი ზაქარია გაბაშვილმა თავისი ოჯახით, რომელიც იძულებული გახდა ქართლი დაეტოვებინა ანტონ კათალიკოსის აღდგენის შემდეგ. ქართლის ტახტის პრეტენდენტი, ვახტანგ VI-ის შვილიშვილი ალექსანდრე ბაქარის ძე პეტრე მესამის მკვლელობის შემდეგ ეკატერინე II-მ პეტერბურგიდან გააძევა, რადგან მან ზედმეტი ერთგულება გამოიჩინა მოკლული იმპერატორისადმი. ერთ ხანს იგი შირაზში ცხოვრობდა ქერიმ-ხანისაგან დახმარების მოიმედებამგვრამ ირანის მბრძანებლის სიკვდილის შემდეგ იმედგადაწურული ალექსანდრე სასწრაფოდ წამოვიდა საქართველოში, იმერეთში გაჩნდა და ქართლში აჯანყების თადარიგს შეუდგა — 1779 წელს მან ფარული კავშირი გააბა ერეკლეს პოლიტიკით უკმაყოფილო თავადებთან.

ალექსანდრეს გამოჩენამ იმერეთში ქართლის უკმაყოფილო თავადებს ჩამქრალი იმედები გაუღვივა — ისინი ელოდნენ ქართლში ბატონიშვილის გადასვლას, რომ აჯანყებულიყვნენ.

ერეკლე მეფე ერეკენის ციხეს იყო შემომდგარი იქაური გამდგარი ხანის დასამორჩილებლად; როდესაც მან წერილი მიიღო ქართლიდან — „მოვიდა ბაქარ-მეფის შვილი ალექსანდრე იმერეთს

¹ ვ. მაქარაძე, დასახ. ნაშრომი, გვ. 45—46.

² ალექსანდრე ბატონიშვილს დიდხანს აღარ უტოცხლია, 1780 წელს „მოკვდა ძე სოლომონ მეფისა ალექსანდრე და დაშთა მეფე უძეოდ და დაფლეს გელათს. ვინაითგან ალექსანდრე იყო დისწული კაცია დადიანისა, ამისთვის წარვიდა დადიანი შესაფერითა დიდებითა და მივიდა გელათს და იტრა დისწული თვისი ალექსანდრე; თუმცა დიდი შური იყო მეფესა და დადიანს შუა, მაგრამ სიყვარულისათვის დისწულისა არა რიდა მისელა იმერეთსა შინა და მშვიდობითა მოიქცა“ (ნ. დადიანი, ქართველთ ცხოვრება, თბ., 1962, გვ. 179—180).

და მეცადინეობს, რათა ვიეთნიმე ქართველნი შეიტყუოს და გარდაჰბიროს¹. ერეკლე მეფემ სასწრაფოდ მიაშურა ქართლს და მოწინააღმდეგე თავადებს ენერგიული მოქმედებით აჯანყების იმედი მოუსპო. მაგრამ იმერთა მეფის დახმარებით ალექსანდრე არ ცხრებოდა და აჯანყებისათვის ძალებს იკრებდა.

ახალციხის ფაშამ მეთამბოხეს მხარი არ დაუჭირა², თვით ქართლ-კახეთში აღრინდელი შეთქმულების დამარცხების და შეთქმულთა დასჯის შემდეგ მეფის წინააღმდეგ გამოსვლას ვერაინ ბედავდა. წარუმატებელი ცდების შემდეგ ალექსანდრე ბატონიშვილი 1782 წლის დასაწყისში რაჭის გზით დაღესტანში გადავიდა, რათა იქიდან ეცადა ბედი. მას თან ახლდა „გეორგიანული ისტორიის“ ავტორი ალექსანდრე ამილახვარი, რომელსაც პაატა ბატონიშვილის შეთქმულებაში მონაწილეობისათვის ცხვირი ჰქონდა მოჭრილი.

დარუბანდის მფლობელმა ფატალი-ხანმა და ტარკის შამხალმა ალექსანდრეს დახმარება აღუთქვეს, მაგრამ ერეკლე მეფის თხოვნით რუსეთის მთავრობამ ფატალი-ხანს სტუმრების გაცემა მოსთხოვა და თან არჩევანი შესთავაზა: ან დარუბანდის მახლობლად მყოფი რუსის ჯარის ზარბაზნების ყუმბარები ეგემნა, ან ხუთასი ჩერვონეცი და ოქროს სათუთუნე მიეღო საჩუქრად და სტუმრები გაეცა... ფატალი ხანმა მეორე ამჯობინა.

ალექსანდრე ბაქარის ძე რუსებმა სმოლენსკის ციხეში ჩასვეს და იგი იქვე გარდაიცვალა, ხოლო ალექსანდრე ამილახვარი ვიბორგის ციხიდან ცხრა წლის პატიმრობის შემდეგ გათავისუფლდა.

მიუხედავად ყოველივე ამისა, ამერ-იმერის მეფეები მაინც დაზავდნენ: სოლომონ მეფე 1782 წელს ქართლში გადავიდა და სოფელ ალში ერეკლე მეფეს შეურიგდა.

* * *

დასავლეთ საქართველოში ბრძოლები არ ცხრებოდა. თურქეთმა, რომელიც მტრულად შეხვდა იმერეთის მეფისადმი დადიანის დაქვემდებარებას, მოინდომა აფხაზეთის გზით სამეგრელოში შეჭრა და იმერეთისაგან ოდიშის მოწყვეტა. ამავ დროს, თვით აფხაზეთის მთავარიც უარყოფითად იყო განწყობილი ოდიშის მიმართ და მისთვის ტერიტორიის ჩამოჭრას ცდილობდა. ასეთ ვითარება-

¹ ო. ბერბეულიძე, ცხოვრება ირაკლ მეფისა, წიგნში „ქართლის ცხოვრება“, II, ჩუბინოვის გამოცემა, სანკტ-პეტერბურგი, 1854, გვ. 497.

² შ. ბურჯანაძე, დასახ. ნაშრ., გვ. 133.

ში 1779 წლის მიწურულში თურქეთი შეუთანხმდა აფხაზებს, შეკრიბა დიდძალი ჯარი: ჯიქები; ალანები, ჩერქეზები, ყუმურდოელები, ყირიმელი თათრები, ყივჩაყები (ბალყარელები) და თვით აფხაზები „ცხენოსანი და ქვეითი... ჯაბახანით, თოფხანით, ზარბაზნებით“¹ და მოულოდნელად შემოესია სამეგრელოს. ბესიკის ცნობით მოლაშქრენი ექვს ენაზე ლაპარაკობდნენ.

მიუხედავად იმისა, რომ ამ დროს კაცია დადიანსა და სოლომონ მეფეს შორის თანხმობა არ სუფევდა, ოდიშის მთავარმა დახმარებისათვის მაინც სოლომონ პირველს მიმართა. წერილის მიღებისთანავე იმერთა მეფემ სწრაფად შეკრიბა ლაშქარი და გურიელის ჯარის თანხლებით ოდიშისაკენ გაემართა.

იმერეთის და გურია-ოდიშის ერთიანი ლაშქარი ზუგდიდიდან გავიდა მტრის დასახვედრად. მტერმა ენგური გადმოლახა და რუხის მახლობლად დაბანაკდა.

ბრძოლა, რომელიც ისტორიაში შევიდა რუხის ბრძოლის სახელწოდებით, მოხდა 1779 წლის მიწურულში რუხის ციხის მახლობლად.

ბრძოლაში ბრწყინვალე გამარჯვება მოიპოვა ქართველთა ლაშქარმა, მტერი მოისრა, ნაწილი ტყვედ ჩავარდა და მხოლოდ მცირეოდენმა დააღწია თავი სიკვდილსა და ტყვეობას.

რუხის ბრძოლამ ერთხელ კიდევ დაადასტურა, თუ რა ძალა შესწევდათ ქართველებს, როცა გაერთიანებულნი გამოდიოდნენ მტრის წინააღმდეგ.

რუხის ბრძოლამ მეგობრული ურთიერთობა დაამყარა მეფე-მთავრებს შორის, დადიანმა აღიარა იმერთა მეფის უზენაესობა, რის შედეგადაც კიდევ მეტად განმტკიცდა შინაური მშვიდობა.

შინაური პირობების გაუმჯობესების გამო ქვეყანამ მოლონიერება იწყო; ტყვეთა სყიდვის მოსპობით, ეკლესიის საქმეთა მოწესრიგებით, თურქების გაძევებით, ხარკისაგან განთავისუფლებით და ფეოდალთა ურთიერთბრძოლის შენელებით ქვეყანამ ამოისუნთქა, დატარილებულმა მხარემ სწრაფად იწყო მომრავლება — თუ 1769 წელს იმერეთის სამეფოში დაახლოებით 12 ათასი კომლი ითვლებოდა, 1782 წლის აღრიცხვით მოსახლეობამ უკვე 18980 კომლს მიაღწია. ქუთაისში 500 კომლი მაჰმადიანი ცხოვრობდა, 1770 წელს მეფის ხელში ქალაქის გადასვლის შემდეგ მაჰმადიანები განიდევნენ და თუმცა იქ მხოლოდ 50 კომლი ქართული მოსახლეობა დარჩა, მაგრამ მოკლე დროში ქალაქში მცხოვრებთა რიცხვმა 200 კომლს მიაღწია. გაუმჯობესდა შინაური მმართველობა —

¹ ბესიკი, თხზულებანი, თბ., 1962, გვ. 124.

სასამართლო საქმეების მოწესრიგების მიზნით დაარსდა მდივანბე-
ვის ინსტიტუტი, ვახტანგის კანონებში შეტანილი იქნა ცვლილე-
ბები და დამატებანი ადგილობრივ ჩვეულებათა მიხედვით. გაი-
ზარდა სახლთუხუცესის მნიშვნელობა და ამ თანამდებობაზე დაი-
ნიშნა ზურაბ წერეთელი.

• • •

წერეთლები საქართველოს ისტორიაში ჯერ კიდევ მე-16 საუ-
კუნის ნახევრიდან გამოჩნდნენ და აქედან მოკიდებული, მთელი
ოთხი საუკუნის მანძილზე მისი ავანსცენიდან არ ჩამოსულან. ისი-
ნი დიდი წარმატებით მოღვაწეობდნენ და აქტიურად მონაწილე-
ობდნენ ჩვენი ქვეყნის ცხოვრებაში; არ არის არცერთი დარგი, სა-
დაც წერეთლებს თავი არ გამოეჩინოთ: პოლიტიკა, მწერლობა,
მეცნიერება. მე-18 საუკუნის წერეთლები, როგორც ჭკვიანი პო-
ლიტიკოსები, კარგად ერკვეოდნენ ვითარებაში და დარწმუნებულ-
ნი იყვნენ, რომ რუსეთთან მჭიდრო კავშირის გარეშე საქართვე-
ლოს არსებობას დიდი საფრთხე ელოდა, ამიტომ ისინი მთელის
არსებით ჩაებნენ საქართველო-რუსეთის დაახლოების საქმეში და
ამ მიმართულებით ერთ-ერთი დასაყრდნობი გახდნენ.

როგორც ირკვევა, ეს გვარი აღმოსავლურქართულია. ცნობი-
ლია მათი პირვანდელი ადგილსამყოფელიც — ზემო ქართლში,
მდინარე ტანას შენაკადთა ხეობაში სოფლები დიდი და მცირე
წერეთი, აქვეა თრიალეთის მთის ერთ-ერთი ქედი — წერეთის,
ქედად წოდებული¹.

მე-16 საუკუნის შუა ხანებიდან ისინი უკვე ორ შტოდ ჩანან:
ქართლისა და იმერეთის; სავარაუდებელია, რომ იმერეთში მათი
გადასვლა გაცილებით უფრო ადრე მოხდა. ვახუშტი აბაშიძის
„შეწირულების წიგნში“, რომელიც გელათში ინახებოდა (მე-16
საუკუნე), მოხსენებულა „საწერეთლოთა საყდრის ყმანი“². ქარ-
თლელი წერეთლების წარმომადგენელი ზაალი მოხსენებულია
როსტომ მეფის (1632—1658) ერთ-ერთი სიგელში (1648 წლისა),
ხოლო დავით და გიორგი წერეთლები 1715 წლის რუისის სამწყ-
სოს დავთარში ჩანან. ასევე მოხსენებული ჰყავს იოსებ თბილელს
თავის პოემა „დიდმოურავიანში“ ქველი წერეთელი (მე-17 საუკ-
პირველი ნახევარი)³.

¹ ლ. ასათიანი, ცხოვრება აკაკი წერეთლისა, 1965, გვ. 11.

² იქვე, გვ. 13.

³ იოსებ თბილელი, დიდმოურავიანი, 1939, გვ. 39.

მე-17 საუკუნის დოკუმენტებში წერეთლების ხსენება, როგორც დიდი ფეოდალებისა და სამეფო კარის უმაღლესი მოხელეების (სარდალი, სახლთუხუცესი, მანდატურთუხუცესი და სხვ.). ხშირია გარდა იოსებ თბილელისა, წერეთლებს იხსენიებენ თავის თხზულებებში გამოჩენილი ქართველი მწერლები: ფეშანგი¹, არჩილი², ბესიკი³.

წერეთლების რეზიდენცია — საჩხერე, როძელიც აღმოსავლეთ და დასავლეთ საქართველოს შემაერთებელ გზაზე მდებარეობდა, ვახუშტი ბაგრატიონის თხზულებაში „აღწერა სამეფოსა საქართველოსა“ ნახსენებია როგორც კარგად დასახლებული მრავალეროვანი დაბა („მოსახლენი არიან იმერნი, სომეხნი, ურიანი“)⁴.

იმერეთის მეფის სოლომონ I დიდის მეფობაში, როცა საბოლოოდ დაითრგუნა აბაშიძეთა გვარის ძლიერება, მეფის კარზე და საერთოდ იმერეთის სამეფოში დიდი გავლენა მოიპოვა წერეთლების საგვარეულომ. ეს უკანასკნელი მთელი მეთვრამეტე საუკუნის მანძილზე, აგრეთვე სამეფოს გაუქმების შემდგომ პერიოდში აქტიურ როლს ასრულებდა დასავლეთი საქართველოს პოლიტიკურ ისტორიაში. ამასთან, წერეთლების საგვარეულოს გამოჩენილ წარმომადგენელთა დიდი უმეტესობა, როგორც ზემოთ ითქვა, სწორად ეზრკვეოდა რუსეთ-საქართველოს ურთიერთობის საკითხებში; სწორად სახაედა საკუთარი ქვეყნის კეთილდღეობისათვის საჭირო და აუცილებელ ღონისძიებებს, რეალურად და სალად აფასებდა ქართული სამეფო-სამთავროების ორიენტაციის საკითხს და თანმიმდევრულად მოქმედებდა მის შესაბამისად.

• • •

1781—1782 წლებში პოლიტიკური ვითარება ამიერკავკასიაში კვლავ დაიძაბა. შავ ზღვაზე რუსეთ-თურქეთის მეტოქეობა თანდათან გაღრმავდა და გაფართოვდა. ამ პირობებში თურქეთისათვის საარსებო მნიშვნელობა მიეცა დასავლეთ საქართველოში გაბატონებას და შავი ზღვის სანაპირო ზოლის მტკიცედ ჩაგდებას ხელში, აღნიშნულ წლებში თურქეთის მთავრობამ ფოთში გამოგზავნა კაფუჯი-ბაში, რომელსაც სასაზღვრო ადგილებში სიმაგრეები უნდა აეგო და შემდეგ იმერეთი დაეპყრო.

სოლომონ მეფე მხნედ ებრძოდა აგრესორს და მას განზრახ-

¹ ფეშანგი, შანავეზიანი, 1935, გვ. 54.

² არჩილი, თხზ., 1937, ტ. 2. გვ. 55.

³ ბესიკი, თხზულებანი, 1932, გვ. 35.

⁴ ვახუშტი, აღწერა სამეფოსა საქართველოსა, 1941, გვ. 156.

ვის შესრულების საშუალებას არ აძლევდა. 1781 წლის ზაფხულში იმერთა მეფემ აპარაზეც კი გაილაშქრა, მაგრამ წარმატებას ვერ მიაღწია, რადგან იმერეთიდან აპარაში შექრა ბუნებრივი ზღუდეების გამო ძნელი აღმოჩნდა.

ამ მძიმე ბრძოლებში იმერთა მეფე თავის მოკავშირეს ისევ რუსეთში ხელაძედა და მას დახმარებას სთხოვდა. სოლომონ პირველმა ორჯერ — 1781 და 1782 წლებში კვლავ მიმართა რუსეთის მთავრობას თხოვნით, რათა თურქეთის აგრესიისაგან დაეცვა. პირველ თხოვნას დუმილით უპასუხეს, ხოლო მეორე თხოვნის შემდეგ 1782 წლის დეკემბერში რუსეთის მთავრობამ თავის ელჩს კონსტანტინოპოლში — ბულგაკოვს მითითება მისცა, რუსეთის სახელით გამოსარჩლებოდა საქართველოს მეფეებს¹.

1779 წელს სოლომონ მეფემ რომის პაპს პიუს VI-ს მიმართა თხოვნით, რათა თურქების წინააღმდეგ ბრძოლაში დახმარებოდა, მაგრამ პაპისაგან მხოლოდ ლოცვა-კურთხევა მიიღო.

ქუჩუკ-კაინარჯის ხელშეკრულების შემდეგ რუსეთი ქართველი მეფეების თხოვნას უყურადღებოდ ტოვებდა, ამიტომ ერეკლე მეფემ 1781 და 1782 წლებში ორჯერ სთხოვა ავსტრიის იმპერატორ იოსებ მეორეს ფულადი სესხი ლაშქრის გასადიდებლად, მაგრამ უარი მიიღო². ერეკლე მეფე იძულებული გახდა, ისევ თურქეთისათვის მიემართა.

ერეკლეს ელჩის გამოჩენის შესახებ ხონთქარის კარზე რუსეთის სტამბოლელმა ელჩმა პეტერბურგს აცნობა და თან შეატყობინა, რომ ხელთანმა მას წყალობის თვალით შეხედა და რომ ერეკლესა და მას შორის სამეგობრო და სამოკავშირო ტრაქტატი დაიდო.

რუსეთის მთავრობა შეაშფოთა ერეკლეს ამ ნაბიჯმა და მან ენერგიულად სცადა საქმის გამოსწორება: რუსეთის დიპლომატი ორმხრივი იერიშით შეეცადა, ერეკლესათვის გეზი შეეცვლევინებია. ერთი მხრივ, მან ალექსანდრე ამილახვარი ამოქმედა, ალექსანდრე ბაქარის ძე ფათალი-ხანთან მივიდა, თვით ფათალი-ხანი აქტიურად ამოქმედდა ერეკლეს წინააღმდეგ, მას საშუალება მიეცა იმიერკავკასიაში ჯარის დაქირავებისა — ყველა ეს რუსეთის მხრივ მიღებული კონტრზომები ჩანს.³ მეორე მხრივ, რუსეთმა

¹ ა. ცაგარელი, II, გვ. 24, 29, 30.

² ივ. ჭავჭავაძის შვილი, დამოკიდებულება რუსეთსა და საქართველოს შორის XVIII საუკუნეში, გვ. 23.

³ ნ. ბერძენიშვილი დასახ. ნაშრომი, გვ. 168—171.

უხვი დაპირებებით მრავლად ამოქმედა თავისი აგენტები ერეკლეს კარზე. („ბროლიაგა“ რაინეგსი ცი) და ქართლ-კახეთის მეფემ მიიღო ისტორიული გადაწყვეტილება — 1783 წლის 24 ივლისს ჩრდილო კავკასიის რუსულ ციხესიმაგრე გეორგიევსკში დაიდო რუსეთ-საქართველოს ტრაქტატი.

1783 წლის გეორგიევსკის ტრაქტატის ძალით ქართლ-კახეთის სამეფო რუსეთის მფარველობაში შევიდა. ამ აქტით რუსეთი აშკარად ჩაერია ამიერკავკასიის საქმეებში და თურქეთსა და ირანს დაუპირისპირდა. საქართველოს მაჰმადიანური სამყაროსაგან ხსნის იმედის სხივი აუკიაფდა, მაგრამ, სანამ ეს იმედი ხორცს შეისხამდა, უფრო მეტად გამწვავდა საქართველო-ირანისა და საქართველო-თურქეთის ურთიერთობა.

1782 წელს იმერეთის მეფის სოლომონ პირველის თხოვნა რუსეთისადმი იმერეთის სამეფოს მფარველობაში აყვანის შესახებ უყურადღებოდ აღარ დარჩენილა. ეკატერინე II-ის მითითებით 1782 წლის დეკემბერში გრაფმა ა. ბეზბოროდკომ თავად პოტიომკინს აცნობა რუსეთის მთავრობის განზრახვა, დადებულყოფილ ხელშეკრულება რუსეთ-საქართველოს შორის. 1783 წლის დასაწყისში ხელშეკრულების პროექტი მზად იყო, იგი პოტიომკინს გადაეცა. საქართველოს სამეფოებთან მფარველობითი ტრაქტატის გასაფორმებლად¹.

ამ დროისათვის საქართველოში იგზავნება რაინეგსი. მას მოაქვს ორდენი სოლომონ მეფინათვის და დახმარების შეპირება²; თან ევალება, საქართველოს მეფეები ამდენი მომდურების შემდეგ შეარიგოს³ და იმოქმედოს მფარველობითი ტრაქტატის დასადგებად.

1782 წლის დამლევსა და 1783 წლის დასაწყისში რუსეთის სამეფო კარზე მარტო ქართლ-კახეთის სამეფოს საკითხი არ იდგა — შეად დაწერილი ტრაქტატის ტექსტი იმერეთის სამეფოზე მფარველობის გაფორმებასაც შეიცავდა. იქ იმერეთის სამეფო და მისი მეფე სოლომონ I ისეა მოხსენებული, როგორც ქართლ-კახეთის სამეფო და მისი მეფე ერეკლე II⁴.

ივ. ჭავჭავაძის ამის გამო წერს: „თავდაპირველად ისე იყო გადაწყვეტილი, რომ 1783 წ. ხელშეკრულება უნდა მთელ დასავ-

¹ ა. ცაგარელი, ტ. II, გვ. 30—41 (რუს.).

² ი. ცინცაძე, 1783 წ. მფარველობითი ტრაქტატი, თბ., 1960, გვ. 269—270.

³ ბუტკოვი, მასალები კავკასიის ახალი ისტორიისათვის 1792 წლიდან 1892 წლამდე, 1869, ტ. II, გვ. 118 (რუს.). შემდეგში — ბუტკოვი, მასალები.

⁴ ვ. მაქარაძე, ბესიკი დიპლომატიურ სარბიელზე, თბ., 1968, გვ. 62.

ლეთ-აღმოსავლეთ საქართველოსთან ყოფილიყო დადებული და ამ ხელშეკრულების შავად დაწერილი დედანი სწორედ ასეც არის შედგენილი: ყველგან იქ ერეკლე მეფის სახელის გვერდით და ქართლ-კახეთის სამეფოს მოხსენიების დროს დამატებულია „იმერეთის მეფე სოლომონ“ ან „იმერეთის სამეფო“¹. ამასვე ადასტურებენ ა. ცაგარელი, ი. ცინცაძე, ვ. მაჭარაძე².

ყურადღებას იპყრობს ელგუჯა ხინთიბიძის მიერ ესპანეთის სახელმწიფო არქივში მიკვლეული წერილი, რომელიც გამოქვეყნდა 1985 წლის 28 აპრილის გაზეთ „კომუნისტში“. ესპანეთის საგარეო საქმეთა მინისტრს თავისი წარმომადგენელი ბერლინიდან ატყობინებს რუსეთ-საქართველოს ხელშეკრულების ამბავს, რომ „საქართველოს მთავარმა (მეფემ) ერაკლიმ რომელსაც რუსეთის იმპერატორიცამ გაუგზავნა სკიპტრა და გვირგვინი, მიიღო ეს საპატივცემლო ნიშნები, გამოაცხადა რა თავი ვასალად და დამოკიდებულად რუსეთის სამეფოზე, საქართველოს მთავარმა (მეფემ) სოლომონმა რომელსაც ასევე გაეგზავნა საპატივცემლო ნიშნები, მათზე უარი თქვა და ამჯობინა შეენარჩუნებინა თავისი დამოუკიდებელი მბრძანებლობა“.

„ბერლინი 16 სექტემბერი 1783 წლისა“

როგორც ე. ხინთიბიძე აღნიშნავს, წერილი მრავალმხრივ არის საინტერესო. იგი დაწერილია გეორგიევსკში შეთანხმების ხელმოწერიდან (1783 წ. 24 ივლისი) თვე-ნახევრის შემდეგ და ამდენად ინახავს ერთ-ერთ უძველეს ვერსიას იმის თაობაზე, თუ როგორ გავრცელდა ამ შეთანხმების ამბავი დასავლეთ ევროპის სახელმწიფოთა მმართველ წრეებში.

1783 წლის დასაწყისში იმერეთის სამეფოს შესვლა რუსეთის მფარველობაში დღის წესრიგში იდგა, მაგრამ 1783 წლის 8 აპრილს ყირიმის სახანოს შეერთებამ რუსეთთან მთლად შეცვალა პოლიტიკური სიტუაცია ქუჩუკ-კაინარჯის ზავის შემდეგ, „იმერეთის სამეფოს რუსეთის მფარველობაში მიღება თურქეთის აშკარა გამოწვევა იქნებოდა. მართალია, ყირიმის სახანოს შეერთებითაც ირღვეოდა 1774 წლის კაინარჯის ტრაქტატი და აინალი-კავაკის 1779 წლის კონვენცია, რომლითაც ყირიმის სახანო დამოუკიდებელ ქვეყნად იყო აღიარებული, მაგრამ ყირიმის შეერთება მაინც არ ნიშნავდა, რომ რუსეთმა ტრაქტატით კუთვნილი ქვეყა-

¹ ი. ვ. ქ ა ვ ა ხ ი შ ვ ი ლ ი, დამოკიდებულება რუსეთსა და საქართველოს შორის XVIII საუკუნეში, თბ., 1919 წ., გვ. 27.

² ა. ც ა გ ა რ ე ლ ი, ტ. II, გვ. 32 (რუს.). ი. ც ი ნ ც ა ძ ე, დასახ. ნაშრ., გვ. 112, ვ. მაჭარაძე, დასახ. ნაშრ., გვ. 62.

ნა წაართვა თურქეთს. ამ შემთხვევაში რუსეთი დამოუკიდებელ ქვეყანას იერთებდა, რომლის დამოუკიდებლობა ადრე რუსეთმა და თურქეთმა ერთობლივად სცნეს. იქ მხოლოდ თურქეთის პრესტიჟი ილაზხებოდა. აქ კი იმერეთის მფარველობაში მიღება თურქეთისათვის თითქმის ქვეშევრდომის წართმევა იქნებოდა¹.

ასეთ მდგომარეობაში რუსეთმა თავი შეიკავა 1783 წლის ტრაქტატში იმერეთის სამეფოს ჩართვისაგან, მაგრამ ეს იმას არ ნიშნავდა, რომ რუსეთი უარს აცხადებდა იმერეთის სამეფოს შეერთებაზე. იგი ხელსაყრელ პოლიტიკურ ვითარებას უცდიდა თავისი მიზნის განსახორციელებლად.

ასეთი პოლიტიკური სირთულე გადაეღობა წინ იმერეთის მეფე სოლომონ პირველს. რუსეთის მთავრობაც ცდილობდა, ჭერჭერობით მოპოვებულთ დაკმაყოფილებულიყო და თურქეთის მთავრობაც აღარ გაეღიზიანებინა.

ამრიგად, იმერეთის სამეფოს რუსეთის მფარველობაში მიღების საკითხი, თუმცა 1782—1783 წლის დასაწყისში დღის წესრიგში იდგა, იგი 1783—1784 წლებში მოიხსნა.

იმერეთის მეფე ითხოვდა ისეთივე მფარველობითი ტრაქტატის დადებას იმერეთთან, როგორც გაფორმდა ქართლ-კახეთის სამეფოსთან. მაგრამ ამაო იყო მეფის თხოვნა, ამ მოლაპარაკების დროს ბუნდოვნად თავი იჩინა რუსეთის მთავრობის განზრახვამ, მოესპო იმერეთის სამეფო, რაც შემდგომმა მოვლენებმა დაადასტურა².

უან შარდენის ცნობით, აჭარის მოსახლეობა XVII საუკუნის 70-იან წლებში ჭერ კიდევ ქრისტიანული იყო, ხოლო XVIII საუკუნეში სრულიად გამაჰმადიანდა. XVIII საუკუნის მეორე ნახევარში მაჰმადიანობა გურიის სამთავროს საზღვრებშიც შემოიჭრა.

XVIII საუკუნის დასაწყისში ქვემო გურიაში ბათუმისა და ჩაქვის მხარეების დაკავებისთანავე თურქებმა თავდასხმები დაიწყეს ქობულეთზეც, სადაც თავდგირიძეთა საგვარეულო პირველობდა³. XVIII ს. 60—70-იან წლებში, ციხისძირი და ქობულეთი მათ განკარგულებაში გადავიდა. მამუკა თავდგირიძე (სოლომონ ძეფის სიძე) მამია IV გურიელს შეეკედლა. თავადაზნაურობის ნაწილმა მაჰმადიანობა მიიღო, რომ ყმა-გლეხები შეენარჩუნებინა. გლეხობამ მიატოვა თავისი მამა-პაპეული საცხოვრებელი და შუა

¹ ვ. მაქარაძე. დასახ. ნაშრომი, გვ. 69—70.

² უფრო ვრცლად იხ. მ. რეხვიაშვილი, იმერეთი XVIII ს-ში, თბ., 1982, გვ. 157—166.

³ დაწვრილებით იხ. ქ. ჩხატარაიშვილი, გურიის სამთავროს პოლიტიკური ისტორიიდან. „მაკნე“, № 4, 1964.

გურიაში გადასახლდა. ქვემო გურიის მოსახლეობას გადაშენების საფრთხე დაემუქრა, მაგრამ შეიქმნა მეტად თავისებური მდგომარეობა: „გლეხები, რომლებსაც არ სურდათ მამაქმედობის მიღება, გურიის ქრისტიანულ ნაწილში გადადიოდნენ ან თურქებთან ბრძოლას ეწირებოდნენ, მაგრამ რადგანაც მამაქმედობის მიღება გლეხს ბატონყმობის უღლისაგან ათავისუფლებდა, ამიტომ გურიის სამთავროდან და იმერეთიდან მრავალი გლეხი ბატონისაგან თავის დაღწევის მიზნით ქვემო გურიაში გადასახლდა. გურიის ქრისტიანულ და მამაქმედანურ ნაწილთა შორის მოსახლეობის, უმთავრესად გლეხობის, ასეთი ორმხრივი მოძრაობა შემდეგშია — XIX საუკუნის 80-იან წლებამდე არ შეწყვეტილა“¹.

ქვემო გურია თურქეთმა ტრაპიზონის სანჯაყს შეუერთა, მაგრამ მის სრულ მორჩილებაში მოყვანა მინც ვერ შეძლო და XIX საუკუნის 40-იან წლებამდე „უბატონო“ თემის მდგომარეობაში იყო, რომელსაც ადგილობრივი გამამაქმედანებული ქართველები განაგებდნენ².

როდესაც მამია IV-ის მეუღლე, სოლომონ მეფის და როდამი გარდაიცვალა, მეფესა და გურიელს შორის უთანხმოება ჩამოვარდა: სოლომონმა გურიის სამთავროს შემოერთება გადაწყვიტა, მან ჯერ თავისი დისშვილი, მამიას მემკვიდრე 14 წლის დავითი გაიწვია სამეფო კარზე, ვითომც აღსაზრდელად, მაგრამ დააბრმავა და გურიაში შექრა გადაწყვიტა; გურულები მას აღუდგნენ, რადგან იმერეთის მეფის ბატონობას ადგილობრივი მმართველობა ამჯობინეს. ამით ისარგებლა გიორგი V-მ — 1776 წელს თავისი ძმა გადააყენა და თვითონ გაგურიელდა³.

გიორგი გურიელი ცნობილი იყო როგორც „თურქოფილი“, მაგრამ ამ პერიოდში იმერეთის სამეფო ძლიერების ხანაში იმყოფებოდა, ეს გავლენას ახდენდა გურიის სამთავროზეც და ამიტომ გიორგი გურიელი იძულებული იყო, ორმაგი პოლიტიკა ეწარმოებინა, ერთგული ყოფილიყო იმერეთის მეფისა და ამავე დროს, კავშირი ჰქონოდა ახალციხის ფაშასთან, რომ თურქთა რისხვა აეცდინა⁴. მეფე-მთავარს შორის ფარული ბრძოლა მიმდინარეობდა, იმერთა მეფემ მას საჯავახოს მხარე ჩამოაცილა და მისი

¹ ქ. ჩხატარაიშვილი, დასახელებული ნაშრომი, გვ. 130.

² იქვე.

³ იქვე. გვ. 132.

⁴ იქვე. გვ. 133.

მფლობელი გურიის ერისთავები თავის „ხელმწიფედ“ სოლომონს აღიარებდნენ¹. ყოველივე ამის შემდეგ გიორგი იძულებული გახდა, იმერეთის მეფეს მორიგებობდა. მან სოლომონ მეფის დისწული, ზურაბ წერეთლის ასული თავის მემკვიდრე სოლომონს შერთო და ამით მოყვრული კავშირი დაამყარა იმერეთის სამეფოსთან, რის შემდეგ გურიაშიც მშვიდობა დამყარდა. ამის შედეგი იყო, რომ გურიის ლაშქარი იმერეთის ლაშქართან ერთად იბრძოდა აფხაზეთის წინააღმდეგ რუხის ბრძოლაში.

იმერეთის მეფესთან გურიის კავშირი არ მოსწონდა ოსმალეთის მთავრობას, მან ახალციხის ფაშას უბრძანა გურიაზე თავდასხმა და მისი აკლება.

1784 წელს თურქეთის დავალებით დიდი თავდასხმა მოაწყო გურიაზე აჭარის ბეგმა, გამაჰმადიანებულმა ქართველმა აბდულ ხიშშიაშვილმა, მაგრამ მისი ლაშქარი დაამარცხეს გურულებმა და თვით აბდულ-ალაყ ბრძოლის ველზე დაიღუპა.

სოლომონმა, როგორც დასავლეთ საქართველოს მბრძანებელმა, გურიაში აჭარელთა შემოსევის გამო ახალციხის ფაშასთან იჩივლა, მაგრამ ფაშამ მეფეს უპასუხა: შართალია, აჭარა ჩვენს საგამგებლოში შემოდის, მაგრამ აჭარლებზე, რომლებიც მიუვალ მთიან ადგილებში ცხოვრობენ, მე ჩემს უფლებებს ვერ ვახორციელებ და მათი დასჯაც არ შემიძლიაო.

აჭარელთა შემოსევის საპასუხოდ 1784 წლის გაზაფხულზე სოლომონ პირველმა, როგორც დასავლეთის უზენაესმა მბრძანებელმა, ქვემო გურიის გასათავისუფლებლად გაილაშქრა. მეფე ფიქრობდა, რომ ქვემო გურიის მოსახლეობა მხარს დაუჭერდა თურქების წინააღმდეგ ბრძოლაში.

ეს ლაშქრობა მეფემ დიდი სიფრთხილით ჩაატარა, რადგან გიორგი გურიელი, როგორც „თურქოფილი“, საიმედოდ არ ეჩვენებოდა. მეფე წინასწარ მოელაპარაკა მას და ბათუმისაკენ ლაშქრობაზე დაითანხმა, ხოლო მისი მემკვიდრე სიმონი ერთგულების ნიშნად ქუთაისში მიიპატიჟა და მძევლად დაიტოვა, ხოლო გურიელის მეორე ვაჟი ვახტანგი გურიის ლაშქარს უსარდლა.

ამ ლაშქრობას თანამედროვე ასე აღწერს: „...იმერეთის დიდმა მეფემ სოლომონმა სიმონ გურიელი მიიწვია ქუთაისში მოსალაპარაკებლად.

ერთ დღეს მეფე, ვითომ სანადიროდ, წაბრძანდა ვარციხეს და გურიელი ქუთაისში დატოვა. თურმე მეფემ საიდუმლოდ, გასცა ბრძანება და ქარით ჩამოვიდა გურიაში. გურიელი და ქობულეთე-

¹ ქ. ჩხატარაიშვილი, დასახელებული ნაშრომი, გვ. 134.

ლი ჯარი თან გაყოლა, უეცრად გადაიარა ციხისძირი, დალაშქრა ჩაქვი და ბათუმის სოფლები, მრავალი ტყვეები წამოიყვანა და ალაფით გამობრუნდა უკან. ვინც რომ დარჩნენ ჩაქველები და ბათუმელები; ციხისძირის ვადმოსარებს, ვიწრო გზაზე ტყეში, სახელდობრ ნაჭიშკრევს, დახვდნენ მეფის ჯარს, აუტეხეს დიდი სროლა, დაამარცხეს მეფე, ალაფი და ტყვეები დაატოვებინეს¹.

მიუხედავად იმისა, რომ ამ ლაშქრობას იმერთა მეფე დიდი სიფრთხილით ამზადებდა, საიდუმლო მაინც გაცემულ იქნა. ოდიშის მთავარს დადიანს ლაშქრობის გეგმა შეუტყვია და ფოთის ფაშასათვის უცნობებია. ფაშამ აცნობა გურიის სანაპირო პუნქტებში მდგარ თურქთა გარნიზონებს მოსალოდნელი ლაშქრობის შესახებ და ისინიც საბრძოლველად მოემზადნენ; ხოლო თვითონ ფაშამ ციხისძირთან თურქთა ჯარი გადასხა და იმერთა ჯარს ზურგში მოექცა.

იმერთა მეფემ ქვემო გურიის გასათავისუფლებლად 6000-იანი მეომრით გურიის ჯართან ერთად 4 მარტს დაიწყო ლაშქრობა. მათ დაიკავეს ქობულეთის მხარე, აიღეს და დაანგრიეს ქობულეთის ციხე-სიმაგრე, მეფის ბრძანებით გაულიტეს ჩამოსახლებული თურქები, ნაქალაქარი გადახნეს და მარილი მოაყარეს, რომ ოსმალთა საყრდენი ბუდე აღარ გაცოცხლებულიყო. შემდეგ ჩაქვის მხარეში შეიჭრნენ, იქიდან თურქები გარეყეს და ბათუმამდე ილაშქრეს.

უკან მობრუნებულ ლაშქარს, 7 მარტს, ციხისძირთან, ე. წ. ნაჭიშკრევის ვიწრო გამოსასვლელში, რომელიც ტყით იყო დაბურული, თავს დაესხა ჩასაფრებული თურქებისა და ბათუმელ-ჩაქველების ლაშქარი. ორ ცეცხლშუამოქცეული მეფის ლაშქარი სასტიკად დამარცხდა, თავგანწირული ბრძოლის შემდეგ ძლივს გადაურჩა დატყვევებას მეფე და მისი ამალა.

როგორც ნ. ბერძენიშვილი აღნიშნავს, რუსთა სტამბოლელ ელჩს სტახიევს ეს ამბავი პეტერბურგის საიმპერატორო კარისათვის უცნობებია: აქარლებმა გურიის სოფლები დაარბიეს. სოლომონმა ანალციხის ფაშასთან იჩივლა. დაკმაყოფილება ვერ მიიღო. საპასუხოდ 6000 კაცით თურქეთის საზღვრებში შეჭრილა, ხალხი გაბიზნული დახვედრია (დადიანს შეუტყობინებია მათთვის სოლომონის ამოძრავების შესახებ), მთის გზაზე მაჰმადიანები ჩასაფრებიან სოლომონის ჯარს. სოლომონი დამარცხებულა, 600 კაცი მოკლული დაუკარგავს, 200 კაცი ტყვედ წაუყვანიათ, 18 მარტო

¹ „ღროება“, 1880 წ., № 265.

დიდკაცი დაღუპულა, ტყვეები სტამბოლს გაურეკიათ, ნაწილი ტრაპიზონს დარჩენილა¹.

თანამედროვეთა ცნობებს ქართველი ისტორიკოსებიც ადასტურებენ. ნიკო დადიანის ცნობით, იმერთა მეფეს წარმატებით ულაშქრია ჩაქვის მხარეში, მაგრამ უკან მობრუნებულს „ეწივნენ რაოდენიმე ჩაქველნი, დაუწყეს თოფთა ცემა. დაჰკოდეს სარდალი წულუკიძე ბერი და აგიაშვილი ქაიხოსრო და მოჰკლეს მრავალნი წარჩინებულნი თავად-აზნაურნი და ცოცხალნიცა დაიმორჩილეს და მიიქცა მეფე იმერეთს დიდად დამარცხებული“².

ბაგრატ ბატონიშვილის გადმოცემით, ამ ბრძოლაში გურულებსაც უღალატნიათ მეფისათვის³. მისივე სიტყვით, სოლომონს თითქმის მთელი ლაშქარი დაეღუპა და თვითონაც ძლივს გადაურჩა დატყვევებას. მეფე ბრძოლის ველიდან გურიის ლაშქრის სარდალს ვახტანგ ბატონიშვილს გამოუყვანია თავისი ცხენით.

მძიმე იყო ამ ბრძოლის შედეგები. ეს ლაშქრობა გახშირებული თავდასხმების სიგნალი გახდა. ახალციხის ფაშამ ამ ლაშქრობის დამთავრების უმაღლესი ჯარი შეუსია გურიას და საშინლად დაარბია, ააოხრა ეკლესია-მონასტრები და წაასხა ტყვეები. ამის შემდეგ ქობულეთის მხარე თითქმის მთელი საუკუნით (1878 წლამდე) თურქების ხელში გადავიდა.

ჩაქვის ბრძოლა მოხდა 1784 წლის 9 მარტს. იმავე წლის 23 აპრილს, დღის ორ საათზე, როცა სოლომონ მეფე გიორგობის დღესასწაულზე ხონში მიდიოდა, ცხენზე ამხედრების დროს უეცრად გადმოვარდა და გარდაიცვალა. სახელოვანი სარდალი, რომელსაც მტერთან ბრძოლაში სერიოზული დამარცხება არ ახსოვდა, ბაგრატ ბატონიშვილის აზრით, ნაჭიშკრევთან მარცხის ელდას გადაჰყვა. ამასვე აღნიშნავს ამ ბრძოლის თანამედროვეც⁴.

ანდერძის თანახმად, მეფის გვამი გელათის მთავარ ღვთისმშობლის ტაძარში დამარხეს⁵. ხოლო საფლავის ქვას წარწერა 1840 წელს გაუკეთეს და გარდაცვალების თარიღად შეცდომით 1782 წელი დაწერეს⁶.

¹ ნ. ბერძენიშვილი, საქართველოს ისტორიის სკიკთხები, ტ. IV, თბ., 1967, გვ. 171.

² ნ. დადიანი, ქართველთ ცხოვრება, თბ., 1962, გვ. 181.

³ ბ. ბატონიშვილი, ახალი მოთხრობა, გვ. 58.

⁴ „დროება“, 1880, № 265.

⁵ ს. კაკაბაძე, დასავლეთ საქართველოს საეკლესიო საბუთები, II, თბ., 1921, გვ. 95.

⁶ ქართლის ცხოვრება, ჩუბინოვის გამოცემა, II, სანკტ-პეტერბურგი, 1854, გვ. 510.

ახალციხის ფაშის მიერ ჩატანილ ცნობას სოლომონ მეფის სიკვდილის შესახებ სტამბოლში სიხარულით შეხვდნენ. გახარებულმა დიდმა ვეზირმა შიკრიკს საჩუქრად ხალათი უბოძა, რაც დიდ წყალობას ნიშნავდა.

• • •

სოლომონ მეფე მთელი სიკოცხლის მანძილზე გმირულად ებრძოდა როგორც გარეშე, ისე შინაურ მტრებს. არც ერთ მეფეს იმერეთის სამეფოს ოთხსაუკუნოვანი ისტორიის მანძილზე ისეთი სახელი არ დარჩენია, როგორც სოლომონ პირველს. მას დიდად აფასებდნენ, როგორც მისი თანამედროვენი, ისე შთამომავლობა, ვითარცა სწორუპოვარ სარდალს, წინგამხედ პოლიტიკოსს.

რუსეთის იმპერატრიცა ეკატერინე II მას უწოდებდა „გაბედულ, მზრუნველ და ღირსეულ მეფეს ქრისტიანული სჯულისა“, სოლომონ მეორის სიტყვით, იგი იყო „დიდ სახელოვანი ქვეყანასა ჩვენსა უშჯულოთა მაჰმადიანთა ძირითურთ აღმომფხვრელი და ქართველობისათვის მრავალგზის სისხლდათხეული, იმერთა მეორე აღმაშენებელი“¹.

სოლომონ მეორის მეუღლემ მარიამ დედოფალმა მას იმერეთის განმანათლებელი უწოდა², ხოლო ხალხმა იმერეთის მხსნელად მონათლა.

1809 წელს ჯრუჭის მონასტრისათვის დამზადებული სიგელი ასე ახასიათებს სოლომონ მეფეს: „მეფე დიდი სოლომონ, რომელმან სამეფოთ თვისით განსდევნა მრავლით ჟამითგან მკვიდრნი ბილწნი მახმედიანნი და იწუადა ხრმალი მისი ძლიერი ზურგთა მათთა ზედა და შეღება მიწა საძაგითა სისხლითა მათითა და გარდააგდო ტყვის სყიდვა იმერეთით სამარადისოთ, განანათლა სამეფო თვისი კეთილად, განაშენა სამღვდლელონი, აღაუუა ეკკლესიანი ყოველნი“³.

ვახტანგ ბატონიშვილის დახასიათებით, იგი იყო: „კეთილმსახურებისა ტრფიალ და სიმხნესა შინა ჩინებულ, სიმდაბლისა მოყვარე და სიტკბოებით მოალერსე მხილველთა თვისთა. ამან დასაჯნა და დაამდაბლნა სამეფოსა შინა თვისთა წინააღმდეგნი მეშფოთარნი და ქვეყნის ამრეენი გვამნი და ჰყო მშვიდობა იმერეთსა შინა. სძლია სერასკერსა ხონთქრისასა, აგრეთვე ლეკთა დიდთა მხედრობათა შთასრულსა იმერეთად. განყარა მუნ მყოფნი თურ-

¹ ს. კაკაბაძე, დასახ. წყარო, გვ. 95.

² იქვე, გვ. 107.

³ საისტორიო კრებულო, წ. I, თბ., 1925, გვ. 46.

ქნი, აღკვეთა კნინდა ორნი დიდი ბოროტმოქმედებანი სრულიად იმერეთსა შინა, ესე იგი კაცთა კვლა და მპარაობა. გარნა მესამე უბოროტესი ესე იგი ტყვის სყიდვა დროსა თვისსა სრულიად უჩინო ჰყო¹.

სოლომონის სახელი ცნობილი იყო არა მარტო ახლო ქვეყნებში, არამედ შორეულ ევროპაშიც კი. სოლომონ მეფეს ჩვენმა ხალხმა და ისტორიამ „დიდი“ უწოდა, ქართულმა ხალხურმა ზეპირ-სიტყვიერებამ მას საპატიო ადგილი მიუჩინა და ვით აღმაშენებლის, თამარ მეფისა და ერეკლე მეფის გვერდით.

სოლომონ მეფის ძლიერება სახელმწიფო ბეჭედზედაც შესანიშნავად აისახა, როცა აღრინდელი დამამკირებელი წარწერა — „მონა ღეთისა, ყმა ხონთქრისა“ მან ახალი წარწერით შეცვალა: „ლომებრ მყეფე, მტერთ სისხლმჩქეფე, იმერთ მეფე“².

ბრძოლა ტახტისათვის და ამერ-იშერის გაერთიანების ცდა

როგორც ვიცი, სოლომონს ტახტის მემკვიდრე-შვილი არ დარჩენია — აღექსანდრე ბატონიშვილი 1780 წელს გარდაიცვალა. მას დარჩა შვილი გიორგი, რომელიც ქორწინების გარეშე იყო დაბადებული და გამეფების უფლება არ ჰქონდა. თავის სიცოცხლე-შივე სოლომონ მეფემ მემკვიდრედ თავისი ძმის — არჩილის და ერეკლე მეფის ქალის — ელენეს შვილი და ვითი აღიარა, მაგრამ იმერეთის დიდებულებმა სამეფო ტახტზე აიყვანეს არა და ვით არჩილის ძე (ამ დროს იგი 12 წლისა იყო³), არამედ სოლომონის ბიძის გიორგის ვაჟი და ვითი (29 წლისა⁴). ეს არჩევანი იმან განაპირობა, რომ დიდებულთა ვარაუდით, ერეკლეს შვილიშვილის გამეფება იმერეთში გამოიწვევდა ქართლ-კახეთის მეფის გავლენის გაძლიერებას და ფეოდალთა შეზღუდვას. ამას შეიძლება ამერ-იშერის გაერთიანების ცდაც მოჰყოლოდა, რაც მათთვის ყოველად მიუღებელი იყო. ამიტომ თავადებმა და სამღვდელოებამ ტახტზე სასწრაფოდ დასვეს სოლომონ I-ის გამაერთიანებელი პოლიტიკის:

¹ კავკასიის არქეოგრაფიული კომისიის აქტები, ტ. I, გვ. 58 (რუს.). შემდეგში — კავა.

² იოანე ბატონიშვილი, კალმასობა, თბ., გვ. 288.

³ მ. თამარაშვილი, კათოლიკობა ქართველთა შორის, თბ., 1902, გვ. 776.

⁴ ბუტკოვი, მასალები, II, 1869, გვ. 136 (რუს.).

წინააღმდეგ 1778 წელს მომხდარი აჯანყების თანამგრძნობი დავით გიორგის ძე.

იმ ჯგუფის მეთაურები, რომლებმაც დავით გიორგის ძე გაამეფეს, იყვნენ სარდალი პაპუნა წერეთელი¹ და ბოქაულთუხუცესი ბერი წულუკიძე — ყველაზე გავლენიანი თავადები იმერეთში. მათ მხარი დაუჭირა ოდიშის მთავარმა კაცია დადიანმა² „ამა ორთა მოიწადინეს და შემწეობითა დადიანისათა იქმნა იმერთა ზედა დავით გიორგის ძე“³ — აღნიშნავს ნ. დადიანი.

დავით გიორგის ძის გამეფებას იმანაც შეუწყო ხელი, რომ დავით არჩილის ძე, როგორც ზემოთ იყო ნათქვამი, ამ დროს კახეთში იმყოფებოდა აღსაზრდელად, სადაც დედა მისი ელენე ერეკლეს ასული მეორედ გათხოვილი იყო ქიზიყის მოურავ ანდრონიკაშვილზე⁴.

მიუხედავად იმისა, რომ გამეფდა დავით გიორგის ძე, იმერეთში მრავლად იყვნენ დავით არჩილის ძის მომხრეებიც, მაგრამ მათ თავი შეიკავეს აქტიური მოქმედებისაგან, რადგან მომავალი მეფე მცირეწლოვანი იყო და შეიძლებოდა მის გამეფებას ისევე არეულობა მოჰყოლოდა.

სოლომონ I-ის გარდაცვალების მეოთხე დღეს იმერეთის დიდებულებმა ახალ მეფეს პირობის ფიცი ჩამოართვეს⁵, რომლის მიხედვით მეფე ივალებდა: ტყვის სყიდვის აღკვეთას, ერთგულ ქვეშევრდომთა პატივსა და მტრების დასჯას, გაძევებულ მოღალატეთა დევნას, ეკლესიის გაძლიერებას, იმერეთის სამეფოს ტერიტორიის დაცვას, რუსეთთან ურთიერთობის განგრძობას⁶.

ამავე ფიცში ახალმა მეფემ, დავით არჩილის ძის მომხრეებისათვის რომ ესიამოვნებინა, თანხმობა განაცხადა იმ მუხლების შესრულებაზე, რომლებიც სოლომონ I-ის ანდერძში მცირეწლოვან ბატონიშვილებს ეხებოდა: „დავით და გიორგი ქვეშარიტის მამაშვილურის სიყვარულით ჩვენთან განუშორებლად, უზაკველად

¹ პაპუნა ახალი მეფის სიძე — დის ქმარი იყო.

² ახალი მეფე დავით გიორგის ძე — კაცია დადიანის მამიდაშვილი იყო.

³ ს. კ ა კ ა ბ ა ძ ე, წერილები და მასალები საქართველოს ისტორიისათვის, წიგნი I, თბ., 1914, გვ. 89.

⁴ ბ უ რ ნ ა შ ო ვ ი, საქართველოს სურათები, 1896, გვ. 22. (რუს.).

⁵ ი. ლ ო რ თ ქ ი დ ა ნ ი ძ ე, მასალები საქართველოს ისტორიისათვის (მე-18 საუკ.). წიგნი — მასალები საქართველოსა და კავკასიის ისტორიისათვის, ნაკვ. II, 1940, გვ. 43, შემდეგში დავისაბელებთ — ი. ლ ო რ თ ქ ი დ ა ნ ი ძ ე, მასალები.

⁶ შ. ბ უ რ ქ ა ნ ა ძ ე, იმერეთის სამეფოს პოლიტიკური ისტორიისათვის 1784—1789 წწ. წიგნი — ხელნაწერთა ინსტიტუტის მოამბე, ტ. II, თბ., 1960, გვ. 82, ი. ლ ო რ თ ქ ი დ ა ნ ი ძ ე, მასალები, გვ. 44.

და შეერთებულად იყვნენ და მათს მამულს ეპატრონებოდნენ და იმსახურებდნენ და ჩვენთან კეთილის რიგით აღზრდებოდნენ¹.

სოლომონ მეფემ წინასწარ გაითვალისწინა ტახტის მემკვიდრის დავით არჩილის ძის მცირეწლოვანება და თავისი სიკვდილის შემთხვევაში იმერეთის გამგებლობა დროებით სრულწლოვან დავით გიორგის ძეს მიანდო. ერთ დოკუმენტში აღნიშნულია, რომ სოლომონ მეფის „ძმისწულნი იყვნენ მცირე ყრმანი, ამის მიზეზისათვის დასვეს იმერთა ბიძაშვილი მისი დავით არა მეფედ, არამედ ნაიბად, ვიდრე აღზრდამდე არჩილის ძისა დავითისა“².

დავით გიორგის ძე წინდახედული მმართველი აღმოჩნდა; მიუხედავად იმისა, რომ ერეკლე მეფის შვილიშვილს ტახტი წაართვა, რუსეთის მეშვეობით შეეცადა, კარგი ურთიერთობა დაემყარებინა ქართლ-კახეთის სამეფოსთან, ამასთან ერთად იგი, ისე როგორც სოლომონ I, განუხრელად დაადგა რუსეთის ორიენტაციის გზას.

1784 წლის 1 მაისს დავით მეფე წერილს უგზავნის პავლე პოტიომკინს³ და აუწყებს, რომ სოლომონ მეფემ მოულოდნელი გარდაცვალებით დაგეტოვა ჩვენ შვილნი თვისნი ობლად და ვითარცა ბრძანება და ანდერძი გვებრძანა მისის სიმაღლისაგან, იგი ყოველივე აღასრულებს ყოველთავე ქვეყანისა ჩვენისა ერთობილთა დიდთა და მცირეთა და ღ[ვთ]ის მინდობით აღმირჩიეს და აღმიყვანეს სამეფოსა გვარისა და სახლისა და ქვეყანისა მეფეთა ხარისხსა და ვალი საუკუნო დამდვეს პატრონობისა და ყოველის ესოდენის წმინდის ეკლესიებისა და ყოველისა ამის ერისა და სამკვიდრებელისა. აწ თქვენს უაღმატებულესობას, მისის სიმაღლის კურთხეულის ჩვენის ხელმწიფის მეფის სოლომონის სიტყვისა და ანდერძისაებრ, კეშმარიტის მონდობით და სრულის იმედით მოვინდობივარ და მზა ვიქმნებით ყოველსავე ზედა, რომელსაც თქვენი უაღმატებულესობა დაგვარიგებს. ჩვენ მისგან და მისის სიმაღლისაგან ყოველთვის ესრეთ გვექონია ბრძანება და დარიგება, რომ თქვენს ხელქვეშ ვიყვნეთ და თქვენ მიერ მივემთხვივნეთ ყოველსა სათხოველსა მას, რომელიც მისმა სიმაღლემ, ნეტარხსენებულმან მეფემ თქვენ მოგწერათ და ჩვენ ყ[ოველ]ად მოწყალეს ხელმწიფეს არზა მიართვა, ყოველთაგანვე აღბეჭდილი და დამტკიცე-

¹ ქუთაისის ისტ.-ეთნ. მუზეუმის დოკუმენტი № 327.

² ბ ა გ რ ა ტ ბ ა ტ ო ნ ი შ ვ ი ლ ი, ახალი მოთხრობა, გამოსცა თ. ლ. შ. ლ. ო. ო. რ. მ. ყ. თბ., 1941, გვ. 59.

³ პავლე პოტიომკინი — 1784 წლის თებერვლიდან სარატოვის და კავკასიის მხარეთა გენერალ-გუბერნატორი. იხ. ბ უ ტ კ ო ვ ი, მასალები, II, გვ. 165 (რუს.).

ბით ხელმოწერილი. ჩვენი ვედრებაც და ჩვენის ქვეყნების საპირო სათხოვარიც კიდევ ისევ არის და უმხურვალესად გვედრებთ, რომ თქვენი ჰირნახული და ყ[ოვლ]ად მოწყალის ხელმწიფის ჯარით და მოწყალებით გამოხსნილი ქვეყანა ესე და ჩვენი საქმე და სათხოვარი არ დაუტეოთ ზრუნვაში და ურჯულოთა ხელთა შინა არღარა შევარდეს და არ აოხრდეს ესოდენი წმინდანი ეკლესიანი¹.

ამ დოკუმენტიდან ნათლად ჩანს, რომ დავით მეფე საგარეო ურთიერთობის საკითხში სოლომონ მეფის პოლიტიკას აგრძელებს და განუწრელად ადგას რუსეთის ორიენტაციას.

ამავე წერილში მეფე პოტიომკინს სთხოვს, ნება დართოს ელჩების გაგზავნის და პასუხის გამოგზავნა დააჩქაროს, რადგან, როგორც წერილიდან ჩანს, ქვეყნის შიგნით შექმნილი მდგომარეობა აშინებს: „რომ საჩქაროდ არ მოვიდეს თქვენი ამბავი, კეთილი საქმეები შეიცვლება და ქვეყნის ამრევნი მტერნი ჩვენნი არ დასცხრებიან და მტერობას და არეულობას ეცდებიან“².

ამავე წლის 1 მაისს პავლე პოტიომკინს წერილს უგზავნის იმერეთის თავადაზნაურობა, სადაც აღწერილია ის მწუხარება, რაც სოლომონ მეფის მოულოდნელმა გარდაცვალებამ მიაყენა მათ და ელჩების გაგზავნაც მეფის გარდაცვალების გამო შეჩერდა, თორემ ჩვენ ისევ იმ სათხოვარს ვიმეორებთ, რასაც ადრე, თქვენს საფარველქვეშ შესვლას რომ ვითხოვდითო — აღნიშნულია დოკუმენტში.

წერილში ახსნა-განმარტებას იძლევიან, თუ რატომ აირჩიეს მეფედ დავით გიორგის ძე: „ჩვენის მეფის ანდერძის მსგავსად აღვირჩიეთ და მემკვიდრე რ[ომე]ლიც უფროსი და მოსწრებული ბრძანდება, რომ ჩვენი შემოვლა და პატრონობა და მეფობა ამას შეუძლიან, ყოვლისამ ქ[უეყ]ნის ნებით და გამორჩევით მეფედ აღვიარებთ დავით-მეფესა ყოვლისა საიმერეთოსასა, ძესა გიორგისასა დავითიანსა და ერთობით ყოველი საიმერეთო ამას დაემორჩილა, ღ[ვ]თის მინდობით და ქ[ეშმარი]ტის ერთგულებით, რომელიც რომ კურთხეულის ჩვენის მეფის სოლომონის აღსრულების მერვე დღეს მეფედ და პატრონად დაემკვიდრა ყოველსა სახლსა სამეფოსა თვისსა და ქუეყანასა ამას, თთვესა აპრილსა... მეფემ მტკიცითა ფიცითა აღიარა ყოველსა სამეფოსა ამას ერთ-

¹ მოტანილია ვ. მაჰარაძით „ბესიკი დიპლომატიურ საბიულზე“, გვ. 243 — 245.

² იქვე.

გულემა უდიდებულესისა ს[რულია]დ რუსეთის იმპერატორობისა წ[ინაშე] და ყ[ოველ]თა შორის დაამტკიცა მინდობა და სამსახური და ყმობა საუკუნოდ¹.

წერილს ხელს აწერენ და ბეჭედს უსვამენ: ქუთათელი მიტროპოლიტი დოსითეოზი, გენათელი მიტროპოლიტი ეფთვიმი, მთავარეპისკოპოსი იოანე, ქსნის ერისთავის ძე ელისბარ, წულუკიძე ბერი, სარდალი წერეთელი პაპუნა, წულუკიძე გიორგი, სახლთუხუცესი წერეთელი ზურაბ, აგიაშვილი სარდალი ქაიხოსრო, მაჩაბელი ზურაბ, მდივანბეგი კნიაზი დავით, მდივანი მესაიდუმლე გაბაშვილი ბესარიონ. „აღიწერა თვესა მაისსა ერთსა ქ[რისტ]ეს აქათ ჩლბდ“² (1784 წ.).

ამ დოკუმენტით იმერეთის უდიდესმა ფეოდალებმა ერთხმად აღიარეს სოლომონ მეფის საგარეო პოლიტიკის კურსი და სანაცვლოდ რუსეთისაგან მოითხოვეს მხარდაჭერა.

რუსეთის მესვეურნი უკეთესს ვერ ინატრებდნენ, რადგან იმერეთის სამეფოს სიმტკიცით იყვნენ დაინტერესებულნი, რომ არეულობა არ მომხდარიყო და თურქებს დასავლეთი საქართველოს საშინაო საქმეებში ჩარევის საშუალება არ მისცემოდათ.

რაც შეეხება მეფის კანდიდატურას, მათთვის მისაღები იყო დავით გიორგის ძეც, რამდენადაც იგი რუსეთის ორიენტაციისა იყო და თურქების გაბატონებას იმერეთში არ ისურვებდა.

* * *

როგორი იყო ერეკლე მეფის პოზიცია დავით გიორგის ძის გამეფების მიმართ?

შ. ბურჯანაძე აღნიშნავს, რომ „დავით გიორგის ძის გამეფების წინააღმდეგ ბრძოლას განაგრძობდნენ დავით არჩილის ძისა და გიორგი ალექსანდრეს ძის მომხრე ფეოდალები (გიორგი ალექსანდრეს ძე — სოლომონ მეფის მეორე ბიძაშვილი — მ. რ.).

ოპოზიციას დავით არჩილის ძის მხრიდან ზურგს უმაგრებდა ერეკლე მეფე, რომელიც მოითხოვდა თავისი ასულის წულის გამეფებას და ამით ასუსტებდა დავით მეფის პოზიციებს იმერეთში, სადაც ფეოდალების მღელვარება აჯანყებას უახლოვდებოდა“³. შ. ბურჯანაძე იქვე დასძენს, რომ ბურჯანაშვილმა „ზემოქმედება მოახ-

¹ ვ. შაქარაძე, დასახ. ნაშრ., გვ. 246—248.

² იქვე.

³ შ. ბურჯანაძე, დასახ. ნაშრ., გვ. 83.

დინა ერეკლე მეფეზე, რომელსაც უარი ათქმევინა დავით არჩილის ძისათვის მხარის დაჭერასა და იმერეთის საქმეებში ჩარევაზე¹.

როგორც ქვემოთ დავინახავთ, ერეკლე არა თუ ზურგს უმაგრებდა ოპოზიციას, არამედ, პირიქით, ცდილობდა, რომ იმერეთში ამ ნიადაგზე არეულობა არ მომხდარიყო.

ცხადია, ერეკლე მეფისათვის სასიამოვნო არ იქნებოდა; რომ მის შვილიშვილს, კანონიერ მემკვიდრეს ტახტი ხელიდან გამოაცალეს, მაგრამ ამ ფაქტს იგი შეურიგდა და ისე მოიქცა, როგორც ეს შორსმკვრიტელ სახელმწიფო მოღვაწეს შეჰფეროდა.

1784 წლის 8 მაისს ერეკლე მეფე პავლე პოტიომკინს სწერდა: „როდესაც ჩვენი შვილიშვილი დავით არჩილის ძე თავის ბიძისაგან თავის მამულიდამ გამოხმული შეიქნა და ცხიხეებიც დაუქცია, აქ ჩვენთან გვეყვანდა და ჩვენა ვზრდიდით. ამისათვის ჩვენსა და მეფეს სოლომონს შუა სამღუქრავიც იყო. მაგრამ რადგან უმაღლესმა კარმა ჩემი და მეფის სოლომონის მშვიდობა ინება, მეც დავმორჩილდი — თავის ძმისწული თავის მემკვიდრედ ჩემთვისაც ეთხოვნა, თქვენს მალალს მსვლელობასაც მოხსენებოდა და თქვენც მოგეწერათ, აქ მყოფის მინისტრისათვისაც მოეწერა, ამანაც გვირჩია, ჩვენც თავის ძმისწული გაუგზავნეთ და პირობაც ასე დაზღვა, რომ იმის მემკვიდრედ ეს უნდა ყოფილიყო. მეფე სოლომონი ისე უეცრად მიიცვალა, რომ იმ ჟამზე ველარ გამოაცხადა. ახლა იმერეთის მეფეთ-მეფის სოლომონის ბიძაშვილი დავით გიორგის შვილი დაუსვამთ. რადგან ჩემი შვილიშვილი დავით ჯერ უმაწვილი არის და ქვეყნის მოვლა არ შეუძლია, მეც ეს ვიფიქრე, რომ იმერეთში თარაფობა არ ჰქონდეს და ოსმალთ მხრისაკენ არ მიიწიონ, ამისთვის ეს უმაღლესის კარის საერთოგულოთ დავინახე და დავით გიორგის შვილის მეფობის თანახმა ვექმენ. და ღ[მრ]თის ნ[ებით], როცა ჩემი შვილისშვილი დავით გაიზარდოს, მაშინ რომელიც რუსეთს [თის] უმაღლესის კარის ნება იყოს, ასე აღსრულდეს“².

ე. ი. როგორც დოკუმენტიდან ირკვევა, ერეკლე მეფე დავით გიორგის ძის გამეფების წინააღმდეგი არ ყოფილა იმ მოსაზრებით, რომ ოსმალეთი არ ჩარეულიყო იმერეთის საქმეებში და ამას არ გამოეწვია არეულობა და რუსეთის უკმაყოფილობა; შემდეგ კი, როცა დავით არჩილის ძე სრულწლოვანი გახდებოდა, ისე მოვიქცევი, როგორც რუსეთის მთავრობა გადაწყვეტს.

¹ შ. ბურჯანაძე, დასახ. გვ. 84.

² მოტანილია ე. მაქარაძით — ბესიკი დიპლომატიურ სარბიელზე, თბ., 1968, გვ. 99.

ამავე რიცხვით ერეკლე მეფე ბურნაშოვს უგზავნის ანალოგიურ წერილს, სადაც წერს, რომ სოლომონ I გარდაიცვალა, იმერეთის მეფის მემკვიდრედ სოლომონის მიერ აყვანილი იყო ჩემი შვილიშვილი დავით არჩილის ძე, მაგრამ ახლა მეფედ აურჩევიათ დავით გიორგის ძე, სოლომონის ბიძაშვილი; პროტესტს არ ვაცხადებ, რადგან დავით არჩილის ძე მცირეწლოვანია და სამეფოს გაძღოლა არ შეუძლიანო¹.

ერეკლე მეფე ბურნაშოვს სთხოვს, რომ ეს წერილი იმერეთში გაგზავნოს მეფისთვის გასაცნობად. ე. ი. ერეკლე მეორე მოითხოვს, დავით გიორგის ძემ დაუბრუნოს დავით არჩილის ძეს მისი მამულები, მისცეს მას ყველა ის მამული, რომელიც ჰქონდა მამუკა ბატონიშვილს, იყოლიოს იგი თავის მემკვიდრედ და გადასცეს მას სამი ციხე ყოველგვარი მოწყობილობით და მამულებით. თუ ასე იქნებაო, უმატებს ერეკლე მეფე, მე არა თუ არაფერი საწინააღმდეგო არ მექნება, პირიქით, უფრო მეტი მეგობრობა და სიყვარული შექნება დავით მეფისაო.

მოტანილი დოკუმენტებიდან ნათლად ჩანს, რომ ერეკლე მეფე იმერეთის მეფედ ცნობს დავით გიორგის ძეს, და, რომ ის არა თუ მხარს უმაგრებს ოპოზიციას, არამედ ცდილობს იმერეთში მშვიდობიანობა დამყარდეს, რათა გარეშე ძალას სამეფოს საშინაო საქმეებში ჩარევის საბაბი არ მიეცეს.

მოტანილი დოკუმენტებიდან ნათლად ჩანს, თუ როგორ იყო დაინტერესებული ერეკლე მეფე იმერეთში მშვიდობიანობის დამყარებით. შ. ბურჯანაძის ცნობა იმის შესახებ, თითქოს ბურნაშოვმა გავლენა მოახდინა ერეკლე მეფეზე და უარი ათქმევინა დავით არჩილის ძისათვის მხარის დაჭერაზე და იმერეთის საქმეებში, ჩარევაზე, დაუმსახურებელ ჩრდილს აყენებს ერეკლეს იმდროინდელ პოლიტიკას.

1784 წლის 9 ივნისს ბურნაშოვი და ყოფილი კათალიკოსი მაქსიმე იმერეთში გადავიდნენ, სადაც მათ დიდი ზეიმით შეხვდნენ მეფე და თავადაზნაურობა (ეს სიხარული იმანაც გამოიწვია, რომ ერეკლე მეფე თანახმა იყო იმერეთის ტახტზე დავით გიორგის ძის გამეფებისა). მაქსიმე მაშინვე აღადგინეს კათალიკოსის უფლებებში.

ბურნაშოვის ცნობით, ამ დროს იმერეთის თავადაზნაურობა ორ სამტრო ბანაკად იყო გაყოფილი, მაგრამ, როგორც ის აღნიშ-

¹ ი ა ს ე ლ ო რ თ ქ ი ფ ა ნ ი ძ ე, მასალები, გვ. 44.

ნავს, მისი და მაქსიმეს ჩასვლის და ჩარევის შედაგად მშვილობა ჩამოვარდნილა.

დავით მეფემ სცადა გათავისუფლებულყო დიდი ფეოდალების გავლენისაგან; ამისათვის მან პირველ რიგში პატივი და დიდება მოაკლო პაპუნა წერეთელს, რომლის რჩევა-დარიგებასაც ყურს აღარ უგდებდა. მეფემ ახალი პირები დააწინაურა სამეფო კარზე¹, მათ შორის განსაკუთრებით დიდი გავლენა მოიპოვა დავით მეფეზე ქართლიდან იმერეთში გაქცეულმა სოლომონ მეფის სიძემ თავადმა ელიზბარ ერისთავმა, რომლის რჩევით მეფემ მამულები აღარ დაუბრუნა დავით არჩილის ძეს. მეფემ ასევე მოაკლო პატივი სხვა თავადებს, რომელთა დახმარებითაც გვირგვინი იკურთხა. დავით გიორგის ძისა და თავადებს შორის უთანხმოების უფსკრული თანდათან ღრმავდებოდა.

მათი უთანხმოების ერთ-ერთი მიზეზი ისიც იყო, რომ მეფემ დადიანს საჭილაო-სამიქელაო გადასცა, ხოლო გურიელის ვაჟს ვახტანგს, რომელსაც თავისი სიღედრი მიათხოვა, მზითევში საჯავახო გაატანა.

თავადებმა მალე დაივიწყეს მეფისათვის მიცემული ერთგულების ფიცი; მღვდმარეობა უკიდურესად დაიძაბა. უკმაყოფილების ერთ-ერთი მიზეზი გახდა რუსეთის მთავრობის ჩარევა იმერეთის საშინაო საქმეებში. როგორც ზემოთ აღვნიშნეთ, პოლკოვნიკ ბურნაშოვს მინდობილი ჰქონდა თვალყური ედევნებინა იმერეთის საქმეებისათვის. რუსეთი დაინტერესებული იყო იმერეთის შინაგანი პოლიტიკური ერთიანობით, რათა აშლილობის ვითარებაში თურქეთს იმერეთის საშინაო საქმეებში ჩარევის საშუალება არ მისცემოდა.

1784 წლის 13 მაისს პ. პოტიომკინი სწერდა ბურნაშოვს: „ძალიან უნდა შეეცადოთ, რომ იმერეთში სიწყინარე იყოს... დაიყოლიეთ დიდებულები და მეფე, რომ თანხმობით იყვნენ, თვალყური ადევნეთ, რათა მათზე გავლენა არ მოიპოვონ თურქებმა“².

რუსეთის ჩარევამ იმერეთის საქმეებში, მეფის მიერ მამულების გადაცემამ დადიანისა და გურიელისათვის, თავადების მიმართ პატივისცემის მოკლებამ და ახალთა დაწინაურებამ დიდ ფეოდალებში მღელვარება გააღვივა, იმერეთი აჯანყების პირამდე მიიყვანა. ისინი დავით გიორგის ძეს გადაუდგნენ — თავადებმა ახლა დავით არჩილის ძის გამეფება მოინდომეს.

როგორც კი იმერეთში მომხდარი ამბები შეიტყო, ერეკლე

¹ დ უ ბ რ ვ ი ნ ი, ისტორია, II, 1886, გვ. 64—65 (რუს.).

² ბ უ ტ კ ო ვ ი, მასალები, გვ. 24 (რუს.).

მეფემ მაშინვე ენერგიულ ზომები მიიღო იმერეთში სიმშვიდის დასამყარებლად. პაველ პოტიომკინი გრიგოლ პოტიომკინს აცნობებდა: ბურნაშოვის 25 ივლისის პატაკი მივიღე, საიდანაც ჩანს, რომ ფაშები, განსაკუთრებით ახალციხის ფაშა, ყალბ ცნობებს აწვდიან თურქეთის მთავრობას, რათა ამხედრონ საქართველოს წინააღმდეგ. რაც შეეხება იმერეთს, ცნობები ერთხმად ადასტურებენ, რომ თურქეთის თავდასხმა მოსალოდნელია და მირჩიე, რა ზომები მივიღო. ბოლოს დასძენდა: ერეკლეს ვთხოვე იმერეთის შინა ბრძოლები ჩააქროს, სათანადო მითითება მივეცე ბურნაშოვსაცო!

სანამ ბურნაშოვი და პოტიომკინი იმერეთის ამბებს გაიგებდნენ, ერეკლე მეფემ გადამჭრელი ზომები მიიღო და მოსალოდნელი სისხლისღვრა შეაჩერა, რის შედეგადაც იმერეთის საშინაო საქმეები თავის კალაპოტში ჩადგა.

როგორც ზემოთ აღნიშნულიდან ჩანს, ორივე მხარე მორიგე-ბულა. ეს შეთანხმება დააჩქარა კარზე მომდგარმა ნაფრთხემა ც-თურქები იმერეთში შემოსაპრელად 12 000 მეომრისაგან შემდგარ ჯარს აშაღებდნენ: მათ ტანტის მძიმეელი ქაიხოსრო აბაშიძე უნდა გაემეფებინათ იმერეთში, იმავე დროს ოსმალეთის სულთნის მითითებით ახალციხის ფაშა ლეკებსა და ამიერკავკასიის ხანებს მოუწოდებდა საქართველოზე თავდასასხმელად.

ზურაბ წერეთელი რუსეთის წარმომადგენელს იმერეთში ვიტენბერგს² აუწყებდა, რომ „ჩვენ თურქეთიდან წერილი მოვიღეთ... და მალე იმერეთში რალაც ახალი ამბავი მოხდება, ეს „ახალი ამბავი“ იყო ქაიხოსრო აბაშიძის ცნობა, რომელიც განდგომილ თავადებს ატყობინებდა, სულთანმა იმერეთის მეფედ დამნიშნა და სალაშქროდ 12000 მეომარი მომცაო. გამეფების შემდეგ იგი სტამბოლს პირდებოდა ყოველწლიურად ხარკის სახით 190 ბაეშეს³, ხოლო იმერეთის თავადებს იმ მდგომარეობის დაბრუნებას, რაც მისი მამის — ლევან აბაშიძის დროს იყო იმერეთში; ე. ი. თავადების მძლავრობას და ტყვის სყიდვას.

გამდგარი თავადები ფიქრობდნენ, რომ მეფეს შეიძლება რუსეთი დახმარებოდა, ამიტომ შეეცადნენ, მეფეს კავშირი გაეწყვიტა რუსეთთან. ისინი სასტიკი წინააღმდეგი გახდნენ რუსეთში ელჩების გაგზავნისა. მათ მეფეს აუკრძალეს კავშირის დაჭერ-

¹ ვ. მაკარაძე, დასახ., ნაშრ., გვ. 113.

² ვიტენბერგი — სოლომონ I-ის მეურნალი ექიმი; მისი სიკვდილის შემდგ. რუსეთის წარმომადგენელი იმერეთში.

³ დ უ ბ რ ა ვ ი ნ ი, ისტორია, II, გვ. 67 (რუს.).

ბურნაშოვთანაც. პაპუნა წერეთელი ვიტენბერგს ატყობინებდა: „ჩვენ ვთხოვეთ მეფეს, რომ ბურნაშოვთან არავითარი საქმე არ ჰქონოდა, მაგრამ მეფემ მოლაპარაკება გამართა მასთან ჩვენი თანხმობის გარეშე. ამიტომ ჩვენ მის მაგივრად ტახტზე ავიყვანთ მცირეწლოვან დავითს“.¹

მეამბოხეთა მეთაურები — სარდალი პაპუნა წერეთელი და ბოქაულთუხუცესი ბერი წულუკიძე დაუკავშირდნენ დავით არჩილის ძეს; ახლა მათ აღარ აშინებდათ ვრეკლე მეფის შვილიშვილის გამეფება, რადგან ისინი ახლანდელი მეფის წინააღმდეგ იბრძოდნენ.

ვრეკლე მეფის ჩარევის შემდეგ მოწინააღმდეგე მხარეები შერიგდნენ. დავით მეფისათვის ამას დიდი მნიშვნელობა ჰქონდა, რადგან თურქეთის ჯარი იმერეთში სალაშქროდ ემზადებოდა, რათა ქაიხოსრო აბაშიძე გაემეფებინა.

• • •

თურქეთმა დიპლომატიურ ბრძოლაშიც წააგო რუსეთთან; აღმოსავლეთი საქართველო ხომ ხელიდან გამოეცალა, ახლა დასავლეთი საქართველოც მისგან განკერძოების გზაზე იდგა. ამიტომ სოლომონ I-ის სიკვდილის შემდეგ თურქეთის მთავრობამ გადაწყვიტა, აქტიურად ჩარეულიყო იმერეთის საშინაო საქმეებში.

იმერეთის ახალი მეფე, რომელიც თურქეთის დაუძინებელი მტერი გამოდგა, აშკარად აღიარებდა რუსეთის ორიენტაციას. ამით შეშფოთებული ახალციხის ფაშა სულეიმანი წერილებს უგზავნის დავით მეფეს და მოაგონებს, რომ იმერეთი ხვანთქრის ქვეყანაა და ითხოვს — კაცები გამოგზავნოს მასთან კეთილი ურთიერთობის დასამყარებლად. დავით მეფე ღუმილით შეხვდა ახალციხის ფაშის წერილებს, ამიტომ ოსმალეთი ენერგიულად შეეცადა იმერეთის საქმეებში ჩარევას.

თურქეთის მთავრობამ ერთდროულად ორი პრეტენდენტი გამოიწია იმერეთში გასამეფებლად: ერთ-ერთი ტახტის მამიებელი იყო როსტომ რაჭის ერისთავის ძე გიორგი² — 1769 წელს სოლომონ I მიერ ცალთვალდავსებული, თურქეთში ქიორ-ბეის სახელით ცნობილი (ქიორ-ბეი ნიშნავს ბრმა ბეგს).

¹ დ უ ბ რ ა ვ ი ნ ისტორია, II, გვ. 66.

² გიორგის ბებია იყო ალექსანდრე იმერთა მეფის დაჲ (სოლომონ I-ის შამილ) და ვახტანგ VI-ის დისწული. აქედან ჰქონდა გიორგის იმერეთის ტახტის პრეტენზია.

გიორგი როსტომის ძე გზიდახვე უკან დაბრუნდა, როცა ვაი-
გო დავით გიორგის ძის გამეფება იმერეთში¹.

ახლა თურქეთი ცდილობს იმერეთის ტახტზე მისთვის სასურ-
ველი სხვა კანდიდატი მოძებნოს. ასეთი კანდიდატი აღმოჩნდა
სტამბოლში გადახვეწილი ქაიხოსრო ლევანის ძე აბაშიძე².

ქაიხოსრო აბაშიძე (რომელზედაც თურქეთის მთავრობა დიდ
იმედებს ამყარებდა) სოლომონის გარდაცვალებისთანავე სტამ-
ბოლს გაიქცა და სათანადო დაპირებათა სამაგიეროდ სულთნისა-
გან მიიღო იმერეთის მეფედ დამტკიცების ფირმანი. სულთანმა
მას მისცა 12000 მეომარი და 1784 წლის შემოდგომაზე იმერე-
თისაკენ გამოისტუმრა; ამ ჯარის ნახევარი ფოთს მოვიდა, ნახე-
ვარი კი ბათუმსა და ჩაქვში დადგა და აქტიური მოქმედება დაი-
წყო.

ქაიხოსრო აბაშიძემ დადიანს, გურიელსა და სხვა იმერეთის
წარჩინებულ თავადებს წერილები დაუგზავნა, რომ მისთვის
მხარი დაეკირათ და იგი იმერეთის მეფედ ეცნოთ. ასევე ახალ-
ციხის ფაშა სულეიმანიც შეეცადა წერილობით გადაებირებინა
დიდი ფეოდალები.

გიორგი გურიელმა წერილობით მიმართა ახალციხის ფა-
შას და ქაიხოსრო აბაშიძეს. გურიელი სულეიმან-ფაშას წერ-
და, რომ ხონთქარი ქაიხოსროს მეფობას შეჰპირებია, მაგრამ
ქედან არაფერი გამოვა, რადგანაც ქაიხოსრო სამეფო გვარის
წევრი არ არის; ვერც მე და ვერც დადიანი მას მეფედ ვერ
ვცნობთ, ამიტომ მისთვის მხარდაჰქერა უშედეგოდ დარჩებაო.

ქაიხოსროსადმი გაგზავნილ წერილში გურიელი მას ურჩევდა:
შენი გამეფების ცდას ბევრი ადამიანი შეეწირება, შენ მაინც მი-
ზანს ვერ მიიღწევ და უბრალო ხალხის ცოდვას ნუ იკისრებო.
ქაიხოსრომ გურიელს უპასუხა, რომ მან უკვე მიიღო ხონთქარ.
საგან მეფობის ფირმანი და განზრახული აქვს იმერეთი დაიკავოს.

ამრიგად, გურიელი და დადიანი აბაშიძეს მეფედ არ ცნობდნენ,
რადგან იგი სამეფო გვარის წარმომადგენელი არ იყო.

მაგრამ 1784 წლის 30 ოქტომბერს, ქაიხოსრო აბაშიძე გურია-
ში შემოიჭრა თურქთა 6000-იანი ჯარით და ოზურგეთამდე მოაღ-
წია. თურქებმა გაძარცვეს და გადაწვეს სოფლები, მაგრამ ტყვე-
ები ვერ იშოვეს, რადგან ხალხმა წინასწარ იცოდა მოსალოდნელი
საფრთხის შესახებ და გახიზვნა მოასწრო.

¹ გიორგი როსტომის ძე ერისთავს ჰყავდა ცოლად დავით გიორგის ძის და
ქალენე.

² ქაიხოსროს აზრით მას ამის უფლება ჰქონდა, რადგან მისი პაპა გიორგი
აბაშიძე ერთ დროს იმერეთში მეფობდა.

იმერთს მეფე დავით გიორგის ძე 4000-იანი ლაშქრით სასწრაფოდ დაიძრა გურიელის დასახმარებლად და საჯავახოში დადგა, აქედან მან კავკასიის ხაზის სარდალს გენერალ-პორუჩიკს პოტიომკინს დახმარება სთხოვა თურქეთის წინააღმდეგ. მაგრამ უარი მიიღო. მეფემ მაინც გაავრცელა ყალბი ხმები, რომ მის დასახმარებლად რუსთა რამდენიმე პოლკი მოდიოდა. მან წინასწარ მოუქრა თურქებს უკან დასახევი გზები და შესატევად მოემზადა. მეფის ბანაიდან მოლაღატეებმა თურქებს შეატყობინეს მეფის გეგმა, მაგრამ საქმე მეფის სასარგებლოდ წარიმართა — თურქები დაფრთხნენ, ძარცვას თავი გაანებეს, ნაწილი ფოთის ციხეს შეეკედლა და ნაწილი ქაინოსრო აბაშიძესთან ერთად ტრაპიზონში გაიქცა, თან ისე სწრაფად, რომ მთელი საბრძოლო აღჭურვილობა, ბარგაკიდებული ცხენები და 1400 თოფი გურიაში დატოვენ¹.

მართალია, თურქებმა ბრძოლა წააგეს, მაგრამ ხელი არ აუღიათ დასავლეთ საქართველოში შემოსევაზე; მათ უფრო მეტად გაამაგრეს და გააძლიერეს ფოთისა და ბათუმის ციხეები და გარნიზონები.

ამ ომში დავით მეფის მხარეზე იდგნენ გურიელი, დადიანი, მთელი იმერეთის ფეოდალები და გლეხობა.

თურქების განდევნის შემდეგ დავით მეფემ ახალციხის ფაშასთანაც მიაღწია შეთანხმებას, რაც დასავლეთი საქართველოს პოლიტიკურ მდგომარეობას აუმჯობესებდა.

* * *

1784 წლის სექტემბრის შუა რიცხვებში დავით გიორგის ძემ რუსეთის საიმპერატორო კარზე გაგზავნა ელჩობა — მაქსიმე კათალიკოსის, სარდალ-სახლთუხუცეს ზურაბ წერეთლისა და მდივანბეგ დავით კვინიხიძის შემადგენლობით. დეკემბრის შუა რიცხვებში ელჩებმა პეტერბურგს ჩააღწიეს და 29 დეკემბერს ისინი ეკატერინე მეორემ მიიღო².

ელჩობა რუსეთის მთავრობისაგან ითხოვდა დავით გიორგის ძის მეფედ დამტკიცებას, იმერეთის მიღებას მფარველობაში და თურქეთის წინააღმდეგ დახმარებას³.

¹ ქ. ჩხატარაიშვილი, დასახ. ნაშრ., გვ. 138.

² ა. ცაგარელი, ტ. II, გვ. 52—54 (რუს.).

³ იმერეთის მეფე-მთავართა სათხოვარი იმავე კვირაში რუსულ და ლათინურ ენებზე გამოაქვეყნეს გაზეთებში.

ელჩობის შედეგად, იმავე 1784 წლის მიწურულში, რუსეთმა თურქეთს განუცხადა, რომ იმერეთი რუსეთის ხელდებული ქართლ-კახეთის მოსაზღვრე ქვეყანაა და იქ კანონიერი მეფის გადაგდებას და არეულობის შექმნას იგი ვერ შეურიგდებოდა. ამის საპასუხოდ თურქეთმა 1774 წლის ქუჩუკ-კაინარჯის საზავო ხელშეკრულების 23-ე მუხლზე მიუთითა, რომლის ძალითაც დასავლეთი საქართველო თურქეთის ხელდებულად იყო აღიარებული და რუსეთს მის საქმეებში ჩარევა ეკრძალებოდა. თურქეთის მთავრობამ განაცხადა, რომ იგი არ აპირებს იმერეთში ძალით მეფის დასმას, მაგრამ პორტამ იცის, რომ დავით გიორგის ძის მეფობა იმერლებს არ უნდათ და ამიტომ მეფედ გზავნის სხვა პიროვნებას. თუ იმერლები დავით გიორგის ძეს ირჩევენ მეფედ, თურქეთი ამას დაეთანხმება, ოღონდ მეფემ, ისევე, როგორც ამას იმერეთის მეფეები აღრიდნენ აკეთებდნენ, სამეფო რეგალიები ისევ თურქეთისაგან უნდა მიიღოს, ე. ი. თურქეთის ხელდებულება უნდა აღიაროს¹. დაეა გადაუქრელი დარჩა, მაგრამ 1785 წლის დამლევეს რუსეთმა მაინც ათქმევინა. თურქეთს უარი იმერეთში თავისი კანდიდატის გამეფებაზე. მიუხედავად ყოველივე ამისა, ლექთა რაზმები მაინც ხშირად არბევდნენ იმერეთს.

რუსეთის მთავრობა იმერეთის ელჩებისათვის პასუხის გაცემას აგვიანებდა. ასეთ ვითარებაში რუსეთის მესვეურნი რომ დასავლეთ საქართველოთი უფრო დაეინტერესებინა, 1785 წლის 8 ივლისს თავისი ინიციატივით ზურაბ წერეთელმა გრიგოლ პოტიომკინს შემდეგი გეგმა წარუდგინა: თუ რუსეთი დასავლეთ საქართველოზე თავის გავლენას გააერცელებს, მაშინ იგი შეძლებს შავი ზღვის სანაპიროზე გურიაში, კინტრიშთან ნავსადგურის აგებას, საიდანაც იმერეთ — გურია — სამეგრელო — აფხაზეთზე იბატონებს, ამ ადგილის დასახლება შეიძლება ანატოლიიდან გადმოყვანილი ბერძნებით. ეს ადგილი მდიდარია, გარდა ამისა, აქედან უირიშში გემები ორ დღეში მივლენ. ციხისძირის აგებით თურქები იძულებული გახდებიან დატოვონ ფოთის, ჩაქვისა და ბათუმის სიმაგრეები. შესაძლებელი გახდება ლიხთ-იმერეთში იმპერატორის ხარჯზე მუდმივი ჯარის შექმნაც, რუსეთი სტრატეგიულსა და სამრეწველო ნედლეულს გაიტანს იმერეთიდან, ამასთანავე. რუსეთი დაიკავებს ბათუმ — ფოთ — ჩაქვის ხაზს და დაიკავს დასავლეთ საქართველოს ახალციხის საფაშოდან მოსალოდნელი სამხედრო ინტერვენციისაგან².

¹ საქართველოს ისტორიის ნარკვევები, ტ. IV, თბ., 1973, გვ. 745.

² ბუტკოვი, მასალები, II, გვ. 139 (რუს.). ი. ცინცაძე, 1783 წლის შტაბგეგმითი ტრაქტატი, თბ., 1960, გვ. 282—288.

ზურაბ წერეთლის მიერ წარდგენილმა გეგმამ დასავლეთი საქართველოს სამეფო-სამთავროების და რუსეთის ერთიანი ძალით მოქმედების შესახებ თურქეთის წინააღმდეგ, რომელიც მიზნად ისახავდა თურქეთის განდევნას შავიზღვისპირეთიდან, დიდი ინტერესი გამოიწვია რუსეთის მთავრობაში (ჯერ კიდევ სოლომონ პირველი სთავაზობდა ასეთ გეგმას რუსეთს), მაგრამ რუსეთს მაშინ არ შეეძლო ამ გეგმაზე დათანხმებულიყო, ქუჩუკ-კაინარჯის საზავო შეთანხმების გამო, რომელიც დასავლეთ საქართველოზე ოსმალთა უფლებებს აღიარებდა.

1785 წლის 5 ოქტომბერს ელჩებმა მიიღეს ეკატერინე მეორის პასუხი. რა თქმა უნდა, იმერეთის მეფის წინადადება რუსეთის მფარველობაში მისი სამეფოს მიღებაზე ღიად დარჩა. ეკატერინე მეორემ დავით მეფეს ანდრია მოციქულის ორდენი უბოძა, საჩუქრები გამოუგზავნა, შეაქო მისი გადაწყვეტილება რუსეთისადმი ერთგულების შესახებ, დააიმედა იმერეთის კეთილდღეობაზე ზრუნვითა და ურჩია შემდგომში ურთიერთობის დაქვერება გრიგოლ პოტიომკინთან, რომელიც იყო კავკასიისა და შავი ზღვის სამხედრო ხაზის მთავარსარდალი და მმართველი.

1785 წლის 31 დეკემბერს ელჩებმა პეტერბურგი დატოვეს¹, ზამთარში მოსკოვში იყვნენ, ხოლო გაზაფხულზე ასტრახანში ჩამოვიდნენ და დაელოდნენ გრიგოლ პოტიომკინის კონკრეტულ პასუხს, ურომლისოდაც იმერეთში დაბრუნებას არ აპირებდნენ. გრ. პოტიომკინს კი პასუხის გაცემა არ შეეძლო.

დავით მეფე ვერ ხედავდა, რომ რუსეთის მფარველობაში აყვანილი ქართლ-კახეთი 1785 წელს თურქეთის ხელშეწყობით ლეკებმა ააოხრეს, რუსეთმა კი ვერაფერი უშველა. ერეკლე მეფის თხოვნაზე ჯარისა და ფულის გამოგზავნის შესახებ რუსეთი კონკრეტულ პასუხს ვერ იძლეოდა; დამატებითი ჯარის გამოგზავნაზე ჯერ ზამთარი, შემდეგ გაზაფხულის უგზობობა მოიმიზეზეს, რაც შეეხება ფულით დახმარებას, მოთხოვნილი 30000 მანეთის ნაცვლად 4000 მანეთი გამოგზავნეს.

1785 — 1786 წლებში ქართლ-კახეთის მდგომარეობა მეტად მძიმე იყო. თურქეთმა მთელი კავკასიის მაჰმადიანობა ფეხზე დააყენა საქართველოს წინააღმდეგ.

ახალციხის ფაშა საიდუმლო მოლაპარაკებას აწარმოებდა ერეკლე მეორესთან და მოითხოვდა მისგან, რომ თუ უშვილობა უნდოდა, რუსეთის ჯარი შორს ყოფილიყო. საზღვრებიდან და იგი არც ერთი ჯარისკაცით არ გადინდებულა.

¹ ბუტკოვი, მასალები. II. გვ. 191 (რუს.).

ასეთ პირობებში რუსეთი იმერეთს მფარველობაში ვერ მიიღებდა და იქ ჭარის გაგზავნას ვერ შეძლებდა. სწორედ ამიტომ იყო, რომ იმერეთის ელჩებს ორი წელიწადი აცდევინეს — პასუხს ვერ აძლევდნენ. რუსეთის მთავრობას არ სურდა ელჩების ცივად გამოსტუმრება, რადგან შესაფერის ამინდს ელოდა, იმედს და დიპლომატიურ მხარდაჭერას იმერეთს არ აკლებდა, თუმცა ვერაფერითარ რეალურ დახმარებას ვერ უწყევდა.

1786 წლის ბოლოს მოთმინებადაკარგულმა ელჩებმა — ზურაბ წერეთელმა და დავით კვინიხიძემ იმერეთში დაბრუნება გადაწყვიტეს, ხოლო მაქსიმე კათალიკოსი რუსეთში დარჩა გრ. პოტიომკინთან დიპლომატიური კავშირისათვის¹.

* * *

რუსეთ-საქართველოს ტრეკტატი თურქეთის მთავრობას სერიოზულად აფიქრებდა, რადგან ამიერკავკასიაში მის ბატონობას საფრთხეს უქმნიდა, ამიტომ მან ფოთისა და ბათუმის ციხეები ისევ გაამაგრა. 1786 წელს ფოთში 40, ხოლო ბათუმში 30 ზარბაზანი მოზიდეს, 35000 თურქი ტრაპიზონთან იყო დაბანაკებული (საქართველოში შემოსაქრელად), ახალციხიდან ლეკები კვლავ იმუქრებოდნენ და იმერეთზე თავდასასხმელად ემზადებოდნენ დასავლეთი საქართველო კვლავ საფრთხის წინაშე დადგა. არზრუმის ფაშამ 1786 წლის ივლისში ერეკლე მეორეს ოფიციალურად მიმართა და რუსეთთან კავშირის გაწყვეტა მოსთხოვა. პასუხის მოსაფიქრებლად ექვსი თვე დაუნიშნა. ერეკლემ პოტიომკინს მიმართა, მაგრამ მას რაიმე დახმარება არ აღმოუჩენია, მხოლოდ ის გააკეთა, რომ პროტესტი განუცხადა ახალციხის ფაშას სულეიმანს.

1787 წლის 15 აგვისტოს თურქეთმა რუსეთს ომი გამოუცხადა.

როგორც ჩანს, დავით მეფე ვერ გაერკვა ამ რთულ საგარეო-პოლიტიკურ სიტუაციაში, სათანადო დასკვნა ვერ გამოიტანა, როცა მისი ელჩები ორი წლის ამაო ლოდინის შემდეგ ხელმოცარულნი დაბრუნდნენ იმერეთში და 1787 წლის ივლისში მან კიდევ ახალი ელჩი — ბესარიონ გაბაშვილი (ბესიკი) გაგზავნა რუსეთში. ბესიკს ორი წელი აცდევინეს კრემენჩუგში და 1789 წელს მან ძლივს ჩააღწია პეტერბურგს².

¹ უფრო ვრცლად იხ. ზ. ცქიტიშვილი, დასახ. ნაშრ., გვ. 29—36.

² ი. ცინცაძე, დასახ. ნაშრ., გვ. 292—293.

ინერეთში დიდხანს არ გაგრძელებულა მშვიდობა, შეთანხმება მალე დაირღვა, ისევ ამბოხებამ იჩინა თავი.

1785 წლის 25 აპრილს ერეკლე მეფე წერილს სწერს უცნობ პირს: იმერეთში დიდი არეულობაა მეფესა და თავადებს შორის, გლეხებიც დელავენ, გადასახადებს არ იხდიან, ორივე მხარეს წინადადება მივეცი, საზღვარზე მოვიდნენ სურამში, შესაძლებელია, რაიმე ვიღონოთ მათ შესარიგებლადო¹.

ცხადია, ეს შეთანხმება არ მოხდა, რადგან დავით მეფეზე დიდი გავლენა ჰქონდა ქართლიდან გაძევებულ ვლიზბარ ერისთავს და ბესარიონ გაბაშვილს, ამიტომ მან ერეკლე მეფის რჩევას არ დაუჭერა, შერიგებაზე არ წავიდა; ამის შედეგად წერეთელი და წულუკიძეები თურქებთან გაიქცნენ².

ამ არეულობის მოთავენი ისევ ძმები ბერი და გიორგი წულუკიძეები და პაპუნა წერეთელი იყო. მათ ბანაკში აღმოჩნდა ტახტის მემკვიდრე დავით არჩილის ძეც.

საინტერესოა განვიხილოთ მოწინააღმდეგე მხარეთა წერილები, გაგზავნილი ბურნაშოვისადმი.

1785 წლის 14 მაისს დავით არჩილის ძე ბურნაშოვს სწერს: მეფე პირობას არ ასრულებს, მამულები და ციხეები წაგვართვა, დადიანი მოიწვია ჯარებით და ქვეყანას აოხრებს. სოლომონის ქვრივი და შვილიშვილი დაიქირა, მე წერეთელთან ვცხოვრობ, სოლომონ მეფის მოკეთენი გაგდებული არიან³.

გიორგი წულუკიძე და პაპუნა წერეთელი ბურნაშოვს მეფის თვითნებობაზე სწერენ და აღნიშნავენ: მეფე დავითს ჩვენი გაქრობა უნდა, თუ რამეში დამნაშავენი აღმოვიჩნდეთ, დაგვსაჯეო⁴.

16 მაისს მეფე დავით ბურნაშოვს სწერს: წულუკიძე და წერეთელი „შეურაცხყოფას მაცუნებდნენ, ისეთ სიღარიბეში ჩავევარდი, რომ არც ღომი მქონდა და არც ღვინო... წულუკიძეს და წერეთელს უნდათ, დაანგრიონ ჩვენი სამეფო, წაგვართვეს ჩვენი ძმა დავითი (არჩილის ძე) და ცხადად არღვევენ პირობას. ჩვენ აქამდე ვითმინეთ, ვფიქრობდით, თქვენი დარიგებით ხელახლავ შევრიგდებოდით. ყოველ შემთხვევაში, არავის არ მივცემ ნებას, სამეფო წამართვან, ან ძმას წამკიდონ, იგი ჩემი მემკვიდრეა. დავინც იმას მართმევს, უნდა სამეფო დააქციოს. წულუკიძემ მოინ-

¹ იასე ლორთქიფანიძე, მასალები, გვ. 49.
² ბუტკოვი, მასალები, II, გვ. 184—185 (რუს.).
³ იასე ლორთქიფანიძე, მასალები, გვ. 49.
⁴ იქვე.

დომა რაჭაში აზნაურები და გლეხები თავის ქვეშევრდომებად გაეხადა, დაეფიცებინა, რომ ჩვენი არ ისმინონ, მაგრამ იმათ ეს არ მიიღეს, ჩვენ შეგვატყობინეს, მაშინ ჩვენ ისინი, ე. ი. აზნაურები და გლეხები დავაფიცეთ ჩვენს ერთგულებაზე. რაჭაში წულუკიძემ ღალატით დაიკავა ჩვენი ციხე ჰიდროთა, შეევუთვალე, ციხე დაებრუნებინა, მან ჩვენი კაცები გამორეკა, „ციხე ჩემიაო, მოდი წაიღეო“, გზები ყველა შეკრულია, თითქმის მთელი სამეფო უჭირავთ, რამდენჯერმე გავუგზავნე კაცები, წინადადება მივეცი, არეულობა მიატოვონ, შევრიგდეთ, მაგრამ არ მიიღეს. ბევრ თავადს და აზნაურს შეპირდნენ სოფლებს და საჩუქრებს. ახლა ჩვენ ძმასთან (დავით არჩილის ძესთან) მოვიდნენ, ოთხი ტყვე ახალციხეში გაგზავნეს, ითხოვენ ოსმალეთის და ლეკების ჯარს. ამას ჩვენ ვერ მოვიტმენთ, ზომებს მივიღებთ. გიგზავნით თქვენ და ერეკლეს აზნ. ბუჭუა მასხარაშვილს, რომ მეორე მხარემ ტყუილით არ შეგაცდინოსთ“¹.

როგორც ვხედავთ, მეფე-თავადთა უთანხმოების სურათის წარმოსადგენად საინტერესოა ეს ზემოთ მოტანილი ვრცელი ამონაწერები.

ერთ-ერთი მიზეზი თავადების უკმაყოფილებისა იყო ის, რომ გამეფებისთანავე დავითმა დაიახლოვა ქართლიდან ლტოლვილი ქსნის ერისთავის შვილი ელიზბარი და თავის პირველ მრჩეველად გაიხადა.

სოლომონის მიერ გაუქმებული რაჭის საერისთავო დავით მეფემ ისევ აღადგინა, მან მოიწვია როსტომ ერისთავის შვილიშვილები — თავისი დის ელენეს შვილები — ანტონ და ლევან გიორგის ძენი და მათ რაჭა ჩააბარა, შემდეგ — 1785 წელს, გიორგი (ქიორ-ბეი) მიიწვია და რაჭის ერისთავად დასვა. რაჭის საერისთავოს მამულების ნაწილი წულუკიძეებსა და ნაწილი წერეთლებს ეკავათ. ამიტომ საერისთავოს აღდგენა მათთვის სასურველი არ იყო. სოლომონის დროს იმერეთის პირველკაცები — სარდლები ბერი წულუკიძე და პაპუნა წერეთელი, ახლა აშკარად გადაუდგნენ მეფეს. ამასთან ერთად, 1785 წლის დასაწყისში მეფემ ახალი გადასახადები შეაწერა მოსახლეობას, რამაც დიდი უკმაყოფილება გამოიწვია, ამით ისარგებლეს მეფით უკმაყოფილო თავადებმა და მისი ჩამოგდება განიზრახეს, ხალხი წააქეზეს და მეფეს სახელმწიფო გადასახადების გადახდა შეუწყვიტეს.

იმერეთი ამბოხების ქარცეცხლში გაეხვია. 1785 წლის 19 აგვისტოს ბურნაშოვი პ. პოტიომკინს ატყობინებდა: იმერეთში არეუ-

¹ იასე ლორთქიფანიძე, მასალები, გვ. 50.

ლობა გრძელდება, გლეხები თვითნებობენ, არავის უჯერებენ, გადასახადებს არ იხდიან, წულუკიძემ და წერეთელმა უარი განაცხადეს თავის სახელობებზე. შეძლებული აზნაურები განზე დგანან, არც ერთ მხარეს არ ეკედლებიან; ყველაფერს განაგებს ელიზბარ ერისთავი; მეფემ წერა-კითხვა არ იცის და უჯერებს, ვინც რას ეტყვის, ყველაფერში ენდობა დადიანს, რომელსაც მისცა 400 კომლი. დადიანს განზრახვა აქვს, იმერეთის ანგარიშზე გაძლიერდეს და ამიტომ ბადებს მხარეებს შორის განხეთქილებას. წერეთელი ახლა მთებში წავიდა, რომ ჯარი იშოვოს ოსებში და სხვა ხალხში.¹

ასეთი დაძაბული ვითარების დროს ლალატმა თავი იჩინა მეფის მომხრეთა შორისაც კი. ელიზბარ ერისთავი და ზაალ აბაშიძე მიმოწერას აწარმოებდნენ ახალციხის ფაშასთან: თუ თურქეთი მხარს დაუჭერდა დავით არჩილის ძეს და იმერეთის ტახტზე დასუამდა, ისინი მეფისაგან განდგომას აპირებდნენ და ახალციხის ფაშას 100 ტყვესა და 40 ქისა ფულს სთავაზობდნენ.²

მიუხედავად იმისა, რომ მოსახლეობამ გადასახადების გადახდაზე უარი განაცხა, ამ არეულობის დროს სამეფო აზნაურობამ და ყმა-გლეხობამ მაინც მეფეს დაუჭირა მხარი, ვინაიდან, თუ მეფე დამარცხდებოდა, აზნაურებს მამული ეკარგებოდათ და ყმა-გლეხობა ტყვედ გაიყიდებოდა თავადების მიერ.

ამ არეულობის დროს არც დავით მეფე რჩებოდა ვალში თავის მოწინააღმდეგეებთან. მან დადიანის ჯარით მოარბია როგორც წულუკიძეების, ისე მის წინააღმდეგ გამოსულ თავადთა მამულეები.³

ბერი წულუკიძე სტამბოლში ჩავიდა და ქვლეშ-ბეი შერვაშიძეს დაუეკავშირდა, მისი შუამდგომლობით სამხედრო დახმარება სთხოვა ხონთქარს, თავის მხრივ, დაპირება მისცა, რომ დავით მეფეს ტახტიდან ჩამოაგდებდა, აჯანყებულ იმერეთს დაუმორჩილებდა და ხარკსაც დაიკისრებდა. თურქეთის მთავრობამ წულუკიძის თხოვნა დააკმაყოფილა და დავით მეფის წინააღმდეგ გზ. ზავნა.⁴

დავით მეფე ენერგიულად ებრძოდა თავის მოწინააღმდეგეებს — დავით არჩილის ძეს საუფლისწულო მამული ჩამოართვა, ბერი წულუკიძეს ქუთაისის მოურავობა და სამეფოს ბოქაულთუ-

¹ ი ა ს ე ლ ო რ თ ქ ი ფ ა ნ ი ძ ე, მასალები, გვ. 52.

² ი ქ ვ ე, გვ. 53.

³ ნ. დადიანი, ქართველთ ცხოვრება, თბ., 1962, გვ. 183.

⁴ ნ. ბერძენიშვილი, დასახ. ნაშრ., გვ. 167.

ხუცესობა წაართვა, პაპუნა წერეთელი საწერეთლოს უფროსობიდან გადააყენა და მის ბიძაშვილს — ბექან წერეთელს გადასცა, მასვე წაართვა აგრეთვე ონის ქალაქი და წედისი (რომელიც 1784 წელს მიიღო მეფისაგან). რაც შეეხება წერეთელთა საფეოდალო მამულს, მისი ჩამორთმევა ვერ გაბედა, რადგან პაპუნას ძმა ზურაბი ამ დროს ელჩად იყო რუსეთში და ეს ნაბიჯი მის უკმაყოფილებას გამოიწვევდა.

დავით მეფემ გათავისუფლებულ ადგილებზე თავისი მისანდო — ერთგული პირები დასვა.

1786 წლის 15 იანვარს წულუკიძემ და წერეთელმა ახალციხის საფაშოდან 500 ლეკი და 1000 თურქი გადმოიყვანეს დასავლეთ საქართველოში და რაჭა მოარბიეს. მათ თან ახლდა დავით არჩილის ძე ბორჩალოელთა რაზმით, მაგრამ სასტიკად დამარცხდნენ. ლეკთა და თათართა ჯარი მთლიანად ამოწყდა. არცერთი კაცი საშობლოში არ დაბრუნებულა.

დამარცხებულებმა მალე ახალციხეში მოიყარეს თავი, მათ შორის დავით არჩილის ძემაც, რაც იმაზე მიგვანიშნებს, რომ ერეკლე მეფე ნეიტრალიტეტს იცავდა და იმერეთის საქმეებში არ ერეოდა. 1787 წელს დავით მეფე პ. პოტიომკინს სწერდა: „სხვათა შორის თქვენგან შემწეობა არ მიგვიღია, მეზობლები ამიტომ დაგვიცინიან, მაგრამ შინაური მტრები მაინც დავიმორჩილეთ, ზოგიერთი მათგანი მეფე ერეკლესთან წავიდა, მაგრამ არა მგონია, რომ ერეკლემ მათ მხარი დაუჭიროს“.¹ დავით მეფე არ ცდებოდა — ერეკლე მეფე იმერეთის სამეფოს საქმეებში არ ერეოდა.

• • •

როგორც ზემოთ აღინიშნა, იმერეთის ელჩები ზურაბ წერეთელი და დავით კვინიხიძე რუსეთის საიმპერატორო კარზე ორი წლის უშედეგო ლოდინის შემდეგ იმერეთში დაბრუნდნენ — 1787 წლის დასაწყისში, ხოლო მაქსიმე კათალიკოსი რუსეთში (მოზდოკში) დარჩა და გრ. პოტიომკინს წერილობით განუცხადა: სანამ იმერეთი არ იქნება მიღებული რუსეთის მფარველობაში, რუსეთიდან არ წავალ, მაგრამ პოტიომკინისაგან პასუხი არ მიუღიათ. მიუხედავად ყოველივე ამისა, დავით მეფემ 1787 წლის ივნისის დასაწყისში ბესარიონ გაბაშვილი (ბესიკი) გაგზავნა რუსეთის

¹ საქართველოს ისტორიის ნარკვევები, ტ. IV, თბ., 1973, გვ. 747.

საიმპერატორო კარზე სრულუფლებიან ელჩად. მაგრამ რაიმე წარმატებას ვერც მან მიაღწია.¹

თავისი წარუმატებლობის მიზეზში იმერეთის ელჩი ვერ ერკვეოდა და ამას ერეკლე მეფის დიპლომატებს მიაწერდა. 1789 წლის 14 თქტომბერს ბესიკმა გრ. პოტიომკინს მოხსენებითი ბარათი წარუდგინა, სადაც აღნიშნული იყო, რომ მეზობლის (ე. ი. ერეკლე მეფის — მ. რ.) მიზეზით ფერხდება იმერეთზე რუსეთის მფარველობის გაფორმებაო.

იმერეთის ელჩმა არ იცოდა, რომ 1789 წლის 12 ივლისს დავით მეფე ტახტიდან ჩამოაგდეს და დავით არჩილის ძე გაამეფეს.

იმერეთიდან კვლავ არაფერი ისმოდა. ყველაფერი ეს ბესიკმა ისევ ერეკლეს დიპლომატიას გადააბრალა. 1790 წლის 8 მარტს მან კიდევ არ იცის, რომ დავით მეფე ტახტიდან ჩამოგდებულია

ბევრი ლოდინისა და ფიქრის შემდეგ ბესიკი იმ დასკვნამდე მივიდა, რომ რუსეთი იმერეთს ვერ, ან არ დაეხმარებოდა და სამწუხაროდ, ამაში ისევ ერეკლე მეფეს აღანაშაულებდა.²

ერთხელ კიდევ ხაზი უნდა გავუსვათ იმ გარემოებას, რომ ერეკლე აქ არაფერ შუაში იყო, რუსეთს არ შეეძლო აქტიური მოქმედება ეწარმოებინა დასავლეთ საქართველოში, ჯერ ერთი, ქუჩუკ-კაინარჯის ზავის პირობათა შესაბამისად, მეორე, თურქეთს გვერდში ედგნენ დასავლეთის სახელმწიფოები და რუსეთის გაძლიერების შიშით, საკირო შემთხვევაში ისინი აქტიურ დახმარებას გაუწევდნენ პორტას, რათა რუსებისათვის წინააღმდეგობა გაეწია; ასე რომ, რუსეთი აქ დასავლეთის სახელმწიფოების პირისპირ დგებოდა; მესამე, აღმოსავლეთი და დასავლეთი საქართველოს მეფე-მთავართა ძალები და შეიარაღება სრულებით არ იყო საკმარისი სერიოზული სამხედრო წარმატების მისაღწევად, ხოლო რუსეთის დიდი ჯარის (არტილერიით) შემოყვანა ამიერკავკასიაში იმ დროის ტრანსპორტის, საერთოდ კომუნიკაციების, ობოზის, მომარაგების პირობებში სრულიად შეუძლებელი ჩანდა; მეოთხე, ჩრდილოეთი კავკასიის მაკმადრიანი ხალხები, რომლებიც საუკუნეთა მანძილზე თავს ესხმოდნენ მეზობელ ქრისტიანებს, მათ შორის ქართველებს და ძარცვა-გლეჯას ეწეოდნენ, ამ რაიონში რუსეთის სამხედრო ავანპოსტების და ციხესიმაგრეების შექმნის

¹ ნ. დადიანი, ქართველთ ცხოვრება, გვ. 183; იასელორთქიფანიძე, მასალები, გვ. 53.

² შ. ბურჯანაძე, საქართველოს სახელმწიფო მუზეუმის ისტორიული დოკუმენტები და არქივები, II, თბ., 1953, გვ. 17; იხილეთ აგრეთვე, ზ. ცქიტიცილი, გარსევან ჭავჭავაძის სახელმწიფოებრივი მოღვაწეობა, თბ., 1982, გვ. 16—17.

მიუხედავად, ჯერ კიდევ არ იყვნენ შეზღუდულნი, ისინი ყირიმთან, ახალციხესთან და თურქეთის სხვა საყრდენ პუნქტებთან კონტაქტში სისტემატურად ახორციელებდნენ მეტ-ნაკლებად მნიშვნელოვან დივერსიებს და განაპირობებდნენ რუს-ქართველთა ძალების ზურგის არასაიმედოობას.

იმერეთისა და საერთოდ საქართველოს ჩართვა რუსეთ—ოსმალეთ — დასავლეთის სახელმწიფოთა რთულ წინააღმდეგობრივ ურთიერთობაში, მე-17 საუკუნიდან მოკიდებული, საუკუნეთა მანძილზე გრძელდებოდა (მეოცე საუკუნის პირველი მსოფლიო ომის ჩათვლით), ამ ურთიერთობაში წითელი ზოლივით ჩანს დასავლეთის დიდ სახელმწიფოთა (ინგლისის, საფრანგეთის, გერმანიის, ავსტრია-უნგრეთის) თანმიმდევრული ცდა, გამოეყენებინათ თურქეთი სამხრეთ-დასავლეთისაკენ რუსეთის ძლევაში მსვლელობის შესაჩერებლად. მიუხედავად იმისა, რომ ამ მიმართულებით რუსეთმა დიდ გამარჯვებას მიაღწია თურქეთთან წარმოებულ მთელ რიგ ომებში (პირველი მსოფლიო ომის ჩათვლით), რუსეთის იმპერიის მთავარი მიზანი — შავ ზღვაზე სრული გაბატონება და სრუტეებით თავისუფალი გასვლა ხმელთაშუა ზღვაში, მიუღწეველი დარჩა, რადგან ამ გზაზე ოსმალეთი მისთვის დაუძლეველ ბარიერად აღიმართა. ეს კი, თავის მხრივ, განაპირობა თურქეთისადმი დასავლეთის აქტიურმა დახმარებამ.

ამ რთული ურთიერთბრძოლის აქტიური მონაწილე რუსეთის მხარეზე — საქართველო, რომელიც ადრე (XIX საუკუნის დამდეგამდე) სამეფო-სამთავროების სახით გამოდიოდა, რუსეთთან შეერთების შემდეგაც მუდამ გვერდში ედგა რუსეთს და როგორც ცოცხალი ძალით, ისე თავისი რესურსებით ეხმარებოდა მას. ამ ომების შედეგად ქართველმა ხალხმა თავის სანუკვარ ოცნებას — ოსმალთაგან მიტაცებული ბევრი პროვინციის დაბრუნებას — მიაღწია.

1790 წელს ახალმა მეფემ — დავით არჩილის ძემ, რომელიც იწოდა სოლომონ მეორედ, ბესიკს ისევ მიანიჭა დესპანობის რწმუნება. გრ. პოტიომკინმა ბესიკი თავისთან მიიწვია და რუსეთ-ოსმალეთის მთელი ომის დროს იგი პოტიომკინის ბანაკში იმყოფებოდა.

1791 წლის 24 იანვარს, ღამით, ორმოცი წლის ასაკში, ბესიკი გაურკვეველ ვითარებაში გარდაიცვალა ქალაქ იასში (რუმინეთი); იგი იქვე დაასაფლავეს¹.

¹ იმერეთის სხვა ელჩებიც — მაქსიმე კათალაკოსი და სემონ გაბაშვილი უცხოეთში დაიხივნენ, სამშობლოში არ დაბრუნებულან.

როგორც ზემოთ აღვნიშნეთ, დავით გიორგის ძის გამეფებაში და შემდეგ ტახტზე მომაგრებაში დიდი წვლილი ეკუთვნოდა ოდიშის მთავარს კაცია დადიანს. როდესაც იგი დასნეულდა და სიკვდილის მოახლოვება იგრძნო, იმერთა მეფე თავისთან — ოდიშში მიიწვია, თავისი მცირეწლოვანი შვილები გრიგოლი და მანუჩარი ჩააბარა და სთხოვა: რომ არ დაივიწყოს ის ღვაწლი და სამსახური, რაც კაციას მის წინაშე მიუძღოდა და მფარველობა გაუწიოს მის შვილებს, იმერთა მეფემ „აღუთქვა ფიცითა შემწეობა და ნაცვლად მისა მამობის გაწევა და წარვიდა იმერეთს“.¹

1788 წელს კაცია დადიანი გარდაიცვალა, ოდიშართ მთავრად მისი ძე 18 წლის გრიგოლი დასვეს. როგორც ჩანს, ეს კანდიდატურა დავითისათვის მიუღებელი იყო, ამიტომ იმერთა მეფემ „დაივიწყა კეთილობა კაცია დადიანისა და ანდერძიცა მისი“ და განიზრახა ოდიშის დაპყრობა, ვინაიდან ტახტზე მცირეწლოვანი იქდა და წინააღმდეგობას ვერავინ გაუწევდა. ამ მიზნით, მან შეკრიბა იმერთა ჯარი და კაციას გარდაცვალებიდან ორი თვის თავზე ოდიში დალაშქრა. გრიგოლმა თავს ლეჩხუმში გაქცევით უშველა.² მეფემ მთავრად გრიგოლის უმცროსი ძმა მანუჩარი დასვა³ და ტყვეებითა და ალაფით უკან მობრუნდა.

ამ ბრძოლით ისევე განახლდა შინაური აშლილობა, რაც დასავლეთ საქართველოში საუკუნეთა მანძილზე არ ცხრებოდა. მეფეს ქვეყნის შიგნით ბევრი მტერი ჰყავდა, ახალციხის ფაშაც უარყოფითად იყო განწყობილი მის მიმართ, ამასთან ერთად, დავით არჩილის ძე, რომელიც ერეკლე მეფის კარზე იყო, კეთილ შემთხვევას უცდიდა ტახტზე ასასვლელად.

ოდიშის თავადაზნაურობაც ორ სამტრო ბანაკად გაიყო: ერთნი მანუჩარს ემხრობოდნენ, მეორენი — გრიგოლს.

გრიგოლის მხარეზე იყვნენ: ლეჩხუმის მთავარსარდალი ქაიხოსრო გელოვანი და ოდიშის სახლთუხუცესი გიორგი ჩიქვანი. ამათ გადაწყვიტეს, დავით მეფის წინააღმდეგ დავით არჩილის ძისათვის დაეპირათ მხარი. ამათი რჩევით გრიგოლმა ერეკლე მეფისაგან გამოიწვია დავით არჩილის ძე. მიწვევის მიღებისთანავე დავით ბატონიშვილი ქართლიდან იმერეთში გადმოვიდა, სადაც მას მიეგებნენ წერეთლები, წულუკიძეები და ზოგი სხვა თავადიც.

¹ ნ ი კ ო და დ ი ა ნ ი, ქართველთ ცხოვრება, თბ., 1962, გვ. 184.
² ი ქ ვ ე.
³ ი ქ ვ ე.

შემდეგ დავითი მივიდა ლეჩხუმს, სადაც მას (მურის სასახლეში) ცოლად შერთეს გრიგოლ დადიანის და მარიამი.¹

გრიგოლ დადიანმა შეკრიბა ლეჩხუმისა და ოდიშის ჯარი და მეფის დასახვედრად მოემზადა.

თავის მხრივ, დავით გიორგის ძემ შეკრიბა იმერეთის ჯარი, დაიხმარა ოსმალეთისა და ლეკების რაზმები და მოწინააღმდეგესთან შესახვედრად გაემართა.

ერეკლე-მეფემ, დაინტერესებული იყო რა თავისი შვილიშვილის გამეფებით, ქართლ-კახეთის ლაშქარი იმერეთის საზღვარს შიაყენა² ბატონიშვილისათვის დახმარების აღმოსაჩენად. ზურაბ წერეთელი და წულუკიძეც უკმაყოფილონი იყვნენ დავით მეფისა, რადგან, როგორც ვიცით, სოლომონ მეფის მიერ ნაწყალაობევი მამულები დავითმა მათ ჩამოართვა და რაჭის ერისთავებს დაუბრუნა. გურიის მთავარსაც განდგომილად ეჭირა თავი. ასეთ მდგომარეობაში ძალთა ფარდობა მეფის სასარგებლო არ იყო.

ბრძოლა მოხდა 1789 წლის 11 ივლისს, ხონის მახლობლად, ხუნწ-მათხოჯის ქალაში³. ამ ბრძოლაში, როგორც მოსალოდნელი იყო, დავით მეფე დამარცხდა და ახალციხეში გაიქცა⁴. იმერეთის ტახტზე დავით არჩილის ძე⁵ ავიდა; ბიძის პატივსაცემად მას სოლომონ II ეწოდა.

სოლომონ II-მ ტახტზე ასვლისთანავე მიზნად დაისახა, აღედგინა სოლომონ I-ის საშინაო პოლიტიკა, რომელიც, მისი აზრით, დავით გიორგის ძემ უარყო. ეს უარყოფა იმაში გამოიხატებოდა, რომ ძველმა მეფემ რაჭისა და იმერეთის მამულები ისევ გასცა შველ მეპატრონეებზე, რაც საზიანო იყო სამეფო ტახტისათვის.⁶

ასეთმა პოლიტიკამ ისევ ორ სამტრო პარტიად გაყო იმერეთი. ერთ მხარეს სოლომონის ირგვლივ შემოიკრიბნენ წერეთლები და წულუკიძეები, ხოლო მეორე მხარეს დამარცხებული, მაგრამ ახა-

¹ ნ. დადიანი, ქართველთ ცხოვრება, გვ. 184.

² ბაგრატი და დავით ბატონიშვილები, მასალები საქართველოს ისტორიისათვის, გვ. 35.

³ იქვე.

⁴ იასე ლორთქიფანიძე, მასალები, ვგ. 51.

⁵ დავით არჩილის ძე — სოლომონ I-ის ძმისწული — დაიბადა 1772 წელს, ძამამისი არჩილ ბატონიშვილი კაცში გარდაიცვალა 1775 წელს, და როგორც ექსორია-(ანათემა) კმნილი, ანუ ეკლესიისაგან განდევნილი იოსებ კათალიკოსის (საკუთარი ძმის) მიერ ნაცვლად ეკლესიისა ან სასაფლაოსი, სანებზე დაიშარბა. ამის შემდეგ დავითი კახეთში იზრდებოდა, სადაც დედამისი, ერეკლეს ქალიშვილი ელენე ანდრონიკაშვილზე იყო გათხოვილი მეორედ (იხ. ხელნაწერთა ინსტიტუტის მოამბე, ტ. IV, თბ., 1962, გვ. 237.

⁶ იასე ლორთქიფანიძე, მასალები, გვ. 51.

ლი თაობის წარმომადგენელი — რაქის ერისთავის შთამომავალი და აბაშიძენი. იმერეთში არეულობა ისევ გრძელდებოდა.

1790 წლის 11 ივლისს დავით მეფე ოსმალეთის და ლეკთა ჯარით (რა თქმა უნდა, ახალციხის ფაშას ხელშეწყობით) ისევ შემოიჭრა იმერეთში. სოლომონ II-ც მომხდურს მიეგება, მაგრამ ზოვრეთის ბრძოლაში დამარცხდა და წერეთლების სათავედოს შეაფარა თავი.¹ დავით მეფემ ცოტა ხნით ისევ დაიკავა იმერეთის ტახტი.

ტახტიდან ჩამოგდებულმა სოლომონ II-მ დახმარებისათვის, ერთი მხრივ, თავის პაპას, ერეკლე მეორეს მიმართა, ხოლო მეორე მხრივ, თავის ცოლისძმას — გრიგოლ დადიანს. ერეკლემ მთხოვნელს დახმარება აღმოუჩინა. ქართლ-კახეთის ლაშქარს თავისი შვილიშვილი გიორგის ძე იოანე უსარდლა და იმერეთში გამოუშვა სოლომონის ისევ გასამეფებლად; ხოლო გრიგოლ დადიანმა ოდიშის ლაშქარი ქუთაისისაკენ დაძრა. თვით სოლომონ მეფეს ლეკთა დაქირავებული რაზმები ახლდნენ. დავით მეფე ორ ცეცხლშუა მოექცა, 1790 წელს ლომისიათხევის ბრძოლაში დამარცხდა და ისევ ახალციხეში გაიქცა, იმერეთის ტახტი ისევ სოლომონ მეფემ დაიკავა². იმავე 1790 წელს დავითი კვლავ შემოიჭრა იმერეთში ლეკთა დაქირავებული ბრბოებით, მაგრამ სოლომონმა ისევ დაამარცხა და დავითი კვლავ ახალციხეში გჯავიდა, ახლა უკვე საბოლოოდ.



მიუხედავად მძიმე და რთული ვითარებისა, რაც საქართველოს ყველა სამეფოსა და სამთავროში სუფევდა, საქართველოს გაერთიანების იდეა არასოდეს დასამარცხებულა. იგი მუდამ ცოცხლობდა მოწინავე წრეებში, მაგრამ მისი განხორციელება ყოველთვის გადაულახავ დაბრკოლებებს აწყდებოდა. მას შემდეგ კი, რაც რუსეთის დამხმარე კორპუსმა საქართველო დატოვა და გარეშე ძალის დახმარების იმედი გაქრა, ქართველ პოლიტიკოსებს შორის მომწიფდა აზრი საქართველოს გაერთიანების შესახებ. ამ აზრმა უფრო მკვეთრად იჩინა თავი XVIII საუკუნის 90-იანი წლების დასაწყისში, მას შემდეგ, რაც დასავლეთ საქართველოში ანარქია დამკვიდრდა და ლეკთა ბრბოები დაუპატიჟებელი, მაგრამ ხშირი სტუმრები გახდნენ.

¹ ნ. დადიანი, ქართველთა ცხოვრება, გვ. 185—186.

² იქვე.

სოლომონ I-ის გარდაცვალების შემდეგ ბრძოლა ტოლმის არ შენელებულა, ფარულად თუ აშკარად იგი მუდამ წარმოებდა და ალბათ კიდევ დიდხანს გაგრძელდებოდა, ამ ვით გიორგის ძე არ გარდაცვლილიყო და ამის შემდგომ რუსეთთან შეერთება არ განხორციელდებოდა.

ამ გაუთავებელი შინაშლილობის დროს იმერეთის მოწინააღმდეგეებში დაიბადა აზრი ქართლ-კახეთთან იმერეთის შეერთების შესახებ. ეს იქნებოდა ერთადერთი საშუალება შინაურა, შფოთვისა და არეულობის მოსასპობად. თუმცა თავადების უმეტესობა იმერეთში დაეთის მეფობის წინააღმდეგი იყო, მაგრამ ამ უკანასკნელს ყოველთვის ჰქონდა საშუალება ოსმალ-ლეკთა ჯარის დახმარებით და იმერეთში მისი მცირერიცხოვანი მომხრეებით უსიამოვნება მიეყენებინა ქვეყნისათვის. ამიტომ იმერეთის დელეგაცია, რომლის შემადგენლობაში შედიოდნენ: ეფთვიმე გენათელი, დოსითეოს ქუთათელი, სარდალი ქაიხოსრო წერეთელი, პაატა მიქელაძე, სახლთუხუცესი ზურაბ წერეთელი, სეხნია წულუკიძე, იოანე აბაშიძე, იოანე ავიაშვილი, ქაიხოსრო ჩიჯავაძე და ფიცისკაცნი: ლორთქიფანიძე, იოსელიანი, ავალიანი და სხვანი, ეახლა მეფე ერეკლეს და თხოვნით მიმართა, რათა დასავლელი საქართველოს სამეფო-სამთავროები ქართლ-კახეთისათვის შეეერთებინა და ამით საქართველო გაეერთიანებინა.

თათბირის მონაწილენი ორი დღის მანძილზე ერეკლე მეფეს იმას უმტკიცებდნენ, რომ უმჯობესია იყო იმერეთის შემოერთება, მაგრამ ერთი სიტყვაც არ თქმულა იმაზე, იძლეოდა თუ არა ამის საშუალებას საგარეო პირობები.

ერეკლეს უარი ქართლ-კახეთისათვის იმერეთის სამეფოს შემოერთებაზე სრულიადაც არ იყო ნათესაური გრძნობებით მოწვეული. ვინც არ უნდა ყოფილიყო იმერეთის ტახტზე — იქნებოდა ეს ერეკლეს შვილიშვილი სოლომონ მეორე თუ სხვა ბაგრატიონი ან არაბაგრატიონი, ერეკლეს პოზიცია აღმოსავლეთი და დასავლეთი საქართველოს გაერთიანების საკითხში, იმ დროის პირობებში, უარყოფითი უნდა ყოფილიყო, რამდენადაც იგი უკავშირდებოდა ოთხი ქვეყნის — ოსმალეთისა, სპარსეთის, რუსეთისა და საქართველოს აწეწილ, გართულებულაერთიერთობას, ამასიის ზავის პირობებს, რაც ძალაში რჩებოდა, ორი აგრესორი ქვეყნის — ოსმალეთისა და სპარსეთის ურთიერთობას საქართველოსთან დამოკიდებულების საკითხში, ე. ი. საქართველოს განაწილებას მათი გავლენისა და მოქმედების ზონებად.

საქართველოს გაერთიანება არ მოხერხდა, მაგრამ იმა-
 ვი წელს ერეკლე მეფემ სამხედრო კავშირი შეკრა დასავ-
 საქართველოს სამეფო-სამთავროებთან და ფიცით გამტკი-
 ული ურთიერთდახმარების ხელშეკრულება — ტრაქტატი¹ და-
 სადაც გატარებული იყო საქართველოს გაერთიანების იდეა
 დასწითიებული იყო, რომ მის მონაწილე მხარეებს (ქართლს,
 კახეთს, იმერეთს, გურიასა და ოდიშს) აკავშირებს სისხლით ნათე-
 საობა, საერთო ენა და ერთმორწმუნეობა. „ეს იყო საქართველოს
 ერთვნილი ერთობის მაღალი გამოსატყულება და პირდაპირი შე-
 ეგი იმ სამხედრო და პოლიტიკური თანამშრომლობისა, რომელ-
 საც ადგილი ჰქონდა მე-18 საუკუნის მეორე ნახევარში საქართვე-
 ლოს მეფეებს შორის“².

ხელშეკრულების ძალით მეფე-მთავრებს შორის მყარდებოდა
 პოლიტიკური კავშირი ერეკლე მეფის უზენაესი ხელმძღვანელო-
 ბით გარეშე მტრისაგან ქვეყნის საერთო ძალით დასაცავად.

რამდენიმე საუკუნის შემდეგ ეს იყო პირველი ნებაყოფლობითი
 სწრაფვა საქართველოს დაქსაქსული ნაწილების გაერთიანებისა-
 კენ. რითაც დამტკიცდა, რომ ქართველ ხალხში კიდევ არსებობ-
 დასალთა აუცილებელი გაერთიანების შეგნება გარეშე მტერთან
 საბრძოლველად.

„ივერიელთა ერთობის ტრაქტატის“ შედგენაში დიდი წვლილი
 მიუძღვის ქართლ-კახეთის სამეფოს ვიცე-კანცლერს სოლომონ
 ლეონიძეს, რომელმაც დასავლეთ საქართველოში იმოგზაურა და
 დოკუმენტზე ადგილზე მოაწერინა ხელი მეფე-მთავრებს.³

ინტერესმოკლებული არ იქნება, თუ განვიხილავთ სოლომონ
 ეონიძის შეხედულებას საქართველოს რუსეთთან შეერთების
 კითხთან დაკავშირებით.

აღნიშნული დოკუმენტი ოთხ ცალად გადაწერილი ხელმოწე-
 რილი და ბეჭედდასმული საქართველოს ყველა მეფე-მთავარს
 გადაეცა: თვით სოლომონ ლეონიძე, პლატონ იოსელიანის გადმო-
 ცემით, ცდილობდა, „რათა მოეყვანა ერთობასა მტკიცესა ერთნა-
 თესაობა ქართველთა, მეცადინებდა შინაკავშირითა გაუქმებინა
 გარეკავშირ“⁴, სოლომონ ლეონიძის აზრით „ერი, დატული გარე-
 თითა უც... ნათესავთაგან მფარველობითა, არის მარადის დამ-

¹ პ. იოსელიანი, დასახ. ნაშრ.
² ნ. ბერძენიშვილი, დასახ. ნაშრ., გვ. 366.
³ აღნიშნული დოკუმენტის შედგენას მეფე-მთავრები არ ესწრებოდნენ, მაგ-
 რამ წინასწარ თანხმობა ჰქონდათ მიცემული მის შედგენაზე.

დაბლებული. ერი სხვათა მფლობელობასა შინა ქვეშე შესული, არის მონა და მონა მზაკეარი, დაცინებული, მასხრად აგდებული, ვითარცა დამქარგველი თვითმყოფობისა, ჰკარგავს სულისა თვისისა საკუთარსა ძალასა და ღირსებასა. უძლური სულითა, ჰკარგავს სხეულისაცა ძალასა: ენა და მეტყველება მისი, მწერლობა და მწიგნობრობა მოედება ერსა დაძინებულსა უცხოთა ნათესავისა ენითა და ჩვეულებითა“.¹

ამიტომ ლეონიძე უპირატესობას შინაგან გაერთიანებას ანიჭებდა და ცდილობდა, შინაკავშირით გაეუქმებინა გარეკავშირი. იგი სხვის მოიმედედ დარჩენას აყვედრიდა დასავლეთ საქართველოს მეფე-მთავრებს და ძალთა გაერთიანებისაკენ მოუწოდებდა საქართველოს შესვლას რუსეთის მფარველობაში სოლომონ ლეონიძე დროებით ღონისძიებად თვლიდა. ამით იგი გათავისუფლებოდა ირანისა და თურქეთის ბატონობისაგან, ხოლო მოლონიერების შემდეგ რუსეთის მფარველობაში დარჩენა მას მიუღებლად მიაჩნდა.

• • •

1794 წელს სოლომონ მეორის მიერ დამარცხებულმა მეამბოხეებმა ისევ ახალციხეში მოიყარეს თავი, მაგრამ მათ რიგებს მოულოდნელად გამოაკლდა იმერეთის ყოფილი მეფე დავით გიორგის ძე, რომელიც 1795 წლის 11 იანვარს ახალციხეში ყვავილით გარდაიცვალა² (იგი იმერეთში ჩამოასვენეს და მშობლების გვერდით — ჭრუჭის მონასტერში დაკრძალეს).

დავითის გარდაცვალებას იმერეთში მშვიდობა არ მოყოლია. ახლა მეორე პრეტენდენტი გამოჩნდა იმერეთის ტახტზე³. ეს იყო 1780 წელს გარდაცვლილი ალექსანდრეს (სოლომონ I-ის ძის) უკანონო შვილი გიორგი, რომელსაც მხარს უჭერდნენ გენათელი ეპისკოპოსი და რამდენიმე იმერელი თავადი.⁴ შეთქმულნი ახალციხეში მყოფ გრიგოლ დადიანს დაუკავშირდნენ და ისიც სასწრაფოდ გამოეშურა ოსმალთა ჯარით, მაგრამ სოლომონ მეფემ დაასწრო

¹ პ. იოსელიანი, დასახ. ნაშრ., გვ. 24.

² შ. ბურჯანაძე, დასახ. ნაშრ., გვ. 246.

³ საქართველოს ისტორიის ნარკვევები, ტ. IV, თბ., 1973, გვ. 752.

⁴ იქვე.

და შეთქმულნი დააპატიმრა. ტახტის მაძიებელი გიორგი ბატონიშვილი მუხურის ციხეში გამოკეტა¹.

1797 წელს მან ეფთვიმე გენათელი, როგორც შეთქმულების ერთ-ერთი მონაწილე, იმერეთიდან გააძევა. ეფთვიმემ ოდიშის სამთავროს შეაფარა თავი, მაგრამ რამდენიმე ხნის შემდეგ მეფემ ისევ მიიწვია ეპისკოპოსად. მან გიორგი ბატონიშვილის ვაჟები გელათის მონასტრის ხარჯზე აღზარდა².

1806 წელს ცხრა წლის პატიმრობის შემდეგ გიორგი ბატონიშვილი მუხურის ციხიდან გამოიპარა და გენერალ რიკპოფთან მივიდა ქუთაისში, სადაც რუსეთის ქვეშევრდომობა მიიღო. იგი თბილისში გადაიყვანეს, ხოლო 1807 წელს პეტერბურგში გაგზავნეს, სადაც იმავე წელს ყვავილით გარდაიცვალა.

მისი ცოლი და შვილები გელათში იყვნენ. შემდეგ რუსეთის განკარგულებით ისინი ქართლში გადავიდნენ. ცოლს პენსია დაუნიშნეს, ხოლო შვილები თბილისის კეთილშობილთა სასწავლებელში მოათავსეს.

როცა გრიგოლ დადიანმა შეთქმულების გამჟღავნების ამბავი შეიტყო, გზიდანვე უკან გაბრუნდა, რადგან ამ დროს მისი ცოლ-შვილი სოლომონ მეფის კარზე იმყოფებოდა. ამის შემდეგ ახალციხის ფაშამ გრ. დადიანს უარი უთხრა ჯარით დახმარებაზე³. ხელმოცარული დადიანი ისევ ერეკლე-მეფეს ეახლა და დახმარება სთხოვა როგორც სიძემ⁴, მაგრამ მან ჯარით დახმარებაზე უარი განუცხადა, ხოლო სოლომონ მეფესთან შუამავლად თავისი ძე ალექსანდრე და შვილიშვილი იოანე (გიორგის ძე) გააყოლა, რათა მათ სოლომონ მეფეს, მანუჩარსა და გრიგოლს შორის შშვიდობა ჩამოეგდოთ. მაგრამ იმერთა მეფე მანუჩარის მხარეზე იყო, თავის პაპას უარი აკადრა, ხოლო გრიგოლი იმერეთში დააქავა.

რაკი გრიგოლი დარწმუნდა, რომ სოლომონი მას მთავრად არ დასვამდა, საიდუმლო კავშირი გააბა თავის ერთგულ ბიძა გიორგი დადიანის ძესთან და მასთან ერთად შეიმუშავა მოქმედების

¹ გიორგი ბატონიშვილი იყო ძე სოლომონ I-ის ვაჟის ალექსანდრესი, იგი იშვა ქორწინების გარეშე ქლენტის ასულ მარიამისაგან. ღედის გარდაცვალების შემდეგ პატარა გიორგი სოლომონ მეფემ თავის მესამე ცოლს — გულქან-ღედოფალს გააზრდევინა. გიორგიმ ცოლად შეირთო გურიელის ასული დარეჯანი, რომლისგახაც ორი ვაჟი — ალექსანდრე და დიმიტრი შეეძინა (საქ. ცენტრ. არქივი, ფ. 226, № 3226).

² ს. კაკაბაძე, დასავლეთი საქართველოს საეკლესიო საბუთები, II, 83. 166—167.

³ ნიკო დადიანი, ქართველთა ცხოვრება, გვ. 188.

⁴ გრიგოლ დადიანმა ცოლად შეირთო გიორგი ერეკლეს ძის ქალი ნინო.

გეგმა — თავიანთ მხარეზე გადმოებირებინათ ლეჩხუმის მოურავი ქაიხოსრო გელოვანი, რასაც დიდი მნიშვნელობა ექნებოდა მთავრის ტახტისათვის ბრძოლაში. გიორგიმ მიიმხრო გელოვანი, ერთ ღამეს მათ ქუთაისიდან გააპარეს გრიგოლი და ოდიშში ნოლას ციხეში მიიყვანეს¹. აქედან გრიგოლმა პატიების წერილი გაუგზავნა იმერთა მეფეს და თანაც ზავი და მშვიდობა ითხოვა, რაც სოლომონმა არ მიიღო. მან შეკრიბა იმერთა ჯარი, მოუხმო მანუჩარ დადიანს და ნოლას ციხეში გამაგრებულ ბიძა-ძმისწულს გარს შემოადგა, თუმცა ბრძოლაში დამარცხდა და ისევ ქუთაისში გაბრუნდა². გრ. დადიანი ლეჩხუმში ავიდა და გელოვანის მხარდაჭერით იქაური ციხეები და ხალხი შემოიმტკიცა³. მიუხედავად ამისა, ჯერჯერობით ოდიშის ტახტის დაპყრობა მას მაინც არ შეეძლო, ვინაიდან, ჯერ ერთი, მანუჩარს თავისი მომხრეები ჰყავდა და მეორეც, იმერთა მეფე გრიგოლს ამის საშუალებას არ მისცემდა. სოლომონ მეფემ მოინდომა გრიგოლის და გიორგის მიტყუება ქუთაისში და ღალატით სიკვდილი. „მოდით ჩემთან ქუთაისს და იქ შეგკრათ პირობა: შენ ჩემთვის, ხოლო მე შენთვის, და მიითვალე დადიანობა“⁴. ხოლო მეფეს განზრახული ჰქონდა, „ოდეს მოვალს ქუთაისს, ჩემთანა, გრიგოლ მოვკლავ და ბიძასა მისსა, ანუ შევიპყრობ“⁵.

დადიანებმა იგრძნეს, რომ მეფე ღალატს უპირებდა, მაგრამ მაინც წავიდნენ და ბანძას მდგომებმა იმერეთიდან გამოითხოვეს სასულიერო და საერო პირნი სიტყვის სიმტკიცისა და უშიშროებისათვის, მათი თანხლებით ქუთაისში მივიდნენ, მაგრამ გრიგოლის ნაცვლად სასახლეში გიორგი გამოცხადდა. იქ ნათელი გახდა, რომ მეფეს განზრახული ჰქონდა გრიგოლის მოკვლა. ეს ამბავი უკან მობრუნებულმა გიორგიმ შეატყობინა გრიგოლს, რომელმაც სასწრაფოდ დატოვა იმერეთი და უკან დაბრუნდა ისე, რომ მეფემ ვერ მოასწრო რაიმე ღონისძიების მიღება,⁶ რადგან მას იმერეთის სასულიერო და საერო პირნი ახლდნენ. ამის შემდეგ მეფე იძულებული გახდა გრიგოლი ოდიშის მთავრად ეცნო. 1798 წელს გრიგოლ დადიანსა და სოლომონ მეფეს შორის ოჯო-

¹ ნიკო დადიანი, ქართველთ ცხოვრება, გვ. 189.

² იქვე.

³ იქვე.

⁴ იქვე.

⁵ იქვე.

⁶ იქვე.

ლაში მშვიდობის ხელშეკრულება დაიდო,¹ ხოლო მანუჩარ და-
დიანმა საუფლისწულოდ სალიპარტიანო მიიღო.²

გრიგოლ დადიანის გამარჯვება ძირითადად ქაიხოსრო გელო-
ვანის მომხრეობამ გამოიწვია, მაგრამ გაძლიერებული გრიგოლი
ახლა აღარც გელოვანს მოსწონდა. ეს იმერთა მეფემ თავის სასარ-
გებლოდ გამოიყენა და გელოვანთან ისევ დაამყარა კავშირი. გრი-
გოლ დადიანმა მეფეს დაასწრო და გელოვანი მოაკვლევინა, რი-
თაც ჩაშალა მათი კავშირი.

ამის შემდეგ კიდევ უფრო გამწვავდა ურთიერთობა დადიანსა
და სოლომონს შორის, მეფემ ისევ მიიმხრო მანუჩარი და იმე-
რეთ-ლეკთა ჯარით ოდიშში შეიჭრა, გრიგოლი განდევნა და მანუ-
ჩარი გაამთავრა, მაგრამ გრიგოლის ოდიშიდან განდევნა მაინც
ვერ შეძლო, რადგან მას ერთგულებდნენ ხორგის, ხეთის, ჭაქვინ-
ჯისა და ნოლას ციხეების პატრონები.³ „ოღეს წარვიდოდა მეფე
სპითა თვისითა იმერეთად, კვალად დაიპყრობდა გრიგორი დადი-
ანობასა. და ოღეს მოვიდოდა მეფე სპითა თვისითა ოდიშად, მის-
ცემდა მანუჩარს დადიანობასა. და ვინათგან გრიგორი ვერ განს-
დევნა მეფემან სამფლობელოთ თვისით და ვერ აღასრულა საწა-
დო თვისი, ამისთვის განძვინდა და აქცევდა ოდიშსა ყოველ წელ
და აოხრებდა სპითა იმერელ-ლეკითა და სტყვევნიდა მრავალსა
ქრისტიანთა ტყვეთა, სწვიდა და აოხრებდა ოდიშსა. და მიეცა
ოდიში დიდსა მწუხარებასა, სადა ურწმუნოთა ლეკთა მრავალნი
ეკლესიანი შებლანეს“.⁴

ოდიში ორ სამტრო ბანაკად გაიყო. ერთნი მანუჩარს უჭერ-
დნენ მხარს, მეორენი — გრიგოლს. ასეთი მდგომარეობა სოლო-
მონ მეფეს უადვილებდა გრიგოლის წინააღმდეგ ბრძოლას. მან
პირველ რიგში ლეჩხუმის უკან დაბრუნება მოინდომა, რადგან
მას თავის სამკვიდრო მამულად თვლიდა.

1802 წელს მანუჩარ დადიანთან ერთად იმერთა მეფე 8000-
იანი ლაშქრით ლეჩხუმში შეიჭრა.⁵ გრიგოლს ლეჩხუმელთა უმ-
რავლესობამ უღალატა და მანუჩარის მხარეზე გადავიდა, უბრძოლ-
ველად ომწაგებულმა გრ. დადიანმა მურიდან მეფესთან საიდუმ-
ლო მოლაპარაკება გააბა: თუკი მანუჩარს დატოვებთ და წახვალთ
უკან, რასაც მეტყვით, მოგცემთ, მეფემ ჭყვიშის ციხე მოსთხო-
ვა, გრიგოლმა თანხმობა განაცხადა.⁶ ამის შემდეგ მეფემ თავისი

¹ შ. ბურჯანაძე, დასახ. ნაშრომი, გვ. 247.

² ნ. დადიანი, ქართველთ ცხოვრება, გვ. 190.

³ იქვე.

⁴ იქვე.

⁵ იქვე.

⁶ იქვე.

მოკავშირე მანუჩარი მიატოვა, თავისი ლაშქრით რაჭაში გადავიდა და აქ დაბანაკდა. გრიგოლმა ლეჩხუმში ისევ დაიკავა, ხოლო უძწეოდ დარჩებილმა მანუჩარმა ორბელის ციხეს შეათარა თავი¹.

მანუჩარი დარწმუნდა, რომ მეფეს არცერთი ძმისათვის კეთილი არ სურდა, ამიტომ ეახლა თავის ძმას გრიგოლს და პატიება სთხოვა იმ წინააღმდეგობისათვის, რასაც ადრე მის მიმართ იჩენდა. გრიგოლმა დიდი სულგრძელობით და სიხარულით მიუტევა „ყოველნი შეცოდებანი“ და ძმებს შორის ისევ კეთილი განწყობილება აღდგა². ამის შემდეგ გრ. დადიანმა მეფეს აღარ მისცა შეპირებული ჭყვიშის ციხე³.

ამრიგად, სოლომონ მეფემ მანუჩარის გაწირვით თავისი ერთგული მოკავშირე დაკარგა, ველარც „დანაპირები“ ციხე მიიღო და ძმები — დადიანები ერთმანეთს დააკავშირა, ამიერიდან ისინი იბრძოდნენ მის წინააღმდეგ.

1802 წელს მეფემ ჭყვიშის ციხე მაინც აიღო და დადიანს შეუტია. ბრძოლა მოხდა სოფ. უსახელოსთან, დადიანი დამარცხდა და ოდიშში მიბრუნდა, ხოლო სოლომონ მეფემ მთელი ლეჩხუმი შემოიმტკიცა და მის მოურავად თავისი ერთგული, გრიგოლ დადიანის მიერ მოკლული ქაიხოსრო გელოვანის შვილი ბერი გელოვანი დანიშნა, თვითონ კი იმერეთში დაბრუნდა.

დამარცხებულმა გრიგოლ დადიანმა დახმარება სთხოვა აფხაზეთის მთავარს ქელაიშ-აჰმედ-ბეგ შერვაშიძეს. აფხაზეთის მთავარმა გრ. დადიანს ფული და მძევალი — მისი პირშო მოსთხოვა დადიანი დათანხმდა, შერვაშიძეც თავისი ლაშქრით ოდიშში გამოცხადდა და სოფელ აბედათს დაბანაკდა, მაგრამ როდესაც იმერთა მეფის ჯარი და მასთან მყოფი ლეკების რაზმი იხილა, შეშინდა, მეფის ლაშქართან შებრძოლება ვერ გაბედა და უკან გაბრუნდა.

იმერთა მეფე ივანდიდიდან ოდიშში შეიჭრა და ქვეყნის დამორჩილებას შეუდგა. დადიანი გორდისა და მურის ციხეებში გამაგრდა, რომელთა აღებაც მეფემ ვერ შეძლო⁴.

სოლომონმა ოდიშის მთავრად დადიანის უმცროსი ძმა ტარიელი (იგივე ოტია) დასვა⁵, საჭილაო დაიპყრო და იგი სახასო მამუ-

¹ ნ. დადიანი, ქართველთ ცხოვრება, გვ. 190.

² იქვე, გვ. 191.

³ იქვე.

⁴ ბაგრატი და დავით ბატონიშვილები, ახალი მოთხრობა, თბ., 1941, გვ. 80.

⁵ იქვე.

ლად გამოაცხადა.¹ ლაშქრის ნახევარი თავისი ბატონობის უზრუნველსაყოფად ოდიშში დატოვა² და თვითონ იმერეთში მობრუნდა. ამ წარმატებით აღფრთოვანებული იმერთა მეფე აღნიშნავდა: „მე შევეუერთე ლეჩხუმში ჩემს სამეფოს, რომელსაც იგი მეჭკვიდრეობით ეკუთვნოდა, ხოლო ოდიშში დავსვი დადიანად ოტია, ძმა გრიგოლისა, ჩემდამი მორჩილებით“.³ მაგრამ მიუხედავად იმერთა მეფის ამ წარმატებისა,⁴ გრ. დადიანი ოდიშის გარკვეულ ტერიტორიაზე მაინც ბატონობდა.⁴ განხეორდა ადრინდელი სურათი — მთელი ოდიშიდან მისი გამოდევნა იმერთა მეფემ მაინც ვერ შეძლო.

სოლომონ მეფის ძალადობისაგან რომ თავი დაეღწია, გრიგოლ დადიანმა დახმარებისათვის მიმართა რუსეთის წარმომადგენელს საქართველოში პავლე ციციანოვს. ციციანოვმა პირველ ხანებში მეფემთავარს ერთმანეთში მორიგება და მშვიდობიანი ურთიერთობის დამყარება ურჩია, მაგრამ სოლომონ მეფე უარზე იდგა და კატეგორიულად მოითხოვდა დადიანის მორჩილებას და იმერეთისათვის ლეჩხუმის გადაცემას. გრ. დადიანს ეს არ სურდა, ამიტომ მან ციციანოვს, სოლომონისაგან რომ თავი დაეღწია, რუსეთის მფარველობაში შესვლა სთხოვა,⁵ წინააღმდეგ შემთხვევაში იგი, მუქარანარევი კილოთი წერდა — თუ რუსეთი ამაზე უარს იტყოდა, იგი იძულებული გახდებოდა თურქეთის ქვეშევრდომობა მიეღო: მსურს რუსეთის მფარველობის ქვეშ ვიყო — სწერდა გრ. დადიანი ციციანოვს — რათა თავი დაეღწიო სოლომონ მეფის ბრძკვალეებს, თუ რუსეთის მთავრობა არ მიშველის, მაშინ იძულებული ვიქნები მთელი ჩემი მიწა-წყლით ოსმალეთის ქვეშევრდომობა მივიღო.

რუსეთის საგარეო პოლიტიკის გეგმაში მთელი საქართველოს შემოერთება შედიოდა, ამიტომ ციციანოვისათვის ასეთი წინადადება მეტად ხელსაყრელი იყო. ციციანოვმა გადაწყვიტა, მიეღო დადიანის წინადადება და მისთვის მფარველობა გაეწია. მან კავშირი დაამყარა ოდიშის მთავართან.

სანამ შეერთება მოხდებოდა, ციციანოვმა სცადა, ეს საკითხი გაერკვია ოსმალეთთან, რომლის პროტექტორატის ქვეშაც ნომინალურად ითვლებოდა ოდიში. ამის შესახებ ციციანოვმა რუსე-

¹ ს. კაკაბაძე, დასავლეთ საქართველოს საეკლესიო საბუთები, II, თბ., 1922, გვ. 142.

² ბაგრატი და დავით ბატონიშვილები, დასახ. ნაშრ., გვ. 80.

³ კაკა, II, გვ. 341 (რუს.).

⁴ ნ. დადიანი, ქართველთ ცხოვრება, გვ. 192.

⁵ იქვე.

თის ელჩს კონსტანტინოპოლში იტალინსკის სთხოვა, გაერკვია: ხომ არ ჩათვლიდა ოსმალეთის მთავრობა სამეგრელოს შემოერთებას 1774 წლის ქუჩუკ-კაინარჯის ზავის დარღვევად. ამის პარალელურად ციციანოვი მოლაპარაკებას აწარმოებდა გრიგოლ დადიანთან რუსეთის ქვეშევრდომობაში შესვლის პირობების შესახებ.

ამ დროს თურქეთს ნაპოლეონის აგრესია ემუქრებოდა და სტამბოლის მთავრობა ხსნას რუსეთისაგან ელოდა; ასეთ ვითარებაში რუსეთთან სამეგრელოს შეერთების საკითხი თურქეთის მთავრობის შემოფოთებას არ იწვევდა. რეის-ეფენდი დუმილით შეხვდა იტალინსკის წინადადებას და რუსეთის ელჩმა დაინახა, რომ თურქეთი უმტკივნეულოდ დათმობდა არა მარტო სამეგრელოს, არამედ იმერეთსაც. ხოლო პეტერბურგის საიმპერატორო კარმა არც კი დაუცადა იტალინსკის პასუხს და ციციანოვი გააფრთხილა, რომ სამეგრელო დაეკავებინა — „არ გპირდებით თქვენ — სწერდა ალექსანდრე I ციციანოვს — რომ სამეგრელოს დასაკავებლად ელჩ იტალინსკის ცნობას მოუცადოთ; ოტომანის პორტა, რომელსაც სამთავროზე ისეთი მოჩვენებითი ხელისუფლება აქვს, რომ მას არავითარი სარგებლობა არ მოაქვს მისთვის, ამ შემთხვევაში... არ მოინდომებს, დაარღვიოს რუსეთთან არსებული კეთილგანწყობილება“¹.

მოლაპარაკება ციციანოვსა და გრიგოლ დადიანს შორის დამთავრდა და სათანადო აქტი 1803 წლის 4 დეკემბერს გაფორმდა. ამ აქტის თანახმად, ოდიშის სამთავრო ავტონომიური უფლებით უერთდებოდა რუსეთს, გრ. დადიანი რჩებოდა ოდიშის მთავრად და მემკვიდრედ ცხადდებოდა მისი ვაჟი. ყოველ ახალ მთავარს ამტკიცებდა რუსეთის სამეფო კარი და უგზავნიდა სამთავროს დროშასა და ხმალს. სამთავროში უნდა მდგარიყო რუსეთის ჯარი, რომელსაც სამთავრო უნდა დაეცვა გარეშე მტრისაგან.

ეს ჯარი მთავარს უნდა უზრუნველყო ბინით, სათბობით და განათებით, უნდა მოემარაგებინა ზომიერ ფასებში სურსათ-სანოჯაგით.

თუ სამთავროში რაიმე მადანი აღმოჩნდებოდა და მის დამუშავებას დაიწყებდნენ, შემოსავლის წილი მთავარსაც უნდა მისცემოდა, ხოლო მუშახელი ზომიერ ფასებში მთავარს უნდა გამოეყვანა. თუ ახალი ქალაქი გაშენდებოდა და აქედან რუსეთის ხაზინას შემოსავალი გაუჩნდებოდა, დადიანსაც უნდა მიეღო შემოსავლის ნაწილი.

¹ დ უ ბ რ ო ვ ი ნ ი, ისტორია, ტ. IV, გვ. 89 (რუს.).

თუ სამთავროში ნაცსადგური აშენდებოდა, იქიდან დადიანი შემოსავალს ვერ მიიღებდა. რუსეთის ფლოტისათვის დადიანს უსასყიდლოდ უნდა მიეწოდებინა ხე-ტყე, ხოლო მუშახელის ხარჯები რუსეთის ხაზინას უნდა გადაეხადა.

შინაური მმართველობა დადიანის უფლებებში რჩებოდა, მხოლოდ სისხლის სამართლის საქმეები გადადიოდა რუსეთის მოხელის გამგებლობაში.

მთავარი ვალდებული იყო ყველაფერში მთავარმართველს, ანდა მის მიერ მივლინებულ რუს მოხელეს¹ დამორჩილებოდა.

რუსეთის ქვეშევრდომობაში შესვლის ერთ-ერთი პირობა იყო ლეჩხუმის საკითხი, რომელზედაც თავის პრეტენზიას აცხადებდა იმერეთის მეფე. რუსეთთან შეთანხმებით ლეჩხუმი ოდიშის შემადგენლობაში უნდა დარჩენილიყო².

მთავარს უბოძეს ალექსანდრე ნეველის ორდენი, ხმალი, დროშა და ძვირფასი საჩუქრები.

ოდიშის სამთავროს შესვლამ რუსეთის მფარველობაში დიდი შთაბეჭდილება მოახდინა მთელ დასავლეთ საქართველოში. ოდიშისა და ლეჩხუმის გავლენიანი წრეები, რომელნიც აქამდე სოლომონ მეფეს უჭერდნენ მხარს, ახლა უკვე დადიანის მხარეზე გადავიდნენ, ლეჩხუმის მოურავი ბერი გელოვანიც დადიანს მიემხრო; მისი დახმარებით დადიანმა მალე შეძლო ოდიშის ციხესიმაგრეების ხელში ჩაგდება და 1804 წელს მთელი ოდიში მისი მბრძანებლობის ქვეშ მოექცა.

ოდიშის სამთავროს შესვლა რუსეთის მფარველობაში იმერეთის მეფის საწინააღმდეგოდ გადადგმული ნაბიჯი იყო, ეს იმერეთის სამეფოს პოლიტიკურ პოზიციებს დიდად აუსუსტებდა, ამიერიდან იმერთა მეფეს აღარ შეეძლო ოდიშის დალაშქვრა და მის საშინაო საქმეებში ჩარევა.

¹ თვდაპირველად რუსეთის სამეფო კარზე შეთანხმების ასეთი პუნქტების წინააღმდეგი იყვნენ, მათ სურდათ თავიდანვე დადიანისათვის მთავრის ნაცვლად უფროსი ეწოდებინათ და რუს მოხელედ ექციათ, სამთავროს შემოსავლის საქმეები ჩამოერთმიათ და მისთვის ჭამაგირი გაეჩინათ, მაგრამ ციციანოვის შტკოცებით, ოდიშისა და დადიანის უკმაყოფილებას შეიძლება აჯანყებაც გამოეწვია, ხოლო სამეგრელოს იარაღით დაპყრობა რამდენიმე ათას კაცს შეიწირავდა; გარდა ამისა, რუსეთი საბოლოოდ დაკარგავდა ხალხის ნდობას. ამიტომ, ციციანოვის რჩევით, ეს პუნქტები უცვლელად უნდა დამტკიცებულიყო; შემდეგში, როცა რუსეთის ქარი იქ შევიდოდა და მომძლავრდებოდა, მთავრის უფლების შეკვეცა და სამთავროს გაუქმებაც გახდებოდა შესაძლებელი. ციციანოვის ამ რჩევას ანგარიში გაუწიეს და ყველა პუნქტი უცვლელად დამტკიცეს.

² აკაი, II, გვ. 460—461 (რუს.).

აპრიგად, რუსეთის მთავრობამ ისარგებლა სამეგრელო-იმერეთს შორის ჩამოვარდნილი უთანხმოებით და ადვილად ჩაიგდო ხელში ოდიშის სამთავრო.

1804 წელს გრიგოლ დადიანი გარდაიცვალა. მისი მემკვიდრე 12 წლის ლევანი აფხაზეთის მთავარს ქელაიშ-ბეგ შერვაშიძეს ჰყავდა მძევლად. იგი ფულის გარეშე ლევანს არ ათავისუფლებდა. გან-რისხებულმა ციციანოვმა ბრძანება გასცა, თუ შერვაშიძე მძევალს არ გაათავისუფლებდა, იარაღით შეემუსრათ იგი¹. ოდიშის ტერი-ტორიაზე მდგომმა გენერალმა რიკპოფმა რუსთა პოლკით სამ სა-ათში აიღო ძლიერ გამაგრებული ანაკლიის ციხე. აფხაზეთის მთა-ვარს თავზარი დასცა რუსული იარაღის ძლიერებამ და მძევალი სასწრაფოდ გაათავისუფლდა²; იგი რუსეთის ხელმწიფის ბრძანებით, ოდიშის მთავრად დაინიშნა ლევან V-ის (1804—1840) სახელწო-დებით.

ლევანის მცირეწლოვანების გამო რეგენტად მისი დედა ნინო დანიშნეს³, რომელიც ოდიშს მართავდა ოთხი წევრისაგან შემდგა-რი საბჭოს დახმარებით. საბჭოში შედიოდნენ: ნიკო დადიანი (დიდ ხიკოდ წოდებულნი)⁴, ბესარიონ ჰყონდიდელი, სახლთუხუცესი გა-ორგი ჩიჭვანი და ლეჩხუმის მოურავი ბერი გელოვანი.

დედოფალ ნინოსა და საბჭოს მთავარი საზრუნავი იყო სამთავ-როს საქმეების მოწესრიგება, მაგრამ ნინოსა და საბჭოს შორის მა-ლე (1808 წ.) უთანხმოება ჩამოვარდა, თუმცა ამას ჩქარა მოეღო ბოლო, რადგან 1811 წელს ლევან V სრულწლოვანი გახდა და რუ-სეთის საიმპერატორო კარმა სრულუფლებიან მთავრად დაამტკი-ცა.

ლევანის მთავარი მრჩეველი და ვეზირი ნიკო დადიანი გახდა, რომელიც დიდ დახმარებას უწევდა ახალგაზრდა მთავარს, როგორც საშინაო, ისე საგარეო საქმეებში.

ნიკო დადიანმა მთავარს სახელმძღვანელოდ შეუდგინა „დას-ტურლამა“, რომელშიც აღნიშნულია ყველა ის უფლება-მოვალეო-ბანი, რომელთა შესრულება ევალებოდა ახალგაზრდა მთავარს, მაგრამ ლევანი ნაკლებ ინტერესს იჩენდა სამთავროს მართვა-გამ-გეობის საქმეებში, მას ნადირობა და გართობა უფრო აინტერესებ-და.

¹ ნიკო დადიანი, ქართველთ ცხოვრება, გვ. 194.

² იქვე.

³ ნინო დედოფალი იყო საქართველოს უკანასკნელი მეფის გიორგი XIII-ის ქალიშვილი.

⁴ ნიკო დადიანი — ისტორიკოსი, ავტორი ამ წიგნში წყაროდ გამოყენებული „ქართველთ ცხოვრებისა“.

იმერეთა მონაწილეობა კრწანისის ბრძოლაში

რაც ერთის თაობისაგან კუშმარიტებად არის ცნობილი, ხშირად ის შემდგომი თაობისათვის საეჭვოდ ხდება, რადგანაც ისტორიაში ყველაფერი ნელ-ნელა ირკვევა ნათლად.

დ რ ე ბ ე რ •

ქერიმ-ხან ზენდის სიკვდილის შემდეგ (1779 წ.) ირანში ისევ დაიწყო შინაომი ტახტისათვის, რომელიც ორი საგვარეულოს ურთიერთგაუღელტეხილში დაშტაურდა. ზენდების გვარიდან გადაარჩა მხოლოდ ლუტფალი-ხანი, რომელიც ცოტა ხნით კიდევ მომძლავრდა იმდროინდელ სატახტო ქალაქ შირაზში.

ქერიმ-ხანს აღმოსავლური ჩვეულებების მიხედვით მძევლად ჰყავდა თურქ-ყაჯართა ტომის წარმომადგენელი ალა-მაჰმად-ხანი, რომლის მამა ქერიმ-ხანმა მოაკვლევინა, ხოლო თვით იგი ბავშვობაში დაასაკურთხა.

ქერიმ-ხანის გარდაცვალებისთანავე ალა-მაჰმად-ხანი თავისი მამის სამკვიდრო ასტრახანში გაიქცა და იქიდან შეუდგა მზადებას ერანში გასაბატონებლად. მან დაიპყრო: თალიში, გილანი, მაზანდარანი და 1791 წელს თითქმის მთელი აზერბაიჯანი დაიმორჩილა.

თავის სატახტო ქალაქად მან თეირანი გამოაცხადა; 1792 წელს ალა-მაჰმად-ხანმა ისპაჰანიც დაიმორჩილა, ხოლო 1794 წელს ლუტფალი-ხანიც დაამარცხა და მთელი ირანის მბრძანებელი გახდა.

ტახტისათვის ბრძოლის პერიოდში ალა-მაჰმად-ხანი, „მშობასა და სიყვარულს“ სთავაზობდა „გურჯისტანის“ მეფეს ერეკლეს, მაგრამ როდესაც ტახტზე განმტკიცდა, მან დამოკიდებულება შეცვალა ერეკლესადმი. ისევე, როგორც მისი შორსმჭვრეტელი წინამორბედნი, ალა-მაჰმად-ხანიც ირანისათვის დიდად სახიფათოდ თვლიდა რუსების განმტკიცებას აზერბაიჯანში; გეორგიევსკის ტრაქტატის დადება მას ირანის უფლებების შებლაღვივად მიაჩნდა. ამიტომ იგი ქართლ-კახეთში ირანის ძველი ბატონობის აღდგენას შეეცადა — ერეკლე მეფისაგან მან რუსეთ-საქართველოს პოლიტიკური კავშირის გაუქმება და ირანისადმი ქართლ-კახეთის დამორჩილება მოითხოვა. საჰაგიეროდ, — ალა-მაჰმად ხანი დიდ პატივსა და წყალობას ჰპირდებოდა ერეკლე მეფეს.

ალა-მაჰმად-ხანის წინადადება ერეკლე მეფისათვის მიუღებელი იყო, რადგან 1783 წლის ტრაქტატით საქართველოს ბედი მან რუსეთს დაუკავშირა. ტრაქტატის ძალით რუსეთის მთავრობა

ვალდებული იყო, ერეკლეს დახმარებოდა, მაგრამ მოკავშირე-მფარველის დანაპირები არ ჩანდა.

1793 წელს ერეკლე მეფემ დანამდვილებით იცოდა, რომ ირანის მბრძანებელს გადაწყვეტილი ჰქონდა საქართველოზე ლაშქრობა, აქეთ ეპატიებოდნენ მას ქართლ-კახეთის მეტოქე კავკასიელი ხანებიც.

რადგან რუსეთიდან დახმარების იმედი არ ჰქონდათ, ერეკლე მეფემ და სოლომონ II-მ ძველ ნაცად ხერხს მიმართეს და თურქეთ-ირანს შორის უთანხმოების ჩამოგდება სცადეს, რათა ამით თავი დაეღწიათ ირანის შაჰის რისხვისაგან. მათ კავშირი დაამყარეს თურქეთის მთავრობასთან და ირანის წინააღმდეგ დახმარება სთხოვეს, მაგრამ უარი მიიღეს.

საქართველოს პოლიტიკურმა მესვეურებმა არ იცოდნენ, რომ ირანის შაჰს თავდასხმა საქართველოზე სწორედ თურქეთთან და ევროპის სახელმწიფოებთან შეთანხმებით მზადდებოდა, რომ აქ საქმე ეხებოდა ინგლის-საფრანგეთ-თურქეთ-ირანის გაერთიანებულ წინააღმდეგობას ამიერკავკასიაში რუსეთის გაბატონებისადმი, მართლაც, ალა-მაჰმად-ხანს საქართველოში გამარჯვება თურქეთმა, ინგლისმა და საფრანგეთმა დიდი სიხარულით მიულოცეს, რადგან ეს იყო არა მარტო საქართველოს მეფის დამარცხება, არამედ რუსეთის დიდი მარცხიც ამიერკავკასიაში.

1793 წელს ერეკლე რუსეთში მყოფ თავის შვილს მირიანს სწერდა, დაესვა საკითხი რუსეთის მთავრობის წინაშე, რათა აღეკვეთათ ირანის შაჰის მოსალოდნელი თავდასხმა საქართველოზე. ერეკლე მეფის თხოვნის პასუხად იმავე წლის 30 მაისს რუსეთის სამხედრო საბჭოზე წაიკითხეს ერეკლე მეფის თხოვნა ალა-მაჰმად-ხანისაგან დაცვისა და საქართველოში არტილერიის გამოგზავნის შესახებ¹.

საბჭომ ბუნდოვანი ბრძანება გაუგზავნა გუდოვიჩს, როგორც სპარსეთის მოსაზღვრე მხარის უფროსს, რომ თუკი ირანის შაჰი ნამდვილად ფიქრობს საქართველოს დალაშქვრას, შეაგონოს მას, რომ გუდოვიჩი ამას გულგრილად ვერ შეხვდება და რომ გუდოვიჩმა წააქეზოს მეზობელი ხანები, რათა საერთო ძალით წინააღმდეგობა გაუწიონ ალა-მაჰმად-ხანს. ამასთანავე, შეძლებისდაგვარად დაეხმაროს მათ და თვით მეფეს, მაგრამ ერიდოს ბევრ ხარჯსა და დაუიდარაბას.

¹ ნ. ბერძენიშვილის ცნობით, ეს არტილერია ერეკლე მეფის ხარჯზე იყო რუსეთში შეკვეთილი, რბმელიც კრწანისის ბრძოლის შემდეგაც კი არ მოუღიათ.

გუდოვიჩს, როგორც ირკვევა, სინამდვილეში არაფერი არ გაუკეთებია ამ მიმართულებით.

ამრიგად, ერთი მხრივ, პეტერბურგის მთავრობის მუდმივი მიყრუება ერეკლეს თხოვნაზე და, მეორე მხრივ, გუდოვიჩის მიერ შეუსრულებლობა სამხედრო საბჭოს 1793 წლის ბრძანებისა, იყო იმის მიზეზი, რომ ერეკლე მეფემ ტრაქტატის ძალით მოთხოვნილი დახმარება ვერ მიიღო და იგი იძულებული გახდა მხოლოდ თავისი და სოლომონ მეფის მცირერიცხოვანი ჯარებით შებრძოლებოდა რიცხობრივად შეიღწეოდა მეტ მტერს. ამას დაემატა ის გარემოებაც, რომ ბატონიშვილები და ქართლ-კახეთის ფეოდალების უმრავლესობა, უკმაყოფილონი ერეკლე მეფის ასეთი უშედეგო რუსული ორიენტაციით, გულგრილად შეხვდნენ ამ უბედურებას და უფრო თავიანთ თავზე ფიქრობდნენ, ვიდრე ქართული მიწა-წყლის დაცვაზე. ბატონიშვილებიც საჭიროდ არ თვლიდნენ საბრძოლველად გამოსვლას, ზოგი კი მცირე ამალით მოვიდა. გიორგი ბატონიშვილი 4000 მეომრით სიღნაღში იყო, იულონი ქართლში, და არც კი უფიქრიათ, ერეკლეს მიშველებოდნენ გასაჭირის დროს. ქიზიყის მოურავმა ზაქარია ანდრონიკაშვილმა ბრძოლის წინა ღამეს სოღანლულიდან 2000 მეომარი გააპარა მოტყუებით. ერეკლე მეფის მტრები ხალხში დაძრწოდნენ და მეფის სახელით უიმედობასა და დახიზვნას მოუწოდებდნენ.

ალა-მაჰმად-ხანმა 35000 მეომარი მოიყვანა, ერეკლე მეფემ მას 5000 დაუპირისპირა და მაინც გაუმართა ბრძოლა, მაგრამ რიცხობრივმა უპირატესობამ თავისი გაიტანა და მრავალშვილად დახდის გმირი მეფე დამარცხდა.

ქართველები გუდოვიჩის უმოქმედობას ალა-მაჰმად-ხანის შემოხვევისას იმით ხსნიდნენ, რომ იგი ალა-მაჰმად-ხანისაგან საჩუქრებს ღებულობდა. გუდოვიჩის ანგარება თვით რუსეთის საზოგადოებაშიც იყო ცნობილი¹.

ერთ-ერთ ქართულ წყაროში აღნიშნულია, რომ გუდოვიჩმა ერეკლე მეფეს დახმარება იმიტომ არ აღმოუჩინა, რომ ალა-მაჰმად-ხანისაგან „ფეშქაშსა“ და ნივთებს იღებდაო²: „რომელსაცა არ ენება მოცემა და არა მოსცა მეფესა შეწევნა, ამისთვის რომელ ხოჯა უვლინებდის ფეშქაშსა და ნივთსა, რომელიცა ატყუა და ესრეთ შეემთხვა მეფესა“.

¹ ი. ლორთქიფანიძე, მასალები, გვ. 86—87.

² მასალები საქართველოს ისტორიისათვის, მ. ჭანაშვილის გამოცემა, 1905, გვ. 45—46.

იმ სხვა მიზეზებთან ერთად კრწანისის ტრაგედიის ერთ-ერთი მიზეზი ქართლ-კახეთის შინაგანი დაუძლეულობა და ცენტრალური ხელისუფლების სისუსტე იყო. თავადური რეაქცია ქვეყანას ისე მოსდებოდა, რომ 40000 მეომრის ნაცვლად ერეკლე მეფემ 5000 ძლივს შეაგროვა, ხოლო აქედან 3000 იმერელი იყო.

აი რას წერდა ერეკლე მეფე გუდოვიჩისადმი ვაგზავნილ წერილში: „ჩვენ რომ ყოვლად მოწყალე დედოფლის მიერ დაიმედებული არ ვყოფილიყავით და დარწმუნებული არ ვყოფილიყავით თქვენს დახმარებაში, მაშინ სხვა მხრიდან მოწვეული ჯარებით მას (ალა-შაჰმად-ხანს) წინ აღვუდგებოდი ანდა სხვა ხერხით დავიცავდი თქვენს სამეფოს. მაგრამ ჩვენ დარწმუნებული ვიყავით თქვენი და უშაღლესი კარის დახმარებაში“¹.

1795 წლის კრწანისის ბრძოლამ გამოამჟღავნა საქართველოს ღრმა კრიზისი. საქართველოს სამეფოს გაუქმებისა და მისი რუსეთთან შეერთების მომხრეებს გაუჩნდათ ახალი საბუთი, რომ „არსებული ხელისუფლება გაკოტრებულია, რომ თვით საქართველოს გადასარჩენად აუცილებელია მისი შემოერთება, იქ პოლიტიკური ხელისუფლების გაუქმება, რომ არსებული საქართველო არც მოკავშირედ ვარგა და არც ვასალად, რომ ამის გამო, ბოლოს და ბოლოს, საკუთრივ რუსეთის ინტერესები ზიანდება, რომ ამ ქვეყნის შემოერთება სრულიად ახალ პერსპექტივას გადაშლის ირან-ოსმალეთთან ბრძოლაში, რომ ამავე დროს, ეს საქმე (მეფობის გაუქმება საქართველოში) ფრიალად აღვილად მოგვარდება: ამის მომხრენი ბევრი იშოვება თვით ქართველთა შორის“².

XX საუკუნის დასაწყისის ქართულ სამეცნიერო ლიტერატურაში გავრცელდა აზრი, თითქოს ალა-შაჰმად-ხანის 1795 წლის შემოსევას საქართველოში ხელს უწყობდა თვით რუსეთის საიმპერატორო კარი. 1796 წელს საქართველოზე მეორე გამოლაშქრებაშიც თითქოს რუსეთის ხელი ერიაო. ამას იმით ხსნიდნენ, რომ „შინათგამცემი“ მტრები ეკატერინე II-ს უმტკიცებდნენ, ვიდრე მეფე ერეკლეს ქართულ მხედრობას არ გაუწყვეტთ და სამხედრო ძალას არ მოუტპობთ, მანამ საქართველოს ხელში ვერ ჩაიგდებთო. ამ ძალის შოსპობა კი რუსეთს თითქოს ირანის შაჰის ხელით სურდა³.

ალა-შაჰმად-ხანის შემოსევებისა და კრწანისის ბრძოლის შესახებ ამ მცირე ცნობების შემდეგ შევხებით ამ ბრძოლაში იმერეთის მონაწილეობის საკითხს. საქართველოში გავრცელებული იყო

¹ ა. ც ა გ ა რ ე ლ ი, ტ. II, გვ. 105 (რუს.).

² ნ. ბ ე რ ძ ე ნ ი შ ვ ი ლ ი, საქართველოს ისტორიის საკითხები, ტ. IV, თბ., 1967, გვ. 194.

³ ზ. კ ი კ ი ნ ა ძ ე, ფარული საზოგადოების დაარსების მიზეზები, თბ., 1919,

ხმები: იმერლებმა მეფე ერეკლეს ალა-შაჰმად-ხანის შემოსევის დროს უღალატეს, მიშველების მაგიერ ქალაქი თბილისი გაძარცვეს, ხალხი დაატყვევეს და წაიყვანესო, ეს არ იქმარეს და გზად მიმავალმა იმერლებმა ქართლის სოფლებს დაუწყეს ძარცვა-რბევას; 10000 ტყვე ახალციხეში გადაიყვანეს, გაყიდეს და აღებული ფულის ნახევარი მეფეს მიართვეს, ნახევარი თვითონ დაიტოვესო.

უფრო მოგვიანებით გაჩნდნენ „კრუ მესტორიენი“, რომელნიც ამბობდნენ, რომ იმერლებმა არამც თუ მართო ერეკლე მეფეს უღალატეს, არამედ მათ დალუპეს საქართველო და ყველაფერი ფერფლად აქციესო¹.

ერევნის ხანთან დასახმარებლად მიმავალი ერეკლე და სოლომონ მეფეები ყაზახში იყვნენ დაბანაკებულნი, როცა შეიტყვეს ირანის შაჰის გამოლაშქრება საქართველოზე, ისინი აიყარნენ და სასწრაფოდ უკან, თბილისში მობრუნდნენ.

9 და 10 სექტემბერს ქართველებმა მკაცრი ბრძოლები გადაიხადეს და კიდეც დაამარცხეს მტერი, მაგრამ 11 სექტემბერს თვითონ იქნენ მტრისგან დამარცხებულნი.

გაერცელებული აზრით, ალა-შაჰმად-ხანი 11 სექტემბერს თითქოს უკან გაბრუნებას აპირებდა, მაგრამ მოლაღატეებმა ღამით თბილისიდან კაცი გააპარეს, რომელიც ალა-შაჰმად-ხანს დაეწია და საქართველოს მძიმე მდგომარეობა (რომ ქართველებს მკირეჩიცხოვანი ძალები ჰყავთო) შეატყობინა. ამის შემდეგ თითქოს ალა-შაჰმად-ხანი ისევ შეტევაზე გადმოვიდა და თბილისი აიღო. დადგენილი არ არის არც ამ ღალატის ფაქტი, არც ის, რომ სპარსელები მართლაც უკან გაბრუნებას აპირებდნენ.

იასე ცინცაძის მიხედვით საქმე შემდეგში ყოფილა: 10 სექტემბერს ბრძოლაში გამარჯვება ქართველებს გენერალურ ბრძოლაში გამარჯვებად მიუჩნევიათ, მაგრამ, როდესაც მტერმა 11 სექტემბერს მთლიანი ძალით განაახლა შემოტევა, ქართველებმა ეს შინაგამცემლებს დააბრალებს².

ალ. ორბელიანი ღალატს სომხებს აბრალებს, ხოლო თვით ამ ბრძოლის მონაწილე, ისტორიკოსი დავით ბატონიშვილი კრწანისის ველზე ქართველების დამარცხების მიზეზს იმერეთის დამხმარე რაზმის „უხეირო“ მოქმედებით ხსნის³.

¹ ესარგებლობ ზ. კიკინაძის შრომით „მეფე ერეკლესა და ალა-შაჰმად-ხანის ომი და ამ ომში იმერლების ღალატი მართალა თუ არა?“ თბ., 1895.

² ი. ცინცაძე, ალა-შაჰმად-ხანის თავდასხმა საქართველოზე, თბ., 1969, გვ. 203.

³ დ. ბატონიშვილი, ახალი ისტორია, თ. ლომოურის გამოცემა, თბ. 1941. გვ. 23.

დავით ბატონიშვილის მიხედვით იმერელ მეომრებს მეორე დღეს ბრძოლის ნაცვლად ხალხის ძარცვა დაუწყიათ, ხოლო ორივე მეფეს 1500 მეომარიღა შერჩენია. აქ ჩვენთვის საინტერესო ის არის, რომ იმერეთის მეფე ბრძოლის უკანასკნელ დღეს — 11 სექტემბერს ბრძოლის ველზეა.

ნუტკოვოს ცნობით, მეფე ერეკლე ყველამ მიატოვა ბრძოლის ველზე და მათ შორის პირველად სოლომონ მეფე გაიქცა თავისი ჯარით¹.

გენერალი გულდოვიჩი რუსეთის დედოფალს თავის 23 სექტემბრის მოხსენებაში ატყობინებდა, რომ „ყაზახიდან დაბრუნებული ერეკლე მეფე თბილისთან მიატოვა. არა მარტო იმერეთის ჯარმა, არამედ თვით სოლომონ მეფემაც და მთებს შეაფარა თავი. ასე, რომ იმერლებს მონაწილეობა თბილისის დაცვაში არ მიუღი-
ათ“².

გულდოვიჩის ამ ყალბ ცნობას აქარწყლებს თვით ერეკლე მეფის 15 სექტემბრის წერილი მირიან ბატონიშვილსადმი: „10 სექტემბერს აღა-მაჰმად-ხანი თბილისს მოადგა, მისი პირველი მოსვლის დროს. მას შევხვდით მცირერიცხოვანი ჯარით, იმერეთის მეფეს აგრეთვე ჰყავდა 1000 კაცამდე და დავამარცხეთ რა შეწინავე ჯარები... გამოვბრუნდით“³.

ზ. ჭიჭინაძის ცნობით, ბრძოლის დაწყების წინ იმერეთის ჯარი ორ ნაწილად გაიყო: 1500 კაცი, რომელთაც სოლომონ მეფემ უსარდლა, სოღანლულის მთის იქით უნდა დაედგარიყო, რადგან სპარსეთის ჯარის ერთი ნაწილი თელეთსა და შავნაბადას შუა იდგა, იმერეთის ჯარის მეორე ნაწილი კი დარჩა მეფე ერეკლესთან კრწანისის მინდვრის ახლოს. ამ ჯარს ზურაბ წერეთელმა უსარდლა, მაგრამ ბრძოლის დაწყების წინ წერეთელმა ავადმყოფობა მოიმიზეზა და საერთოდ აღარ მიიღო ბრძოლაში მონაწილეობა⁴. ზ. ჭიჭინაძის ეს ცნობა მცდარი უნდა იყოს, რადგანაც ერთი ქართული წყაროს მიხედვით, ზურაბ წერეთელი ბრძოლის ველზე ჩანს: „იმერთა მხედრობანი იყვნეს მძღვანელობასა ქვეშე ზურაბ წერეთლისასა და სდგეს იგინი მარჯვნით კერძო მეფისა“.

ამ ბრძოლის მონაწილე თეიმურაზ ბატონიშვილი (გიორგი XIII-ის ვაჟი) წერს — „ათსა რიცხვსა სეკდენბრისასა ბრძოლა უყო ღეფის ძის ძემან დავით მეწინავეთა აღა-მაჰმადისათა, ველსა ზედა კრწანისისა თვისთა მხედრობითა და ჰყავცა თვისთანა იმერთა

¹ ბუტკოვი, მასალები, გვ. 339 (რუს.).

² ი. ცინცაძე, დასახ. ნაშრ., გვ. 205.

³ ა. ცაგარელი, ტ. II, გვ. 105 (რუს.).

⁴ ზ. ჭიჭინაძე, დასახ. ნაშრ., გვ. 22.

მხედრობანი მცირედნიცა და იყოფოდა მუნვე თავადი იმერეთის მხედართმძღვანი, სახლთუხუცესი წერეთელი ზურაბ¹. თეიმურაზ ბატონიშვილი იქვე დასძენს: „ხოლო იმერთა მხედრობანი იყვნეს მძღვანელობასა ქვეშე ზურაბ წერეთლისასა. დადგნეს იგინი მარჯვენით კერძო მეფისა“². აქედან ნათლად ჩანს, რომ ზურაბ წერეთელი ბრძოლაში მონაწილეობდა, ხოლო 10 და 11 სექტემბერს რომ იმერლები გმირულად იბრძოდნენ, ამის შესახებ ალექსანდრე ორბელიანიც (ერეკლე მეფის შვილიშვილი — თეკლა ბატონიშვილის ვაჟი) გვაწვდის ცნობას: „მეფე სოლომონის დის ბატონიშვილის მარიამისაგან გამიგონია, ასე ვაუჯაკურად იყვნენ იმერლებიო, რომ მარტო ორასი მეტი თავად-აზნაური დააკლდათ ალა-მაჰმადხანის ორი დღის ომშიო. როგორც მეც ვიცი, მართლაც ასეთი ხელი გამოუღიათ იმერლებს, რომ ქართველები გაუკვირვებიათ. ფეხით მაშინდელის ქართველებისაგან გამიგონია“³ — დასძენს ალ. ორბელიანი, რომელმაც ეს ისტორია 1844 წელს აღწერა.

თეიმურაზ ბატონიშვილის ცნობით, მეფე ერეკლემ და სოლომონმა 11 სექტემბერს თბილისი ერთად დატოვეს: „ხოლო ოდეს განვიდოდა მეფე ტფილისით, განუტევა მეფე იმერეთისა სოლომონ, შვილიშვილი თვისი სამეფოდ თვისად. რომელ ბრძვეს მხედრობაცა მისთა მტერთა მიმართ სახელოვნად“⁴ — კიდევ ხაზს უსვამს იმერთა გულადობას თეიმურაზზე. მაგრამ კითხვა იბადება, თუ იმერეთის ლაშქარმა ბოლომდე იბრძოლა კრწანისის ველზე, რატომ გავრცელდა ხმები დალატისა და მოსახლეობის ძარცვის შესახებ.

ზ. ჭიჭინაძე გადმოგვცემს: ბრძოლის უკანასკნელ დღეს ნათელი გახდა, რომ ტფილისს სპარსნი აიღებდნენ, რადგან ქართველთა მხედრობა მთლად გაწყდა, ბრძოლა მიიწურა, თბილისს დაპყრობა ელოდა.

კრწანისის ველზე მებრძოლი იმერთა 1500-იანი ლაშქარი მთლად გაწყდა, გადარჩა მხოლოდ სოღანლუღის ველზე მდგარი იმერთა ჯარი, ესეც იმიტომ, რომ მტრის მთელმა ძალამ კრწანისის მინდორს მიაშურა. უკანასკნელი ბრძოლის დღის დილას სოღანლუღში მდგარმა იმერთა ჯარმა თათბირის შემდეგ გადაწყვიტა, უიმედო ბრძოლაში არ ჩაბმულიყო, რადგან ხედავდა, რომ ბრძოლა წაგებული იყო. მათ დაიხიეს და თბილისში შევიდნენ⁵. თუ ამ

¹ თეიმურაზ ბატონიშვილი, გაზეთი „ივერია“, 1891, № 51.

² იქვე.

³ ალექსანდრე ვახტანგის ძე ქაძმაკურ-ორბელიანი, ალა-მაჰმადხანის შემოსევა ქ. ტფილისში, გადმობეჭდილი ჟურნალ „მოამბიდან“, 1895 წ., გვ. 30.

⁴ თეიმურაზ ბატონიშვილი, დასახ. ნაშრ., გვ. 52.

⁵ ზ. ჭიჭინაძე, დასახ. ნაშრ., 22—25.

ცნობას დაეუჭერებთ, იმერთა ჯარის ერთ ნაწილს 11 სექტემბერს ბრძოლაში მონაწილეობა აღარ მიუღია. ეს კი საკმარისი გახდა, რომ იმერთა ჯარის ეს მოქმედება შემდეგში ლალატად მოენათლათ.

ალექსანდრე ორბელიანი უფრო საინტერესო ცნობას გვაწვდის: ერეკლე მეფის ბრძანებით, სოლომონ მეფე თავისი რაზმის ერთი ნაწილით ბრძოლას ველიდან მოცილებით „აბანოს კართან“ ყოფილა საბრძოლველად გამზადებული და ერეკლეს ბრძანებას ელოდა, რომელ მხარეს მიშველებოდა. იმერლების რაზმის მეორე ნაწილი, ათასი კაცისაგან შემდგარი, ერეკლე მეფის განკარგულებით იმ ზარბაზნების მცველად მდგარა, რომლებსაც ცნობილი ქართველი არტილერისტი, მაიორი გიორგი გურამიშვილი მეთაურობდა. იგი თბილისზე მომავალ გზას იცავდა მთელი გულისყურით. ზარბაზნებზე მისასვლელი ერთი გზა ყოფილა, ზარბაზნების განლაგების უკან კი მთა იყო აღმართული, ასე რომ, აქედან მტერს არავინ ელოდა. ამ დროს ნისლი წამოსულა, რომელსაც ქართველი არტილერისტები და მათი მცველი იმერლების რაზმი დაუფარავს, კრწანისის ველზე კი ბრძოლა არ ცხრებოდა. ერეკლე მეფეს ბრძოლის ველზე ამბავი მიუტანეს, რომ სპარსელების ერთმა რაზმმა ის მალლობები დაიკავა, რომელიც ერთი მხრიდან მაიორ გურამიშვილის ზარბაზნებს ფარავდაო. ამ მომენტში, ქართველი არტილერისტების საუბედუროდ, ნისლმა გადაიყარა და სპარსელების წინაშე თბილისის მისადგომების დაცვის მთელი სისტემა გადაიშალა.

ერეკლე მეფეს სოლომონ მეფესთან ცხენოსანი შიკრიკი გამოუგზავნია ბრძანებით, რათა სასწრაფოდ ზარბაზნების განლაგების ადგილას გადმოსულიყო, მაგრამ ეს შიკრიკი კოჭრიდან მომავალ სპარსელ მზევრავებს დაუნახავთ და მოუკლავთ, ასე რომ სოლომონ მეფემდე ერეკლეს ბრძანებას ვერ მიუღწევია. სოლომონ მეფე განკარგულების მოლოდინში უძრავად მდგარა „აბანოს კართან“.

ზარბაზნების განლაგების ადგილას მდგარ იმერლების ათასეულის მეთაურს უკან მალლობზე სპარსელები რომ დაუნახავს, უფიქრია: „მეფე ირაკლი თავისი ჯარით წაუხებენიათ, თორემ ყიზილბაშების ჯარსა ამ მხარეს რა უნდაო. ზარბაზნების უფროსი მეფის ირაკლის მაიორი თ—დი გიორგი გურამიშვილი რამდენს ეხვეწა მცირე ხანს მოცდას — რასაც ფიქრობო, ტყუილი არისო. მაგრამ არა ქნეს, გამოსწიეს და ქალაქში ეს ამბავი შემოიტანეს. მაშინ როდესაც რომ სოლომონ მეფე აბანოების კარზე იდგა თავის ჯარითა და თავის პაპის ბრძანებას ელოდა... იმ ათასმა კაცმა, იმერთის მეომრებმა ეს ამბავი მოუტანეს მეფე სოლომონსა — მითამ

მეფე ირაკლი თავისი ჯარით სულ გაწვევითეს ყიზილბაშებმაო. ზარბაზნებიც იმათ წაიღესო და ჩუენ ძლივს გადავირჩინეთ თავიო. ყმაწვილი კაცი მეფე სოლომონ ამ გაუგებელის ტყუილით მოიტაცეს და საჩქაროდ იმერეთისაკენ გასწიეს“¹.

აღ. ორბელიანის მიერ გადმოცემული ცნობების სისწორეს ადასტურებს თვით ირანის შაჰის არმიაში მყოფი შირზა იუსუფ ყარაბაღელიც², მაგრამ ცნობა იმის შესახებ, რომ სოლომონ მეფე მისმა მეომრებმა მოიტაცეს და საჩქაროდ იმერეთისაკენ გასწიესო, სინამდვილეს არ შეესაბამება, რადგან ზემოთ მოტანილი ცნობებიდან ნათლად ჩანს, რომ ორთავე მეფემ თბილისი ერთად დატოვა. ამასვე ადასტურებს იოანე ქართველიშვილის შემუშავებო³.

XIX საუკუნის დამლევს სომეხმა მწერალმა ერიცივმა სომხურ გაზეთ „არძაგნქში“ წერილი გამოაქვეყნა, სადაც აღნიშნული იყო, რომ „იმერლებმა მეფე ერეკლეს უღალატეს, ქართველები დაღუპეს, ქალაქი აიკლეს, სპარსთა იმდენი ვერ აენეს ტფილისს, რაც იმერლებმა. იმერლებმა 12 სექტემბერს აიღეს ტფილისი, სპარსელებმა კი 14 სექტემბერს“⁴ — და იმერლების საქციელს ავაზაკობას უწოდებდა.

იმერეთის ლაშქრის საწინააღმდეგო ცნობების გავრცელებაში ედება ბრალი აგრეთვე არტემ არარაცკის, რომლის შრომები ყველას მიერ აღიარებულა, როგორც ყალბი და ცილისმწამებლური.

ასევე ყალბი ცნობები გაავრცელა სომეხმა ისტორიკოსმა ეოსკერჩიანმა, ხოლო ამ ცნობებით შემტდარაბა ი. მეუნარგიამ იგივე გაიმეორა.

იმერეთის ლაშქრის ღალატზე ყალბი ცნობების გავრცელება ეკუთვნის აგრეთვე მელექსე სტეფან ფეშანგს (რომელიც კუზიან დარჩიას გაუბრიყვებია), ბებუთაშვილს⁵ (რომელმაც იმერლების ღალატი ლექსად აღწერა), იოსებ არღუთისისკის, გუდოვიჩს, ბუტკოვს, ღუბროვინს.

ამრიგად, ამერ-იმერის ერთიანობის მტრების მიერ მოგონილი ბრალდება იმის შესახებ, რომ იმერლებმა ერეკლე მეფეს უღალა-

¹ ი. ცინცაძე, დასახ. ნაშრ., გვ. 206—207; იხ. აგრეთვე აღ. ორბელიანი, დასახ. ნაშრ., 38—39.

² ი. ცინცაძე, დასახ. ნაშრ., გვ. 207—208.

³ იოანე ქართველიშვილი, შემუშავები, გამოცემა ა. იოსელიანისა, თბ., 1952, გვ. 72—73.

⁴ ზ. კიკინაძე, დასახ. ნაშრ., გვ. 24.

⁵ ბებუთაშვილი, პოეტი, გორიდან იყო. ერეკლე მეფესთან დაახლოებული პირი. იხ. ჟურნალი „კვალი“, 1895, № 39—40.

ტეს კრწინის ველზე, ქართული წყაროების შეჯერების შემდეგ არ დასტურდება.

ღუბროვინი ცილისმწამებლურად წერს, თითქოს იმერლებს 10000 კაცი გაეტაცნოთ ქართლიდან და ოსმალეთში დაეყიდნოთ. იბადება კითხვა, როგორ შეძლო 1500 იმერელმა 10000 ქართლის დატყვევება და ახალციხეში გადაყვანა?

ეს ყო უდიდესი ცილისწამება იმერეთის ქარის მიმართ, რაც მხოლოდ ბოროტ და შურის ჩამომგდებ ადამიანებს შეეძლოთ შეეთხზათ.¹

რაც შეეხება იმერელთა მიერ ჩადენილ ძარცვა-გლეჯას, ესეც მტრების მიერ შეთხზული ბრალდებაა. სინამდვილეში საქმე სულ სხვაგვარად იყო: იმერთა ლაშქარს სურსათი აღარ აღმოაჩნდა, ეს კი იზღროინდელ ომში, თუ ბრძოლა რამდენიმე დღეს გასტანდა, მოსალოდნელი იყო: თბილისის სახლები და დუქნები გამოეკეტათ. არსად არაფერი არ მოიპოვებოდა. ზ. ჭიჭინაძე აღნიშნავს: იმერლებმა სოლომონ მეფეს მოახსენეს, რომ ქალაქი ცარიელია, სახლები დაკეტილია, დაკეტილ სახლებში სურსათ-სანოვავე იქნება, ჩვენ კი აქ შიმშილით ვიხსოვებით, გავალოთ ზოგიერთი სახლი, რაც ჩვენთვის საჭირო იქნეს, ის გამოვიტანოთ, თორემ გზაში შიმშილით დავინოცებით, ნამეტურ დაჭრილნი. ჩვენ, რომ არ წავილოთ, იგი მაინც ჩვენს მტერს დარჩება დღესო.²

მეფემ ჩარს ნება მისცა ზოგიერთი სახლის გაღებისა და იქიდან სურსათის გამოტანისა. ჩარმა პურისა და სხვა სანოვავის გამოტანა იწყო. მოქალაქეთა სახლების ყარაულებმა ამაზედ ყვირილი შექმნეს — გვიშველეთ, იმერლებმა ქალაქი აიკლეს, სახლები გაქურდეს, გაძარცვეს, დაგვლუბესო. 11 საათზე იმერლებმა ქალაქი მართლაც დატოვეს, ხოლო 4 საათზე სპარსელთა ჩარმა ქალაქი დაიკავა, გაძარცვა და შემდეგ გააწვა.³

რა ვუწოდოთ იმერთა მოქმედებას: დანაშაული, ღალატი, ძალმომრეობა თუ ძარცვა-გლეჯა?

ერეკლეს დასახმარებლად მისმა შვილიშვილმა იმერეთიდან 3000 კაცი მოიყვანა, 1500 ბრძოლის ველზე დარჩა, 1500-მა კაცმა თავს უშველა, როცა მტრის გამარჯვება ცხადი გახდა. ჩარი მოქალაქეთა სურსათით იკვებებოდა ერთი დღის განმავლობაში; ეს სურსათი მტერს უნდა დარჩენოდა და დარჩა კიდევ. თურმე ეს საქციელი ომის პირობებში ღალატი და ძარცვა-გლეჯა ყოფილა, იმერლებს ესეც არ აკმარეს და ცოლი დასწამეს: გზად მიშავალი ჩა-

ზ. ჭიჭინაძე, დასახ. ნაშრ., გვ. 25-27.

² იქვე, გვ. 33-34.

³ იქვე, გვ. 34-35.

რი ქართლის სოფლებს შეესია და ხალხი დაიტაცაო.¹ მაგრამ თვით არლუთინსკიმ, ვოსკერჩინანმა, ფეშანგიმ, არარაცკიმ, ბებუთოვმა, გუდოვიჩმა, ბუტკოვმა და დუბროვინმა აღიარეს, რომ მთელი ქართლის სოფლები დაცარიელდა, ხალხი ჯგუფ-ჯგუფად შორს ტყეებში გაიხიზნა, რომელთა კვალი იმერლებმა და სპარსელებმა კი არა, არავინ არ იცოდა. მათ საიდან შეეძლოთ იმერლებს 10000 კაცის დატყვევება და ახალციხეში გაყიდვა?

ამ ცალისმწამებლებმა გამოიყენეს ძარცვა-გლეჯისა და ტყვის გაყიდვის ცალკეული ფაქტები, რაც მთელ იმერეთის ჯარზე და მის მეფეზე გაავრცელეს, რომ ამით სახელი გაეტეხათ იმერლებისათვის და საერთოდ ქართველთათვის. ერთ-ერთი მათგანი შემდეგია: თბილისიდან ჯარის გასვლის დროს სარდალმა ზურაბ წერეთელმა „ვერცხლით სნეულმა“ და აღვირახსნილმა ფეოდალმა თავისი ყმებიდან რამდენიმე პირი დაიახლოვა და დაავალა, ჯარიდან შეუმჩინებლად გაპარულიყვნენ, სოფლები გაეძარცვათ და ტყვეები მოეტაცნათ, ხოლო ნაძარცვიდან ნახევარი იმერეთის ამ „სახელოვანი“ თავადისათვის მიეტანათ. შედგა ავაზაკთა 40-კაციანი რაზმი,² რომელიც შეუმჩინებლად ჩამოშორდა. ამ ფაქტს თემურაზ ბატონიშვილიც აღწერს: „მეფე სოლომონ წარემართა გზასა თვისსა, მაშინ უცნობლად მისსა, განეყვნენ მას მხედრობასა მისგან კაცნი რაოდენიმე, ჰგონებდა მეფე წინარე წარსვლისა მათსა. გარნა დადგნენ იგინი ადგილსა დაფარულსა უკანით, რათა არა იხილნეს იგი მეფემან მათმან და ოდეს განეშორა მათ მეფე, იწყეს მათ ავაზაკებრ მოქმედება, რომელ სადაც კპოვეს გზათა ზედა სახლეულობანი ტფილისელთა მცხოვრებთაგან აყრილნი და მრავალნი, განძარცვათ მათ ხელჰყვეს და რომელნიმე მათგანი განძარცვეს, ხოლო სხვანი ხიზანი სიმხნითა თვისითა ჰფარვიდეს თავთა თვისთა და ესრეთ გადავიდნენ იმერნი ქვეყანასა თვისსა“.³

აქედან ჩანს, რომ ამ ძარცვის შესახებ სოლომონ მეფემ არაფერი იცოდა. ამრიგად, ზურაბ წერეთელმა და მისმა 40-კაციანმა ავაზაკთა რაზმმა ჩირქი მოსცხო მთელ იმერეთის ჯარს და შებღალა კრწანისის ველზე გამირულად დაღუპული 1500 იმერელი მეტბრძოლის სახელი, შეარცხვინა თვით იმერთა მეფე სოლომონ II, შვილიშვილი ერეკლე მეორისა. უკვე დავიწყებას მიეცა იმერეთის საუკეთესო მამულიშვილთა ღვაწლი და მსხვერპლი, რაც მათ ვაი-

¹ ზ. კვიციანიძე, გვ. 36—37.

² იქვე, გვ. 38.

³ თემურაზ ბატონიშვილი, დასახ. ნაშრ., გვ. 62—63.

დეს ქართლის სამეფოს დასახმარებლად გაჭირვების ჟამს. უკვე ორი საუკუნე გვაშორებს იმ დროს, მაგრამ ქართველი ხალხის მტრებს და დაუკვირვებელი ისტორიკოსების მიერ შექმნილი სიყალბე იმერეთის ჭარის ღალატის შესახებ კიდევ ბოგინობს, თუმცა ქართული ისტორიოგრაფია, ყველა მეტნაკლებად მნიშვნელოვანი ავტორი, ვინც კრწანისის ბრძოლას შეხებია, უარყოფს ამ სიყალბეს: ომან მდივან-ბეგი ხერხეულიძე, იონა-ბერი ხელაშვილი, ეგნატე იოსელიანი, რომელმაც თავისი თვალთ ნახა ყოველივე, გაძლიერებული ბერი, არსენ ბერი, რომელიც ანტონ II-ს რუსეთში გაჰყვა და 1824 წელს დაამთავრა საქართველოს ისტორიის წერა, სოლომონ დოდაშვილი, ალექსანდრე ორბელიანი, პლატონ იოსელიანი, მარი ბროსე, ჩუბინოვი (ჩუბინაშვილი), ნიკოლოზ ბერძენოვი, სულხან ბარათაშვილი, დიმიტრი ყიფიანი, ნიკო დადიანი, დავით ბატონიშვილი, თეიმურაზ ბატონიშვილი, იოანე ბატონიშვილი და სხვანი.

სოლომონ II ბრძოლა დამოუკიდებლობისათვის

1798 წელს ერეკლე მეორე გარდაიცვალა. ტახტი მისმა უფროსმა ძემ გიორგიმ დაიკავა. 1799 წლის 26 ნოემბერს თბილისში შემოვიდა რუსთა ჭარი გენერალ ლაზარევის სარდლობით. გიორგი XII რუსეთის ერთგულებაზე დაიფიცა და ტახტის მემკვიდრედ თავისი უფროსი ვაჟი დავითი გამოაცხადა.

1800 წლის 28 დეკემბერს საქართველოს უკანასკნელი მეფე გიორგი XII გარდაიცვალა. 1801 წლის 12 სექტემბერს რუსეთის ახალმა იმპერატორმა ალექსანდრე I მანიფესტი გამოსცა ქართლ-კახეთში მეფობის გაუქმებისა და რუსული მმართველობის შემოღების შესახებ. 1802 წლის 9 აპრილს გენერალი კნორინგი თბილისში მოვიდა ამ მიზნის შესასრულებლად: 12 აპრილს მან გამოაცხადა მეფობის გაუქმება და რუსული მმართველობის დამყარება¹.

სოლომონ II თავდაპირველად განუხრელად აღგა რუსეთის ერთგულების გზას. 1796 წელს სოლომონ მეფემ რუსეთში გაგზავნა თავისი ელჩები. მათი მშვეობით იგი კვლავ ითხოვდა რუსეთის მფარველობაში შესვლას. სოლომონ მეფემ ხელმოკრედ 1798 წელსაც ითხოვა რუსეთის მფარველობა, ხოლო 1801 წლის ივნისშიც გაიმეორა ასეთივე თხოვნა, მაგრამ იმპერატორმა კნორინგს

¹ ბუტკოვი, მასალები, III, გვ. 323, 324, 327, 333, 349, 350. (რუს.).

დაავალა, უბრალო მეგობრული ურთიერთობა დაეჭირა იმერეთის მეფესთან და არ დაერღვია თურქეთთან არსებული თანხმობა¹.

მართალია, ამ დროს იმერეთის მეფე ოსმალეთს თავის უზენაეს მზრძანებლად არ თვლიდა და თავი დამოუკიდებელ მეფედ მიაჩნდა, მაგრამ რუსეთი ოსმალეთთან დადებული საზავო ხელშეკრულების ძალით, მოვალე იყო დასავლეთი საქართველო ოსმალთა გავლენის სფეროდ ჩაეთვალა.

სოლომონ მეფე დასავლეთ საქართველოს მზრძანებლად აცხადებდა თავს და მთავართა არსებობას მხოლოდ მათი მორჩილების პირობით ურიგდებოდა. მეფის სახელით სოლომონ ლიონიძე წერდა, რომ „აფხაზეთის სამთავრო თავიდანვე იმერეთისა იყო და მასვე ეკუთვნოდა ფოთის ციხეც“². იმერთა მეფე დადიანს უყურებდა როგორც თავის ურჩ ყმას; მას მეფის წინააღმდეგობის უფლება არ ჰქონდა და მისი მორჩილი უნდა ყოფილიყო.³

სოლომონ მეფეს დასავლეთი საქართველოს მთავრები ჯერ კიდევ თავის მორჩილებაში ჰყავდა, როცა ერეკლეს სიკვდილის შემდეგ იმერეთის მეფესა და ქართლ-კახეთის სამეფოს შორის, ნაცვლად ურთიერთკავშირისა, განხეთქილებამ იჩინა თავი. გიორგი XIII გამეფების შემდეგ მეგობრული ურთიერთობა აღმოსავლეთსა და დასავლეთს შორის შესუსტდა. გიორგი XIII საქართველოს ერთიანობისათვის უფრო ნაკლებ ზრუნავდა, ვიდრე დინასტიისა და ნათესაურ ინტერესებზე. სოლომონ მეორის გამაერთიანებელ პოლიტიკას, რაც დადიანთან ბრძოლაში გამოიხატებოდა, გიორგი XIII არ იზიარებდა და იგი ზურგს თავის სიძეს — დადიანს უმაგრებდა, ამით ხელს უწყობდა იქ არსებული განხეთქილების შემდგომ გაღრმავებას, აფერხებდა დასავლეთი საქართველოს გაერთიანებისათვის ბრძოლის წარმატებას. თავის მხრივ, სოლომონ მეორეც დიდად აფასებდა ოქახურ სიახლოვეს და უფრო მეტად იყო დაკავშირებული თავის ღვიძლ ბიძებთან — დარეჯან დედოფლის შვილებთან, ვიდრე თავის ნახევარბიძასთან — ქართლ-კახეთის მეფე გიორგი XII-თან. დინასტიურ ბრძოლაში სოლომონ მეფე დარეჯან დედოფლის პარტიას ემხრობოდა და ტახტის მემკვიდრედ იულონს აღიარებდა და არა გიორგი XIII-ის ძეს, ტახტის კანონიერ მემკვიდრეს დავითს.

ქართლ-კახეთის მეფე გიორგი XII ხშირად ავადმყოფობდა, ხოლო მისი სამეფო არსებობის უკანასკნელ დღეებს ითვლიდა; განხეთქილება სამეფო კარზე დავით და იულონ ბატონიშვილთა პარტიებს შორის უფრო მწვავედებოდა.

¹ კაკა, ტ. I, გვ. 559 (რუს.).

² კაკა, ტ. III, გვ. 336.

³ იქვე, გვ. 573 (რუს.).

1799 წლიდან აღმოსავლეთ საქართველოში რუსეთის ჯარების თანდათანობით მატებამ თავისებური გავლენა მოახდინა დასავლეთი საქართველოს პოლიტიკურ ცხოვრებაზე.

ბაგრატიონთა დინასტიის ყოფნა-არყოფნის საკითხი შეუმჩნეველი არ დარჩენიათ დასავლეთი საქართველოს პოლიტიკურ მოღვაწეებს. შექმნილი მდგომარეობიდან თავის დასაღწევად იმერეთის სამეფო კარის მესვეურებმა შემდეგი ღონისძიებები დასაბეს: დასავლეთ საქართველოში მთავრების დამორჩილებით უნდა დაეყარებულიყო მეფის ძლიერი ხელისუფლება; აღმოსავლეთ საქართველოში იულონ ბატონიშვილისათვის უნდა შეენარჩუნებინათ ტახტის მემკვიდრეობა, რაც, სოლომონის ფიქრით, იმერეთის სამეფოს დამოუკიდებელი არსებობის გარანტია იქნებოდა. თუ სოლომონ მეფე დასავლეთ საქართველოში გაბატონდებოდა, ე. ი. ერთპიროვნული მბრძანებელი იქნებოდა, მაშინ რუსეთი მას მფარველობაში მიიღებდა 1783 წლის ტრაქტატში გათვალისწინებულ პირობათა საფუძველზე და მის ხელისუფლებას მთავრებზედაც ცნობდა.

სოლომონ მეფე ყოველთვის ცდილობდა, რუსეთის მფარველობა მოეპოვებინა, თან არც იმის თქმას იგიწყებდა რუსეთის წარმომადგენლებთან ურთიერთობისას, რომ მოსურნე იყო იულონ ბატონიშვილის გაშეფებისა ქართლ-კახეთში. ამიტომ მას თავიდანვე ეპვის თვალთ დაუწყო ცქერა რუსეთის მთავრობამ, რადგან ქართლ-კახეთში მეფობის აღდგენა ეწინააღმდეგებოდა მეფის რუსეთის მიზნებს.

იულონის პარტიასთან და ამ გზით ალექსანდრე ბატონიშვილთან ურთიერთობა, რომელიც თავის მხრივ ირანის მხარდაჭერას ეყრდნობოდა, იმერეთის მეფეს იმთავითვე რუსეთის მიზნების მოწინააღმდეგეთა ბანაკში აქცევდა. ამიტომ რუსეთის მთავრობასა და სოლომონ მეფეს შორის საერთო ენის გამონახვა ძნელდებოდა, იმერეთის მეფე კარგად ხედავდა, რომ ქართლ-კახეთში მეფობის გაუქმება იმერეთის სამეფოსაც უდიდეს განსაცდელს უმზადებდა.

ყოველივე ეს განაპირობებდა სოლომონ მეორის არამყარ წინააღმდეგობრივ მოქმედებას, მის მერყევე პოზიციას რუსეთის სამხედრო და სამოქალაქო წარმომადგენლებთან ურთიერთობაში, მის ორჭოფობას.

• • •

1801 წლის მაისში ცხადი გახდა, რომ ქართლ-კახეთში მეფობა საბოლოოდ უქმდებოდა. 1801 წლის 4 აგვისტოს იმერეთის მეფემ თავისი ელჩი ჭაფარიძე გაგზავნა რუსეთში მეფე ოფიციალურად

ლურად ითხოვდა იმერეთის მიღებას რუსეთის მფარველობაში, მაგრამ ელჩობის მთავარი მისია იყო ქართლ-კახეთში მეფობის აღდგენა და იულონ ბატონიშვილის გაშეფება. გენერალმა კნორინგმა კავკასიის სამხედრო ხაზიდან ელჩი რუსეთში არ გაუშვა, უკანვე გამოაბრუნა და მეფეს შემოუთვალა, რომ რუსეთ-ოსმალეთს შორის არსებული კეთილგანწყობილება არ უნდა შერყეულიყო, ეს კი ხელს უშლიდა თხოვნის დაკმაყოფილებას, ხოლო რაც შეეხება იულონის გაშეფებას, კნორინგი აცნობებდა მეფეს, რომ რუსეთის მთავრობამ ქართლ-კახეთის სამეფოს ბედი უკვე გადაწყვიტა და მეფობა გააუქმა, ამიტომ თქვენი ჩარევა ქართლ-კახეთის საქმეებში იმპერატორის შეურაცხყოფას ნიშნავს¹.

თუმცა რუსეთის მთავრობა უარს ეუბნებოდა იმერეთის მეფეს მფარველობაში მიღებაზე, მაგრამ იგი დიდად იყო დაინტერესებული იმერეთის საშინაო საქმეებით, რაც იმაში გამოვლინდა, რომ რუსეთმა სავანგებო დეალებით თავისი მოხელე სოკოლოვი მიავლინა იმერეთში, რომლის მთავარ მისიას იმერეთის სამეფო კარზე შექმნილი ვითარების დაზვერვა და ტახტის პრეტენდენტის — მცირეწლოვანი კონსტანტინე ბატონიშვილის, ყოფილი მეფის დავით გიორგის ძის ვაჟის, განთავისუფლება შეადგენდა.

იმ ხანებში რუსეთის მთავრობა ვარაუდობდა, კონსტანტინე ბატონიშვილის მეშვეობით შეექმნა მეფის მოწინააღმდეგე პარტია და აქტიურად ჩარეულიყო იმერეთის საშინაო საქმეებში, რის შედეგადაც გაუადვილებოდა დასავლეთ საქართველოში გაბატონება, მაგრამ იმერეთის მეფეც არ იყო ხელდაკრეფილი — მან სოკოლოვის „ვიზიტს“ აღმოსავლეთ საქართველოში სოლომონ ლიონიძის „ვიზიტით“ უპასუხა, რომელსაც დაავალა იქ შექმნილი ვითარების გამორკვევა და სოლომონ მეფის მომხრეებთან კავშირის დამყარება, რომელთა მიზანი იყო საქართველოდან რუსეთის განდევნა და ბაგრატიონთა დინასტიის აღდგენა. „მზადდებოდა კოალიციური გამოსვლა, რომელშიც სოლომონთან ერთად მონაწილეობა უნდა მიეღოთ ქართლ-კახეთის ფეოდალებს, ახალციხის ფაშას, განჯის, შუშისა და სხვა ხანებს; შეთქმულებს დახმარებას აღუთქვამდნენ ირანი და ოსმალეთი“².

იმერეთ-ოსმალეთის სამსაუკუნოვანი ბრძოლის ისტორია იმის დამადასტურებელი იყო, რომ იმერეთი მუდამ ებრძოდა ოსმალთა აგრესიას, მაგრამ იმეამად იმდენად დიდი იყო საფრთხე დასავლეთ

¹ კაპა, ტ. 1, გვ. 562 (რუს.).

² მ. დუშბაძე, დასავლეთი საქართველო XIX საუკუნის პირველ ნახევარში, თბ., 1957, გვ. 140.

საქართველოში მეფობის გაქრობისა, რომ იმერეთის ზოგიერთმა პოლიტიკურმა მესვეურმა ისევ ოსმალეთთან კავშირი ამჯობინა. ამით ისინი შეეცადნენ ჩაეშალათ რუსეთის ცდა იმერეთის სამეფოს გაუქმებისა.

რუსეთის მთავრობა თვალყურს ადევნებდა იმერთა მეფის ნაბიჯებს, მისთვის ცხადი გახდა, რომ სოლომონის თხოვნა მფარველობაში მიღების შესახებ მოჩვენებითი იყო, სოლომონს რუსეთის მოწინააღმდეგე ბატონიშვილები თავისთან ჰყავდა და მფარველობას უწყევდა მათ. ამით სოლომონ მეფის პოლიტიკა საშიშროებას უქმნიდა რუსეთის პოზიციების განმტკიცებას აღმოსავლეთ საქართველოში.

რუსეთის ჯარის შემოსვლამ საქართველოში და ერეკლე მეფის მიერ ტახტის მემკვიდრეობის არსებული წესის მოშლამ ქართლ-კახეთის საშინაო პოლიტიკური ვითარება უკიდურესად დაძაბა. გიორგის მძიმე ავადმყოფობის ვითარებაში ტახტისათვის ბრძოლა გაჩაღდა ორ დაჯგუფებას — იულონ ერეკლეს ძისა და დავით გიორგის ძის შორის. საქმე შეიარაღებულ შეჭახებად მივიდა. იულონის მომხრენი დამარცხდნენ, ბატონიშვილები დასავლეთ საქართველოში გადავიდნენ და იმერეთის მეფეს შეეხიზნენ.

ბატონიშვილებმა იმერეთიდან კავშირი გააბეს მაჰმადიანურ სამყაროსთან, რათა მისი სამხედრო ძალის გამოყენებით განედევნათ რუსეთის ჯარი ქართლ-კახეთიდან და ისევ ბაგრატიონების ხელისუფლება აღედგინათ.

სოლომონ მეფე აქტიურად ერეოდა ქართლ-კახეთის სამეფოს საქმეებში, ამიერკავკასიის ხანებთან და სპარსეთის შაჰთან მიწერ-მოწერას აწარმოებდა და მათ ქართლ-კახეთზე სალაშქროდ იწვევდა — ბაგრატიონების სახლის უფლებათა აღსადგენად.

1801 წლის ზაფხულში სოლომონ მეფემ კიდევ ერთი ელჩი — როსტომ ნიჟარაძე გაგზავნა თბილისში რუსეთის წარმომადგენლებთან ოფიციალური განცხადებით, რომ იმერეთი მიეღოთ რუსეთის მფარველობა-ქვეშევრდომობაში, ოღონდ იმ პირობით, თუ ქართლ-კახეთში იულონი გამეფდებოდა.

როგორც ზემოთ აღვნიშნეთ, 1795 წელს ახალციხეში გარდაიცვალა იმერეთის ყოფილი მეფე დავით გიორგის ძე. მისი მცირეწლოვანი შვილი კონსტანტინე სოლომონ მეფეს მუხურის ციხეში ჰყავდა გამოკეტილი, დავითის ქვრივი ანა დედოფალი, სოლომონ მეფისაგან შევიწროებული და დევნილი, ჯერ თბილისში ჩავიდა რუსეთის ხელისუფლებთან მფარველობისა და დახმარების სათხოვნელად, შემდეგ პეტერბურგს წავიდა და იმპერატორ ალექსან-

დრე I-ს სთხოვა, ეშუამდგომლა სოლომონ მეფესთან შვილის პატიმრობიდან განთავისუფლების შესახებ.¹

1802 წელს ალექსანდრე I-მა საქართველოში გამოგზავნა რუსეთის საგარეო საქმეთა კოლეგიის მოხელე სოკოლოვი, რომელსაც დაევალა იმერეთის მეფესთან მოლაპარაკება კონსტანტინე ბატონიშვილის განთავისუფლების შესახებ.

სოლომონ მეფე ფიქრობდა, რომ რუსეთი განთავისუფლებულ ბატონიშვილს მის წინააღმდეგ გამოიყენებდა ტახტის წარმევის მიზნით, ამიტომ იმპერატორის თხოვნას უარი თუპასუხა.

სოლომონ მეფის პასუხით განაწყენებული სოკოლოვი გენერალ ლაზარევს აცნობებდა, რომ იმერეთის მეფე მონაწილეობს შეთქმულებაში, რომლის მიზანია ქართლ-კახეთის სამეფოს აღდგენა და ტახტზე ბატონიშვილ იულონის დასმა.

იმერეთის მეფის უარყოფითი პასუხი კონსტანტინეს განთავისუფლების თაობაზე რუსეთის საწინააღმდეგო აქტად ჩაითვალა. იმერეთის პოლიტიკური მესვეურები მალე დარწმუნდნენ, რომ ასეთი მოქმედებით, ე. ი. რუსეთთან ურთიერთობის გამწვავებით ზარალის მეტს ვერაფერს ნახავდნენ და თავიანთი დამოკიდებულება რუსეთის მიმართ სწრაფად შეცვალეს.

• • •

1802 წლის სექტემბერში გენერალ კნორინგის ნაცვლად მთავარსარდლად და უმაღლესი მმართველობის უფროსად საქართველოში პავლე დიმიტრის ძე ციციანოვი (ციციშვილი) დაინიშნა. იგი იყო გარუსებული ქართველი თავადი, რომლის პაპა ვახტანგ VI ამაღალში შედოდა, როცა ის რუსეთში გადასახლდა.

სამხედრო განათლების მიღების შემდეგ ციციშვილი თავისი ნიჭის წყალობით მალე დაწინაურდა სამსახურში; მან მთელ რიგ ბრძოლებში სახელი მოიხვეჭა და რუსეთის სამეფო კარის დიდი ნდობა დაიმსახურა. ერთ თავის ბრძანებაში სუვოროვი წერდა: „უნდა ვიბრძოდეთ ისე, როგორც მამაცი გენერალი ციციანოვი“.²

საქართველოში ციციანოვის გამოგზავნა შემთხვევითი არ ყოფილა, მასზე რუსეთის ხელისუფალნი დიდ იმედებს აწყარებდნენ, რადგან იგი იყო ქართლ-კახეთის ყოფილი სამეფო კარის ახლო ნათესავი (გიორგი XII ცოლის მარიამ დედოფლის — ციციშვილის ასულის ნათესავი) და მცოდნე საქართველოს ცხოვრებისა. რუსეთის მთავრობა იმედოვნებდა, რომ იგი უმტკივნეულოდ შეძლებდა

¹ დ. და ბ. ბატონიშვილები, დასახ. ნაშრომი, გვ. 81—82.

² ნ. დუბროვინი, ამიერკავკასია 1803—1806 წწ. სპბ. 1866, გვ. 65 (რუს.)

ბატონიშვილების მოშორებას საქართველოდან, თავადაზნაურობის მომხრობას და არეულობისთვის ბოლოს მოღებას. ციციანოვან ერთად მაღალ თანამდებობაზე დაინიშნა მეორე ქართველი გენერალი — დიმიტრი ორბელიანი, რომელიც აგრეთვე ნათესაურად დაკავშირებული იყო ბაგრატიონებთან.

მეტისმეტად ამაყი, ჭიუტი და ფიცხი ციციანოვი აღჭურვილი იყო მახვილი დიპლომატიური ნიჭით და აქტიურობით.

„მრისხანე თავადს“, როგორც მას კავკასიაში უწოდებდნენ, განუსაზღვრელი უფლება მიანიჭა იმპერატორმა ალექსანდრე I-მანება მიეცა, თვითონვე გადაეწყვიტა სასწრაფო და რთული საქმეები, ისე, რომ არ დალოდებოდა პეტერბურგის თანხმობას. მას უფლება ჰქონდა, ვისაც ღირსეულად მიიჩნევდა, ადგილზევე დაეჯილდოებინა იმპერიის ორდენებით.

ციციანოვის გამგებლობაში შედიოდა აღმოსავლეთი საქართველო, ჩრდილოეთი კავკასია და ასტრახანის გუბერნია.

ციციანოვის დანიშვნის მომენტში ამ მხარეების ადმინისტრაციულ ცენტრად ქალაქი გეორგიევსკი ითვლებოდა, მაგრამ ამიერიდან, როგორც ჩანს, მთავარი ყურადღება საქართველოზე უნდა მიპყრობილიყო და ამიტომ მთავარმართველი ციციანოვი პირდაპირ საქართველოში მოვიდა (1803 წლის 1 თებერვალს) და მთელი ამიერ- და იმიერკავკასიის ცენტრად თბილისი აქცია.

საქართველოში წამოსულ ციციანოვს ალექსანდრე I-მა დავალება მისცა — აუცილებლად გამოეხსნა სოლომონ მეფის ტყვეობიდან კონსტანტინე და ხელთ ეგდო იმერეთის სამეფო კარზე შეხიზნული იულონ და ფარნაოზ ბატონიშვილები.

1803 წელს ციციანოვმა იმპერატორისაგან მიიღო ბრძანება, იმერეთის წინააღმდეგ ძალა გამოეყენებინა, თუ შეეფე არ გაათავისუფლებდა კონსტანტინე ბატონიშვილს¹.

„სოლომონ მეფის გასატეხად ციციანოვმა მრავალგვარ საშუალებას მიმართა — ჯერ იმპერატორის მოკითხვის წიგნი გაუგზავნა, სადაც ხელმწიფე „სიყვარულს“ და „მშვიდობას“ აუწყებდა გაეჭვიანებულ მეფეს. შემდეგ ქრთამი აამოქმედა და სოლომონ მეფის კარისკაცები, საერო და საეკლესიო თავადები, მრავლად გაიერთგულა; ხან კიდევ სამხედრო დემონსტრაციას მიმართა, ბოლოს საკუთარი მოხელე გაგზავნა და მეფეს კატეგორიულად მოსთხოვა კონსტანტინე ბატონიშვილის გათავისუფლება“.²

¹ კაკა, ტ. II, გვ. 341 (რუს.).

² ნ. ბერძენიშვილი, საქართველოს ისტორიის საკითხები, ტ. II, თბ., 1967, გვ. 288.

ციციანოვმა მეფის შეშინების მიზნით გენერალ ტუჩკოვის ჯარი მიაყენა იმერეთის საზღვარს¹, ხოლო ბრონევსკის ხელმძღვანელობით მცირე რაზმი გაგზავნა იმერეთში კონსტანტინესა და აღმოსავლეთი საქართველოდან თავშეფარებული ბატონიშვილების წამოსაყვანად.²

ოთხი თვის მოლაპარაკების შემდეგ მეფე სოლომონი დასთანხმდა კონსტანტინე ბატონიშვილის გათავისუფლებაზე, რადგან, ერთი მხრით, ბრონევსკი დაემუქრა, რომ თუ უარს იტყოდა „ტყვის“ განთავისუფლებაზე, ამით იმპერატორის რისხვას გამოიწვევდა, ხოლო მეორე მხრით, ბრონევსკისაგან ოქროთი მოსყიდულმა ქაიხოსრო წერეთელმა და დოსითეოზ კათალიკოსმა (წერეთელმა) მეფე დაიყოლიეს „ტყვის“ განთავისუფლებაზე და 9 წლის პატიმრობის შემდეგ იმერეთის მეფემ იგი რუსეთის იმპერატორს დაუთმო, მაგრამ იმ პირობით, რომ მას საქართველოში არ გააჩერებდა და რუსეთში წაიყვანდა.

სოლომონ მეფეს ეშინოდა „პრეტენდენტს“ და მის მომხრეებს ამბოხება არ მოეწყობოდა მის წინააღმდეგ და ტახტიდან არ გადაეგდოთ, მაგრამ სულ სხვანაირად ფიქრობდნენ რუსეთის პოლიტიკური მესვეურნი: რუსეთის მთავრობა ბაგრატიონებს ერთმანეთს კი არ უპირისპირებდა, არამედ რუსეთის ვრცელ იმპერიაში სხვადასხვა ადგილას ასახლებდა.³ ამჟერადაც იმპერატორმა ციციანოვს მითითება მისცა, რათა კონსტანტინე ბატონიშვილი დაუყოვნებლივ რუსეთში გაეგზავნა.⁴

რაც შეეხება ბატონიშვილების გადაცემას რუსეთის ხელისუფლებისათვის, სოლომონ მეფე თავს იმართლებდა ციციანოვის წინაშე — ჩემი სახლი იგივეა, რაც ერეკლე მეფის სახლი, შემიძლია, თუ არა მე გამოვიჩინო მხეცური სიმკაცრე და არ მივცე მათ თავშესაფარი. ციციანოვის მოხელე ბრონევსკი ციციანოვს შოახსენებდა, რომ სოლომონ მეფე თავის ბიძებს იულონს და ფარნაოზს არწმუნებს რუსეთში წასვლის აუტალებლობაში, მაგრამ ისინი გაუგონარ ჭიუტობას იჩენნო.⁵

სოლომონ მეფემ 1802 წელს, რუსეთის ერთგულება რომ ეჩვენებინა და გული მოეგო, ბაბა-ხანისაგან გამოგზავნილი წერილი გე-

¹ კაკა, ტ. II, გვ. 454 (რუს.).

² იქვე, გვ. 346 (რუს.).

³ „ამერ-იმერის ბაგრატიონთა რიცხვი 100 კომლზე მეტი იყო, ისინი ყველა რუსეთში გადასახლეს“. (იხ. ზ. ჭიჭინაძე, ფარული საზოგადოების მიზეზები, თბ., 1919, გვ. 5).

⁴ კაკა, ტ. II, გვ. 352 (რუს.).

⁵ იქვე, გვ. 348 (რუს.).

ნერალ კნორინგს გადასცა. წერილში სპარსეთის მბრძანებელი სოლომონ მეფეს რუსების წინააღმდეგ ერთიანი ძალით გასალაშქრებლად და რუსეთის ბატონობისაგან ქართლ-კახეთის გასათავისუფლებლად მოუწოდებდა.¹

ამ წერილის გადაცემით იმერეთის მეფე რუსეთის მთავრობას უმტკიცებდა ერთგულებას და ამცნობდა ირანის მბრძანებლის გეგმას, რომელიც რუსეთის წინააღმდეგ იყო მიმართული.

სოლომონ მეფით კმაყოფილი ციციანოვი გრაფ ვორონოვს სწერდა: სოლომონ მეფემ იმპერატორისადმი ერთგულება გამოიჩინა და კონსტანტინე ბატონიშვილი პატიმრობიდან გაათავისუფლა, ხოლო ფარნაოზ და იულონ ბატონიშვილებს უმტკიცებს, რომ აუცილებელია მათი პეტერბურგში წასვლა.

მ. დუმბაძე კონსტანტინე ბატონიშვილის გაათავისუფლებას შიიჩნევს სოლომონ მეფის დიპლომატიურ მანევრად. „შეიძლება ვიფიქროთ — წერს მ. დუმბაძე, — რომ ბრონეესკისთან მოლაპარაკების დროს მეფის დიპლომატებმა შეიმუშავეს ახალი გეგმა — კონსტანტინეს გაათავისუფლებით ნდობის მოხვეჭა რუსეთის მთავრობის წინაშე და ამავე დროს, თვით ახალგაზრდა კონსტანტინესთან მჭიდრო კავშირის დამყარება. ეს კავშირი უნდა განემტკიცებინა იმ გარემოებას, რომ სოლომონ მეორე უშვილო იყო და კონსტანტინეს მემკვიდრეობაზე იგი უნებლიეთ მაინც დასთანხმდებოდა, ამას გვაფიქრებინებს კონსტანტინესთან ერთად ლიონიძის წასვლა თბილისში, ხოლო შემდეგ კონსტანტინეს გამოქცევა იმერეთში, რასაც შედეგად მისი მემკვიდრეობის ოფიციალური აღიარება მოჰყვა. ასეთი დიპლომატიური კომბინაციის გამარჯვებულ შეიძლება ჩაითვალოს ციციანოვის თანხმობა ლიონიძის გაგზავნაზე პეტერბურგში და იმერეთის მეფის მიერ ერთგვარი დამოუკიდებელი ურთიერთობის დამყარება რუსეთის იმპერატორთან“.²

1803 წლის 30 მაისს კონსტანტინე ბატონიშვილი თბილისში ჩაიყვანეს ციციანოვთან, მას თან ახლდა იმერეთის მეფის ელჩი სოლომონ ლიონიძე, რომელიც მეფის დავალებით და ციციანოვის თანხმობით პეტერბურგში უნდა წასულიყო იმერეთის მფარველობაში მიღების სათხოვნელად.

¹ კაკა, ტ. II, გვ. 362 (რუს.).

² მ. დუმბაძე, დასავლეთ საქართველო XIX ს. პირველ ნახევარში, თბ., 1957, გვ. 160.

გრიგოლ დადიანის მიერ რუსეთის მთავრობასთან გამართული მოლაპარაკება მფარველობაში მიღებაზე შეუმჩნეველი არ დარჩენიათ იმერეთის სამეფო კარის მესვეურთ. ისინი კარგად გრძნობდნენ, რომ თუკი სამეგრელოს სამთავრო რუსეთის მფარველობაში აღმოჩნდებოდა, შემდეგ ჯერი იმერეთზე მიდგებოდა და ძალით თუ ნებით ქართლ-კახეთის ბედი უნდა გაეზიარებინა. ამიტომ სოლომონ მეფემ განიზრახა, დაესწრო სამეგრელოს მთავრისათვის და განსაზღვრულ პირობებში უზრუნველყო თავისი უფლებები იმერეთის სამეფო ტახტზე და მთელ დასავლეთ საქართველოზეც.

წინააღმდეგობრივ ვითარებაში მყოფი მეფე ცდილობდა, რუსეთის მფარველობაში შესულიყო იმავე პირობებით, როგორც 1783 წელს რუსეთსა და ქართლ-კახეთს შორის დაიდო მფარველობითი ტრაქტატის სახით. ამ მიზნით, იმერეთის სამეფო კარი პეტერბურგში აგზავნის „ვიცე-კანცლერ“ სოლომონ ლიონიძეს, რომელმაც 1803 წლის 5 აგვისტოს რუსეთის საიმპერატორო მთავრობას მფარველობითი ტრაქტატის შემდეგი ძირითადი მუხლები წარუდგინა:

1. თუ რუსეთი მიიღებდა იმერეთის სამეფოს თავის მფარველობაში, რუსეთს ამის შესახებ უნდა ეცნობებინა ყველა სახელმწიფოსათვის (ამით იმერეთის მეფე ხელუხლებლობის გარანტიას იღებდა).
2. იმერეთის მეფის წარგზავნილებს (მთავარმართებლის გვერდის ავლით) უშუალოდ იმპერატორთან მისვლის უფლება უნდა ჰქონოდათ.
3. იმპერატორს იმერეთის მეფისათვის სიგელი უნდა ებოძებინა, რომ მთავარმართებელი საჭიროების შემთხვევაში იმერეთში დასახმარებლად 1000 კაცისაგან შემდგარ შეიარაღებულ რაზმს გაგზავნიდა.
4. იმპერატორი უნდა დათანხმებოდა სოლომონის არჩევანს: სამეფო ტახტი იმისათვის დაეტოვებინა, ვისაც სოლომონი ინდომებდა.

თავის მხრივ, იმერეთის მეფე რუსეთის წინაშე შემდეგ ვალდებულებებს კისრულობდა:

1. დაიფიცებდა იმპერატორისადმი ერთგულებაზე.
2. მისცემდა რუსეთს ხე-ტყეის გემების ასაგებად. ნუბას რთავდა რუსეთს შავი ზღვის სანაპიროზე თევზი დაეჭირა და რუსეთის ნაევები რიონით იმერეთში შემოსულიყო.

3. თურქეთთან ომის შემთხვევაში თავისი სამხედრო ძალებით იბრძოლებდა რუსეთის არმიის მხარდამხარ.

4. შეიერთებდა აფხაზეთის სამთავროს, რაც სასარგებლო იყო რუსეთის ბატონობისათვის შავ ზღვაზე.

ცალკე ნოტაში, რომელიც ლიონიძის მიერ დიდი დიპლომატიური ხელოვნებით იყო შედგენილი, აღწუსებული იყო, თუ რა ეკონომიური და პოლიტიკური მნიშვნელობა ექნებოდა რუსეთისათვის შავ ზღვაზე ფეხის მომაგრებას, როდესაც დასავლეთი საქართველოს ერთადერთი კანონიერი პატრონი—იმერეთის მეფე რუსეთის ქვეშევრდომი გახდებოდა.

ამ ნოტაში ლიონიძე ისე წარმოადგენდა საქმეს, თითქოს მთელი დასავლეთი საქართველო მეფის კუთვნილებაში ყოფილიყო. ოდიში და გურია იმერეთის სამეფოს ეკუთვნოდა და აფხაზეთი, რომელსაც მეფე ახლა შემოიერთებს, მისი უძველესი სამკვიდროსაჲა. ფოთიც იმერეთის კუთვნილებაა. იმერეთისაა პალიასტომის ტბაც, სადაც დიდი თევზჭერაა გაჩაღებული, და საიდანაც გემები 25 საათში მივლენ ყირიმში. თურქეთთან და ირანთან ომის შემთხვევაში იმერეთი სტრატეგიულად ყველა ქვეყანაზე უფრო ხელსაყრელია რუსეთისათვის, რადგან „აქედან ყველაფერი ახლოა — ყირიმი და სტამბოლი, „შავისა და თეთრი ზღვის გველემში“ (ე. ი. ოსმალეთი. მ. რ.) თავის ბაღში იყვლება რუსეთის ხელმწიფეს. გზა ხსნილია იმერეთიდან ახალციხე-არზრუმ-ანატოლიისაკენ. დიდია იმერეთიდან ვაჭრობის პერსპექტივა: ხომალდის გზა რიონით, ფოთით, შავი ზღვით; გემების ასაშენებელი ძვირფასი ტყე; საიალქნე თოკებისათვის კანაფი, მადნეული, მდიდარი სათევზაო ადგილები, და როცა იმპერატორის მფარველობის ქვეშ იმერეთი ასეთ წარმატებაში შევა, ქართლ-კახეთიც აყვავდება. მაშინ დიდი ჯარის შენახვა, ასე დიდი ხარჯს რომ იწვევს, რუსეთის მთავრობას აქ აღარ დასჭირდება, რადგან ლაშქარი კახეთის, ქართლის და ჩვენი სამეფოსი, ე. ი. აფხაზეთის, ოდიშის, გურიის, ლეჩხუმის და იმერეთის ისეთ ძალას შექმნიან, რომ რუსთა მცირე ჯარიც საკმაო იქნება, რათა შეერთებული ძალით ადვილად დაუმორჩილონ ხელმწიფის მფლობელობას ქვეყნები არაზიდან კასპიის ზღვის ნაპირებამდე“¹.

სოლომონ ლიონიძის მიერ შედგენილი ამ დიპლომატიური ნოტიდან ნათლად ჩანს, რომ იმერეთის სამეფო კარზე კარგად იცოდნენ რუსეთის მიზნები და გეგმები ამიერკავკასიაში; ამიტომ

¹ ნ. ბერძენიშვილი, საქართველოს ისტორიის საკითხები, ტ. II, თბ., 1965, გვ. 290.

ამ გეგმისათვის თავისი ქვეყნის პოლიტიკური ინტერესების შეგუება-შეხამებას ცდილობდნენ და საქმეს ისე ხატავდნენ, იმერეთის სამეფოს დაცვა-გაძლიერება რუსეთის ინტერესებისათვის აუცილებელი უნდა ყოფილიყო. მაგრამ ამ დროისათვის რუსეთის გეგმებში ქართული სამეფოების შენარჩუნება და გაძლიერება სასურველი აღარ იყო, რადგან მეფის თვითმპყრობელობას გადაწყვეტილი ჰქონდა ამიერკავკასიის ქვეყნების შემოერთება, რაც ქართლ-კახეთის სამეფოს გაუქმებით დაიწყო კიდევ.

იმერეთის სამეფოს ბედიც რუსეთის მთავრობას რომ გადაწყვეტილი ჰქონდა, ამას სოლომონიც კარგად გრძნობდა. კონსტანტინე ბატონიშვილი შეთანხმების თანახმად რუსეთში უნდა წაყვანათ, მაგრამ ციციანოვმა იგი თბილისში დატოვა და სოლომონზე ზეგავლენის იარაღად აქცია, თუმცა კონსტანტინე ხელიდან გაუსხლტა რუსეთის ხელისუფალთ და სოლომონ მეფეს მიუვიდა, რომელმაც კმაყოფილებით მიიღო იგი და თავის შემკვიდრედ გამოაცხადა.

მეფის ორქოფული პოლიტიკის დამადასტურებელია ის, რომ მან რუსეთში ლეონიძის ელჩობის პარალელურად მეორე ელჩი ოსმალეთის სულთანთან გაგზავნა თხოვნით, რათა რუსეთის მძლავრობისაგან დასაცავად დახმარება აღმოეჩინათ.¹

სოლომონ მეფე ვარაუდობდა, რომ ამ ორი მოქიშვე სახელმწიფოს ჩარევით საქართველოს საქმეებში ქვეყნის დაცვის უკეთესი პირობები შეიქმნებოდა.

ამ მიზანს ემსახურებოდა ისიც, რომ სოლომონმა გრიგოლ დადიანს შორიგების წინადადებით მიმართა, მაგრამ მეფემ ყველა მიმართულებით წააგო. დადიანმა უარი უთხრა შორიგებაზე, მაშინ მეფემ მისი ძალად გატეხა გადაწყვიტა, მაგრამ რუსეთი ჩაერია და ციციანოვმა დადიანთან ბრძოლა აუკრძალა,² რაც იმას ნიშნავდა, რომ რუსეთს გადაწყვეტილი ჰქონდა სამეგრელოს მიღება მფარველობაში; და თუ ეს ასე მოხდებოდა. მაშინ მეფე დასავლეთი საქართველოს უზენაესი მბრძანებლის სახელით რუსეთთან მფარველობით ტრაქტატს ვეღარ დადებდა და ამით დასავლეთი საქართველოს გაერთიანებასაც საძირკველი ერყეოდა.

იმერეთის მეფეს ოსმალეთმაც უარი უთხრა დახმარებაზე, რადგან ამ დროს მას საფრანგეთის იმპერატორი ნაპოლეონ I ემუქრებოდა დაპყრობით, ამიტომ ოსმალეთს რუსეთთან მეგობრობა უფრო სჭირდებოდა, ვიდრე იმერეთის სამეფო. სტამბოლში იმე-

¹ ნ. ბერძენიშვილი, დასახ. ნაშრ., გვ. 293.

² იქვე.

რეთის ელჩის საქმიანობის შესახებ შეიტყო რუსეთის წარმომადგენელმა სტამბოლში იტალინსკიმ და ეს ციციანოვს აცნობა¹.

ციციანოვმა 1803 წლის 31 აგვისტოს რუსეთის მთავრობას მოახსენა, რომ იმერეთის მეფემ შეიპყრო კვინიხიძე, რომელსაც ციციანოვის პასუხი მოჰქონდა დადიანთან რუსეთის მფარველობაში სამეგრელოს მიღების შესახებ და სიკვდილით დასაჯა იგი. ამასთან, ციციანოვი იმასაც ატყობინებდა იმპერატორს, რომ იმერთა მეფე მუხანათობდა და რომ მან სტამბოლში ელჩი გაგზავნა დახმარების სათხოვნელად, თუმცა უარით გამოისტუმრესო. ამიტომ ციციანოვი ნებართვას ითხოვდა, იმერეთში ჯარით შესულიყო და ტახტზე კონსტანტინე ბატონიშვილი აეყვანა.

იმერეთის მეფის მოქმედებას რუსეთის სამეფო კარზე დიდი უკმაყოფილებით შეხედნენ, თუმცა სოლომონ ლეონიძე მათ არწმუნებდა, რომ ოსმალეთში ელჩის წარგზავნა ქართლ-კახეთის ბატონიშვილების ნამოქმედარი იქნებოდა, მაგრამ იმერეთის ელჩისა იქ არაეის სჯეროდა. სოლომონმა ციციანოვის დასმენას შუამავლის მოკვლის შესახებ ასე უპასუხა: დადიანის მიერ გამოგზავნილი კაცი, გვარად კვინიხიძე, ჩემი ქვეშევრდომი იყო, რომელიც დიდი ხანია გაიქცა როგორც ქურდობაში შენიშნული. მან ბევრჯერ ჩაიღინა საქმე, ღირსი სიკვდილით დასჯისა, ბოლოს გზის მცველებმა მას ქურდობის დროს მოუსწრეს და მოკლესო.

ასეთი ვერსია რუსეთის სამეფო კარზე არ ირწმუნეს განსაკუთრებით მას შემდეგ, რაც დადიანმა რუსეთის ქვეშევრდომობაში შესვლა გადაწყვიტა. ამიტომ იმერეთის ელჩი სოლომონ ლეონიძე „გამოგდებულ იქნა“ რუსეთის სამეფო კარიდან², ხოლო იმპერატორმა აღუქსანდრე I-მა ასეთი მითითება მისცა ციციანოვს: „1. სოლომონ მეფე ვერაგულად იქცევა — ჩვენ მფარველობას ვვთხოვს და ამავე დროს თურქეთს ეხვეწება დახმარებას ჩვენი ჯარის წინააღმდეგ. ამიტომ მე შევაწყვეტინე მოლაპარაკება მის ელჩთან; 2. სოლომონ-მეფე არაა საიმედო. ამიტომ თქვენ გვეალეობათ დაიცვათ აღმოსავლეთი საქართველო იმ არეულობისაგან, რაც იმერეთში დღითი დღე ძლიერდება; 3. ამისათვის თქვენ სამხედრო ძალით უნდა დაიჭიროთ ქუთაისი და იმერეთის სტრატეგიული ადგილები შესაძლებლობისთანავე; 4. ამ ღონისძიებებზე თქვენ არ აიღებთ ხელს სოლომონის შესაძლო წინააღმდეგობის შემთხვევაშიც: მაშინ თქვენ იმას გამოუცხადებთ: ა) იმერეთში არსებულმა უკმაყოფილებამ შეიძლება გამოიწვიოს აშლილობანი, რაც საფრთ-

¹ ნ. ბერძენიშვილი, დასახ. ნაშრ., გვ. 293.

² ბაგრატი ბატონიშვილი, ახალი მოთხრობა, თბ., 1941, გვ. 85.

ხეში ჩააყენებს ქართლსაც; ბ) ამას გარდა, იმერეთის დაკავება აუცილებელია რუსეთისათვის სამეგრელოსთან პირდაპირი კავშირის დასაჭერად; გ) შავი ზღვის სანაპიროზე მომავლების შემდეგ თქვენ უნდა დაიპიროთ ბაქო და სალიანი. ამით ჩვენი გახდება კასპიის ზღვაც და ამ ზღვების გაერთიანება რუსეთის ვაჭრობას ახალ გასაქანს მისცემს“¹.

ე. ი. რუსეთთან იმერეთის სამეფოს შეერთების საქმეში ციციანოვს სრული თავისუფლება ეძლეოდა; ამავე დროს, იმპერატორი ალექსანდრე კონსტანტინე ბატონიშვილის გამეფების წინააღმდეგი იყო².

1803 წლის 23 დეკემბერს გრაფი ვორონცოვი ციციანოვს სწერდა: „იმერეთის მეფის ვერაგობის მშვიდობიანი საშუალებებით გამოსწორება, რა თქმა უნდა, შეუძლებელია, ის საჭიროა კარგად შეაშინოთ და მაშინ გახდება უვნებელი. ამ საქმეს თქვენ განდობით მის წარმოგზავნილს კი განუცხადებთ, რომ თქვენ უფლებამოსილი ხართ თქვენი შეხედულებებისამებრ დაამთავროთ საქმე და თვითონ მასაც თქვენთან გამოვაგზავნით“³.

ციციანოვს თურქეთის გაღიზიანებისა ერიდებოდა და ამიტომ ვერ ახორციელებდა საჭირო ღონისძიებებს, მაგრამ მან მალე მიიღო ცნობა იტალინსკისაგან, რომ ოსმალეთის სულთანი წინააღმდეგი არაა იმერეთი დათმოს, რომ უფრო დიდ პოლიტიკურ ამოცანებთან დაკავშირებით ოსმალეთი სიამოვნებით უთმობს რუსეთს მთელ დასავლეთ საქართველოს, რომ ოსმალეთი რუსეთს თვლის თავის დამცველად ნაპოლეონის აგრესიის წინააღმდეგ ბრძოლაში.

ამის შემდეგ ციციანოვი აღარ მალავდა, რომ მას თუმცა პეტერბურგიდან ნაბრძანები ჰქონდა ძალით დაეკავებინა იმერეთის სამეფო, მაგრამ სისხლის ღვრას ერიდებოდა და მშვიდობიანი გზით ცდილობდა ქვეყნის დამორჩილებას. იმერეთის მეფეზე რომ დიდი ზეგავლენა მოეხდინა, მან ოფიციალურად ბრალი დასდო იმერთა მეფეს რუსეთის მფარველობაში მყოფ დადიანთან მტრობაში. ამის საბუთად კვინიხიძის მკვლელობა და ფალავანდიშვილის დაკითხვა (რომლის მეშვეობითაც ციციანოვი მოლაპარაკებას აწარმოებდა გრიგოლ დადიანთან) გამოიყენა,⁴ შემდეგ ლეჩხუმის დაკავებაც

¹ შ. ბურჯანაძე, იმერეთის სამეფოს ურთიერთობა რუსეთთან სოლომონ მეორის დროს, „მაცნე“ № 3, 1967, გვ. 91.

² აკა, 11, გვ. 359 (რუს.). დაწვრილებით იხილეთ მ. დუმბაძე, დასახ. ნაშრ., გვ. 163—168.

³ იქვე, გვ. 362.

⁴ აკა, 11, გვ. 357, 358, 361, 362 (რუს.).

უსაყვედურა, მაგრამ სოლომონ მეფე ციციანოვს უსაბუთებდა, რომ ლეჩხუმი იმერეთის კუთვნილება იყო და დადიანს იგი უკანონოდ ჰქონდა მიტაცებული.

რუსეთს გადაწყვეტილი ჰქონდა იმერეთი თავისი იმპერიის ფარგლებში მოექცია, რათა შემდეგ სამეგრელოს სანაპიროდან შავი ზღვით ყირიმს დაკავშირებოდა და მთელ საქართველოსთან უფრო ხელმისაწვდომი გზა ჰქონოდა.

პაველე ციციანოვმა სოლომონ მეფესთან მოსალაპარაკებლად მიხეილ ვორონცოვი¹ გაგზავნა და თან თავის მიერ შედგენილი ტექსტის პროექტი გაატანა. რომლითაც იმერეთა მეფეს რუსეთის მფარველობაში შესვლა უნდა ეთხოვა. მეფემ პირველ ხანებში ვორონცოვი არ მიიღო, ავადმყოფობა მოიმიზეზა, მაგრამ ბოლოს, 1804 წლის 20 მარტს იგი მიღებულ იქნა მეფის მიერ. მეფემ იმპერატორის ერთგულებაზე დაფიცების სურვილი განაცხადა, მაგრამ სათხოვარ პუნქტებს ხელი არ მოაწერა იმ მოსაზრებით, რომ სოლომონ ლეონიძის დაბრუნებას დაეუცდი, ის იმპერატორის პასუხს ჩამომიტანსო.

ამ პერიოდში ციციანოვს განჯის კაშპანია დამთავრებული ჰქონდა და რუსეთიდან ორი პოლკი ჯარიც მოუვიდა დამხმარედ, ამიტომ გადაწყვიტა, იმერეთში ჯარი შეეყვანა. მან იმერეთის სარდალს ქაიხოსრო წერეთელს მიმართა: „თუ სოლომონი არ დამემორჩილება და არ ეძიებს სრულიად რუსეთის მფარველობასა და ქვეშევრდომობას, მაშინ იცოდეთ, რომ საკითხი უნარესად არ მოგვარდება“². ამასთან ერთად, ციციანოვმა ალექსანდრე I-ის მითითებით იმერეთის თავადაზნაურობის მოსყიდვა დაიწყო. ჩარტორიისკისადმი გაგზავნილ წერილში ციციანოვი წერდა: „საჭიროდ ჩავთვალე იმერეთში შესვლის წინ იქ გამეგზავნა ოქრო-ვერცხლის ავანგარდი... ვვარაუდობდი, რომ შესაძლებელია ამ საშუალებით მოხერხდეს იქ შესვლა“³.

ოქროს „ავანგარდმა“ მართლაც გასჭრა — მეფის „ერთგული“ თავადები სწრაფად გადადიოდნენ ციციანოვის ნაზარზე. გოორგი აბაშიძემ ერთდროულად ათი ათასი მანეთი მიიღო მოლაღატეებზე გასანაწილებლად; ამ მოლაღატეებს სათავეში ჩაუდგა მეფის სახლთუხუცესი ზურაბ წერეთელი, რომელმაც შემდეგში მრავალჯერ შეახსენა ციციანოვს — დაპირება დიდი იყო, ოქრომ კი იმერეთში მეტად მკირე რაოდენობით მოაღწიაო.

¹ მიხეილ ვორონცოვი შემდეგში -- 1844--1854 წლებში... კავკასიის მეფის-ნაცვალი ვახდა.

² კაკა, ტ. II, გვ. 367 (რუს.).

³ იქვე, გვ. 371 (რუს.).

მიუხედავად იმისა, რომ ციციანოვს ახლა შედარებით მეტი სამხედრო ძალა ჰყავდა, მაინც მორიგებით სურდა იმერეთის შესვლა რუსეთის ქვეშევრდომობაში. მაგრამ ლეჩხუმის საკითხი ყოველთვის შლიდა მოლაპარაკებას — მეფე მფარველობისათვის მზადყოფნას იმ პირობით აცხადებდა, თუ მას შეუნარჩუნებდნენ თავის სამემკვიდრო ლეჩხუმს. ამაზე ციციანოვი არ თანხმდებოდა. ბოლოს ციციანოვმა დაარღვია პეტერბურგის მითითება, რომ ლეონიძე თბილისში გაეჩერებინა, სანამ იმერეთს არ შემოიერთებდა და მისი მეშვეობით სცადა მეფეზე ზემოქმედება.

ციციანოვმა ლეონიძეს განუცხადა, რომ მას იმპერატორისაგან მიღებული აქვს მითითება, იმერეთის სამეფო იარაღით დაიპყროს და იქ მეფობა გააუქმოს. რომ ციციანოვი რუსეთის მთავრობის წინააღმდეგ მოქმედებს და იმერეთში მეფის შეზღუდული ხელისუფლების დატოვებას შესაძლებლად თვლის, ამიტომ ციციანოვი ლეონიძის მეშვეობით მეფეს „საქმის გამოსწორებას“ პირდება, თუ ის უსიტყვოდ მიიღებს მის მიერვე შემუშავებულ „საქვეშევრდომო მუხლებს“¹.

ლეონიძეს მეფე უნდა დაერწმუნებინა, რომ მას თავის გადასარჩენად სხვა გზა არ ჰქონდა და წერილობით უნდა მიემართა ციციანოვისათვის, რომ ყველაფერზე თანახმა იყო².

ციციანოვის მხრიდან ეს მეფისათვის დიდ დახმარებას ნიშნავდა, რადგან მას იმპერატორისაგან მეფობის გაუქმება ჰქონდა დავალებული. მაგრამ ისიც უნდა აღინიშნოს, რომ ამ დროს რუსეთს საქართველოში დიდი ძალები არ ჰყავდა, ამიტომ ციციანოვი ნებაყოფლობით შემოერთებას თვლიდა მიზანშეწონილად და ამ მიზნით მუქარა-დაშინებასაც მიმართავდა.

უნდა აღინიშნოს ისიც, რომ არც იმერეთის ხალხს და მეფეს სურდათ ომი. მ. ვორონცოვის დაკვირვებით, „იმერეთში მცირედი სამზადისიც არა აქვთ ომისა“³.

სოლომონ მეფემ მიიღო ციციანოვის წინადადება მოსალაპარაკებლად შეხვედრის თაობაზე და 1804 წლის 19 აპრილს იმერეთის საზღვარზე — სოფ. ელაზნაურში ერთმანეთს შეხვდნენ იმერეთის მეფე სოლომონ II და გენერალი პავლე ციციანოვი.

ციციანოვმა იპერთა მეფეს შესთავაზა რუსეთის იმპერატორის ქვეშევრდომობაში შესვლა. ტრაქტატის ნაცვლად სოლომონ მეფეს უნდა დაეწერა თხოვნა იმპერატორის სახელზე და ამ თხოვნაში ჩა-

¹ მ. დუმბაძე, დასახ. ნაშრ., გვ. 167.

² იქვე, გვ. 168.

³ კავ. ტ. II, გვ. 271 (რუ).

მთვლილი უნდა ყოფილიყო ქვეშევრდომობაში მისი შესვლის პირობები; კერძოდ, იგი ხელს იღებდა გარეშე სახელმწიფოებთან ურთიერთობაზე, ხოლო საშინაო საქმეებიდან — სისხლის სამართლის საქმეთა წარმოებაზე.

იმერთა მეფე დაეინებით მოითხოვდა ლეჩხუმის შენარჩუნებას, მაგრამ ციციანოვი ამაზე არ თანხმდებოდა, რადგან იგი დადიანისად იყო ცნობილი, მასთან ამიტომ შეთანხმებაც არ მოხერხდა.

მეორე დღეს, 20 აპრილს, რუსეთის ჯარმა გენერალ ტუჩკოვისა და პოლკოვნიკ ერისთავის წინამძღოლობით გადალახა იმერეთის საზღვარი, დაიკავა სოფლები და ხალხს რუსეთის იმპერატორის ერთგულებაზე ფიცის მიღება დააწყებინა. იმერთა მეფეს კრიტიკული მომენტი დაუდგა, ციციანოვის „ავანგარდმა“ (ოქრომ) იმოქმედა და მეფე შინაგან დასაყრდენ ძალებს მოკლებული აღმოჩნდა. თავის მხრივ, ციციანოვიც გრძნობდა ქვეყნის შემოერთებასთან დაკავშირებულ სიძნელებებს და ამიტომ იარაღის გამოყენებას მაინც საქმის მშვიდობიანი მოგვარება ამჯობინა. — ვითომც სიძესთან გამომშვიდობების საბაბით მეფის ბანაკში ქაიხოსრო წერეთლის სიმამრი გიორგი აბაშიძე შეგზავნა. მეფემ ისარგებლა ამ მომენტით და ციციანოვთან მოსალაპარაკებლად სახლთუხუცესი ზურაბ წერეთელი, სარდალი ქაიხოსრო წერეთელი და სეხნია წულუკიძე გაგზავნა. 25 აპრილს სოფ. ელაზნაურში მეფე და გენერალი კვლავ შეხვდნენ ერთმანეთს და შეთანხმებასაც მიაღწიეს. მეფემ ხელი მოაწერა არა მფარველობით ტრაქტატს, არამედ თხოვნას რუსეთის ქვეშევრდომობაში შესვლის შესახებ. დოკუმენტი დაწერილი იყო როგორც თხოვნა-სავედრებელი იმპერატორის სახელზე, რომელიც 17 მუხლისაგან შედგებოდა.

ციციანოვთან მეორედ შეხვედრის დროს (25 აპრილს) სოლომონმა სცადა, ციციანოვის მიერ შედგენილი სათხოვარის მუხლები შეემსუბუქებინა; მაგალითად, რუსეთის იმპერატორთან უშუალო მიმორწერის უფლება ჰქონოდა, რუს მოხელეებთან უკმაყოფილების შემთხვევაში იმპერატორთან ჩივილის უფლება მიეღო, ლეჩხუმში მეფის ჯარი მდგარიყო, სანამ იმპერატორი ამ სადაო საკითხს არ გადაწყვეტდა; გურიის სამთავრო იმერეთის სამეფოს შემადგენელ ნაწილად ეცნოთ; რუსეთის მთავრობას მეფისათვის ჯამაგირი დაენიშნა; მეფეს უფლება ჰქონოდა, საჭიროების შემთხვევაში სათხოვარ მუხლებში ცვლილებები შეეტანა¹.

იმერეთის მეფის ეს მოთხოვნები ციციანოვმა გადაჭრით უარყო, მაგრამ საჭიროდ სცნო ნაწილობრივ დათმობაზე წასულიყო ლეჩ-

¹ კაკა, ტ. 11, გვ. 374—377 (რუს.).

ხუმის საკითხში, რომელიც ყოველთვის სადავოდ იყო ქცეული და შეთანხმების ჩაშლის მიზეზი ხდებოდა, ციციანოვმა შემდეგნაირად მოაგვარა: მეფეს მისცა საიდუმლო წერილი, რომელშიც თანხმობას აცხადებდა, ლეჩხუმი მეფეს დარჩენოდა, სანამ იმპერატორი არ განიხილავდა ლეჩხუმის კუთვნილების დამადასტურებელ საბუთებს. გურიის სამთავრო ციციანოვმა მეფეს მიითვალა და ის ურთიერთობა, რაც მეფესა და გურიელს შორის არსებობდა, იურიდიული აქტით გაფორმდა, როგორც ვასალური დამოკიდებულება.

1804 წლის 25 აპრილს იმერეთის მეფემ ხელი მოაწერა სათხოვარ მუხლებს, რომელთა ძალითაც მეფე რუსეთის იმპერატორის ქვეშევრდომი გახდა, ხოლო იმერეთის სამეფო — რუსეთის შემადგენელი ნაწილი.

ასე შეიერთა რუსეთმა იმერეთის სამეფო.

სათხოვარი პუნქტები, რომელთაც მეფემ ხელი მოაწერა, შემდეგი შინაარსისა იყო:

იმერეთის სამეფო რუსეთის იმპერიაში შემაველ ქვეყნად ცხადდებოდა. სოლომონს მეფობა საშვილიშვილოდ უმტკიცდებოდა, ხოლო თუ ძე არ ეყოლებოდა, მემკვიდრედ კონსტანტინე ბატონიშვილი იგულისხმებოდა.

იმერეთის მეფის ტახტზე აკვლა იმპერატორის თანხმობით უნდა მომხდარიყო, ხოლო იმერეთის მეფე პირობას დებდა, რომ ყველაფერში მთავარმართებელს დაემორჩილებოდა და მისი ერთგული იქნებოდა; ხოლო სისხლის სამართლის საქმეებს ამიერიდან რუსეთის მოხელეები აწარმოებდნენ.

მეფე ვალდებული იყო, იმერეთის ტერიტორიაზე დაბანაკებული რუსეთის ჯარი უზრუნველყო ზომიერ ფასებში ბინით, სათბობით და სურსათით.

თუკი იმერეთის სამეფოში რაიმე მადნეულობა აღმოჩნდებოდა და მათი დამუშავება მოხდებოდა, იქიდან მეფეს გარკვეული წილი უნდა მიეღო. მუშა-ხელი მეფეს უნდა გამოეყვანა, ხოლო მუშის ქირას სამთამადნო მმართველობა გადაიხდიდა.

ახალი ქალაქის გაშენების შემთხვევაში, თუ მას სარგებლიანობა ექნებოდა, მეფეს წილი უნდა მიეღო.

გემთმშენებლობისათვის თუ ვარგისი ხე-ტყე აღმოჩნდებოდა, მეფეს იგი უფასოდ უნდა მიეცა რუსეთისათვის, ხოლო მოჭრა-გადაზიდვის ხარჯები მეფის რუსეთის ხაზინას უნდა გაეღო.

იმერეთის ტერიტორიაზე გაშავალ საეპქრო გზაზე ბაჟის აღება უნდა გაუქმებულიყო, ხოლო მეფე თავის წილს მიიღებდა საერთო საიმპერიო საბაჟო შემოსავლიდან.

იმერეთის მეფეს უნდა დაებრუნებინა დადიანისათვის სამეგრელოდან წამოყვანილი ტყვეები და არავითარი პრეტენზია არ უნდა ჰქონოდა სამეგრელოს სამთავროს მიმართ.

მეფე ვალდებული იყო, გაეყვანა საურმე გზა ვახანიდან ქუთაისამდე და მასვე უნდა უზრუნველყო გზის მოვლა-პატრონობა და უშიშროება.

მეფეს უნდა დაემტკიცებინა კონსტანტინე ბატონიშვილისათვის საბატონიშვილო მამული, მხოლოდ ერთი პირობით — კონსტანტინეს იმერეთში არ უნდა ეცხოვრა, რადგან შიშობდნენ, რომ ეს შინაურ შფოთს გამოიწვევდა.

აიკრძალა ამერ-ამერში გადასახლ-გადმოსახლება ხელისუფლების ნებართვის ვარეშე.

ასეთი შეთანხმების დადებით დიდად კმაყოფილი ციციანოვი იმ დღესვე იმპერატორ ალექსანდრე I-ს საქართველოს ისტორიის მოშველიებით აცნობებდა, რომ: „განგებას ენება, რათა საქართველოს სამეფო, ქართველთა მეფის ალექსანდრე პირველის მიერ 1390 წელს დაყოფილი იმერეთის სამეფოდ და სამეგრელოს სამთავროდ სრულიად რუსეთის იმპერატორის ალექსანდრე პირველის მიერ კვლავ შეერთებულიყო“¹.

ამგვარად, რუსეთის მთავრობამ ისარგებლა იმერეთის მეფესა და დადიანს შორის შინაბრძოლებით და ასე იოლად შეძლო სამეგრელო-იმერეთის მოქცევა თავის მფარველობასა და პოლიტიკურ გავლენაში.

მთავარმართებლად დანიშვნისას ციციანოვის მიერ იმპერატორისაგან მიღებული მითითება, რომ კავკასიაში რუსეთის საზღვრები კასპიისა და შავ ზღვებამდე გაეწია, უკვე შესრულდა. შავი ზღვის შიმართულებით — ჯერ სამეგრელოს სამთავრო მოექცა რუსეთის მფარველობაში (1803 წ.) და შემდეგ (1804 წ.) იმერეთი.

იმერთა მეფის ცდები — რუსეთის მფარველობაში ისე შესულიყო, რომ დასავლეთი საქართველოს სამთავროები მეფისათვის დაემორჩილებინა, სრული მარცხით დამთავრდა.

ამგვარად, 1804 წლის 25 აპრილის აქტით იმერეთის სამეფომ, როგორც პოლიტიკურმა ერთეულმა, თავისი არსებობა დაასრულა.

იმერეთსა და სამეგრელოსთან დადებული ხელშეკრულება რუსეთის იმპერატორმა 1804 წლის 4 ივლისს დაამტკიცა და იმერთამეფემ ამის ოფიციალურ საბუთად ალექსანდრე I-ის სიგელი მიიღო.

¹ 6. ბ ე რ ძ ე ნ ი შ ვ ი ლ ი, საქართველოს ისტორიის საკითხები, წიგნი II. თბ., 1965, გვ. 305.

რუსეთის მიერ მოპოვებულ წარმატებათა შესანარჩუნებლად და საქართველოს საბოლოოდ შემოსამტკიცებლად აუცილებელი იყო ქარის გამრავლება დასავლეთ საქართველოში, მაგრამ ეს დიდ სიძნელებთან იყო დაკავშირებული. აქამდე რუსეთი საქართველოს დარიალის ხეობით უკავშირდებოდა, რაც დიდ დროსა და ხარჯებთან იყო დაკავშირებული. მაგრამ ამ გზით რუსეთის ქარის შემოსვლა უკვე შეუძლებელი ხდებოდა, რადგან 1804 წლის მაისში მთიანეთის აჯანყებამ დარიალის გზის ჩაკეტვა გამოიწვია. აჯანყებულებმა გაჟლიტეს კაიშაურსა და ციხისძირში მყოფი კახაკები. ქართლ-კახეთიდან სამხედრო ნაწილების გადაყვანა დასავლეთში მათი სიმცირის გამო არ შეიძლებოდა, ციციანოვი ერევანთან ბრძოლით იყო დაკავებული.

ასეთ პირობებში რუსეთის მთავრობას აუცილებლად მიაჩნდა ზღვიით ქარის გადმოსხმა დასავლეთ საქართველოში, მაგრამ ზღვაზე კვლავინდებურად ოსმალეთი ბატონობდა.

ფოთი ყველაზე მნიშვნელოვანი ნავსადგური იყო შავ ზღვაზე, რადგან იგი რიონის შესართავთან მდებარეობდა, ყირიმიდან ამ გზით ადვილად შეიძლებოდა ქარის შეყვანა იმერეთსა და სამეგრელოში და ამ ქარის სურსათით მომარაგება. ამიტომ იყო, რომ ციციანოვი უდიდეს მნიშვნელობას ანიჭებდა ამ ნავსადგურს როგორც ეკონომიურად, ისე სტრატეგიულად და თავის მოხსენებაში მიუთითებდა — „სამეგრელო ფოთის გარეშე არაფერს წარმოადგენს“. მისი აზრით, რუსეთისათვის ფოთი იქნებოდა უფრო დიდი შენაძენი, ვიდრე სამეგრელო, რადგან ამ ნავსადგურის დაკავებით ოსმალეთი მოწყდებოდა დასავლეთ საქართველოს.

რუსეთის მთავრობამ გადაწყვიტა ყირიმიდან შავი ზღვიით ფოთის ნავსადგურში ქარებისა და სურსათ-სანოვავის შემოზიდვა, მაგრამ ამისათვის ოსმალეთის ნებართვა იყო საჭირო, რადგან ფოთის ციხე მათ ხელში იყო.

იმპერატორის დავალებით იტალინსკი სტამბოლის მთავრობასთან მოლაპარაკებას აწარმოებდა მის თაობაზე. მან სტამბოლის მთავრობას განუცხადა, რომ ქუჩუკ-კაინარჯის ტრაქტატის ძალით სხვადასხვა ნავმისადგომი და ციხე-სიმაგრეები უნდა დარჩნენ იმ სამთავროთა მფლობელობაში, რომელთაც ისინი ძველთაგანვე ეკუთვნოდნოდათ, ფოთი კი სამეგრელოს ფარგლებში შედიოდა და თურქეთის ისევე უკანონოდ უკავია, როგორც გურიის ბათუმი და ანაკლია სამეგრელოში. ამიტომ იტალინსკის დასკვნით, ფოთი სამეგრელოს უნდა გადასცემოდა, მაგრამ ეს არც თუ ისე იოლი იყო, როგორც

რუსეთის მთავრობას წარმოედგინა. თურქეთი ჭერჭერობით დუმდა იმერეთისა და სამეგრელოს დაკარგვის თაობაზე, რადგან რუსეთთან ურთიერთობის გამწვავებას ერიდებოდა, ხოლო ამითი გათამამებული რუსეთი თურქეთს არავითარ ანგარიშს არ უწევდა და დარწმუნებული იყო იმაში, რომ ფოთის ნავსადგურსაც მას დაუთმობდა, ამიტომ იყო, რომ იმპერატორმა ციციანოვს დაავალა, რა და როგორი გზითაც არ უნდა მომხდარიყო, ფოთის ნავსადგური ხელში ჩაეგდო. მაგრამ ამიერკავკასიაში არსებულ იმდროინდელ ვითარებაში ფოთის ნავსადგურისათვის ბრძოლა მიზანშეუწონლად ჩათვალეს და იტალიისკომ სტამბოლის მთავრობას ფოთით მხოლოდ დროებით სარგებლობა სთხოვა, რათა აღმოსავლეთ საქართველოში დაბანაკებული ჯარისათვის გემებიდან სურსათ-სანოვაგე გადმოეტვირთათ. თურქეთის მთავრობამ თანხმობა მისცა ნავსადგურით დროებით სარგებლობაზე.

რუსეთი არ დასჯერდა მარტო სურსათ-სანოვაგის შეტანას და მათ გემებით ჯარის ნაწილებს შეყვანაც დაიწყეს ფოთის გზით. ოსმალეთის მთავრობას ეს შეუმჩნეველი არ დარჩა და აღმფოთებულმა რუსეთს ახსნა-განმარტება მოსთხოვა.

რუსეთის იმპერატორმა იტალიისკის დაავალა, თურქეთის მთავრობისათვის შემდეგი განმარტება მიეცა: ქუჩუკ-კაინარჯის ზავით ფოთის ციხესიმაგრე სამეგრელოს სამთავროს უნდა დარჩენოდა, მაგრამ გაურკვეველი მიზეზების გამო იგი თურქებმა დაიკავესო.¹ ასეთი პასუხით უკმაყოფილო თურქეთმა რუსეთს აუკრძალა ფოთის ნავსადგურით დროებით სარგებლობაც კი. რუსეთის გემები ფოთის თურქმა კომენდანტმა ნაპირთანაც არ მიუშვა და უკან გააბრუნა.² რუსეთის ხელისუფლებმა ისევ მიმართეს ფოთის ციხისათვის, ნება დაერთო, გემები გადმოეტვირთათ, მაგრამ კომენდანტმა სასტიკი უარი თქვა: „დადიანს არა აქვს მიწა, თვით დადიანი და მეფე სოლომონი თავიანთი მიწებით და წყლებით თურქეთის სულთანს ეკუთვნიან, თუ რუსის ჯარი ფოთთან მოვა, ჩვენ მას სისხლის დაუღვრელად არ გავატარებთ“.³

რუსებმა ციხისთვის მოსყიდვაც კი სცადეს, მაგრამ ამაოდ. რუსეთის წარმომადგენლებმა ეს სოლომონ მეფეს გადააბრალეს, ვინაიდან ის წინააღმდეგი იყო რუსეთის ჯარის დაბანაკებისა ზღვის სანაპირო ზოლზე, საიდანაც ყოველთვის შეიძლებოდა იმერეთში შეჭრილიყვნენ.

¹ კაკა, გვ. 563 (რუს.).

² ალ. ხახანაშვილი. იმერეთის მეფე სოლომონ მეორე, თბ., 1911, გვ. 26.

³ კაკა, ტ. II, გვ. 283 (რუს.).

რუსეთის მთავრობისათვის ნათელი გახდა, რომ ოსმალეთი ნავ-
მისაღვომს არ დაუთმობდა, ამიტომ იმპერატორმა კვლავ წინადადუ-
ბა მისცა ციციანოვს, რაიმე გზით ფოთი ისე ჩაეგდო ხელში, ოს-
მალეთთან საქმე არ გაემწვავებინა.

რუსეთ-იმერეთის კავშირის გაფორმების შემდეგ ციციანოვმა
იმერეთში გაგზავნა თავისი საგანგებო მოხელე პეტრე ლიტვინოვი,
რომელსაც 80-კაციანი შეიარაღებული რაზმი ახლდა. დასავლეთ
საქართველოში ლიტვინოვის მისიას შეადგენდა:

1. თუ მოხერხდებოდა, უხმაუროდ ფოთის ნავსადგურის ხელში
ჩაგდება.

2. დადიანისა და სოლომონის ურთიერთმორიგება, სანამდე
რუსეთის ჯარი შევიდოდა დასავლეთ საქართველოში.

3. რუსეთის ჯარის ზღვით შესვლა სამეგრელოში.

4. მეფე-დადიანის საქმეებში ჩარევა, დადიანის გაძლიერება და
მეფის დასუსტება.¹ მასვე ვეალებოდა, გამოერკვია ხალხის განწყო-
ბილება რუსების მიმართ.

1804 წლის 4 ივნისს ლიტვინოვი ქუთაისში მივიდა და დაკისრე-
ბული მოვალეობის შესრულებას შეუდგა. მან გამოარკვია, რომ
ფეოდალთა გარკვეული ჯგუფი, ვინც მეფისაგან დამდაბლებული
იყო, აგრეთვე, მოსახლეობის დაბალი ფენები, განსაკუთრებით, ვა-
ჭარ-ხელოსნები, რუსებს მიმართ სიმბათიით იყვნენ განწყობილ-
ნი.² ლიტვინოვმა 16 ივნისს სამეგრელოში მოწოდება გამოგზავნა,
რომლის ძალითაც ტყვის მსყიდველებს სიკვდილით დასჯა მოელო-
დათ. ტყვეთა სყიდვის წინააღმდეგ მიმართული კანონი მანამდეც
იყო გამოცემული. მაგრამ ახლა რუსეთის ჩარევას ამ საქმეში გარ-
კვეული ზეგავლენა უნდა მოეხდინა მოსახლეობაზე.³

ლიტვინოვისათვის ნათელი გახდა, რომ იმერთა მეფე დადიანი-
ვით ქედს არ იხრიდა და სანდო არ იყო. თავის მხრივ, სოლომონ-
მაც გაარკვია, რომ ციციანოვ-ლიტვინოვთან სამართალს ვერ იპოვ-
ნიდა. ამიტომ ურთიერთობა იმერეთის მეფესა და რუსეთის წარ-
მომადგენლებს შორის თანდათან რთულდებოდა.

ციციანოვი ლიტვინოვს ურჩევდა, სანამ დასავლეთ საქართველოში
რუსეთის ჯარი არ შევიდოდა, მანამ მეფესთან ურთიერთობის გამ-
წვავებას მორიდებოდა, თორემ დადიანიც და სოლომონიც ერთნაი-
რად უნდონი არიან რუსეთისათვის, ოღონდ დადიანს სისუსტე
აძულებს, უფრო მეტი ერთგულება გვიჩვენოსო.⁴

¹ მ. დ უ მ ბ ა ძ ე, დასახ. ნაშრ., გვ. 174.

² ი ქ ვ ე.

³ ი ქ ვ ე.

⁴ ნ. ბ ე რ ძ ე ნ ი შ ვ ი ლ ი, დასახ. ნაშრ., გვ. 309.

იმერეთში გადმოსვლისთანავე ლიტვინოვი შეეცადა მეფე-მთავარს შორის შეთანხმების მიღწევას. მან საჭილაოში ერთმანეთს შეახვედრა იმერეთის მეფე და სამეგრელოს მთავარი. მეფე-მთავარმა ურთიერთშორის მშვიდობიანობის დაცვის პირობა დადეს, ხოლო ლეჩხუმის საკითხი ისევ ღიად დატოვეს, რადგან იმპერატორის გადაწყვეტილებას უნდა დალოდებოდნენ, რასაც უსიტყვოდ დაემორჩილებოდნენ.

შეთანხმებამდე დადიანმა სამხედრო ძალით დაიკავა ლეჩხუმი გარდა ჭყვიშის ციხისა, ხოლო დეხვირის ციხეს ალყა შემოარტყა. ლიტვინოვმა გამოარკვია, რომ ლეჩხუმის ფეოდალები დადიანს უჭერდნენ მხარს. იმერეთის მეფემ ციციანოვს მიმართა თხოვნით, რათა ნება დაერთო, ისევ დაეპყრო თავისი სამემკვიდრეო ლეჩხუმი; მაგრამ ციციანოვმა ყურად არ იღო მეფის თხოვნა და მხარი დაუჭირა დადიანის ხელში ლეჩხუმის გადასვლას, რითაც სოლომონისათვის მოცემული თავისი ხელწერილი ლეჩხუმის შესახებ გააუქმა.

სოლომონ მეფე იმდენად უკმაყოფილო იყო ლეჩხუმის ჩამორთმევით, რომ ლიტვინოვს შეეშინდა ქუთაისში გაჩერებისა და 1804 წლის შემოდგომაზე სუჯუნის მონასტერში გადავიდა საცხოვრებლად, რომელიც რუსეთის ერთგულ ბესარიონ ჭყონდიდელს ეკუთვნოდა.¹

განაწყენებული მეფე კვლავ წინააღმდეგობრივად და ორჭოფულად მოქმედებდა. იგი ხელს უშლიდა შავი ზღვით ჭარის შემოყვანას, რადგან კარგად იცოდა, რომ აქ ჭარის შემოყვანა იმერეთის დამოუკიდებლობის აღსასრული იქნებოდა. ამიტომ იყო, რომ მან ფოთის გამგებელს აცნობა ლიტვინოვის განზრახვა — რუსები დადიანის მეშვეობით აპირებენ ფოთის ციხის ხელში ჩაგდებას.

სოლომონმა გრიგოლ დადიანის გადმობირებაც ცადა, რა თქმა უნდა, ხელსაყრელი პირობების შეთავაზებით, რომ რუსების წინააღმდეგ ერთიანი ძალით ემოქმედით, მაგრამ უარი მიიღო. ამ უარის შედეგი უნდა ყოფილიყო დადიანის უეცარი სიკვდილი, რასაც სოლომონ მეფეს აბრალებდნენ.

ელაზნაურის ტრაქტატი მეფეს დროის მოგების საშუალებად მიაჩნდა და ბრძოლისათვის ემზადებოდა. ბრძოლისათვის ემზადებოდა სპარსეთიც, ოსმალეთი კი უკვე ყურადღებას აქცევდა კავკასიის ამბებს. იმერთა მეფე თავის პოლიტიკურ ხაზს ამ მოვლენებს უკავშირებდა. მას საიდუმლო ურთიერთობა ჰქონდა გაბმული ქართველ ბატონიშვილებთან, ხანებთან, ფაშებთან, სპარსეთის შაჰთან

¹ კაკა, ტ. II, გვ. 401 (რუს.).

ნილი ადგილობრივი სურსათ-სანოვაგით უნდა დაკმაყოფილებულყო, ხოლო ტრანსპორტით და მუშახელთ მომსახურება ზოსახლეობას ეკისრებოდა.

მეფის რუსეთის მკაცრი რეჟიმით აღმოსავლეთი საქართველოდან დევნილი ბლომად აფარებდა თავს დასავლეთ საქართველოს მოსახლეობაში. ისინი ავრცელებდნენ შემადრწუნებელ ხმებს რუსეთის მკაცრი მმართველობის და მოხელეთა თვითნებობას შესახებ. ამან მეტად დააფრთხო დასავლეთის ფეოდალები. მაგრამ საზოგადოების დაბალი ფენები კეთილად იყვნენ განწყობილი რუსეთის ჯარის მიმართ, რადგან მათ მიაჩნდათ, რომ რუსები მოსპობდნენ ოსმალების ძალადობას, ტყვეთა სყიდვას და განაწამებ ხალხს მშვიდობას მოუტანდნენ.

იმერეთის მეფე ალაშფოთა რუსეთის დიდი ჯარის შემოსვლამ დასავლეთ საქართველოში, რადგან ხელშეკრულების ძალით იგი 500 კაცზე მეტს არ მოელოდა. მეფე ფიქრობდა, „ხომ არ მიჭერენო“ და ციციანოვს მიმართა კითხვით, მაგრამ ციციანოვმა მუქარით უპასუხა — „თქვენს დასაცავად მოსულ ძალას უნდობლობით ნუ ეკიდებით, თორემ იმპერატორის მიმართ დამნაშავედ ჩაითვლებით“¹.

იმერეთის მეფესა და რუსეთის წარმომადგენლებს შორის უნდობლობა თანდათანობით იზრდებოდა. ლიტვინოვი, რომელიც მცირე ამალით ქუთაისში ვერ ჩერდებოდა, რადგან ფიზიკური განადგურებისა ეშინოდა და სამეგრელოში ცხოვრობდა, ახლა, ჯარის გამრავლების შემდეგ, ქუთაისში გადმოვიდა.

ლიტვინოვი საჭაროდ აცხადებდა, რომ რუსეთის ხომალდების მოსვლის შემდეგ იმერეთის მეფე რუსეთისათვის საშიში აღარ არისო.

მას შემდეგ, რაც ქუთაისში რუსეთის ახალი ჯარი დაბანაკდა, იმერეთის მეფეს შიში ჰქონდა, რომ ერთ მშვენიერ დღეს მას დაიპყრდნენ და რუსეთში გადაასახლებდნენ, ამიტომ მან ქუთაისი მიატოვა და საცხოვრებლად ზამთრობით ვარციხეში, ხოლო ზაფხულობით ოკრიბასა და გოგში იმყოფებოდა.²

ციციანოვი მეფეს უნდობლობას უსაყვედურებდა და მისგან ისევ ქუთაისში დაბრუნებას, კონსტანტინე ბატონიშვილის გაცემას და იმპერატორთან მადლობის დებუტაციის გაგზავნას მოითხოვდა.

მეფემ კონსტანტინე ბატონიშვილი იშვილა და მის გაცემას არ აპირებდა. ქუთაისში დაბრუნების პირობად რუსეთის ჯარის ქალაქიდან გაყვანას მოითხოვდა. ლეჩხუმის გამო ისევ საყვედურობდა,

¹ კაკა, ტ. II, გვ. 419 (რუს.).

² ნ. დ. აღიანი, ქართველთა ცხოვრება, გვ. 195.

ლიტვინოვს მრავალ უწესო საქციელს აბრალებდა და მის ნაცვლად სხვა მოხელის დანიშვნას ითხოვდა.¹

აქედანაც ნათლად ჩანს, რომ მეფესა და რუსეთის ხელისუფლებას შორის ურთიერთობა კიდევ უფრო გაუარესდა. მეფე ტრაქტატით გათვალისწინებულ ვალდებულებებს არ ასრულებდა და დამოუკიდებელ პოლიტიკას აგრძელებდა. ციციანოვი თავის მხრივ ლიტვინოვს იმერეთისა და სამეგრელოს საქმეების მმართველს ეძახდა. ვარციხეში გადასული მეფე მობრუნდა და ერთ ხანს ისევ ქუთაისში ცხოვრობდა.

1805 წლის 19 თებერვალს სოლომონ მეფემ ალექსანდრე I-ის მიერ ხელმოწერილი სიგელი მიიღო, რომელიც მეფეს აუწყებდა, რომ 1804 წლის 4 ივნისიდან იმერეთის სამეფო რუსეთის ქვეშევრდომობაში იმყოფებოდა.

იმერთა მეფემ სიგელი სახეიმო ვითარებაში მიიღო გენერალ რიკპოფისაგან და მისი შიღების პატივსაცემად წირვა-ლოცვა გადაიხადა.

მიღებულმა სიგელმა მხარეებს შორის გარეგნული მშვიდობა დაამყარა.

იმერთა მეფემ რამდენჯერმე სთხოვა ციციანოვს, ებრძანებინა ლიტვინოვისათვის, რომ გაეთავისუფლებინა დეხვირის ციხე, სადაც რუსეთის გარნიზონი იყო ჩაყენებული, და შეემციკებინა ქუთაისში მდგარი ჭარის ნაწილები; რაც ნორმალური ურთიერთობის აღდგენისათვის იყო აუცილებელი. ციციანოვი წერილობით მეფეს პირადებოდა ციხის გათავისუფლებას, მაგრამ ნათქვამს არ ასრულებდა.

რიგი წარმატებების შემდეგ ციციანოვი 1806 წლის დასაწყისში ბაქოს ციხის მახლობლად დაბანაკდა; ამავე წლის 8 თებერვალს ბაქოს ხანს დამორჩილება და ციხის გასაღების ჩაბარება მოსთხოვა ელიზბარ ქსნის ერისთავის პირით. ბაქოს ხანმა მას თვალთმაქცურად თანხმობა განუცხადა. ციციანოვი ბაქოს მფლობელს პუსეინ-ყულიხანს 1796 წლიდან იცნობდა, როცა ის მონაწილეობას იღებდა ზუბოვის ექსპედიციაში, შეგობრობდა კიდევაც მასთან, ამიტომ ციციანოვმა სწრაფად მიიღო გადაწყვეტილება უშუალოდ მიეღო ხანისაგან ციხის გასაღები. იგი მხოლოდ ერთი ოფიცრის — ერისთავისა და ორი კაზაკის თანხლებით გაემართა ციხისაკენ. ხანი ციხიდან გამოვიდა, გასაღები ჩააბარა და ციციანოვი სასაუბროდ მიიწვია. როცა ნოხზე მსხდომნი ყალიონს აბოლებდნენ, ხანის მხლებელმა იბრეიმ-ბეგმა ციციანოვს კეფაში დამბაჩა დაახალა, ხოლო

¹ ნ. ბ. რ. ძ. ე. ნ. შ. ე. ლ. ი., დასახ. ნაშრ., გვ. 315.

მეორე გასროლით ქსნის ერისთავი მოკლა. ციციანოვს თავი მოჰკვეთეს¹ და სპარსეთის შაჰს აბაჰ-მირზას მიართვეს.

ციციანოვის სიკვდილი მძიმე დანაკლისი იყო რუსეთის მთავრობისათვის. მისი ენერგიული მოქმედების შედეგად მთელი კავკასია რუსეთის მფლობელობაში მოექცა, მაგრამ ამ ვრცელი ტერიტორიის შენარჩუნებისათვის საჭირო იყო სამხედრო ძალის გამოგზავნა, რომელიც უზრუნველყოფდა მშვიდობის დამყარებას ამ მხარეში, ამის საშუალება კი იმჟამად რუსეთს არ გააჩნდა, რადგან მოკავშირეებთან ერთად ნაპოლეონთან ომში იყო ჩაბმული და პირიქით, იძულებული გახდა, კავკასიიდან ევროპის ფრონტზე გაეგზავნა რამდენიმე პოლკი.

ფრანგების გამარჯვებამ რუსებზე დიდი გავლენა მოახდინა კავკასიის ხალხებზე. ნაპოლეონის აგენტები ცდილობდნენ ოსმალეთ-რუსეთს შორის უთანხმოების ჩამოგდებას, ოსმალეთ-სპარსეთის შეკავშირებას და რუსეთის წინააღმდეგ ომში ჩაბმას. ასეთ ვითარებაში რუსეთი თავს იკავებდა კავკასიაში ომის წარმოებისაგან, ცდილობდა, მოპოვებული შენარჩუნებინა და როცა საჭირო ღრო დადგებოდა, ისევ სწრაფად გადასულიყო შეტევაზე.

მოკლული ციციანოვის ადგილზე მთავარმართებლად დაინიშნა გენერალი გუდოვიჩი, რომელსაც დაევალა კავკასიის, კერძოდ საქართველოს დამშვიდება.

• • •

იმერეთის მეფე არ წყვეტდა დამოუკიდებლობისათვის ბრძოლას. ახლა თავის იმედებს იგი რუსეთ-ოსმალეთს შორის მოსალოდნელ ომზე ამყარებდა. მისი აზრით, ამ ბრძოლაში მეომარი მხარეები დასუსტდებოდნენ და იმერეთს დამოუკიდებლობის გარანტია მიეცემოდა. იმერთა მეფე ორივე სახელმწიფოს ერთგულებას, ეფიცებოდა, სინამდვილეში კი არც ერთისა არა სწამდა რა. ასევე, სოლომონ მეფის ერთგულება არც რუსებს სჭეროდათ და არც ოსმალებს. რუსეთისათვის ნათელი იყო, რომ მეფე მათ ლალატობდა; ამიტომ, როდესაც იმერეთში ციციანოვის სიკვდილის ამბავი მოვიდა, გენერალმა რიკპოფმა ჯარით დაიკავა ქუთაისი. სოლომონ მეფემ მოინდომა ძალით გაეთავისუფლებინა ქალაქი, მას ალექსანდრე ბატონიშვილიც აქეზებდა და ახალციხის ფაშაც დახმარებას პირდებოდა.

¹ 1811 წლამდე ციციანოვის ნეშტი იქვე ციხის კართან იყო დაფლული. ამ წელს კავკასიის მთავარმართებელმა მარკიზმა პაულიჩმა იგი გადმოასვენა და ობოლისის სიონის ტაძარში დაკრძალა.

რუსების ქარის მიერ ქუთაისის დაკავებამ იმერეთში მღელვარება გამოიწვია. მეფე რიკპოფს პირიდებოდა სურსათის მიწოდებას, თუ ქუთაისიდან ქარს გაიყვანდა. ამ პირობაზე გენერალი არ თანხმდებოდა. მას არ შეეძლო სოლომონის წინააღმდეგ აქტიურად ემოქმედნა, რადგან საამისო სამხედრო ძალები არ ჰყავდა; სოლომონ მეფემ თავისი მახლობლების ჩაგონებით გამოაცხადა, რომ იგი იმერეთს განთავისუფლებულად თვლის რუსეთის უზენაესი გამგებლობისაგან და გენერალ რიკპოფს ქარის გაყვანა მოსთხოვა ქუთაისიდან. გუდოვიჩი ამ წინადადებაზე არ დათანხმდა და მეფის დარწმუნება ცადა — ქარი შენ დასაცავად მიდგას ქუთაისშიო. მეფე რომ რუსეთს დალატობდა, ეს მაშინაც ცხადი გახდა, როცა რუსების მომხრე ზურაბ წერეთელი ჩამოიშორა და მის მაგივრად სახლთუხუცესად როსტომ ნიჟარაძე დანიშნა.

ზურაბ წერეთელმა დიდი როლი შეასრულა იმერეთის სამეფოს გაუქმების საქმეში. იგი იყო პატივმოყვარე, შორსმჭვრეტელი და მოანგარე ადამიანი. ზურაბი ცდილობდა სოლომონის ტახტიდან ჩამოგდებას და მეფეს უკვე 1805 წლიდან დალატობდა¹.

უკმაყოფილოდ დარჩენილი წერეთელი, მას შემდეგ, რაც მეფემ თავიდან მოიშორა, რუსებს აწვდიდა მეფის ყველა გეგმებსა და ჩანაფიქრს. 1808 წელს მან გუდოვიჩს შეატყობინა — მეფე დაქორავებული ლეკების დახმარებით რუსების განდევნას აპირებო იმერეთიდან, ამიტომ თუ იგი ამ გადაწყვეტილებას არ შეცვლის, სოლომონ მეფე იმერეთიდან უნდა განდევნოთ და მეფობას მე ვიკისრებო. მაგრამ რუსები ამ წინადადებაზე არ დათანხმდნენ. იმის შემდეგ, რაც წერეთელმა გაარკვია მისდამი რუსების დამოკიდებულება, იგი ისევ სოლომონ მეფის მხარეზე გადავიდა და 1808 წლიდან 1810 წლამდე კვლავ მეფის სახლთუხუცესი იყო².

რუსეთის სამხედრო ძალა იმერეთში თანდათანობით მატულობდა. მეფე გრძნობდა, რომ ეს ძალები მის ტახტიდან ჩამოსაგდებად იყვნენ მოსულნი, ამიტომ წერეთლის მეშვეობით გუდოვიჩს შეუთვალა: — გულწრფელად ვინანიებ ჩემს შეცდომებს და რუსთ ხელმწიფეს ერთგულებას ვპირდებიო, როცა ნიშნად მისი ერთგულებისა მეფეს მძევლები მოსთხოვეს, არ დათანხმდა, ვარციხეში გადავიდა და იქიდან მოითხოვა რუსთა ქარის გაყვანა ქუთაისიდან და ლეჩხუმის დაბრუნება.

¹ 6. შენგელია, სახლთუხუცესის თანადგობა იმერეთის სამეფოში, ქუთაისის პედინსტიტუტის შრომები, ტ. I, 1940 წ.

² იქვე.

ამ დროს სოლომონ მეფესთან ხონთქრის წინადადებით ახალციხის ფაშასაგან მდიდარი საჩუქრებით დატვირთული წარმომადგენელი მოვიდა და წინადადება მისცა, იმერეთი ისევ შესულიყო ხონთქრის მფარველობაში. ხონთქრის ყურადღებით გახარებულმა და გამხნეებულმა მეფემ საყვედურით აღსაესე წერილი მისწერა გენერალ რიკპოფს — მოტყუებული ვარ ხელმწიფისაგან, ლეჩხუმს არ მიბრუნებენ, ქუთაისის სასახლე წაშართვეს, თვითონ სოფელს ვაფარებ თავს, ამაზე მეტი დამცირება რა იქნებაო.

* * *

ნაპოლეონის სამხედრო წარმატებებმა ეგვიპტეში თუმცა ოსმალეთის მხრივ უკმაყოფილება გამოიწვია და ამან ოსმალეთი რუსეთთან დაახლოვა (1798—1806 წწ.), მაგრამ ნაპოლეონის მომდევნო წარმატებებმა ევროპაში ოსმალეთი საფრანგეთის მოკავშირედ აქცია ამრიგად, ნაპოლეონის გამარჯვებებმა მოახლოვა რუსეთ-ოსმალეთს შორის ომის დაწყება.

ოსმალეთი განაწყენებული იყო იმერეთ-სამეგრელოს დაკარგვით. ახლა მას ყველაზე მეტად რუსების მიერ შავ ზღვაზე ფეხის მოკიდება და რედუტ-კალეს სიმაგრის აგება აწინებდა.

ნაპოლეონისაგან წაქეზებულმა და მისი მხარდაჭერით გამხნეებულმა ოსმალეთმა 1806 წელს რუსეთს ომი გამოუცხადა. ბრძოლის ერთ-ერთ ასპარეზად კვლავ დასავლეთი საქართველოს შავი ზღვის სანაპირო ზოლი იქცა — ოსმალეთი დასავლეთი საქართველოს ხელში ჩაგდებისათვის იბრძოდა. ოსმალეთმა რუსებთან საბრძოლველად მოუწოდა დასავლეთი საქართველოს მეფე-მთავრებს და ამიერკავკასიის ხანებს, რადგან იცოდა, რომ ისინი უკმაყოფილონი იყვნენ რუსებისა.

რუსეთს ერთდროულად სამ ფრონტზე უხდებოდა ბრძოლა: მდ. ვისლაზე — ნაპოლეონის წინააღმდეგ, მდ. დუნაიზე — ოსმალეთის წინააღმდეგ, აღმოსავლეთ ამიერკავკასიაში — სპარსეთის წინააღმდეგ.

1807 წლის თებერვალში ოსმალეთის ფლოტი თავს დაესხა რედუტ-კალეს სიმაგრეს, გააფთრებული წინააღმდეგობის შედეგად რუსებმა თავდასხმა მოიგერიეს და ციხე-სიმაგრე შეინარჩუნეს. ამ ბრძოლაში მონაწილეობა ვერ მიიღო ქუთაისში მდგომმა გენერალმა რიკპოფმა, რადგან მას იმერეთის მეფე სანდოდ არ მიაჩნდა და ახალციხის ფაშის თავდასხმის მოლოდინშიც იყო. გუდოვიჩმა რიკპოფს დამატებით ერთი ბატალიონი ჯარი გაუგზავნა და ახალციხიდან ქართლში შემოსასვლელი ხეობა გაამაგრა.

შე ზღვაზე ფოთი წარმოადგენდა ოსმალეთის საყრდენ პუნქტს. აქედან ყოველთვის იქმნებოდა დასავლეთ საქართველოში შეჭრის საფრთხე, ამიტომ რუსეთის მთავარსარდლობამ გადაწყვიტა მისი ხელში ჩაგდება. 1807 წლის მაისში გენერალმა რიკპოფმა სამეგრელოში მყოფი რუსეთის ჯარით ფოთის ასაღებად გაილაშქრა, ქალაქი დაიკავა და ციხეს გარს შემოადგა. რადგან იერიშით მისი აღება არ ხერხდებოდა, იგი ფიქრობდა ხანგრძლივი ალყით მეციხოვნეების გატეხას. ამასობაში ოსმალეთმა მაშველი ძალები გამოგზავნა, რითაც რუსეთის ჯარს გარემოცვის საფრთხე დაემუქრა. რიკპოფმა ხიფათისათვის რომ თავი დაედო, ციხეს ალყა მოხსნა და უკან დაიხია. ამასობაში რუსეთ-ოსმალეთს შორის დროებითი ზავი დაიდო და რიკპოფმა გუდოვიჩისაგან ბრძანება მიიღო — ქუთაისში ჯარით დაბრუნებულიყო.

რუსეთ-ოსმალეთის საომარ ოპერაციებში სოლომონ მეფეს მონაწილეობა არ მიუღია. როდესაც მას გენერალმა რიკპოფმა სამხედრო დახმარება სთხოვა, სოლომონმა უპასუხა, რომ „ჩვენ განზრახვა გვქონდა და მზადაც ვიყავით სამსახური გაგვეწია რუსეთის ჯარისათვის, მაგრამ თქვენ თავიდანვე ფიცი დაარღვიეთ და ჩვენი სამფლობელო ლეჩხუმში წაგვართვით“¹. როდესაც გენერალმა რიკპოფმა ფოთზე გაილაშქრა, დახმარების ნაცვლად სოლომონ მეფე ქუთაისში შევიდა; რუსთა ჯარის ყაზარმები დაანგრია და თავისი ჯარის შეყრას შეუდგა².

სოლომონ მეფისა და რუსეთის ურთიერთდამოკიდებულება ოსმალეთისათვის კარგად იყო ცნობილი, ამიტომ ოსმალეთის ჯარის მთავარსარდალმა უსუფ-ფაშამ მეფეს წერილი გამოუგზავნა, რომელშიც სთხოვდა — ერთიანი ძალით გაელაშქრათ რუსეთის ჯარის წინააღმდეგ და განედევნათ იგი დასავლეთი საქართველოდან. სოლომონ მეფემ ფაშას უარი შეუთვალა რუსეთის წინააღმდეგ ბრძოლაზე და აღნიშნული წერილი გენერალ რიკპოფს გადასცა იმ მოსაზრებით, რომ დაერწმუნებინა იგი სოლომონის მხრივ რუსეთის ერთგულებაში, რაც რიკპოფმა არ იწამა³.

ამის შემდეგ გუდოვიჩი შეუდგა იმერეთში გარნიზონის გარავლებას და მის საზღვართან სამხედრო ნაწილების თავმოყრას, რათა საჭიროების შემთხვევაში მზად და ახლოს ყოფილიყვნენ იმერეთთან.

¹ კაკა, ტ. III, გვ. 136 (რუს.).

² დ უ ბ რ ო ვ ი ნ ი, V, გვ. 166 (რუს.).

³ საქართველოს სახელმწიფო მუზეუმის ისტორიული დოკუმენტები და აქტივები, II, გვ. 60.

1808 წლის მარტში გუდოვიჩმა მიიღო იმპერატორის საიდუმლო ბრძანება იმერეთში მეფის ხელისუფლების გაუქმების, მეფის ოჯახის (კონსტანტინეთურთ) რუსეთში გადასახლების და იმერეთში დროებითი მმართველობის დაწესების შესახებ რუსეთის წარმომადგენლის უფროსობით.

ამ დროებით მმართველობაში პირველკაცობა ზურაბ წერეთელს შესთავაზეს პოდპოლკოვნიკის ჩინთან და წელიწადში 1200 მანეთ ჯამაგირთან ერთად. ასევე დიდ პატივს პირდებოდნენ საბჭოს სხვა წევრებსაც, მაგრამ ამ პროექტს ჭერჭერობით განხორციელება არ ეწერა, რადგან სოლომონ მეფეს მთელი იმერეთის თავადაზნაურობა და სამღვდელოება უჭერდა მხარს. ამასთან, რუსეთ-თურქეთს შორის ზავი არ იყო დადებული და ამდენად, იმერეთის საკითხიც გადაუჭრელი რჩებოდა. ამიტომ გუდოვიჩმა ვერ გაბედა გადაპრელი ზომების მიღება და ეს უფრო ხელსაყრელი დროისათვის გადადო. იმპერატორის ბრძანების შესასრულებლად დამატებითი სამხედრო ნაწილები გაიგზავნა იმერეთში.

სოლომონ მეფემ კვლავ მიატოვა ქუთაისი და სოფ. მუხაყრუაში დაბანაკდა.

სოლომონი ნათლად გრძნობდა, რომ რუსეთის მთავრობისათვის იგი მიუღებელი იყო, როგორც ბაგრატიონთა გვარის წარმომადგენელი, რომ ადრე თუ გვიან, მას გვირგვინს წაართმევდნენ. ამის საბუთს ციციანოვის მიერ ბატონიშვილების რუსეთში გადასახლება, იმერეთში ჯარის ნაწილების მიმატება და მეფის ხელისუფლების შევიწროება აძლევდა.

1804 წლიდან მოყოლებული, იმერეთის პოლიტიკური მდგომარეობა თანდათანობით უარესდებოდა. რუსეთ-იმერეთს შორის დადებული ხელშეკრულების მუხლებიც არ სრულდებოდა, რამაც ორივე მხარეს შორის უნდობლობა გააღრმავა; იმპერატორთან სამადლობო დეპუტაციის გაგზავნაზე მეფემ უარი განაცხადა.

სოლომონ მეფე ფრთხილად იქცეოდა—რუსეთ-თურქეთის ომის დროს ნეიტრალიტეტი დაიკავა და მოვლენათა განვითარებას უცდიდა. სოლომონი ფიქრობდა, რომ თუ რუსეთი დამარცხდებოდა, მისი სამეფოს მოსაპოვების უშუალო საფრთხეც მოიხსნებოდა. ოსმალეთი კი თავისი სისუსტის გამო იმერეთის სამეფოს ვერ მოშლიდა, ამიტომ იმერთა მეფე ძალაუნებურად ოსმალეთის მხარეზე იხრებოდა.

მას შემდეგ, რაც იმერთა მეფემ მძევლების მიცემაზე უარი განაცხადა და ამან უფრო მეტად გააუარესა რუსეთ-იმერეთის ურთიერთობა, მეფემ თავისი საქმიანობა რუსეთის წინააღმდეგ წარმართა. მან გადაწყვიტა, ლეკთა რაზმები მოეშველიებინა, ახალციხის

ფაშას დაკავშირებოდა და მისგან ჩართო დახმარება მიეღო. ამის განსახორციელებლად კიდევაც გადადგა პრაქტიკული ნაბიჯი. დახმარებისათვის მეფემ ირანსაც და იქ გადახვეწილ ალექსანდრე ბატონიშვილსაც მიმართა, ხოლო სამეფო¹ შიგნით რუსეთის მომხრე თავადები დასაჯა.

გუდოვიჩს მხედველობიდან არ გამოპარვია სოლომონის ეს საქმიანობა, ამიტომ ბრძანა, იმერეთის საზღვარზე მიეყვანათ ქვემეხებით შეიარაღებული რამდენიმე ბატალიონი, რომელიც საჭირო შემთხვევაში იმერეთში უნდა შესულიყო.

თანდათანობით უახლოვდებოდა აღსასრულს იმერეთის სამეფოს სამსაუკუნოვანი ისტორია. რუსეთის წარმომადგენლები იმერთა მეფეს ისეთ ბრალდებებსაც უყენებდნენ, რაშიც ის არაფერ შუაში იყო; მაგალითად, ფოთის ციხის აულეებლობაც სოლომონ მეფის ლალატს მიაწერეს, თუმცა მეფე აქ დამნაშავე არ იყო. ფოთის ციხის აულეებლობის მიზეზი იყო თვით მისი კედლების სიმაგრე და დამცველთა გააფთრებული წინააღმდეგობა, რუსთა ძალების უკმარისობა და ტყვია-წამლის უქონლობა: რუსეთის წარმომადგენლებმა სამეგრელოში ეკლესიებიდან ზარებიც კი ჩამოხსნეს და ტყვიებად გადაადნეს¹.

1808 წელს მოულოდნელად გარდაიცვალა დასავლეთ საქართველოში განლაგებული რუსეთის ჯარების უფროსი გენერალი რიკჰოფი. მთავარმართებელმა გუდოვიჩმა მის ადგილზე გენერალი დიმიტრი ორბელიანი დანიშნა — ქართული ენის და წეს-ჩვეულების კარგი მცოდნე, ნათესაურადაც დაკავშირებული სამეფო კართან. გუდოვიჩის ფიქრით, ეს დიპლომატიური ნაბიჯი გამართლებული იყო იმით, რომ რუსი გენერლებისაგან განსხვავებით, ორბელიანს მეტი სარგებლობის მოტანა შეეძლო რუსეთისათვის.

იმერეთში გამგზავრების წინ გუდოვიჩმა ორბელიანს შემდეგი დავალება მისცა: გაეძევიანა სოლომონ მეფე იმერეთიდან ისე, რომ თავიდან აეცილებინა მოსალოდნელი სისხლისღვრა და შეექმნა ღრობითი მმართველობა რუსი მოხელის უფროსობით.

ქუთაისში მოსული ორბელიანი თავისი მისიის შესრულებას შეუდგა. მისი მიზანი იყო მეფის მიტყუება ქუთაისში და პეტერბურგში სამადლობო დეპუტაციის გაგზავნა, მაგრამ მეფესთან სამდღიანმა მოლაპარაკებამ უშედეგოდ ჩაიარა — სოლომონ მეფე უარს აბობდა ქუთაისში დაბრუნებაზე, ვიდრე იქ რუსეთის გარნიზონი იქნებოდა, ხოლო რაც შეეხება პეტერბურგში დეპუტაციის გაგზავნას, იმერთა მეფე ამ მოთხოვნის პირობად ლეჩხუმის დაბ-

¹ კაკა ტ. IV, გვ. 392 (რუს.).

რუნებას და ახალი ტრაქტატის დადებას აყენებდა. თუ ამას არ შემისრულებთ, რუსის ხელმწიფის სამსახური არ შემიძლიანო — აცხადებდა მეფე.

1809 წელს გუდოვიჩი გაათავისუფლეს და მის ადგილზე გენერალი ტორმასოვი დანიშნეს.

სოლომონ მეფემ ტორმასოვთან ზურაბ წერეთელი გაგზავნა, რომელმაც მას გააცნო მეფის პრეტენზიები და სურვილები, მაგრამ ტორმასოვმა ყველაფერი უარყო და ზ. წერეთელს განუცხადა — მეფის განდევნა იმერეთიდან ნაბრძანები მაქვსო, მაგრამ, რადგან ეს საკმარისი სამხედრო ძალის გარეშე შეუძლებელი იყო, სხვადასხვა მაქინაციით ცდილობდა განეხორციელებინა.

ზურაბ წერეთელმა სოლომონ მეფის სიმტკიცის გასატეხად ტორმასოვს უჩრია — რაკი იმერეთის საერო და სასულიერო დიდკაცობას მეფეზე ძლიერი გავლენა აქვს, მთავარმართებელმა, მეფის გვერდის ავლით, უშუალოდ მიმართოს ხალხს, აუწყოს მას მეფის შეუსაბამო საქციელი ხელმწიფესთან დამოკიდებულებაში და მოუწოდოს მეფეზე ზემოქმედებისათვის. ამით მეფე შეშინდება და მორჩილებაშიც მყოფა!

ტორმასოვმა მართლაც შეადგინა ასეთი პროკლამაცია და გენერალ ორბელიანს გაუგზავნა გამოსაქვეყნებლად იმ შემთხვევაში, თუ მეფე მის მოთხოვნებს არ შეასრულებდა. ეს მოთხოვნები, რომელთაც წერეთლის ხელით უგზავნიდა ტორმასოვი, იყო შემდეგი: 1. ქუთაისში დაბრუნებულიყო საცხოვრებლად. 2. თბილისში მძევლად გაეგზავნა დიდგვარიანთა შვილები და 3. პეტერბურგში იმპერატორთან გაეგზავნა მადლობის დეპუტაცია, რომლის შემადგენლობაში ზურაბ წერეთელიც უნდა ყოფილიყო.

სოლომონ მეფემ კატეგორიულად უარი განაცხადა ამ მოთხოვნების შესრულებაზე, კერძოდ: მადლობის დეპუტაციის გაგზავნას იგი შეუძლებლად ცნობდა და აღნიშნავდა — იმისათვის ხომ არ უნდა გავგზავნო მადლობის დეპუტაცია, რომ ხელმწიფეს მოვახსენო: „მადლობთ უმდაბლესად, დიდო იმპერატორო, ვინაითგან დამამდაბლე მეფე ერთმორწმუნე და დამაკლე სამფლობელოთა ჩემთა ყოველად უმოწყალესითა ამით ღრამოტითა“.¹

სოლომონ მეფემ ტორმასოვის რჩევა უარყო. მაშინ ორბელიანმა პროკლამაცია გამოაქვეყნა, მაგრამ ამან სრულიად საწინააღმდეგო შედეგი მოიტანა: იმერეთის ხალხმა ეს პროკლამაცია მეფის ტახტიდან ჩამოგდების განზრახვად მიიჩნია, ხოლო შეურაცხყოფი-

¹ ნ. ბ. რ. ძ. ე. ნ. შ. ვ. ი. ლ. დასახ. ნაშრ., გვ. 371.

² ი. კ. ვ. ე.

ლმა მეფემ მოიხმო ხალხი; გამოცხადდა 6000 შეიარაღებული მეომარი; მეფის ერთგული პირნი ლეჩხუმს, გურიასა და ოდიშშიც გადავიდნენ და ხალხს აწმებდრებდნენ. სოლომონ მეფის მომხრეებმა შეეკრიბეს ოდიშისა და ლეჩხუმის თავადაზნაურობა, სოფლის მამასახლისები, სასულეორო პირნი და სოლომონის ერთგულებათზე დააფიცეს.¹

რუსების წინააღმდეგ მღელვარება იზრდებოდა. 1809 წლის 5 ივლისს იმერლები თავს დაესხნენ კახაკებს, რომელნიც ყვირილადან სურამში მიდიოდნენ და გაძარცვეს.

სოლომონ მეფე ყოველგვარ ზომებს ღებულობდა, რომ ტახტი შეენარჩუნებინა. მან ისარგებლა იმ გარემოებით, რომ რუსის ჯარი ფოთის ასაღებად იყო წასული და ახალციხის საზღვარზე ინახულა რუსეთის დაუძინებელი მტერი ალექსანდრე ბატონიშვილი. ამავე დროს, ახალციხის ფაშასთან გაგზავნა დეპუტაცია, რათა მიემხრო ფაშა, ამასთანავე, მეფე არზრუმის ფაშასაც თხოვდა დახმარებას.

პროკლამაციის უარყოფითი შედეგით გაკვირვებული ტორმასოვი ორბელიანსა და წერეთელს საყვედურობდა, რომ მათ სათანადოდ ვერ აუხსნეს იმერეთის ხალხს მისი წინადადება, რომელიც თითქოს სოლომონ მეფისა და ხალხის სასარგებლო იყო. ტორმასოვისათვის ისიც ნათელი გახდა, რომ ზურაბ წერეთელი ორპირობას ეწეოდა, ამიტომ მან წერეთელს წერილობითი პირობა ჩამოართვა, რათა იგი დახმარებოდა რუს მოხელეებს იმერეთიდან მეფის განდევნაში.

იმერეთის თავადაზნაურობამ ტორმასოვს თხოვნით მიმართა, რომ დაეცვათ ციციანოვის დროს მეფესთან გაფორმებული ხელშეკრულება, მიეცათ მისთვის ლეჩხუმი და შეემუშაებინათ ახალი სამფარველო პუნქტები, გაეყვანათ ქუთაისიდან ჯარი გარდა ერთი ასეულისა, როგორც ეს ციციანოვის დროს იყო დადგენილი.

ამ მოთხოვნის პასუხად ტორმასოვმა ორბელიანს წინადადება მისცა, რა გზითაც არ უნდა ყოფილიყო. დაეტყვევებინა სოლომონ მეფე რუსეთის მომხრე თავადაზნაურთა მეშვეობით.

უფრო მოგვიანებით ტორმასოვი მეფეს ჰპირდებოდა: თუ ქუთაისში დაბრუნდები და რუსეთის მოთხოვნებს შეასრულებ, ქუთაისიდან ჯარს გაიყვანო, ხოლო ორბელიანს კი სწერდა. როგორმე შეეტყუებინა მეფე ქუთაისში და შეეპყრო.²

1809 წლის 29 აპრილს მეფემ ტორმასოვის მიერ გამოგზავნილი წერილი მიიღო „...სხვათა შორის უნდა მოგახსენოთ, რომ თქვენი

¹ ალ. ხახანაშვილი, დასახ. ნაშრ., გვ. 35—36.

² კაკა. ტ. IV, გვ. 194—196 (რუს.).

საქციელის გამო ხელმწიფე იმპერატორი დიდად განრისხებულია — სწერდა ტორმასოვი მეფეს — თქვენ მიერ მიღებული ფიცის და ხელშეკრულების ძალით ვალდებული იყავით აქამდის გაგვეგზავნათ რუსეთში დეპუტაცია და უმდაბლესის მადლობის გამოცხადებით დაგვეტკიცებინათ თქვენი გრძნობანი ერთგულებისა, მაგრამ არ ვიცით რატომ უკუდგებით და არ ემორჩილებით პირობას. ახლა გაცნობებთ, რომ იმპერატორმა მიბრძანა, დაუყოვნებლივ გაგზავნოთ მასთან დეპუტაცია, რომელშიც უსათუოდ სახლთუხუცესი თავადი ზურაბ წერეთელიც უნდა ერიოს.

დეპუტაცია უნდა გამოეცხადოს იმპერატორს, მოახსენოს თქვენ მაგიერ უმდაბლესი მადლობა პატრონობისა და იმერეთის სამეფოს მიღებისათვის დიდებული რუსეთის მფარველობაში.

თქვენის უსიამოვნების ზოგიერთი მიზეზი თავადმა ზ. წერეთელმა გადმოგცა — ლეჩხუმის მაზრის დაბრუნების შესახებ. ტყუილად სწუხდებით. ლეჩხუმის მაზრა ჩამოგერთვათ იმპერატორის ბრძანებით და განკარგულებით. თუ დეპუტაციას დროზე გაგზავნით და თან გაატანთ იმ საბუთებსაც, რომელთა ძალითაც ის მაზრა თქვენ გეკუთვნით, იმპერატორს თქვენზე გული მოუბრუნდება და ლეჩხუმის მაზრას უკანვე დაგიბრუნებთ.

თქვენი განრისხების მიზეზი კიდევ ის არის, რომ თქვენს ყურამდის ცრუ ამბავს მოუღწევია, თითქოს თქვენი სასახლე ჯარის ბინად გაგვეხადოს და მთლად აგვეოხრებინოს. დამშვიდლით მეფევ, ეს ამბავი მოკლებულია სინამდვილეს...“ დასასრულ, ტორმასოვი სწერს მეფეს: „თუ ინებებთ და თქვენის ნებით ქუთაისში თქვენსავე სასახლეში დაბრუნდებით, გაძლევთ სიტყვას, მთელს ჯარს ქუთაისიდან გავიყვან; დავტოვებ მხოლოდ რამდენიმე ჯარისკაცს თქვენის უმადლესობის სადარაჯოდ“¹.

ამასობაში საბოლოოდ გამოირკვა სოლომონ მეფის შეურაცხებელი პოზიცია რუსეთისადმი. მეფე დაუინებით მოითხოვდა ლეჩხუმს, ურომლისოდაც უარს აცხადებდა რუსეთის ქვეშევრდომობაზე. რუსეთის წარმომადგენლებიც დაუინებით მოითხოვდნენ, მეფეს გაეგზავნა პეტერბურგში მისი უახლოესი თავადებისაგან შემდგარი დეპუტაცია და თვითონ ქუთაისში გადასულიყო საცხოვრებლად. ამით მათ სურდათ, მეფისათვის ჩამოეცილებინათ მისი დასაყრდენი ძალა, ხოლო მეფე უბრძოლველად შეეპყროთ.

მეფე კი მოითხოვდა ქუთაისიდან ჯარის გაყვანას, წინააღმდეგ შემთხვევაში უარს აცხადებდა ქუთაისში საცხოვრებლად გადასვლაზე.

¹ კაკა, ტ. IV, გვ. 219 (რუს.).

იმერეთის მეფის ასეთი პრეტენზიების შედეგად ტორმასოვი იმ დასკვნამდე მივიდა, რომ სოლომონის დამორჩილებისათვის მხოლოდ მძლავრი იარაღი იყო საჭირო — მეფე განედევნა იმერეთიდან. ამ აზრისა იყო ლიტვინოვიც. იგი აღნიშნავდა, რომ სანამ მეფე იმერეთშია, იქ არ შეიძლება იყოს სიმშვიდეო. ლიტვინოვის განცხადებით, ორი წლის განმავლობაში ქუთაისში ყოფნის დროს მან მხოლოდ ხუთჯერ ნახა მეფე.

რუსეთის მთავრობას ხელთ ჰქონდა ცნობები, რომ იმერთა მეფე მათ ღალატობდა. 1809 წლის სექტემბერში ტორმასოვი რუმინანცევს სწერდა: „მეფე სოლომონს ჰქონდა შეხვედრა იმერეთის საზღვარზე, ახალციხის მხრიდან მოსულ ალექსანდრე ბატონიშვილთან, რომელიც მოვიდა ახალციხეში საქმაოდ დიდი ფულით, ახალციხის ფაშის, იმერეთისა და მთიელი ოსების ასამხედრებლად ჩვენი ჯარების წინააღმდეგ, და თუმცა არაა გამორკვეული მათი მოლაპარაკების შინაარსი და არც ის, თუ როგორია მათი შეთანხმება, მაგრამ, ცხადია, რომ მეფემ მალე ამ შეხვედრის შემდეგ დესპანები გაგზავნა ახალციხის ფაშასთან — თავისი სიძე მალხაზ ანდრონიკაშვილი, თავადი როსტომ ნიქარაძე და რაჰის ერისთავი. ეს არის ახლა მივიღე დანამდვილებითი ცნობა, რომ იმერეთის თავადები მივიდნენ ახალციხის ფაშასთან. ჩემს მიერ გაგზავნილმა კაცმა იქ ნახა ისინი, სპარსეთში ბაბახანთან გასამგზავრებლად რომ ემზადებოდნენ“.¹

ამის შემდეგ რუსეთის მთავრობას აღარ შეეძლო ეფიქრა სოლომონის შემორიგებაზე. რუსმა მოხელეებმა დაიწყეს გეგმის დამუშავება იარაღის ძალით იმერეთის სამეფოს სალიკვიდაციოდ. რადგან სოლომონ მეფეს კავშირი ჰქონდა ოსმალეთთან, ირანთან, აღმოსავლეთ საქართველოსთან და ყველა მათთან, ვინც რუსეთის ხელისუფლების წინააღმდეგი იყო, იგი რუსეთისათვის მეტად სახიფათო ფიგურად იქცა.

1809 წლის სექტემბერში ტორმასოვი გენერალ ორბელიანს სწერდა, რომ ემოქმედა სოლომონის წინააღმდეგ ზურაბ წერეთელთან ერთად, რომელსაც იმერეთის თავადობა უნდა გადაებირებინა რუსეთის მხარეზე ისე, რომ მეფე მარტოდ დარჩენილიყო. მეფის მოლაღატე ზურაბ წერეთელი კი რუსეთის მთავრობას ატყობინებდა რა მეფის საიდუმლოს, ტორმასოვს სწერდა — „საქმის დაყოვნება არ შეიძლება, რადგან მტრები ზაფხულს უცდიან, როცა თქვენ დაგაბრკოლებთ სხვადასხვა საქმეები, ხოლო ისინი გაიკრიბებიან რა ტყეში, გამაგრდებიან“.²

¹ კაკა, ტ. IV, გვ. 289 (რუს.).

² იქვე.

ზურაბ წერეთლის აქტიური მონაწილეობით შედგა იმერეთის სამეფოს გაუქმების ახალი გეგმა: ქვეყნის შიგნით უნდა აეჭანყებინათ მეფის წინააღმდეგ გურიის მთავარი და რაჭის ერისთავი, რაც მეფის ძალების დასუსტებას გამოიწვევდა და ამის შემდეგ ადვილად დაიმორჩილებდნენ მეფეს. ამავე დროს, რადგან სპარსეთთან და ოსმალეთთან ომი მიმდინარეობდა და ტორმასოვს არ შეეძლო ჯარის ნაწილების გადაყვანა იმერეთის ოპერაციისათვის, მეფის განდევნას ისევ მშვიდობიანი გზით ცდილობდა.

• • •

საქართველოში და საერთოდ ამიერკავკასიაში სამხედრო ნაწილების შემოყვანა და მათი იარაღითა და სურსათ-სანოვაგით მომარაგება დარიალის და რედუტ-კალეს გზებით ხდებოდა. ორივე გზა უეარგისი იყო და ვერ უზრუნველყოფდა გაზრდილი ჯარის მოთხოვნილებებს, ამიტომ რუსეთის მთავარსარდლობის გეგმაში ისევ დადგა ფოთის ნავსადგურის დაპყრობის საკითხი. ეს აუცილებელი იყო. რუსეთის საგარეო საქმეთა მინისტრი თავის სტამბოლელელჩს იტალინსკის სწერდა, რომ იმერეთი და სამეგრელო რუსეთისათვის გამოუსადეგარი დარჩებიან, თუ არ იქნება გახსნილი შავი ზღვით უმოკლესი გზა. ამისათვის მოხერხებული ადგილია ფოთის ნავსადგური, რომლის დაკავებაც აუცილებელი ხდება, რადგან დასავლეთ საქართველოში მდგარი ჯარების უზრუნველყოფა სურსათით დარიალის ხეობით ძნელიაო.

ტორმასოვმა ორბელიანს დავალება მისცა, ფოთის ციხეზე შეტევა განეხორციელებინა. გენერალმა ორბელიანმა 1809 წლის 14 მაისს ციხეს შეუტია, მაგრამ იგი ნავარაუდევზე ძლიერი აღმოჩნდა და რუსებმა მისი აღება ვერ შეძლეს: ისევ ხანგრძლივ ალყაზე გადავიდნენ.

თუმცა ამ დროს რუსეთის ჯარი სტამბოლს ემუქრებოდა და ოსმალთა მთავარი ყურადღებაც იქით იყო მიპყრობილი, მაგრამ დასავლეთი საქართველოს სანაპიროზე ამ სიმაგრის შენარჩუნებას ოსმალთათვის საარსებო მნიშვნელობა ჰქონდა, ამიტომ ფოთის შევიწროებული მეციხოვნეების დასახმარებლად ტრაპიზონის შერიფთაშა გამოგზავნეს 9000 კაცი. რადგან ფოთის ციხის აღებას იმერეთის მეფისათვის ცუდი შედეგი მოჰყვებოდა, სოლომონ მეფის ბრძანებით, მამია გურიელმა გზა დაუთმო ოსმალეთის ჯარს: „წარმოვიდნენ და მისცა გზა ზღვით და ხმელით გურიელმან მამიამ,

ვინათგან ეამსა, მას ერთგულებდა გურიელი მამია იმერეთისა მეფეს სლომონს¹.

1809 წლის ოქტომბრის ბოლოს ოსმალები გრიგოლეთსა და მალთაყვას შუა დაბანაკდნენ და დიდი საფრთხე შეუქმნეს ფოთის ციხეზე შემომდგარ რუსთა და მეგრელთა ლაშქარს.

ახლა რუსეთის ჯარი ჩავარდა განსაცდელში. ოსმალთა დასახმარებლად გურიის მთავარი ჯარს კრებდა; იგი რუსების უკმაყოფილო იყო, რადგან ციციანოვმა გურიელი იმერეთის მეფის ყმად ცნო და დადიანთან შედარებით დაამცირა.

რუსებმა მოკავშირის ძებნა დაიწყეს და ყურადღება ისევ გურიასზე, შეაჩერეს, რათა გურიელიც მეფის მოლაღატედ ექციათ და რუსეთის მხარეზე გადაებირებინათ, ამაში მთავარი როლი ისევ ზურაბ წერეთელმა, ისტორიკოსმა ნიკო დადიანმა და ჭუმათელმა მიტროპოლიტმა შეასრულეს. მათი შუამავლობით რუსეთის მთავრობამ მამია გურიელი დაარწმუნა, რომ იმპერატორისაგან გამოითხოვდა გურიის სამთავროს დამოუკიდებლობას, გაათავისუფლებდა იმერეთის მეფისადმი მორჩილებისაგან და დადიანივით გაუფორმებდა საქვეშევრდომო ხელშეკრულებას, თუკი ახლა რუსეთის ჯარს დაეხმარებოდა ოსმალების წინააღმდეგ ბრძოლაში. მამია გურიელი, რომელსაც იმერეთის მეფისაგან დამოუკიდებლობის მოპოვება სურდა, რუსეთის მხარეზე გადავიდა.

1809 წლის 2 ნოემბერს მამია გურიელმა ზურგიდან დაარტყა ოსმალების ლაშქარს, ხოლო პირისპირ რუსეთ-სამეგრელოს ლაშქარმა შეუტია. ორ ცეცხლს შუა მოქცეულმა ოსმალების ჯარმა სრული მარცხი განიცადა, გადარჩენილებმა გაქცევით უშველეს თავს.

იმვე წლის 15 ნოემბერს ციხის დაცვის უფროსმა ქუჩუყ-ბეი შერვაშიძემ წინააღმდეგობა შეწყვიტა და ციხის გასაღები გენერალ დიმიტრი ორბელიანს მიართვა. ოთხთვენახევრის ბრძოლის შემდეგ ფოთის ციხეს რუსები დაეპატრონენ.²

ციხის აღებაში გაწეული სამსახურისათვის რუსეთის მთავრობამ მამია გურიელი გაათავისუფლა იმერეთის მეფის მორჩილებისაგან და დამოუკიდებელ მთავრად ცნო. ამ მოქმედებით მან ერთხელ კიდევ შელახა იმერეთის მეფის უფლებები, თუმცა ეს არაფრად ჩააგდო, რადგან უკვე გადაწყვეტილი ჰქონდა. თვით იმერეთის სამეფოს გაუქმება.

¹ ნ. დადიანი, ქართველთა ცხოვრება, თბ., 1962, გვ. 200.

კაკა, ტ. IV, გვ. 390—391 (რუს.).

1809 წლის სექტემბერში მთავარმართებელი ტორმასოვი ფოთის ციხესთან ალყად მდგომ ორბელიანს ატყობინებდა, რომ პეტერ-ბურგიდან უკვე მიიღო ნებართვა იმერეთში ჯარის შეყვანისა და ძალის გამოყენებით სოლომონ მეფის ტახტიდან ჩამოგდების შესახებ.

ფოთის გარნიზონის დასახმარებლად წამოსული შერიფ-ფაშას ლაშქრის წინააღმდეგ ტორმასოვმა თავის დროზე მიიღო ზომები და ორბელიანის დასახმარებლად 1809 წლის 11 ოქტომბერს პოლკოვნიკი სიმონოვიჩი გაგზავნა ორი ბატალიონითა და არტილერიით. ფოთის კაშპანიის დამთავრების შემდეგ სიმონოვიჩი იმერეთში უნდა დარჩენილიყო თავისი ბატალიონებით და როგორმე ხელში ჩაეგდო სოლომონ მეფე. სიმონოვიჩს ტორმასოვმა მითითება მისცა, ზურაბ წერეთელთან შეთანხმებით ემოქმედა.

დასავლეთ საქართველოში არტილერიის გაგზავნის ამბავი სოლომონ მეფემ ადრე შეიტყო; იგი მიხვდა, რომ ეს მეფის წინააღმდეგ იყო მიმართული. რათა რუსთა ჯარი იმერეთში არ შეეშვა, მისი ერთი რაზმი როსტომ წერეთლის მეთაურობით ქართლში გადავიდა და არტილერიის ადალს თავს დაესხა სოფ. ქვებთან. თავდასხმა რუსებმა მოიგერიეს, მაგრამ ტორმასოვი იძულებული გახდა ახალი დამხმარე რაზმი გაეგზავნა დასავლეთისაკენ.

სოლომონ მეფეს არ უნდოდა ფოთში მიმავალი სამხედრო ნაწილები იმერეთის ტერიტორიაზე გაეტარებინა და მზად იყო, შებრძოლებოდა მათ, მაგრამ სიმონოვიჩმა იმერთა მეფეს ტორმასოვის წერილი გადასცა, სადაც მთავარმართებელი იმერთა მეფეს სთხოვდა ფოთში მიმავალი რუსის ჯარის იმერეთის ტერიტორიაზე უვნებლად გატარებას, სურსათისა და ტრანსპორტით დახმარებას სათანადო ღირებულების გადახდით.

ტორმასოვი მეფეს აუწყებდა, რომ იმპერატორის კეთილი ნების თანახმად, მას მეფობას ვერავინ წაართმევდა. იმავე დროს, მეორე წერილით იგი აუწყებდა ზ. წერეთელს, რომ მეფის შეპყრობის შემდეგ იმერეთის დროებით მმართველობაში იგი პირველ ადგილს მიიღებდა.

სოლომონ მეფემ რუსეთის ჯარი უზრუნველყო სურსათით და საჭირო ტრანსპორტით, რისთვისაც ტორმასოვისაგან მადლობაც კი მიიღო.

სიმონოვიჩის სამხედრო ნაწილებმა დაიგვიანეს, მათ ფოთის ციხის აღებაში მონაწილეობა არ მიუღიათ — იგი უკვე აღებული დახვდათ გენერალ ორბელიანის მიერ. რუსეთის ჯარის დაგვიანების ერთ-ერთი მიზეზი ის იყო, რომ სოლომონ მეფეს არ სურდა რა რუსების მიერ ფოთის ციხის აღება, დროის გაყვანის მიზნით ხი-

დებსა და გზებს აფუჭებდა, რათა რუსეთის ჯარის მოძრაობა შეეფერხებინა.

ფოთიდან მობრუნებული სამხედრო ნაწილებიდან სიმონოვიჩმა ერთი პოლკი ქართლში გაგზავნა და ერთი ზურაბ წერეთლის მამულში ჩააყენა. ცოტა ხნის შემდეგ იმერეთში კიდევ ორი ბატალიონი შევიდა და სვერში, საჩხერეში, ხეფინისხევსა და ლომსიანთხევში დაბანაკდა¹.

ტორმასოვმა ზ. წერეთლის რჩევით გენერალი ორბელიანი დასავლეთი საქართველოს ჯარების სარდლობიდან გაათავისუფლა და მის ადგილზე პოლკოვნიკი სიმონოვიჩი დანიშნა.

სიმონოვიჩს დაევალა, დაეჩქარებინა სოლომონ მეფის შეპყრობა. რუსეთის მოხელეებისათვის ამ დროს ადგილობრივი ფეოდალებიდან ძირითად დასაყრდენ ძალას ზურაბ წერეთელი წარმოადგენდა. ტორმასოვი დიდ იმედებს ამყარებდა მასზე, მაგრამ იმერეთის მოსახლეობამ მტრული თვალით დაუწყო ცქერა მას. 1809 წლის 30 დეკემბერს ზ. წერეთელი ტორმასოვს სწერდა: „ჯერჯერობით არ შემიძლია აშკარად ვიმოქმედო, რადგან არ ვიცი, თქვენდამი ერთგულებისათვის როდის მომკლავენ“². იგი ტორმასოვს სამხედრო ნაწილების გაგზავნას სთხოვდა, რათა იმერეთის მეფე ზამთარშივე შეეპყროთ. ამასთან, ფულის მოყვარული თავადი წერეთელი ტორმასოვს სწერდა, რომ ორბელიანისაგან მიღებულ 340 ოქროს თავისი საკუთარიც დაუმატა მეფის ზოგიერთი მრჩევლის მოსაწყიდად. იგი კიდევ ითხოვდა ოქროს ამ მიზნით.

სოლომონ მეფე თავის უფლებებს არ თმობდა. რუსი მოხელეები ცდილობდნენ მის თავიდან მოცილებას, მაგრამ ისე, რომ ამას სისხლისღვრა არ მოჰყოლოდა.

ზურაბ წერეთელს სოლომონ II-სათვის დიდი სამსახური ჰქონდა გაწეული, მეფეც მას თავის ერთგულ თავადად თვლიდა, მაგრამ ზურაბ წერეთლის განწყობილება მეფისადმი მას შემდეგ შეიცვალა, რაც სოლომონმა აღმოსავლეთი საქართველოდან გადმოხვეწილი სოლომონ ლიონიძე შეიფარა. ნიჭიერმა ლიონიძემ მალე დიდი გავლენა მოიპოვა მეფეზე, მან დიდი მამულიც მიიღო სოლომონისაგან და თან მეფის კანცლერის თანამდებობაც მოიპოვა, რამაც იგი იმერეთის სამეფო კარზე გააპირველკაცა. ამის შემდეგ ორ დიდ თავადს შორის შუღლი ჩამოვარდა — ლიონიძე წერეთლის

¹ კაკა, ტ. IV, გვ. 221 (რუს.).

² იქვე, გვ. 21ა (რუს.).

დიდგულობას ვერ ითმენდა,¹ სახლთუხუცესი კი — მეფეზე ლიონიძის გავლენასა და მის გაპირველკაცებას.

ლიონიძე მეფის რუსეთის ზრახვების შეურიგებელი მტერი იყო, მეფისა და ლიონიძის აზრები ერთმანეთს ემთხვეოდა, ამიტომ სოლომონი მას ენდობოდა და უჭერებდა, ეს კი პატივმოყვარე წერეთელს მეფის წინააღმდეგ განაწყობდა.

ასეთ ვითარებაში დაიწყო სოლომონსა და ციციანოვს შორის მოლაპარაკება რუსეთის მფარველობაში შესვლის შესახებ. ეს წერეთელს და რუსეთის მოხელეებს ხელსაყრელ ნიადაგს უქმნიდა ერთმანეთთან დაახლოებისათვის. მოლაპარაკება ციციანოვსა და სოლომონს შორის ქიანურდებოდა. საჭირო იყო მეფეზე ზეგავლენა და მისი დაყოლიება. ეს საქმე ციციანოვმა ზურაბ წერეთელს მიანდო, რომელმაც ციციანოვის იმედები გაამართლა და მეფე მართლაც დაიყოლია ხელის მოწერაზე. აქედან დაიწყო მოღალატურა მოქმედება.

• • •

ფოთის ციხის აღების შემდეგ იმერთა მეფე იმედგაცრუებული დარჩა — შერიფ-ფაშას მისთვის აღარ ეცალა. სოლომონი ცდილობდა, გაზაფხულამდე როგორმე გაეძლო და ტახტი შეენარჩუნებინა, შემდეგ კი აღიდებული წყლებისა და ტყეების წყალობით მოახერხებდა ბრძოლის გაგრძელებას. ამ მიზნით, მეფის ჩაგონებით, ზურაბ წერეთელი ტორმასოვს სწერდა: „ჩვენი მეფე ცდილობს, ერთგული ყმა იყვეს იმპერატორისა და გთხოვთ, მოწყალე თვალთ შეხედოთ და სასოება მისცეთ, რომ მშვიდობიანად იმეფოს და იცხოვროს“.²

ტორმასოვმა წერეთელს უპასუხა: „ოთხი წლის განმავლობაში მეფემ იმდენჯერ დაამტკიცა თავისი მძულვარება რუსეთისადმი, რომ მეტად დაუჭერებელია, იგი სწორ გზაზე დგებოდეს და რუსეთის ერთგული ხდებოდეს: სოლომონის ბედი გადაწყვეტილია, საჭიროა იმერეთში მშვიდობიანობა დამყარდეს და მივირს, თქვენ მოწადინებული რაღა ხართ, რომ სოლომონი დარჩეს მეფედ?“.³

ზურაბ წერეთელი ისევ განაგრძობდა ორპირობას: სიმონოვიჩს ურჩევდა, სოლომონის დევნა უარეყო, ტორმასოვს კი აჩქარებდა, რომ მეფე ძალით შეეპყრო. წინააღმდეგობრივი იყო მისი დამოკიდებულება მეფესთან.

¹ „ივერია“, 1877, №26, გვ. 12—13.

² ალ. ხახანაშვილი, დასახ. ნაშრ., გვ. 38.

³ კაკა, ტ. IV, გვ. 213 (რუს.).

მეფე დიდ სიფრთხილეს იჩენდა რუსეთის სარდლობის მიმართ. ერთხანს ტორმასოვი და სიმონოვიჩი იმ აზრისა იყვნენ, რომ მეფეს ვერც დაიჭერდნენ და ვერც დაიმორჩილებდნენ. ამიტომ ფიქრობდნენ დათმობით მის შემორჩევას.

უფრო შოგვიანებით, სიმონოვიჩი დარწმუნდა, რომ მთელი იმერეთი მტკიცედ უჭერდა მხარს მეფეს, ამიტომ ტორმასოვის წინაშე გადაჭრით დასვა საკითხი მეფისადმი დამოკიდებულების შეცვლის და მასთან შერიგების შესახებ.¹

სოლომონ მეფესა და ტორმასოვს შორის მოლაპარაკება ისევ გაიმართა, მეფემ ერთხელ კიდევ სცადა, მიეღწია იმერეთის სამეფოს ავტონომიური უფლებების შენარჩუნებისათვის რუსეთის მფარველობის პირობებში.

ამ მოთხოვნასთან ერთად სოლომონ მეფის მოციქულებს თან მიჰქონდათ იმერეთის თავადაზნაურობისა და უმაღლესი სამღვდლოების წერილი, რომელშიც რუსეთის ხელისუფლებისაგან მეფისათვის წყალობას ითხოვდნენ.

1810 წლის 5 იანვარს ტორმასოვისადმი გაგზავნილ წერილში სოლომონ მეფე უმტკიცებდა მას, რომ ციციანოვის მიერ იმერთა მეფესთან დადებული ტრაქტატი მხოლოდ რუსეთის ხელისუფლებამ დაარღვია: 1) ლეჩხუმს დაპირდნენ და არ მისცეს, 2) დეხვირია მცველნი ამოწყვიტეს და ციხე დადიანს გადასცეს, 3) ლიტვინოვმა მეფის ბეჭედი აგლიჯა ქუთათური ვაჭრის დუქნიდან და საქონელი მისცა ვაჭარს, რომელზედაც მეფე განრისხებული იყო, 4) 120 კაცის მაგივრად, მეფის დაუკითხავად ქუთაისში დიდი ჯარი ჩააყენეს; 5) მეფეს ქუთაისის სასახლე წაართვეს და იქ სალდათები ჩააყენეს, 6) მის სიძეს — წულუკიძეს ჯარისკაცებმა სცემეს და სხვ.

როგორც ზემოთ აღვნიშნეთ, მეფემ ერთხელ კიდევ ცადა თავისი უფლებების აღდგენა და ტორმასოვს გაუგზავნა ახალი ტრაქტატის პროექტი, სადაც ძველისაგან მცირეოდენი განსხვავებით, მეფე სუვერენიტეტის აღდგენას ითხოვდა. ტორმასოვმა ახალი მუხლების მიღებაზე უარი განაცხადა იმ მოტივით, რომ ძველსა და ახალ მუხლებში არავითარი განსხვავება არ არის, გარდა სამი მუხლისა: 1) ლეჩხუმის დაბრუნება, 2) სამეფო ნიშნების ბოძება და 3) იმპერატორის კარზე მეფის მინისტრის დანიშვნა. იგი აღნიშნავდა, რომ ყველა ამას იმპერატორი მუხლების შეუცვლელად მიიღებს, თუ იმერთა მეფე მთავარმართებლის მოთხოვნას დაემორჩილება და ქუთაისში საცხოვრებლად გადავა, მძევლებს თბილისში გამოგზავნის, ხოლო იმპერატორთან საჩქაროდ დეპუტაციას მიავლენსო.

¹ კაკა, ტ. IV, გვ. 217 (რუს.).

ტორმასოვი ფიქრობდა, რომ მეფე მხოლოდ დროის მოგების მიზნით აწარმოებდა მოლაპარაკებას, რადგან მისთვის ცნობილი იყო — სოლომონ მეფე ოსმალეთის ფაშებს რუსეთის წინააღმდეგ საბრძოლველად მოუწოდებდა და ფაშებიც ჯარს უყრიდნენ თავს, რაც რუსეთის მოხელეებს აიძულებდა, ფხიზლად ყოფილიყვნენ. ასეთ პირობებში, თუმცა ტორმასოვი ვადამწყვეტი ბრძოლისათვის ემზადებოდა, მაინც ცდილობდა, სოლომონ მეფეზე ზემოქმედება მოეხდინა მოლაპარაკების გზით და იგი უბრძოლველად ჩაეგდო ხელში. ტორმასოვი მეფეს სწერდა, რომ იმპერატორის მოთმინების ფილა აღივსო და მრისხანებით შეიცვალა, ნაბრძანები მაქვს, თუ მეფე სოლომონი კვლავ გაჭირვებულდება და მორჩილებას არ განაცხადებს, ძალით წაერთმევა სამეფო, ხოლო თუ მეფე დამორჩილდება რუსეთის ხელისუფლების ნება-სურვილს, ყველა უფლებებს შეუნარჩუნებთო. ტორმასოვის პირობები ასეთი იყო:

1) მეფემ სამი დღის განმავლობაში უნდა წარუდგინოს სიმონოვიჩის პეტერბურგში დესპანებად გასაგზავნი ბატონიშვილი კონსტანტინე, სიძე მეფისა მალხაზ ანდრონიკაშვილი, თავადნი: სოლომონ ლეონიძე, სეხნია წულუკიძე, ქაიხოსრო წერეთელი და როსტომ ნიქარაძე.

2) დაუყოვნებლივ გადავიდეს საცხოვრებლად ქუთაისს (ამისათვის ტორმასოვმა სიმონოვიჩს სახელმწიფო ხარჯებით შეაკეთებინა მეფის სასახლე).

3) გაგზავნოს დესპანთა ხელით უმადლესი თხოვნა მადლობის გამოსაცხადებლად, რომ იმპერატორმა სამუდამოდ მიიღო იმერეთი თავის ქვეშევრდომად, მოინანიოს თავისი საქციელი და აღუთქვას ერთგულება. ტორმასოვი სამი დღის მოფიქრების ვადას აძლევდა და თუკი მეფე ამ პირობებს შეასრულებდა, მთავარმართებელი საზეიმო ფიცით არწმუნებდა მეფეს, რომ მას იმერეთის მეფობა არ წაერთმეოდა; მაგრამ იმერთა მეფის მოტყუება არ ხერხდებოდა — ქუთაისში გადასვლასა და პეტერბურგში დეპუტაციის გაგზავნაზე არ თანხმდებოდა, თავის მხრივ იგი ითხოვდა ელაზნაურის ტრაქტატით განსაზღვრულ პირობათა განხორციელებას, სახელდობრ: ლეჩხუმის დაბრუნებას, რუსის ჯარის გაყვანას იმერეთიდან ერთი როტის გარდა. ქუთაისის სასახლის „დაბრუნებას“.

ტორმასოვის ყველა „საიდუმლო“ განზრახვას მეფე მიხედვრილი იყო: პეტერბურგში გასაგზავნი დეპუტაციის შემადგენლობაში მეფის უერთგულესი და უჭკვიანესი პირები ირიცხებოდნენ; მათი მოცილებით რუსეთის მოხელენი ვარაუდობდნენ მეფის პოზიციების დასუსტებას და რუსი მოხელეების ნება-სურვილზე მის დაყოლიე-

ბას, ხოლო მეფის ქუთაისში გადასვლა ნიშნავდა მის ხელში ჩაგდებას.

იმედგაცრუებული სიმონოვიჩი ფიქრობდა, რომ სოლომონ მეფეს გაგებული ჰქონდა იმპერატორის საიდუმლო ბრძანება მეფის შეპყრობისა და რუსეთში გაგზავნის შესახებ. მეფის ძალით შეპყრობას მოითხოვდა ზურაბ წერეთელიც; ამ აზრს იზიარებდნენ სიმონოვიჩი და ტორმასოვი, მაგრამ ჭერჭერობით ამისათვის საჭირო ძალები არ ჰყავდათ, ისინი მოლაპარაკებით ცდილობდნენ მეფის შეყოლიებას, სანამ დამხმარე ძალას მიიღებდნენ. ამ მიზნით და თვით სოლომონის თხოვნით ტორმასოვმა იმერთა მეფესთან მოსალაპარაკებლად გაგზავნა თავისი მოხელე მოგილევესკი. ამ პერიოდში მეფის ბანაკი რუსეთის ჯარს ისე უნდა მოეცვა, რომ მეფეს გასაქცევი გზა არსაით ჰქონოდა. საჭირო იყო მზად ყოფილიყვნენ თავიანთი ლაშქრით: გურიელი, დადიანი და გელოვანი. სიმონოვიჩს ხმები უნდა გაეგრცელებინა, თითქოს ახალციხეზე სალაშქროდ მიდიოდა და ხანისწყლის ხეობა უნდა დაეკავებინა, რომ მეფეს ახალციხეში გასაქცევი გზა მოჭრილი ჰქონოდა. ამავე დროს, ქართლიდან იმერეთის საზღვარზე რუსეთის ჯარის ნაწილი უნდა მოსულიყო და იქ დაბანაკებულიყო, იმ მიზნით, რომ დათქმულ დროზე მას იმერეთის საზღვარი გადაეღახა და იმპერატორის ერთგულებაზე ხალხის დაფიცებას შესდგომოდა. ამავე დროს, გამოქვეყნდებოდა პროკლამაციები მეფის ტახტიდან ჩამოგდების შესახებ.

სოლომონ მეფე ხედავდა მოწინააღმდეგის მზადებას, მაგრამ არას იმჩნევდა და მოლაპარაკების გახანგრძლივებას ცდილობდა. მეფე ტორმასოვს დაეთანხმა პეტერბურგში დეპუტაციის გაგზავნაზე, მხოლოდ იმ პირობით, რომ გასაგზავნ დეპუტატებს თვით დანიშნავდა და მადლობის სათხოვარსაც გაატანდა, ხოლო როცა ეს დეპუტატები პეტერბურგიდან დაბრუნდებოდნენ, მეფეც გადავიდოდა ქუთაისში საცხოვრებლად.

ტორმასოვიც მიხვედრილი იყო მეფის განზრახვას და, ერთი მხრივ, სიმონოვიჩს უბრძანებდა სასწრაფოდ დამთავრებინა სამხედრო სამზადისი, მეორე მხრივ, მოგილევესკის პირით მეფეს ყველაფრის შესრულებას ჰპირდებოდა, თუ მის რჩევას დაჰყვებოდა. მაგრამ ტორმასოვი გრძნობდა, რომ მეფესთან მოლაპარაკება უშედეგოდ დამთავრდებოდა და ამიტომ ეგერთა მე-9 პოლკის ორი და ხერსონის პოლკის ერთი ბატალიონი იმერეთის საზღვარს მიუახლოვდა იმ მოსაზრებით, რომ მოლაპარაკების უშედეგოდ დამთავრებისთანავე დაეწყოთ მეფის წინააღმდეგ იარაღით ბრძოლა.

ქუთაისიდან მოგილევესკიმ ვარციხეში მყოფ მეფეს თავადი ამირეჯიბი გაუგზავნა და მასთან შეხვედრის სურვილი ამცნო. მეფეც

მოგილევსკის ახლა თავადი სოლომონ ლიონიძე, თავადი ჯაფარიძე და ვარციხეში მიიწვია მოსალაპარაკებლად. ამ მოლაპარაკების შედეგი მოგილევსკიმ დაწვრილებით აცნობა ტორმასოვს.

მეორე დღეს მოგილევსკის მოახსენეს, რომ მისი წინადადებებიდან შეასრულებენ მხოლოდ ერთს — მეფე თანახმაა, გაგზავნოს დეპუტაცია, სხვა მუხლები დარჩება უცვლელადო. „დანარჩენ მუხლებს შევასრულებ და ქუთაისშიაც მხოლოდ მაშინ გადმოვალ, როცა დაბრუნდება დეპუტაცია და წერილობითს საბუთს მომიტანს ხელმწიფისაგან, რომ იმერეთის მეფედ დამტოვა მისმა იმპერატორობითმა უდიდებულესობამ და ამასთან ჟურნალეულმეტოფს რუსეთის ჯარისაგანაო“¹.

ერთი სიტყვით, მეფე და მისი მრჩეველები დროის მოგების მიზნით მოგილევსკის აყოვნებდნენ, ამას რუსეთის მოხელე კარგად გრძნობდა და ისევ რუსეთში დაბრუნდა. ხოლო რამდენიმე ხნის შემდეგ მეფისაგან გამოგზავნილმა პირმა ამცნოთ, რომ მეფემ ყველაფერი შეინანია და გთხოვთ შებრალებასაო. ამის შესამოწმებლად მოგილევსკიმ ჯაშუში გაგზავნა და მანაც ამცნო, რომ 19 თებერვალს მეფემ გაგზავნა ახალციხის ფაშასთან თ. თ. ქაიხოსრო, სვიმონი და ბერი წულუკიძეები და სთხოვა მას დახმარება ჩვენი ჯარის წინააღმდეგო.

ტორმასოვისადმი გაგზავნილ წერილში მოგილევსკი წერდა: მეფე თუმცა ერთგულებას აცხადებს, მაინც სანდო არ არისო.²

სოლომონ მეფესთან მრავალგზის უნაყოფო მოლაპარაკების შემდეგ მთავარმართებელმა ტორმასოვმა განკარგულება გასცა, 1810 წლის 20 თებერვლისათვის მზად ყოფილიყვნენ სამხედრო შენაერთები და მათი მოკავშირე დასავლეთი საქართველოს მთაგრეხი, რომ იმერეთის მეფე იარალის ძალით განედევნათ და ქვეყანა რუსეთისათვის შეეერთებინათ.

20 თებერვალს ქუთაისის ეკლესიებში გამოაცხადეს ტორმასოვის მოწოდება სოლომონ მეფის ხელისუფლების გაუქმების შესახებ. მოწოდებაში აღნიშნული იყო, რომ სოლომონ მეფემ დაარღვია მის მიერ რუსეთის ქვეშევრდომობაზე მიღებული ფიცი, არ ცნობს რუსეთის ხელისუფლებას და მის წინააღმდეგ იწვევს ოსმალეთსა და არღვევს მშვიდობიანობას. ამიტომ ნაბრძანები მაქვს, იმერეთის ხალხის კეთილდღეობისათვის სოლომონ მეფე გავაძევო იმერეთიდან, ხოლო ხალხმა უნდა გაწყვიტოს ყოველგვარი კავშირი მეფესთან, „თქვენი კეთილდღეობისათვის ახლა წესდება იმე-

¹ თ. ხუსკივაძე, დასახ. ნაშრ., გვ. 49.

² იქვე, გვ. 51.

რეთის მმართველობა, შემდგარი იმერეთის უწარჩინებულესი თავადაზნაურობისაგან, რუსი სამხედრო მოხელის თავმჯდომარეობით¹.

დასავლეთ საქართველოში მყოფი რუსეთის ჯარების სარდალმა სიმონოვიჩმა, რომელიც სამეფოს გაუქმებოს შემდეგ იმერეთის გამგებლად იყო ნავარაუდები, გამოსცა მუქარის მოწოდება: თუ თავადაზნაურობა მეფეს დაუქერდა მხარს და რუსეთს არ მიემხრობოდა, მაშინ მამულები, ყმები და ყოველგვარი ქონება ჩამოერთმეოდათ და სახელმწიფო ხაზინაში გადაირიცხებოდა. ასეთმა მუქარამ გაჭრა და მეფეს უმრავლესობა ჩამოაცილა — ქუთაისში ხალხის დაფიცება დაიწყო იმპერატორის ერთგულებაზე.

20 თებერვალს რუსეთის სამხედრო ნაწილებმა ყველა კუთხიდან შეუტოეს იმერეთის სამეფოს. სოლომონი ვარციხის მიდამოებში იყო გამაგრებული 4000 მეომრით.

მეფის შესაპრობად ვარციხისაკენ ერთდროულად მიემართებოდნენ რუსთა შენაერთები: ქართლიდან, ქუთაისიდან, სამეგრელოდან, გურიიდან და ლეჩხუმიდან.

საჯავახოში მდგარმა გურიელმა შეტევა განახორციელა ვარციხის მიმართულებით, ხოლო სამეგრელოს ჯარის ერთი ნაწილი რუსეთის ჯართან ერთად ჩხარს დადგა, მეორე ნაწილი დადიანის მეთაურობით ვარციხისაკენ წავიდა, გელოვანი ლეჩხუმის ჯარით ოკრიბაში შეიჭრა და მეფეს რაჭოდან დახმარების მიღების საშუალება მოუსპო.

წინასწარ შემუშავებული გეგმით, იმერეთის ყველა მიმართულებით დაიგზავნა სამხედრო რაზმები, რომ გზა გადაეჭრათ მეფის დასახმარებლად წამოსული მამული ძალებისათვის.

ერთთვიანი ბრძოლის შემდეგ იმერეთის მეფის გარემოცვის რკალი თანდათანობით ვიწროვდებოდა. მეფემ თავისი სადგომი — ვარციხე დატოვა და ხანის ხეობას მიაშურა, რათა იქიდან ახალციხეში გადასულიყო, მაგრამ სიმონოვიჩის მიერ ეს გზაც მოჭრილი აღმოჩნდა. მეფემ საიდუმლოდ გაგზავნა ახალციხის ფაშასთან სოლომონ ლეონიძე და მალხაზ ანდრონიკაშვილი, რათა დაეჩქარებინა ოსმალთა ჯარის გადმოყვანა იმერეთში, მაგრამ ესეც ნაგვიანევი აღმოჩნდა.

გალიაში გამომწყვდეულმა მეფემ თანხმობა განაცხადა რუსების მიერ წამოყენებული მოთხოვნების მიღებაზე და მოლაპარაკება გამართა სიმონოვიჩთან და მოგილევესკისთან, რომლებმაც იგი მთავარმართებელ ტორმასოვთან შეხვედრაზე დაითანხმეს.

¹ კაკა, ტ. IV, გვ. 219 (რუს.).

1810 წლის 12 მარტს ბაღდათის ზემოთ სალხინოს საყდარში სიმონოვიჩმა და მოგილევსკიმ საჯაროდ, რუსეთის რაზმებისა და იმერეთის თავადების თანდასწრებით ჯვარსა და სახარებაზე დაიდო-
ცეს, რომ მეფეს არ შეიპყრობდნენ. მიიღებდნენ მეფური პატივის-
ცემით და ქართლის საზღვარზე, პატიების გამოთხოვის მიზნით,
ტორმასოვთან შეხვედრის შემდეგ, უკან გამოისტუმრებდნენ¹.

იმავე წლის 15 მარტს, მეფე 500 შეიარაღებული მეომრით გაემ-
გზავრა ქართლის საზღვარზე ტორმასოვთან შესახვედრად და მოსა-
ლაპარაკებლად. გზაში მეფე და მისი თანამზრახველნი ხალხში ხმებს
ავრცელებდნენ, რომ იგი მიდიოდა რუსეთის ადგილობრივ ხელო-
სუფლებასთან მოსალაპარაკებლად, და თუ შეთანხმება არ მოხდე-
ბოდა, მეფე შინც დაბრუნდებოდა იმერეთში და ბრძოლას გააგრ-
ძელებდა დამოუკიდებლობისათვის.

გზაში, როგორც ჩანს, მეფემ შეიტყო, რომ რუსეთში გადასახ-
ლებას უპირებდნენ და გაქცევა სცადა, მაგრამ ამაოდ, რუსთა რაზ-
მები მას მკვიდროდ მურყევობდნენ. ამის შემდეგ მეფეს გაძლიერე-
ბული დაცვა დაუყენეს და თან გამოუცხადეს, რომ იგი რუსეთის
„საპატიო ტყვე იყო“ და ამაოდ შეეცდებოდა გაქცევას. ყოველგვარ
ი ხიფათის თავიდან ასაცილებლად მოგილევსკიმ, რომელიც მე-
ფეს მიაცილებდა ორი ბატალიონი ჯარით, მას ალყა შემოარტყა და
ისე მიიყვანა სოფ. ვარიაწში, სადაც 1810 წლის 28 მარტს მას მღა-
ვარმართებელი ტორმასოვი შეხვდა.

ტორმასოვმა მეფეს გამოუცხადა, რომ მისი ბედის გადასაწყვე-
ტად იმპერატორის პასუხს უნდა დალოდებოდა თბილისში. ამიტომ
მეფის მხლებლებიდან 400 კაცს რუსეთის ერთგულებაზე ფიცი მია-
ღებინა და იმერეთში დააბრუნა.

მეფე 100 კაცის თანხლებით თბილისში წაიყვანეს. ქალაქში
შესვლისთანავე ეს 100 კაციც ჩამოაშორეს და მარტოდ დარჩენილი
მეფე თავად სუმბათაშვილის სახლში დააბინავეს, როგორც საპა-
ტიო ტყვე და ძლიერი დაცვა დაუყენეს, რომ არ გაქცეულიყო.

ტორმასოვი დიდად კმაყოფილი იყო, რომ ხუთი წლის განმავ-
ლობაში ურჩობით განთქმული მეფე ტყვედ ჰყავდა თბილისში. მან
მადლობა გამოუცხადა სიმონოვიჩს და გენერლის ჩინი მიანიჭა, თან
მთელი დასავლეთი საქართველოს ჯარების სარდლად და იმერეთის
მმართველად დანიშნა.

ტორმასოვი საგანგებოდ ეშზადებოდა, რათა სოლომონ მეფე
რუსეთში გადაესახლებინა.

¹ ს. კაკაბაძე, საქართველოს ისტორია, ახალი საუკუნეების ეპოქა, თბ.,
1921, გვ. 177.

მეფის დატყვევების შემდეგ იმერეთის ციხეები რუსეთის ჯარებმა დაიკავეს; ორმოცი ათასმა კომლმა — იმერეთის თავადობამ, სამღვდლოებამ და ხალხმა — იმპერატორის ერთგულებაზე დაიფიცა.

ტორმასოვის ბრძანებით ყოველგვარი უსიამოვნო მოულოდნელობის თავიდან აცილების მიზნით ციხესიმაგრეების ნაწილი დაანგრეს, ნაწილში კი რუსი ჯარისკაცები დააყენეს:

„შინაგანი წესიერებისა და ოსმალეთის თავდასხმისაგან დასაცავად“ იმერეთში დატოვებული რუსეთის ჯარის ნაწილები განლაგდნენ: ქუთაისში, ვაკეში, ბაღდათში, საჩხერეში, ჩხერში, ვარციხესა და სხვა პუნქტებში, აგრეთვე, რაჭაში არ დარჩენილა არც ერთი კუთხე, სადაც სამხედრო ნაწილი თუ არა, საყარაულო პუნქტი მაინც არ ყოფილიყო.

იმერეთის სამეფოს გაუქმებისთანავე შეიქმნა დროებითი მთავრობა. იმერეთი დაიყო ექვს ნაწილად: ქუთაისის, ვაკის, ბაღდათის, საჩხერის, ჩხერის და რაჭის ოლქებად. აღმოსავლეთი საქართველოს მსგავსად ამ ოლქებში ჩამოაყალიბეს სახაზინო, სასამართლო და აღმასრულებელი ექსპედიციები.

ტორმასოვი რუმიანცევისადმი გაგზავნილ მოხსენებაში საზეიმო განწყობილებით აღნიშნავდა, რომ იმპერატორის ნება-სურვილა შესრულებულია და იმერეთი მთელი თავის ციხესიმაგრეებით ერთი თვის განმავლობაში შეერთებულია მისი უდიდებულესობის იმპერიასთან. მოსახლეობას მიაღებინეს იმპერატორისადმი ერთგულების ფიცი, თვით მეფე კი თბილისშია და ელოდება მისი უდიდებულესობის გადაწყვეტილებას.

სოლომონ მეფესთან ერთად ტახტის მემკვიდრე კონსტანტინე ბატონიშვილიც დაიჭირეს და თბილისში ჩაიყვანეს. როგორც ვიცით, იგი ადრე გაიქცა და ისევ იმერეთში დაბრუნდა; სოლომონ მეფემ კონსტანტინე ტახტის მემკვიდრედ აღიარა, ცოლი შერთო და საუფლისწულოდ ჩხარი და სვირი მისცა. 1810 წლის 31 ივლისს იგი მთავრობის განკარგულებით რუსეთს გაიგზავნა.

იმერეთის სამეფოს გაუქმებაში და მეფის დაჭერაში რუსეთის მთავრობას იარაღით მხარში ამოუდგნენ სამეგრელოსა და გურიის სამთავრო სახლების წევრები ლევან დადიანისა და მამია გურიელის მეთაურობით, აფხაზეთის მთავარი მანუჩარ შერვაშიძე და ლეჩხუმის მოურავი ბერი გელოვანი; იმერეთის სამეფოდან: ზურაბ შერეთელი, ანტონ რაჭის ერისთავი, ვახუშტი ჩხავაძე, ევლიმე — გენათელი მიტროპოლიტი, სეხნია და ოტია წულუკიძეები და სხვანი.

სუმბათაშვილის სახლი თბილისში, სადაც სოლომონ მეფე მოათავსეს, მდებარეობდა მტკვრის მარჯვენა ნაპირზე, ავლაბრის ხიდის ახლოს; სახლი განმარტოებულად იდგა და გარს ერტყა მაღალი გალავანი ვიწრო გასასვლელი კარით.

რვა ოთახიდან მეფის განკარგულებაში ოთხი ოთახი იყო. სახლის შიგნით მეფე თავისუფლად გრძნობდა თავს, ხოლო გალავანი გარშემორტყმული იყო ჯარისკაცებით, მეფეს ძლიერი დაცვა დარაჯობდა. მეფესთან შესვლა მხოლოდ სპეციალური ნებართვით შეიძლებოდა. სიფრთხილისათვის მეფეს მულამ თან ახლდა ერთი ოფიცერი.

მიუხედავად დიდი სიფრთხილისა და ძლიერი დაცვისა, იმერთა მეფემ 1810 წლის 10 მაისის ღამეს მაინც მოახერხა გაქცევა ქაიხოსრო წერეთლის მიერ წინასწარ შემუშავებული გეგმის მიხედვით.

მეფემ მოსამსახურის ტანისამოსი ჩაიცვა, ლოგინში თავისი პირისფარეში ჩააწინა, ნაცრით პირისახე მოისვარა, თუნგით ხელში (დავით ბატონიშვილის სიტყვით ტიკჭორით) ორ დარაჯს გაუარა და შეკითხვაზე თამამად უპასუხა, რომ იგი მეფის მსახურია და მტკვარზე მიდის წყლის მოსატანად. შემდეგ მეფე ქალაქის გალავნიდან გაიყვანეს. გალავნის გარეთ მას ელოდნენ გაქცევის ორგანიზატორები: ქაიხოსრო, გიორგი და ორი სიმონ წერეთელი, დავით და გიორგი ერისთავები, როსტომ ნიეარაძე, დავით აბაშიძე, ბერი ლორთქიფანიძე და სხვანი, სულ 23 ცხენოსანი. მათი თანხლებით მეფე ახალციხის მიმართულებით გაუჩინარდა¹.

თრიალეთის გზაზე მიმავალ მეფეს წინ 300-კაციანი ლექთა მოთარეშე რაზმი შემოხვდა. მათ იმერთა მეფე იცნეს, თავყანი სცეს და ახალციხემდე მიაცილეს. ახალციხის ფაშამ სოლომონ მეფეს ოქროთი აღკაზმული ცხენი მიართვა და დიდი ზარ-ზეიმით აღნიშნა მისი მისვლა ახალციხეში².

ტორმასოვი ამ დროს ყარაბაღში იყო და მოლაპარაკებას აწარმოებდა დროებითი ზავის შესახებ მირზა ბეზიურგთან. მის მოვალეობას თბილისში ასრულებდნენ მოადგილეები — გენერლები ახვერდოვი და როზენი. მათ სასწრაფოდ მიიღეს ზომები გაქცეული მეფის შესაპყრობად, მაგრამ ამოოდ.

¹ დ. და ბ. ბატონიშვილების ისტორია, თ. ლომოურის გამოცემა, თბ., 1941, გვ. 105; „კრებული“, 1872 წ., გვ. 10—12, ილარიონ ქართლელის ნაამბობი • ლ. ხახანაშვილი, დასახ. ნაშრ., გვ. 60—61.

² ბ. და დ. ბატონიშვილების ისტორია, გვ. 105.

როზენმა განკარგულება მისცა სიმონოვიჩს, რათა მიეღო სასტიკი ზომები — დაეპატიმრებინა სოლომონ მეფესთან გაქცეულების ოჯახები, შეეპყროთ მეფის მეუღლე, რათა ქმართან დაკავშირების საშუალება არ ჰქონოდა და თვალი ედევნებინა სოლომონისათვის, რომ იმერეთში გადმოსვლისთანავე შეეპყროთ.

ასეთივე განკარგულება გასცა ყარაბაღიდან სასწრაფოდ დაბრუნებულმა ტორმასოვმა. იგი სიმონოვიჩს ურჩევდა, გაემაგრებინა ხანისწყლისა და ზეკარის ვიწროები, საიდანაც მოსალოდნელი იყო მეფის შემოსელა იმერეთში მაშველი ჯარით. ასევე გურიისა და სამეგრელოს მთავრებს მან სთხოვა, თავიანთი ჯარით შეერთებოდნენ სიმონოვიჩს და ერთიანი ძალით ემოქმედათ მოსალოდნელი საშიშროების წინააღმდეგ. თვითონ ტორმასოვი ყალბ ხმებს ავრცელებდა, ვითომ ახალციხის საფაშოზე თავდასასხმელად მიდიოდა, ამით მას სურდა, ფაშა დაეშინებინა, რომ სოლომონ მეფეს ჯარით არ დახმარებოდა.

რუსმა მოხელეებმა დააპატიმრეს და ფოთის ციხეში მოათავსეს იმ თავადთა ოჯახები, რომელნიც მეფესთან იმყოფებოდნენ. ფოთის ციხეში გამოამწყვდიეს აგრეთვე სოლომონ მეფის მეუღლე, დადინის ასული მარიამი, რათა მეფესთან მიწერ-მოწერა არ ჰქონოდა.

ირან-ოსმალეთთან მიმდინარე ომის პირობებში, სოლომონ მეფის გაქცევამ დიდი შეშფოთება გამოიწვია. ტორმასოვმა საყვედური მიიღო იმპერატორისაგან: რატომ მეფე დაქერისთანავე რუსეთში არ გამოგზავნეო. იმპერატორის ბრძანებით პასუხისგებაში მისცეს მთელი საგუბერნიო ხელისუფლება.

გენერალი როზენი სამხედრო ტრიბუნალს გადასცეს, მაგრამ სასამართლომ უდანაშაულოდ სცნო. თბილისის კომენდანტი მაიორი კომნენი ხუთი თვის პატიმრობის შემდეგ სამსახურიდან სამუდამოდ დაითხოვეს, თბილისის ბოქაულ ბარათაშვილს თავადის წოდება ჩამოართვეს და ჯარისკაცად განაწესეს¹, ხოლო მეფის გაქცევის ხელშემწყობნი: ავთანდილოვი, პენტელოვი (პენტელაშვილი), ფალავანდოვი (ფალავანდიშვილი) და მურასოვი დახვრიტეს². მეფის მოსამსახურეები: თაბუჯაშვილი (რომელიც მეფის საწოლში ჩაწვა)

¹ ერთი წყაროს ცნობით, ბარათაშვილმა თვით გადასცა ცხენი დაქანცულ მეფეს, რომელსაც იგი შემოხვდა ქალაქგარეთ, იხ. „ქრებული“, 1872 წ., № 10—12¹ ილარიონ ქართლელის ნაამბობი.

² ბ. ბატონიშვილის გადმოცემით, ოთხივე დაასაფლავეს ავღაბარში, მინდორზე, „რომელთაცა საფლავსა ზედა მათსა დაედგათ ნათელი ზეგარდმო, და შეჩაბუნენ წმინდათა შორის“ იხ. დ. და ბ. ბატონიშვილების ისტორია, გვ. 106.

და სალარიძე ციმბირში გადასახლეს, ასეთივე სასწელი მიიღო ყველამ, ვინც მეფესთან იყო განწესებული თვალყურის სადევნებლად.

• • •

13 მაისს სოლომონ მეფე ახალციხის საფაშოში, სოფ. ქოთელში თავის ბიძას ალექსანდრე ბატონიშვილს შეხვდა; მათ მოქმედების გეგმა შეადგინეს, ხოლო ალექსანდრე ბატონიშვილმა სასწრაფოდ აცნობა იმერეთის ხალხს სოლომონ მეფის გაქცევა: „ღმერთმა მოგვხედა და ჩვენი სახლის ბედნიერება დაიწყო. დღეს, ე. ი. 13 მაისს, მეფე სოლომონი გაექცა რუსებს თავისი თავადებით, რომლებიც მასთან იყვნენ და მობრძანდა ქოთელში. ფაშისა და ჩვენგან ყველა მხრით დაგზავნილია ცნობები და წერილები. ვიცი, რომ თქვენც ისურვებთ, დარჩეთ ბაგრატიონების სახლის ერთგულნი. ახლა დადგა ქამი, გამოიჩინოთ თქვენი გმირობა, იმოქმედოთ, რითაც სამუდამოდ დავალებულს გახდით ჩვენს სახლს“¹.

ტორმასოვმაც არ დააყოვნა და 17 მაისს იმერეთის უმაღლეს სასულიერო წოდებას მიმართა განცხადებით, სადაც აღნიშნავდა, რომ „სოლომონმა გადადგა დამღუპველი ნაბიჯი, როცა იგი თბილისიდან გაიქცა და თავი შეაფარა ურჯულო მაჰმადიანებს. მისი მიზანი ის არის, რომ თურქებთან შეერთებით, რომელთაც არაერთხელ აუოხრებიათ იმერეთი და იმერელი ხალხისათვის მიუყენებიათ ბევრი უბედურება, დაარღვიოს იმერეთის მშვიდობიანობა, ჩააგდოს უწმინდურთა მონობაში ქრისტიანთა ოჯახები და თავს დაატეხოს უბედურება“².

ტორმასოვი იმერეთის სამღვდელოების დახმარებით და მხარდაჭერით მოუწოდებდა ხალხს, ზურგი შეექციათ მეფისათვის, უკუედლოთ ფიქრი სამეფოს აღდგენაზე და მტკიცედ დამდგარიყვნენ რუსეთის სახელმწიფოს ერთგულებაზე.

სოლომონ მეფემაც პროკლამაციები დაგზავნა და იმერეთის ხალხს აჩანყებისაკენ მოუწოდა რუსეთის ხელისუფლების წინააღმდეგ.

ტორმასოვმა განმეორებით გამოუშვა პროკლამაცია, სადაც ხალხს აფრთხილებდა, ყოველგვარი კავშირი გაეწყვიტათ სოლომონ მეფესთან, წინააღმდეგ შემთხვევაში მკაცრი ზომების მიღებით — ციმბირში გადასახლებით და ყოველგვარი ქონების ჩამორთმევით

¹ კაკა ტ. IV, გვ. 340 (რუს.).

² ოქვე. გვ. 267 (რუს.).

იმუქრებოდა, ხოლო რუსეთის ერთგულთ პატივსა და ჯილდოს პირდებოდა.

სოლომონის მიერ იმერეთის ხალხისადმი გამოგზავნილი წერილები საქმის ცოდნით იყო შედგენილი. მეფე ანგარიშს უწევდა საზოგადოებრივ აზრს და თავის პოლიტიკურ საქმიანობასაც ამას უფარდებდა. მან კარგად იცოდა, რომ იმერეთის ხალხი უარყოფითად იყო განწყობილი როგორც ოსმალეთის, ისე სპარსეთის წინააღმდეგ, ამიტომ მათი დახმარებით რუსების წინააღმდეგ ბრძოლა იმერეთის ხალხში პოპულარობას ვერ მოუხვეჭდა.

იმერეთის ხალხი და „სოლომონ-მეფე კარგად ხედავდა, რომ რუსეთის მთავრობა აზიელ დამპყრობელთ — სპარსეთს ან ოსმალეთს არ გავდა. ხალხის ქლექტისა და აოხრების მუქარით კი არ მოდიოდა, არამედ პირზე ეკერა „მშვიდობა“, „სათნობა“ და „სამართლიანობა“¹.

სოლომონ მეფემ კარგად იცოდა, რომ რუსეთის რეგულარულ ჯარს ვერ გაუმკლავდებოდა, ამიტომ იგი ირანსა და ოსმალეთს სთხოვდა რუსების წინააღმდეგ დახმარებას. მისი ვარაუდით, რუსეთის მთავრობა ყველა ფრონტზე ვერ შეძლებდა ბრძოლას და იძულებული გახდებოდა, იმერეთისათვის დაეთმო და მეფე ისევ აღედგინა.

სარდალი ქაიხოსრო და სვიმონ ზურაბის ძე წერეთელი ფარულად შემოვიდნენ იმერეთში და ხალხს აჯანყებისაკენ მოუწოდეს. იენისის თვეში მთელი იმერეთი აჯანყებული იყო, აჯანყებას სათავეში ქაიხოსრო წერეთელი ჩაუდგა. დავით ბატონიშვილი აჯანყების დაწყებას ასე აღწერს: „სცნეს რა იმერთა მეფისა აღსვლაი ახალციხეს, შეიქმნა მათ შორის აღრეულობაი და ადგილ-ადგილ ამბოხი, უმეტეს ზემო მხარსა შინა, რომლისა ამბოხის თავი იქმნა ქაქუჩელა აბაშიძე, საქარელი“².

იენისის შუა რიცხვებში იმერთა მეფე მცირეოდენი (600) ლექთა რაზმის თანხლებით იმერეთში გადმოვიდა და ტყაჩირში აგიაშვილის სახლში შეჩერდა. მის ირგვლივ თავის მოყრა დაიწყეს აჯანყებულებმა.³

აჯანყებულებმა იენისის დამდგეიდან გაწყვიტეს რუსის ჯარის ყოველგვარი კავშირი თბილისთან. იმერეთის ტერიტორიაზე არსებული ყველა სამხედრო შენაერთი აჯანყებულთა გარემოცვაში აღ-

¹ ნ. ბერძენიშვილი, დასახ. ნაშრ., გვ. 385.

² მასალები საქართველოს ისტორიისათვის, შეკრებილი ბატონიშვილის დავით გიორგის ძისა და მის ძმებისა, თბ., 1905, გვ. 90.

³ უფრო დაწვრილებით იხ. მ. გონიკიშვილი, იმერეთი XVIII—XIX საუკუნეთა მიჯნაზე, თბ. 1979.

მოჩნდა. სიმონოვიჩის გარნიზონი ქუთაისში ჩაიკეტა და გარეთ ვერ გამოდიოდა. სიმონოვიჩი ტორმასოვს სწერდა, რომ იმერეთში ერთი მომხრეც კი არ ჰყავდა¹ და დამატებით ჯარს სთხოვდა. ტორმასოვმა სასწრაფოდ გაუგზავნა მას ერთი ბატალიონი.

პირველი სისხლიანი შეტაკება რუსეთის ჯარსა და აჯანყებულთა შორის მოხდა 22 ივნისს სოფელ საქარაში, სადაც 2000-იანი რაზმი ქაიხოსრო აბაშიძის მეთაურობით შეებრძოლა რუსთა ჯარს, რომელსაც მაიორი კალატოზოვი (კალატოზიშვილი) მეთაურობდა. ამ ბრძოლაში იმერლებმა სძლიეს მოწინააღმდეგეს და მათი მეთაური კალატოზოვიც სიცოცხლეს გამოასალმეს. მეორე რაზმმა ტიტოვის მეთაურობით შეძლო აჯანყებულებისათვის მთავარი პოზიციები წაერთმია, მაგრამ აჯანყება დღითი დღე ძლიერდებოდა, მისი ცენტრი ლომსიანთხევი იყო.

აჯანყების შესუსტების მიზნით სიმონოვიჩმა ჯარი ჩააყენა ელახნაურში, ყვირილის სანაპიროზე, სვირსა და ბაღდათში,² მაგრამ ამ ღონისძიებამ სასურველი შედეგი ვერ გამოიღო, აჯანყება თანდათანობით ძლიერდებოდა.

მიუხედავად იმისა, რომ იმერეთის ტერიტორიაზე რუსეთის ჯარის ნაწილები თითქმის ყველა სტრატეგიულ ადგილში იყვნენ განლაგებულნი, აჯანყების ზრდის გამო აუცილებელი ხდებოდა აღმოსავლეთი საქართველოდან დამხმარე ნაწილების გადმოყვანა, რის გარეშეც რუსეთის მმართველობას აჯანყების ჩაქრობა არ შეეძლო.

მთავარმართებელი ტორმასოვი შეშფოთებული იყო იმერეთის აჯანყებით. მან აჯანყების ჩასაქრობად და დასავლეთი საქართველოს ჯარების მთავარსარდლად «ფოთის გმირი» გენერალი დიმიტრო ორბელიანი დანიშნა, დამატებით 3200 მეომარი მისცა, თან დაავალა იმერეთში შექრა და შეამბოხეთა განადგურება. მას უნდა გამოეყენებინა დადიან-გურიელის ლაშქარი. ორბელიანს მიეცა დავალება, გაეძარცვათ სოფლები, წაერთმიათ მოსახლეობისათვის სურსათი ჯარის გამოსაკვებად, დაეპატიმრებინათ აჯანყებული თავადანაზნაურობა, აჯანყებული გლეხების ნაწილი გაეციმბირებინათ და ნაწილი ჩამოეხრჩოთ, რომ ამით მოსახლეობა დაშინებულიყო.

ტორმასოვმა ცალკე განკარგულებაც გამოსცა: რომელი გლეხიც აჯანყებას გაუდგებოდა და რუსეთის მხარეზე გადავიდოდა, მათ ბატონისაგან ათავისუფლებდა და სახაზინო გლეხად ჩარიცხავდა. მაგრამ ამ ღონისძიებამაც ვერ გაჭრა.

ტორმასოვმა უფრო ადრე, როდესაც იმერთა მეფე თბილისიდან

¹ კავა, ტ. IV, გვ. 358 (რუს.).

² იქვე, გვ. 279, 291, 294 (რუს.).

გაქცა, სიმონოვიჩს უბრძანა, მოსყიდული მკვლელის მეშვეობით სოლომონ მეფე თავიდან მოეცილებინათ. ეს განზრახვა მან სოლომონ მეფის პირად მტერს — ელიზბარ ერისთავს გაანდო და მასვე დაავალა, სიმონოვიჩთან ერთად გამოენახათ საშუალება ამ გვგმის სისრულეში მოსაყვანად, მაგრამ დრო მიდიოდა და ეს ჩანაფიქრი არ სრულდებოდა. ხალხის მოსასყიდად და ჯაშუშების დასაქირავებლად ტორმასოვი ფულს და ოქროს არ ზოგავდა, მაგრამ გაკვირვებას იყო, რომ იმერეთში ჯაშუშებს და მკვლელებს ვერ პოულობდნენ.¹

სურამს მოსულმა გენერალმა ორბელიანმა თავისი ჯარი ორად გაკყო: ერთი ბატალიონი მაიორ ტიხოცკის მეთაურობით ალის გზით გაგზავნა, თვითონ კი ვახანის გზით გაემართა იმერეთისაკენ. ამით იგი ვარაუდობდა, ორი მხრიდან დასხმოდა თავს ლომსიანთხევში გამაგრებულ აჯანყებულებს და გაენადურებინა, მაგრამ მოხდა საწინააღმდეგო: ბნელათხევში მალხაზ ანდრონიკაშვილის, სიმონ და როსტომ წერეთლების მეთაურობით აჯანყებულებმა ტიხოცკის ბატალიონს გზა გადაუღობეს და ნახევარი ამოხოცეს. ჯარის გადარჩენილი ნაწილი აჯანყებულთა რკალში მოხვდა, ვერც წინ და ვერც უკან ვერ წავიდა. ამაზე ადრე იმავე ხეობაში აჯანყებულებმა გაანადგურეს რუსთა ერთი ბატალიონი, სადაც 160 კაცი დაიღუპა.²

ალის ხეობა აჯანყებულებმა ჩაეკეტეს. ტიხოცკის ბატალიონის დარჩენილ ნაწილს ტორმასოვის მიერ გაგზავნილმა დამხმარე რაზმმაც ვერ უშველა. გენერალმა ორბელიანმა ტიხოცკის ნახევარი ბატალიონი ჯარი გაუგზავნა, მაგრამ აჯანყებულებმა ისიც დაამარცხეს და უკან გააბრუნეს.

დღმ. ორბელიანის ჯარიც შეჩერებულ იქნა აჯანყებულებისაგან. იგი იძულებული გახდა უკან დაბრუნებულიყო და ალის ხეობაში მომწყვდეულ ტიხოცკის ჯარის ნარჩენებისათვის ეშველა. ორბელიანი ტორმასოვს სწერდა: „იძულებული გავხდი გავჩერებულიყავ ალის ხეობაში, რათა შემესვენებინა ექვსდღიანი ბრძოლის შედეგად არაქათგამოცლილი ჯარისკაცები“.³

„სისხლის ღვრა და შეუწყვალბელი ბრძოლა მოხდა ალის ხეობაში. ოთხი დღე განუწყვეტელი სროლა იყო. რუსეთის ჯარი დიდად შევიწროვდა. დამარცხებაც არ ასცდებოდათ, რომსურამიდან მშველელი რაზმი არ მოსწრებოდათ. 11 ივლისს დასვენებული ორი როტა ბორჯომის გზით შემოუერთდა ტიხოცკის რაზმს. ელაზნაურიდან მოვიდა თვით ორბელიანიც. დამპალოს ველზე ათი როტა რუ-

¹ ნ. ბერძენიშვილი, დასახ. ნაშრომი, გვ. 388—389.

² მ. დუშბაძე, დასახ. ნაშრ., გვ. 194.

³ ალ. ხახანაშვილი, დასახ. ნაშრ., გვ. 69.

სის ქარი და ოთხი ზარბაზანი დაუხვდათ აჯანყებულებს. ოთხი ვერ-
სის სივრცეზე მდინარე ძირულამდის ეცნენ ერთმანეთს მოპირის-
პირენი. ხიღს იქით ერთმანეთს მოსდევდა იმერთა მიერ გამაგრე-
ბული ადგილები. ქარის გატარება აქ შეუძლებელი იყო, ამიტომ
ორბელიანი უკან დაბრუნდა სურამს იმ აზრით, რომ ვახანის ხეობით
შესულიყო იმერეთს“.¹

მალხაზ ანდრონიკაშვილი, სიმონ და როსტომ წერეთლები, რუ-
სეთის ქარის დამარცხებით გახარებულნი, მეფეს ულოცავდნენ ამ
გამარჯვებას.

სურამში მდგომი გენერალი ორბელიანი ტორმასოვს დამატებით
ქარს სთხოვდა. მთავარმართებელი ამისი წინააღმდეგი იყო, რად-
გან ყოველდღე ელოდა ირანის გამოსვლას და ასეთ მდგომარეობაში
იმერეთში რვა ბატალიონი ქარის დაბანდება ყოვლად შეუწყნარებ-
ლად მიაჩნდა. ტორმასოვი ორბელიანს უსაყვედურებდა, რომ მისა
ტაქტიკური შეცდომის შედეგი იყო დიდი მსხვერპლი, მაგრამ ბო-
ლოს ტორმასოვი მაინც იძულებული გახდა, შეესუსტებინა ირანის
ფრონტი და იქიდან ქარის ნაწილები იმერეთში გაეგზავნა.

ამ დროს სიმონოვიჩის გარნიზონი ქუთაისში იყო ჩაკეტილი. მის
დასახმარებლად გამოეშურა სამეგრელოს მთავარი ლევან დადიანი;
მან ჭიხაიშს მიაღწია და იქ დაბანაკებულ 500 კაცს შეუერთდა. ამა-
სობაში სოლომონ მეფე მას თავს დაესხა, დაამარცხა და გაფანტა,
მაგრამ ძალზე დაზარალებულმა დადიანმა თავი დააღწია იმერთა მე-
ფის რკალს და ქუთაისში ტორმასოვს შეუერთდა.

ტორმასოვმა გენერალ ორბელიანის დამარცხება მის უუნარობას
დააბრალა და მთავარსარდლის პოსტიდან გადააყენა; მის მაგივრად
16 ივლისს გენერალი ბარონი როზენი დანიშნა და დაავალა, სასწ-
რაფოდ ჩაეხშო იმერეთის აჯანყება.

ორბელიანი არ დაელოდა როზენის მისვლას სურამში და თავისი
ქარით ვახანის გზით იმერეთისაკენ გაეშურა. გზაში მას აჯანყებულ-
თა 2000-კაციანი რაზმი შეხვდა. ორბელიანმა იერიშით გაარღვია
აჯანყებულთა რკალი და ჩხერისაკენ გასწია, რათა გადაერჩინა იქ
გამაგრებული მეციხოვნეები, რომელნიც ერთი თვის განმავლობაში
იცავდნენ ციხესიმაგრეს.

ჩხერის მისადგომებთან დიდი ბრძოლა გაიმართა. ორსაათიანი
შეტაკების შემდეგ აჯანყებულებმა ვერ გაუძლეს რუსეთის რეგულა-
რულ არმიას და უკან დაიხიეს. გენერალმა ორბელიანმა ჩხერის ცი-
ხე გაათავისუფლა.

¹ კაკა, ტ. IV, გვ. 302 (რუს.).

გენერალმა როზენმა სურამიდან გენერალ ორბელიანის მიერ გაწმენდილი გზა თავისუფლად განვლო, 23 ივლისს ჩხერის მახლობლად იგი ორბელიანს შეხვდა და ჯარის სარდლობა ჩაიბარა. როზენმა არ დააყოვნა და იმერეთის მოსახლეობას მუქარანარევი კილოთი დამშვიდებისაკენ მოუწოდა, თანაც ასეთი მოწოდება გაავრცელა: „განშორდით მეფედ ყოფილსა სოლომონსა, რომელმანცა თქვენ დაგამონავათ... მოანდევით თავი თქვენი... კაცთმოყვარებასა... იმპერატორისასა; დაუტევეთ... შფოთი“¹.

ქუთაისში, სიმონოვიჩთან შესაერთებლად სასწრაფოდ მიმავალ რუსეთის ჯარს 24 ივლისს ჩხერის მახლობლად 5000-იანმა იმერეთის ლაშქარმა გზა შეუკრა, მაგრამ ზარბაზნებისა და ხიშტების გამოყენებით იმერთა ჯარი დაამარცხეს და გაფანტეს. ამ ბრძოლაში მოკლეს აჯანყებულთა სარდალი დიმიტრი აბაშიძე. როზენის ჯარმა ქუთაისისაკენ აიღო გეზი.

ქუთაისისაკენ მიმავალი როზენი დიდ წინააღმდეგობას წააწყდა: გზები ჩახერგილი და გადათხრილი იყო; ჩასაფრებული იმერლები განსაკუთრებით დიდ ზიანს აყენებდნენ არიერგარდს.

26 ივლისს როზენის ლაშქარს დიდი შეტაკება მოუხდა აჯანყებულებთან სოფ. ცხრაწყაროსთან. ამ ბრძოლაში დაიღუპა აჯანყებულთა მეთაური ქაიხოსრო აბაშიძეც.

27 ივლისს რუსეთის ჯარს მდ. ყვირილას გადალახვის შემდეგ შეტაკება მოუხდა იმერეთის 4000-იან ლაშქართან, რომელსაც ქაიხოსრო წერეთელი მეთაურობდა. როზენმა იმერლები დაამარცხა და გაფანტა.

28 ივლისს დიდი ბრძოლა მოხდა სიმონეთის ტყეში. აქაც აჯანყებულებს ქაიხოსრო წერეთელი სარდლობდა. 7000-იანი ლაშქარი გზის მარჯვნივ და მარცხნივ იყო გამაგრებული. იმერეთის ჯარი ოთხი საათის განმავლობაში აკავებდა რუსეთის ლაშქარს, რომ იგი ქუთაისში არ შეეშვა, შეამბოხებები თავგანწირულად იცავდნენ თავს, მაგრამ ბოლოს ხიშტებით შევიწროებულ იქნენ და ტყეში გაიფანტნენ... ამ ჯარის ნაწილი მალლაკში მდგომ სოლომონ მეფის ლაშქარს შეუერთდა. ბრძოლაში მონაწილეობას იღებდნენ ახალციხის ფაშოსა და ლეკთა რაზმებიც. ამ გამარჯვების შემდეგ რუსეთის არმიას გზა გახსნილი ჰქონდა ქუთაისისაკენ.

29 ივლისს როზენმა გაფანტა ქუთაისის გარშემო ჩასაფრებული აჯანყებულები და სიმონოვიჩის გარნიზონს შეუერთდა.

ამის შემდეგ იმერეთის ლაშქარი თავდაცვაზე გადავიდა, ხოლო

¹ საქ. სახ. მუზ. ისტ. დოკ. და არქივები, II, გვ. 106.

რუსეთის ჯარის სარდლობა აჯანყების სასწრაფო ლიკვიდაციას შეუდგა.

სოლომონ მეფემ კავშირი დაამყარა აფხაზეთის მთავარ ასლანბეგ შერვაშიძესთან. იგი სამეგრელოს შეესია და რბევა დაუწყო იმ მიზნით, რომ რუსეთის ერთგულ ლევან დადიანს სამეგრელოს ჯარი იმერეთის ტერიტორიიდან გამოეყვანა, მაგრამ ამის საპასუხოდ რუსეთის ფლოტი სოხუმს მიაღდა და შერვაშიძე იძულებული გახდა თავისი სამთავროსათვის მიეხედა.

აჯანყების ძირითადი ძალები დამარცხდა. ჯერი სოლომონ მეფის შეპყრობაზე მიდგა. როზენმა რუსეთის ჯარის მთელი ძალები სოლომონ მეფის შესაპყრობად ამოქმედა. 4 აგვისტოს ბრძოლა გაიმართა სოფ. რიონთან, რომელსაც თვით იმერთა მეფე ხელმძღვანელობდა. მთელი დღის განმავლობაში მიმდინარეობდა გააფთრებული შეტაკება, მებრძოლი მხარეები მხოლოდ სიბნელემ გააჩერა.

10 აგვისტოს გელათის ახლო, ნაგარებში სიმონოვიჩმა ორი მხრიდან შეუტია მეფის ლაშქარს, მაგრამ მეფე ხელიდან გაუსხლტა; რუსეთის ლაშქარი ფეხდაფეხ დაედევნა მას, მაგრამ მეფის ხელში ჩაგდება ვერ შეძლო.

სოლომონ მეფე დროის გაყვანის ტაქტიკას ადგა, რადგან იმედი ჰქონდა, რომ ირანი და ოსმალეთი ომში ჩაებმებოდნენ და ეს საშუალებას მისცემდა მეფეს, იმერეთში გამაგრებულიყო. ამიტომ მან წერილი გაუგზავნა სიმონოვიჩს და სთხოვა, იმპერატორისათვის ეცნობებინა, რომ იგი თავისი სურვილით გადადგებოდა ტახტიდან, თუ იმპერატორი მას ყველაფერს აბატიებდა და იმერეთში დატოვებდა საცხოვრებლად. დამარცხებული მეფის თხოვნას სიმონოვიჩმა ყურადღება არ მიაქცია და ბრძოლა განაგრძო.

სიმონოვიჩმა გაითვალისწინა, რომ სოლომონ მეფის კავშირი ახალციხის ფაშასთან ხანისწყლის ხეობით ხორციელდებოდა და გზის შესაკრავად 17 აგვისტოს ბაღდათში გაგზავნა ზარბაზნით შეიარაღებული რაზმი, მაგრამ აჯანყებულებმა ეს რაზმი ალყაში მოაქციეს. ამ დროს ახალციხის ფაშასაგან მეფის დასახმარებლად 2000 მეომარიც გადმოვიდა. როზენმა ალყაში მოქცეულ ჯარს დამხმარე ძალები მიაშველა.

23 აგვისტოს რუსეთის ჯარმა შეტევა დაიწყო. აჯანყებულებმა და თურქებმა უკან დაიხიეს — გამარჯვება რუსეთის ჯარს დარჩა.

ამის შემდეგ მეფე სოლომონი სამი ათასი მეომრით ზემო საქარაში გამაგრდა. რუსის ჯარი სიმონოვიჩის სარდლობით 26 აგვისტოს მას თავს დაესხა. ბრძოლა იყო მეტად შეუპოვარი და ხუთ საათს გაგრძელდა. რუსეთის ჯარის ნაწილებმა მაინც გატეხეს აჯანყებულ-

თა წინააღმდეგობა და გამარჯვებას მიაღწიეს. ამ გამარჯვების შემდეგ გზა გაიწმინდა აჯანყებულებისაგან და ქუთაისსა და თბილისს შორის კავშირი აღდგა.

აქამდე ტორმასოვმა არ იცოდა, რა ხდებოდა იმერეთში. მის კურიერებს აჯანყებულნი იჭერდნენ და მთავარმართებლის ბრძანებები დანიშნულებისამებრ ვერ აღწევდა. მხოლოდ სექტემბერში მიიღო როზენმა ოთხჯერ ამაოდ მიწერილი და გზაში იმერთა მიერ დაჭერილი ბრძანება, რომლის ძალითაც როზენს მთავარსარდლობა უნდა გადაეცა ორბელიანისათვის და თვითონ თბილისში დაბრუნებულიყო, ხოლო სექტემბრის თვის ბრძანებით, იგი იმერეთში უნდა დარჩენილიყო მმართველად, მაგრამ ამ დროს როზენი თბილისს უახლოვდებოდა, ხოლო იმერეთის დასამშვიდებლად მან სიმონოვიჩი დატოვა, რადგან ორბელიანმა, ვითომცდა ავადმყოფობის გამო, უარი თქვა იმერეთში რუსის ჯარის უფროსობაზე¹.

ტორმასოვის აზრით, იმერეთის დასამშვიდებლად საჭირო იყო არა რაზმების დამარცხება, არამედ მეფის დამორჩილება. ამ მიზნის მისაღწევად იგი სიმონოვიჩს ურჩევდა, ეხმარა არა მარტო მახგილი, არამედ ოქროც და ყოველგვარი ხრიკიც. ასეთი სახის მითითება სოლომონ მეფეს ბევრჯერ ჩაუუარდა ხელში, ამიტომ იგი ექვის თვალით უცქერდა ყველას, ერთ ადგილას არ ჩერდებოდა, ისე სწრაფად იცვლიდა ბინას, რომ სიმონოვიჩის ცდა, სადმე მიესწრო მეფისათვის, ამაოდ რჩებოდა. თვით ტორმასოვი „ცოფმორეული იყო, რომ ნანატრი არ უსრულდებოდა. ტორმასოვს უკვირდა და ვერ გაეგო, თუ როგორ არ იპოვებოდა მთელს იმერეთში მეფის უკმაყოფილო ან მისგან ნაწყენ-შეურაცხყოფილი, ან დიდ ფულსა და ჯილდოს დახარბებული, თავზეხელაღებული ვინმე, რომელიც ამ საქმეს შეასრულებდა“².

სოლომონ მეფე ხანისწყლის ხეობაში გაიქცა და იქ გამაგრდა. იქვე მოუვიდა ახალციხიდან 1500-კაციანი მამველი რაზმი. ხანისწყლის ხეობა ძნელად მისადგომი იყო, მაგრამ სიმონოვიჩმა მაინც გადაწყვიტა მისი აღება. თავისი ჯარით სამი მხრიდან შეუტია და წარმატებასაც მიაღწია — 25 სექტემბერს სოლომონ მეფე დამარცხდა და ისევ ახალციხეს შეაფარა თავი. მას თან გაჰყვა თავდაზნაურთა დიდი ჯგუფი.

ქალაქი ახალციხე ჩირალდნებით გაანათეს, როცა სოლომონ მეფის მისვლა შეიტყვეს. ხაზინიდან ფაშამ დიდი ფული მიიღო, რომ მეფეს ღირსეულად დახვედროდა.

¹ ალ. ბახანაშვილი, დასახ. ნაშრ., გვ. 73.

² ნ. ბერძენიშვილი, დასახ. ნაშრ., გვ. 393.

ამგვარად, რუსეთმა სოლომონის წინააღმდეგ ომი წარმატებით დაამთავრა, მაგრამ უკმაყოფილო იყო იმით, რომ მეფე მაინც გაექცათ. ვსექტემბერს ტორმასოვმა სიმონოვიჩს 2000 ჩერვონეცი გაუგზავნა იმ პირობა გასამრჯელოდ, ვინც სოლომონს მოკლავდა ან დაატყვევებდა.

სოლომონ მეფემ ახალციხიდან ხონთქართან აღძრა შუამდგომლობა, რათა იგი სამხედრო ძალით დახმარებოდა რუსების წინააღმდეგ, მაგრამ ამ დროს თვით ტორმასოვი გადავიდა შეტევაზე, და ახალციხის დაპყრობა განიზრახა. ხონთქარი ღუმილით შეხვდა რუსეთის აგრესიას ახალციხის საფაშოს მიმართ, მაგრამ ცოტა ხნის შემდეგ რუსეთის არმია იძულებული გახდა, დაპყრობით ომზე ხელი აეღო, რადგან ამ დროს ახალციხეში შავი ჭირი გაჩნდა და რუსეთის არმიასაც მოედო. ამ დროს სულთანს დუნაის ფრონტზე დამარცხებას განიცდიდა, ამიტომ სოლომონისათვის არ ეცალა, მისთვის დახმარების გაწევა არ შეეძლო, ამასობაში, 1812 წელს რუსეთ-ოსმალეთს შორის ბუქარესტში ზავიც დაიდო, რითაც დასრულდა 1806 წელს დაწყებული რუსეთ-ოსმალეთის ომი.

ბუქარესტის ხელშეკრულების მიხედვით, რუსეთს აზიაში იარაღით დაკავებული ადგილები (ფოთი, სოხუმი, ახალქალაქი) ოსმალეთისათვის უნდა დაებრუნებინა, ხოლო იმერეთი, სამეგრელო, გურია და აფხაზეთი, რომელნიც თავისი ნებით შეუერთდნენ რუსეთს, მას რჩებოდა.

რაკი ოსმალეთთან ვერაფერს გახდა, სოლომონ მეფე ერევანში წავიდა და იქიდან ირანის შაჰს სთხოვა დახმარება, მაგრამ ამოოდ, ხელმოკარული მეფე ისევ ახალციხეში დაბრუნდა. იმერთა მეფე ვ შაჰისაგან სამხედრო დახმარება ვერ მიიღო, მაგრამ შაჰის განკარგულებით მას განსაზღვრული მატერიალური სახსარი გამოუყვეს და ურჩიეს, ისევ ახალციხეში დაბრუნებულიყო და იქიდან დაკავშირებოდა სულთანს მისგან სამხედრო დახმარების მისაღებად.

ოსმალეთისა და ირანის მიერ მიტოვებულმა იმერთა მეფემ ახლა საფრანგეთის იმპერატორს ნაპოლეონ პირველს მიმართა დახმარებისათვის. როგორც მისი წერილიდან ჩანს, იმერთა მეფეს ადრეც მიუმართავს ნაპოლეონისათვის, მაგრამ პასუხი არ მიუღია; ახლა იგი იმპერატორს აცნობებდა, რომ მას ტახტი წაართვეს და დახმარებას სთხოვდა, ამასთან, თუკი ეს მოხერხდებოდა, იმერთა მეფე საფრანგეთის იმპერატორს სთხოვდა, თავის მფარველობაში მიეღო იგი და მისი სამეფო.

ნაპოლეონისადმი გაგზავნილი წერილი დათარიღებულია 1810 წლის 20 ოქტომბრით.

ამ წერილის პასუხი იმერთა მეფეს არ მოუღია, მაგრამ მან განმეორებით მაინც სცადა, კვლავ მიემართა ნაპოლეონისათვის. ახალციხიდან კონსტანტინოპოლში გაიგზავნა დიპლომატიური მისია სარდალ ქაიხოსრო წერეთლის მეთაურობით. ამის შესახებ საფრანგეთის საქმეთა რწმუნებული კონსტანტინოპოლში ლატურ მობური ატყობინებდა თავის მთავრობას პარიზში, რომ სულთანი სოლომონ მეფეს დაჰპირდა დახმარებას 20—25-ათასიანი არმიით ტახტის დასაბრუნებლად. როგორც ჩანს, ქაიხოსრო წერეთელს უნდა ჩაეტანა კონსტანტინოპოლში სოლომონის მიერ გაგზავნილი წერილი ნაპოლეონისადმი, რათა იგი საფრანგეთის წარმომადგენლისათვის გადაეცა პარიზში გასაგზავნად.

წერილი ქართულად იყო დაწერილი. იგი ქართველ ხუცესს უთარგმნია კონსტანტინოპოლში თურქულად, ხოლო თურქულიდან ფრანგულად უთარგმნია საფრანგეთის საელჩოს მრჩეველს რიუფენს.

წერილი 1811 წლის 6 იანვრით არის დათარიღებული.

იმერთა მეფე ჩივის, რომ რუსეთის იმპერატორმა უსამართლოდ და უკანონოდ ჩამოართვა მას სამეფო. სოლომონი თხოვს ნაპოლეონს, „ვითარცა უნივერსალურ არბიტრს“ გამოსარჩლებას და მფარველობას.

არც ამ წერილს მოჰყოლია რაიმე შედეგი. ყოველი მხრიდან ხელმოკარული მეფე ახალციხიდან არზრუმს წავიდა, სადაც მას სულთანმა მუდმივი ბინა მისცა საცხოვრებლად, მაგრამ ტორმანოვის მიერ მოსყიდულმა არზრუმის ფაშამ მეფის შევიწროება დაიწყო. სოლომონ მეფემ დატოვა იქაურობა და ტრაპიზონში წავიდა. იქაურმა ფაშამ ოსმან-ოღლიმ, რომელიც წარმოშობით ქართველი იყო, დიდი პატივით მიიღო.

სოლომონ მეფემ სულთანს აცნობა არზრუმის დატოვებისა და ტრაპიზონში გადასახლების მიზეზი. განრისხებული სულთანის ბრძანებით არზრუმის ფაშას თავი მოჰკვეთეს¹.

ამრიგად, რეალურ დახმარებას მოკლებული, მაგრამ ფაშისა და ხონთქრის მოიმედე, ჯერ ახალგაზრდა (36 წლისა), მაგრამ განუწყვეტელი ბრძოლებითა და შფოთით დაქანცულ-დაავადებული იმერთა მეფე მცირე ამალით ტრაპიზონს შეეხიზნა. ახლა უკვე დრო და საშუალება მიეცა მეფეს, რათა მიმოეხილა განვლილი მეფობის პერიოდი, გარკვეულიყო ძველსა და ახალ ვითარებაში, შეეფასებინა უცხო და შინაური ადამიანები, რომლებიც მის გარშემო ტრიალებ-

¹ ალ. ხახანაშვილი, დასახ. ნაშრ., გვ. 77.

დნენ, განესაჯა მათი საქციელი, აეწონ-დაეწონა ამიერკავკასიაში, კერძოდ, დასავლეთ და აღმოსავლეთ საქართველოში შექმნილა მდგომარეობა და, სანამ გვიან არ იყო, მომავლის სამოქმედო ახალ სწორი გეგმა შეემუშავებინა.

მაგრამ მეფე დარწმუნდა, რომ რუსეთთან ბრძოლა წაგებულა იყო

* * *

რუსეთის მთავრობამ სოლომონ მეფის მეუღლე მარიამ დედოფალი, რომელიც ფოთის ციხეში ჰყავდათ გამოკეტილი, 1810 წელს ჯერ ვორონეჟში გადაასახლა, შემდეგ, 1817 წელს, იქიდან პეტერბურგში გადაიყვანა და იგი იქვე გარდაიცვალა 1841 წელს.

ტორმასოვი აპირებდა იმ თავადაზნაურთა გაციმბირებას, რომლებიც აჭანყებაში მონაწილეობდნენ, ხოლო არასაიმედო პირთა გასახლებას იმერეთიდან, მაგრამ სიმონოვიჩის რჩევით, რომელსაც მიაჩნდა, რომ საჭირო არ იყო სიმკაცრე, პირიქით — პატიების პოლიტიკა უნდა გატარებულყო, იგი დაეთანხმა სიმონოვიჩს, ყველას აპატია დანაშაული და ისინიც კი გაათავისუფლა პასუხისმგებლობისაგან, ვინც მეფეს გაჰყვა ოსმალეთში, თუკი ოთხი თვის განმავლობაში დაბრუნდებოდნენ იმერეთში, ხოლო ვინც არ დაბრუნდებოდა, მათი მამული სახელმწიფოს გადაეცემოდა და თვითონ სახელმწიფო მოღალატედ იქნებოდა გამოცხადებული¹.

* * *

სოლომონ მეფის მხარეზე იბრძოდნენ ტარიელ და მანუჩარ დადიანები. ტარიელი აჭანყების დაწყებისთანავე გამოცხადდა თავისი რაზმით მეფესთან და ბრძოლის დასასრულამდე მასთან იყო, ლეჩხუმის თავი ბერი გელოვანიც მეფის მხარეზე მოქმედებდა.

აჭანყების მთავარი მეთაურები, რომელნიც ახალციხიდან გამოვიდნენ და რომლებმაც პირველად გააგრძელეს მეფის მოწოდება აჭანყების შესახებ, სვიმონ ზურაბის ძე და ქაიხოსრო წერეთლები იყვნენ. აჭანყებას თავკაცობდნენ: ქაიხოსრო აბაშიძე² და მისი შვილები: ხახული, ივანე და სვიმონი, დავით აბაშიძე-ლაბუაშვილი, პაატა და ხოსია ყივინაძეები, ქაქუჩა თავზარაშვილი, დიაკონი გრიგოლ ჩხეიძე, ბერიკა და ანდრია ქლენტები, თეიმურაზ და ივანე დევდარიანები, აბესა ნიყარაძე, მალხაზ ანდრონიკაშვილი და ბევრი სხვა.

¹ ალ. ხახანაშვილი, დასახ. ნაშრ., გვ. 74.

² 25 ივლისის ბრძოლაში მოკლეს.

ამათგან ბევრმა ბრძოლის ველზე დალია სული, ხოლო ნაწილი აჯანყების ჩაქრობის შემდეგ თავიანთ კერას დაუბრუნდა.

განდევნილი იმერთა მეფე სოლომონ II კიდევ იმედოვნებდა, რომ იმერეთში დაბრუნდებოდა.

ქართული წყარო სევდიანად აღწერს მეფის უკანასკნელ დღეებს: „თუმცა სულთანი აღუთქვამდა ტახტის დაბრუნებას... მაგრამ იმერეთიდან მოსულმა ცნობამ გული აუცრუა ტანჯულ მეფეს. ეძია მოსვენება საქართველოში. თავადაზნაურობა უთვლიდა მას ტრაპიზონს, რომ ნულარ იფიქრებს იგი სამეფოში დაბრუნებას ოსმალეთის ჯარით. და მეფემაც დალია სული უტხოეთში, დანატრებულია სამშობლოს ცასა და თანამემამულეთა ნახვას“.¹

იმერთა მეფემ 1815 წლის 7 თებერვალს იმერეთიდან შორს, ოსმალეთის ქალაქ ტრაპიზონს განუტევა სული 42 წლისამ. დაასაფლავეს იქაურ ბერძენთა წმ. გრიგორის ეკლესიის ეზოში. მის ძეგლს ერთ მხარეზე ქართულად აწერია: „საფლავსა ამას შინა მღებარე არს იმერთა მეფე სოლომონ, წელი ჩყიე (1815).

„ჰსაჯენ, უფალო, მავნებელნი ჩემნი და ჰბრძოდე მბრძოლთა მათ ჩემთა“.

„მომიხსენეთ, მე, ძმანო საფლავსა ამას მღებარე მეფე სოლომონ“.

მეორე გვერდზე ასევე ქართულად აწერია: „განმეძარცვა მე პირველქმნილი სიკეთე და მშვენება და მღებარე ვარ შიშველ და კდემული საფლავსა ამას შინა, ტომისაგან დავეითისა, შთამოსრული ბაგრატიონი ძე არჩილისა, ღრულიად იმერთა მეფე სოლომონ, რომლისთვისაც ვითხოვ შენდობასა“.²

სოლომონ მეფის სიკვდილის შემდეგ მისი 60-კაციანი ამაღის წევრთა უმრავლესობა იქვე ღარჩა, ნაწილი დაბრუნდა საქართველოში — „ისინი შეიწყნარეს რუსთა და მისცეს თავისთვის სახლისა შინა მშვიდობით ცხოვრება“.³

რუსული წყაროები სოლომონ მეორეს ახასიათებს, როგორც სუსტი ხასიათისა და ორგულ ადამიანს, თავის მრჩეველთა ხელში სათაშაშო „მბრძანებელს“.

იმავე დროს, უნდა აღინიშნოს, რომ განუწყვეტელ ფარულ თუ აშკარა ბრძოლაში მეფე დროდადრო ჭიუტობისა და პარტი-

¹ აღ. ხა ხ ა ნ ა შ ვ ი ლ ი, დასახ. ნაშრ., გვ. 77.

² ნ. დალიანი, ქართველთ ცხოვრება, თბ., 1962, გვ. 205.

³ 1935 წელს თურქებმა სოლომონ მეფის ძეგლი დაანგრეს, ხოლო ეკლესია საწყობად გადააკეთეს.

კულარიზმის გამოვლენით (ლეჩხუმის საკითხი, საერთოდ სამეგრელოს სამთავროსთან დამოკიდებულება და სხვ.) საკუთარი პოზიციების გამაგრების ნაცვლად თავის მდგომარეობას ართულებდა, რუსეთის მოხელეების (კერძოდ, ციციანოვის) მხრივ უნდობლობასა და უკმაყოფილებას აძლიერებდა და ყოველივე ამით, ნაცვლად ხელის შეშლისა, აჩქარებდა სამეფოს ლიკვიდაციის პროცესს და მტრის „წისქვილზე წყალს ასხამდა“.

ზოგიერთი რუსი მოხელის უგუნური პოლიტიკა იმერეთის მეფის მიმართ, რამაც ესოდენ გაართულა იმდროინდელი ვითარება და სავლეთ საქართველოში და სახელი გაუტეხა მას არა მარტო მაშინდელი საქართველოს მოსახლეობაში, არამედ მომდევნო თაობებშია და ისტორიაშიც, ნაწილობრივ სოლომონ მეფის უინიანობითა და წინდაუხედაობითაც იყო გაპირობებული. თუ ანალოგიური პროცესი ადგილობრივი ხელისუფლების გაუქმებისა და საიმპერიო მმართველობის შემოღებისა სამეგრელოში კიდევ თითქმის ხუთი ათეული წელი გაგრძელდა (სამეგრელოს სამთავრო გაუქმდა 1857 წ.), უნდა ვივარაუდოთ, რომ მეტ-ნაკლებად ხანგრძლივი იქნებოდა ეს პროცესი იმერეთშიც, თუ არა სოლომონ მეორისა და მასთან მოვლინებულ რუს მოხელეთა ურთიერთგაუგებრობა და წინდაუხედაობა.

იმდროინდელმა კავკასიაში შექმნილმა პოლიტიკურმა ვითარებამ იმერეთს მეფე ორ ცეცხლ შორის მოაქცია, რამაც იძულებული გახადა ხან ერთ მხარეს გადახრილიყო და ხან მეორეს.

ის დიდი სიყვარული და ნდობა, რომელიც მას ხალხში ჰქონდა მოპოვებული, ამტკიცებდა, რომ იმერეთის მოსახლეობის ფართო ფენებს სოლომონ მეფე თავისი ინტერესების დამცველად მიაჩნდა, სწამდა, რომ თავის ბრძოლაში იგი ხელმძღვანელობდა ქვეყნის კეთილდღეობის ინტერესებით და მთელი თავისი ძალდონით მოუდრეკლად ემსახურებოდა მას.

ტახტზე ასვლისთანავე სოლომონ მეორე დაადგა თავისი სახელოვანი ბიძის — სოლომონ დიდის გზას და მიზნად დაისახა დასავლეთი საქართველოს გაერთიანება ერთი სკიპტრის ქვეშ, მაგრამ ამისათვის მას ძალები არ ეყო, რადგან არც საშინაო, არც საგარეო პირობები ხელს არ უწყობდა ამ დიდ განზრახვას.

გავიდა ზუსტად 100 წელი სოლომონ მეორის უდროო გარდაცვალებიდან — 1915 წელს, პირველი მსოფლიო ომის მსვლელობაში, კავკასიის ფრონტზე გამარჯვებული რუსთა ძლევამოსილი მხედრობა ზეიმიტ შევიდა ქალაქ ტრაპიზონში — თაპარ-მეფის ვასალური იმპერიის დედაქალაქში. რუსეთის ჯარში მყოფმა ქართველებამ — ოფიცრობამ და ჯარისკაცებმა სწრაფად მიაშურეს სოლომონ მეორე

რის საფლავს ბერძენთა ეკლესიის ეზოში, გვირგვინებით შეამკეს იმერეთის უკანასკნელი უიღბლო მეფის საფლავი, თვალნათლივ ახილეს და ამოიკითხეს ამ საფლავის ცნობილი წარწერა — „განმე-
ძარცვა მე პირქმნილი მშვენება...“

• • •

იმერეთის სამეფოს მოსპობაში რუსეთის მოხელეებს მნიშვნე-
ლოვანი დახმარება გაუწია იმერეთის სამეფოს პირველმა ვეზირ-
მა — სახლთუხუცესმა ზურაბ წერეთელმა. იგი დიდ როლს ასრუ-
ლებდა სამეფო კარზე; ბოლოს ისე განდიდდა, რომ აბაშიძეთა
მსგავსად, მეფეს მეტოქეობა დაუწყო და მოინდომა თვითონ დამჯ-
დარიყო იმერეთის ტახტზე.

ზურაბ წერეთელი შორსმჭვრეტელი ადამიანი იყო და კარგად
ხედავდა, რომ ძლიერი რუსეთი მალე მიაღწევდა გამარჯვებას კავკა-
სიაში, ამიტომ იმერეთში რუსების შემოსვლისთანავე ზურაბი მათ
სამსახურში ჩადგა.

წერეთლისათვის დამახასიათებელი იყო პოლიტიკური მერყეო-
ბა. სიმონოვიჩმა ასე დაახასიათა იგი: „არა მგონია, რომ იგი სავსე-
ბით ერთგული იყოს ჩვენი... მას საკუთარი სარგებლობა აიძულებს
ჩვენთვისაც იყოს რამდენადმე სასარგებლო“. ამიტომ რუსეთის მო-
ხელეები მასთან ფრთხილად იჭერდნენ თავს. მაგრამ როდესაც რუ-
სეთი-აქტიურ პოლიტიკაზე გადავიდა და გადაწყვიტა სოლომონ
მეფის გადაგდება იარაღის ძალით, ზურაბი რუსების მხარეზე დად-
გა და მონაწილეობდა რუსეთის ერთგულებაზე ხალხის ძალით დაფი-
ცებაში, შემდეგ, იმერეთის აჯანყების დროს, იგი იარაღით ხელში
ებრძოდა მეფეს.

1811 წელს რუსეთის იმპერატორმა ზურაბ წერეთელს დამსახუ-
რების სიგელი უბოძა, სადაც ჩამოთვლილი იყო ისეთი ფაქტე-
ბი, რომლებიც აშკარად მეტყველებდნენ, რომ იგი მეფეს. დალა-
ტობდა. 1784 წლის ელჩობა რუსეთში, მეფეზე ზემოქმედების მოხ-
დენა 1804 წლის ელაზნაურის ხელშეკრულებაზე ხელის მოწერის
დროს¹. ჯაშუშური ცნობების მიწოდება გენერალ რიკოფისათვის
სოლომონ მეფის შესახებ, მამია გურიელის გადმობირება რუსების
მხარეზე ფოთის კამპანიის დროს, იმერეთის მოსახლეობის დაფიცე-
ბა რუსეთის ერთგულებაზე მეფის გადადგომის შემდეგ, საწერეთლოს

¹ ზურაბ წერეთელმა მხარი დაუჭირა იმერეთის შეერთებას რუსეთთან. მიიღო
ზეგავლენით მეფე დათანხმდა ციციანოვის მიერ შედგენილ შეზღუდვისათვის ელაზ-
ნაურში ხელი მოეწერა. ამისათვის ციციანოვმა ზ. წერეთელს ბრილიანტებით
შემკული სათუთუნე უბოძა თავისი სახელის წაწყობით.

მოსახლეობის ჩაურევლობა რუსეთის წინააღმდეგ აჯანყებაში, საკუთარი ჯარის გადაყვანა რუსეთის მხარეზე სოლომონის წინააღმდეგ ბრძოლაში, მონაწილეობა ახალციხის ლაშქრობაში¹ და სხვა. ასეთი დამსახურებისათვის ზ. წერეთელმა ჯერ პოლკოვნიკობა მიიღო — 1808 წ., ხოლო 1811 წელს კი — გენერალ-მაიორის ჩინი. ზ. წერეთელი იმდენად შორს წავიდა სამშობლოსა და მეფის ღალატში, რომ უკან დასახვევი გზა აღარ ჰქონდა — ოდესღაც იმერეთის დამოუკიდებლობისათვის მებრძოლი, რუსებს ამოუდგა მხარში და მეფის წინააღმდეგ იარაღით ხელში გამოვიდა.

წერეთლიანთ სახლი სამშობლოს დამოუკიდებლობისათვის ბრძოლის დროს ორად გაიყო: უმრავლესობა მეფის მხარეზე იბრძოდა, ხოლო მამა-შვილი — ზურაბი და გრიგოლი რუსებს მიემხრნენ.

წერეთლიანთ სახლის წევრები: ქაიხოსრო, როსტომი, ბერი, სვიმონ გიორგის ძე და სვიმონ ზურაბის ძე ზოგიერთ სხვა თავადებთან ერთად თან გაჰყვნენ ლტოლვილ მეფეს და სიკვდილამდე მასთან იყვნენ ოსმალეთში.

მამის გამცემლური მოქმედებით აღშფოთებული სვიმონ წერეთელი თავის მამას ახალციხიდან სწერდა: „...აბა რაღად მინდა სიცოცხლე, ყოველი კაცი ქართველი თუ კახელი, თათარი თუ სომეხი, ბერი თუ ერი, ყმაწვილი თუ მოხუცებული, ვინც ვნახე ყველა ასე მეუბნება, რომ რა ქნა ეს მამაშენმაო, მეფე რომ გასცაო და ეს ხმა რა საძაგელია ხომ იცით და მომიხსენებია ნეტამც ოცის წლითაც აღრე ამოვწყვეტილიყავით სუყველა ქალებიან-კაცებიანად და ეს ხმა ჩვენში არ შემოსულიყო, სჯობდა ჭეშმარიტად. რას შერები, რას უყურებ, შენც აქ ჩამოდი და ამასთან (მეფესთან) დაიკარგე, თორემ ამ ხმას ჩვენ ველარ მოვიხდით“.² სხვა წერილში შვილი მამას მოახსენებდა: „...გურიისა და ვაკის მცხოვრებთა მიბაძვა თქვენ არ გამოგადგებათ; როგორც მამა-პაპა იქცეოდა, თქვენთვისაც ისე სჯობსო“.³

როცა სოლომონ მეორის მეუღლეს მარიამ დადიანის ასულს რუსეთში გადასახლება დაუპირეს, სვიმონ წერეთელი თავის ძმას გრიგოლს სწერდა ოსმალეთიდან: „გავიგე, რომ მარიამ დედოფლის მიცემა გადაგიწყვეტია რუსეთის სარდლობისათვის... დედოფალს ნურავის დაანებებო“.⁴

¹ საქ. სახ. მუზ. ისტ. დოკ. და არქივ. II, გვ. 129—134.

² იქვე, II, გვ. 90.

³ იქვე.

⁴ იქვე, გვ. 101.

ზურაბის გამცემლობით აღშფოთებული სოლომონ ლეონიძე 1806 წლის 30 ოქტომბერს დამამცირებელ წერილს სწერს ყოფილ სახლთუხუცესს: „სოფლისათვის ცრუსა და მართლისა უკვდავებისათვის გეტყვიტ წრფელსულობით და უკეთუ არა ირწმუნო, მე რა გყო? შენ კაცი ხარ და არა ღმერთი. გინდა რომ ცა და ქვეყანა შენს ფიქრზე ბრუნვიდეს... თუ კაი მონარღე ბრძანდები, იაგანში ღუშაში ითამაშე, რა გაჯავრებს? მართალია, დიდი კაცი ხარ, 1000 კვამლი გეყოლებდა, მაგრამ ქვეყნის კარტა რომ არის, თუ კაცი ხარ იმაში ან შენს საჩხერეს იპოვნი და ან შენს სასახლეს მიაგნებ? თუ საღ ზიხარ ან საღა გძინავს? თურმე არაფერი ყოფილხარ და რას დიდგულობ?“¹

იმ პირთა შორის, რომელთაც ერეკლე მეორის კარზე თავიანთა ნიჭითა და დამსახურებით წინ წაიწიეს, აღსანიშნავია სოლომონ ლეონიძე, რომელმაც დიდი, უანგარო პატრიოტის, გამოჩენილი დიპლომატისა და სახელმწიფო მოღვაწის უკვდავი სახელი მოიპოვა.

მისი ნამდვილი გვარი ცნობილი არ არის, იგი სამღვდელო წოდებიდან გამოვიდა და ჭერ კიდეც ბავშვი იყო, როცა მეფის კარის მოსამსახურე გახდა. ცოდნისმოყვარე და მახვილი გონების პატრონმა ლეონიძემ კარგად გამოიყენა ის კულტურული გარემო, რომელშიც მისი თანამოასაკე უფლისწულები ტრიალებდნენ.²

გადმოცემით სოლომონ ლეონიძის პირველი მასწავლებელი იყო იმდროისათვის კარგად ცნობილი მღვდელმთავარი დოსითეოზ ნეკრესელი, რომელმაც თქვა: „არა არს ესრეთ ტკბილი, ვით მამულის სიყვარული“. ამ პატრიოტული გრძნობით შთაგონებული მოქმედებდა ლეონიძე მთელი მისი პოლიტიკური მოღვაწეობის მანძილზე. გადმოცემით მჭევრმეტყველებაში ლეონიძეს მზეჭაბუკ ორბელიანი წერტონიდა.

ბუნებრივი ნიჭით დაჭილღობულმა ლეონიძემ შეისწავლა აღმოსავლური ენები, საუკეთესოდ ფლობდა რუსულ ენას და კარგად იცნობდა საბერძნეთ-რომის ისტორიასა და ლიტერატურას, ბერძენ ფილოსოფოსთა ნაშრომებს.

სოლომონი 23 წლისა იყო, როცა მეფის კარის მდივნობა მიიღო, შემდეგ როცა ერეკლე მეფემ რუსეთის წაბაძულობით ვიცე-კანცლერის თანამდებობა შექმნა, იგი სოლომონს ჩააბარა.

ქართლ-კახეთის სამეფო კარზე სოლომონი დაწინაურდა არა მარტო თავისი დიდი ნიჭის წყალობით, არამედ როგორც სამშობ-

¹ ნ. შენგელია, სახლთუხუცესის თანამდებობა იმერეთის სამეფოში, ქუთაისის პედინსტიტუტის შრომები, ტ. I, 1940, გვ. 148.

² გ. ქიქოძე, ერეკლე მეორე, თბ., 1942, გვ. 181.

ლოსათვის თავდადებული ლომგული მეომარი. 1779 წელს მან თავი ისახელა ერევნის ომში, რისთვისაც თავადობა და ამოწყვეტილი კახელი თავადის ლეონიძის მამული მიიღო (აქედან წარმოდგება მისი გვარი „ლეონიძე“). სოლომონმა ცოლად შეირთო ქსნის ერისთავის ქალი და ამით უმაღლეს არისტოკრატობას დაუმოყვრდა.

თავის საბრძოლო დამსახურებისათვის სოლომონ ლეონიძემ ერეკლე მეფისაგან მიიღო პატივის სიგელი და „ღერბი ვაჟაკობისა — ღერკულეს, აღჭურვილი ლახტითა და შემოხვეული ლომის ტყავითა და სათავადოთა გვირგვინითა“.¹

თავისი სიცოცხლის უკანასკნელ წუთამდე ერეკლე-მეორე დიდი ნდობით ეპყრობოდა სოლომონ ლეონიძეს და მისი მოღვაწეობა მართვა-გამგეობის მრავალ დარგში ნაყოფიერად მიაჩნდა.

ლეონიძე თავდადებით იბრძოდა საქართველოს გაერთიანებისათვის. საქართველოს სიძაბუნეს იგი მის დაშლილობაში ხედავდა. მისი აზრით, საქართველოს გამოხსნა აგრესორებისაგან შინაგანი ძალების გაერთიანებით შეიძლებოდა, ამიტომ იყო, რომ იგი თავგამოდებით ცდილობდა მეფე-მთავართა შეთანხმებას; ამ შეთანხმებით შეიძლებოდა, მისი აზრით, ერთიანი ცენტრალიზებული სახელმწიფოს შექმნა. მისმა ენერგიულმა საქმიანობამ შეამზადა 1790 წ. ივერიელ მეფე-მთავართა შორის დადებული ტრაქტატი, რომელიც წარმოადგენდა მნიშვნელოვან ნაბიჯს დაშლილი ქვეყნის გაერთიანებისაკენ.²

ლეონიძე, მართალია, დამოუკიდებელი საქართველოსათვის თავდადებული მებრძოლი იყო, მაგრამ მას სწამდა, რომ ჩვენს ქვეყანას ძლიერი ქრისტიანული სახელმწიფოს — რუსეთის მფარველობა და დახმარება ესაჭიროებოდა. იგი ერეკლესთან ერთად 1783 წლის ტრაქტატის მომხრე იყო. მისივე ინიციატივით, 1790 წელს ტრაქტატის მონაწილენი საერთო მფარველობას სთხოვდნენ რუსეთის იმპერატორს³ და ლეონიძეც ბოლომდე იცავდა რუსეთ-საქართველოს 1783 წლის ტრაქტატის საფუძველზე აღიარებულ ურთიერთობას.⁴

რუსეთის მიერ ქართლ-კახეთში მეფობის გაუქმებას ლეონიძე მტრულად შეხვდა. იგი მოითხოვდა დავით გიორგის ძისათვის ტახტის გადაცემას. გენერალმა ლაზარევმა, რომელიც რუსეთის ჯარს

¹ საქართველოს სიძველენი, 11, გვ. 553.

² შ. დუშბაძე, დასახ. ნაშრ., გვ. 200.

³ „პირველად საქართველოს ტრაქტატით რუსეთთან შეერთებაში მე ვიყავ მოქმედი“ სწერდა ლეონიძე საქართველოს მთავარმართებელ კნორინგს 1801 წელს (აქტები, 1, გვ. 323).

⁴ შ. დუშბაძე, დასახ. ნაშრ., გვ. 200.

სარდლობდა ქართლ-კახეთში, ლეონიძეში მეტად სახიფათო ძალა დაინახა და იგი დააპატიმრა. დავით გიორგის ძის დახმარებით ლეონიძე ციხიდან გამოვიდა, მაგრამ, რადგან ქართლ-კახეთში მისი ყოფნა აღარ შეიძლებოდა, სოლომონ დიდმა, რომელიც უნდობლად უყურებდა რუსეთის გაბატონებას აღმოსავლეთ საქართველოში, თავისთან მიიწვია და შეიფარა ლეონიძე. მეფემ მას უბოძა იმერეთში კაცხი, ხოლო რაჭაში — წესის სასახლე, ბარაკონის ეკლესია, მინდას ციხე, ხიდიკარი და თავის „საუკუნოდ ყმად“ დაამკვიდრა.

ლეონიძე იმერეთის სამეფო კარზე ასრულებდა პოლიტიკური მრჩევლის როლს, ენებისა და მოვლენების დიდი ცოდნით, მჭევრმეტყველებითა და მაღალი ნიჭით იგი ბრწყინვალედ ართმევდა თავს ამ დროისათვის იმერეთის კარზე დატრიალებულ ურთულეს მოვლენებს. ლეონიძე იმერთა მეფის მარჯვენა ხელი გახდა, მის დაუკითხავად სოლომონი არც ერთ მნიშვნელოვან საკითხს არ წყვეტდა. ეს იყო ზურაბ წერეთლის მეფისაგან განდგომის ერთ-ერთი მიზეზიც, რადგან ლეონიძემ იგი სულ დაჩრდილა.

ის საგარეო-პოლიტიკური კურსი, რომელსაც იმერთა მეფე თავიდან ბოლომდე თანმიმდევრობით ახორციელებდა რუსეთთან ურთიერთობაში, ძირითადად ლეონიძის მიერ იყო შემუშავებული, ამიტომ იყო, რომ რუსეთის მოხელეები ყოველნაირად ცდილობდნენ (დაბეზღებით, ცილისწამებით, მოჭრთამვით) მეფესთან ურთიერთობაში როგორმე ჩამოეცილებინათ მეფისაგან ლეონიძე, ვინაიდან მან ყველაფერი იცოდა და ვერავინ ვერ მოატყუებდა.

შორსმჭვრეტელი ლეონიძე შესანიშნავად ერკვეოდა საგარეო-პოლიტიკურ სიტუაციაში. მან პირველმა გამოიტანა უტყუარი დასკვნა, რომ 1801 წლის აქტის შემდეგ რუსეთის სახელმწიფო იმერეთში მეფის არსებობას ვერ შეურიგდებოდა. მან ისიც კარგად იცოდა, რომ ამ დროს ირან-ოსმალეთს საქართველოს დაცვა არ შეეძლო, რომ რუსეთი მათზე ბევრად ძლიერი იყო, ამიტომ მათგან დახმარების მიღებისა და საქართველოს საქმეებში მათი ჩარევის რჩევა ლეონიძეს მეფისათვის არასოდეს არ მიუტია. ამ საკითხში იგი რუსეთის მხარეზე იყო და მას ერთგულებდა. თავისი პოლიტიკური შეხედულებანი ლეონიძემ ერთხელ კიდევ გამოთქვა 1803 წელს პეტერბურგში ელჩად ყოფნის დროს. რუსეთთან კავშირში იგი საქართველოს ავტონომიის შენარჩუნებას ცდილობდა.

ლეონიძეს მაინც სწამდა, რომ საქართველო შეძლებდა დაკარგული პოზიციების დაბრუნებას, რომ რუსეთთან კავშირში საქართველო საქართველოდვე დარჩებოდა.¹ რუსეთის მოხელეები მას მა-

ინც მტრული თვალით უყურებდნენ, რადგან ვერ წარმოედგინათ კაცი, რომელიც საქართველოს დამოუკიდებლობისათვის იბრძოდა და იმავე დროს რუსეთის ერთგულიც იყო.

ნ. ბერძენიშვილის სიტყვით სოლომონ ლეონიძე „ერეკლე მეორისა, სოლომონ პირველისა და 1783 წლის ტრაქტატის ენით ლაპარაკობდა, ხოლო ალექსანდრე ხელმწიფე და მისი მოხელენი კი 1801 წლის აქტისა და მის შემდგომი მოვლენების ენით“.¹

მიუხედავად იმისა, რომ რუსეთის მოხელეებს დიდად სძულდათ სოლომონ ლეონიძე, მაინც ვერ უარყოფდნენ მის დიდ ნიჭსა და კეთსას. ციციანოვი აღნიშნავდა, რომ ლეონიძისაგან მიღებულმა წერილებმა, სიბრძნითა და ლამაზი სიტყვებით აღსავსემ, იგი „მოაჯადოვა“². ისტორიკოსი აკადემიკოსი დუბროვინი, რომელსაც აგრეთვე სძულდა ლეონიძე, აღნიშნავდა, რომ მისი წერილები მახვილსიტყვიერების ნიმუშებს წარმოადგენდნენ.³

¹ ნ. ბერძენიშვილი, დასახ. ნაშრ., გვ. 381.

² საქართველოს ისტორია, I, თბ., 1958, გვ. 409.

³ იქვე, უფრო დაწვრილებით სოლომონ ლეონიძის მოღვაწეობის შესახებ იხილეთ — შ. ცქიტიშვილი, საქართველოს სახელმწიფო მოღვაწენი, XVIII ს. II ნახევარი — XIX ს. დამდეგი, თბ., 1980, გვ. 53—78.

ტყვის სყიდვა დასავლეთ საქართველოში

რამდენიმე საუკუნის მანძილზე გარეშე მტერთა განუწყვეტელი თარეშისა და შინაომების ასპარეზად ქცეული დასავლეთი საქართველო, რომელიც გეოგრაფიულად შავ ზღვაზე იყო მიმდებარე და ბიზანტიის იმპერიის დაცემამდე დასავლეთს სწორედ ამ საზღვაო გზით უკავშირდებოდა, მთლიანად ახალი ჰეგემონის — ოსმალეთის გავლენაში მოექცა.

თურქ-ოსმალთა სახელმწიფო XVI საუკუნის დასაწყისში მსოფლიო იმპერიად გადაიქცა.

„შუა საუკუნეების ერთადერთი ნამდვილად სამხედრო სახელმწიფო“ (მარქსი), რომელიც სხვისი ტერიტორიების დაპყრობითა და ძარცვა-გლეჯით შეიქმნა, უშუალოდ გაუმეზობლდა საქართველოს. კონსტანტინეპოლისა და ბალკანეთის დაპყრობის შემდეგ ოსმალეთი შავ ზღვაზე გაბატონდა, რის შედეგადაც საქართველო ცივილიზებული მსოფლიოსაგან ზოწყვეტილი აღმოჩნდა. დიდი სავაჭრო გზები, ამიერკავკასიის ტერიტორიაზე ოდესღაც რომ გადიოდა, მოიშალა. ყოველივე ამან უარყოფითი დაღი დაასვა ჩვენი ქვეყნის განვითარების საქმეს.

XVI—XVII საუკუნეებში საქართველო, ერთი მხრივ, ოსმალეთისა და, მეორე მხრივ, ირანის გამუდმებული შემოსევების გამო, მძიმე მდგომარეობაში ჩავარდა. წარსულში მთელ წინა აზიაში უძლიერესი ქართული სახელმწიფო XVII საუკუნეში წარმოადგენდა დაქუცმაცებულ, დაუსტებულ ქვეყანას. 1555 წლის ამასიის ზავით აღმოსავლეთი საქართველო ირანს ერგო, დასავლეთი — თურქეთს. გარეშე მტრის მოძალებამ და შინაურმა შფოთმა გააძლიერა მწარმოებელი კლასის ჩაგვრა. ოსმალეები ობობას ქსელის მსგავსად შემოერთებენ დასავლეთ საქართველოს და გარე სამყაროსაგან მოწყვეტენ, საგარეო ურთიერთობა და ვაჭრობა თურქებმა თავიანთ ინტერესებს დაუმორჩილეს.

ფეოდალიზმი, რომელიც იმდროინდელი საქართველოს გაბატონებულ სოციალურ-ეკონომიკურ წყობას წარმოადგენდა, დასავლეთი საქართველოს პირობებში რიგი თავისებურებით ხასიათდებოდა.

როგორც ზემოთ ითქვა, ახალმა საგარეო ვითარებამ ერთბაშად დააქვეითა საგარეო ვაჭრობა და შინა აღებ-მიცემობა, მოშალა ისტორიული ტრადიციული სავაჭრო გზები და კონტაქტები, მწარმოებელი კლასი — გლეხობა რიცხობრივად შემცირდა, ეკონომიკურად გაჩანაგდა; გამუდმებულმა ბრძოლებმა კატასტროფულად დასცა შრომის ნაყოფიერება, ამან თავის მხრივ გამოიწვია ექსპლოატაციის გაძლიერება და მისი უფრო მეტად უხეში და მძიმე ფორმების განვითარება, საშიში გახდა მიმოსვლა-მიმოზიდვა, მას მრავალი დაუძლეველი დაბრკოლება გადაეღობა დაქუცმაცებული, წვრილი პოლიტიკური ერთეულების წარმოშობის გამო, რომელთაც თავისი საზღვრები დააწესეს და ყოველნაირი ბარიერები შექმნეს მათი გადალახვის წინააღმდეგ. დაეცა სასოფლო-სამეურნეო წარმოება, ავრიკულტურა (აქი იმერეთის მეფე აღნიშნავდა — გარეშე მტერი ჩემს სამეფოში ღომის მეტს ვერაფერს იპოვნისო). საქართველოში მცხოვრები მისიონერები თუ აქ მოგზაური სხვა უცხოელები ერთბაშად გვიხატავენ იმ ღუბჯირ ეკონომიკურ მდგომარეობას, რომელშიც მაშინდელი საქართველო, განსაკუთრებით დასავლეთი, იმყოფებოდა.

ამ მძიმე ვითარებამ, კერძოდ, ეკონომიკური ცხოვრების კატასტროფიულმა დაქვეითებამ, სხვა ხელშემწყობ მიზეზებთან ერთად, განაპირობა ხალხის ეთიკურ-მორალური დაქვეითება, რაც ასე თვალნათლივ ჩანს იმავე უცხოელი მისიონერებისა და მოგზაურების ცნობებში იმდროინდელი საქართველოს შესახებ. ამასვე ადასტურებს ჩვენი ქვეყნის იმ პერიოდის ისტორიის ყველა სხვა წყაროც.

უმთავრესი მანკი, რაც იმ დროს საქართველოს ცხოვრებას ახასიათებდა, იყო ტყვეთა სყიდვა. ფორმები, რომლებიც ამ მოვლენამ მიიღო ჩვენში, გაცილებით უფრო მძიმე და ამორალურია, ვიდრე ტყვეებით-მონებით ვაჭრობის ის ფორმები, რომლებსაც ადგილი ჰქონდა როგორც შუა საუკუნეებამდე, ისე შემდეგ — ახალ საუკუნეებში მსოფლიოს რომელი კუთხეც არ უნდა ავიღოთ.

ეს არ იყო ბრძოლაში დამარცხებული, ტყვედ ჩავარდნილი მონაწილემდევის დამონება, რაც მონობის ძირითადი წყარო იყო მონათმფლობელურ საზოგადოებაში (ანტიკური პერიოდი), არც შავკანიანთა წასხმა ახალ მატერიკზე პლანტაციებში სამუშაოდ, ეს იყო ქართველების მიერ ქართველებისავე მოტაცება (ძირითადად მოზარდებისა და ახალგაზრდებისა) უცხოეთში მონათა ბაზრებზე გასასყიდად. და ეს იყო არა ერთეული შემთხვევები, არამედ საგარეო ვაჭრობის ძირითადი ფორმა მთელი საუკუნენახევრის განმავლობაში, რაც ფართო მასშტაბის მოვლენას წარმოადგენდა. ამით

ახსენება, რომ დიდი ინგლისელი ბუნებისმეტყველი ჩარლზ დარვინი, იმოწმებს რა ძველ მოგზაურს, ამბობს:

„სპარსელთა სისხლი გაკეთილშობილდა ორი ეროვნების — ქართველებისა და ჩერქეზების სისხლით, რომლებიც ყველა სხვა ხალხზე ლამაზები არიან.

სპარსეთში თითქმის არ არის არცერთი წარჩინებული, რომლის დედა ქართველების ან ჩერქეზების შთამომავალი არ იყოს.“¹

ტყვეთა სყიდვა, რომელშიც აქტიურად მონაწილეობდნენ ადგილობრივი თავად-აზნაურები, ჩვეულებრივი მოვლენა გახდა. ფრანგი მოგზაურის ჟან შარდენის ცნობით, XVII საუკუნეში მართო სამეგრელოდან 3000 ტყვე გაჰყავდათ ოსმალეთში ყოველწლიურად, სადაც ახალგაზრდა ვაჟებს რიცხავდნენ იანიჩართა ჯარში, ახალგაზრდა ქალებს ათავსებდნენ სულთნისა და მისი ფაშების ჰარამხანებში, ხოლო ხანში შესულებს მონებად ყიდდნენ. ოსმალეების წარჩინებულთა სასახლეებში იმ დროისათვის მრავლად იყვნენ გაყიდული ქართველები.

ტყვეებით ვაჭრობამ დასავლეთ საქართველოში განსაკუთრებით მძიმე სახე XVII საუკუნიდან მიიღო. იმერეთის მეფეებს, თუ გურიისა და ოდიშის მთავრებს დამპყრობელი ქვეყნებისათვის (თურქეთი, ირანი) პერიოდული თუ ერთდროული ხარკი ხშირად ადამიანთა (ქალ-ვაჟთა) განსაზღვრული რაოდენობით უნდა გადაეხადათ; ამავე დროს მთავრებს და დიდებულებს თავიანთი მოთხოვნილების დასაკმაყოფილებლად საჭირო უცხო საქონელიც ტყვეებზე გადაცვლით უნდა შეეძინათ.

რუსეთის მეფის მიხეილ თევდორეს ძის კარზე მყოფი საქართველოს ელჩი — მიტროპოლიტი ნიკიფორე 1639 წელს მას მოახსენებდა: (სამეგრელოში) „არა მართო მისი მფლობელი ლევანი ჰყიდის ადამიანებს, არამედ მამა — შვილს, ძმა — ძმას, ქმარი — ცოლს, ცოლი — ქმარს ჰყიდის და აქ ჩამოსულ ვაჭრებს საქონელში უცვლის“. საყურადღებო ცნობებს გვაწვდის ტყვეთა სყიდვაზე ფრანგი მოგზაური ჟან ბატისტ ტავერნიე, რომელმაც აზიაში იმოგზაურა 1631—1633 წლებში; დასავლეთი საქართველოს მეფე-მთავართა ბრძოლის შედეგს იგი ასე გვისურათებს: „როგორც კი ამ ომებში ტყვეებს იშვონიან, იმ თავითვე გზავნიან ოსმალეთში გასასყიდად. ადამიანთა ყიდვა-გაყიდვა ამ ქვეყანაში იმდენად ჩვეულებრივი მოვლენაა, რომ ცოლს ან ქმარს ფული დასჭირდება, თავის ერთ-ერთ შვილს გზავნის გასასყიდად. ან მეწერილმანესთან ბაფთებსა, ტილოს ნაჭ-

¹ Чарльз Дарвин. Полное собрание сочинений, т. II, книга I, 1927, стр. 579, ეს სიტყვები ასევე სამართლიანია ოსმალთა წარჩინებულთა მიმართაც.

რებსა თუ სხვა ამგვარნივთებზე გადასაცვლელად“.¹ ეან შარდენის ცნობით, „ტყვეთა სყიდვამ“ სამეგრელოს 40,000-იანი მოსახლეობა 1640-იანი წლებიდან მოყოლებული სულ რაღაც 30 წლის განმავლობაში 20,000-მდე შეამცირა“.²

თეიმურაზ პირველი რუსეთის მეფის მიხეილ თევდორეს ძისადმი 1639 წელს გაგზავნილ ბარათში აღნიშნავს, რომ ოდიშისა და გურიის მთავრები ყოველწლიურად ჰყიდიან ახალგაზრდებს — დადიანი 10—15 ათასი, ხოლო გურიელი 10—12 ათასი კაცის რაოდენობით.³ მაგრამ ეს ციფრები გადაჭარბებული უნდა იყოს, ვინაიდან იმ ხანებში სამეგრელოში მყოფ კათოლიკე მისიონერთა მიერ შეკრებილი ცნობების მიხედვით, სამეგრელოდან ყოველწლიურად გაჰყავდათ დაახლოებით 2 ათასი კაცი, ხოლო მიქელ თამარაშვილის ცნობების თანახმად, იმ პერიოდში შავი ზღვის სანაპიროდან ყოველწლიურად გაყიდულ ტყვეთა რაოდენობა 4 ათას კაცს არ აღემატებოდა.⁴

ტყვეების გაყიდვა და უცხო ვაჭართა მიერ მოტანილ საქონელზე გადაცვლა ჩვეულებრივი მოვლენა იყო.

ეან შარდენი დასავლეთ საქართველოში იყო 1672 წლის აგვისტოდან იმავე წლის დეკემბრის შუა რიცხვებამდე. ამ ხნის განმავლობაში მიღებული შთაბეჭდილებების შედეგად იგი აღნიშნავს, რომ „აქაური თავად-აზნაურობა ყოველთვის ეძებს შემთხვევას, რათა რისხვად დაატყდეს თავის ყმებს, რომ იპოვოს რაიმე საბაბი და გაჰყიდოს ისინი ცოლშვილიანად. ამავე მიზნით მეზობლებს სტაცებენ შვილებს, ჰყიდიან საკუთარ შვილებს, ცოლსა და დედასაც კი. ერთ-ერთმა მათგანმა ერთხელ გაჰყიდა რამდენიმე ხუცესი, რომელთაც ზედ მიაყოლა თავისი ცოლი, რათა ამ გზით შეეძინა საშუალება შეყვარებული ახალი საცოლის გამოსასყიდად და საქორწინო ხარჯებისათვის. როგორც მეგრელები, ისე გურულები ტყვეებს იტაცებდნენ მეზობელი ხალხებისაგან. ვინც ომის დროს ტყვეს ხელთ ჩაიგდებდა, იმას შეუზღუდველი უფლება ჰქონდა ტყვის სიკვდილ-სიცოცხლეზე და შეეძლო თავისი სურვილისამებრ მოქცე-

¹ ე ა ნ ბ ა ტ ი ს ტ ა ე რ ნ ი ე, თბ., 1974, გვ. 199.

² ე ა ნ შ ა რ დ ე ნ ი, დასახ. ნაშრ., გვ. 123.

³ Переписка грузинских царей с российскими государями, стр. 22—23.

⁴ შ. თამარაშვილი, ისტორია კათოლიკობისა ქართველთა შორის, ტფ., 1902, გვ. 180.

ოდა მას. ჩვეულებრივად, ტყვეს აქცევენ მონად და ჰყიდიან თურქებზე“.¹

იგივე ჟან შარდენი მოგვითხრობს, რომ გემი, რომელზეც ის იმყოფებოდა, როდესაც სამეგრელოს ნაპირს მიაღდა და მგზავრებმა დააპირეს სურსათ-სანოვავის შეძენა, იქ არაფერი მოიპოვებოდა, გარდა ჯაჭვებით შებორკილი მონებისა და მშვილდ-ისრით შეიარაღებული თორმეტიოდე შიშველი, შიშის მომგვრელი ზედამხედველისა.² სხვადასხვა ჰასაკისა და სქესის მონათა დიდმა რაოდენობამ, რომელთაგან ერთნი შებორკილნი იყვნენ ჯაჭვებით, მეორენი ერთმანეთზე გადაბმულნი, ამ საბაჟო ზედამხედველებმა თავიანთი ყაჩაღური და ბოროტი სახით საშინელი შთაბეჭდილებით აღავსეს ჩემი წარმოდგენა.³

ის გემი, რომელზედაც ჟან შარდენი იმყოფებოდა, მისი სიტყვით „ტყვეების საპყრობილე იყო. ტყვეებს, მათ შორის ყმაწვილებსაც, ყოველ საღამოს ჯაჭვით წყვილ-წყვილად აბამდნენ; დილით ჯაჭვს ხსნიდნენ... ყოველ დილას ნაპირზე ცეცხლს ვხედავდით. ეს იმის ნიშანი იყო, რომ იქ უკვე მოყვანილი ჰყავდათ ტყვეები ან სხვა საქონელი გასაყიდად“.

იმ გემზე, რომელზედაც ჟან შარდენი იმყოფებოდა, ორმოცი ტყვე იყო. „კაპიტანი, თურქი და ქრისტიანი ვაჭრები მათ ცვლიდნენ იარაღზე, მრავალგვარ წვრილმანებსა და სხვა საქონელზე“... „მამაკაცები ოცდახუთიდან ორმოცი წლის ასაკამდე, ღირდა მხოლოდ თხუთმეტი ეკიუ, ორმოცზე მეტი ხნისა — რვიდან ათამდე. ლამაზი ქალწულები — ცამეტიდან თვრამეტ წლამდე — ოცი ეკიუ. სხვები უფრო იაფად ფასობდნენ. ქალები — თორმეტად, ბავშვები სამ ან ოთხ ეკიულ. ერთმა ბერძენმა ვაჭარმა... ქალი ძუძუთა ბავშვით იყიდა თორმეტ ეკიულ; ქალი იქნებოდა ოცდახუთი წლისა; ჰქონდა ულამაზესი ნაკვთები და ნამდვილი შრომანისფერი პირისახე. არასოდეს მინახავს ასეთი ლამაზი გულმკერდი, ასეთი მრგვალი ყელი და საოცრად ნაზი ფერხორცი. ეს ლამაზი ქალი ერთდროულად ვნებასაც და სიბრალულსაც იწვევდა“.⁴

ტყვეების ფასი ამ დროს იმდენად დაეცა, რომ შავი ზღვის სა-ნაპირო ზოლზე, მაგალითად 1672 წელს, „25—40 წლის მამაკაცი

¹ ჟან შარდენი, დასახ. ნაშრ., გვ. 124—125.

² ჟან შარდენი, მოგზაურობა სპარსეთსა და აღმოსავლეთის სხვა ქვეყნებში, ფრანგულიდან თარგმნა მზია მგალობლიშვილმა, თბ., 1975, გვ. 206.

³ იქვე, გვ. 207.

⁴ იქვე, გვ. 211—212.

ღირდა მაშინდელი ფულით თუმანი, ხოლო ახალგაზრდა ქალი 13—18 წლისა — 13 1/2 მანეთი“.¹

ტყვის სყიდვა ფეოდალთა შემოსავლის გარკვეულ წყაროდ იქცა საქართველოში. მას აწარმოებდნენ, როგორც საერო, ისე სასულიერო პირნი. უპირველეს ყოვლისა ტყვის სყიდვას აწარმოებდნენ მთავრები და თავადები. მოსახლეობის მნიშვნელოვანი ნაწილი — ჯანდონით სავსე ახალგაზრდობა ყოველწლოურად მიედინებოდა თურქეთისაკენ. აკად. ნ. ბერძენიშვილი აღნიშნავს: „არც ერთ ომს, არც ერთ უცხოელ დამპყრობელს ხმლით იმდენი ზარალი არ მიუყენებია საქართველოსათვის, რამდენიც ამ „მშვიდობიან“ ტყვეთა სყიდვამ მიაყენა მას“.²

ევროპელ მოგზაურებს, კერძოდ, იტალიელ მისიონერებს, უხვად აქვთ შემონახული ცნობები ტყვეთა სყიდვის შესახებ. 1624 წელს ლევან დადიანმა დარბაზობის დროს სუფრაზე ძვირფასი სასმისები მოატანინა. ამის შესახებ პატრი ივანე წერს: „მთავარმა თავისი სიმდიდრის გამოსაჩენად ბევრი ძვირფასი თვლებით მოჭედილი თასი მაჩვენა, ზოგი ათ ყმად, ზოგი რვად და ზოგიც ექვსად ეყცდა“.³

არქანჯელო ლამბერტი ერთ ასეთ საყურადღებო ფაქტს აგვიწერს: „იყო ერთი უპირველესი დიდებულთაგანი ოდიშში, გვარად ჭილაძე, რომელიც შეჩვეული იყო ტყვეების გაყიდვასა და ამას ერთ წელიწადს თურქთა გემების მოსვლის დროს დასჭირდა ათითორმეტი ტყვე ოსმალებზე გასაყიდად, რათა სამაგიეროდ ეყიდნა მათგან სხვა საქონელი, რომელიც სახლში სჭირდებოდა. ეს შეუტყვეს მისმა ყმებმა და თავს უშველეს გაქცევით, რათა ხელში არ ჩავარდნოდნენ მას და თავისუფლება არ დაჰკარგვოდათ, მაგრამ ჭილაძემ ეს ხერხი იხმარა საჭირო კაცების მახეში გასაბმელად. გამოაცხადა, რომ ამა და ამ დღესასწაულს დიდებული წირვა უნდა გადავიხადოო და ერთ-ერთ კარის ეკლესიაში უნდა მოვიდნენ მღვდლებიო, რომელთაც წირვის შესრულებისათვის უხვად დავასაჩუქრებ და მდიდრულ ნაღიმს გავუმართავო; ამ ცრუ დაპირებამ შეაცდინა მღვდლები და დანიშნულ დღეს თორმეტი მღვდელი გამოცხადდა. მათ დიდებულად შეასრულეს წირვა, რომელსაც დიდოღვთისმოსავობით დაესწრო ჭილაძე. წირვა რომ შეასრულეს და

¹ ს. კაკაბაძე, საქართველოს ისტორია, ახალი საუკუნეების ეპოქა, თბ., 1922, გვ. 75.

² ნ. ბერძენიშვილი, საქართველოს ისტორია, XVI—XVIII საუკუნეები. თბ., 1950, გვ. 300.

³ მ. თამარაშვილი, კათოლიკობა ქართველთა შორის, ტფ., 1902, გვ. 147.

მღვდლებს იმედი ჰქონდათ, თავადი თავის დაპირებისამებრ დაგვა-საჩუქრებს და ნადიმს გაგვიმართავსო, კილაძემ ეკლესიის კარები დაკეტა, ჭაჭვები მოატანინა, თორმეტივე მღვდელი ჭაჭვებში ჩასვა, თმები და გრძელი წვერები მოაპარსვინა და პირდაპირ წააყვანინა თურქთა გემებზე გასასყიდად¹. არქანჯელო ლამბერტი დასძენს: „მე ჩემის თვალთ ბევრჯერ მინახავს, რომ ქმარს თავისი ცოლი გაუყიდია თურქებზე მხოლოდ იმიტომ, რომ ცოტა ეპვი ჰქონდა მის კუდიანობაზე, რასაც მეგრელები მრუშობაზე უფრო სდევნი-ან: ამ შემთხვევაში ფასი მარტო ქმარს როდი რჩება, არამედ გაა-ნაწილებენ სამად და ერთი წილი ერგება ბატონს, რომლის ყმად ითვლება ქალი, მეორე — ქმარს და მესამე — ქალის მშობლებს. აქედან ჩანს, რომ ამ საქმეში ბევრს აქვს სარგებლობა და ამიტომაც ზნირია ასეთი ყიდვა-გაყიდვა“².

პატრი იოსებ რომაელი 1675 წელს რომში გაგზავნილ წერილში წერს: „...უმანყო ბავშვებს, თუ ვაჟებს და ქალებს, სწავტრო მოე-დანზე ჰყიდიან ოხერ ფასად, რათა მით დააკმაყოფილონ ოსმალე-ბის უწმინდური მადა. გვესმის და ვხედავთ მათს ჟღავილს და ტი-რილს; ამ დროს ზოგი მდინარეში თავს იგდებს, ზოგი თვალებს ითხრის და ზოგიც ცხვირს იჭრის, რათა ურწმუნოებმან აღარ იყი-დონ და წმინდა სარწმუნოება არ დაატოვებოდნ“³.

ჟან-ბატისტ ტავერნიეს აზიაში პირველი მოგზაურობის დროს (1631—1633 წწ.) კონსტანტინეპოლში უნახავს სამეგრელოს მთავ-რის ელჩი. მას (ელჩს), თურმე ორასამდე მონა ხლებია. „ყოველ-დღე რომელსამე მათგანს ჰყიდდა, როდესაც სამეგრელოში დაბ-რუნდა, მას შერჩა ერთი მდივანი და ორი ფარეში“⁴. იმავე ტავერ-ნიეს ჩვენებით: „მეტი ფულის გამორჩენისათვის არჩევენ უფრო ლამაზ ბიჭებს და გოგოებს. ქვეყნის დიდებულნი არ ზოგავენ არც ქმრიანს და არც გაუთხოვარ ქალებს. ქალებისა და კაცების გაყიდვა ისეთ საზოგადო ჩვეულებად არის გადაქცეული ამ ქვეყანაში, რომ ის შეადგენს მათი ვაჭრობის უდიდეს საგანს და სწარმოებს თათქ-მის ყოველ უბრალო შემთხვევის გამო“.

ტყვის სყიდვაში მთავრებს ზოგჯერ გულქვა მშობლებიც არ ჩა-მორჩებოდნენ. თეათინელი კლემენტე ჯალანო მოგვითხრობს: თე-ათინელმა მონაზვნებმა „იქვე დააარსეს სკოლა, ბავშვები ზოგი

¹ არქანჯელო ლამბერტი, დასახ. ნაშრ., გვ. 161.

² იქვე, გვ. 161—162.

³ მიქელ თამარაშვილი, კათოლიკობა ქართველთა შორის. თბ., 1902, გვ. 249.

⁴ ჟან ბატისტ ტავერნიე, თბ., 1974, გვ. 201; იხილეთ აგრეთვე, მოამბე № 6, 1898, გვ. 7.

თვით მთავარმა აჩუქა, ზოგი ბატონებმა და ზოგიც თვით გამოართ-
ვეს იმ მშობლებს, რომლებსაც ბავშვების აღზრდა არ შეეძლოთ,
რათა ისინი თათრებისათვის არ მიეყიდათ“.¹

სამეგრელოს მთავრისა და მისი კარისკაცების დახასიათებისას
იტალიელი მისიონერი დონ-მარი-ჟოზეფ-ძამპი ეან შარდენს
ეუბნება: „ეს მთავარი ისეთივე ავი სული, დიდი ავაზაკი და ნამდ-
ვილი მძარცველია, როგორც მისი ქვეშევრდომები“.²

იმ ძალადობასთან ერთად, რომელსაც მთავარი და თავადებაც
მიმართავდნენ ტყვეთა მოსაპოვებლად, იყო კიდევ ერთი საზე ტყვე-
თა სყიდვისა. ეს იყო ჩუმაღ, ქურდულად მოპარული ტყვეების
გაყიდვა. არქანჯელო ლამბერტი წერს: „არიან ისეთი ქურდებიც,
რომელნიც იპარავენ კაცებს და ყმაწვილებს და ჰყიდიან ჩუმაღ
თურქეთში, გურიელის სამთავროში, ზღვის პირად, სახელდობრ
ქობულეთში, მუდამ ტყვეებით ვაჭრობენ, ამას ხელს უწყობს ის
გარემოება, რომ ახლო ქალაქებიდან — რიზე, გონია და ტრაპიზო-
ნიდან მოდის მრავალი თურქი ვაჭარი. მათ მოაქვთ ბლომად ფული
და ტანისამოსი, რაც ფრიად ეჭირვება აქაურ ხალხს. თურქები კი
სამაგიეროდ მხოლოდ ტყვეებს თხოულობენ. ამიტომაც აქ მოყავთ
თურქებზე ტყვეთ გასასყიდად ქართველებიც და აფხაზებიც. ყვე-
ლანი ისე არიან დახელოვნებული ამ ხელობაში, რომ ადვილად
იპარავენ, როგორც მამაკაცებს, ისე დედაკაცებს, დიდებსაც და პა-
ტარებსაც. ზოგჯერ ასეთი ავაზაკები ღამე თავს დაესხმიან მეზობ-
ლის სახლს, შეტეხენ ძალით სახლის კარს, შებოჭავენ ვისაც კი შიგ
იპოვნიან და პირდაპირ ქობულეთში გააქანებენ თურქებზე გასას-
ყიდად“.³ ტყვის ასეთ ვაჭრობას დაბალი ფენის წარმომადგენლნი
აწარმოებდნენ.

პატრი იოსებ ჭუდიჩი, რომელმაც 1640 წელს გაგზავნა რომს
სამეგრელოს აღწერა, აღნიშნავს: „ამ თვეში მიდიან სამეგრელოდან
კონსტანტინეპოლში თათრების გემები, დატვირთული ამ ქვეყნის
საქონლით და განსაკუთრებით ურიცხვი ქრისტიანი ყმაწვილებით,
რომლებიც თათარს (სულთანს) მიჰყიდეს მეგრელებმა და ქართვე-
ლებმა“.⁴

მისიონერები მოგვითხრობენ ამ საშინელი სოციალური მანკის
გვერდით მეორე კიდევ უფრო მძიმე ჩვეულების — ბავშვების ცოც-
ხლად დამარხვის შესახებ. მიქელ თამარაშვილი გადმოგვცემს: —

¹ მიქელ თამარაშვილი, კათოლიკობა ქართველთა შორის. თბ.,
1902, გვ. 155.

² ეან შარდენი, მოგზაურობა საქართველოში, თბ., 1935, გვ. 14.

³ არქანჯელო ლამბერტი, დასახ. ნაშრ., გვ. 76.

⁴ მ. თამარაშვილი, დასახ. ნაშრ., გვ. 176—177.

„ეს რომ ჩვენ სხვა მწერლების ნაწერებში ამოგვეკითხა, სრულე-
ბით არ დავიჭერებდით, არამედ ზღაპრად და ცილისწამებად ჩავთ-
ვლიდით, რადგან ასეთი ბარბაროსული ჩვეულება თვით უკანასკ-
ნელ ნადირ ხალხშიც ძლიერ იშვიათია, სამეგრელო კი ასეთ კატე-
გორიის ხალხს არ ეკუთვნოდა, ვინაიდან ძველი დროიდანვე შეტა-
ნილი იყო განათლება და ყოველი უმთავრესი კაცობრივი პატიოს-
ნება და გრძნობა, ხოლო ეს სისაძაგლე რა ამოვიკითხეთ და თვით
ნაწერები კი ეკუთვნოდა იმნაირ კაცებს, რომელნიც განწირულნი
იყვნენ ამ ერისათვის, რომელნიც ამ ერის ავსა და კარგს თვალთ
ხედავდნენ და ხელით ეხებოდნენ და რომლებიც ყველა თავიანთ
გაგონილს, ნანახს ყოველდღე სწერდნენ ევროპაში და ყველა საშუ-
ალებას ხმარობდნენ ამ უბედურების მოსასპობლად, არავითარი საბუ-
თი გვაქვს, მათ არ დაუჭეროთ და ქორად ჩამოვართვათ ნათქვამი.
ამის გამო იძულებულნი ვხდებით ესეთი მოთხრობა მივიღოთ ის-
ტორიულ ფაქტად“.¹

არქანჯელო ლამბერტი მოგვითხრობს: „ამათ შორის ყველაზე
ბარბაროსულ ჩვეულებად უნდა ჩაითვალოს ის, რომ ყმაწვილებს
ცოცხლად მარხავენ. უფრო ხშირად დედები მარხავენ თავიანთ
ახლად დაბადებულ ბავშვებს. ამ საშინელ საქმეს ჩადიან ხშირად
ის ქვრივები, რომელნიც პირველ ქმრის ხელში დაორსულდნენ და
მეორე ქორწინებისათვის ვერ დალოგინებულან. მაშინ ახალი ქმა-
რი თავიდან იშორებს საბრალო ყმაწვილს... ამოთხრის თავის სახლ-
ში ორმოს და ჩაფლავს ახლად დაბადებულ ყმაწვილს. ასევე იქცე-
ვიან ისინი, რომელთაც სიღარიბისა და მრავალ-შვილიანობის გამო,
არ შეუძლიათ მათი რჩენა“.²

ამ მოვლენის ძირითადი მიზეზები, ცხადია, უმძიმესი ეკონომი-
კური მდგომარეობა და საერთო მორალური დაქვეითება იყო.
გლეხების გამუდმებული შიში გარეშე მტრებისა და საკუთარი ბა-
ტონების მიმართ, მათი უუფლებობა, სასოწარკვეთილი გლეხი თა-
ვისივე ხელით უსპობდა სიცოცხლეს თავის შვილს, მართლაც ეს
იყო ყველაზე საზარელი პერიოდი ჩვენი ქვეყნის ისტორიაში.

1667 წელს ლევან II დადიანის ცრუ ძემ მათემ³ რუსეთის სა-
მეფო კარს თავის მიერვე დაწერილი წერილი წარუდგინა. ამ ვრცელ
წერილში იგი აღნიშნავს, რომ სამეგრელოში „ეპისკოპოზი, თავადი,

¹ მ. თამარაშვილი, დასახ. ნაშრ., გვ. 175.

² არქანჯელო ლამბერტი, დასახ. ნაშრ., გვ. 76.

³ ეს მათე 1666 წელს ასტრახანში ჩავიდა. თავისი თავი მან ლევან II დადი-
ანის ძედ გამოაცხადა. მისი თქმით, მისმა მტერმა ქართველებმა ლევანის ძეობა
არ დაუდასტურეს, რუსეთის სამეფო კარმა იგი ციმბირში გადაასახლა. 11 წლის
პატიმრობის შემდეგ მათე სამშობლოში დააბრუნეს, მაგრამ ასტრახანის ვოევო-

აზნაური, ყველა ტყვეს ყიდის. ასეთი წელიწადი არ იქნება ათასი სული კაცი არ გაიყიდოს. ყველა თათრის ხელთა არის და თათრდება. ასე შეიქმნა ოდიში. კაცები ასრე შეპირებული არიან, რომ შეილი რომ ეყოლებათ, მოარჩობენ თავის ხელითა — თათარს მისცემენო, იმის გულისათვის ჩვენ მოვკლათო ჩვენი ხელითაო“.¹

ჯერ კიდევ ადრე — XVI საუკუნეში ტყვის სყიდვა, ქურდობა, ავაზაკობა, მკვლელობა, ეკლესიების ძარცვა იმდენად გაიზარდა და გავრცელდა, რომ აუცილებელი გახდა საეკლესიო კრების მოწვევა, რომელიც ფეოდალურ საზოგადოებას თავისი ავტორიტეტით წინ აღუდგა და მოუწოდა ამ უმსგავსოებათა წინააღმდეგ საბრძოლველად. სწორედ ამ მიზანს ემსახურებოდა იმერთა მეფის ბაგრატ III-ის მიერ მე-16 საუკუნის 50-იან წლებში მოწვეული საეკლესიო კრება², რომელმაც დღის წესრიგში დააყენა ყველაზე მტკივნეული საკითხი — ტყვეთა სყიდვის აკრძალვა.

კრებას დაესწრო აფხაზეთის კათალიკოსი ევდემოსი, საგანგებოდ მოწვეულ იქნენ ქართლის კათალიკოსი მალაქია და დასავლეთი საქართველოს 10 ეპისკოპოსი: ქუთათელი, გენათელი, ქყონდიდელი, ბედიელი, მოქველი, დრანდელი, ცაგერელი, ხონელი, ნიკორწმინდელი და ცაიშელი. ამ საეკლესიო კრებამ იმსჯელა გამრავლებულ ბოროტმოქმედებათა შესახებ და შეიმუშავა ხალხის ზნეობრივი ცხოვრების ამაღლების მიზნით „სამართალი კათალიკოსისა“, რომელიც 23 მუხლისაგან შედგებოდა.

ბაგრატ III-ის სიკვდილის შემდეგ მის დროს მიღებული ტყვეთა სყიდვის ამკრძალავი კანონი თითქმის დავიწყებას მიეცა და ტყვეებით ვაჭრობამ განსაკუთრებით მძიმე ხასიათი მიიღო მომდევნო მე-17 საუკუნის მეორე ნახევრიდან.

XVII საუკუნის 40-იან წლებში კათოლიკე პატრების ჩაგონებით და მცდელობით ტყვეთა სყიდვის წინააღმდეგ ერთგვარი ზომები მიიღო ლევან II დადიანმა (1611—1657 წწ.).

დასადმი მიწერილი მეფის წერილი (რითაც მათეს ფული უნდა მიეღო) ყალბი აღმოჩნდა. ამიტომ მას სიკვდილით დასჯა გადაუწყვიტეს, მაგრამ შეიწყალეს და ისევ ციხიერში უნდა გაეგზავნათ. საბოლოოდ მაინც სიკვდილით დასაჯეს. არც ვადასახლების, არც სიკვდილით დასჯის მიზეზი ცნობილი არაა. თ. ტივაძე, ერთი ეპიზოდი XVII საუკუნის 60-იანი წლების რუსეთ-საქართველოს ურთიერთობის ისტორიიდან, კრებული, ქართული სამეფო-სამთავროების საგარეო პოლიტიკის ისტორიიდან, I, თბ., 1970, გვ. 98—121.

¹ თ. ტივაძე, დასახ. ნაშრ., გვ. 104.

² მ. რეხვიაშვილი, იმერთის სამეფო XVI საუკუნეში, თბ., 1976, გვ. 53—57.

თუ რამდენად ფართო ხასიათი მიიღო ტყვის სყიდვამ, ეს თურქი მოგზაურისა და დიპლომატის ევლია ჩელების¹ „მოგზაურობის წიგნის“ ცნობებიდანაც ჩანს. იგი წერს: „აბაზები მეგრელებს იტაცებენ, მეგრელები — აბაზებს და ვაქრებს მიჰყიდნიან ხოლმე“², „აბაზები ერთმანეთს ებრძვიან, ბავშვებსა და ქალებს იტაცებენ, ტყვეებს ჰყიდნიან და ამით ცხოვრობენ“.³

თვით ევლია ჩელებმა საქართველოში თავისი ხანმოკლე მოგზაურობის დროს რამდენიმე ქართველი ტყვე-ბიჭი შეიძინა და ყირიმში რომ ჩავიდა, თერამეტი მონა ჰყავდა.⁴ მან აფხაზეთში „ერთი აბაზა (ე. ი. აფხაზი — მ. რ.) ბიჭი“⁵ იყიდა, შემდეგ „აბაზა ჰაბუკი“⁶. თავრიზის ხანს ევლიას სიმღერა მოეწონა და „ერთი ქართველი ბიჭი“⁷ უბოძა. ევლია ჩელები აღნიშნავს, რომ მას აჩუქეს: ახალციხის განმგებელმა საფარ-ფაშამ „ორი ქართველი ბიჭი“⁸, ყარსის ფაშამ „ორი ქართველი ბიჭი“⁹, არზრუმის ფაშამ ორი „ქართველი მონა“¹⁰, სეილი-ფაშამ „ორი ქართველი ბიჭი“¹¹, ვარდარ ალი-ფაშამ ერთი „ქართველი ბიჭი“¹², მურთაზა-ფაშამ „ქართველი მონა“¹³, ბაქოში „ქართველი ბიჭი“¹⁴, იგივე ევლია ჩელები გადმოგვცემს, რომ ერევნის ხანმა არზრუმის ფაშას მისი ხელით საჩუქრებთან ერთად ექვსი „ქართველი ბიჭი“ გაუგზავნა.¹⁵ თავრიზის ხანმა არზრუმის ფაშას ორი „ქართველი ბიჭი“ გაუგზავნა და თვით მას ერთი „ქართველი ბიჭი“¹⁶ აჩუქა. იგი განაგრძობს: აჩიკ ბაშის

¹ ევლია ჩელებმა საქართველოში იმოგზაურა 1640—1641, 1646—1647 წლებში.

² ევლია ჩელების „მოგზაურობის წიგნი“, ნაკვ. I, ქართული თარგმანი გ. ფუტურდიისა, თბ., 1971, გვ. 96.

³ იქვე, გვ. 102.

⁴ იქვე, გვ. 122.

⁵ იქვე, გვ. 103.

⁶ იქვე, გვ. 104.

⁷ იქვე, გვ. 243.

⁸ იქვე, გვ. 302.

⁹ იქვე, გვ. 311.

¹⁰ იქვე, გვ. 336.

¹¹ იქვე, გვ. 341.

¹² იქვე, გვ. 415.

¹³ იქვე, გვ. 436.

¹⁴ იქვე, გვ. 281.

¹⁵ იქვე.

¹⁶ იქვე, გვ. 257.

(იმერეთის — მ. რ.) ბეგისაგან აჰმედ-ფაშას საჩუქრად მიუვიდა „ხუთი მონა და ხუთი მხევალი“, აქედან ევლია ჩელებს ერგო „ერთი მონა და ერთი მხევალი“.¹

სამეგრელოში თარეშის დროს ქუთფაჯ-ფაშას მეომრებმა ორი ულამაზესი „ვარსკვლავივით ქალიშვილი“ მოიტაცეს, სეიდ აჰმედ-ფაშამ ისინი ათას-ათას ყურუშად იყიდა და ოც სხვა ქალიშვილთან ერთად სულთან იბრაჰიმ-ხანს გაუგზავნა.² იმავე ხანებში ოსმალებმა ტყვედ ჩაიგდეს „სამეგრელოს ბეგის ბიძაშვილი. მან ასი ტყვე, ათასი სული საქონელი, მრავალი საპალნე ოქროს ქსოვილი, მრავალი საპალნე ფარჩა მისცა და თავი გამოისყიდა“.³

სამეგრელოში ლაშქრობის შემდეგ სეიდ აჰმედ-ფაშამ არზრუმის ფაშას საჩუქრად მიართვა „ორასი მეგრელი ტყვე, ასორმოცდაათი მონა და ასი მხევალი“.⁴

ზემოთ მოტანილი ცნობები ნათლად ადასტურებს, რომ ტყვეებით დასაჩუქრებასა და ვაჭრობას ფართო ხასიათი ჰქონდა.

დასავლეთი საქართველოს მეფე-მთავრები ტყვეთა სყიდვაში არა მარტო თავიანთი უშუალო ინტერესების დაკმაყოფილებას პოულობდნენ, არამედ მბრძანებელ ოსმალებსაც ემსახურებოდნენ და უხვად აწვდიდნენ მის ბაზრებს სანუკვარ ცოცხალ საქონელს. დასავლეთი საქართველოს მეფის სახელმწიფო ბექედების წარწერა ნათლად გვიდასტურებს მის მორჩილებას ოსმალებთანადმი. იმერეთის მეფის სახელმწიფო ბექედზე შემდეგი წარწერა იყო: „მონა ვარ ღეთისა, ყმა ხონთქარისა“.⁵

უფრო გვიან, XVIII საუკუნის სამოცდაათიან წლებში, როცა იმერეთის მეფე სოლომონ I დიდი შეეცადა და შეძლო კიდევ შეეზღუდა ოსმალთა მძლავრობა დასავლეთ საქართველოში და დაემორჩილებინა გურია-ოდისის გამდგარი მთავრები და დიდი ფეოდალები (რაჭის ერისთავი როსტომი და არგვეთის ბატონი ლევან აბაშიძე), შესაძლებელი გახდა ტყვეთა სყიდვის წინააღმდეგ კმედითი ზომების განხორციელება; ეს უკანასკნელი უშუალოდ იყო დაკავშირებული გარეშე შტრის დათრგუნვასა და ფეოდალთა დამორჩილებასთან; ახლა იმერთა მეფის სახელმწიფო ბექედის დამამკირე-

¹ ევლია ჩელების „მოგზაურობის“ წიგნი, ნაკვ. I, ქართული თარგმანი გ. ფუთურაძისა, თბ., 1971, გვ. 332.

² იქვე.

³ იქვე.

⁴ იქვე, გვ. 335.

⁵ Акты, т. I, стр. 58.

ბელი წარწერა სოლიმონ დიდის მიერ უკვე სულ სხვაგვარად იყო შეცვლილი:

„...ლომებრ მყეფე, მტერთ სისხლმჩქეფე, იმერთმეფე“.¹

მაგრამ სანამ ეს პერიოდი დადგებოდა, ჯერ კიდევ ბევრი დრო უნდა გასულიყო და დასაძლეთი საქართველოს მშრომელ მოსახლეობას კიდევ დიდხანს უნდა განეცადა თავისი მძიმე ხვედრი.

XVIII საუკუნის პირველ ნახევარში აღამიანებით ვაჭრობა უკიდურეს საზღვარს მიაღწია, ტყვეებს (აღამიანებს) ყიდდნენ ყველანი: მეფეები, მღვდელთმთავრები, მთავრები, თავადები, აზნაურები და გაყაზახებული გლეხებიც.

„იყო ესე ალექსანდრე მეფე (1683—1695 წწ.) მხნე, ახოვანი, ჰაეროვანი, და უხვი, არამედ ხელად მქცევი, ცუნდრუკი, ულთო ტყვის მსყიდველი“.²

ხოლო გურიელი მამია, თუმცა იყო მეფედ (1701—1702 წწ.), „ჰყიდდა ტყვეთა გურულთა და აძლევდა იმერთა“.³

გიორგი აბაშიძის მეფობის დროს (1702—1707 წწ.) იმერეთში „ვერაჳინ იკადრებდა განყიდვად ტყვისა, თვინიერ მისსა“.⁴

„ოდიშს და გურიას იყიდოდა ტყვენი ფრიად და უმეტეს ოდიშს ლიბარტიანისაგან“.⁵

გაბრიელ ჰყონდიდელი იყო „უღვთო, მეძაჳ-მემრუშე, სოდომია, და ტყვის მსყიდველი და საესე ბოროტითა“.⁶

სვიმონ ქუთათელი მღვდელმთავარი იყო, მაგრამ „ტყვის მსყიდველი, მეძაჳ-მემრუშე, კაცის მკლუელი, სარუ-ფიც, უწირაჳ-ულოცაჳი“.⁷

ხარაგაულელი აზნაურები კიკნაძეები XVIII საუკუნის 40—50-იან წლებში ტყვის მსყიდველთა ბრბოს მეთაურობდნენ და არა მარტო იმერეთს, ქართლის სოფლებსაც იკლებდნენ.

გლეხები — ბურჯანაძეები დიდი ხნის განმავლობაში დაუსჯელად მონაწილეობდნენ ტყვის სყიდვაში.

ტყვე დასავლეთ საქართველოში თანდათან უმთავრესი საქონელი გახდა. ტყვეებში ამოგებული ფულით იძენდნენ იარაღს, სამკაულს, ტანისამოსს, ისტუმრებდნენ სამეფო თუ სამთავრო ხარჯებს, იხდიდნენ სახონთქარო ხარკს, იძლეოდნენ ქრთამს.

¹ იოანე ბატონიშვილი, კალმასობა, თბ., სახელგამი, გვ. 288.

² მასალები საქართველოს ისტორიისათვის..., თბ., 1905, გვ. 137.

³ იქვე, გვ. 141.

⁴ იქვე, გვ. 150.

⁵ იქვე, გვ. 157.

⁶ იქვე, გვ. 161.

⁷ იქვე, გვ. 167.

ალექსანდრე მესხეთის მეფობის (1721—1752 წწ.) დროინდელ ერთ-ერთ საბუთში ვკითხულობთ: „თათრის ვალი დაგვედვა ცხრას და ჩვიდმეტი მარჩილი, მერმე იმ ჩვენმა მოვალე თათარმა დაგვიჭირა, ცუცხვათელმა თათარმა: ვიკარგებოდით და რაჯული გვეშლებოდა. ... გაურჯულებას მამულის გაყიდვა ვარჩიეთ“¹.

ზემოთ აღნიშნული ნათელ წარმოდგენას ქმნის იმდროინდელ სოციალურ-ეკონომიკურ და პოლიტიკურ ვითარებაზე.

ტყვეთა სყიდვა რომ საყოველთაო მოვლენა იყო, ამას ადასტურებს მამია გურიელის საფიცარი წიგნი², გურიაში ტყვეთა სყიდვის აღკვეთის შესახებ დადებული.

დავით გარეჯის ნათლისმცემლის უდაბნოდან გურიაში მივლინებული ბესარიონი, რომელსაც ევალებოდა გურიელისათვის ტყვეთა სყიდვის აღკვეთის შესახებ საფიცარი წიგნის ჩამორთმევა, მართლაც მიიღებს საბუთს, რომელიც წარმოადგენს მამია გურიელის მიერ დადებულ ფიცს. იგი, ერთი მხრივ, მიუთითებს ტყვეთა სყიდვის ძირითად მიზეზებზე და, მეორე მხრივ, ცხადყოფს ზოგიერთი საეკლესიო ორგანოს ცდას, მიმართულს ამ ბოროტების აღსაკვეთად.

ეს საბუთი ნათლად გვიხატავს იმდროინდელი გურიის სამთავროს ეკონომიკურ მდგომარეობას — ადამიანი საექსპორტო საგნად არის გადაქცეული, რომ მთავრები ტყვეთა სყიდვას ზოგჯერ აწარმოებენ სასმელ-საჭმელის მოსაპოვებლად.

მამია გურიელი არ იძლევა მთლიანად ტყვეთა სყიდვის გადაგდების პირობას, „ჩემმა საბატონოს კაცმა ტყვე ველარ გასყიდოს და ჩვენც ეს აღთქმა დაგვიც დღეს ამას აქეთ ჩვენთვის საქონლად და სასარგებლოდ, რომ მოიხმარებოდეს და ან სასმელ-საჭმელში და ჩვენ აღარ გავსყიდოთ... რაც ხვანთქრისა და ვეზირისა მართებულია და საგრძნობელი შემოგვივარდეს, რომ მტრისაგან არ ვიჩაგრებოდეთ ან ქვეყნის შემოსავლები საქმე მოგვიხდეს თვარა მას გარეთ ეს ასე გავითაოთ ამ ქვეყნის ტყუეზედ“. აქედან ნათლად ჩანს, ტყვეთა სყიდვის აკრძალვა მთლიანად შეუძლებელია ოსმალეთის მძლავრობის გამო და ეკლესიაც იძულებულია, ამ ფაქტს შეურიგდეს. ამავე დროს, საბუთში ნათლად ჩანს, რომ ადამიანთა მოტაცება გასაყიდად ან გადასაცვლელად ხდებოდა უმთავრესად არა მარტო უცხოეთიდან მოტანილი ფუფუნების საგანთა შექმნის მიზნით, არამედ „ხვანთქრისა და ვეზირისა“, ე. ი. დამპყრობელი მეზობლისათვის ხარკის გადასახდელადაც. ეს უკანასკნელი ისეთი

¹ საქ. ცენტრარქივი, ფ. 227, № 55.

² საისტორიო მოამბე, წიგნი 1, ტფ., 1925, გვ. 183.

ძალა იყო, რომ გურიელი უარს ვერ ეტყოდა, თუნდაც ყველა ღმერთი და წმინდანი აჯანყებოდა.

ქრონიკებში აღნიშნულია, რომ მოტაცების გარდა, ყმებს ტყვეებად ქართველი ფეოდალებიც ჰყიდდნენ „საქონლად და სასარგებლოდ რომ მოიხმარებოდეს და ან სასმელ-საჭმელშიდა“ და „ყიდდენ მოპარულ მეზობლებსაც“¹.

1714 წელს კუნძულ მალტაზე ყოფნის დროს სულხან-საბა ორბელიანმა ნახა ქართველი ტყვეები: „ზოგი აფხაზი, ზოგი იმერელი, გურული და მეგრელი, რომლებიც მალტელებს მამპადიანებისათვის წაერთმიათ². იმავე წელს ხოფაში საბამ ნახა, რომ „თათრებს იმერეთიდან ტყვეები მიჰყავდათ კონსტანტინეპოლს გასასყიდად“³.

შავი ზღვის სანაპიროზე ცხოვრება გაჭირდა, განსაკუთრებით აქტიურობდნენ გამამპადიანებული აფხაზი ფეოდალები. ვახუშტი ბაგრატიონის ცნობით, „აფხაზები დაუხვდებიან ოსმალთა ნავთა და ლაზ-ქანთა და უფროსად ოდიშ-გურიასა“. აფხაზ მეკობრეებს თურქებიც კი უფროსობდნენ. 1715 წელს ქანმა მენავემ სულხან-საბა ორბელიანი ქობულეთში არ წამოიყვანა: „გურიას ხომალდს ველარ წამოვიღებ, აფხაზი აშლილია, მეშინიან“⁴.

კაპიტან დე გრაი დე ფუას ცნობით, ლეკი აბრაგები, რომელნიც ოცდაათ კაციან ჯგუფებად ერთიანდებოდნენ, საქართველოდან ხალხს იტაცებდნენ, ტყვეებად ყიდდნენ ან ცვლიდნენ სხვადასხვანინეთსა და საქონელზე. მისივე ცნობით, „კარგი ცხენი უფრო ძვირია, ვიდრე ადამიანი“⁵.



როდესაც სოლომონ პირველი (შემდეგში დიდად წოდებული) სამეფო ტახტზე ავიდა (1752 წ.), ადამიანების მოპარვა, მიტაცება და წარტყვევნა ჩვეულებრივი მოვლენა იყო. იმერთა ახალგაზრდა მეფე კარგად ხედავდა, რომ, თუ ამ უმსგავსოების წინააღმდეგ ზომებს არ მიიღებდა, სამეფოს საძირკველი ერღვეოდა

¹ ქრონიკები, ტ. III, თბ., 1967, გვ. 110.
² სულხან-საბა ორბელიანი, მოგზაურობა ევროპაში, თბ., 1940, გვ. 129.
³ იქვე, გვ. 149.
⁴ იქვე.
⁵ კაპიტან დე-გრაი დე-ფუა, გრაფ ტოტლენის ექსპედიცია საქართველოში, ახალციხის რაიონული გაზეთი „წითელი დროშა“, 1964, № 109.

და ხალხის საუკეთესო და ჯანსაღი ნაწილი უცხოეთში იკარგებოდა.¹ ამიტომ სოლომონ მეფემ ტახტზე ასვლისთანავე „ტყვეების თურქებისათვის მიყიდვა ყველა თავის ქვეშევრდომებს მკაცრი ჯარიმით და თვით სიკვდილის სასჯელით აუკრძალა“². ფეოდალთა იმ ნაწილის წინააღმდეგ, რომელიც უარს ამბობდა ამ ბრძანების შესრულებაზე, სოლომონ მეფე „მიმართავდა ხან სიმკაცრეს, ხან ძალას“³. ამ ღონისძიებამ ნაწილობრივ გამოიღო შედეგი. საქირო იყო უფრო მკაცრი ღონისძიება. ამისათვის სოლომონის ინიციატივით, მითითებით და ხელმძღვანელობით 1759 წლის 5 დეკემბერს (საეკლესიო კრების მეორე დღის სხდომაზე) დასავლეთი საქართველოს (გარდა აფხაზეთისა) საეკლესიო და საერო ფეოდალების გაერთიანებულმა კრებამ დადგენილება გამოიტანა ტყვის სყიდვის აკრძალვის შესახებ. საერო და სასულიერო პირებმა პირობა დადეს, რომ ამიერიდან ტყვეს აღარ გაყიდნენ, ხოლო ვინც კანონს არ დაემორჩილებოდა, ეკლესია მას შეჩვენებით, ხოლო მეფე სიკვდილით დასჯით დაემუქრა.

კრების მონაწილეებმა კოლექტიური პირობა დადეს — „სანამ სული გვიდგას, ეს საქმე ჩვენგან არ იქნეს, არც ამაშიდ ერთმანეთს უსუსტოთ, კიდევ ერთმანეთს მიუდგეთ, კიდევ მეფე სოლომონის მორჩილი და ბრძანების აღმასრულებელი ვიქნეთ“⁴.

დადგენილება თანდათანობით ხორციელდებოდა — ტყვის სყიდვას მოკლე დროში უკვე ახსენებდნენ, როგორც წარსულის მოვლენას. მაგალითად, 1764—1770 წლებში ზაალ გურიის ერისთავისათვის მიცემულ პირობის წიგნში. მისი ყმები აღნიშნავენ, რომ „ავის დროვობისაგან და ქვეყნის არეულობისაგან ტყვის ყიდვა ყოფილიყო“⁵.

აქვე უნდა აღვნიშნოთ, რომ ტყვეთა სყიდვა ძირფესვიანად მაინც არ აღმოფხვრილა, თვით სოლომონ მეფეც აღიარებს, რომ მისმა ღონისძიებამ ტყვეთა სყიდვის შესახებ მიზანს მხოლოდ ნაწილობრივ მიაღწია. 1768 წელს ეკატერინე II-ისათვის გაგზავნილ მიმართვაში სოლომონ პირველი წერდა, რომ ხვანთქრის სერასკირებსა და ფაშებს მისგან მრავალგზის უთხოვიათ ტყვის ხარაჯა და ტყვე და როცა არ მიუცია, ძალით წაურთმევიათ.

¹ დოკუმენტები საქართველოს სოციალური ისტორიიდან (XV—XVIII სს.), თბ., 1940, გვ. 157.

² სიგელ-გუჯრები, ტ. I, გვ. 15 (რუს.).

³ იქვე, 34. (რუს.).

⁴ იქვე, ტ. I გვ. 57—58 (რუს.).

⁵ ე. თაყაიშვილი, საქართველოს სიძველენი, ტ. II, თბ., 1909, გვ. 521—522.

სოლომონ მეფის მიერ მიღებულმა ღონისძიებამ ტყვეთა სყიდვის წინააღმდეგ იმას მიაღწია, რომ ადამიანების გაყიდვა მხოლოდ თვით იმერეთის შიგნით ხდებოდა. მაგალითად: 1777 წელს მერაბ ლორთქიფანიძე პირობის წიგნს აძლევს მაქსიმე კათალიკოსს — „ტყვის გაყიდვისათვის გამიწყერით და კიდევ შემაჩვენე... ის ტყვე ისევ თქვენ მოგართვით... მერმე თქვენ ტყვის გაუყიდველობის პირობა გვთხოვეთ და მე ასე პირობა მომირთმევია: ჩემს სიცოცხლეში ქრისტიანი კაცის შვილი არც მიყვილო თათარს, არც სხვა ურჯულო-კაცსა... და ვეგების დიდის გვიკრებვისათვის ჩემს მეზობელს ან ჩემი ქვეყნის კაცს გლახობით მიყვილო და ან ცოლ-ქმარი, სხუა ამის გარდა ჩემგან საუსჯულებთ ტყვე არ გაიყიდოს... თუ ვისმე ჩემის ქვეყნის კაცს მიყვილო იმასაც პირობა დავადებინო, რომ უსჯულოს ხელში არ ჩავარდეს“.¹

ანალოგიურ პირობის ფიცს აძლევს „ურჯულოზე“ ტყვის გაუყიდველობის შესახებ იმერეთის კათალიკოსს გიორგი გურიელი 1777 წელს.²

როგორც ზემოთ აღნიშნულიდან ჩანს, ქრისტიანის გაყიდვა მაჰმადიანზე დაგმობილია. ამასთან ერთად, ისე, როგორც აღმოსავლეთ საქართველოში, იმერეთის სამეფოშიც ყმის გაყიდვა მხოლოდ ორი პირობით შეიძლება — ან ცოლ-ქმარი ერთად, ან მამაკაცი გლახად. ორივე ეს ღონისძიება მიმართული იყო ყმა-გლეხების ოჯახის შენარჩუნებისა, მიწათმოქმედთა გამრავლებისა და მიწაზე მიჩაჭვისაკენ.³

საქართველოში ხშირი თარეშებისა და ომების შედეგად შემოღებული იყო ტყვეთა გამოსაყიდად დაწესებული ბეგარა. ამ ბეგარას „სატყვეო“ ეწოდებოდა. იგი იკრიბებოდა როგორც ომის დროს, ისე თარეშების მეოხებით ტყვედჩაყვარდნილთა გამოსაყიდად. ეს ბეგარა, როგორც ჩანს, საკმაოდ დიდი რაოდენობით იკრიბებოდა. 1722 წელს გაცემული სიგელით ვახტანგ მეექვსემ თბილისელი მოქალაქეები, წარჩინებული ვაჭრები და ქეთხუდები⁴ სატყვეო ბეგარის გაღებისაგან გაათავისუფლან⁵. ეს იმას არ ნიშ-

¹ ს. კაკაბაძე, დასავლეთ საქართველოს საეკლესიო საბუთები, წ. II, თბ., 1921, გვ. 60.

² იქვე, გვ. 59—60.

³ შ. ბურჯანაძე, დასახ. ნაშრ., გვ. 93.

⁴ ქეთხუდა (სპარსული) — სოფლის მამასახლისი; ხელოსანთა ამქრის ხელმძღვანელი; უბნის უფროსი; გვარის ან ტომის მეთაური; სამეურნეო საქმეთა მწარმოებელი.

⁵ АКТЫ, т. VII, г. II, 772.

ნავს, რომ ტყვეებით ვაჭრობა შეწყდა. პირიქით, მას XIX საუკუნის მეორე ნახევარშიც ჰქონდა ადგილი, მოთარეშე ლეკები არა მარტო ადამიანებს იტაცებდნენ, არამედ გაწყობილ გუთნეულსაც კი.¹

მიუხედავად იმისა, რომ სახელმწიფო ყოველნაირად კრძალავდა ტყვეებით ვაჭრობას, მეფე მაინც იძულებული გახდა, გარკვეულ იურიდიულ ნორმებში ჩაეყენებინა ეს მოვლენა — ვახტანგ VI-ის „დასტურლამალი“ გარკვეულ ბაჟს აწესებს ტყვეებით ვაჭრობაზე.

„ქართველმან, თათარმან, სომეხმან თუ რამც სჯულმან იმერეთს რომ ტყვე იყიდოს, ტყვის თავს მსყიდველს სამს მინალთუნს საბატონოდ გამოართმევდნენ, თუ ქართლში გადმოიყვანეს და აქ გაისყიდა, ან აქაური ერთმანეთს მიჰყიდეს, სამ მინალთუნს მყიდველი და სამს მინალთუნს გამსყიდველი ბატონს ვერ დააკლებს, ზეითაც დაგვიწერია: და მთაზედ ტყვის გამსყიდველ-მსყიდველთან ხელი არა აქვს ტყვის მებაჟეს“.

საინტერესოა, რომ კანონი პირდაპირ მიუთითებს იმერეთზე, როგორც ტყვეების შესასყიდ ქვეყანაზე, რაც ნათლად ადასტურებს, თუ რამდენად ყოფილა გავრცელებული დასავლეთ საქართველოში ტყვეთა სყიდვა.

ერეკლე II-ის ინიციატივით 1789 წელს შეიქმნა სპეციალური თანხა ლეკთა მიერ წარტყვევნილ და დაღესტანსა და ირანში გაყიდული ქართველების გამოსასყიდად. სახელმწიფოს მიერ გამოსყიდულ ტყვეებს წინანდელი წოდებრივი მდგომარეობა უბრუნდებოდათ, მაგრამ კერძო პირის მიერ გამოსყიდული ტყვე უნუგეშო მდგომარეობაში ვარდებოდა, რადგან მყიდველს, რომელმაც იგი თურქთაგან გამოისყიდა საკუთარი სურვილისამებრ შეეძლო მოპყრობოდა, როგორც ნივთს. იყო შემთხვევები, როცა გაყიდულ ქართველ ტყვეს თავი დაუღწევია მონობისათვის და მნიშვნელოვან სამხედრო ან ადმინისტრაციულ თანამდებობამდე მიუღწევია ან სამშობლოში დაბრუნებულა.

მუსულმანურ ქვეყნებში (როგორც იყო ეგვიპტე, სირია, თურქეთი, ირანი, ყირიმი და სხვ.) გაყიდული ტყვეების უმრავლესობა მონებად იქცეოდა ან „იანიჩარისა“ (თურქეთში) და „მამელუკის“ (ეგვიპტეში) ჯარში მსახურობდა, ხოლო ქალები ბეგების, ხანების, ფაშების, სერასკირების და სხვათა ჰარამხანებს ამშვენებდნენ ან საოჯახო მონობაში იმყოფებოდნენ.

¹ იესე ოსესშვილი, თავდასავალი. ს. კაკაბაძის რედაქციით. ტფ., 1913, გვ. 77.

მამელუკები და იანიჩრები, რომელთა შორის ბევრი იყვნენ ქართული წარმოშობისა, ზოგჯერ ვეზირებად, მსაჯულებად და ელჩებად მუშაობდნენ და სახელმწიფოს სხვადასხვა მაღალსფეროსა და თანამდებობას უძღვებოდნენ. მამელუკები ყოველწლობით სპეციალურ აგენტებს აგზავნიდნენ საქართველოში ქართველი ბავშვების შესასყიდად, რათა ისინი ერთგულ მეომრებად აღზარდათ.

როგორც ითქვა, თურქეთის იანიჩართა ჯარში ბევრი ქართველი და სხვა კავკასიური მოდგმის ყმაწვილი ითვლებოდა, ასევე სპარსეთის ყულას ჯარშიც.

საქართველოს მოსაზღვრე თურქეთის ფაშები და სერასკირები, რომელნიც თავზარს სცემდნენ ამიერკავკასიის, კერძოდ, საქართველოს დაქუცმაცებულ სამეფო-სამთავროებს, აშკარად მოითხოვდნენ ტყვეებით ვაჭრობის თავისუფლებასა და ილაშქრებდნენ საქართველოში მისი აკრძალვისაკენ მიმართულ ღონისძიებათა წინააღმდეგ.

კაცი შეუიარაღებლად სამუშაოზე გასვლას ვერ ბედავდა, ხალხი ღროის უმეტეს ნაწილს გამაგრებულ ადგილებში ატარებდა, გათავხედებული ლეკები ხშირად ქალაქებსაც კი ესხმოდნენ თავს. დავით გურამიშვილი წერს:

„მოისრა ხშირი ქვეყანა, გახდა ვერანად, ტრამლადა
სულ წარიტაცეს, თუ ვინმე შამბში მიურჩა წამლადა;
დადედლებულნი შიშთაგან აღარ ვარგოდნენ მამლადა,
აღარვინ დარჩა ფარსაგი პატრონად, ქვეყნის მამლადა“.

• • •

იმერეთის მეფეებს, გურიის, სამეგრელოსა და აფხაზეთის მთავრებს დამპყრობელი ქვეყნისათვის პერიოდულად და ერთდროულად გადასახდელი ხარკი ხშირად ადამიანთა განსაზღვრული რაოდენობით უნდა გადაეხადათ და თავიანთი მოთხოვნილების დასაკმაყოფილებლად საჭირო უცხო საქონელი ტყვეებზე გადაცვლით შეეძინათ.

• • •

სამწუხაროდ, წინა საუკუნეების მემკვიდრეობა უცვლელად მიიღო მე-18 საუკუნემაც. უფრო მეტიც, იგი გაგრძელდა მე-19 საუკუნის პირველ მეოთხედშიც.

საქართველოში რუსეთის დამკვიდრების შემდეგაც პირველ ხანებში ისევ გრძელდებოდა ხალხის ტყვევნა-მოტაცება. რუსეთის ხელისუფლებამ ვერ შეძლო აღეკვეთა ლეკების თარეში.

1803 წელს ციციანოვმა ახალციხის სელიმ-ფაშა ხიმშიაშვილს აცნობა, რომ „იმერეთი და გურია შევიდნენ რუსეთის პროტექტორობაში და ამიერიდან ნულარ დაუშვებთ ტყვეთა სყიდვას“¹. სელიმი ამ მიმართვაზე ფორმალურად თანახმა იყო, მან ოფიციალურად მიმართა დაღესტნის ხანებს, მმართველებს, მოლებს, ბელადებს, რაზმთა ხელმძღვანელებს და მთელ ხალხს, რომ ამიერიდან ისინი აღარ გადმოსულიყვნენ ახალციხეში და აღარ ეწარმოებინათ თავდასხმები საქართველოზე². ეს მხოლოდ სიტყვიერი თანხმობა იყო, რეალურად სელიმს ლეკთა რაზმების გარეშე ცხოვრება არ შეეძლო. ისინი ძველებურად დათარეშობდნენ საქართველოში.

რუსი ოფიცერი ლოპიკი 1806 წელს წერდა, რომ სოფლის მოსახლეობას, რომელიც თავს აიძვებდა რუსეთის ჯარი უზრუნველგეყოფს ლეკებისაგანო, ვერ გაუმართლდა იმედები, მათი თარეშები არ წყდება. ამ ბარბაროსებს ძველებურად მოაქვთ უბედურება საქართველოს ხალხისათვისო.

XIX საუკუნის დასაწყისში იმერეთის მეფე, გურიისა და სამეგრელოს მთავრები ხშირად ეომებოდნენ ერთმანეთს, რის გამოც მოსახლეობა აწიოკებას და ტყვევნას განიცდიდა, მაგრამ ზოგჯერ მშვიდობიანობის დროსაც ჰქონდა ადგილი ადამიანთა გატაცებას.

1804 წელს რუსი დიპლომატი ლიტვინოვი სამეგრელოს მთავრის შესახებ წერდა: „მაშინაც კი, როდესაც მთავარს ომი არა ჰქონდა რომელიმე მეზობელთან, მის სამთავროში მშვიდობიანობა არ იყო. ქვეყანას ამ დროსაც იკლებდნენ მტაცებლები, რაშიც მონაწილეობას იღებდნენ არა მარტო უპირველესი თავადები, არამედ ჯველაზე მეტად დადიანის მკვიდრი ძმებიც კი... და ეს ხდებოდა იმის გამო, რომ დადიანის ხელისუფლება იმდენად დაეცა, რამდენი ვერ ბედავდა ბოროტების დასჯას, ბრძანების გამოცემასაც კი. რომელიც არასასიამოვნო ან საზარალი იქნებოდა იმ თავადებისათვის, რომლებიც ტყვეებით ვაჭრობდნენ“³. დადიანს ყოველთვის უნდა მოეთმინა, რადგან ხშირი უთანხმოება ჰქონდა აფხაზეთის მთავართან (ანაკლიის გამო) და იმერეთის მეფესთან (ლეჩხუმის გამო) და ომის დროს ეშინოდა თავისი თავადების

¹ კაკა, ტ. 11, გვ. 896 (რუს.).

² იქვე, გვ. 898 (რუს.).

³ იქვე, გვ. 803 (რუს.).

ორგულობისა, თუ ამ უკანასკნელთ აწყენინებდა, ისინი ადვილად გადავიდოდნენ მოწინააღმდეგის მხარეზე.

ტყვეებით ვაჭრობა იმდენად დიდ მოგებას იძლეოდა, რომ იმერეთის მეფის სოლომონ II-ის ბრძანებას ტყვეთა სყიდვის აკრძალვის შესახებ დადებოთი შედეგი არ მოპოვოდა, ხოლო ამავე პერიოდში — 1804 წელს სამეგრელოში გამოიცა ბრძანება, რომლის თანახმად ტყვეების გამყიდველები დაისჯებოდნენ რუსეთის კანონთა მიხედვით, ე. ი. მთელი ოჯახის წევრებთან ერთად სიკვდილით. მაგრამ ტყვეებით მოვაჭრეებმა თავი ფოთის ციხესიმაგრეს შეაფარეს, რომელიც თურქებს ჰქონდათ გამაგრებული და შიგ მრავალრიცხოვანი გარნიზონი ჰყავდათ ჩაყენებულნი. ამდენად, ბრძანება ტყვეებით მოვაჭრეებზე ნაკლებად მოქმედებდა. 1805 წელს პეტერბურგში გაგზავნილ მიმართვაში ციციანოვი ნებას ითხოვს: „სამეგრელოში ტყვეებით ვაჭრობის საბოლოო აღაგმვისათვის, ფოთში გადსახლებულ ტყვეებით მოვაჭრე აზნაურებს, რომელთაც მამულები აქვთ დადიანის სამფლობელოში — სამეგრელოს ტერიტორიაზე — და რომელნიც აქ მოსავლის ასაღებად მოსულნი, გაბრუნებისას ტყვეებს იტაცებენ, უნდა ჩამოერთვათ დადიანის სასარგებლოდ ეს ადგილ-მამული; დაპატიმრების შემთხვევაში ისინი უნდა გადაეცნენ სამხედრო სასამართლოს დასასჯელად“.

როდესაც 1809 წელს რუსეთის არმიამ ადგილობრივი მთავრების (დადიანი, გურიელი, შერვაშიძე) დახმარებით ფოთი აიღო, საქართველოს მთავარსარდალი ტორმასოვი პეტერბურგს სწერდა, რომ „ფოთის აღებით აღიკვეთა ყოველგვარი ბოროტება, რომელიც აქამდე არსებობდა ქრისტიანი ტყვეების გაყიდვის სახით; მათი წარტყვევნა ხდებოდა იმერეთიდან, გურიიდან და სამეგრელოდან, მიჰყავდათ ისინი გასაყიდად ირანში, თურქეთში და ეგვიპტეში“.¹

ფოთის აღების შემდეგ ტორმასოვი პეტერბურგში გზავნის ახალციხის აღების გეგმას, რომელიც იმპერატორმა „დიდად მოიწონა“, რის გამოც გენერალი ბარკლაი დე ტოლი 1810 წელს ტორმასოვს მიუთითებდა, რომ საჭირო იყო ახალციხის საფაშოს მალე აღება, რათა მომავლისათვის მისი შემეგობით აღკვეთილიყო ყველა საშუალება საქართველოში ლეკთა, ოსთა, თვით ირანელთა თარეშებისათვის.

მაგრამ, ფოთის აღებამ ტყვეთა ვაჭრობა ვერ შეაჩერა. ამ პერიოდში სამეგრელოს დედოფალი საჩივრის წერილს უგზავნის საქართველოს მთავარმართებელს, სადაც წერს, რომ მეგრელი თა-

¹ კაკა. ტ. IV. გვ. 1159. (რუს.).

ვადები გიორგი და ბეჟან მხეიძეები გამუდმებით ჰყიდიან ქრისტიანებს თურქებზე და ურწმუნოებზე. როდესაც 1812 წელს ბეჟან მხეიძე დაატყვევეს, დასჯის ნაცვლად გენერალმა ორბელიანმა იგი გაათავისუფლა, „რომელიც თავისი მოქმედებით სიკვდილით დასჯას იმსახურებსო“ — ჩიოდა სამეგრელოს დედოფალი¹.

თურქეთისათვის ფოთის ციხის იძულებითი დაბრუნების შემდეგ 1813 წელს ფოთისა და ანაკლიის დაბრუნებით გათამამებული თურქები აქეზებდნენ აფხაზებს ტყვეებით ვაჭრობისაკენ.

რუსი გენერლების 1814 წლის მიმოწერაში აღნიშნულია, რომ „ამჟამად ფოთში მყოფი სერასკირი სეიდ-სულეიმან-ფაშა და ახალციხელი სელიმ-ფაშა (ხინჯიაშვილი) აქტიურ მონაწილეობას იღებენ დასავლეთ. საქართველოდან გატაცებული ადამიანებით ვაჭრობაში“².

1811 წლის ერთ ცნობაში აღნიშნულია, როცა ფოთი, ანაკლია და სოხუმი თურქეთის ხელში იყო, იმერეთთან, სამეგრელოსთან და გურიასთან მათი ვაჭრობის მთავარ საგანს ბიჭები და გოგოები წარმოადგენდნენ, რომელთაც ისინი (თურქები) ხან ყიდულობდნენ, ხან ცვლიდნენ თავიანთ პროდუქტებზე და ხანაც იპარავდნენ³.

ამგვარად, საქართველოში რუსეთის ხელისუფლების დამკვიდრებამაც ვერ აღკვეთა შავი ზღვის სანაპიროზე ადამიანებით ვაჭრობა, რადგან შავ ზღვასთან მდებარე ციხესიმაგრეები ჯერ ისევ თურქების ხელში იყო.



განსაკუთრებით სავალალო მდგომარეობაში იყო იმერეთის სამეფო. აშდენი უბედურების შემდეგ, 1810—18 წლებში მას თავს დაატყდა შავი ჭირი⁴. ამ სენმა ერთი წლის განმავლობაში (1811 წელს) იმერეთში შეიწირა 32.750 სული, მეზობელ პროვინციებში გაიხიზნა 7450 კაცი, ხოლო ტყვეებად გაიყიდა 2000 ყმაწვილი და ქალიშვილი⁵. შავი ჭირის ტალღა გადავიდა აგრეთვე სამეგრელოსა და გურიაში. ამის მომსწრე ნიკო დადიანი წერს: „წელსა ამას, 1811, გაჩნდა იმერეთსა შინა, ოდიშსა და გურიასა

¹ კ. გუგუშვილი, ტყვეებით ვაჭრობა საქართველოში, „მნათობი“, № 11, 1938, გვ. 175.

² კაკა, ტ. V, გვ. 569, 780 (რუს.).

³ ნ. დუბროვინი, ისტორია (რუს.).

⁴ კაკა, ტ. IV, გვ. 110 (რუს.).

⁵ ნ. დუბროვინი, ისტორია, ტ. IV, გვ. 1—2 (რუს.).

საშინელი მომსვრელი სენი (ე. ა. ქამი) და ამასთან საშინელი და საკვირველი სიყმილი, რომელ უთვალავნი მოისრნენ და მრავალნი განიზნენ, კინილან და შუა გაიყო ყოველნი ქვეყანანი ესე ზემო ხსენებული და მრავალნი წარვიდნენ აფხაზეთად, ვინათგან აფხაზეთსა შინა არა იყო წელსა მას სიყმილი და არცა იგი მომსვრელი სენი და განგრძელდა ესევეითარი რისხვა ღვთისა ორსა წელსა და შემდგომად გარდვიდა, გარნა ქვეყანანი მრავალნი და სოფელნი დაშთენ ოხრად.¹

იმერეთში შავი ჭირისაგან დაღუპულთა ზემოთ ნაჩვენები რიცხვი არასრულია, რადგან ეს ცნობა შეეხება მხოლოდ 1811 წელს, სენი კი 3 წელაწადი გრძელდებოდა, აქ არ შედის გურიასა და სამეგრელოში დაღუპულთა რიცხვი.

შავმა ჭირმა დააზიანა არა მარტო დასავლეთი საქართველო, არამედ ქართლი და ახალციხის მხარე. 1811 წელს ამ სენმა ახალციხეში იმსხვერპლა ერეკლე II-ის კანცლერი სოლომონ ლიონიძე და ცნობილი პატრი ნიკოლა.

შავმა ჭირმა, რასაც შიმშილობაც მოჰყვა, მუსრი გაავლო მოსახლეობას. შიმშილი მშობლებს აიძულებდა, პურის ნატეხისათვის მონად გაეყიდათ თავიანთი შვილები. 1812 წლის ნასყიდობის ბარათში აღნიშნულია „ესე ნასყიდობის წიგნი მოგეცი მე ქრიშობედ კოსტავამ თქვენ, თავადს თარხანს დაეითს, ასე რომ გამიჭირდა და შიმშილით მიკვდებოდა ჩემი შვილი დარიჯანა და მოგყიდე ეს ჩემი შვილი დარიჯანა და ფასიც სრული გამოგართვი, როგორც გული შემიჭერდებოდა და ვინც ამის მოდავე მოგადგეს, პასუხი ჩვენ გავსცეთ. არის ამისი მოწამე და გამრიგე ქაქუჩა პაპიძე, ამირეჯიბი, მოურავი სიმონა, მე მღვდელს დაეითს დამიწერია ამ ქრიშობელას სიტყვით და მოწამე ვარ ამ წერილისა“².

იმავე 1812 წელს გაცემული ნასყიდობის ბარათით პ. ჭანტურიძე და მისი მეუღლე მარიამი ნასყიდობის წიგნს აძლევენ იოსებ ციხისთავიშვილს და მის ნაშეერთ: „ასე რომა გამიჭირდა და შერილი მოგყიდე... თევდორე და ფასიც სრულად ავიღე, როგორც გული შემიჭერდებოდა.. მოგცეს და გიბედნიეროს ღმერთმა. ამაში მოდავე და მოლაპარაკე არავინ გყავდეს“. ციხისთავს ამ საბუთისათვის მიუწერია: „როგორც გადმოცემიდან ვიცი, ეს კაცი უყიდათ ექვს კოდ ფეტვად, რადგან იმ დროს პურძვირობა ყოფი-

¹ ნიკო დადიანი ქართველთ ცხოვრება, თბ., 1962, გვ. 203.

² საქ. მუზეუმის ხელნაწ. საბუთი № 2842.

ლა... ეს ნასყიდი კაცი სიკვდილამდის ემსახურებოდა ჩემს მამა-პაპას და გამოცვლილს სახელს ბუკველას ეძახდნენ¹.

1817 წელს გენერალი ერმოლოვი იძულებული გახდა, ელიარებინა, რომ: „ამ ხალხის მიერ ორი წლის განმავლობაში განცდილ იმ უბედურების შემდეგ, რაც მას ეწვია მტერთა შემოსევის, შინაური აჯანყების, არაჩვეულებრივი წყალდიდობის, შიმშილობისა და ჯამის შედეგად, საჭიროა საკმაო დრო, რომ უამისოდაც ღარიბმა ხალხმა შეძლოს თუნდაც საშუალო მდგომარეობამდე მიღწევა. განსაკუთრებით შიმშილმა და ჯამმა ამოწყვეტა თითქმის შესამედი იმერეთის მოსახლეობისა, მეორე მესამედზე მეტმა სიცოცხლის შენარჩუნებისათვის თავი შეაფარა თურქეთის სამფლობელოებს და გაიფანტა საქართველოს სხვადასხვა ადგილებში“².

ერმოლოვი წერს, რომ „მამები პურის ნატეხებისათვის ჰყიდდნენ შეილებს სამულდამო მონღბაში, ხოლო სასოწარკვეთილი დედები ტყეში და გზებზე აგდებდნენ შიმშილისაგან დაუძლურებულ თავიანთ ბავშვებს“³.

ამ შემადრწუნებელ უბედურებას თან სდევდა ლეკების განუწყვეტელი თარეში. 1817 წელს გენერალი ერმოლოვი ბარონ სტროგანოვს — რუსეთის სრულუფლებიან მინისტრს კონსტანტინოპოლში, სწერდა, რომ ყარსის, ახალციხისა და ტრაპიზონის ფაშები აწყობენ განუწყვეტელ თარეშს ჩვენს მიწებზე, ეწვეიან მტაცებლობას, ატყვევებენ და მიჰყავთ მოსახლენი, მიაქვთ მათი ქონება და იქამდეც კი მიდის მათი თავხედობა, რომ თავს ესხმიან ჭარისკაცებს და იტაცებენ მათ: თავიანთთან იწვევენ და თავშესაფარს აძლევენ ლეკებს, ჩვენი ქვეშევრდომი ოლქების მცხოვრებლებს და აქეზებენ მათ ძარცვა-გლეჯისათვის. ისინი დაასახლეს ჩვენი საზღვრების მახლობლად, რის გამოც არ არის მოსვენება და მყუდროება⁴ — იგი ავალებს სტროგანოვს, ყოველივე ეს აცნობოს პორტას.

1819 წელს სტროგანოვი აღნიშნავს, რომ უშედეგოა ყოველი მისი ცდა, რათა სულთანს შეასმინოს რუსეთის მოსაზღვრე ფაშების თავგასულობა: „არა მაქვს არავითარი იმედი, მივალწიო პორტაში რაიმე წარმატებას ჩემი დარიგებოთ“⁵. შემდეგში როცა რუ-

¹ საქ. მუზეუმის ხელნაწ. საბუთო № 11ა კოლექციისა, № 2987.

² იქვე.

³ იქვე.

⁴ იქვე, № 2989.

⁵ იქვე, № 2991.

სეთის იმპერატორმა მიმართა თურქეთის მთავრობას ამ უწყისობათა შესახებ, უპასუხეს: „მოვლენები, რომლებიც ხდება აზიელ მცხოვრებთა შორის, გამოწვეულია უსახსროდ დარჩენილ ადამიანთაგან, რადგან რუსეთი უფრო და უფრო აგვიანებს საზღვრების დაკლას, ასეთი ადამიანები სარგებლობენ ამ შემთხვევით, რომ აწარმოონ ძარცვა-გლეჯა, ხოლო როდესაც ეს საზღვრები სწავსებით დაკლილი იქნება და პორტა იმ მხარეში დანიშნავს თავის მოხელეებს, მაშინ ამ მოვლენებს იგი საბოლოოდ აღკვეთს“. ამრიგად, თურქეთის მთავრობა მოითხოვდა, სწრაფად დაეცალა რუსეთს იმერეთი, სამეგრელო და გურია, რომლებიც პორტას თავის სამფლობელოდ მიაჩნდა, და მხოლოდ ამის შემდეგ ჰპირდებოდა წარტყვევნისა და შემოსევა-თარეშის აღკვეთას, საქართველოს მოსაზღვრე ფაშების მოთვინიერებასა და ახალციხიდან ლეკების განდევნას. საგარეო საქმეთა მინისტრი ნესელროდც ატყობინებს ერმოლოვს, რომ თურქეთი მოითხოვს შავი ზღვის სანაპიროების დაბრუნებას და მხოლოდ ამის შემდეგ გვირდება ყოველგვარი თარეშის აღკვეთასო.

თურქეთის მთავრობიდან ასეთი პასუხის მიღების შემდეგ ერმოლოვი თვითონაც აღარ უკრძალავს საქართველოს მოსახლეობას, მოიტაცოს თურქეთის ჯოგები და ადამიანებიც, თუკი ისინი ჩვენს ტერიტორიაზე სათარეშოდ გადმოვლენო.

როგორც ამ ცნობებიდან ჩანს, მოსახლეობას რუსეთთან შეერთების შემდეგაც აწიოყებდნენ დაღესტნელი ლეკები და თურქეთის საფაშოებიდან გადმოსული ყაჩაღები. რათა მკითხველმა წარმოდგენა იქონიოს იმ შფოთიან დროზე, მოვიტანთ თავდასხმის რამდენიმე ფაქტს:

1818 წელს ახალციხელ და აქარელ თურქთა რაზმი იმერეთში შეიპარა და მოულოდნელად თავს დაესხა მახლობელ სოფელს. რაზმი დაეშვა ძალზე დაქანებული მთიდან და შეუმჩნეველად შემოუარა სოფელელთა ყარაულს. ასეთი ყარაულები იმ ხანებში ზაფხულობით დაყენებული ჰყავდათ თურქეთის სამფლობელოებიდან მომავალ გზებზე. მოთარეშებმა გაიტაცეს გლეხთა ოთხი ოჯახი. რომლებიც შედგებოდა 20 მამრისა და 19 მდედრისაგან. ამას გარდა, თავდასხმის დროს მოკლეს ორი იმერელი და ორი მოთარეშე თურქი.

¹ აგელისხევა ქუთაისის, ზღდათის, შორაპლის, ყუდუყის და ანაკლიის ცხელიმარეთა დაკლა უტყუბისაგან.

1819 წელს სოფ. ასკანას თავს დაესხა ახმედ-ბეგ ხიმშიაშვილი, თურქეთის ქვეშევრდომი. იგი შემოიჭრა მთელი რაზმით და გაატაცა რამდენიმე კაცი.

1822 წელს ახალციხელი ყაჩაღების 200-კაციანი რაზმი შემოიჭრა ვაკის მაზრაში (იმერეთში), მაგრამ უკუიქცა, რადგან ადგილობრივი მცხოვრებნი მომზადებულნი შეხვდნენ ამ შემოსევას.

• • •

ტყვეებით ვაჭრობამ კიდევ უფრო მძიმე სახე მიიღო XIX საუკუნის 30-იან წლებში. ამ დროს აფხაზეთის მთავრები ტყვეებით მოვაჭრეთა წამქეზებლები, მფარველნი და მოვაჭრენი იყვნენ, კერძოდ, ჰასან-ბეგ შერვაშიძის ვერაგობის გამო შეუძლებელი იყო აფხაზეთში თავისუფლად გავლა.

1837 წელს დიუბუა წერდა, რომ „სოხუმის მიდამოებში, ჰასან-ბეგის მუხანათობის მეოხებით, მზის ჩასვლის შემდეგ ვერავინ ბედავდა გასვლას ბაზრიდან კარანტინამდე, რომელიც ზღვას ვერსნახევრით იყო დაშორებული“. არა მარტო აფხაზეთში, არამედ შავი ზღვის მთელ სანაპიროზე დიუბუას მოგზაურობის დროსაც ისევე დათარეშობდნენ მეკობრეების გაღერები, როგორც სტრაბონის, ლამბერტისა და შარდენის დროს. დიუბუას გადმოცემით აფხაზ მეკობრეებს გაუძარცვავთ კოდორის კონცხთან სავაჭრო გემი და დაუჭრიათ რამდენიმე კაცი¹. მათი ხელშემწყობი და მფარველი იყო მიხეილ შერვაშიძე (1823—1864 წწ.).

ადამიანებით ვაჭრობას აწარმოებდნენ მეფის რუსეთის სამსახურში მყოფი ქართველი თავადებიც, რომელთაც ყაჩაღთა ბანდები ჰყავდათ და სისტემატურად ვაჭრობდნენ ადამიანებით ფოთში მოსულ მაჰმადიან „კომერსანტებთან“. მაგალითად, 1828 წელს გენერალი სიპიაგინი პასკევიჩს სწერდა: „მაიორი მაჭუტაძე თავისი რაზმით სისტემატურად ესხმის თავს მეგრელებს, ხოლო 31 მაისს მან ტყვედ გაიტაცა 13 კაცი“.²

ადამიანებით ვაჭრობას დიდი გასაქანი ჰქონდა სამურზაყანოშიც. აქაური თავადები ადამიანებს იტაცებდნენ არა მარტო სამეგრელოსა და იმერეთში, არამედ ერთმანეთშიც. ტყვეებათ ვაჭრობდნენ: თემურყვა ანჩაბაძე, დათა ანჩაბაძე, ალ. შერვაშიძე, სესირყვა ემუხვარი, ჯამლეთ მარლანია და სხვანი. მაგრამ მათ

¹ ვააბტა გუგუშვილი, ტყვეებით ვაჭრობა საქართველოში, „მნათობი“, № 11, 1938, გვ. 170—171.

² იქვე, გვ. 171.

დაპატიმრებას და დასჯას თვითმპყრობელობა ვერ ბედავდა, „რადგან თითქმის ყოველ სამურზაყანოელ თავადს, აქვს რა ნათესაური კავშირი აფხაზეთისა და წებელდის თავადებთან, რომ არაფერი ვთქვათ მათ მეზობლებზე, მეტად ადვილად შეუძლიათ, გააღრმავონ უკმაყოფილება ხალხისა და ისარგებლონ რა ხელსაყრელი შემთხვევით, გამოიწვიონ მღელვარება სამურზაყანოში; ხოლო ჩვენს ხელისუფლებას, რომელსაც აქ არა ჰყავს სამხედრო ძალა, მეტად გაუჭირდება აღმოფხვრას ბოროტება და აღადგინოს წესრიგი“¹.

პოლკოვნიკი ბებუთოვი მოითხოვდა სამურზაყანოში რუსის ჯარის შეყვანას, რასაც შეიძლება, შიში გამოეწვია და მყუდროება დამეყარებინა; ამის შედეგად, დასჯის მოშიშარნი ხელს აიღებდნენ ტყვეებით ვაჭრობაზე, ყაჩაღობა-მტაცებლობაზე და ალბათ დაუბრუნდებოდნენ სამეურნეო საქმიანობას².

თვით ტყვეებით მოვაჭრე თემურყვა ანჩაბაძე ბებუთოვს სწერდა, რომ სამურზაყანოში პირდაპირ ჰყვავის ტყვეებით ვაჭრობა, რადგან ამ ქვეყანაში არ არის უფროს-უმცროსობა, დადიანს არ გააჩნია საშუალება მცხოვრებთა მოთვინიერება-დამორჩილებისა და არც შერვაშიძეებს შეუძლიათ, წესიერად განაგონ ეს ქვეყანა. თვითონ შერვაშიძეები, ოთხი ოჯახი, რომელიც აქ სახლობს, ერთმანეთს პარავენ და ურთიერთს იკლებენ. ბეჟან შერვაშიძემ თურქებს მიყიდა ერთი ჩემი კაციო³.

* * *

სხვა კუთხეებთან შედარებით გურიიში უფრო მეტად იყო განვითარებული ტყვეებით ვაჭრობა, რაც თურქეთის უშუალო მეზობლობით აიხსნება. პ. გუგუშვილი აღნიშნავს, რომ იმ ხანებში (XIX საუკ. 30-იან წლებში) უბრალო ქურდობისათვის — საოჯახო ნივთების, ხარის, ცხენის მოპარვისათვის კანონით უფრო დიდი სასჯელი იყო განსაზღვრული. ვიდრე ადამიანებით ვაჭრობისათვის. მაგრამ სასტიკი და უღმობელი იყო ხალხის განაჩენი საქვეყნოდ გამოაშკარავებული ტყვეებით მოვაჭრეების მიმართ — მათ კოცონზე წვაედნენ⁴.

¹ პაატა გუგუშვილი, ტყვეებით ვაჭრობა საქართველოში, „მნათობი“, № 11, 1938, გვ. 180.

² იქვე.

³ იქვე.

⁴ იქვე.

ინტერესმოკლებული არ იქნება, თუ გავეცნობით როგორ ასა-
მართლებდნენ კაცის მკვლელებსა და ტყვეებით მოვაჭრეებს: „გუ-
რიაში (XIX ს. 30-იან წლებში) კაცის კვლისა და ტყვეებით ვაჭ-
რობისათვის, როგორც მძიმე დანაშაულისათვის ბრალდებულის
გამოსატყვევებლად ხშირად მიმართავდნენ ე. წ. შანთისა და მღუღარე
წყლის გამოყენებას. ბრალდებულის სურვილზე იყო დამოკიდე-
ბული ამათში ერთ-ერთის არჩევა. შანთი იწონიდა ოყას (1,2 კგ),
სიგრძით უდრდა ერთ ვერშოკს, ხოლო სიგანით — ადამიანის ხე-
ლის გულის სიფართეს. ამ შანთს სამგზის გაახურებდნენ ვაზის
(და არა სხვა რომელიმე ხის) ანთებული ნახშირით, შემდეგ გახუ-
რებულს დებდნენ მიწაში ჩარკობილ ორ პალოზე. ბრალდებულს
ხელებზე ჩამოაქმევდნენ სათანადოდ გამოკრილ ქალაღს, რომ-
ელზედაც ეწერა მისი ბრალდება. მას ხელები ქვემოდან უნდა
ამოედო და ისე აედო გახურებული შანთი, რომელსაც სამი ნახ-
ტომის შემდეგ დააგდებდა. შემდეგ ხელს უხვევდნენ გურიელის
მიერ ბეჭედდასმული სუღარით და მიყავდათ მახლობელ ციხეში,
სადაც რამდენიმე დღეს დაყოფდა. მერე უსინჯავდნენ ხელს და
თუ იგი დამწვარი აღმოჩნდებოდა. ბრალდებულს დამნაშავედ
იცნობდნენ და დასასჯელად გადაცემდნენ. თუ ხელები დამწვარი
არ ექნებოდა. ათავისუფლებდნენ და ასაჩუქრებდნენ თოფით ან
ტანისამოსით. დამნაშავეს გამოაშკარაებდნენ ეს წესი. აგრეთვე
აღულებული წყალი და ხმალში გასვლა საყოველთაოდ იყო აღი-
არებული, როგორც სიმართლის „უქვეშარიტესი“ გზა¹.

გურიაში იტაცებდნენ არა მარტო ქრისტიან ადამიანებს და
ყილდნენ თურქეთში. არამედ ხშირად იტაცებდნენ თურქებსაც და
ყილდნენ გურიაში, სამეგრელოში, იმერეთში.²

ტყვეებით ვაჭრობა გურიაში მხოლოდ XIX საუკუნის 50-იანი
წლებიდან შენედა. გერმანელი მოგზაურის 1843 წლის ცნობით
გურია თხლად და დასახლებული, რაც შედეგია „თურქთა გამანად-
გურებელი თარეშებისა და ბავშვებით ვაჭრობისა, რაც ახლაც
გრძელდება“³.

• • •

XIX საუკუნის ოციან წლებში იმერეთის ფეოდალები არა მარ-
ტო საკუთარ ყმებს ყილდნენ, არამედ თავისუფალ გლეხებსაც იტა-

¹ ლ. გუგუშვილი, დასახ. ნაშრ., გვ. 182.

² იქვე.

³ იქვე. გვ. 183.

ცებდნენ და ახალციხელ თურქებზე, სხვა ქართველ თავადებზე ყიდდნენ როგორც კანონიერ ყმებს.

1816 წელს გენერალი რტიშჩევი იმპერატორისათვის წარდგინილ მოხსენებაში წერდა: იმერეთის თავადაზნაურობას მიღებული აქვს წესად, რომ „ქარგი ცხენის, თოფის, ფარჩისა და მათთვის საჭირო სხვა საგნისათვის, აგრეთვე მეგობრული საჩუქრების სახით, გასცეს თავისი გლეხი, ხშირად რამდენიმე ოჯახი, მიუხედავად იმისა, რომ ისინი მყიდველებს გაჰყავთ იმერეთის საზღვრებიდან“.¹ იმერეთის მოსახლეობის საზღვარგარეთ გაყიდვა რომ აღეკვეთათ, გენ. რტიშჩევმა იმერეთის თავადაზნაურობას სპეციალური ბრძანებით აუკრძალა ყმების საზღვარგარეთ გაყიდვა. მაგრამ, როგორც ჩანს, მემამულეებმა სხვა გზას მიმართეს, სახელდობრ, თავიანთ ყმებს ებრაელებს აძლევდნენ გირაოდ ვალში, და შემდეგ რაკი ვალს ველარ ისტუმრებდნენ, დაგირავებულ გლეხებს ებრაელებზე ყიდდნენ.²

აკრძალვის კანონი არსებობდა, ბრძანებები იწერებოდა, მაგრამ ტყვეთა სყიდვა თითქმის საგლეხო რეფორმამდე მაინც გრძელდებოდა.

1859 წელს ქუთაისის გენერალ-გუბერნატორი კავკასიის მეფინანსცილის მთავარმმართველობის უფროსთან გაგზავნილ საიდუმლო ბარათში აღნიშნავს, რომ მთელ ქუთაისის გუბერნიაში, განსაკუთრებით კი თურქეთის მოსაზღვრე რაიონებში, გავრცელებულია ცხენის ქურდობა. ტყვეებით ვაჭრობა, კონტრაბანდა და მძარცველობა, რაც ხშირად დაუსჯელი რჩება ადგილობრივი პოლიციის უღონობის გამო. რადგან ცნობილი ქურდები, მძარცველები, კონტრაბანდისტები და ტყვეებით მოვაჭრენი ყოველთვის ნახულობენ დასაყრდენს მოსახლეობაშიო. საპასუხო მომართვაში იმავე 1859 წელს ნამესტნიკის მოადგილე გრიგოლ ორბელიანი მოითხოვს, რომ სასტიკად იქნან დასჯილი და ციმბირში გადასახლებული ის პირები, რომელთაც მძარცველობა, კონტრაბანდისტობა და ტყვეებით ვაჭრობა გადაუქცევიათ კერძო მესარეწეობად და არსებობის საშუალებად.³ ვინაიდან მთავრობამ ვერ აღკვეთა ასეთი უმსგავსოებანი, იძულებული გახდა ტყვეებით ვაჭრობისა და კონტრაბანდისტების წინააღმდეგ საბრძოლველად

¹ კავ. ტ. V. № 568, გვ. 499 (რუს.).

² კავ. ტ. XII, V, გვ. 1339 (რუს.).

³ იქვე. გვ. 49—50 (რუს.).

სპეციალური საყარაულო დაეარსებინა მდინარე ნატანებზე, —
თურქეთში გადასასვლელ ფონთან.¹

* * *

ზემოთ მოტანილი ცნობები ნათლად ადასტურებს, რომ ტყვე-
ებით ვაჭრობას ფართო ხასიათი ჰქონდა თვით XIX საუკუნის
შუა პერიოდამდე.

დასავლეთი საქართველოს მეფე-მთავრები და ფეოდალები
ტყვეთა სყიდვაში არა მარტო თავიანთი უშუალო ინტერესების
დაკმაყოფილებას პოულობდნენ, არამედ მბრძანებელ ოსმალეთსაც
ემსახურებოდნენ და უხვად აწვდიდნენ მის ბაზრებს სანუკვარ
ცოცხალ საქონელს.

¹ კავ. ტ. XII, V, გვ. 1139 (რუს.).

XVI—XVIII საუკუნეების იმერეთის სამეფოს სოციალურ-ეკონომიკური მდგომარეობა

ეკონომიკური მდგომარეობა

XVI—XVIII საუკუნეებში საქართველოს ეკონომიკური მდგომარეობა დიდად განსხვავდებოდა ერთიანობის ხანის საქართველოს ეკონომიკური მდგომარეობისაგან. გარეშე მტრების ხანგრძლივმა თარეშმა არა მარტო შეაჩერა ქვეყნის საწარმოო ძალების განვითარება, არამედ გამოიწვია მათი დაცემა. იმ სხვა მიზეზებთან ერთად, რომელნიც განაპირობებდნენ საქართველოს სამეურნეო-ეკონომიკურ ჩამორჩენილობას, განსაკუთრებული მნიშვნელობა ჰქონდა თურქეთის გაბატონებას მახლობელ აღმოსავლეთში და ირან-თურქეთს შორის ხანგრძლივ ბრძოლებს ამიერკავკასიასა. ქურთისტანსა და ერაყში გაბატონებისათვის.

მას შემდეგ, რაც თურქებმა კონსტანტინეპოლი აიღეს, ხოლო ტრაპიზონისა და ყირიმის დაპყრობით შავი ზღვა საკუთარ „ტბალ“ აქციეს, ფაქტიურად ხელთ იგდეს ვაჭრობის მონოპოლია მსოფლიოს ამ ნაწილში.

საქართველოს ეკონომიკური მდგომარეობისათვის უარყოფითი მნიშვნელობა ჰქონდა დიდ გეოგრაფიულ აღმოჩენებსაც, რომელთა შედეგად ევროპიდან აზიაში სამომოსვლო გზებმა სხვა მიმართულებით გადაინაცვლეს, ამით ევროპის ქვეყნებმა საქართველოსადმი ინტერესი დაკარგეს. დიდ სავაჭრო გზები, რომლებიც ამიერკავკასიის ტერიტორიაზე გადიოდა, მოიშალა: ჩრდილოეთის გზის გამოყენებაც (თეთრი ზღვა — არხანგელსკი — მოსკოვი — ასტრახანი — ირანი) განზე ტოვებდა საქართველოს მსოფლიო სავაჭრო რეპერაციებისაგან. გამონაკლისს წარმოადგენდა კახეთის სამეფო, რომელიც ჩრდილოეთის გზის ახლოს იყო და ამ გზაზე განლაგებულ სავაჭრო ცენტრებთან გარკვეული სავაჭრო ურთიერთობა ჰქონდა.

ირან-ოსმალეთი დაჟინებით ცდილობდნენ საქართველოს სრულ დაპყრობას: ამ მიზნის მისაღწევად არაერთარ ბარბაროსულ სა-

შუალეხას არ ერიდებოდნენ: კაფავდნენ ბაღ-ვენახებს, სპობდნენ ნაგებობებს, იტაცებდნენ პირუტყვს. მოსახლეობის გაქვლეტა, დატყვევება და აყრა-გადასახლება, ხოლო მათ ადგილზე არაქართული ტომების ჩამოსახლება აგრესორთა პოლიტიკისათვის ჩვეულებრივი მოვლენა იყო. ამას ემატებოდა ხშირი ფეოდალური შინაომები; სამეფო-სამთავროების ქიშპი და მტრობა-შუღლი, რაც მწარმოებელი კლასის — გლეხობის მდგომარეობას უკიდურესად აუარესებდა.

სხვა ქართულ სამეფო-სამთავროებთან შედარებით უფრო მძიმე პირობებში იმყოფებოდნენ დასავლეთი საქართველოს პოლიტიკური ერთეულები. აქ XVI საუკუნეში თავი იჩინა ისეთმა მოვლენებმა, რაც ფეოდალური საზოგადოების დაშლისა და გადაგვარების მომასწავებელი იყო. პირველ ყოვლისა ეს იყო „ტყვეთა სყიდვა“, რომელიც უმთავრესად მწარმოებელ კლასს ანადგურებდა. როგორც ზემოთ ითქვა, ამ მოვლენას სოციალური ნიადაგი ჰქვებავდა, თუმცა „ტყვეთა სყიდვის“ მფარველი და წამქეზებელი ოსმალეთი იყო. „ყველა და ყველაფერი, რაც კი ქართულ ფეოდალურ საზოგადოებაში პროგრესული იყო, ამ სოციალური სენის წინააღმდეგ ბრძოლად იყო მოწოდებული, ყველაფერი, რაც კი საქართველოში რეაქციული იყო, ხელს უწყობდა ამ სოციალური სენის გავრცელებას-განმტკიცებას“¹.

ამ ვითარებაში ინტენსიური მეურნეობის წარმოება შეუძლებელი იყო, ქალაქები ვაჭარ-ხელოსნებისაგან ცარიელდებოდა, სოფლები — გლეხებისაგან. აყრილ-გაქცეული გლეხები შედარებით მშვიდი რაიონებისაკენ გარბოდნენ.

ქალაქები შავ ზღვაზე ოსმალების გაბატონების შედეგად დაეცა, გალარიბდა, თანდათან გადაშენდა და გაქრა ან დაბასოფლად იქცა. მართალია, დაფანტულმა ხელოსნებმა ახალ პუნქტებს მიაშურეს (ხოფი, ანაკლია, რუხი), მაგრამ ვაჭრობის გაცხოველება აღარ შეეძლოთ. საგარეო ვაჭრობა ამიერიდან ოსმალთა ვაჭრების ხელთ იყო, ტყვეთა სყიდვა ექსპორტის უმთავრესი წყარო გახდა. სოფლის მეურნეობა დაქვეითდა, გლეხთა ექსპლოატაცია გაძლიერდა.

სოფლის მეურნეობა. ივ. ჯავახიშვილი აღნიშნავს, რომ „საქართველოს მიწა-წყალი უაღრესად მნიშვნელოვანი და მეურნეობის სხვადასხვა დარგისათვის გამოსადეგი იყო ნოტიობის სიჭარბის გამო. „სარწყავი მიწები დასავლეთ საქართველოში არ

¹ ნ. ბერძენიშვილი. საქართველოს რუსეთთან შეერთების ისტორიული მნიშვნელობისათვის, „მნათობი“, № 6, 1954, გვ. 130.

იყო ან ცოტა მოიპოვებოდა. პირიქით, აღმოსავლეთ საქართველოს ნიადაგისა და ჰაერის შედარებით სიმშრალის გამოისობით ბევრგან მიწის მორწყვა აუცილებელი იყო და სასოფლო მეურნეობაშიც სარწყავ-ურწყავ მიწებსა და სარწყავ რუებს აქ განსაკუთრებული მნიშვნელობა ჰქონდა მინიჭებულნი¹.

XVI საუკუნეში ქართლში, კახეთში და სამცხე-საათაბაგოში მთავარი წამყვანი როლი ხორბლეულის მოყვანას ეკუთვნოდა, დასავლეთ საქართველოში კი ძირითადი სასოფლო-სამეურნეო კულტურა ღომი იყო. ღომს გარდა, იმერეთის ზოგ სოფლებში მოჰყავდათ ხორბალი, ფეტვი, ქერი და იფქლი. აფხაზეთის საკათალიკოსო გლეხების დიდი დავთარი ასახელებს ადგილობრივ კულტურებს: პურს, ქერს, იფქლს, ღომსა და ფეტვს.

1578 წელს შედგენილ ქუთაისის საყდრის გამოსავალი ბეგრის დავთარში 518 გადამხდელი გლეხია შეტანილი. ამათგან თითქმის ყველას ღომის გადასახადი აწერია.

დასავლეთ საქართველოში ხორბლის კულტურა ნაკლებად იყო განვითარებული, ხოლო რაც მოდიოდა, უხარისხო იყო რბილი ნიადაგის გამო, ქარის დროს მცენარე მიწაზე წვებოდა და იღუპებოდა². ხორბლეული კულტურების მოყვანას მხოლოდ მაღალ ადგილებში მისდევდნენ.

დასავლეთ საქართველოში რომ უმთავრესად ღომი იყო გავრცელებული, ამას ვახუშტიც აღნიშნავს: „და სთესენ ღომსა ფრიად მრავლად და გამოიზრდებიანცა მით“³.

დასავლეთ საქართველოს ეკონომიკურ დახასიათებას ვახუშტი ბატონიშვილიც იძლევა, თუმცა ზოგადად; დასავლეთ საქართველოს მიწაზე „მარცვალნი... ყოველნი ნაყოფიერებენ ფრიად. გარნა ბრინჯ-ბანბას სთესენ იშვიათ და აგრეთვე ხორბალსა და ქრთილსა... და სხვათა მარცვალთა სიმრავლენი იმყოფიან, რამეთუ ერთი მხოლოდ მუშაკად მოქმედი კაცი მხოლოდ წალღთობისა მქონებელი დასახლდების, მოიყვანს საზრდელსა ჯალაბთასა და გარდაიხდის ბეგარასაცა“⁴.

ვახუშტი ბატონიშვილი ახასიათებს დასავლეთ საქართველოს ყველა კუთხეს ცალ-ცალკე და საინტერესო ცნობებს იძლევა ყვე-

¹ ივ. ჯავახიშვილი, საქართველოს ეკონომიკური ისტორია, წიგნი 1, 1930. გვ. 148.

² არქანჯელი ლამბერტი, სამეგრელოს აღწერა, გვ. 51.

³ ქართლის ცხოვრება, IV, გვ. 744.

⁴ იქვე.

ლა იმ სასოფლო-სამეურნეო კულტურაზე, რომლებიც გავრცელებული იყო ამა თუ იმ კუთხეში. ვახუშტი ჩამოთვლის ლეჩხუმის, რაჭის, არგვეთის, საჩხეიძოს, საჩიჯავაძოს, იმერეთის ვაკის, ოკრიბის, სამეგრელოს, აფხაზეთის და გურიის მხარეებს,¹ სადაც ყველგან „ნაყოფიერებენ ყოველნი მარცვალნი“. გარდა აღნიშნული კულტურებისა, როგორც დასავლეთ, ისე აღმოსავლეთ საქართველოშიც, მისდევდნენ ბრინჯის მოყვანას. არქანჯელო ლამბერტის ცნობით იქ, სადაც ჭაობი იყო და ღომის მოყვანა არ შეიძლებოდა, ბრინჯს სთესდნენ, რომელიც ურწყავად ხარობდა: „ისე ბლომად მოდის, რომ არამც თუ აქაურებს ყოფნის, არამედ მიაქვთ თურქეთის გემებს“.²

დასავლეთ საქართველოს მოსახლეობის ეკონომიკური მდგომარეობა სწრაფად გაუმჯობესდა ახალი უხვმოსავლიანი კულტურის — სიმინდის შემოსვლით. ივ. ჭავჭავაძის აზრით, სიმინდი პირველად სამეგრელოში XVII საუკუნის დასაწყისში უნდა შემოსულიყო შავი ზღვის გზით³. მოგვიანებით ამ კულტურამ ღიღი ადგილი დაიკავა დასავლეთ საქართველოში, შემდეგ იგი გავრცელდა აღმოსავლეთ საქართველოშიც და ბოლოს — მთელ კავკასიაში, მაგრამ ამ პერიოდის ელჩები, მისიონერები და მოგზაურები დასავლეთ საქართველოს კულტურათა შორის სიმინდს ჯერ კიდევ არ ახსენებენ (გარდა ევლია ჩელებისა).

საქართველოში მნიშვნელოვანი ადგილი ეკავა პარკოსან კულტურებს. იმერეთში თესდნენ ბარდასა და ცერცეს. სამეგრელოში XVII საუკუნეში პარკოსანთა შორის ყველაზე მეტად გავრცელებული იყო თურქული ლობიო. ივ. ჭავჭავაძის აზრით, იგი XVI საუკუნის II ნახევარში უნდა შემოსულიყო. მან როგორც დასავლეთ საქართველოში, ასევე აღმოსავლეთშიც მთავარი ადგილი დაიკავა პარკოსან კულტურებს შორის, ხოლო მთის ადგილებში ისევ ოსპი, ცერცი და სხვა პარკოსანი კულტურები იყო გავრცელებული.⁴

ნიკოფორე ტოლოჩანოვის აღწერის მიხედვით იმერეთში ხარობს: „ხორბალი, მუხუდო, ჭვავი, ლობიო, ფეტვი, კანაფი, ღივის

¹ ვახუშტი, აღწერა სამეფოსა საქართველოსა, 1941, გვ. 149, 162—165, 170, 171, 176.

² არქანჯელო ლამბერტი, დასახ. ნაშრ., გვ. 55.

³ ივ. ჭავჭავაძის აზრით, საქართველოს ეკონომიკური ისტორია, II, 1934, გვ. 77—78.

⁴ ივ. ჭავჭავაძის აზრით, დასახ. ნაშრ., გვ. 363, იხ. აგრეთვე პ. გუგუშვილი, დასახ. ნაშრ., გვ. 48.

პური, ღომი, აბრეშუმი, ყოველ სახლში მოჰყავდათ ბამბა, ასევე მთაში ბევრს აღნობდნენ რკინას, სპილენძი ბევრია, გვარჯილა თვითნაბადია მთაში“¹ და სხვ.

დასავლეთი საქართველოს სოფლის მეურნეობაში მნიშვნელოვანი ადგილი ეკავა მეფუტკრეობას. არქანჯელო ლამბერტის სიტყვით „მთელ ქვეყნიერებაზე უმჯობესი თაფლი კოლხიდისა არის“.²

სოფლის მეურნეობაში განსაკუთრებული მნიშვნელობა ჰქონდა მევენახეობას. საუკუნეების მანძილზე აწარმოებდა ქართველი კაცი ვაზის ჯიშის გამოყვანას და შეგუებას ამა თუ იმ ბუნებრივ პირობებთან. ამის ნათელ დადსტურებას იძლევა საქართველოს ყველა კუთხეში გავრცელებული ყურძნის ჯიშების 250 სახელწოდება.³ აქედან დასავლეთ საქართველოში ცნობილ ჯიშთა საერთო რაოდენობა 152 შეადგენს. „16 ლიხთ-იმერეთის ზოგადი ჯიშია, 29 ორ-ორ თემში მოიპოვება, 11 მარტო იმერეთისაა, 24 რაჭისა, 13 ლეჩხუმისა, 26 ეგრისისა, 14 გურიის, 9 აჭარის და 11-იც შავშეთ-კლარჯეთისა.“⁴

შემთხვევითი არ არის, რომ ქუთაისის საყდრის გამოსავალი ბეგრის 1578 წ. შედგენილ დავთარში 518 მებეგრიდან დიდ უმრავლესობას ღვინის ბეგარა მართებს და ზოგს — დიდი რაოდენობით.

1672 წელს საქართველოში ნამყოფი ჟან შარდენი წერს: არსად იმისთანა ქვეყანა არ მოიპოვება, სადაც ამდენსა და ასე კარგ ღვინოს სვამდნენ, როგორც საქართველოში.⁵

XVI—XVIII საუკუნეების საქართველოში „ვენახის ორი მთავარი სახეობა იყო გავრცელებული — დაბლარი და მალლარი. ქართლ-კახეთში ძირითადი წამყვანი იყო დაბლარი და მალლარი აქა-იქ გვხვდებოდა, დასავლეთ საქართველოში (იმერეთში) დაბლარიც იყო და მალლარიც, გურია-სამეგრელოში კი ვენახის ძირითად სახეობას მალლარი წარმოადგენდა“.⁶

¹ ნ. ტოლოჩანოვის იმერეთში ელჩობის მუხლობრივი აღწერილობა, 1650—1652 წწ., გამოსცა ი. ცინცაძემ. თბ., 1970, გვ. 150.

² არქანჯელო ლამბერტი, დასახ. ნაშრ., გვ. 194.

³ ივ. ქავახიშვილი, საქართველოს ეკონომიური ისტორია, წიგნი II, თბ., 1934, გვ. 512.

⁴ იქვე, გვ. 593.

⁵ ჟან შარდენი, მოგზაურობა საქართველოში, თბ., 1975, გვ. 297.

⁶ დ. გვრიტიშვილი, ნარკვევები საქართველოს ისტორიიდან, II, თბ., 1965, გვ. 16.

ივ. ჭავჭავაძის დაასკვნის, რომ „სრულიად საქართველოს შემოქმედებითი მევენახეობის მთავარი ცენტრი კახეთი ყოფილა. დასავლეთ საქართველოში კი პირველი ადგილი ეგრისს, მეორე არგვეთს და მესამე ჭანეთს ეკუთვნის, რომლის წვლილი იმ მხრივაც არის საგულისხმო, რომ მთელ საქართველოში გავრცელებული კაბისტონი, ანუ კაპიტო სწორედ იქაური არის“¹.

ისე, როგორც აღმოსავლეთი საქართველო, დასავლეთი საქართველოც ცნობილი იყო ბალ-ვენახებით და ბოსტნეებით. ტექნიკური კულტურებიდან ბამბა, აბრეშუმი და კანაფიც მოჰყავდათ, თუმცა მცირე რაოდენობით.

ვახუშტი ბატონიშვილი დასავლეთ საქართველოში გავრცელებული კულტურული მცენარეების აღწერის დროს განსაკუთრებით ხაზს უსვამს ვენახისა და ხილის სიმრავლეს.

„თუმცა არც ლეჩხუმი მთის ადგილად თქმული, გარნა არხ ვენახიანი, ხილიანი“;

რაჭაში „ნაყოფიერებს ყოველნი მარცვალნი, ვენახნი, ხილნი მტილოვანნი ყოველნი“;

არგვეთში „ვენახი დაბლარი და ღვინო კეთილი, გარნა ქართლის კერძო ადგილთა თხელი“;

საჩხეიძოს სოფლები „ნიგვზნარ-ხილიან-ვენახიანი. ხეთა ზედა ასულნი, რომელსა უწოდებენ მალლარსა ანუ ბაბილოსა, ღვინო მრავლად და კარგი, აბრეშუმს აკეთებენ. არამედ არგვეთში უფროს“;

იმერეთის ვაკეში „ვენახნი დაბლარნი არიან მრავლად. ხილნი მრავალნი ტყეთა შინაცა“;

ოკრიბა „ნაყოფიერი ფრიად ხილითა, ვენახითა: არამედ ვენახი მალლარი, ღვინო მსუბუქი, მხნე-გემოიანი“².

დასავლეთ საქართველოში რომ საკმაოდ იყო გავრცელებული ტექნიკური კულტურები, ამას უფრო ძველი ცნობებიც ადასტურებს (არქანჯელო ლამბერტი).

მიწათმოქმედების შემდეგ საქართველოში მთავარი ადგილი მეცხოველეობას ეჭირა. საქართველოს ბუნებრივ-გეოგრაფიული პირობები ხელს უწყობდა მესაქონლეობის განვითარებას. საზამთრო საძოვრები და საზაფხულო იალაღები საშუალებას იძლეოდა პირუტყვის გამრავლებისათვის.

დასავლეთ საქართველოში საქონლის ჯოგებს ბარის ზონაში ზამთრობით მინდორში უშვებდნენ უმწყემსოდ „არამეთუ არა უხმთ

¹ ივ. ჭავჭავაძის დასკვნის, უსახ. ნაშრ., გვ. 596.

² ვახუშტი, გვ. 775.

თემა, ვინათგან ზამთარშიც მძოვრად არიან თვინიერ არგვეთისა და რაჭა-ლეჩხუმისა,¹ მაგრამ მეცხოველეობის მხრივ დასავლეთი საქართველო მაინც ჩამორჩებოდა აღმოსავლეთ საქართველოს. ვახუშტი ბატონიშვილის დაკვირვებით, „პირუტყენი“ თვინიერ აქლემისა, არიან ყოველნი, და არა ეგდენ მრავალ ვითარცა სხვა საქართველოთა შინა.“²

იმერეთში ცნობილი იყო ცხვარი თავისი მსწრაფლ გამრავლების საუკეთესო უნარით, რომელიც ტყუპსა და ხშირად სამ-ოთხ ბატკანსაც კი ბადებდა.³

სპეციალურ ლიტერატურაში დადასტურებულია, რომ ე. წ. თუშური ცხვარი მიღებულია იმერული და სხვა კავკასიური ჯიშების ჰიბრიდიზაციის შედეგად.⁴

ხელოსნობა, ქალაქები, ვაჭრობა. განვითარებული ფეოდალიზმის ხანაში, სოფლის მეურნეობის შესაბამისად, განვითარებული იყო ხელოსნობის მრავალი დარგი, როგორც ქალაქად, ისე სოფლად გვხვდებოდნენ: მეთუნე-მეკეცენი (თიხის ჭურჭლის მკეთებელნი), მინის ოსტატები, მებაჭრენი, მებამლენი, მემშვილდენი, ცხენის იარაღ-საჭურვლის მკეთებელნი, ხუროები, კალატოზები, მემადნეები (ოქრო-ვერცხლისა, რკინა-ფოლადისა და სპილენძის „გამომახურებელნი“), მქედლები, ფეიქრები, მღებრები, ეტრატის (საწერი ტყავის) დამამზადებელნი, წიგნების გადამწერნი, ფერწერის ოსტატები, ოქრონემსულის მოხელსაქმენი და სხვ.⁵

საქართველოს სამეფო კარი, დიდი ფეოდალები და ეკლესიამონასტრები აწარმოებდნენ ვაჭრობა-აღებშიცემობას როგორც ქვეყნის შიგნით, ისე უცხო — აღმოსავლეთისა თუ დასავლეთის ქვეყნებთან: ირანთან, ერაყთან, სირიასთან, ეგვიპტესთან, რუსეთთან და სხვა უფრო შორეულ ქვეყნებთანაც.

საზღვარგარეთიდან შემოჰქონდათ: ძვირფასი ქსოვილები, ძვირფასი ჭურჭელი, იარაღ-საჭურველი, სამოსელი, ბეწვეული, პატიოსანი ანუ ძვირფასი თვლები და მარგალიტი, ნელსაცხებელი, წმელი ხილი, თევზეული და სხვ. გაჰქონდათ: აბრეშუმი, ბამბა, ფაჩა, ბეწვეული, ცხენები, ჯორები, თაფლი და ცვილი, სინდური და ნავთობიც კი, აგრეთვე ღვინო და კაკალი. საერთაშორისო ვი-

¹ ვახუშტი. გვ. 769—771.

² იქვე.

³ იქვე.

⁴ მ. რჩეულიშვილი, მასალები ქართული ცხვრის შესწავლისათვის. შოთა რუსთაველის ეპოქის მატერიალური კულტურა, თბ., 1938.

⁵ საქართველოს ისტორია, დამხმარე სახელმძღვანელო, თბ., 1938, გვ. 173.

თარებით გამოწვეულმა ცვლილებებმა, რომელთა შესახებაც წინა თავებში გვქონდა ლაპარაკი, არსებითად შეცვალა საქართველოს, კერძოდ, დასავლეთი საქართველოს მდგომარეობა.

მონღოლთა შემოსევებისა და უფრო გვიან — საქართველოს მთლიანი სახელმწიფოს დანაწევრების პერიოდიდან ვაჭრობა და ხელოსნობა თანდათანობით იწყებს დაქვეითებას; ქვეყანაში ნატურალური მეურნეობა ბატონდება. ამ პირობებში გლეხი თვითონ ეწევა სოფლის მეურნეობის ნედლეულის გადამუშავებას და ამით იკმაყოფილებს ოჯახის მოთხოვნილებას ტანსაცმელზე, ფეხსაცმელსა და სხვა საყოფაცხოვრებო საგნებზე.

სოფლის მეურნეობის, ხელოსნობისა და ვაჭრობის დაქვეითებამ გამოიწვია ქალაქებისა და საქალაქო ცხოვრების დაცემაც. თურქების მიერ კონსტანტინეპოლის აღებამ, შავ ზღვაზე მათმა გაბატონებამ, ზღვისპირეთზე მდებარე სავაჭრო ადგილების აკლებამ, ამასთანავე დიდი გეოგრაფიული აღმოჩენების შედეგად ამიერკავკასიაზე გამავალი სავაჭრო გზების გაუქმებამ და სხვა მიმართულებით მათმა გადანაცვლებამ სავსებით დააქინა საქართველოს ქალაქების მნიშვნელობა¹.

როგორც შ. მესხია აღნიშნავს,² XVII საუკუნის დასაწყისში აფხაზეთში არც ერთი ქალაქი არ არსებობდა, მოსული უცხოელი ვაჭრები პირდაპირ თავიანთ გემებზე აწარმოებდნენ ადგილობრივ მოსახლეობასთან ვაჭრობას.

არც დასავლეთ საქართველოს სხვა სამთავრო-სამეფოებში არსებობდა მნიშვნელოვანი ქალაქები; ქუთაისსაც კი, რომელიც ოდესღაც ყვოდა, თავისი მნიშვნელობა დაეკარგა.

სამეგრელოში ამ დროს ერთადერთი ქალაქი იყო რუხი, როგორც ითქვა, ლევან დადიანის მიერ აღდგენილი. 1920—30 წ. წ. ნუმისმატური ნაპოვნების მიხედვით აქ ანტიკურ პერიოდში აუვავებული სავაჭრო ცენტრი უნდა ყოფილიყო, ახლა კი რუსი ელჩის მოწმობით³, მხოლოდ ორმოცი სომეხი და 10 ებრაელი ოჯახი ცხოვრობდა.

მისიონერებისა და მოგზაურთა ცნობებით, დასავლეთ საქართველოში ამ დროს ვაჭრობა, ძირითადად ბაზრობებზე წარმოებდა.

¹ ქალაქი ეწოდებოდა არა შარტო ზღუდემეფოვლებულს, ვაჭრებითა და ხელოსნებით დასახლებულ ადგილს, არამედ ყოველ ადგილს, სადაც კი ვაჭრობა და აღება-მიცემა წარმოებდა, თუნდაც დროებით.

² Ш. Месхиа. Города и городской строй феодальной Грузии XVI—XVIII вв., Тбилиси, 1950, стр. 90—106, 117—124.

³ Посольство дьяка Ф. Елчина, стр. 337 (შ. მესხიას მიხედვით).

აქ თავს იყრიდა დიდძალი მოსახლეობა (20 ათასამდე), რომელსაც თავისი ნაწარმი გამოჰქონდა და უცხოეთიდან ჩამოსულ ვაჭრებზე ჰყიდდა, თვითონ კი მათგანვე ყიდულობდა საჭირო საგნებს.

უკვე მე-17 საუკუნის დასაწყისიდან წყაროები იცნობენ აგრეთვე ზღვისპირა სავაჭრო პუნქტს ანაკლიას, რომელიც ტყვეებით ვაჭრობის ცენტრს წარმოადგენდა.

რადგან ქალაქის განსაზღვრა ელჩებისა, მისიონერებისა და მოგზაურთა მიერ სხვადასხვაგვარია და მეტად პირობითი, ამიტომ მათ აღწერებში მრავალი გეოგრაფიული პუნქტი, განსაკუთრებით ზღვისპირა სიმაგრეები და ქვეყნის შიგნით არსებული ციხეებიც ხშირად ქალაქად იხსენიება.

ამ წყაროების მიხედვით დასავლეთი საქართველოს მთავარი ქალაქი მაინც ქუთაისია, რომელიც თავის აღრინდელ მდგომარეობასთან (ანტიკურ პერიოდთან) შედარებით მეტად დაკნინებული ჩანს, თუმცა მას ჯერ კიდევ „დიდი“ ეწოდება.

ტოლოხანოვითა და იევლევიტ იგი ორ — „დიდ და დაბლობ — მცირე ქუთაისად“ იყოფა.

წყაროები იხსენიებენ ქალაქებს: სკანდას, ჩხარს, გეგუთს, ხონს, შორაპანს, ფოთს, ქობულეთს და სხვ., მაგრამ, როგორც აღვნიშნეთ, ამ გეოგრაფიული პუნქტების ქალაქებად აღიარება საფუძველს მოკლებულია.

შ. მესხია ამ პერიოდის დასავლეთი საქართველოს ქალაქებს სამ ჯგუფად ჰყოფს: 1. მცირე ზღვისპირა ქალაქები — სიმაგრეები და სავაჭრო პუნქტები: ბიჭვინთა, ზუფუ, ანაკოფია, სოხუმი, ანაკლია, ფოთი, ქობულეთი, ბათუმი. 2. მცირე ქალაქები — ქვეყნის შიგნით არსებულ სიმაგრეებთან და მთავრების რეზიდენციებთან: რუხი, ზუგდიდი, საჩხერე, შორაპანი, ონი, ლაილაში, ბაღდადი, ოზურგეთი და სხვ. 3. მცირე ქალაქები საეკლესიო-მონასტრულ ცენტრებთან: ჩხარი, ხონი, ჩიხორი და სხვ.¹

XVII საუკუნის დასავლეთი საქართველოს მეფე-მთავართა შორის ვაჭრობისა და ხელოსნობის მიმართ მხოლოდ ლევან მეორე დადიანი (1611 — 1657 წწ.) იჩენდა დიდ ინტერესს. მან მთელი რიგი ღონისძიებები განახორციელა ამ დარგების განვითარების მიზნით.

იმ ანარქიის დროს, რომელიც დასავლეთ საქართველოში სუფევდა და მეფე-მთავრები თავიანთი გაუთავებელი შინაომებით

¹ შ. მესხიას ზემოთ დასახელებული წიგნი, გვ. 124; ქართლის ცხოვრება, IV, გვ. 829.

ქვეყნას მოსვენებას არ აძლევდნენ, მაინც იყო პერიოდები, როცა შედარებით მშვიდობა ჩამოვარდებოდა და მაშინვე ვაჭრობაც გამოცოცხლდებოდა. არქანჯელო ლამბერტი აღწერს: „ქუთაისი კარგი სავაჭრო ქალაქია, რადგან იმისთანა ადგილზე დგას, სადაც ყოველმხრით ადვილად მოდიან ვაჭრები თავისი საქონლით. მთებიდან ჩამოდიან სვანები, რომელთაც ჩამოაქვთ თავისი შინაური ნაწარმოები: ნაბღები და მსხვილი შალეები და ჩამორეკენ ხოლმე თხებს და ცხვრებს. ქართლიდან მოდიან ქართლელები და ირანელები, რომელთაც ჩამოაქვთ ძვირფასი ირანული შალეები და ინდოეთის ფერადი ქსოვილები, ტყავები, დამარილებული თევზი კასპიის ზღვიდან, ხიზილალა და სანელებელი, თურქები სამცხის მხრიდან მოდიან და ბლომად მოაქვთ თავისი სავაჭრო, მაგალითად, უნაგირები და ცხენის საკაზმავეები, ხალები, ხანჯლები და თურქული ზანდუკები. სხვებზე მეტი ვაჭრები იქ სომხები არიან. სომხებს ქუთაისში თავიანთი სახლები აქვთ. ესენი დადიან თურქეთში, ირანში და ქართლში და ბლომად მოაქვთ იქიდან იშვიათი საქონელი“¹.

როგორც ირკვევა, იმერეთის სამეფოში, თურქებს გარდა, ირანელებიც იყვნენ ჩაბმული ვაჭრობაში.

საქართველოს ტერიტორიაზე ევლია ჩელების ცნობებით, ინტენსიური ვაჭრობა იყო გაჩაღებული. ოსმალთ, ყირიმელ და ლაზ ვაჭრებს მრავალი კუთხიდან მოჰქონდათ სხვადასხვა სახის საქონელი როგორც ზღვით და ხმელეთით, ასევე მდინარე ჭოროხით. „ლაზების ბევრ ნავს ამ მდინარის აღმა, აღმოსავლეთისაკენ და სამეგრელოს საზღვრებისაკენ მოაქვს მარილი, რკინეული, სხვადასხვა ხელსაწყო-იარაღი. მათ სამეგრელოსა და გურჯისტანის ზღის ხეზე, თაფლზე, თაფლის სანთელზე, ტყვე ქალიშვილებსა და კაბუკებზე ცვლიან და ასე ვაჭრობენ“².

ქვეყნის ეკონომიკურ ცხოვრებაში დიდ როლს ასრულებდნენ ზღვისპირა ნავსადგურები: ანაკლია, ყულევი, სოხუმი, ბათუმი, ქობულეთი, ბიჭვინთა და სხვ. ისინი უმთავრესად თურქებთან აწარმოებდნენ აღამიანებით ვაჭრობას.

დიდი ბაზრობა იმართებოდა რაჭაში. ონი ძველთაგანვე სავაჭრო გზაჯვარედინზე მდებარეობდა: იგი ერწოს გადასასვლელით ცხინვალიდან ქართლს, ხოლო მაპისონის, გეზევეციის და კარაგო-

¹ ლამბერტი, დასახ. ნაშრ., გვ. 10.

² ევლია ჩელების „მოგზაურობის წიგნი“, ნაკვ. I, ქართული თარგმანი ზ. ფუთურაძისა, თბ., 1971, გვ. 95, 103.

მის გადასასვლელებით ჩრდილო კავკასიას უკავშირდებოდა. რაჭას ზემო სვანეთთანაც ჰქონდა მიმოსვლა საცალფეხო გზით.

გიულდენშტედტის გადმოცემით, დასავლეთ საქართველოს სამეფო-სამთავროებში არსად იმდენი სხვადასხვა კუთხის წარმომადგენელი არ იკრიბება სავაჭროდ, რამდენიც ონში¹.

ზემო რაჭაში „ქვაწითელას“ სანახებში მოიპოვებოდა რკინის საბადოები. ადგილობრივი მოსახლეობა რკინის ამ მადნებს ოდიდან ამუშავებდა. ამ საქმიანობასთან დაკავშირებით რკინის მწარმოებელ მთელ ხეობას „სარკინეთი“ ეწოდებოდა, ხოლო მეწარმეთ „რკინის კაცები“. სარკინეთში დამზადებულ რკინას „წელური რკინა“ ეწოდებოდა. სარკინეთში დამზადებული რკინეულის ნაწილი ადგილობრივ მოთხოვნილებებს აკმაყოფილებდა, ჭარბი ნაწილი ალებ-მიცემობის საგანი იყო. იგი გაჰქონდათ როგორც მახლობელ, ისე შორეულ თემებში და იცვლებოდა საჭირო საგნებზე².

გიულდენშტედტის ცნობით, რაჭაში დამზადებული რკინის ნაწარმი კახეთშიც კი აღწევდა, სადაც იცვლებოდა პურზე, საქონელსა და სხვ. იგივე ავტორი ონის აღწერის დროს ნაზგასმით მიუთითებს, რომ სომხები და ებრაელები ვაჭრობენ წედისიდან მოტანილი რკინის ნივთებით, ქართლიდან მოზიდული ბამბის ქსოვილებით, მარილითა და ფეტვით, ოსები სავაჭროდ მოდიან აქ დეალეთიდან და დიგორიდან, აგრეთვე ბალყარები, ბასიანელები და სვანებიც³.

საყურადღებოა ის ფაქტი, რომ რაჭიდან რკინეული ნაწარმი გაჰქონდათ ჩრდილო კავკასიის ზოგიერთ კუთხეში: დიგორს, ბასიანს და ყაბარღოში, ჩრდილო კავკასიიდან რაჭაში შემოჰქონდათ უმთავრესად ჩოხა-ნაბადი და მატყლი. რაჭიდან გაჰქონდათ აგრეთვე კანაფი, აბრეშუმი და სხვა საგნები, ამ ალებ-მიცემას აწარმოებდნენ როგორც რაჭველები, ისე ჩრდილო კავკასიელები⁴.

ამრიგად, XVII საუკუნეში დასავლეთი საქართველოს საერთო სოციალურ-ეკონომიკური დაკნინება ვაჭრობისა და ხელოსნობის დაქვეითებასაც გულისხმობს და ცხადყოფს იმ მძიმე მდგომარეობას, რომელშიც საქართველოს ეს ოდესღაც მდიდარი და კეთილდღეობაში მყოფი მხარე მოექცა.

¹ გიულდენშტედტი, მოგზაურობა საქართველოში, გ. გელაშვილის თარგმანი, ტ. II, თბ., 1964, გვ. 107, 221.

² ნ. რეხვიაშვილი, მკვლევარ რაჭაში. თბ., 1953, გვ. 8.

³ გიულდენშტედტი, მოგზაურობა საქართველოში, ტ. I, თბ., 1962, გვ. 107.

⁴ ნ. რეხვიაშვილი, დასახ. ნაშრ., გვ. 13.

მე-18 საუკუნეშიც, განსაკუთრებით კი მის პირველ ნახევარში, სოფლის მეურნეობა და საქალაქო ცხოვრება დაქვეითების გზაზე იდგა. შინაფეოდალური ომები, გარეშე მტრების მოძალემა და ტყვეთა სყიდვის საყოველთაო მძვინვარება დიდად აბრკოლებდა ქვეყნის შიგნით ეკონომიკური სიძლიერის აღდგენას, ისედაც უკიდურეს მდგომარეობამდე მიყვანილ მწარმოებელ მოსახლეობას ფიზიკურადაც ანადგურებდა და უცხო მოძალადეებს ქვეყნის დაპყრობას უადვილებდა.

მე-18 საუკუნის 30-იან წლებში თურქთა მიერ შავი ზღვის ნავსადგურებისა და უმნიშვნელოვანესი სტრატეგიული პუნქტების დაკავებამ საგარეო ვაჭრობა მკვეთრად შეზღუდა. ამან თავისებური გავლენა შინაურ ვაჭრობაზეც მოახდინა. აქამდე საზღვაო ვაჭრობა თუ თურქთა ხელში იყო, ახლა სახმელეთო გზებიც მათ განკარგულებაში აღმოჩნდა.

ზღვის სანაპირო ზოლზე მდებარე სავაჭრო პუნქტები: ფოთი, ქობულეთი, სოხუმი, შეკვეთილი და გრიგოლეთი სულს დაფავდნენ, ხოლო ქვეყნის შიგნით მდებარე: ბაღდადი, ჩიხორი, საჩხერე, ონი, ჩხარი, ქუთაისი და ოზურგეთი დაღმავალი გზით მიექანებოდნენ.

ერთადერთი მხარე, სადაც წიაღისეულის მოპოვება და დამუშავება მიმდინარეობდა, ეს იყო რაჭა. სოფ. წესში იღებდნენ ვერცხლის მადანს, ხოლო, როგორც ზემოთ აღვნიშნეთ, სოფ. წედისში დიდი რაოდენობით ხდებოდა რკინის მადნის მოპოვება და დამუშავება.

ვაჭრობის და საერთოდ ეკონომიკის დაცემას დასავლეთ საქართველოს ტერიტორიაზე განლაგებული საბაჟოების არსებობაც აფერხებდა, რაც სამეფო-სამთავროების ფეოდალური დაშლილობის შედეგს წარმოადგენდა.

• • •

ერთი შეხედვით გაუგებარია, თუ როგორ შეიძლებოდა ადგილი ჰქონოდა შიმშილსა და ეკონომიკურ გაჭირვებას ბუნებით ისე მდიდარ და უხვმოსავლიან ქვეყანაში, როგორც იყო საქართველო, კერძოდ მისი დასავლეთი ნაწილი, სადაც, როგორც ზემოთ დავინახეთ, მრავალდარგოვანი სოფლის მეურნეობა ყვაოდა, ბევრი ძვირფასი კულტურა ხარობდა და ასეთ ინტენსიურ მეურნეობას მისდევდნენ. მაგრამ გასათვალისწინებელია ის გარემოება, რომ ჭერ ერთი, სოფლის მეურნეობის წარმოება ხშირად იყო გაძნელებული და ზოგჯერ სრულებით შეუძლებელიც ხშირი საგარეო

და შინაომების გამო; როგორც ვიცით, ეს ომები, ცალკეული ბრძოლები თუ შეტაკებანი მხოლოდ ჩვენი ქვეყნის სამეფო-სამთავროების ტერიტორიაზე წარმოებდა, რაც დიდად უშლიდა ხელს ამ რაიონებში რაიმე სამეურნეო-საწარმოო საქმიანობას და მუშაობას; გარეშე თუ შინა ომებში ჩაბმული იყო არა მხოლოდ თავადაზნაურობა, რომელიც მეურნეობაში არ მუშაობდა, არამედ დიდძალი მშრომელი მოსახლეობა, რომელიც მოწყვეტილი იყო თავისი უშუალო საქმიანობისაგან; ურთიერთბრძოლისა და გარეშე მტრის თავდასხმების დროს ნადგურდებოდა სარჩო-საბადებელი, რაც მწარმოებელი მოსახლეობის მიერ იყო მოპოვებული როგორც არამწარმოებელი მოსახლეობის სარჩენად, ისე საკუთარი თავისა და ოჯახის გამოსაკვებად; მტერი ერეკებოდა მუშა და პროდუქტიული საქონლის ჯოგებს, ხოლო მეცხოველეობის დარგში რეპროდუქციას ერთი და ორი წელიწადი არ ყოფნიდა, ამას ზედ ერთვოდა ეპიზოტები — საქონლის დაავადებები, რაც საბოლოოდ ანადგურებდა პირუტყვის ისედაც მცირერიცხოვან ჯოგს; დაბოლოს, ხშირი იყო ინფექციურ სნეულებათა დიდი ეპიდემიები — ძირითადად შავი ქირისა; რომელიც ენდემიური (მუდმივი) კერებიდან, რომლებიც საქართველოს გარეთ მდებარეობდნენ (უმთავრესად სამხრეთის ქვეყნებში), საქართველოში ვრცელდებოდა და მუსრს ავლებდა მოსახლეობას.

საუკუნეების მანძილზე მშრომელი მოსახლეობა გარეშე მტრის ყოველი შემოსევისა და ურთიერთხდომის დროს მასობრივად ტოვებდა ადგილსამყოფელს და მიუვალ მთებსა და ტყე-ღრეებში პოულობდა დროებით თავშესაფარს, რომ შემდეგ ისევ დაბრუნებოდა მშობლიურ ადგილებს.

ასეთ ვითარებაში, რასაკვირველია, შეუძლებელი იყო სისტემატური სამეურნეო საქმიანობა და ამიტომაც, ხელსაყრელი ბუნებრივი პირობების მიუხედავად, იგი არც წარმოებდა. ცხადია, მრავალრიცხოვანი პარაზიტული კლასის რჩენასთან ერთად, რაც სამეფო და საეკლესიო ბეგარების გვერდით მძიმე ტვირთად აწვა მშრომელ მოსახლეობას, საკუთარი თავის ღირსეულად შენახვა უკვე შეუძლებელი იყო, მოსახლეობის მასა შიმშილობდა და ამ ნიადაგზე ამორალურ ზნე-ჩვეულებებსაც იძენდა (მაგალითად, ახალშობილთა მოსპობა).

დასავლეთი საქართველო XVI საუკუნის მეორე ნახევარში, მთელი XVII საუკუნის მანძილზე და მეღვრამეტე საუკუნის პირველ ნახევარში მძიმე ეკონომიკურ პირობებში მოექცა.

მწარმოებელი მოსახლეობის შემცირებამ გამოიწვია პარაზიტული კლასის შემოსავლის შემცირებაც. ამის გამო, კომპენსაციის მიზნით, მიმართეს იმ საზომ-საწყაოს გადიდებას, რომლითაც გლეხობას ბეგარა უნდა მიეცა თავადაზნაურობისა და ეკლესიისათვის.

საზომის თავდაპირველ ოდენობასთან შედარებით ლიტრა ექვსჯერ გადიდა, დასაველეთ საქართველოს ეკონომიკური დაუძღურების ერთ-ერთ საბუთად შეიძლება მოვიტანოთ შემდეგი ფაქტი: როდესაც გიორგი გურიელმა ოდიშის მთავარს გიორგი დადიანს სასისხლოდ 10 000 დრაჰკანი მოსთხოვა, გიორგი დადიანი ანაზღ დათანხმდა, მაგრამ ვინაიდან ეს თანხა მას არ გააჩნდა, გირაოდ ხოფი მისცა. ამ ფაქტს ვახუშტი ბატონიშვილი ასე გადმოგვცემს: „ვინაიღ-გან მწირობდა დადიანი და არა აქვნდა ეგოდენი მის-თვის მისცა ხოფი, ვიდრე ამოვიდოდეს ფასი ოქროსა მის“¹.

საზოგადოებრივი წოდებაანი

თავადი. XI — XIII საუკუნეებში სიტყვა თავადი ყოველგვარი საქმის თავკაცის, უფროსის აღმნიშვნელ სიტყვად იხმარებოდა და ამ საუკუნეებში ფეოდალები მხოლოდ ერთ — აზნაურთა წოდებად ითვლებოდნენ. XIII და საბოლოოდ — XIV საუკუნეებში აზნაურობას გამოეყო დიდებულთა ფენა, რომელიც მეფისაგან ბოძებული „დიდების“ წყალობით გამოცალკევდა, „დიდება“, მემკვიდრეობით კუთვნილებად იქცა. მისი მქონენი აზნაურთა წოდებაზე უპირატესი მდგომარეობით გამოირჩეოდნენ. XV საუკუნეში თავადთა წოდების ჩამოყალიბება დამთავრდა“².

სათავადო იყო ტერიტორიულ-ადმინისტრაციული, სამხედრო-პოლიტიკური და სამეურნეო ერთეული, რომელსაც გადამწყვეტი ადგილი ეჭირა ქვეყნის პოლიტიკურ ცხოვრებაში. მას თავისი შემდეგი დამახასიათებელი ნიშნები ჰქონდა:

1. ტერიტორიის ერთობა, ე. ი. ყმა-მამული, რომელიც მას გააჩნდა, მოთავსებული იყო ერთიან ტერიტორიაზე.
2. ციხე-დარბაზები, ეკლესია-მონასტრები, საგვარეულო საძევალები.
3. სათავადო წარმოადგენდა გარკვეულ სამხედრო ერთეულს.

¹ ქართლის ცხოვრება, IV, გვ. 816.

² საქართველოს ისტორია, სახელმძღვანელო, თბ., 1946, გვ. 298—299; იხილეთ აგრეთვე, ო. სოსელია, ფეოდალური ხანის დასაველეთ საქართველოს ისტორიიდან, თბ., 1966, გვ. 41—42.

4. სათავადოს გარკვეული ყმა-მამული გააჩნდა. თავადის ძალა მისი ყმების რიცხვზე იყო დამოკიდებული.

5. სათავადო სამეურნეო ერთეულს წარმოადგენდა და ძირითადად თვით იკმაყოფილებდა თავს, ე. ი. მისი მეურნეობა ნატურალური ხასიათისა იყო.

6. თითოეულ სათავადოში მხოლოდ ერთი თავადი ითვლებოდა, დანარჩენები ამ სათავადო სახლის თავადიშვილად ითვლებოდნენ. უფლებრივად თავადი და თავადიშვილი განსხვავდებოდნენ ერთმანეთისაგან¹.

გვიან ფეოდალურ საქართველოში ვახტანგის კანონების მიხედვით თავადები უფლებრივად სამ მთავარ ჯგუფად იყოფიან: 1) „დიდებული თავადები“, 2) „შუათანა თავადები“ და 3) „მესამე რიგის თავადები“².

სათავადოს სათავეში უდგას „დიდებული თავადი“, თითოეული თავადის უფლება-მოვალეობა პირობითად შეიძლება ორად გაიყოს: საშინაო და საგარეო.

თავადის საშინაო მოვალეობაში შედის: სათავადოს შიგნით მართვა-გამგეობის მოწესრიგება, მოხელეთა დანიშვნა, მათი სარგისა და ხელის (გასამრჩელო, ანაზღაურება) განსაზღვრა, ბატონყმური რიგის დაცვა, ყმისა და მამულის ყიდვა-გაყიდვა, სოციალური ურთიერთობის მოწესრიგება, სათავადოს თავდაცვის ორგანიზაცია და სხვ.

თავადის საგარეო ფუნქციას წარმოადგენს: ურთიერთობა სამეფო კართან, დამოკიდებულება მეზობელ სათავადოებთან და სხვ.

ყველა სათავადოს თავისი „სახლის რიგი“ ჰქონდა, სადაც განსაზღვრული იყო თავადისა და თავადიშვილის უფლება-მოვალეობანი, „სახლის რიგს“ მეფე ამტკიცებდა და თვით მეფე აღევნებდა თვალ-ყურს, თუ როგორ იცავდნენ მას სათავადოს წევრები.

თითოეულ სათავადოს თავისი სათავადო ნიშანი გააჩნდა. როცა სათავადოს უფროსი გარდაიცვლებოდა, სათავადოს წევრები ამ ნიშანს მეფეს წარუდგენდნენ და მეფე ახალ თავადს ნიშნავდა გარდაცვალებულის ადგილზე.

¹ დ. გვირიტიშვილი, ფეოდალური საქართველოს სოციალური ურთიერთობის ისტორიიდან, თბ., 1955, გვ. 256.

² ვახტანგის სამართლის მიხედვით „დიდებული თავადის“ სისხლი 1536 თუმანი ღირს, შუა თავადისა — 768 თუმანი, მესამე რიგის თავადისა — 384 თუმანი, იხ. ვახტანგის სამართალი, მუხლი 26, 27, 28. გამოსცა თ. ენუქიძემ, თბ., 1955, გვ. 57. თავადთა ასეთი დაყოფა დასავლეთ საქართველოში არ არის ცნობილი.

ახალ თავადად სავალდებულო არ იყო შაინც და შაინც გარდაცვლილი თავადის შვილი ყოფილიყო. ჯერ თვით სათავადო საგვარეულოს წევრები წინასწარ შეთანხმდებოდნენ, თუ ვინ უნდა აერჩიათ თავადად და თავიანთ კანდიდატს მეფეს წარუდგენდნენ¹.

აღმოსავლეთ საქართველოში სათავადოს უფროსს მეფე ნიშნავდა, რის დროსაც ანგარიშს უწევდა სათავადოს სახლიკაცების ნება-სურვილს.

განსხვავებული მდგომარეობა გვაქვს დასავლეთ საქართველოში. ო. სოსელია აღნიშნავს, რომ „არა გვაქვს საფუძველი ვთქვათ, რომ დასავლეთ საქართველოში სათავადოს უფროსს, როგორც წესი, მეფე ან მთავარი ნიშნავდა. გვაქვს საბუთები, საიდანაც ირკვევა, რომ სათავადოს უფროსს მეფე არ ნიშნავდა, მას სათავადოს სახლისკაცები ირჩევდნენ, „უფროსობას ან ბატონობას ანებებდნენ“². აქედან გამომდინარე, მკვლევარი დაასკვნის, რომ „სათავადოს უფროსობა მემკვიდრეობით სახელოს არ წარმოადგენს“³.

რით უნდა ყოფილიყო გამოწვეული დასავლეთ საქართველოს სათავადოს ასეთი დამოუკიდებლობა სამეფო კარისაგან? საფიქრებელია, რომ ეს განაპირობა იმერეთის მეფის ხელისუფლების სისუსტემ.

მიუხედავად ამისა, სათავადოს უფროსი შაინც მეფის ყმად ითვლებოდა. კიდევ ერთი თავისებურება შეიმჩნევა დასავლეთ საქართველოში. აღმოსავლეთ საქართველოში სათავადოს თავისი სახლის რიგი აქვს, სადაც სათავადოს წევრების უფლება-მოვალეობებია აღნიშნული. ამ „კონსტიტუციას“ აღმოსავლეთ საქართველოს მეფე ამტკიცებდა და, ამავე დროს, როგორც აღინიშნა, მეფე სვამდა სათავადოს უფროსსაც; მეფევე ადევნებდა თვალ-ყურს, რომ ეს წესი არ დარღვეულიყო⁴.

დასავლეთ საქართველოში კი „სახლის რიგს“ თვით სათავადოს

¹ დ. გვრიტიშვილი, ფეოდალური საქართველოს სოციალური ურთიერთობის ისტორიიდან, თბ., 1955, გვ. 258, 460.

² ო. სოსელია, ფეოდალური ხანის დასავლეთ საქართველოს ისტორიიდან, თბ., 1966, გვ. 273.

³ აღსანიშნავია ის გარემოება, რომ რაქისა და გურიის ერისთავთა სათავადოში უფროსის უფლება-მოვალეობა მემკვიდრეობით გადადიოდა შამიდან შვილზე, თუმცა XVIII საუკუნეში რაქის ერისთავთა სათავადოში ეს წესი დაირღვა.

⁴ დ. გვრიტიშვილი, დასახ. ნაშრ., გვ. 258.

უფროსი და სახლიკაცები ადგენენ ანდა თვით სათავადოს უფროსი ადგენს და სახლიკაცებს უთანხმებს¹.

აღმოსავლეთ საქართველოში სამოხელეო აპარატი და საერთოდ მართვა-გამგეობა სათავადოს უფროსის ხელში იყო².

ასეთივე მდგომარეობა იყო დასავლეთ საქართველოშიც; სათავადოს უფროსის ხელში იყო მთელი სამოხელეო აპარატი³.

სათავადოთა უმეტეს ნაწილს საგადასახადო შეუვალობა ჰქონდა მოპოვებული, ე. ი. მისი ყმა-გლეხები სახელმწიფო გადასახადს არ იხდიდნენ⁴.

თავადის გარეშე სამეფოში არც ერთი მნიშვნელოვანი საქმე არ წყდება. იგი მეფესთან ერთად ქვეყნის პოლიტიკური საქმეების აქტიური მონაწილეა. მეფე იბრძვის, რომ თავადის უფლებები შეზღუდოს და იგი თავისი მორჩილი მოხელე გახადოს, მაგრამ ამას ვერ ახორციელებს, ზოგჯერ ხდებოდა პირიქით — ბევრჯერ ყმათა და დროთა ცვალებით ასრე დამდაბლებულან, რომე ოდენ სახელი მეფე რქმევიათ, თორემ მართებული არა უქნევიანებით რა, როგორც ყმათა სდომეზიათ ისრე უსამართლებიათ და ურიგეზიათ⁵.

ყოველ სათავადოში სამი სახის მფლობელობა-ქონება არსებობდა: 1. „სახასო“, 2. „საუფლისწულო“ და 3. „სათავისთავო“.

სათავადოს ძირითად ქონებას „სახასო“ წარმოადგენდა. მას თავადი განაგებდა. მთელი შემოსავალი აღირიცხებოდა, სახელმწიფო გადასახადების შემდეგ შემოსავალი განაწილდებოდა ძმებს შორის არათანაბარი პრინციპით: სათავადოს სახლის უფროსი აიღებდა საუფროსოს, შემდეგ ძმები — საშუალოს და საუმცროსოს.

„საუფლისწულო“ მიცემული ჰქონდა თავადიშვილს, როგორც სახარჯო ქონება. შემოსავალი ხმარდებოდა თავადიშვილს. ერთი შეხედვით, საუფლისწულო იყო პირად საკუთრებაზე დაფუძნებული ქონება. იგი თავადისა თუ თავადიშვილის ოჯახის წევრების პირად საკუთრებას წარმოადგენდა. მასში შედიოდა მზითევი, წასყიდი, ნაწყალობები და სხვ.⁶

გვიანფეოდალურ ხანაში სათავადო პოლიტიკურად უფრო დამოუკიდებელი ხდება. იგი მოქმედებს „იმის მიხედვით, თუ რას

¹ ო. ს. ო. ს. ე. ლ. ი. ა., ფეოდალური ხანის დასავლეთ საქართველოს ისტორიიდან, თბ., 1966, გვ. 178.

² დ. გ. ვ. რ. ი. ტ. ი. შ. ვ. ი. ლ. ი., დასახ. ნაშრ., გვ. 275—281.

³ ო. ს. ო. ს. ე. ლ. ი. ა., დასახ. ნაშრ., გვ. 179.

⁴ საქართველოს ისტორია, თბ., 1946, გვ. 302.

⁵ ვახტანგის სამართალი, მუხლი 2.

⁶ დ. გ. ვ. რ. ი. ტ. ი. შ. ვ. ი. ლ. ი., ნარკვევები საქართველოს ისტორიიდან, წიგნი II, თბ., 1965, გვ. 33.

უქარნახებს მას საკუთარი ფეოდალური ინტერესები... მეფეთა პოლიტიკა კი არ განსაზღვრავდა ფეოდალების პოლიტიკას, პირუტყუ — უქანასკნელთა ინტერესები განსაზღვრავდნენ, საბოლოო ანგარიშში „პირველს“.¹ მაგრამ საბოლოოდ თავადი მაინც მეფის ყმად ითვლებოდა. მეფეს შეეძლო მოლაღატე თავადისათვის ყმა-მამული ჩამოერთმია და იგი სახასოდ ექცია.

უმემკვიდრეოდ დარჩენილი ყმა-მამული თავადის ნათესავზე კი არ გადადიოდა, არამედ მეფეს რჩებოდა და მისი სურვილისამებრ სხვას გადაეცემოდა.

თავადი სახელმწიფო, სამეფო გადასახადებს იხდიდა, და მეფის გაწვევაზე უსიტყვოდ გადიოდა.

ყველა ეს პირობა, რომელიც თავადს მეფის წინაშე ვალდებულს ხდიდა, ყოველთვის არ ხორციელდებოდა. ეს დამოკიდებული იყო დროზე, პირობებზე და თვით პიროვნებაზე. თავადები მეფის ყმები იყენენ, მაგრამ ისინი მეფეს არ უყურებდნენ როგორც „ღმერთის სწორს“, მათ თვალში მეფე მხოლოდ პირველი თანასწორთაგანი იყო.

თავადები მეფეს ერთგულებდნენ, თუ მისი პოლიტიკა მათ ინტერესებს შეესაბამებოდა, თუ არა და ისინი ადვილად არღვევდნენ მეფისადმი მიცემულ ფიცს და ემხრობოდნენ მეფის მოწინააღმდეგეს.

აზნაური. „აზნაურობა საქართველოს სახელმწიფო წოდებრივი წყობილების საერთო მოვლენა იყო და აზნაური საქართველოს ყოველ თემსა და კუთხეში იყვნენ“².

თავადების შემდეგ გაბატონებული კლასის ძირითად ფენას აზნაურობა წარმოადგენდა. აზნაური თავდაპირველად ნიშნავდა „თავისუფალს“, მაგრამ შემდეგში სოციალური ცნების ამსახველი გახდა. „აზნაურნი დიდნი“ იმაზე მიგვანიშნებს, რომ „მცირე აზნაურნიც“ იყვნენ. შემდეგში, როგორც წყაროებიდან ჩანს, აზნაურთა ფენა დაიყო, ვინაიდან გვხვდება ასეთი გამოთქმები: „დიდებული აზნაური“, „ნათესავით აზნაური“, „აზნაური მოსაკარგავენი“, „ციხეთა უფალნი“ და „უციხონი“. გვიან ფეოდალურ ხანაში აზნაურთა უფლებრივი მდგომარეობა გაუარესდა.

¹ ნ. ბერძენიშვილი, ფეოდალური ურთიერთობიდან XV საუკუნეში, მასალები საქართველოს და კავკასიის ისტორიისათვის, ნაკვ. 1, 1937, გვ. 20—29.

² ივ. ჯავახიშვილი, ქართული სამართლის ისტორია, წიგნი I, ქუთაისი, 1919, გვ. 33.

ფეოდალური საქართველოს დაქუცმაცების პერიოდში, როდესაც მეფე ძლიერ ფეოდალებს ებრძოდა, მის მხარეზე იყო აზნაურთა ფენა, ვინაიდან აზნაურები, როგორც წვრილი ფეოდალები, საჭიროებდნენ ცენტრალური ხელისუფლების დახმარებას, რათა მსხვილ ფეოდალთა ძალმომრეობას ფრთები შეკვეცოდა; ამიტომ აზნაურობა დაინტერესებული იყო მეფის ხელისუფლების განმტკიცებაში, თავის მხრივ მეფის ხელისუფლებაც დასაყრდენს ამ სოციალურ ფენაში ეძებდა.

ფეოდალური დაშლილობის პერიოდში აზნაურთა ფენა პოლიტიკურად და ეკონომიკურად დასუსტებულია, რაც იმაში გამოიხატება, რომ დამოუკიდებელი აზნაური არ არსებობს, ისინი არ ქმნიან ერთ მთლიან ძალას.

ვახტანგის კანონით აზნაურები სამ ჯგუფად იყოფიან: 1. „გადიდებული აზნაური“, 2. „შუა აზნაური“ და 3. „ცალმოგვი აზნაური“.¹ ასეთ დაყოფას ეკონომიკური საფუძველი უნდა ჰქონოდა.

როგორც ენგელსი აღნიშნავს, შუა საუკუნეების ფეოდალური იერარქიიდან საშუალო თავადაზნაურობა თითქმის სრულიად გაქრა, მისი ერთი ნაწილი დამოუკიდებელ წვრილ მთავრებად იქცა, ხოლო მეორე — ჩამოქვეითდა და დაბალი აზნაურების რიგში მოექცა; დაბალი აზნაურები სწრაფად მიექანებოდნენ დალუპვისაკენ, მათი დიდი ნაწილი სრულიად გადატყვებული იყო და მხოლოდ თავადებთან სამსახურით ცხოვრობდა, მეორე ნაწილი თავადებთან ვასალურ დამოკიდებულებაში და მორჩილებაში იმყოფებოდა.²

კუთენილების მიხედვით აზნაურები სამ ჯგუფად იყოფიან: 1. სამეფო-სამთავრო, 2. სათავადო და 3. საეკლესიო-სამონასტრო აზნაურებად.

ნიკიტა ტოლოჩანოვის ცნობით, იმერეთის სამეფოში 1100 აზნაური ყოფილა, ხოლო თავადები კი 100³. დასავლეთ საქართველოში აზნაურების უმრავლესობა თავადების საკუთრებას შეადგენდა. სარგის კაკაბაძის გამოანგარიშებით 1640-იანი წლებისათვის იმერეთის სამეფოში უნდა ყოფილიყო დაახლოებით 840—850

¹ ვახტანგის კანონის მიხედვით გადიდებული აზნაურის სისხლი 192 თუმანი ღირს, შუა აზნაურისა — 96 თუმანი, ხოლო ცალმოგვი აზნაურისა — 48 თუმანი. იხ. ვახტანგის სამართალი, მუხლი 29, 30, 31. გამოსცა თ. ენუქიძე, თბ., 1955.

² ფრ. ენგელსი, გლეხთა ომი გერმანიაში, თბ., 1956, გვ. 26—27.

³ ნ. ტოლოჩანოვის იმერეთში ელჩობის მუხლობრივი აღწერილობა 1650—1652 წწ. გამოსცა ი. ცინცაძე, თბ., 1970, გვ. 153.

კომლი აზნაური.¹ მათ შორის სამეფო აზნაური იყო 225 კომლი², დანარჩენი 615—625 კომლი თავადებისა და ეკლესია-მონასტრებისა იყო.

სამეფო (ტახტის) აზნაური ყოველთვის მეტი პატივით სარგებლობდა, ვიდრე თავადისა, ამიტომ სათავადოს აზნაურები ყოველთვის მიისწრაფოდნენ, რომ სამეფო ან სამთავრო აზნაურებში გამხდარიყვნენ, რითაც მეტი საშუალება ეძლეოდათ სოციალურად და ეკონომიკურად დაწინაურებისა. მიუხედავად იმისა, რომ აზნაურები იურიდიულად თავისუფალნი იყვნენ და სადაც სურდათ იქ წავიდოდნენ, ამას მაინც ვერ ახერხებდნენ, ვინაიდან თავადის მიწაზე იყვნენ მიჯაჭვულნი.

ყველა აზნაური წვრილი მფლობელი იყო (ზოგს სულ არ ჰყავდა ემა-გლეხი, ზოგს კი — ერთიდან 50-მდე).

აზნაური თავისუფალია მხოლოდ იმ შემთხვევაში, თუ თავის ყმასა და მამულზე ხელი აიღო და თავისი „მამულიდამ ადგა“. ამრიგად, ბატონისაგან წასვლის შემთხვევაში აზნაური კარგავს თავის სამკვიდრო მამულს³. აქედან გამომდინარე, ნათლად ჩანს, რომ აზნაური არ იყო თავისი მამულის ერთადერთი მესაკუთრე, მის მამულზე გარკვეული უფლებები ჰქონდა თავადსაც. დებულება, რომ „ყმისა ყველა ბატონისა არის“, აზნაურზეც ვრცელდებოდა.

აზნაურის ყმა-მამული საკუთრების მიხედვით შემდეგნაირად ნაწილდებოდა: 1. სამკვიდრო ყმა-მამული, 2. ბატონისაგან ნაწყალობევი და 3. ბატონისაგან დამოუკიდებლად ნაშოვნის, პირადი გარჯით შეძენილი ყმა-მამული: ნასყიდი, ნასისხლი, ნამზითვი, ნაჯილდოები⁴ და სხვ.

¹ ს. კაკაბაძე, მასალები იმერეთის სახელმწიფოებრივი მდგომარეობის შესახებ მე-17 საუკუნეში, საისტორიო მოამბე, წიგნი I, 1925, გვ. 192..

² იქვე, გვ. 196.

ს. კაკაბაძე თვლის, რომ ტოლოჩანოვის მიერ მოცემული ცნობა უნდა გამოხატავდეს მხოლოდ სამეფო აზნაურთა რაოდენობას, იმ ვარაუდით, რომ 225 კომლ სამეფო აზნაურს თავისუფლად შეეძლო 1100 შეიარაღებული მამაკაცის გამოყვანა. არქანჯელო ლამბერტი წერს, რომ „მეგრელები... ჩვეულებრივნი არიან ომსა, იმდენად ჩვეულებრივნი, რომ შობილებს სულ ბატარები დაყავთ ლაშქარში და არ არიდებენ იმ გაჭირვებას, რომელიც იქ უნდა გადახდეთ; ბავშვები ისე ატარებენ იარაღს, უკავიათ ხელში ფარი და ხმარობენ შვილსა, თითქმის დაბადებიდან შეჩვეულნი იყვნენ ბრძოლას“ (არქანჯელო ლამბერტი, სამეგრელოს აღწერა, გვ. 86).

³ გ. აკოფაშვილი, აზნაურთა უფლებრივი მდგომარეობის საკითხისათვის. მასალები, საქართველოსა და კავკასიის ისტორიისათვის, ნაკვ. 32, თბ., 1955, გვ. 88.

⁴ იქვე.

ბატონი მიეტოვებინა და სადაც სურდა, იქ წასულიყო. მაგრამ ასეთ შემთხვევაში, როგორც ითქვა, ყმა-მამული, რომელიც ნაბოძები ჰქონდა, ბატონისათვის უნდა დაეტოვებინა.

XVI—XVIII საუკუნეებში აზნაურების უფლებრივი მდგომარეობა უარესდება; ამას ადასტურებს აზნაურთა ახალი კატეგორიების გაჩენა: „მკვიდრი“, „მეფის მიერ ნაწყალობევი“, „ნამზითვი“, „ნასისხლი“, „ნასყიდი“, ეკლესიას ჰყავდა „შეწირული აზნაურებიც.“¹

თავადს უფლება ჰქონდა აზნაური გაეყიდა, გაესაჩუქრებია, დაერბია. აზნაურსა და ბატონს შორის აშლილობა და „წყენა“ უმრავლეს შემთხვევაში ისევ შერიგებით მთავრდებოდა, ვინაიდან აზნაურისათვის თავისი ყმა-მამულის მიტოვება ძნელი იყო. ამრიგად, მიწათმფლობელთა კატეგორიას აზნაურიც ეკუთვნოდა, მაგრამ იგი ვასალურ დამოკიდებულებაში იყო მეფესთან, ან თავადთან, ან ეკლესია-მონასტერთან. მართალია იგი ყმა-მამულს ფლობდა, მაგრამ მისი უფლება ამ ყმა-მამულზე შეზღუდული იყო. ეს უკანასკნელი პირობით ქონებას წარმოადგენდა და ბატონის დაუკითხავად ვერ გასხვისდებოდა. აზნაური, როგორც ზემოთ აღინიშნა, მხოლოდ ნასყიდი ყმა-მამულის სრული მპრძანებელი იყო.

გლეხი ვახუშტის სქემით ქართული ფეოდალური საზოგადოების სოციალური კიბის ორ უკანასკნელ საფეხურზე დგანან „მსახურნი“ და „მუშაკნი გლეხნი“², რომელნიც ერთიანი სოციალური ფენის — გლეხობის ორ განსხვავებულ ჯგუფს წარმოადგენენ. „მსახურნი“ ვახუშტისათვის იგივე გლეხია, მხოლოდ უფრო მაღალი პატივისა, მომდევნო საფეხურზე მდგომნი კი არიან „მუშაკნი გლეხნი“³.

ვახუშტი პირველი იყო, რომელმაც ქართული ფეოდალური ურთიერთობის კვლევას მიჰყო ხელი და მრავალი მოვლენაც სათანადოდ შეაფასა, რაც შეეხება XIX საუკუნის პირველი ნახევრის ისტორიკოსებს (პ. იოსელიანი, მ. ბროსე, დ. ბაქრაძე, ნ. ურბნელი, მ. ჭანაშვილი და სხვ.), მათ ვახუშტისათვის დიდად არ გაუსწრიათ წინ. ეს კიდევ აისახა თანამედროვე სამეცნიერო ლიტერატურაში.

¹ გ. აკოფაშვილი, აზნაურთა უფლებრივი მდგომარეობის საკითხისათვის, მსალები საქართველოსა და კავკასიის ისტორიისათვის, ნაკვ. 32, 1955, გვ. 101.

² ვახუშტი, აღწერა სამეფოსა საქართველოსა, გვ. 14.

³ დ. გვრიტიშვილი, დასახ. ნაშრ., გვ. 4—12.

მომდევნო პერიოდის ისტორიკოსებიდან სოციალური ურთიერთობის საკითხების კვლევა მიზნად დაისახა პროფ. ალექსანდრე ხახანაშვილმა. მან აღნიშნულ საკითხს მიუძღვნა შემდეგი გამოკვლევები: „ბატონყმობა საქართველოში რუსეთთან შეერთებამდის“, „წოდებათა ისტორია საქართველოში“, „იმუნიტეტი საქართველოში“¹ და სხვა.

ამ შრომებში მოცემულია ცდა ქართული ფეოდალური ურთიერთობის მოვლენათა განზოგადებისა და ევროპულ ფეოდალიზმთან მათი შეხამებისა. ავტორი იხილავს ფეოდალური ურთიერთობის თითქმის ყველა საკითხს მისი ჩასახვიდან XIX საუკუნის დამდეგამდე. ამან კი სათანადო კვალი დააჩნია გამოკვლევის ხარისხს, მით უმეტეს, რომ ავტორი მეთოდოლოგიურადაც არ დგას სწორ პოზიციაზე². იგი ძირითადად ემყარება უცხო — ევროპისა და რუსეთის — ისტორიის ფაქტებს და მზამზარეული სქემების მიხედვით იხილავს ქართული ფეოდალიზმის მოვლენებს, რაც მიუღებელია. აღ. ხახანაშვილს სურს დაამტკიცოს, რომ ქართული ბატონყმობა უფრო ჰუმანურია, ვიდრე ევროპული და რუსული.

აღ. ხახანაშვილის აზრით, სანამ საქართველო რუსეთს შეუერთდებოდა, მანამ ბატონი იყო გლეხისათვის მფარველი და პატრონი. ბატონი და ყმა მამაშვილურ დამოკიდებულებაში იყვნენ და მათ შორის არავითარი კლასთა ბრძოლა არ იყო³. მიუხედავად ამ მცდარი შეხედულებისა, ავტორი უამრავ ფაქტობრივ მასალას იძლევა ქართული ფეოდალიზმის დასახასიათებლად. ამიტომ ალექსანდრე ხახანაშვილის მეცნიერული ღვაწლი ქართული ფეოდალიზმის შესწავლაში თვალსაჩინოა.

ყველაზე მნიშვნელოვანი გამოკვლევა ქართული ბატონყმური ურთიერთობის შესახებ, რაც რევოლუციამდელმა ისტორიოგრაფიამ შექმნა, არის ს. ავალიანის ცნობილი შრომა⁴.

აღნიშნულ გამოკვლევაში ავტორი ემყარება ძველ ქართულ საკანონმდებლო ძეგლებს: ვახტანგ VI სამართლის წიგნს, ბეჟა-აღბუ-

¹ აღ. ხახანაშვილი, ბატონყმობა საქართველოში რუსეთთან შეერთებამდის, პირველად გამოიცა 1889 წ. შეროდ — 1910 წ. ამ უკანასკნელ გამოცემაშია დაბეჭდილი „იმუნიტეტი საქართველოში“ (აღრე დაიბეჭდა „ცნობის ფურცელში“ — 1910 წ.) და „წოდებათა ისტორია საქართველოში“ (გამოკვეცდა ჟურნალ „ქვალში“ 1899 წ.).

² დ. გვრიტიშვილი, დასახ. ნაშრ., გვ. 8.

³ აღ. ხახანაშვილი, დასახ. ნაშრ., გვ. 126—127.

⁴ С. А. Авалиани. Крестьянский вопрос в Закавказье, т. I, крестьянское право и история крестьянской реформы в Тифлисской и Кутаисской губерниях, Одесса, 1912, стр. 1—84.

ლას კანონებს და სხვა წყაროებს. ავტორი მოუთითებს, რომ ფეოდალურ საქართველოში მოქმედებდა დაუწერელი კანონები, რომელნიც არ ასახულან საქანონმდებლო ძეგლებში. ავტორი ხშირად მიმართავს სიგელ-გუჯრებს და სხვა დოკუმენტებს, რომლებშიც მრავლადაა მოტანილი ყმისა და ბატონის ურთიერთობის ფაქტები.

ს. ავლიანის მტკიცებით, შუა საუკუნეების საქართველოსათვის დამახასიათებელი იყო არა მარტო ბატონყმობა, არამედ მონობაც. მაგრამ ტყვე-მონების არსებობა საქართველოში ქართული ფეოდალური ურთიერთობის ნიშანი კი არ იყო, როგორც ეს ავტორს ჰგონია, არამედ ამ ურთიერთობის ნორმებისაგან გადახვევას წარმოადგენდა და ეკონომიური და სოციალური დაქვეითების შედეგი იყო.

ს. ავლიანი დაინტერესდა საქართველოში იმუნიტეტის არსებობის საკითხით. მან ქართული იმუნიტეტი შეადარა ბერძნულს, ევროპულსა და რუსულს და მათ შორის მსგავსება დაინახა, რაც იმით ახსნა, რომ ერთნაირი საზოგადოებრივი წყობა სხვადასხვა ქვეყანაში მსგავს ინსტიტუტებს წარმოშობს.

ს. ავლიანის დაკვირვებით, ფეოდალურ საქართველოში გლეხობა იყოფოდა: 1. მსახურებად, 2. აზატებად და 3. მებეგრე გლეხებად. მათგან განსხვავებულ მდგომარეობაში იმყოფებოდნენ ხიზნები, რომელნიც საქართველოს სხვადასხვა კუთხეში სხვადასხვა სახელწოდებით აღინიშნებოდნენ. მაგალითად: მინდობილნი, მიბარებულნი და სხვა.

ს. ავლიანის აზრით, გლეხობიდან ყველაზე დაბალ საფეხურზე იდგნენ მოჯალაბენი, რომელნიც მხოლოდ დასავლეთ საქართველოში გვხვდებოდნენ, ხოლო ქართლსა და კახეთში ეს კატეგორია არ ჩამოყალიბებულა, რადგან მოახლეს, ფარეშს, შინაყმას და სხვა მომსახურე პირებს, რომლებსაც დასავლეთ საქართველოში მოჯალაბენი წარმოადგენდნენ, ქართლ-კახეთში ყმა-გლეხები აძლევდნენ მებატონეს.

საქართველოს ისტორიის საკითხებზე მთელი რიგი შრომები აქვს შექმნილი სარგის კაკაბაძეს. მისი შრომების დიდი ნაწილი მიძღვნილია დასავლეთ საქართველოს ისტორიისადმი, კერძოდ, გლეხობის საკითხს ეხება მისი ერთ-ერთი შრომა¹. მასში ს. კაკაბაძე ძირითადად იხილავს XV საუკუნის ფაქტებს. მისი დაკვირვებით, გლეხზე დაკისრებული საბატონო გადასახადი ფუძეს ედო, ამასთან, გადასახადი არ იზრდებოდა, თუ ერთ ფუძეზე რამდენიმე

¹ С. Н. Какабадзе. Черты феодального строя и крестьянские повинности в Грузии в конце средних веков, Тифлис, 1912.

მეკომპური იქდა. ფუძე სხვადასხვა ზომისა იყო და მას უმთავრესად ფლობდა ერთი კომლი გლეხი. ფუძეზე დადებული გადასახადი სხვადასხვა ადგილას სხვადასხვა იყო. გლეხს ევალებოდა ძირითადად ნატურალური გადასახადი — პური, ლეინო და სხვ. ამას გარდა, გლეხს წელიწადში რამდენიმეჯერ უნდა მიერთმია თავისი ბატონისათვის ქათამი, ღორი, რძე, ყველი, კვერცხი და სხვ. წლის განმავლობაში გლეხს ევალებოდა ბატონისათვის რამდენიმე ძღვენის მირთმევა. ასევე გლეხის მოვალეობა იყო ბატონისა და მისი სტუმრების გამასპინძლება. აღნიშნულს გარდა, გლეხს კიდევ ბევრი გადასახადი და სამსახური ევალებოდა. გლეხთა მდგომარეობის მოტანილ სურათს ავტორი წარმოადგენს დასავლეთ საქართველოს საეკლესიო გლეხების მაგალითზე.

სარგის კაკაბაძე შემდეგნაირად ახასიათებს მსახურებსა და გლეხებს: როგორც მეფესა და ათაბაგს, ისე თავადებს ჰყავდათ აზნაურები, აზნაურებს მისდევდნენ მსახურები, რომელთაც ბეგარის მაგივრად ბატონის სამსახური და თანხლება ედვათ და რომელნიც ყოველთვის შზად უნდა ყოფილიყვნენ აზნაურებთან ერთად ოშში გამოსასვლელად. მსახურებს მოსდევდა გლეხობა, რომლის უდიდეს ნაწილსაც შეადგენდა ბეგარის გადამხდელი გლეხობა (მოყალნე გლეხი აღმოსავლეთ საქართველოში — ყალანი ნიშნავს მიწის გადასახადს, — მებეგრე გლეხი სხვაგან, მოინალე — ოდიშსა და აფხაზეთშიც). აზნაურებს შეიძლება ყოლოდათ ყმად როგორც მსახურნი, ისე გლეხნი, მსახურთ — მხოლოდ გლეხნი. ყველასი ვალდებულება და გადასახადი სასტიკად განსაზღვრული იყო ჩვეულებით და კანონით¹. ზემოთ აღნიშნულიდან ნათლად ჩანს, რომ ავტორი მხოლოდ ზოგად დახასიათებას იძლევა და სრულ წარმოდგენას ვერა ქმნის მსახურისა და მებეგრე გლეხის სოციალურ-ეკონომიკურ მდგომარეობაზე.

ს. კაკაბაძე აღნიშნავს, რომ ეკონომიური ცხოვრების არეულარევაში, საერთო გაკირვებაში, ამასთანავე გახშირებულმა ურთიერთ ხლომაში და ტყვეთ აღამიანთა მოტაცებაში თანდათან გააუარესა გლეხთა უფლებრივი მდგომარეობა. მსახურთა, მებეგრე გლეხებთან შედარებით, პრივილეგიური მდგომარეობა შეიკრყა და მსახურიც უფლებრივად თანდათან უახლოვდება გლეხს. ამასთანავე XVII საუკუნეში და ამ დროითგან მსახურთა რიცხვი თანდათან კლებულობს: ნაწილი მათი თანდათან გადადის მებეგრე გლეხთა

¹ ს. კაკაბაძე, საქართველოს ისტორია, ახალი საუკუნის ეპოქა, თბ., 1920, გვ. 6.

კატეგორიაში. მოყალნე ანუ მებეგრე გლეხის ვითარებაც გაუარესდა¹

„XVII საუკუნის დასასრულიდან დასავლეთ საქართველოში ჩნდება ახალი, ეგრეთ წოდებული მოჯალაბე გლეხთა კატეგორია, რომელიც ბატონის სრულ საკუთრებას შეადგენდა და თავისი მდგომარეობით მონას უფრო შეჰკვანდა“².

გვიანსაუკუნეების ხანის საქართველოს სოციალური ურთიერთობის ისტორიის შესწავლას მიუძღვნა რიგი შრომები აკად. ნ. ბერძენიშვილმა: „საქართველოს ისტორია XIII—XIV საუკუნეებში“, «Очерк из истории развития феодальных отношений в Грузии (XIII—XVI в.в.)», «ფეოდალური ურთიერთობიდან XV საუკუნეში», „XVIII საუკუნის საქართველოს ისტორიიდან“ და სხვა. ამ შრომებში ნ. ბერძენიშვილი არ იფარგლება აღნიშნული საუკუნეებით და იძლევა ფეოდალური ურთიერთობის ჩამოყალიბებისა და განვითარების საერთო სურათს.

ქვეყნის მდგომარეობას აუარესებდა სუსტი ეკონომიური ბაზისი, ნატურალური მეურნეობის ბატონობა, ფეოდალური იმუნიტეტის ზრდა, დაქუცმაცებული საქართველოს თითოეულ ნაწილში სამეფო ხელისუფლების სისუსტე. ფეოდალები უფრო და უფრო მეტ უფლებებს იტაცებენ. საქართველოს დაშლა მხოლოდ „სამეფოების“ წარმოქმნით არ დამთავრებულა. დასავლეთ საქართველოში იმერეთის სამეფოს გამოეყო გურიის, ოდიშისა და აფხაზეთის სამთავროები, ხოლო როგორც დასავლეთი საქართველო, ასევე აღმოსავლეთი საქართველო მოიფინა მეფეებისადმი ნომინალურად დამოკიდებული სათავადოებით. „გახელმწიფებული“ ფეოდალები კიდევ უფრო მეტად ზრდიან ექსპლოატაციას, ამას თან ერთვის XVI—XVII საუკუნეებში ოსმალებისა და ყიზილბაშების გამუდმებული თარეში, რაც კიდევ უფრო მეტად აჩანაგებს გლეხის ეკონომიურ მდგომარეობას.

პროფ. დ. გვრიტიშვილი თავის გამოკვლევაში დიდ ადგილს უთმობს გლეხობის სოციალ-ეკონომიკური მდგომარეობის შესწავლას (ქართლის სათავადოებში). თუმცა იგი დასავლეთი საქართველოს გლეხობის საკითხს ცალკე არ შეხებია, მაგრამ მისი დასკვნით „ისტორიულად, გლეხი სოციალური ურთიერთობის ყველაზე დაბალ საფეხურზე მდგომი კატეგორიის აღმნიშვნელი ტერმინი იყო. რაც უფრო ღრმავდებოდა ეს სოციალური დიფერენციაცია, მით უფრო ფართოდებოდა „გლეხის“ შინაარსი და ამ ფონზე

¹ ს. კაკაბაძე, დასახ. ნაშრ., გვ. 80.

² იქვე, გვ. 80—81.

ფეოდალურ საქართველოში გლეხი ყმის აღმნიშვნელ ზოგად ტერ-
მინად იქცა. ყმა გლეხის მდგომარეობამდე დავიდა.¹

საფუძვლიანი გამოკვლევა უძღვნა პროფ. ო. სოსელიამ დასავ-
ლეთ საქართველოში სათავადოების სისტემის წარმოქმნას². წიგნ-
ში წარმოჩენილია ის წინამძღვრები, რომლებმაც განაპირობეს სა-
თავადოთა წარმოქმნა საქართველოში საერთოდ და კერძოდ, დასავ-
ლეთ საქართველოში; მოცემულია სათავადოთა ორგანიზაციის ზო-
გადი დახასიათება; შესწავლილია სათავადოთა სოციალ-პოლიტი-
კური სტრუქტურა, ფეოდალური საკუთრების ფორმები, საგლე-
ხო ვალდებულებათა სახეები; კლასობრივი ბრძოლის ფორმები;
ნაჩვენებია სათავადოთა ძირითადი დამახასიათებელი ნიშნები:
ფეოდალური იურისდიქცია, იმუნიტეტი და სხვა.

ლევან მუსხელიშვილმა ვრცელი გამოკვლევა მიუძღვნა გლეხ-
თა კატეგორიებს შრომაში „დასავლეთ საქართველოს გლეხობის
სოციალ-ეკონომიური კატეგორიები XVI—XVII სს.“.

ავტორმა უარყო დასავლეთ საქართველოს გლეხთა კატეგორიე-
ბის სარგის კაკაბაძისეული დაყოფა და თავისი სქემა წარმოგვიდ-
გინა. ეს ნაშრომი უმთავრესად XVI საუკუნის დასავლეთ საქარ-
თველოს საეკლესიო საბუთების, შემოსავლის დავთრების ანალიზს
ემყარება. ვინაიდან საერო საბუთები უმნიშვნელო რაოდენობით
არის შემონახული, ლ. მუსხელიშვილს დასაშვებად მიაჩნია საეკ-
ლესიო გლეხთა სოციალ-ეკონომიური კატეგორიები საერო გლე-
ხთა მიმართაც გამოიყენოს და მათ შორის მსგავსება დაინახოს.³

ლ. მუსხელიშვილმა ყურადღება მიაქცია ტერმინ „გლეხს“ და
დაასკვნა, რომ „გლეხი“ დასავლეთ საქართველოში, ვიდრე მე-19
საუკუნის შუახანებამდე, არ ნიშნავდა ერთი სოციალურ-ეკონო-
მიური ფენის კაცს, გლეხობა არ წარმოადგენდა ერთ მთლიანს წო-
დებრივ ფენას, გლეხი რამდენიმე კატეგორიისა იყო და ამ კატე-
გორიათა შორის დიდი სოციალურ-ეკონომიური სხვაობა არსებობ-
და.⁴

¹ დ. გვრიტიშვილი, ფეოდალური საქართველოს სოციალური ურთი-
ერთობის ისტორიიდან, თბ., 1955, გვ. 185.

² ო. სოსელია, ფეოდალური ხანის დასავლეთ საქართველოს ისტორიი-
დან, თბ. 1966.

³ ლ. მუსხელიშვილი, „დასავლეთ საქართველოს გლეხობის სოციალ-
ეკონომიური კატეგორიები XVI—XVII სს.“ საქართველოს მეცნიერებათა აკა-
დემიის ენის, ისტორიისა და მატერიალური კულტურის ინსტიტუტის მოამბე,
1940, № 5—6, გვ. 268.

⁴ ლ. მუსხელიშვილი, დასახ. ნაშრ., გვ. 269.

როგორც ცნობილია, XIII საუკუნისათვის ძირითადად დასრულდა დიდი სოციალური პროცესი: „გლეხთა ფენაში გაერთიანდა ქვეყნის მატერიალური დოვლათის მწარმოებელთა მიწისმოქმედი ნაწილი“. ამ ფენის საერთო დამახასიათებელი ეს იყო, რომ „ყველა გლეხი შებეგრე იყო და ეს იმის გამო, რომ მიწა (ფუძე), რომელზედაც გლეხი მეურნეობდა, ფეოდალის საკუთრებას შეადგენდა, ხოლო გლეხი ამ მიწით საშვილიშვილოდ სარგებლობდა, სხვა მხრივ, ე. ი. უფლებრივი და ეკონომიკური თვალსაზრისით, გლეხობა არ წარმოადგენდა ერთფეროვან მასას. უმრავლესობა მკვიდრი გლეხობა იყო. მკვიდრი იმ გლეხს ეწოდებოდა, რომელიც მამით შეილამდე ერთი ფეოდალის ხელთ რჩებოდა. მკვიდრების გვერდით სახლობდნენ გარეთმოსული გლეხებიც.

როგორც მკვიდრ, ისე გარეთმოსულ გლეხებში გამოირჩეოდა სხვადასხვა უფლებრივი კატეგორიები.¹ ნებიერი ისეთ გლეხს ეწოდებოდა, რომელიც თავის ნებით მიუვიდოდა ფეოდალს და გარკვეული პირობით ეყმობოდა მას. თუ ასეთი გლეხი თავის ყმობას წერილობით დაუდასტურებდა ფეოდალს და ამ უკანასკნელის ყმათა სიაში მოჰყვებოდა, მას თავდაწერილი ეწოდებოდა, თუ არა — ის თავდაუწერილი რჩებოდა. თუ გლეხს მისი მდგომარეობის განმსაზღვრელი წერილობითი საბუთი მეფისაგან ჰქონდა მიცემული, მას სიგელოსანი ეწოდებოდა. ნასყიდი ეწოდებოდა იმას, ვინც ფეოდალს სყიდვით, პირადად შეეძინა, ნაწყალობევი კი ის იყო, ვინც მეფემ ან საერთოდ მალა მდგომმა ფეოდალმა თავის ხელქვეით ფეოდალს („ყმას“) ერთგული სამსახურის ჯილდოდ უბოძა. შეწირული ისეთ გლეხს ეწოდებოდა, რომელიც ფეოდალმა ამა თუ იმ ზატს (ეკლესია-მონასტერს) გადასცა.

გლეხთა კატეგორიებს ეს სიმრავლე, — ნებიერიდან ნასყიდამდე, — ცხადი მოწმობა იყო იმ მუდმივი ბრძოლისა, რომელიც ფეოდალებსა და გლეხებს შორის წარმოებდა და ფეოდალური ურთიერთობის შინაარსს შეადგენდა.² ამასვე მოწმობდა ბეგარისა (ნატურალური თუ ფულადი რენტის) და შუშაობა-სამსახურის (შრომითი რენტის) სახეობათა სიმრავლე.

ეკონომიკურად გლეხობა მრავალფეროვანი იყო. მის ქონებად საგლეხო ფუძე ითვლებოდა, მაგრამ გლეხთა მდგომარეობა თანდათან უარესდება; მართალია იგი მკვიდრია, მაგრამ მემამულის მიწაზე ზის, ტრადიციით ამ მიწის მფლობელია, მაგრამ იგი ვალდებულია ბეგარა გადაიხადოს მემამულის სასარგებლოდ.

¹ საქართველოს ისტორია, I, '1958, გვ. 181.

² იქვე.

დაბეგრილ ანუ ყმა გლეხთა კატეგორიები XVI—XVII საუკუნეებშიც ისეთივე იყო, როგორც წინა საუკუნეების დროს. არსებობდნენ „ნასყიდნი, ნაწყალობენი, მკვიდრნი, შეწირულნი, ნეზიერნი და სხვა კატეგორიების ყმები. მაგრამ XVI—XVII საუკუნეებში ამ მხრივაც ხდება ზოგი მნიშვნელოვანი ცვლილება. ჭერ ერთი, ბატონყმური ურთიერთობა თანდათან აქრობს „ნეზიერ“, ამ ნახევრად თავისუფალ ყმათა კატეგორიას და მას ათანაბრებს გლეხთა სხვა კატეგორიებთან. ამას გარდა, XVI საუკუნეში ბატონყმური ურთიერთობის შემდგომმა გამწვავებამ, რასაც ზედ ერთოდა გამუდმებული საშინაო და საგარეო ომიანობა, ჩამოაყალიბა, გააფორმა გლეხთა ახალი კატეგორიები — ბოვანო, ხიზანი, მოჭალაბე და სხვა¹.

მიწა, რასაც განსხვავებული ფენებისა და კატეგორიების გლეხები ამუშავებდნენ, მეზატონის საკუთრება იყო, გლეხი მას მხოლოდ მემკვიდრეობით, ტრადიციით ფლობდა. მეზატონის მიერ გლეხი მიწაზე იყო მიმაგრებული, მაგრამ ფაქტიურად მიწაც გლეხზე იყო მიმაგრებული.²

მსახურიც და მებეგრე (კახეთში „მოყალნე“) გლეხნიც ერთი სოციალური კლასის წარმომადგენლები არიან. მათი საერთო ეკონომიური ნიშანია წარმოების ძირითად საშუალებასთან — მიწასთან დამოკიდებულების ხასიათი. არც მსახური, არც მებეგრე (მოყალნე) ფეოდალურ საზოგადოებაში მიწის მესაკუთრე არ არის. მსახურს ისევე, როგორც მებეგრეს, მიწა უმთავრესად მიღებული აქვს სამემკვიდრეო მფლობელობაში და ამ მიზეზითაა დაქვემდებარებული მიწის მესაკუთრე ფეოდალისადმი. ეს არის ფეოდალური საზოგადოების ეკონომიური საფუძველი.³

XVI—XVIII საუკუნეებში დასავლეთი საქართველო პოლიტიკურად დაქუცმაცებულია და ეკონომიკურად დაქვეითებულია. გლეხთა ვალდებულებანი თანდათანობით მძიმდება. გლეხს უკვე დიდი ხანია დაკარგული აქვს ეკონომიური და პირადი დამოუკიდებლობა. იგი მიჩაქვულია მეზატონის მიწაზე და ბატონის ნებართვის გარეშე წასვლა არ შეუძლია.⁴

მამულიანობის თვალსაზრისით გლეხები იყვნენ ორი სახისა, ერთნი — მკვიდრი გლეხები, რომელთაც მამული ჰქონდათ და მეო-

¹ საქართველოს ისტორია, I, გვ. 310, 311.

² ნ. ასათიანი, გლეხობა XVI—XVIII საუკუნეების კახეთის სამეფოში (ბელნაწერი), გვ. 166.

³ იქვე.

⁴ საქართველოს ისტორიის ნარკვევები, IV, 1973, გვ. 189.

რენი — უმიწო. უმამულო; მათ ბოგანო ეწოდებოდათ (იხ. ჩვე-
მოთ).

დასავლეთ საქართველოში გლეხთა სოციალური დანაწილების
შესახებ ცნობა მოგვეპოვება 1470—1474 წლების ძეგლში „მცნე-
ბა სასჯულო“. იგი ჩამოთვლის წოდებებს: „თავადნი, აზნაურნი,
გინა აზნაურისშვილი, მსახურნი გინა გლეხნი“.¹ „მცნება სასჯუ-
ლოში“ წარმოდგენილია ორი დაბალი წოდება: მსახურნი და გლეხ-
ნი, მაგრამ 1543—1549 წლების ძეგლი „სამართალი კათალიკო-
ზისა“ მხოლოდ გლეხებს ასახელებს. აქ დასახელებულია: თავადის-
შვილი, აზნაურისშვილი და გლეხი.² ასევე მსახურის გარეშე ასა-
ხელებს გლეხს ბაგრატი III-ის 1527 წლის შეწირულების წიგნი³
და ვახუშტი აბაშიძის XVI საუკუნის შეწირულების წიგნი.⁴

მაშასადამე, ტერმინ „გლეხს“ ჰქონდა ორგვარი მნიშვნელობა:
ფართო მნიშვნელობით ის აღნიშნავდა მთელს მიწისმოქმედ მო-
სახლეობას, როგორც მაღალი, ისე დაბალი ფენისას, ხოლო უფრო
ვიწროდ, ისე, როგორც ის ნახმარია „მცნება სასჯულოში“, აღ-
ნიშნავდა მხოლოდ დაბალი ფენის მიწის მფუძს.⁵

ტერმინი გლეხი (სამეგრელოში მოინალე) XVII საუკუნეშიც
იხმარება ზოგადი მნიშვნელობით: იქ, სადაც გლეხია დასახელე-
ბული, მსახურიც იგულისხმება.⁶

ტერმინი გლეხი იხმარება ვიწრო მნიშვნელობითაც. მაგალითად,
კაცხის საბუთში მოხსენიებულია „მსახურნი“ და „გლეხნი“⁷. იმავე
პერიოდის დავით კათალიკოსის წყალობის წიგნში დასახელე-
ბულნი არიან „აზნაურისშვილნი, მსახურნი და გლეხნი“⁸.

ამრიგად, XVI—XVII საუკუნეებში არსებობს ორი საგლეხო
კატეგორია: „მსახური“ და „გლეხი“. მაგრამ ეს ორი კატეგორია

¹ ი. დოლიძე, ქართული სამართლის ძეგლები, ტ. III, გვ. 224, იხ. აგ-
რეთვე საქცენტრარქივი, ფონ. 1448, საქ. 5020.

² ს. კაკაბაძე, სამართალი კათალიკოზისა და მისი შედგენის დრო, ტფ-
1913, გვ. 3—5.

³ ს. კაკაბაძე, დასავლეთ საქართველოს საეკლესიო საბუთები, I, ტფ-
1921, გვ. 9, იხ. საქცენტრარქივი, ფონ. 1449, საქ. 1672.

⁴ იქვე, გვ. 21—26. იხ. აგრეთვე საქცენტრარქივი, ფონ. 1449, საქ. 1583.

⁵ ლ. მუსხელიშვილი, დასახ. ნაშრ., გვ. 271.

⁶ ს. კაკაბაძე, დასავლეთ საქართველოს საეკლესიო საბუთები, I, გვ.
78, 84.

⁷ ს. კაკაბაძე, საისტორიო კრებული, III, გვ. 56.

⁸ საქართველოს სიძველენი, II, გვ. 89.

შრავალფეროვანი იყო და თითოეული მათგანი ნაწილდებოდა რამდენიმე ქვეკატეგორიად.

დაბეგრული გლეხები XVI საუკუნეში იყოფოდნენ ორ ძირითად ფენად: მეტვირთედ და მომუშავეებად. ეს ქვეკატეგორიები ერთმანეთისაგან განსხვავდებოდნენ ბატონისადმი სამსახურებრივი მოვალეობითა და გამოსაღებით. გამოსაღები მებეგრე გლეხს ერთხელ და სამუდამოდ გადაეკეთილი ჰქონდა და მკვეთრი ცვლილება ამ ხაზით არ შეიმჩნევა, თუ არ ჩავთვლით გადასახადების საერთო მომატებას გლეხთა მთლიანი ფენის ექსპლოატაციის ზრდის საფუძველზე.

XVII საუკუნისათვის მონალე გლეხები სამი ფენისაგან შედგებიან: მეტვირთე, მომუშავე და მონალე. ეს ფენები ერთმანეთისაგან განსხვავდებიან საბატონო სამსახურითა და გამოსაღებით.

ასევე XVI საუკუნეში დაბეგრული მსახური ორ ფენად — მოსამსახურედ და მოლაშქრედ იყოფოდა, XVII საუკუნეში დაბეგრული მსახური ხუთი ფენისაგან შედგება: 1. მეტვირთე, 2. მომუშავე, 3. მონადე, 4. მოსამსახურე და 5. მოლაშქრე.¹

აღნიშნულიდან ჩანს, გლეხოზა ერთ მთლიან სოციალურ ფენას არ წარმოადგენდა, დროთა განმავლობაში მისი უფლებრივი და ეკონომიკური მდგომარეობა იცვლებოდა, ამის მიხედვით იცვლებოდა სოციალური აღნაგობაც.

სხვა ქართველ მკვლევარებთან ერთად, პროფ. ო. სოსელიაც იმ აზრისაა, რომ „განვითარებული ფეოდალიზმის ხანაში გლეხოზა, ეკონომიკურ და სოციალურ-უფლებრივი თვალსაზრისით, ერთ მთლიან სოციალურ ფენას არ წარმოადგენდა. დროთა განმავლობაში იცვლებოდა გლეხოზის სოციალური აღნაგობაც“².

გლეხები კუთვნილების თვალსაზრისით განირჩეოდნენ: ა) სამეფო ან სამთავრო, ბ) სამონასტრო-საეკლესიო და გ) საბატონო (თავადის, აზნაურის)³.

განვითარებული ფეოდალიზმის ხანაში (XII საუკუნე) დასრულდა გლეხთა მიწაზე მიმაგრების პროცესი. აღბუღას კანონების მიხედვით ბატონს თავისი ყმა შვიდი წლის განმავლობაში შეუძლია ძებნოს და უკან დააბრუნოს, ხოლო თუ ამ ხანში ვერ იპოვის, ეს ყმა მისგან თავისუფალია⁴. ვახტანგ VI-მ ეს კანონი

¹ ლ. მუსხელიშვილი, დასახ. ნაშრ., გვ. 312.

² ო. სოსელია, ფეოდალური ხანის დასავლეთ საქართველოს ისტორიიდან. თბ., 1966. გვ. 67.

³ იქვე.

⁴ აღბუღას კანონი, მუხლი 78.

30 წლამდე გაზარდა¹. რუსეთში ჯერ ხუთი წელიწადი იყო.² შემდეგ 10—15 წელი, ხოლო 1649 წელს ალექსი მიხეილის ძემ ვადა მოსპო და მებატონეებს ნება დართო ყმა უფადოდ ეძებნათ.³

ალბულასა და ვახტანგის კანონებში დიდი სხვაობაა. ალბულას კანონები ყმა გლეხებს ქონებრივ და პიროვნულ უფლებას ანიჭებენ. ვახტანგის კანონმა ყმა გლეხს უფრო შეუმცირა თავისუფლება და მოაკლო ქონებრივი უფლება.

ალბულას კანონით გლეხს აქვს საკუთარი სარჩო, რომელიც შეუძლია თან წაიღოს ერთი ადგილიდან მეორეზე გადასვლისას. კარდა ამისა, გლეხს ერგება მესამედი ნაწილი იმ მოძრავი ქონებისა, რომელიც თავისი შრომით შესძინა ბატონს. გლეხს აქვს უფლება ბატონის ხელის მოწერით გაყიდოს და დააგირაოს მამული. გლეხს, რომელიც ახალ ბატონს მიეწერა, შეუძლია დაბრუნდეს ძველ ბატონთან, ეს უფლება ვრცელდება შვილიშვილამდე.

თუ შვიდი წლის განმავლობაში ყმა გლეხი არ დაბრუნდა და არც ძველმა ბატონმა მოიკითხა იგი, წინანდელი ბატონი კარგავს უფლებას წაიყვანოს დაკარგული გლეხი თავისთან.⁴

ალბულას კანონმდებლობა არ არჩევს ნაბოძებს, ნასყიდს და თავისი ნებით მისულს. მაგრამ როგორც ჩანს, დროთა განმავლობაში ყმის კეთილმდგომარეობა გაუარესდა. ვახტანგის კანონი უკვე ასხეავენს ნასყიდს, ბოძებულსა და თავისი ნებით მისულს. ვახტანგის კანონმა შეაევიწროვა ყმა და აღიარა, რომ „ყმისა ყველა ბატონისა არის“.

ალბულას კანონმა იცის მხოლოდ დროებითი მოვალე, რომელსაც შეუძლია გადაიხადოს ვალი და გათავისუფლდეს.⁵

განვითარებული ფეოდალიზმის ხანაში გლეხი განირჩეოდა: ა) მკვიდრი და ბ) გარეთმოსული. ორივე ჯგუფში იყვნენ გლეხების სხვადასხვა უფლებრივი კატეგორიები: 1. ნებიერი, 2. ნასყიდი, 3. ნაწყალობევი და 4. შეწირული.⁶

ამ საუკუნეებში დასავლეთ საქართველოში საკმაოდ ვხვდებით ნებიერ ანუ ნებით მოსულ გლეხებს, განსაკუთრებით აფხაზეთსა

¹ ვახტანგის კანონი, მუხლი 202, ვახტანგ VI სამართლის წიგნი, თბ., 1955.

² სსრ კავშირის ისტორია, VII კლასის დამბმ. სახელმძღვანელო, თბ., 1973, გვ. 164.

³ იქვე, გვ. 180.

⁴ ქართული სამართლის ძეგლები, ტ. I, ალბულას კანონი, გვ. 78.

⁵ იქვე.

⁶ საქართველოს ისტორია, I, დამბმარე სახელმძღვანელო, თბ., 1957, გვ.

და სვანეთში, სადაც გლეხთა დაურევების პროცესი ჯერ კიდევ დამთავრებული არ იყო¹.

თავისუფალი გლეხის ყმობა მემამულესთან იმით იყო გამოწვეული, რომ გლეხი გაჭირვებას განიცდიდა, მას მიწა-წყალი არ ჰქონდა ან არ ჰყოფნიდა, მფარველი, დამცველი სჭირდებოდა.

ნებით მოსული გლეხი თავისუფლებას ინარჩუნებდა და უფლება ჰქონდა თავის ბატონს ყმობოდა². თუმცა მებატონისაგან იმის ცდასაც ჰქონდა ადგილი, რომ ნებიერი გლეხი სამუდამოდ დაეყმეებინა და თავის მკვიდრ ძირ ყმად ექცია.

გვიანი ფეოდალიზმის ხანაში, ექსპლოატაციის ზრდის პირობებში, მკვიდრსა, ნასყიდსა, ნაწყალობევისა და ნებიერ ყმა-გლეხთა შორის განსხვავება თანდათან ისპობა. გლეხობის ფართო მასა ორ ძირითად ფენად იყოფა: მსახურებად და დაბეგრულ გლეხებად³.

მსახური

მსახურთა ინსტიტუტი ფეოდალური ურთიერთობის ყველა საფეხურზე ჩანს და საქართველოს ყველა ნაწილისათვის არის დამახასიათებელი. მსახური ჰყავს მეფეს, ეკლესიას, ფეოდალს; იგი გლეხთა კატეგორიაში თავსდება, მაგრამ მისი მოვალეობა შედარებით საპატიოა და ამიტომ გლეხთა სხვა კატეგორიებისაგან საგრძნობლად განსხვავდება. ეს განსხვავება ოფიციალურ საკანონმდებლო ძეგლებშიც არის ასახული⁴.

მებატონეს თავისი ფეოდალური მეურნეობის გაძღოლისა და საფეოდალოში დისციპლინის განმტკიცებისათვის ესაჭიროება ერთგული პირები თვით გლეხებიდანაც. ეს განსაკუთრებით საჭირო შეიქმნა ბატონყმობის პერიოდში; ამ დროს კლასობრივი წინააღმდეგობა მებატონეებსა და ყმა-გლეხობას შორის უკიდურესად არის გაზრდილი. ამიტომ მებატონის კარზე ყმა-გლეხთა შორის მსახურს პრივილეგიური მდგომარეობა უკავია. მებეგრე გლეხებთან შედარებით მას უფრო საპატიო სამსახური აკისრია და საბატონო გამოსაღებისაგან მთლიანად ან ნაწილობრივ გათავისუფლებულია, მაგრამ მსახური მაინც თავისი პატრონის ყმა-გლეხია, მებატონეს შეუძლია მსახური გაყიდოს, გაამზიეთოს, დასაჯოს და სხვა.

¹ ო. სოსელია, დასახ. ნაშრ., გვ. 69, 70, 73.

² იქვე, გვ. 73—75.

³ იქვე, გვ. 76.

⁴ დ. გვრიტიშვილი, დასახ. ნაშრ., გვ. 186.

მსახურთა ფენა დროისა და პირობების მიხედვით ცვლილებებს განიცდის. ბატონყმური ურთიერთობის განვითარებასთან ერთად იგი თანდათან მიექანება დაბეგრილ გლეხთა რიგებისაკენ, მაგრამ მებატონეები იძულებული არიან მაინც შეინარჩუნონ გლეხთა ეს ფენა. მიუხედავად იმისა, რომ მსუბუქად დაბეგრილი მსახურნი დასავლეთ საქართველოში მებეგრე გლეხებად გადაიქცნენ, მსახურთა მეორე ნაწილი — დაუბეგრაფნი გასაოცარ სიმყარეს იჩენდნენ¹.

მსახური გლეხზე მალა და აზნაურზე დაბლა იდგა, იგი პრივილეგიურ ფენას ქმნიდა. ბექა-აღბულას კანონის მიხედვით, მსახურის ჰისხლი ღირდა 1000 თეთრი (ხოლო თუ იგი აზნაურის მოვალეობას ასრულებდა — 1200 თეთრი), გლეხისა კი — ოთხასი².

ვახტანგის კანონის მიხედვით, მსახურის სისხლი 240 მანეთი ღირს, ხოლო გლეხისა 120 მანეთი³. როგორც ამ კანონებიდან ჩანს, მსახური XVI—XVII საუკუნეებში დაქვეითებას განიცდის. ამან გამოხატულება ჰპოვა მსახურის სისხლის ფასის შემცირებაში. ბექა-აღბულას კანონით, მსახურის სისხლი გლეხის სისხლზე ორნახევარჯერ მეტია, ხოლო ვახტანგის კანონის მიხედვით — ორჯერ მეტი.

მსახურს ბატონის მიმართ „საპატიო სამსახური — ლაშქრობა-მხლებლობა და მასპინძლობა“ ევალებოდა, პირადი თავისუფლება მასაც დაკარგული ჰქონდა. კანონი 30 წლის განმავლობაში დაკარგული ყმის ძებნის შესახებ მსახურზეც ვრცელდებოდა.

მსახურები ორ ძირითად ფენად იყოფოდნენ: 1. მსახური-მოლაშქრენი და 2. მსახური-მოხელეები.

მსახური-მოლაშქრეები თავიანთი ფუნქციის მოლაშქრობა-მხლებლობის გარდა ფეოდალის კარზე ქმნიდნენ რაზმებს და ასრულებდნენ პოლიციურ ფუნქციებს გლეხობის მიმართ⁴. ხოლო მსახურთა მეორე ფენა — მსახური-მოხელეები: მოურავი, ნაცვალი,

¹ ლ. მუსხელიშვილი, დასახ. ნაშრ., გვ. 312.

² ქართული სამართლის ძეგლები, ტ. 1, ი. დოლიძის რედ., გვ. 428, 29 მუხლი.

³ იქვე, გვ. 489, მუხლი 32—33. შემდეგში სისხლის ფასმა იმატა. მეფე ერეკლეს დადგენით (1786 წ.) თუშისა, ანწუხისა და ქართლელის სისხლი 300 მანეთამდე ავიდა (რათა მოესპო კაცის კვლა და ავაზაკობა):

⁴ გ. აკოფაშვილი, გლეხთა კატეგორიების საკითხისათვის აღმოსავლეთ საქართველოში, მასალები საქართველოსა და კავკასიის ისტორიისათვის, ნაკვ. 34; 1962, გვ. 70.

ჩამასახლისი, მდივანი, მოლარე, იასაული, შათირი და სხვანი მსახურობდნენ ფეოდალის სამფლობელოში.¹

ამ ორ ფენას გარდა გვხვდებიან ხელოსანი-მსახურები: მკედელი, მზარეული, მელვინე, ხაბაზი და სხვ. ნ. ასათიანი მსახურთა კატეგორიიდან გამოყოფს სამ ფენას: 1. მხლებელ-მოლაშქრეებს, 2. მოხელეებს და 3. ხელოსნობით მსახურთ.²

ამრიგად, XVI—XVII საუკუნეებში მეფე-მთავრისა თუ ფეოდალის კარზე საპატიო სამსახურს მსახური ასრულებდა, ხოლო არასაპატიოს — გლეხი. მაგრამ მსახურთა ფენა საბოლოო ანგარიშით გლეხთა კლასში შედიოდა.

მსახურს თავისი სამსახურებრივი მოვალეობის შესრულები-სათვის ფეოდალი აძლევდა მიწას, მაგრამ ეს მიწა მემკვიდრეობით მფლობელობაში არ გადადიოდა. ვახტანგი ამბობს თავის განჩინებაში, რომ „მსახური თავის მამულს ვერ გაჰყიდის, იმიტომ რომ ის მამული, ჩვენი მსახური ვინც იქნება, იმას უნდა ჰქონდეს, და თუ ან გაჰყიდის ან იყიდის ვინმე, განმსყიდველსაც და მყიდველსაც დიდად ავად მოვეპყრობით, რადგან მსახურთ მამული, ვინც ჩვენი მსახურნი იქნებიან, იმათთვის არის განწესებული, სხვათ არ მიეცემა“.³

მიუხედავად იმისა, რომ მსახურთა მიწა მემკვიდრეობით, მამიდან შვილზე არ გადაიციმოდა, მსახურთა მცირე ნაწილს საკუთარი გლეხი ჰყავდა⁴.

XVI—XVII საუკუნეთა მანძილზე დაუბეგრავ მსახურთა ფენა ერთგვარ სიმყარეს აღწევს. ეს იმით აიხსნება, რომ აზნაურთა თუ მსახურთა სამხედრო რაზმების გარეშე არსებობა მსხვილ ფეოდალს არ შეეძლო, ვინაიდან ურჩი ყმების დასასჯელად თუ მეზობელ თავადთან დავის დროს სამხედრო ძალა აუცილებელი იყო.⁵ ყველა მსხვილი ფეოდალი მსახურთა ხარჯზე ზრდიდა სამხედრო რაზმებს, რომელნიც პატრონის ნება-სურვილის აღმსრულებელნი იყვნენ.

¹ საქართველოს ისტორიის ნარკვევები, ტ. IV, 1973, გვ. 191.

² ნ. ასათიანი, დასახ. ნაშრ., 122.

³ საქართველოს სიძველენი, ტ. I, გვ. 195.

⁴ „დავთარი ქუთაისის საყდრის გამოსავალი ბეგრისა, შედგენილი 1578 წელს, ძველი საქართველო, ტ. IV, გვ. 31; მართებს მკედლიძეს ლომის — „კაცსა ღვინო ათიანით კოკითა თორმეტი და პურის ქამა და სამსახური აქუს სამი პარტაბტი“ (ე. ი. სამი გლეხი ჰყავს).

⁵ საქართველოს ისტორიის ნარკვევები, ტ. IV, 1973, გვ. 193.

აღნიშნულიდან გამომდინარე, ნ. ასათიანი ასკენის, რომ „მსახურთა ფენის არსებობა გლახთა ერთიან სოციალურ კლასში სთიშავდა მას, აფერხებდა გლახთა ერთიან აქტიურ ანტიფეოდალურ გამოსვლას. ამას გარდა, ფეოდალი თვით მსახურთა გამოყენებით ახშობდა გლახთა კლასობრივ წინააღმდეგობას“.¹

როგორც ზემოთ აღვნიშნეთ, მსახური შედიოდა გლახთა კლასში, მაგრამ მისი მოვალეობა და უფლება განირჩეოდა ყმა-გლახთა უფლება-მოვალეობისაგან. მსახურთა მოვალეობას უმთავრესად შეადგენდა სამსახური და ლაშქრობა. მსახური ბატონის მიერ მიცემულ მიწაზე იჯდა.

თვით მსახურებიც არ შეადგენდნენ ერთ მთლიან ფენას. XVI საუკუნის დასაველეთ საქართველოში მსახურთა ერთი ნაწილი მსუბუქად იყო დაბეგრული, მეორე კი — სულ დაუბეგრავი, მაგრამ XVII საუკუნეში მნიშვნელოვანი ცვლილება მოხდა. მსუბუქად დაბეგრულ მსახურ გლახთა კატეგორია ფაქტიურად გაქრა და ყმა-გლახთა კატეგორიაში გადავიდა.

იმ გარემოებას, რომ XVI საუკუნის წყაროებში („სამართალი კათალიკოზისა“², ბაგრატ III-ის 1527 წლის წყალობის წიგნი³ და ვახუშტი აბაშიძის XVI საუკუნის შეწირულების წიგნი⁴) თავადისა და აზნაურის გარდა დასახელებულია მხოლოდ გლახი, ლ. მუსხელიშვილი იმით ხსნის, რომ XVI საუკუნეში „გლახი“ ფართო მნიშვნელობითაა ნახმარი და მასში მსახურიც შედის.⁵ ო. სოსელია არ ეთანხმება ამ მოსაზრებას და თავის მხრივ დასძენს: „თუ XV საუკუნეში მებეგრე გლახისაგან მსახური ასე თუ ისე განირჩეოდა, XVI საუკუნეში იგი თავისი მდგომარეობით (ბატონთან დამოკიდებულებით, ვალდებულებით) მებეგრე გლახს დაუახლოვდა, მებეგრე გლახისაგან მისი გარჩევა არც ისე ადვილია, ამიტომაც საკვირველი არაა, თუ წყაროებში მსახური გლახთა ფართო მასაში არის ნაგულისხმევი“.⁶

ტერმინ „გლახის“ ქვეშ რომ მსახურიც იგულისხმება, ამას ადასტურებს 1545 წლის გელათის დავთარი; მაგალითად, ნაცვალის შამ-

¹ ნ. ასათიანი, დასახ. ნაშრ., გვ. 177.

² ს. კაკაბაძე, სამართალი კათალიკოზისა და მისი შედგენის დრო, ტფ., 1913.

³ ს. კაკაბაძე, დასაველეთ საქართველოს საეკლესიო საბუთები, I, 1921, გვ. 3, საქცენტრარქივი, ფონ. 1449, საქ. 1672.

⁴ ს. კაკაბაძე, დასახ. ნაშრ., გვ. 21, საქცენტრარქივი, ფონ. 1449, საქ. 1583.

⁵ ლ. მუსხელიშვილი, დასახ. ნაშრ., გვ. 217.

⁶ ო. სოსელია, დასახ. ნაშრ., გვ. 77:

რიკიშვილი მსახურია, მას ცხენით სამსახური მართებს, მაგრამ იგი რიონელ გლეხთა სიაშია მოთავსებული.¹

ასევე ხოირის საკათალიკოზო ყმები მსახურები არიან, სხვა ბეგარასთან ერთად მართებთ ლაშქრობა და სამსახური, მაგრამ გლეხთა სიას არიან მიწერილი.²

ბევრ საბუთში მსახურები არ არიან ნახსენები, ისინი გლეხთა შორის იგულისხმებიან.

1550—1570 წლების ვახუშტი აბაშიძის შეწირულების წიგნი ამბობს: „სალმრთოდ გამოიღებდნენ რასაცა კუამლი ამოსდიოდეს ბატონმან აზნაურიშვილმან და გლეხმან“.³ ასევე 1527 წლის წყალობის წიგნში ბაგრატ III აღნიშნავს: „ანუ თავადნი ანუ აზნაურისშვილნი ანუ გლეხნი.“⁴ ან კიდევ 1569 წლის გიორგი II-ის შეწირულების წიგნში დასახელებულნი არიან მეფე, თავადი, აზნაური და გლეხი,⁵ უფრო ადრინდელ 1470—1474 წლების შამადავლე დადიანის წიგნი საკათალიკოზო სარგოს შესახებ ასახელებს აზნაურს და გლეხს.⁶ როგორც ვხედავთ, მსახურები არც აქაა ნახსენები.

მებეგრე გლეხისაგან რომ მსახურის გარჩევა აღვილი არ არის, ამას არქანჯელო ლამბერტიც ადასტურებს. მისი ცნობით, „მსახურები ანუ გლეხები ჩვეულებისამებრ, მტკიცედ ასრულებენ თავის სამსახურს და იხდიან იმ ბეგარას, რაც თავიანთ ბატონის ძველიდან კმართვებიათ (ე. ი. წინა საუკუნეებიდან), ჩვეულებრივ მათი მოვალეობა ის არის, რომ ოჯახის ერთ-ერთი წევრი, მორიგეობით, ბატონს მის სახლში ემსახურებოდეს. ლაშქარსა და მგზავრობაში მსახური თან უნდა ეახლოს ბატონს ცხენით, თუ ცხენი ჰყავს, ან ფეხით, თუ ცხენი არა ჰყავს. ხენა-თესვისა და მოსავლის დროს მსახური ვალდებულია თავის ჯალაბით, თოხით, გუთნით და ხარე-ბით მიეხმაროს თავის ბატონს“.⁷

როგორც აქედან ჩანს, მსახური და გლეხი თითქმის არაფრით განსხვავდებიან ერთმანეთისაგან: ერთიც დაბეგრილია და მეორეც, მხოლოდ, მოინალეს (გლეხს), გარდა ზემოხსენებული ვალდებულებისა, უფრო სათაკილო ტვირთი ადევს—მისი მოვალეობაა ზამთრისათვის ბატონს შეშა მოუშხადოს; როცა ბატონი სადმე მიემგზავრე-

¹ აფხაზეთის საქ. გლეხების დიდი დავთარი, გვ. 62; ს. ც. ა. ფონ. 1448. საქ. 3322.

² იქვე, გვ. 56.

³ დას. საქ. საეკ. საბ. I, გვ. 26; ს. ც. ა. ფონ. 1449, საქ. 1583.

⁴ დასახ. ნაშრ., გვ. 9.

⁵ დასახ. ნაშრ., გვ. 19.

⁶ დასახ. ნაშრ., გვ. 2.

⁷ არქანჯელო ლამბერტი, დასახ. ნაშრ., გვ. 27—28.

ბა, მისი ბარგი (ჭურჭლეული, სასმელ-საქმელი, ლოგინი) მოინალეშუნდა უზიდლოს თავისი ზურგით. ნება არა აქვს ცხენით ეახლოს, კიდევ რომ ჰყავდეს ცხენი!..

საკათალიკოსო დაფთრების მიხედვით ჩანს, რომ საეკლესიო გლეხები შედარებით უკეთეს პირობებში იყვნენ, ვიდრე საბატონო გლეხები.

საეკლესიო გლეხები გარკვეული ბეგარის გარდა არაფერს იხდიდნენ, ხოლო საბატონო გლეხების შესახებ არქანჯელო ლამბერტი აღნიშნავს, რომ გარდა პირადი სამსახურისა, ყოველი გლეხი ვალდებულია ბატონს, მისი მოთხოვნისამებრ, აჭამოს წელიწადში ერთხელ, ორჯერ ან სამჯერ, ჩვეულებისა და იმის მიხედვით, თუ რამდენი მიწა-ადგილი აქვს გლეხს. ვინც უფრო შეძლებულია, ძროხა უნდა მიუყვანოს და ურმით ღომი, პური, ღვინო და ქათმები მიუზიდოს, ვისაც ნაკლები მიწა-ადგილი აქვს უნდა მიუყვანოს ერთი ღორი, სამი თუ ოთხი გუდა ღვინო და ერთი ტომარა ღომი... გარდა ამისა, ყველანი მზად უნდა იყვნენ მიიღონ თავიანთ სახლში და შეძლებისამებრ გაუმასპინძლდნენ უცხო კაცს, რომელსაც ბატონი მათთან დასადგომად გამოგზავნის. როცა ბატონს სტუმრები მიუვა, ყოველი ყმა ვალდებულია ძღვნად მიართვას პური, ღვინო, ქათმები, ყველი და ხილი. დიდ ღდესასწაულებში ჩვეულებად არის მიღებული, რომ ყმა ბატონს გაუმასპინძლდეს. ყმა უმასპინძლებოდა ბატონს აგრეთვე შობის და დიდ მარხვაში. გარდა ამისა, როცა ბატონი მოისურვებს, შეუძლია მივიდეს თავის ყმასთან ვახშმად ან სადილად და ყმა ვალდებულია გაუმართოს კარგი მასპინძლობა.

„სამსახური“ სამი მნიშვნელობით იხმარებოდა: 1) ლაშქრობა, 2) საკუთრივ სამსახური და 3) მუშაობა.

ლაშქრობა ყველას ვეალებოდა, როგორც საქვეყნო-სავალდებულო სამსახური; მაგალითად, შეწირულ ყმას ყოველგვარი სამსახურისაგან ათავისუფლებდნენ. გარდა „ლაშქრობა-ნადირობისა“².

არქანჯელო ლამბერტის სიტყვით, ოდიშში ვერავინ ვერ გაითავისუფლებს თავს ლაშქრობისაგან, რაც უნდა დიდი გვარის კაცი იყოს ან რაც უნდა ავადმყოფი იყოს. ლაშქრობა შეიძლებოდა ცხენითაც და ფეხითაც.³

საკუთრივ სამსახური იყო როგორც საპატიო. ისე სათაკილო. იგი ცხენითაც სრულდებოდა და ფეხითაც. საპატიო სამსახურს ას-

¹ არქანჯელო ლამბერტი, დასახ. ნაშრ., გვ. 27—28.

² საისტოროო კრებულ, III, გამოსცა ს. კაკაბაძემ, თბ., 1928, გვ. 50

³ არქანჯელო ლამბერტი, დასახ. ნაშრ., გვ. 87.

რულებდა მსახური, სათაკილოს — გლეხი (მოინალე), საპატიო სამსახური ცხენით სრულდებოდა, სათაკილო — ფეხით, ლამბერტის გადმოცემით, მოინალე თავის ბატონს ცხენით ვერ ეახლებოდა, კიდევაც რომ ჰყოლოდა იგი.¹ საპატიო სამსახურში შედიოდა ხელოსნობით სამსახური, მოლარეობა, სახლთუხუცესობა, მოურავობა და სხვანი.² სათაკილო სამსახურად ითვლებოდა სასახლეში მუშაობა, განსაკუთრებით დამამკირებელ სამსახურად ითვლებოდა ტვირთის და ბარგის ზიდვა.³ ნ. ბერძენიშვილის გადმოცემით, გურიის ტვირთის მზიდავს ზიზლით იხსენიებდნენ.

სამსახური მსახურსაც ვეალებოდა და გლეხსაც. სამსახური ვიწრო მნიშვნელობით ეწოდებოდა ბატონის დავალებით, მისი მოთხოვნით შესრულებულ სამსახურს.

სამსახური ზოგჯერ ბატონის მიერაა დადგენილი. ასე, მაგ. „მართებს მუშაობა ორი დღე“.⁴ „მართებს სამი დღის მუშაობა“,⁵ „მართებს ერთი კვირის სამსახური“,⁶ ან კიდევ „მართებს სამსახური სასახლის, როდესაც მოვიკითხავთ“⁷ და სხვა.

ქუთაისის საყდრის დავთარში გვხვდება ტერმინი „სამსახური ოჩისა“⁸, „მართებს სახლისა და ოჩის მუშაობა“⁹ (ოჩე მეგრულად ნიშნავს ყანას), ე. ი. ოჩის სამსახური ნიშნავდა ყანაში მუშაობას. იყო აგრეთვე „ყავრით სამსახური“¹⁰, „ომფორის სამსახური“ (ქუთ. დავთ. გვ. 4), „ქურჭლის სამსახური“ (ქუთ. დავთ. გვ. 5).

მუშაობა — გულისხმობდა ბატონის სახლ-კარის მოვლა-პატრონობას, მინდორში მუშაობას. მუშაობა განსაზღვრული იყო დღიურად, მაგ., „ორი დღის მუშაობა“,¹¹ „სამი დღის მუშაობა“,¹² „კვირაში

¹ არქანქელო ლამბერტი, დასახ. ნაშრ., გვ. 28.

² ს. კაკაბაძე, დასავლეთ საქართველოს საეკლესიო საბუთები, I, ტფ. 1921, გვ. 22—23, იხ. აგრეთვე ს. ც. ა. ფონ. 1449, საქ. 1583.

³ ს. კაკაბაძე, აფხაზეთის საკათალიკოზო გლეხების დიდი დავთარი, თბ., 1914, გვ. 54—55. ს. ც. ა. 1448, საქ. 3322.

⁴ იქვე, გვ. 35; იხ. აგრეთვე ს. კაკაბაძე, დასავლეთ საქართველოს საეკლესიო საბუთები, I, გვ. 23, ს. ც. ა. ფონ. 1449, საქ. 1583.

⁵ იქვე, გვ. 35.

⁶ იქვე, გვ. 34.

⁷ იქვე.

⁸ დავთარი ქუთაისის საყდრის გამოსავალი ბეგრისა, შედგენილი 1578 წელს, ძველი საქართველო, ტ. IV, გვ. 64.

⁹ იქვე, გვ. 70.

¹⁰ იქვე, გვ. 45.

¹¹ აფხაზეთის საკათალიკოზო დავთარი, გვ. 9; ს. ც. ა. ფონ. 1448, საქ. 3322.

¹² იქვე, გვ. 22.

ორორის დღის მუშაობა¹, „ყოვლის დღის მუშაობა“² და სხვ. იყო აგრეთვე „ზვრის მუშაობა“, „სასახლის მუშაობა“, „თონხა“, „მარგლა“, „თივის თბევა“, „ყურძნის კრეფა“, „იფქლის მკა“, „ქერის მკა“, „საყდრის მუშაობა“³.

ლ. მუსხელიშვილს უამრავი ფაქტობრივი მასალა მოაქვს იმის დასადასტურებლად, რომ დასავლეთ საქართველოში მსახურთა უმრავლესობას საგლეხო ვალდებულება ჰქონდა დაკისრებული.⁴ მაგალითად, 135 კომლი მსახურიდან 63 კომლი გლეხივითაა დაბეგრული, 36 კომლი მსუბუქადაა დაბეგრული, მხოლოდ 36 კომლი არაა დაბეგრული. მათ მხოლოდ ბატონის სამსახური და მასპინძლობა ევალებათ. ხოლო ზოგიერთ სოფელში, მაგალითად, ხოირს, ოცხანას, მალაკს და ბაშს დაუბეგრავი მსახური სულ არაა.⁵ ზოგ შემთხვევაში XVI საუკუნეში მსახური უფრო მეტად არის დაბეგრული, ვიდრე გლეხი.⁶

მსახურთა მდგომარეობა იმდენად იცვლება, რომ XVI საუკუნისაგან განსხვავებით, XVII საუკუნეში მათ მუშაობა დაეკისრა და ზოგიერთი მეტეირთეც კი გახდა.⁷

პროფ. ო. სოსელია იზიარებს იმ აზრს, რომ მსახურთა ფენა თანდათან კარგავს თავის პირვანდელ პრივილეგიას; დაბეგრულ გლეხთა კატეგორიაში გადადის და მე-19 საუკუნეში მსახური, როგორც ცალკე კატეგორია, უკვე აღარ არსებობს.⁸

ო. სოსელია ასეთ ევოლუციას ხედავს მსახურთა ფენაში: „თუ მე-16-17 საუკუნეებში მსახურნი სამ ჯგუფს შეადგენდნენ: 1) მსახური. ცხენით, 2) მსახური უბრალოდ, მსუბუქად დაბეგრული და

¹ საეკლესიო საბუთები, I, გვ. 23; ს. ც. ა. ფონ. 1449, საქ. 1583.
² ქუთაისის საყდრის დავთარი, გვ. 45.
³ იქვე, გვ. 5.
⁴ ლ. მუსხელიშვილი, დასახ. ნაშრ., გვ. 280—295.
⁵ ს. კაკაბაძე, აფხაზეთის საკათალიკოზო გლეხების დიდი დავთარი, თბ., 1914, გვ. 50—51, 80—89; საქცენტრარქივი, ფონ. 1448, საქ. 3322, ე. თაყაიშვილი, დავთარი ქუთაისის საყდრის გამოსავალი ბეგრისა, შედგენილი 1578 წელს, ძველი საქართველო, ტ. IV; ლ. მუსხელიშვილი, დასახ. ნაშრ., გვ. 283—289.
⁶ მებეგრე გლეხს ქრისტესშიას ქაჯაიას „მართებს საკლავი ორი, ქათამი ორი; ღვინო გუდა ორი, ატარი ღვინო 3, 2 ზროხა მეთორმეტეს წელსა და ტვირთის ზიდვა“, ხოლო მსახურ ცისტარიას შამის მამას „მართებს 4 საკლავი, ქათამი 4, ურემი ღვინო ერთი, ატარი ღვინო 9, მეთორმეტეს წელიწადს მთელი ზროხა და ლაშქრობა“, იხ. ს. კაკაბაძე, აფხაზეთის საკათალიკოზო გლეხების დიდი დავთარი, თბ., 1914, გვ. 55.
⁷ ლ. მუსხელიშვილი, დასახ. ნაშრ., გვ. 299—300.
⁸ ო. სოსელია, ფეოდალური ხანის დასავლეთ საქართველოს ისტორიიდან, თბ., 1966, გვ. 79.

3) მსახური უბრალოდ, თავ-ბეგრიტ დაბეგრილი, მე-18 საუკუნის მეორე ნახევრიდან მსახურთა მხოლოდ ერთი-მეორე — ჯგუფი რჩება. ცხენით მსახურთა ჯგუფის მოვალეობას ბატონის წინაშე ახლა როგორც წესი, წვრილი აზნაურები ასრულებენ. ამ ჯგუფის მსახურნი ან აღწევებულან, აზნაურთა ფენაში გადასულან, ან ლამცირებულან, მეორე ჯგუფში მოქცეულან, ხოლო მესამე ჯგუფი მებეგრე გლეხთა კატეგორიაში გადასულა. მსახურთა დარჩენილი მცირერიცხოვანი მეორე ჯგუფის ვალდებულებაჲ დამძიმებულა¹.

მსახურს გლეხისაგან ასხვავებს ის, რომ მის ვალდებულებაში მუშაობა არ შედის, ხოლო ტვირთით მისი დაბეგრა ნიშნავს არასაპატიო, დაბეგრილ გლეხთა კატეგორიაში მოხვედრას. უფრო მოგვიანებით მსახურთა კატეგორია მთლად ქრება და როგორც ცალკე ფენა XIX საუკუნეში აღარ არსებობს.²

მებეგრე გლეხები. (სამეგრელოში „მოინალეები“. მეგრული სიტყვა „მოინალე“ ქართულ „მოსამსახურეს“ შეესაბამება, მაგრამ შინაარსობრივ „მსახურს“ არ აღნიშნავს. მოინალე მსახურზე უფრო დაბლა იდგა)³. მოსახლეობის ძირითად კატეგორიას მებეგრე გლეხები წარმოადგენენ, მათი მთავარი მოვალეობა ბეგარის გადახდა და მუშაობა იყო. ბეგარა ფართო მნიშვნელობით ყოველგვარ ნატურალურსა და ფულად გადასახადს ეწოდებოდა, ვიწრო მნიშვნელობით ბეგარა ნიშნავდა „თავ-ბეგარას“, „მთავარ ბეგარას“, „მართალ ბეგარას“, რომლის გარდა არსებობდა „სხვა ბეგარა“ „ძღვენი“, „სამასპინძლო“ (სამეგრელოში „გოჭკომური“) და სხვ. მებეგრე-მოინალე გლეხის დამახასიათებელი ვალდებულება იყო აგრეთვე „მუშაობა“, რომელშიც იგულისხმებოდა ყოველგვარი მუშაობა და ბატონის სასახლის მეურნეობაში მონაწილეობა, ტვირთის ზიდვა, ქურის რეცხვა, ზერის მუშაობა, ხოდაბუნის მკა და სხვა მრავალი. მუშაობა თავის მხრივ განიყოფებოდა „ნიადაგ მუშაობად“ და „ნადობად“⁴.

დაბეგრილ ანუ ყმა გლეხთა კატეგორიები XVI—XVII საუკუნეებში ძირითადად ისეთივე იყო. როგორც წინა პერიოდში, მაგრამ აღნიშნულ საუკუნეებში მოხდა ზოგი მნიშვნელოვანი ცვლილება. თანდათან გაქრა „ნებიერ“ ყმათა კატეგორია და იგი გაუთანაბრ-

¹ ი. ს. სელია. ფეოდალური ხანის დასავლეთ საქართველოს ისტორიიდან, აბ., 1966, გვ. 80.

² ბ. ო. ზ. ღინი, რაფ. ერისთავი და მურიე, ბატონყმობა სამეგრელოში, ტფ., 1927, გვ. 86, ს. კაკაბაძე, მსალეები დასავლეთ საქართველოს სოციალური და ეკონომიური ისტორიისათვის, საისტორიო კრებული, I, 1928, გვ. 8.

³ საქართველოს ისტორია, I, 1958, გვ. 311.

⁴ საქართველოს ისტორიის ნარკვევები, ტ. IV, 1973, გვ. 193, 194.

და გლებთა სხვა კატეგორიებს; გარდა ამისა, XVI საუკუნეში გამუდმებული საგარეო და საშინაო ომიანობის შედეგად XVII საუკუნეში გაჩნდა გლებთა ახალი კატეგორიები — ბოვანო, ხიზანი, მოჯალაბე და სხვ.

ეკონომიკური მდგომარეობის მიხედვით აღმოსავლეთ საქართველოში მებეგრე გლებები ოთხ ჯგუფად იყოფოდნენ: 1. „ქარგი გლები“, „ქარგი კვამლი“, რომლის მამული საკომლოსაგან შედგებოდა და სრულ ბეგარას იხდიდა; 2. „შუათანა გლები“, რომელიც ნახევარ საკომლოს ფლობდა და სრულ ბეგარას არ იხდიდა, 3. „მცირე გლები“, ანუ „დაბალი გლები“, რომლის მამული ნახევარ საკომლოზე ნაკლებს შეადგენდა და ბეგარასაც ნაკლებს იხდიდა; 4. „შეუძლებელი გლები“, ანუ „დაბეგრელი გლები“¹.

პროფ. გ. ჯამბურია მიუთითებს, რომ „ასევე ოთხი ეკონომიკური ჯგუფი უნდა ყოფილიყო დასავლეთ საქართველოს მებეგრე მოინალეებშიც“², თუმცა წყაროების უქონლობის გამო ამის ზუსტად დადგენა არ ხერხდებაო, მსგავს სურათს გვაძლევს საწერეთლოს გლებთა გადასახადის აღმწერ-შემდგენელი 1828—1843 წლებში, რომლის მიხედვითაც გლებები ოთხ საგადასახადო კატეგორიად არიან დაყოფილი³.

გლებთა ოთხ კატეგორიად დაყოფის ცნობა მოიპოვება აფხაზეთის საკათალიკოზო გლებების დიდ დავთარში და საცაიშლოს გამოსავლის დავთარში.

მართალია ამ დავთრებში მითითებული არ არის მებეგრე გლებების ჯგუფებად დაყოფა, მაგრამ ბეგარის მიხედვით ნათლად ჩანს, რომ გლებები ოთხ ჯგუფად იყოფიან, რომელნიც განსხვავებული რაოდენობის ბეგარას იხდიან.

როგორც ჩანს, არსებობდა გლებთა მეხუთე კატეგორიაც, რომელიც მიწის სიმცირის გამო ნატურით არაფერს იხდიდნენ: მაგალითად, „ორ მცეხველს ბეგარა არა მართებთ სამსახურისა და მცეხველობის მეტი“ (აფხაზეთის საკათალიკოზო დიდი დავთარი, გვ. 51).

როგორც აღმოსავლეთ, ისე დასავლეთ საქართველოში გლებთა ვალდებულება თანდათან მძიმდება; მებატონე ან პირდაპირ უდიდებს გლებს ვალდებულებას, ან სხვა გზას მიმართავს.

¹ ო. სოსელია, ფეოდალური ხანის დასავლეთ საქართველოს ისტორიიდან. 1946, გვ. 142—143.

² საქართველოს ისტორიის ნარკვევები, ტ. IV, 1973, გვ. 194.

³ იქვე.

XII—XV საუკუნეების განმავლობაში „თავი ბეგარის“ გარდა, გაჩნდა „სხვა ბეგარა“. გლეხთა საგადასახადო ნორმების ზრდა და „სხვა ბეგარის“ წარმოქმნა XVI—XVII საუკუნეებში საერთო მოვლენას წარმოადგენდა.¹ ამას ადასტურებს აფხაზეთის საკათალიკოზო გლეხების დიდი დავთარი, სადაც XVI საუკუნის მეორე ნახევარში გლეხ ბაზაძეს უნდა გადაეხადა „ერთი თეთრი, 12 კოკა ღვინო, 6 საწონი ღომი, ერთი კოდი პური, ძღვენი, სამი ქათამი და მუშაობა“². იმავე ბაზაძეს XVII საუკუნის პირველ ნახევარში თეთრის გადასახადი 10-ჯერ გაუდიდდა, ხოლო „ქურის გამოსაღები“ დამატა³.

აღნიშნულ პერიოდში გლეხ ცოტნიაშვილს მართებდა: 13 თეთრი, 16 კოკა ღვინო, 8 საწონი ღომი, 1 კოდი პური, 1 ქერი, ძღვენი, 3 ქათამი, და მუშაობა⁴. ხოლო XVII საუკუნის პირველ ნახევარში ცოტნიაშვილს ღვინის გადასახადი 5 კოკით გაუზარდეს⁵.

XVII საუკუნეში სოფ. ნაგუზაუში მცხოვრებ გლეხებს ბეგარა პირვანდელ მართებულთან შედარებით ათ-ათი კოდი ღომით და ექვს-ექვსი კოკა ღვინით მეტი შეუტანიათ.⁶

მომდევნო XVIII საუკუნეში გლეხთა გადასახადები კიდევ უფრო დიდდება, ამას თვით დოკუმენტები „ღალადებენ“: „უამთა ვითარებისაგან დიდი ბეგარა დაგდებოდათ“⁷, აღნიშნულია წყაროებში.

საბატონო ვალდებულებების გარდა გლეხს ევალებოდა გადაეხადა სახელმწიფო გადასახადი, რასაც „საური“ და „საუდიერო“ ეწოდებოდა⁸.

¹ საქართველოს ისტორია, I, 1958, გვ. 314.

² ს. კაკაბაძე, აფხაზეთის საკათალიკოზო გლეხების დიდი დავთარი, 1913, გვ. 64; ს. ც. ა. ფონ. 1448, საქ. 3322.

³ იქვე, გვ. 5—6.

⁴ იქვე, გვ. 64.

⁵ იქვე, გვ. 5.

⁶ იქვე, 5—6.

⁷ ს. კაკაბაძე, დასავლეთ საქართველოს საეკლესიო საბუთები, I, 1921, გვ. 93, 106, 141; დოკუმენტები... II, გვ. 286, № 448.

⁸ „საურის“ გადასახადი მონღოლების დროიდან შემოიღეს. აღმოსავლეთ საქართველოში მას „სათათრო“, ხოლო დასავლეთ საქართველოში „სახვანთქრო“ ეწოდებოდა. „საუდიერო“ კი დასავლეთ საქართველოში თურქების ბატონობის დროიდან გაჩნდა და „საძალოდ სათხოვარს“ ნიშნავს.

„საური“ და „საუდიერო“ გადასახადს დასავლეთ საქართველოს სხვადასხვა კუთხეში სხვადასხვა რაოდენობით იხდიდნენ.¹

მოჯალაბე („ლოლმახორე“ სამეგრელოში) გლეხთა კატეგორია მხოლოდ დასავლეთ საქართველოში გვხვდება. აღმოსავლეთ საქართველოში მოჯალაბე „სახლეულის“, „ბიჭის“ და „გოგოს“ სახელითაა ცნობილი.

მოჯალაბეს მიწა არა აქვს, იგი ბატონის კარ-მიდამოზე ცხოვრობს თავისი ცოლ-შვილით და ყველაზე სათაყილო და მძიმე სამუშაოს ასრულებს (პირუტყვისა და მისი სადგომის მოვლა, შეშის ჩეხვა, საფქვავეის ზიდვა, ღომის ცეხვა, პურის რჩევა და სხვ.); მოჯალაბე ზოგჯერ გლეხადაც კი არ იწოდებოდა.

რაფ. ერისთავის აღწერის მიხედვით „მოჯალაბე ბატონს შეეძლო გაეყიდნა და მზითვეში გაეყოლებინა როგორც მთელის ოჯახით, ისე ცალ-ცალკე წევრი ოჯახისა. თავის ოჯახიანად მოჯალაბე ბატონის ეზოში ცხოვრობს, თავს ირჩენს ბატონის ნასუფრალით, აგრეთვე ღომის გაცეხვის შემდეგ ნარჩენ ქატოთი, სიმინდით, გოგრით, ლობიოთი, მხალით, რომელთაც თვითონვე მოიწევდა ბატონის ბოსტანში; მასვე ეკუთვნის შიგნეული ბატონის ეზოში დაკლული საქონლისა. ტანთ იცვამენ ბატონისა და მისი ოჯახის წევრების გამონაცვალს ან ვისმე ნაჩუქარს ძველძულებს, საერთოდ დაგლეჯილი და ძონძები აცვიათ“².

ზემოთ აღნიშნულიდან ნათლად ჩანს, რომ მოჯალაბეს სრული ბატონ-პატრონი ბატონია და მისი მდგომარეობა მონის მდგომარეობას უახლოვდება.

მოჯალაბეთა კატეგორია XVII საუკუნიდან ჩანს, მაგრამ ეს იმას არ ნიშნავს, რომ ისინი ადრე არ იყვნენ, რადგან სოციალური ფენის გაჩენა-ჩამოყალიბება ხანგრძლივი პროცესია. როგორც სამეცნიერო ლიტერატურაშია აღნიშნული, ადრე მოჯალაბის მოვალეობას მეზეგრე გლეხებიდან მორიგეობით გამოყვანილი მოსამსახურენი ასრულებდნენ³.

ზიზანი. ზიზან გლეხთა კატეგორია რადიკალურად განსხვავდება სხვა გლეხთა კატეგორიებისაგან. გლეხთა არც ერთ კატეგორია-

¹ საისტორიო მოამბე, 5, 1950. გვ. 210—211; 258; ბატონუშობა სამეგრელოში, გვ. 90; იონა მეუნარგია, სამეგრელოს სამთავროს უკანასკნელი პერიოდი, თბ., 1939, გვ. 90.

² ბატონუშობა სამეგრელოში, გვ. 86, 87; დასავლეთ საქართველოს საეკლესიო საბუთები, I, გვ. 87—88, 100, 108, 11, გვ. 31.

³ საქართველოს ისტორიის ნარკვევები, ტ. IV, 1973, გვ. 198—199, ოსოელია, ფოთალური ხანის დასავლეთ საქართველოს ისტორიიდან, გვ. 84—91; ლ. მუსხელიშვილი, დასახ. ნაშრ., გვ. 317.

ზე არ დაწერილა იმდენი, რაც ხიზანთა კატეგორიაზე დაიწერა როგორც რევოლუციამდე, ისე მის შემდგომ პერიოდში¹.

პროფ. დ. გვრიტიშვილმა თავის გამოკვლევაში „ფეოდალური საქართველოს სოციალური ურთიერთობის ისტორიიდან“ შეისწავლა ხიზანთა ინსტიტუტი, კრიტიკულად განიხილა წინამორბედთა ნააზრევნი და ახალი დამატებითი მასალების გამოყენებით მოგვცა გლახთა ამ კატეგორიის დახასიათება. ავტორის დაკვირვებით, „ხიზანი გლახთა ისეთი კატეგორიაა, რომელიც პირად თავისუფლებას ჰფლობს, მაგრამ საწარმოო საშუალებათა მთავარ ელემენტს — მიწას მოკლებულია. ამდენად მებატონისა და ხიზნის ურთიერთობის მთავარი საფუძველი უპირველეს ყოვლისა არის მიწა“².

ხიზანი ერთი ბატონიდან მეორესთან შეხიზნული გლახია, რომელიც ბატონის მიწას ამუშავებს და მას ღალას უხდის.

პროფ. დ. გვრიტიშვილი ხიზნობის წარმოშობას XIII საუკუნიდან, ე. ი. მონღოლთა ბატონობის დროიდან ვარაუდობს,³ თუმცა გლახთა გადასახლებანი ერთი ადგილიდან მეორეში ყოველი დიდი ისტორიული ქართველის დროს ხდებოდა.

მიწა, რომლითაც ხიზანი სარგებლობს, „ხიზნის“ სამუდამო მფლობელობაში არ გადადიოდა. ხიზანს ბატონი ადვილად იშორებდა, თუკი ამას საჭიროდ თვლიდა, ამავე დროს ხიზანსაც უფლებმა ჰქონდა მიეტოვებინა მეპატრონე და ახალ ადგილზე ეძებნა თავშესაფარი.

ამდენად, ხიზანი არ იყო „პატრონის“ ყმა ამ სიტყვის პირდაპირი გაგებით. როგორც ცნობილია, ბატონყმური ურთიერთობის ერთ-ერთი დამახასიათებელი თვისება ისაა, რომ არა მარტო ყმა არის მიჯაჭვული ბატონის მიწაზე, არამედ მიწაც — ყმაზე. ხიზანს ეს ნიშანი არასოდეს ჰქონია.⁴ პროფ. გ. ჯამბურიას დახასიათებით, „ხიზანი გაქცეულია ერთი ბატონიდან მეორესთან, იმის მიწაზე ზის და ღალას უხდის. ზოგჯერ კი თავის პირველ ბატონსაც უხდის გადასახადს. იგი ყოველდღე უკან წაყვანას მოელის და ამიტომ ინტენსიურ მეურნეობას ვერ მისდევს“⁵.

ვ. გუჩუა თავის საკანდიდატო დისერტაციაში „ხიზნობა და ხიზანთა საკითხი საქართველოში“ ხიზნობის ჩამოყალიბებას XVI საუკუნის დასაწყისიდან ვარაუდობს. მისი შეხედულებით ეს განა-

¹ დ. გვრიტიშვილი, დასახ. ნაშრ., გვ. 201—204.

² დასახ. ნაშრომი, გვ. 205.

³ იქვე, გვ. 204.

⁴ იქვე, გვ. 206-207.

⁵ გ. ჯამბურია, ქართული ფეოდალური ურთიერთობიდან, გვ. 123.

პირობა ქვეყნის პოლიტიკურმა დაქუცმაცებამ. გაქცევიდან 30 წლის შემდეგ ყმა-გლეხი თავისუფლდებოდა ბატონყმური დამოკიდებულებისაგან და ხიზანი ხდებოდა¹.

6. ასათიანის მიხედვით ხიზანი გარკვეულად მაინც დაკავშირებულია თავის პირველ ბატონთან. შეიძლება იგი მისგან გამოქცეულია, მაგრამ რადგანაც ყოველწუთს აყრას და უკანდაბრუნებას მოელის, ამდენად იგი მაინც ითვლება... იმ პირველი მებატონის ყმად. ეს იცის კარგად თვითონ ხიზნად მოსულმა გლეხმა, ეს იცის მისმა ახალმა ბატონმაც და ამიტომაც, რომ მათ შორის ბატონყმური ურთიერთობის დამყარება არ შეიძლება. ხიზანი თავისუფალია ახალ ბატონთან ურთიერთობაში, მაგრამ იურიდიულად ძველი მებატონის ყმად რჩება. ამას ამტკიცებს ის ფაქტიც, რომ ზოგჯერ მებატონე თვითონვე გააბარებდა თავის ყმა-გლეხს სხვა მებატონესთან „ხიზნად“ („მიბარებული“). ამ მდგომარეობის გათვალისწინებით გასაგები გახდება, თუ რატომ იყო წარმოქმნილი განსხვავება „ნებურსა“ („ნებითმისულსა“) და „ხიზანს“ შორის. ხიზანის აყრის ნება ძველ მებატონეს ჰქონდა, „ნებიერსა“ და „თავშეწირულს“ კი ვერაფერს ვერ აყრიდა².

პროფ. დ. გვრიტიშვილის მიერ მოტანილი ერთი ცნობის მიხედვით ხიზნები სამ ჯგუფად იყოფიან:

1) გლეხები, რომლებიც მებატონეს დროებით შეაფარებენ თავს და ჟამთასიავის გადასვლის შემდეგ ბრუნდებიან ძველ საცხოვრებელზე;

2) გლეხები, რომლებიც მებატონის მიწაზე უვადოდ დასახლდნენ, მაგრამ შეინარჩუნეს წასვლის უფლება;

3) გლეხები, რომლებიც ერთი მებატონის მიწაზე სახლობენ, მაგრამ სხვა მებატონისაგან ვადით იღებენ მიწას დასამუშავებლად — საღალოდ³. როგორც ნ. ასათიანი აღნიშნავს, სამივე შემთხვევაში ხიზანნი იურიდიულად თავისუფალნი ჩანან ახალ მებატონესთან დამოკიდებულებაში, მაგრამ გარკვეულად ამქდანებენ ძველ მებატონესთან (ძველ საცხოვრებელ ადგილთან) დამოკიდებულების ფაქტს⁴.

„თუ მებატონე ვალს აიღებდა და დათქმულ დროზე ვერ გადაიხდიდა, მაშინ მოვალე მევეალეს ყმებს დაუგირავენდა, დაგირავე-

¹ ვ. გუჩუა, ხიზან გლეხთა წარმოშობის საკითხისათვის, მასალები საქართველოსა და კავკასიის ისტორიისათვის, წ. 34, 1962, თბ., გვ. 60—63.

² თ. ეორდანიძე, ქართლ-კახეთის ეკლესია-მონასტრების ისტორიული საბუთები, გვ. 22.

³ დ. გვრიტიშვილი, დასახ. ნაშრ., გვ. 205.

⁴ ნ. ასათიანი, დასახ. ნაშრ., გვ. 221.

ბული ყმები მებატონის მიწაზე რჩებოდნენ, მაგრამ ამ შემთხვევის გამო ეს ყმები გუშინდელ ბატონისადმი დღეს ხიზნების მდგომარეობაში იმყოფებოდნენ¹.

ძველი მებატონე ფეოდალური სამართლის ძალით გაქცეულ გლეხს ხშირად უკან იბრუნებდა. რადგან მას ახალი ადგილიდან ისევ აყრა მოელოდა, ამიტომ იგი ინტენსიურ მეურნეობას არ მისდევდა. ხიზანი გლეხები XVI—XVII საუკუნეებში გვხვდებიან. ხიზნობა განსაკუთრებით გავრცელდა XVII საუკუნის მეორე ნახევარში, რაც გამოწვეული იყო გლეხთა ექსპლოატაციისა და კლასობრივი ბრძოლის გამწვავებით.

ქართულ ისტორიოგრაფიაში დადგენილად ითვლება, რომ დასავლეთი საქართველოდან და ქართლიდან სისტემატურად მიედინებოდნენ გაქცეული გლეხები კახეთში და იქ სახლდებოდნენ. ამის მიზეზი იყო ერთი ის, რომ კახეთი ამ დროისათვის ეკონომიკურად მომძლავრებულია და შედარებით მშვიდობიანი, მეორე მხრივ, ამ დროს არსებული პოლიტიკური გათიშულობა ფაქტიურად ათავისუფლებდა ქართლიდან და დასავლეთი საქართველოდან გაქცეულ ყმა-გლეხებს, რადგან მათზე ძველ მებატონეს ხელი ვერ მიუწვდებოდა.

¹ დ. გვრიტიშვილი, დასახ. ნაშრ., გვ. 205

მწერლობა და ხელოვნება 89-18-18 საუკუნეების ომეგრეთის სამეფოში

ქართული ენა და მწერლობა თავიდანვე წარმოადგენდა ქართველურ ტომთა ერთ-ერთ მთავარ გამაერთიანებელ ნიშანს. ჯერ კიდევ ერთიანი ქართული სახელმწიფოს შექმნამდე, ქართლი (ე. ი. საქართველო) ეწოდებოდა ქვეყანას, „სადაც ქართულითა ენითა ეამი შეიწირვის“. ენისა და მწერლობის ეს დიდი მნიშვნელობა კიდევ უფრო იზრდებოდა ქართველი ერის ისტორიის შავბნელ პერიოდებში, კერძოდ, ერთიანი საქართველოს დაქუცმაცებისა და სამეფო-სამთავროების ურთიერთბრძოლის ვითარებაში, რაც გვყავს ფეოდალიზმის პერიოდისათვის იყო დამახასიათებელი.

სწორედ XV—XVIII საუკუნეების საქართველოსათვის, რომელიც ჯერ კიდევ შორის იყო „ერთიან ბურჯუაზიულ ერად“ ჩამოყალიბებამდე, ქართული ენა და ლიტერატურა წარმოადგენდა იმ დულაბს, რასაც ჯერ კიდევ შესწევდა ძალა ერთიანობის გრძნობა და მისდამი მისწრაფება შეენარჩუნებინა ქართულ სამეფო-სამთავროების შესვეურთა და ტომთა შორის.

ამასთან ერთად უდიდესი მნიშვნელობა ჰქონდა იმ გარემოებას, რომ ძველი სამწერლობო ქართული ენა და ქართული ლიტერატურა არც ენობრივ-სტილისტურად, არც იდეურ-პოლიტიკურად და, საერთოდ, შინაარსობრივად, ძირითადად, არ ამჟღავნებს ტომობრივ-გეოგრაფიულ განკერძოებულობასა და მიდრეკილებას — არ არსებობს აღმოსავლურქართული, სამხრეთულქართული და დასავლურქართული ლიტერატურული მიმართულებანი, არამედ მთელი ჩვენი მწერლობა არსებითად ერთიანქართულია, ჩვენი სამშობლოს რომელ კუთხეშიც არ უნდა იყოს შექმნილი ესა თუ ის ნაწარმოები და რომელი ქართული ტომის წარმომადგენელიც არ უნდა იყოს მისი ავტორი.

ეს მოვლენა ლიტერატურის ისტორიაში საყოველთაო ხასიათისა არ არის, ვინაიდან მსოფლიოს ბევრი მოწინავე ლიტერატურის ისტორია ტომობრივ-კუთხური მიმართულებით ვითარდებოდა და ეს მიმართულებანი ღრმა კვალს ტოვებდნენ საერთო-ეროვნული ლიტერატურის განვითარებაზე.

ამრიგად, XVI—XVIII საუკუნეების ქართული მწერლობის ძეგლები, რომლებიც დასავლეთ საქართველოში შეიქმნა, საერთო-ქართული მწერლობის ძეგლებია როგორც თავისი ფორმით, ისე შინაარსით, მაგრამ ამ პერიოდის სპეციფიკა იმაში მდგომარეობს, რომ სამწერლობო მოღვაწეობას უკვე აღარ აქვს ინტენსიური ხასიათი, იგი სპორადიულია, ჩვენი ლიტერატურის ისტორიის ოქროს ხანასთან შედარებით მეტად ღარიბია როგორც რაოდენობრივად, ისე ფორმით და შინაარსით.

ჩვენამდე მოღწეული ლიტერატურული მემკვიდრეობა ცხადყოფს, რომ დასავლეთ საქართველოში კულტურულ-საგანმანათლებლო საქმიანობა უკვე IX—X საუკუნეებში ყოფილა გაჩაღებული, ხოლო მას შემდეგ, რაც ქუთაისი დასავლეთ საქართველოს პოლიტიკურ-ადმინისტრაციული და ეკონომიკური ცხოვრების ცენტრად იქცა, კულტურულ-შემოქმედებითი ტალღა თითქმის მთელ დასავლეთ საქართველოს გადასწვდა. მუშაობა გაიშალა სამეფო ქალაქ ქუთაისში, მთავართა (ზუგდიდი, ოზურგეთი) და ერისთავთა (რაჭა) სასახლეებში, მონასტრებსა (გელათი, ჯრუჭი, მარტვილი, წალენჯიხა, ხობი და სხვ.) და კათედრალურ ტაძრებში (ცაიში, ბედი, შემოქმედი, ცაგერი და სხვ.); მდიდარი წიგნსაცავები შეიქმნა ვანის, მღვიმის, უდაბნოს, ლაბეჭინის, ნიკორწმინდის, საირმის, ნამარნევისა და სხვა ეკლესია-მონასტრებში.

დასავლეთ საქართველოში დამზადდა მრავალი ძვირფასი ხელნაწერი: გელათის ბიბლია, გელათ-გარეჯის, კაცხის, ცაიშის, ბედიის, შემოქმედისა და გურიანთის გულანები, თეთროსნის დავითნი, მოქვისა და გელათის ოთხთავები, მოქცევაჲ ქართლისაჲ, ვეფხისტყაოსნის რამდენიმე ხელნაწერი და მრავალი სხვ. დასავლეთ საქართველოდან ჩვენამდე მოაღწია უცხოეთში შექმნილმა ზოგიერთმა ნუსხამ, მგალითად, გოლგოთის სვინაქსარზა, რომანის მონასტერში დაწერილმა სახარებამ, პალავრის კრებულმა. აგრეთვე საქართველოს სხვა კუთხეებში შექმნილმა რამდენიმე ხელნაწერმა: შატბერდის სახარებამ, ოდიშის ოთხთავმა, უდაბნოს მრავალთავმა და სხვ.

განსაკუთრებული ძალით გაიშალა მუშაობა გელათის აკადემიაში. დღიდან დაარსებისა გელათი ქართული კულტურის თვალსაჩინო ცენტრი გახდა. საერო-ფილოსოფიური მეცნიერების განვითარების დონით გელათს თანამედროვენი „მეორე ათენს“ უწოდებდნენ, ხოლო საეკლესიო-სამუსიკო მრავალწიგნისა და გა-

¹ ლ. შენაბდუ, ძველი ქართული მწერლობის კრები, თბ., 1962, გვ. 575 — 577.

ნათლების მიხედვით „მეორე იერუსალიმად“ მიაჩნდათ. მართლაც, XII—XIV საუკუნეებში გელათში შეიქმნა ცოდნის იმ დონის კვალობაზე ლიტერატურული, ფილოსოფიური და საისტორიო მწერლობის პირველხარისხოვანი ძეგლები, ოქრომჭედლობის საუცხოო ნიმუშები, უნიკალური მოზაიკური მხატვრობა; არქიტექტურის დიდებული ძეგლები. აღნიშნული საუკუნეებისათვის ქართულ ენაზე ნათარგმნი იყო ბიზანტიური ლიტერატურის თითქმის ყველა თვალსაჩინო თხზულება. ქართულად შეიძლებაოდა ყოველმხრივი ცოდნის მიღება.

ამ პერიოდის საქართველოში მოღვაწეობდნენ დიდი მოაზროვნეები: ეფრემ მცირე, არსენ იყალთოელი, იოანე პეტრიწი, არსენ ბერი და სხვანი. მრავალი ქართველი იგზავნებოდა ბიზანტიის სკოლებში, განსაკუთრებით კონსტანტინეპოლის აკადემიაში.

გელათის აკადემიაში შეიქმნა საკუთარი სკოლა; იგი აგრძელებდა იმ მუშაობას, რომელიც ერთ დროს საზღვარგარეთის ქართულ ცენტრებში — ათონსა და პეტრიწონში ღვიოდა და სადაც იგი შესუსტდა განსაკუთრებით XIII საუკუნიდან.

თუმცა საქართველოში ხშირი და გამანადგურებელი ომები წარმოებდა; რამაც კულტურის მრავალი ძეგლი მოშალა და დაანგრია; გელათი გადაურჩა ამ ნგრევას, რაშიც დიდი როლი მისმა გეოგრაფიულმა მდებარეობამ შეასრულა. იგი მხოლოდ ორჯერ გახდა მტრის თავდასხმის ობიექტი.

საუკუნეთა მანძილზე გელათის ისტორიაში აღინიშნება აღმავლობისა და დაქვეითების პერიოდები. დაცემის პერიოდი განსაკუთრებით შეინიშნება XV საუკუნიდან. როგორც ცნობილია, ამ პერიოდში წინა აზიაში არსებითი ხასიათის ცვლილებები მოხდა. 1453 წელს თურქებმა აიღეს ბიზანტიის დედაქალაქი კონსტანტინეპოლი და მოსპეს ეს მოწინავე იმპერია. ამის შემდეგ საქართველოს უშუალოდ გაუმეზობლდა ჩამორჩენილი ოსმალეთი. საქართველო მოწყდა კულტურულ დასავლეთს. აქან უდიდესი გავლენა იქონია მთელ მის მომდევნო ცხოვრებაზე. ასეთ საგარეო ვითარებას დაერთო შინა პოლიტიკური და სოციალური გართულებანი. საქართველო დაიშალა ცალკე პოლიტიკურ ერთეულებად.

ადრე თუ გელათი საქართველოს მეფეთა საძვალე მონასტერს წარმოადგენდა, პოლიტიკური დაშლის შემდეგ იგი მხოლოდ იმერთა მეფეების საკუთრებად იქცა.

XVI საუკუნის დასაწყისიდან ოსმალები უკვე იწყებენ დასავლეთ საქართველოს რბევას, რასაც გელათის ტაძარიც ვერ გადაურჩა. წყაროები აღნიშნავენ: „დაწვეს დიდი მონასტერი გელათისა

შიგნით და გარეთ“ ან კიდევ „მოვიდეს თათარნი და დაწვეს საყ-
დარი ქუთათისი და გელათი“.

ოსმალთა მიერ აოხრებული გელათის აღსადგენად დიდი სამუ-
შაოები ჩაატარა იმერეთის მეფემ ბაგრატ III (1510—1565 წწ.).
მის დროს აღდგა წმ. გიორგის ეკლესია, მოიხატა ღვთისმშობლის
ეკლესიის კედლები და სხვ. ამის გამო ბაგრატ მეფეს გელათის „მე-
ორედ აღმაშენებელს“ უწოდებდნენ.

გელათის განახლებაში მეფეს მხარში უდგნენ კათალიკოსი ევ-
დემონ ჩხეტიძე და გენათელი ეპისკოპოსი მელქისედეკ საყვარე-
ლიძე¹ (მელქისედეკ საყვარელიძეს ქელიშშიც უწარმოებია აღმშე-
ნებლობითი საქმიანობა²).

ბაგრატ მეფის თაოსნობით 1519 წელს გელათში დაარსდა სა-
ეპისკოპოსო კათედრა, ხოლო XVI საუკუნის მეორე ნახევარში
ბიჭვინთიდან გელათში გადმოიტანეს კათალიკოსის რეზიდენცია,
რამაც კიდევ უფრო გაზარდა გელათის მნიშვნელობა.

დიდი მეცნიერულ-შემოქმედებითი მუშაობა იყო გაჩაღებული
გელათის მონასტერთან დაარსებულ აკადემიაში: „იქ შეიქმნა მრავალი
ფილოსოფიურ-ლიტერატურული ხასიათის თხზულება, იქ
გაიშალა მოღვაწეობა იმ ქართული მწერლებისა და მოაზროვნე-
ებისა, რომელთაც არნახულ სიმაღლეზე აიყვანეს ქართული კულ-
ტურა“³... „გელათში ისწავლებოდა ის საგნები (გეომეტრია, არით-
მეტიკა, მუსიკა, რიტორიკა, გრამატიკა, ფილოსოფია, ასტრონომია),
რომლებსაც სწავლობდნენ იმ დროს ბიზანტიის უმაღლეს სასწავ-
ლებლებში. სწავლების სისტემა ბიზანტიური უმაღლესი სკოლების
ტრადიციების მიხედვით იყო შემუშავებული. აკადემიის მთელ სას-
წავლო-სამეცნიერო საქმიანობას ხელმძღვანელობდა მოძღვართ-
მოდღვარი“⁴.

XVI საუკუნის 20-იან წლებში გელათის აკადემიის კულტურულ-
შემოქმედებითი ცხოვრება შენელდა, მოძღვართ-მოდღვარის ინსტი-
ტუტი გაუქმდა, ტაძარი საეპისკოპოსო კათედრალად იქცა. მოძღვ-
ართ-მოდღვარი ეპისკოპოსმა შეცვალა. აკადემიის შენობამ თავდა-
პირველი მნიშვნელობა დაკარგა, ის ბერთა სატრაპეზოდ გადაკეთდა.

¹ თ. ყ ა უ ხ ი შ ე ი ლ ი, ბერძნული წარწერები საქართველოში, გვ. 120,
ბ. ლომინაძე, გელათი, გვ. 21—22, 32, 34—35, 38, 50.

² გ. ბოქორიძე, რაჭის ისტორიული ძეგლები. საქ. მუზეუმის მოამბე.
V, 1930, გვ. 197—198.

³ ლ. მენაბდე, ძველი ქართული მწერლობის კერები, ტ. I, ნაკვ. II,
თბ., 1962, გვ. 532.

⁴ ლ. მენაბდე, დასახ. ნაშრ. გვ. 533.

მიუხედავად იმისა, რომ გელათში, როგორც უმაღლესმა სასწავლებელმა, დაკარგა თავისი ძველი მნიშვნელობა, ის მაინც კულტურულ-საგანმანათლებლო და ლიტერატურულ-შემოქმედებითი საქმიანობის ცენტრად დარჩა, იქაური მოღვაწენი დაუღალავად იღვწოდნენ მშობლიური კულტურის საგანძურის დაცვისა და გამდიდრების მიზნით.¹

გელათის მონასტერში არის დაწერილი საყურადღებო საისტორიო წყარო, რომელიც „გელათური ქორონიკონის“ სახელითაა ცნობილი. მისი ავტორი უცნობია, მაგრამ ტექსტიდან ჩანს, რომ იგი გელათელია. ავტორი განსაკუთრებულ ყურადღებას იჩენს ქუთაისისა და გელათისადმი, ვრცლად ჩერდება საეკლესიო საკითხებზე და კარგად აშუქებს XVI საუკუნის ისტორიის ცალკეულ მომენტებს.

ამავე პერიოდში არის დაწერილი (1543—1549 წწ.) „სამართალი კათალიკოსისა“, რომლის შედგენაში მონაწილეობა მიიღეს: სპეციალურად მიწვეულმა ქართლის კათალიკოსმა მალაქიამ (1531—1549 წწ.), აფხაზეთის კათალიკოსმა ევდემონ ჩხეტიძემ (1543 წლიდან 1557 წლამდე ეპისკოპოსი, ხოლო შემდეგ 1578 წლამდე დასავლეთ საქართველოს კათალიკოსი) და დასავლეთ საქართველოს ათმა ეპისკოპოსმა. კრებამ იმსჯელა გამრავლებულ ბოროტმოქმედებათა შესახებ და შეიმუშავა ხალხის ზნეობრივი ცხოვრების ამაღლების მიზნით „სამართალი კათალიკოსისა“. იგი ეხება მკვლევლობის; ტყვეებით ვაჭრობის; ეკლესიათა ძარცვის, არაკანონიერი ქორწინებისა და სხვა დანაშაულობათა საკითხს.

დასავლეთ საქართველოში დიდი საეკლესიო მოღვაწის ევდემონ ჩხეტიძის ინიციატივით მოუხატავთ გელათის წმ. გიორგის ეკლესია, მასვე მოუჭედინებია 1568 წელს ბიჭვინთის ლეთისმშობლის ხატი². ევდემონის შეკვეთით დამზადდა მრავალი ხელნაწერი. მაგალითად, ევდემონის დავალებით იოანე ქობინაშვილმა გადაწერა საღღესასწაულო და პარაკლიტონი, მანოელ ინანიკისშვილმა 1565 წელს გელათში გადაწერა მოზრდილი მეტაფრასი, მისივე დაკვეთითაა გადაწერილი ის მეტაფრასი, რომელშიც სხვა მნიშვნელოვან ძეგლებთან ერთად დაცულია ეფრემ მცირის ორიგინალური თხზულება „მოსახსენებელი მცირე სუმეონისთვის ლოღოთეტისა და თხრობაჲ მიზეზსა ამათ საკითხავთა თარგმანისათა“.

¹ ლ. შენაბდუ, დასახ. ნაშრ., გვ. 534.

² ბ. ლომინაძე, ბიჭვინთის ხატის 1568 წლის წარწერა, მასალები საქართველოსა და კავკასიის ისტორიისათვის, ნაკვ. 33, 1960, გვ. 99—102.

ევდემონ ჩხეტიძისავე დავალებით უნდა იყოს დამზადებული რამდენიმე სხვა თხზულების ხელნაწერი (იამბიკონი, იოანე დამასკელის წიგნი, ცხოვრება თეოდორესი, ათთა ბერძენთა წამებულთა წიგნი, ვახგებულეიით ღვთისაეტყველება და სხვ.)¹.

XVI საუკუნის ქართული კულტურის დიდი დამკველი და პოპულარიზატორი ჩანს კათალიკოსი ექვთიმე საყვარელიძე (1578—1616 წწ.).

ექვთიმეს თაოსნობითა და ინიციატივითაა გადაწერილი მრავალი ხელნაწერი და კრებული, მისივე დაკვეთით ონოფრე მონაზონსა და მანოელს გადაუწერიათ მოზრდილი მეტაფრასი; ნათანაელს, გიორგის, ზებედესა და იოანეს — გულანი; ნაგკრატოზ ცინცაძეს — მეტაფრასი; ანანია კალანდაძეს — ეამნ-გულანი; მისივე დაკვეთითაა გადაწერილი ერკეთის გულანი, იოსიპოს ფლავიოსის „წიგნი ჰურიისაჲ“².

XVII საუკუნის კულტურის მოღვაწეთაგან გამოირჩევა დასავლეთ საქართველოს კათალიკოსი ზაქარია ქვარიანი (1657—1660 წწ.); რომლის თაოსნობით არის მოხატული გელათის ღვთისმშობლის ეკლესიის ზოგიერთი ნაწილი. მისივე ინიციატივითაა გადაწერილი 1653—1655 წლებში გელათ-გარეჯის გულანი. ის დამზადებულია რამდენიმე პირის მიერ (იესე ბაღდაშვილი, დემეტრე მწერალი, იოსებ კარგარეთელი და სხვ.)³.

XVII საუკუნის II ნახევრიდან ცნობილია გელათელი მღვდელმთავარი გედეონ ლორთქიფანიძე, რომელიც ერთ ხანს (1669—1676 წლებში) იმერთა მეფე ბაგრატ IV-ემ ელჩად მიავლინა რუსეთში. მისი თაოსნობით დამზადებული და გადაწერილია სახარება-სამოციქულოს საკითხავები⁴.

მონღოლთა ბატონობის დროიდან მთელ საქართველოში სწავლავანათლების საქმე დაქვეითების გზას დაადგა. დასავლეთ საქართველოში შინაფეოდალური ომების შედეგად, რომელსაც დასასრული არ უჩანდა; სწავლავანათლებისათვის საკირო პირობები აღარ არსებობდა. მოსახლეობის დაბალი ფენები სრულ უმეცრებაში ცხოვრობდნენ. მიუხედავად ამისა, გაბატონებული კლასის მცირერიცხოვან ნაწილში სწავლა-აღზრდის საქმეს დიდი ყურადღება ექცეოდა. სკოლები არსებობდა ეკლესია-მონასტრებთან, საეპისკოპოსო კათედრებთან, მეფე-მთავართა და მსხვილ ფეოდალთა სასახლეებთან.

¹ ლ. მენაბდე, დასახ. ნაშრ., გვ. 529—540.

² იქვე, გვ. 541.

³ იქვე, გვ. 542.

⁴ შ. თამარაშვილი, კათოლიკობა ქართველთა შორის, თბ., 1902, გვ. 156—158, 163.

XVII საუკუნიდან საქართველოში კათოლიკე მისიონერებიც აარსებენ სკოლებს; მათი მიზანი იყო კათოლიკობის პროპაგანდა და რომის კათოლიკურ ეკლესიასთან ქართული მართლმადიდებელი ეკლესიის შეერთებისათვის ნიადაგის მომზადება.

არქანჯელო ლამბერტის მოწმობით პატრმა ანტონ ჯარდინამ, რომელმაც კარგად იცოდა ქართული ენა, გურიაში გაცხსნა სკოლა, შეადგინა ქართული გრამატიკა და დაწყებინა ყმაწვილებს მისი შესწავლა. ბავშვები ჩქარა დაწინაურდნენ სკოლაში და ყველა-სათვის გასაოცარი შეიქნენ... მისიონერებმა დააპირეს რამდენიმე ყმაწვილი იტალიაში გაეგზავნათ, რათა იქ მაღალი სწავლა მიეღოთ და შემდეგ დაბრუნებოდნენ თავიანთ მამულს... მაგრამ მისიონერები მტრებს მოერიდნენ, იქნებ ხალხში ხმა გაავრცელონ და სთქვან, რომ პატრებმა ყმაწვილები თათრებს მიჰყიდესო. ამის გამო ყმაწვილები ევროპაში აღარ გაგზავნეს.¹

აღნიშნულ პერიოდში ცხოვრების საერთო დონის დაცემასთან ერთად დაეცა სულიერი კულტურაც. განათლების ცენტრები — მონასტრები თუშცა თავის საგანმანათლებლო მოღვაწეობას განაგრძობდნენ, მაგრამ შემოქმედებითი სამეცნიერო მუშაობა არ ჩანდა. ისინი მხოლოდ ძველი წიგნების გადაწერით კმაყოფილდებოდნენ, მაგრამ მიუხედავად მოსახლეობის კატასტროფული შემცირებისა, და მძიმე სოციალურ-პოლიტიკური და ეკონომიკური პირობებისა, XVI—XVII საუკუნეების დასავლეთ საქართველოში მაინც არ შეწყვეტილა საგანმანათლებლო ლიტერატურული მოღვაწეობა.

განსაკუთრებული ისტორიული და მხატვრული ღირებულებისაა ამ პერიოდში შექმნილი მინიატურები, რომლებიც ქართველი მხატვრების მიერაა შესრულებული და დიდი თავისებურებით გამოირჩევა. ამის საუკეთესო ნიმუშს წარმოადგენს დასავლეთ საქართველოში დახატული XVI საუკუნის ფსალმუნის ილუსტრაციები, როდენობით სამოცდაათი.

კულტურულ-საგანმანათლებლო მუშაობაში ჩაბმული იყვნენ როგორც ადგილობრივი, ისე დროებით აქ ჩამოსული მწერლებიც. პირველ რიგში უნდა მოვიხსენიოთ კახეთის მეფე თეიმურაზ პირველი, რომელიც აღმოსავლეთ საქართველოდან დევნილი 1649 წლიდან იმერეთის სამეფო კარს აფარებდა თავს. ის რაქის ხშირი სტუმარი ყოფილა და იქვე (რაქაში) დაუწერია „შედარება გაზაფხულისა და შემოდგომისა“, „შამითარვანიანი“ და სხვა თხზულებანი.

¹ ა. ლამბერტი, დასახ. ნაშრ.

რაქის ხშირი სტუმარი იყო აგრეთვე არჩილ მეფეც, მაგრამ თუ რა ლიტერატურული მუშაობა ჩაატარა იქ, არა ჩანს.

რაქის კულტურულ-საგანმანათლებლო კერებიდან აღსანიშნავია კელიშის მონასტერი, სადაც თავის დროზე საკმაოდ მდიდარი ბიბლიოთეკა იყო. იქაა ნაპოვნი ლიტერატურაში კარგად ცნობილი „მოქცევაჲ ქართლისაჲ“, იქედანვეა დავითნი და ოთხთავი, რომელიც ნიკოლოზ მწირმა გადაწერა და კელიშის მონასტერს შეწირა.

ასევე მნიშვნელოვანი წიგნთსაცავები არსებობდა სევაში (ონის რაიონი), ლაბეჰინსა და ნიკორწმინდაში¹ (ამბროლაურის რაიონი).

აღმოსავლეთ საქართველოდან იმერეთში იყო გადასული ცნობილი პოეტი ფეშანგი ხითარიშვილი (ფაშვიბერტყაძე); ის უშუალო მონაწილეა იმდროინდელი პოლიტიკური ბრძოლებისა: მის კალამს ეკუთვნის პოემა „შაჰნავაზიანი“, რომელშიც მოთხრობილია ვახტანგ V-ის მეფობის (1658—1675 წწ.) ისტორია. საფიქრებელია, რომ შინა პოლიტიკური შეხლა-შემოხლის შემდეგ იგი გადავიდა დასავლეთ საქართველოში, დასახლდა ჩხარში, მაგრამ მალე დაუახლოვდა სამეფო კარს და მეფის მდივან-მწიგნობრობასაც მიაღწია. ის აქტიურად მონაწილეობდა თეიმურაზ პირველის, ალექსანდრე მესამისა და რუსი ელჩების — ნ. ტოლოჩანოვისა და ა. იევლევის მოლაპარაკებაში (1650—1652 წწ.). აკადემიკოს გ. ლეონიძის აზრით, ფეშანგის შეუდგენია იმერეთის სამეფოს გეოგრაფიული, ეკონომიკური და სტატისტიკური აღწერილობა და ალექსანდრე მეფის საფიცრის წიგნი რუსთა მფარველობის მიღებაზე².

• • •

საქართველო როგორც XVII, ისე XVIII საუკუნის დასაწყისში განიცდიდა ირანისა და თურქეთის ძლიერ პოლიტიკურ და იდეოლოგიურ ზეგავლენას, ვახუშტი ბაგრატიონის თქმით „შეერთათ ქართველთა ყიზილბაშური უგვანო წეს-ჩვეულებანი“. ქართველი პოლიტიკური მოღვაწენი ამას კარგად ხედავდნენ და ცდილობდნენ ფიზიკური არსებობის შენარჩუნებასთან ერთად ქართველობისათვის ეროვნული ყოფიერების შენარჩუნებასაც.

ქართული კულტურის დაცვისა და განვითარებისათვის ბრძოლაში უდიდესი როლი შეასრულა ვახტანგ VI-მ, რომელმაც ირგვ-

¹ ლ. მენაბდე, დასახ. ნაშრ., გვ. 572—573.

² გ. ლეონიძე, წერილები და გამოკვლევები, გვ. 13—14, 17—22.

ლივ შემოიკრიბა ქართველობისათვის თავდადებულთა დასი, რომელთაც არ დაიშურეს ძალა და ენერგია ქართული კულტურისა და მეცნიერების ასაღორძინებლად. ქართლის ეს მაღალი ლიტერატურის დონე საერთო-ქართული მოვლენა იყო და იგი დასავლეთ საქართველოსაც წვდებოდა და კვებავდა. მაგრამ იგი ნაკლებ ეფექტს ახდენდა, რადგან დასავლეთ საქართველოში ფეოდალური დაქუცმაცებულობა და ომები კვლავ მძვინვარებდა. თურქეთის გავლენაც უფრო მეტად იგრძნობოდა და ქვეყნის ბატონ-პატრონნიც ისინი იყვნენ. ასეთ პირობებში რა თქმა უნდა დიდად უძნელდებოდათ მოღვაწეობა ქართველ პატრიოტებს, მაგრამ მიუხედავად სიძნელეებისა, საერო და სასულიერო მცირე დასი მაინც განაგრძობდა ლიტერატურულ-შემოქმედებით მუშაობას და დაუცხრომლად ზრუნავდნენ ქართული კულტურის გადარჩენისათვის.

ამ დროისათვის საერო და სასულიერო ცენტრები იყო: ქუთაისი, გელათი, ოზურგეთი, შემოქმედი, ზუგდიდი, მარტვილი, ცაიში, წესი, კაცხი და სხვ., მაგრამ ძალიან მცირე იყო მათი პროდუქცია, და რაიმე ორიგინალური ნაწარმოები არ შექმნილა. ამ პერიოდში შეიქმნა გიორგი აბაშიძის ავტობიოგრაფიული ხასიათის ლექსი და ქება ვახტანგ VI-ისა.

ამ დროის დასავლეთ საქართველოში არქიტექტურაც დაეცა. ახალი არ იგებოდა და ძველიც ნადგურდებოდა. მხოლოდ ერთადერთი, ძველი ქართული გუმბათოვანი, ხუროთმოძღვრების შესანიშნავი ბარაკონის ეკლესია იქნა აგებული 1753 წელს როსტომ რაჭის ერისთავის ბრძანებით.

იმერთა მეფემ გიორგი IV (1703—1720 წწ.) განაახლა გელათის ღვთისმშობლის ეკლესიის ერთი ეკვდერი, ხოლო 1730 წელს ალექსანდრე V გიორგის ძემ (1721—1752 წწ.) გელათში წმ. ანდრია პირველის სახელობის ეკლესია, რომელიც დიდი ხნიდან გაუქმებული ყოფილა, განაახლა და თავის საძვალედ აქცია¹.

1759 წელს გელათს თავს დაესხნენ ლეკები, გაძარცვეს და ცეცხლი წაუკიდეს, მაგრამ იგი იოლად გადაურჩა ამ შემოსევას (საერთოდ გელათს მხოლოდ ორჯერ შეესივნენ მტრები, 1510 წ. და 1759 წ.).

XVIII საუკუნის მეორე ნახევრიდან იწყება გელათის აღორძინება, ყმა-მამულის დაბრუნება, ახალ შეწირულებათა მიღება და აღდგენითი სამუშაოების ჩატარება.

1760 წელს სოლომონ პირველის ძმამ — იოსებ გელათელმა ახლად ააგო სამიტროპოლიტო ტახტი.

¹ ბ. ლომინაძე, გელათი (გზამკვლევი), 1958, გვ. 28.

გელათის ძველი სიძლიერის აღდგენაზე ზრუნავდნენ სოლომონ პირველი, სოლომონ მეორე და გელათის უკანასკნელი ეპისკოპოსი ექვთიმე. მათ დიდი მუშაობა ჩაატარეს მონასტერში და აღადგინეს წმ. ნიკოლოზის ეკლესია.¹

XIX საუკუნის დამდეგს გელათი ძლიერ ფეოდალურ სენიორიას წარმოადგენდა. ის ფლობდა 42 სოფელს, 395 კომლსა და იღებდა ორი ათას მანეთზე მეტ ფულად შემოსავალს.²

იმერეთის სამეფოს რუსეთთან შეერთების შემდეგ გელათი გადაკეთდა საეკლესიო შტატის დაწესებულებად, ხოლო 1822 წელს გელათის საეპისკოპოსო იმერეთის საეპისკოპოსოს შეუერთდა, შემდეგ მნიშვნელობა დაკარგა და მხოლოდ საკულტო დაწესებულებად დარჩა.



XVIII საუკუნის მეორე ნახევარი საქართველოსათვის სოციალ-ეკონომიკური და კულტურული აღმავლობის ხანა იყო. აღმოსავლეთ საქართველოში დაარსდა სახელმწიფო სკოლები. 1755 წელს თბილისში დაარსდა სასულიერო სემინარია. 1758 წელს სასულიერო სასწავლებელი ჩამოყალიბდა თელავში, იგი 1782 წელს გადაკეთდა ფილოსოფიურ სემინარიად, რომელიც სახელმწიფო ხარჯზე არსებობდა. სახელმწიფო სასწავლებლებს გარდა აღმოსავლეთ საქართველოში არსებობდა კერძო სასწავლებლებიც, იქ ქართველებს გარდა განათლებას იღებდნენ სომხები და მაჰმადიანებიც.³

სემინარიელებს ასწავლიდნენ ღვთისმეტყველებას, გრამატიკას, ფილოსოფიას, გალობას, ლოგიკას, ფიზიკას, მათემატიკას, რიტორიკას, კატეგორიებს (არისტოტელესას), მეტაფიზიკას და სხვ.

ქართველი ახალგაზრდობა სწავლა-განათლებას იღებდა მონასტრებსა და ეკლესიებთან არსებულ სკოლებშიაც. ასეთი სკოლების ხარჯებს მშობლები იღებდნენ.



XVIII საუკუნეში რაჭის ერისთავები გაცხოველებულ მწიგნობრულ-საგანმანათლებლო საქმიანობას ეწეოდნენ. ამრავლებდნენ

¹ დასავლეთ საქართველოს საეკლესიო საბუთები, გვ. 95-96; 106-107; 120-121, 160-161.

² ლ. მენაბდე, დასახ. ნაშრ. გვ. 531.

³ საქართველოს ისტორიის ნარკვევები, ტ. IV, თბ., 1973, გვ. 779.

ხელნაწერებს და ამზადებდნენ ახალ წუსხებს. თუმცა ჩვენამდე მთელმა ლიტერატურამ, რაც იმ დროს შეიქმნა, ვერ მოაღწია, მაგრამ რაც შემოგვრჩა, ისიც ნათელ წარმოდგენას გვაძლევს ერისთავთა საქმიანობაზე.

მოშობა მესამის (1696 — 1731 წწ.) დაკვეთითაა გადაწერილი გულანი. როსტომ ერისთავის (1749 — 1769 წწ.) ბრძანებითაა გადაწერილი სამართლის წიგნები (1751 წ.), ქილილა და დამანა (1753 წ.), კარაბადინი (1763 წ.) და სხვ.

წიგნების გადაწერა წარმოებდა კაცხის მონასტერში, აქ საკმაოდ მდიდარი წიგნსაცავი იყო. ცნობილია კაცხის. გულანი, გადაწერილი გიორგი აბაშიძის ბრძანებით (1723 წ.).

კულტურულ-საგანმანათლებლო საქმიანობა წარმოებდა ჭრუჭის მონასტერში, აქ იყო მდიდარი წიგნსაცავი. აქვე არის გადაწერილი დიაკონ მონაზონ მაქსიმეს მიერ იოანე ოქროპირის სწავლანი (1785 წ.) იოანე ზაქარიას ძე გაბაშვილის მიერ, „სათნობათა ყვავილი“, „მამათა სწავლანი“ (1788 წ.), ამავე პერიოდშია გადაწერილი იოანე სინელის „კლემაქსი“ და სხვ.

• • •

განათლების საქმე დასავლეთ საქართველოში ეკლესიის ხელში იყო. სკოლები მსხვილ საეკლესიო ცენტრებთან არსებობდნენ. საფუძვლიან განათლებას ის იღებდა, ვინც სასულიერო მოღვაწეობას აპირებდა. თუ რა მასშტაბის განათლების მიღება შეიძლებოდა, ეს ჩანს შემდეგიდან: გიორგი V გურიელის ვაჟი ქაიხოსრო, რომელსაც სასულიერო მოღვაწედ ამზადებდნენ, გელათში სწავლობდა XVIII საუკუნის ბოლოს. მან „იმდროისათვის საუკეთესო განათლება მიიღო. ის მრავალ ენაზე ლაპარაკობდა და დედანში კითხულობდა ლათინ და ბერძენ ავტორებს“¹. თუმცა აქვე უნდა დავძინოთ, რომ 1770 წლის ერთი ცნობით იმერეთში წერა-კითხვა თავადაზნაურთა მხოლოდ ერთმა ნაწილმა იცოდა. უფრო მეტად ქალები ეუფლებოდნენ წერა-კითხვას, მამაკაცები კი გაუთავებელი ომებით იყვნენ დაკავებულნი.

უცხო ენების სწავლა (თურქული, ფრანგული, რუსული) იმ დროს დიპლომატიური ურთიერთობისათვის აუცილებელ საჭიროებას წარმოადგენდა (ელჩები კვინიხიძეები, ზურაბ წერეთელი რამდენიმე უცხო ენას ფლობდნენ). ამ დროს დასავლეთ საქართველოში თურქული ენა ფეხმოკიდებული იყო და მისი ცოდნაც აუცილებლად იყო ქცეული. ალბათ ამ მიზანს ემსახურებოდა XVIII

¹ სიგელ-გაქრები, ტ. I, გვ. 192 (რუს.).

საუკუნის 90-იან წლებში შედგენილი „ქართულ-თურქული სასწავლო წიგნი“, რომელიც ვარძიის მონასტერში შეიქმნა ადგილობრივი ბერის მიერ.

დასავლეთ საქართველოში ეკლესია-მონასტრებთან არსებულ სკოლების გარდა, განათლების მიღება „გაძიძავეებით“ შეიძლებოდა. მაღალი საზოგადოების წარმომადგენლები თავიანთ შვილებს საერო ან სასულიერო პირთ მიაბარებდნენ ხოლმე აღსაზრდელად. მაგალითად, სოლომონ პირველმა თავისი ერთადერთი მემკვიდრე, ალექსანდრე ბატონიშვილი გიორგი წულუკიძეს მიაბარა აღსაზრდელად.

• • •

როგორც ზემოთ აღვნიშნეთ, ქართული მწერლობა დასავლეთ საქართველოში ვითარდებოდა როგორც მეფე-მთავართა სასახლეებში, ისე ეკლესია-მონასტრებში. ადგილობრივ კადრებს ხშირად ემატებოდნენ და ამშვენებდნენ აღმოსავლეთ საქართველოდან ამა თუ იმ მიზეზით ლტოლვილი მწიგნობრებიც.

იმერეთში მოღვაწეობდა ნიკოლოზ ჩერქეზიშვილი-რუსთველი, იგი ვახტანგ VI-ს გაჰყოლია, მაგრამ რუსეთში აღარ წასულა და იმერეთში დარჩენილა ალექსანდრე მეფესთან. მას არც იმერეთში შეუწყვეტია ლიტერატურული მოღვაწეობა, დაუწერია ლექსი — მიძღვნა ალექსანდრე მეფისადმი, მასვე დაუწერია გრიგოლ კათალიკოსის შეწირულების წიგნი ბიჭვინთისადმი¹ და სხვ.

იმერეთში მოღვაწეობდა ზაქარია გაბაშვილი (1707 — 1783 წწ.) „ძველთა ფილოსოფიისა სწავლათა შინა გამოცდილი და ღვთისმეტყველებასაცა მიწვენილი, მშვენიერი რიტორი და უცხო მოქადაგე“.² იგი ქართლ-კახეთის მეფეთა კარის მოძღვარი იყო და აქტიურ როლს ასრულებდა საერო და სასულიერო ცხოვრებაში. მონაწილეობდა იმ ინტრიგებსა და ბრძოლებში, რასაც იმდროინდელ პოლიტიკურ მოღვაწეთა წრეებში ჰქონდა ადგილი, მეთაურობდა იმ პარტიას, რომელიც ანტონ კათალიკოსის წინააღმდეგ იბრძოდა და წარმატებასაც მიაღწია. ანტონ კათალიკოსი საქართველოდან გააძევეს, მაგრამ როცა 1764 წელს ერეკლე მეფის მოწვევით ანტონი დაბრუნდა და საკათალიკოსო ტახტი დაეკავა, ბუნებრივია, ზაქარიას საქმე ცუდად წავიდა. იგი მღვდლობიდან განკვეთეს, შეაჩვენეს და საქართველოდან გააძევეს. ერთხანს რუსეთში დაიწყო მოღვაწეობა, მაგრამ 1771 წელს საქართველოში დაბრუნდა და იმერეთში დამკვიდრდა. გელათში დაიწყო მოღვაწეობა და იქვე გარდაიცვალა.

¹ ს. კაკაბაძე, დასავლეთ საქ. საეკლესიო საბუთები, I, გვ.131-147.

² კალმასობა, II, გვ. 195.

იმერეთის სამეფო კარზე ზაქარია გაბაშვილი გაცხოველებულ ლიტერატურულ და მთარგმნელობით საქმიანობას ეწეოდა. იგი ითვლებოდა კალიგრაფიული სკოლის დამფუძნებლად გელათში. ამ სკოლის „ხელნაწერები გამოირჩევიან განსაკუთრებული სისუფთავით, სილამაზითა და რაღაც თავისებური, გაბაშვილთა საკალიგრაფიო სკოლისათვის დამახასიათებელი ნატიფობით“.¹ ზაქარიას ბევრი საეკლესიო წიგნი გადაუწერია, მათ შორის 1772 წელს გადაწერა და მოწატა „უამის წირვა“. იგი ბევრს თარგმნის, არსებულ ქართულ თარგმანებს ადარებს ბერძნულ და რუსულ ტექსტებს, ავსებს, ასწორებს და „ყოველთურთ განსრულებულ“ რედაქციას იძლევა.²

იმერეთში მოღვაწეობის პერიოდიდან აღსანიშნავია მისი შესწამილოცვა სოლომონ პირველისადმი. ამ ნაწარმოებით იმერთა მეფეს ამალღებული ტონით, მაღალფარდოვანი სტილითა და საზეიმო განწყობილებით მიულოცა ოსმალებზე გამარჯვება ჩხერის ომში (1774 წ.).³

მამასთან ერთად იმერეთში მოღვაწეობდა იოსებ გაბაშვილი, რომელიც ადრე მამასთან ერთად იქნა შეჩვენებული, მან სოლომონ მეფისაგან სახლთუხუცესობა და დიდძალი მამულები მიიღო. ცნობილია მის მიერ დაწერილი რამდენიმე საბუთი 1776 — 1777 წლებისა.

იმერეთში მოღვაწეობდა ზაქარიას შვილი ნიკოლოზი, რომელმაც საეკლესიო კარიერა ქუთაისში მოიპოვა. „ერთგულებისა და მსახურებისათვის“ გლეხებიც კი მიიღო მეფისაგან. 1785 — 1803 წლების საბუთებში ხშირად იხსენიება, წერდა საბუთებს და ეწეოდა მწიგნობრულ-საგანმანათლებლო საქმიანობას.⁴

მამასა და ძმებთან ერთად იმერეთში მოღვაწეობდა ცნობილი პოეტი ბესარიონ გაბაშვილი (ბესიკი) (1750—1791 წწ.). აღმოსავლეთ საქართველოდან მამისა და ძმის გაძევების შემდეგ ბესიკი ლევან ბატონიშვილის ამაღაში ჩარიცხეს, მაგრამ 1777 წელს ქართლ-კახეთის მეფის საწინააღმდეგო შეთქმულებაში მონაწილეობისათვის იგი ერეკლე მეფემ აღმოსავლეთ საქართველოდან გააძევა, იგი იმავე წელს იმერეთში გადავიდა, სადაც დიდი პატივით მიიღეს და კიდევ დააწინაურეს. იგი იმდენად სწავლო პირი იყო სოლომონისათვის,

¹ ნ. შაიხურაძე, მწიგნობარ გაბაშვილთა ოჯახი, ქუთაისის პედაგოგიური ინსტიტუტის შრომები, ტ. XIV, 1955, გვ. 89.

² იქვე.

³ ლ. მენაბდე, ძველი ქართული მწერლობის კერები, ტ. I, თბ., 1962 წ. გვ. 520.

⁴ ნ. შაიხურაძე, დასახ. ნაშრ., გვ. 89—101.

რომ 1778 წელს სპარსეთშიც კი გაგზავნეს ალექსანდრე ბატონიშვილის ჩამოსაყვანად, რათა იგი ერეკლე მეფისათვის დაეპირისპირებინათ. ცნობილია, რომ ამ დროს ერეკლე და სოლომონ მეფეები ერთმანეთს მტრობდნენ და მოწინააღმდეგე პირთ ფართოდ უღებდნენ კარს. ბესიკმა მეფე სოლომონის დავალება პირნათლად შეასრულა.

დავით გიორგის ძის გამეფების შემდეგ ბესიკის ავტორიტეტი კიდევ მეტად გაიზარდა. ის არა მარტო „მდივანთუხუცესი“ იყო, არამედ მეფის პირველი მრჩეველი და თანამზრახველი. დავით გიორგის ძემ თავადობაც უბოძა, 1789—1791 წლებში დიპლომატიური მისიის მეთაურობა დაევალა და რუსეთს წარგზავნა თავის მუღმივ წარმომადგენლად.

იმერეთის სამეფო კარზე ყოფნის დროს ბესიკი წერდა საბუთებს. მან იმერეთში დაწერა არა ერთი საინტერესო ნაწარმოები: „ცრემლთა ისარნი“, „რუხის ბრძოლა“ (1779 წ.), რომელშიც რიტორიკული ენაწყლიანობითაა შექმებული სოლომონ პირველისა და მისი თანამებრძოლების გულადობა და ვაჟკაცობა. ქუთაისში არის დაწერილი სამგლოვიარო ოდა, სამძიმარი, რომელშიც პოეტმა ცხარე ცრემლით დაიტირა თავისი მეგობარი ლევან ბატონიშვილი (გარდაიცვალა 1781 წ.). საფიჭრებელია ქუთაისში იყოს დაწერილი ოდა „ასპინძისათვის“, რომელშიც ავტორმა დიდებულად შეამკო დავით ორბელიანის ვაჟკაცობა და ქართველთა გმირობა, ზოლო ოდაში ისე ჩანს, რომ ერეკლე მეფე თითქოს არც კი ყოფილიყოს ამ ბრძოლაში (ბესიკს ბოლომდე გაჰყვა ერეკლე მეფის სიძულვილი). ქუთაისში არის დაწერილი სოლომონ პირველის ეპიტაფია, ლექსი „ღედოფალ ანაზედ“ და სხვ.

იმერეთის სამეფო კარზე ამავე პერიოდში მოღვაწეობდა სოლომონ მეფის სიძე და დავით გიორგის ძის უახლოესი კარისკაცი, ერეკლე მეფისაგან გამოძევებული ლირიკოსი ელიზბარ ერისთავი (1738—1831 წწ.), რომელიც ქსნის საერისთავოს დაბრუნებაზე ოცნებობდა, მაგრამ სოლომონ მეორის გამეფების შემდეგ იმედი გადაეწურა და ისევ ქართლში დაბრუნდა.

1779 წელს სპარსეთიდან იმერეთში ჩამოდის ერეკლე მეფის მოწინააღმდეგე დასის თვალსაჩინო წარმომადგენელი, გეორგიანული ისტორიის ავტორი ალექსანდრე ამილახვარი (1750—1801 წწ.). მას ერეკლე მეფის წინააღმდეგ შეთქმულებაში მონაწილეობისათვის ცხვირი მოჭრეს და საქართველოდან გააძევეს.

მან ქუთაისში ყოფნის დროს დაწერა და სოლომონ მეფეს მიართვა სოციალ-პოლიტიკური ტრაქტატი „ბრძენი აღმოსავლეთისა“.

ტრაქტატში გამოთქმული იდეები განსაზღვრულია XVIII საუკუნის განმანათლებლების შეხედულებებით, განსაკუთრებით კი მონ-

ტესკიეს (1689 — 1755წწ.) თხზულებით „კანონთა სულის შესახებ“¹. ტრაქტატი თავადური იდეოლოგიის გამოხატველია და ქართული პოლიტიკური აზროვნების მაღალი დონის მაჩვენებელია.

ტრაქტატი „ბრძენი აღმოსავლეთისა“ ამილახვარმა მიუძღვნა იმერთა მეფეს სოლომონ პირველს (წერა დაამთავრა 1780 წ.). მასში წარმოდგენილია ისეთი სახელმწიფოებრივი წყობილების ფორმები, რომლებიც საუკეთესოა ფეოდალური წრისათვის და მის პრაქტიკულ განხორციელებას ურჩევს სოლომონ მეფეს.

ქართლიდან ლტოლვილი მწიგნობრები იმერეთში გადადიან XIX საუკუნის დასაწყისშიც. 1801 წელს იმერეთში ჩადის იულონ ბატონიშვილი, მასთანაა იოანე ქართველიშვილი; რომელიც იულონის ნებართვით ემსახურება სოლომონ მეორეს როგორც მდივანი.

1802 წელს იმერეთში ჩადის ერეკლეს ცნობილი მსაჯული, გამოჩენილი სახელმწიფო მოღვაწე სოლომონ ლიონიძე (1754—1811 წწ.). სოლომონ მეფემ ერთგულებისათვის ლიონიძეს უბოძა მამულები რაჭა-იმერეთში, თავის კანცლერად დანიშნა და 1803 წელს რუსეთშიც მიავლინა (სოლომონ ლიონიძე ერთადერთი იყო, რომელმაც ბოლომდე შეინარჩუნა მეფის ერთგულება).

ლიონიძეს არც იმერეთში შეუწყვეტია ლიტერატურული საქმიანობა. ქუთაისში დაუწერია სატირა ნ. დადიანზე.

ძალზე ბევრი ხელნაწერია დამზადებული იმერთა მეფის დავით გიორგის ძის მეუღლის ანა დედოფლის ინიციატივით. იმისი დაკვეთით ნუსხებს ამრავლებდნენ ი. მუსხელიშვილი, გ. ჭათიშვილი, ოსე გაბაშვილი (ზაქარაის შვილი), გელათის არქიმანდრიტი ზაქარია, მაია ჩიქოვანი² და სხვ.

ერთ-ერთ ძლიერ საგანმანათლებლო ცენტრად ითვლებოდა ხონი, წმ. გიორგის სახელობის ეკლესიასთან არსებული სასწავლებელი. აქაა დამზადებული მრავალი სასულიერო და საერო ხასიათის წიგნები. ამ სკოლის ერთ-ერთი მოღვაწე იყო მიტროფანე გრიგოლაშვილი, რომელმაც შეადგინა სასულიერო-მეთოდური ხასიათის სახელმძღვანელო „სწავლა თუ ვითარ მართებს მოძღვარსა სწავლება მოწაფისა (კითხვამიგებით წარმოდგენილი)“³.

იმერეთში მოღვაწეობდა გიორგი ალექსანდრეს ძე ბაგრატიონი (1778—1807 წწ.), იგი იყო სოლომონ პირველის ერთადერთი ვაჟის ალექსანდრეს (გარდაიცვალა 1780 წ.) უკანონო შვილი. სოლომონის გარდაცვალების (1784 წ) შემდეგ მისი შვილიშვილი არავის არ

¹ საქართველოს ისტორიის ნარკვევები, ტ. IV, თბ., 1973, გვ. 794.

² ლ. შენაბდუ, დასახ. ნაშრ., გვ. 518.

³ ნ. ეაკრიძე, იმერეთის სამეფოს კულტურული ცხოვრება მე-18 ს.-ის მიწურულსა და მე-19 ს.-ის დასაწყისში. გვ. 6 (ხელნაწერის უფლებით).

ჩაუთვლია, და არც თვით სოლომონი თვლიდა, ტახტის მემკვიდრედ.

1797 წელს იმერეთის ფეოდალთა ერთმა ჯგუფმა სოლომონ მეფის ტახტიდან გადაგდება და გიორგი ალექსანდრეს ძის გამეფება მოინდომა. მაგრამ შეთქმულება გამომჟღავნებულ იქნა. სოლომონ მეორემ სიფრთხილისათვის ტახტის პრეტენდენტი დააპატიმრა 1797 წელს და მუხურის ციხეში გამოკეტა. 1798 წელს გიორგი მუხურის ციხიდან გაიპარა და ისევ სოლომონ მეფესთან გამოცხადდა, მეფისადმი ერთგულების დამტკიცებას შეეცადა და არავითარ პრეტენზიას ტახტზე არ აცხადებდა, მაგრამ სოლომონ მეფემ მრჩეველთა ზეგავლენით ისევ მუხურის ციხეში ჩაკეტა.

გიორგი რუსეთის მოხელეებს დაუეჯავშირდა და მათი დახმარებით 1806 წელს მეორედ გაიპარა ციხიდან და რუსთა ბანაკში გენერალ რიკპოფთან გამოცხადდა (რუს მოხელეებს გიორგი სოლომონის წინააღმდეგ და დასაპირისპირებლად სურდათ გამოეყენებინათ, ამიტომ დაინტერესდნენ მისი ვანთავისუფლებით). მათ გიორგი ჯერ აღმოსავლეთ საქართველოში და შემდეგ პეტერბურგში გაგზავნეს 1806 წელს. იგი იმპერატორ ალექსანდრე პირველს წარუდგინეს როგორც იმერეთის ბატონიშვილი, მაგრამ დიდხანს აღარ უცოცხლია. გიორგი ალექსანდრეს ძე ბაგრატიონი ყვავილით გარდაიცვალა 1807 წელს, ღაჯრძალეს ალექსანდრე ნეველის ლავრაში.

გიორგი ბაგრატიონის ლიტერატურულ მემკვიდრეობას შეადგენს პოემა „ხუმბარდიანი“, ავტობიოგრაფიული თხზულება „თავგადასავალი“ და ლექსები, რომელთა ერთი ნაწილი კარგა ხნის მანძილზე ბესიკს მიეწერებოდა.

გ. ბაგრატიონით ჯერ კიდევ XIX ს. 50-იან წლებში დაინტერესდა ვ. ცვეტკოვი. მან იმერეთში იმოგზაურა და ხახუტა აბესაძის¹ მონათწრობის მიხედვით დაწვრილებით აღწერა გიორგი ბაგრატიონის მუხურის ციხეში ტყვეობის ამბავი. ამასთან ერთად ცვეტკოვი შეეცადა გიორგის ლექსების შეგროვებას, მაგრამ ამაოდ. იგი შენიშნავს, რომ ლექსების ნაწყვეტები თბილისში მოუხსენია მოხუცებისაგან.

გ. ბაგრატიონის რამდენიმე ლექსს მიაკვლია ხელნაწერთა ინსტიტუტის თანამშრომელმა ლ. ქუთათელაძემ. მანვე შეკრიბა და გამოსაცემად მოამზადა გ. ბაგრატიონის თხზულებათა კრებული.

გ. ბაგრატიონის ლიტერატურულ მემკვიდრეობაში მნიშვნელოვანი ადგილი უჭირავს სატრფიალო-რომანტიკულ პოემას „ხუმბარ-

¹ იმერეთის მეფის დავით გიორგის ძის ვაჟი სოლომონ მეფეს გიორგისთან ერთად მუხურის ციხეში ჰყავდა გამოკეტილი. ხახუტა აბესაძე მისი გამდელს ახლო ნათესავი იყო.

დიასს“, რომელიც თვით პოეტის ავტობიოგრაფიაა. პოემა დაწერილია მუხურის ციხეში ყოფნის დროს 1803 — 1804 წლებში.

საინტერესო ლიტერატურული ნაწარმოებია გ. ბაგრატიონის ავტობიოგრაფია, რომელიც თედო ჟორდანიამ იპოვა და გამოაქვეყნა 1900 წელს ჟურნალ „მოამბეში“ სათაურით „თავგადასავალი იმერეთის მეფის სოლომონ დიდის შვილისშვილის ბატონიშვილის გიორგისა“.

თავგადასავალი დაწერილია მოსკოვში. გ. ბაგრატიონმა თავისი ცხოვრების მხოლოდ სამი ეპიზოდი წარმოადგინა დამოკიდებულება სოლომონ მეორესთან, მეფის მიერ მისი დაპატიმრება და, რუსეთში საცხოვრებლად გადასვლა. თავისი მნიშვნელობით „თავგადასავალი“ საისტორიო ძეგლია, იგი შუქს ფენს 1790—1807 წლებში იმერეთის ისტორიის ბევრ საყურადღებო დეტალს¹.

მოხსენიების ღირსი არის ცნობილი მწერალი ტიმოთე გაბაშვილი, რომელიც ადრე თბილისში მოღვაწეობდა, ხოლო მე-18 საუკუნის 30-იან წლებში იმერეთის სამეფო კარზე დაიღო ბინა, სადაც ქუთათელ მთავარეპისკოპოსად აეურთხეს. თავისი ნიჭითა და გამჭრიახობით თავი გამოიჩინა და დაუახლოვდა იმერთა მეფეს ალექსანდრე V. იმერთა მეფის დავალებით ტიმოთე 1737 წელს რუსეთში გაემგზავრა დიპლომატიური მისიით და თან წაიღო მისივე შედგენილი იმერეთის რუკა.

რუსეთიდან დაბრუნებული ტიმოთე 1742—1747 წლებში კვლავ ქუთაისის ეპარქიას განაგებდა, ხოლო შემდეგ ისევ ქართლში ბრუნდება.

აღსანიშნავია, რომ ტიმოთეს რუსეთში ყოფნის დროს ქუთათელ მიტროპოლიტად 1740 წელს დაუდგენიათ ანტონი (შემდეგში კათალიკოსი ანტონ I) და ორი წელი დაუყვია ქუთაისში.

ცნობილი არაა თუ რა ლიტერატურულ საქმიანობას ეწეოდა ეს ორი ფრიად განსწავლული პიროვნება, მაგრამ ცხადია, რომ თავის სიტყვას იტყოდნენ კულტურულ-საგანმანათლებლო საქმიანობაში.

დიდოსტატ წინაპართა კულტურულ-ლიტერატურული ტრადიციების დაგვირგვინებას წარმოადგენდა ქართული სტამბის დაარსება ქუთაისში. მე-19 საუკუნის დასაწყისში აქ დაბეჭდილი წიგნები „დავითიანი“, „კურთხევანი“, „ჟამნი“ და სხვ. მთელ დასავლეთ საქართველოს ეფინებოდა. სტამბის პირველი შემქმნელი გიორგი პაიჭაძე, რომანოზ ზუბაშვილი და სხვები ენერჯიას არ იშურებდნენ ქართული წიგნის ბეჭდური გამოცემისათვის.

¹ გიორგი ბაგრატიონის შესახებ ცნობები ამოღებული გ. პაიჭაძის ზემოთ დასახელებული შრომიდან.

იმერეთის ისტორია ერთი თვალის გადავლევით

(ბოლო სიტყვაობა)

ასე დასრულდა იმერეთის სამეფოს სამნახევარსაუკუნოვანი ისტორია — XV საუკუნის სამოციანი წლებიდან XIX საუკუნის პირველი ათეული წლის ბოლომდე.

მე-12—13 საუკუნეებში უძლიერესი ქრისტიანული სამეფო მთელ წინააზიაში — საქართველო — მე-16 საუკუნეს დაშლილი და დაუძლურებული შეეგება. მისი ერთ-ერთი ნაწილის — იმერეთის მთელი მომდევნო ისტორია ჩვენი სამშობლოს ტრაგიკული ისტორიის განუყოფელი და დამახასიათებელი ნაწილია.

მეტად რთული, წინააღმდეგობრივი, შინა-გარე ვითარებით გაპირობებული, უკიდურესობამდე (ქვეყნის ყოფნა-არყოფნამდე) მისული ეს ისტორია მაინც მოიცავს განსაზღვრულ, თანმიმდევრულ, გეგმაზომიერ და კანონზომიერ ეტაპებს, რომლებიც უნდა გამოიყოს და დახასიათდეს ძირითადი ნიშნებისა და ტენდენციების მიხედვით.

როგორც დავინახეთ, მე-16 — 18 სს. ჩვენი სამშობლოსათვის „ძნელბედობის“ ხანა იყო.

საქართველოს (კერძოდ, დასავლეთი საქართველოს) პოლიტიკური, სოციალურ-ეკონომიკური და მორალური დაქვეითება ამ პერიოდში არ შეიძლება აიხსნას მხოლოდ ადგილობრივი, ლოკალური ვითარებით, ჩვენი ქვეყნის შინაგანი ძალების ურთიერთგანწყობით, მათ შორის წინააღმდეგობით თუ თანხმობით. ეს დაქვეითება განაპირობა იმ ეპოქალურმა ცვლილებებმა, რომლებიც წინა საუკუნეებში განიცადა მსოფლიომ: მონგოლთა შემოსევები და ბატონობა; ხალხთა მასების უდიდესი გადასაცელება დასავლეთისაკენ; ახალი საზღვაო-საეკპრო გზების აღმოჩენა აღმოსავლეთისაკენ; განვითარებული ქვეყნების, კერძოდ, ბიზანტიის დამხობა; ჩამორჩენილი, აგრესიული ქვეყნების — ოსმალეთისა და ირანის ურთიერთბრძოლა ჰეგემონობისათვის; რუსეთის ბუმბერაზი ცენტრალიზებული სახელმწიფოს ეფექტური გამოჩენა აღმოსავლეთი ევროპის თვალწინდელ ველებზე და სხვ.

ფეოდალიზმი შევიდა თავისი განვითარების საბოლოო სტადიაში — ბურჟუაზიული რევოლუცია ინგლისში უკვე მე-17 საუკუნეში ძლევამოსილი ნაბიჯით მიემართებოდა წინ, ხოლო სულ რაღაც ერთი საუკუნის შემდეგ საფრანგეთის დიდმა რევოლუციამ ბოლო მოუღო ამ უკვე დრომოქმულ ფორმაციას.

ამ დროს აღმოსავლური ტირანიების არტახებში მოქცეული, დასავლეთს მოწყვეტილი ერთადერთი პატარა ქრისტიანული სამეფო ევროპა-აზიის საზღვარზე, რომელიც გვიანი ფეოდალიზმის პირობებში იმყოფებოდა და აქამდე მსოფლიო სავაჭრო კომუნიკაციებთან ახლოს მდებარე, ახლა უკვე ჩაკეტილი იყო, რასაკვირველია, ვერ შეძლებდა სავსებით გაერთმია თავი ამ რთული ვითარებისათვის... და ვერ გაართვა კიდეც — იგი დაქუცმაცდა, დაეცა, გარეშე მტრების ურთიერთბრძოლის ასპარეზი შეიქნა, მატერიალურად და სულიერად დაქვეითდა, სრული ფიზიკური მოსპობისა თუ გადაგვარების წინაშე დადგა.

მთელი სამი საუკუნე გაგრძელდა „ძნელბედობის“ ხანა საქართველოსათვის, როცა მწვევედ იდგა მისი ყოფნა-არყოფნის საკითხი, მაგრამ ქვეყნის სოციალურ-ეკონომიკურმა წყობამ, რომელიც უფრო პროგრესული იყო გარემომცველი მაჰმადიანური ტირანიების წყობასთან შედარებით, ქართველი ხალხის დიდმა მატერიალურმა და სულიერმა კულტურამ, მისმა გმირულმა და მხნე ეროვნულმა ხასიათმა, დაუშრეტელმა ბრძოლისუნარიანობამ, ჩვენი სამშობლოს თავისებურმა ბუნებრივ-გეოგრაფიულმა პირობებმა, მისი პოლიტიკური მეთაურების (პირველ რიგში — თეიმურაზ I-ის, თეიმურაზ II-ის, არჩილ I-ის, ვახტანგ VI-ის, სოლომონ I-დიდის, ერეკლე მეორის) სიბრძნემ და დაუცქრომელმა ქმედითობამ დალუპავს გადაარჩინა საქართველო: მან შეინარჩუნა თავისი საკუთარი სოციალურ-ეკონომიკური წყობა, სარწმუნოება, ენა და დამწერლობა, კულტურა, ზნე-ჩვეულებანი: შეინარჩუნა ერთიანობისა და თავისუფლებისადმი რწმენა და მისწრაფება. ასე მოაღწია ჩვენმა სამშობლომ მე-19 საუკუნის მიჯნას, როცა რუსეთთან შეერთებით დაიწყო ახალი ერა მის ისტორიაში.

მე-18 საუკუნეში სავსებით აშკარა გახდა რუსეთის იმპერიის ძლევამოსილი წინსვლა და მისი ძალების კუმულაცია ამიერკავკასიაში, რასაც წინა საუკუნეებში მხოლოდ პერსპექტიული და პოტენციური ხასიათი ჰქონდა.

თუ აქამდე რუსეთი მხოლოდ დიპლომატიურ კონტაქტებსა და ინფორმაციის მიღებას ისახავდა მიზნად, წყალობასა და ყურადღებას იჩენდა ამიერკავკასიის ქრისტიანი მოსახლეობისადმი (ძირითადად ქართველების), და ნომინალური დახმარების იმედებით კვება-

ვდა მათ, ახლა რეგულარული არმიის ჯერ ასეულებს, ხოლო შემდეგ ათასეულებსაც გზავნის საქართველოში და აქედან, როგორც პლაცდარმიდან, უტევს ამიერკავკასიის მაჰმადიანურ სამყაროს — განჯის, ბაქოს, ერევნის ხანებსა და სხვა მფლობელებს, და, რაც მთავარია, ალყაში აქცევს და თავს ესხმის ოსმალეთის გამაგრებულ პუნქტებს შავი ზღვის აღმოსავლეთ სანაპიროზე, ე. ი. დასავლეთ საქართველოში; ამრიგად, რუსეთი ცდილობს ორ ფრონტს შორის მოაქციოს ოსმალეთი, დაამარცხოს იგი ძირითად — დასავლეთის ფრონტზე და ამით არა მარტო შექმნას პირობები ბალკანეთზე მისი შევიწროებისათვის, არამედ ბოლო მოუღოს ოსმალეთის გავლენას შავი ზღვის ჩრდილოეთ და აღმოსავლეთ სანაპიროებზეც, რაც ამ რაიონებიდან მისი საბოლოო განდევნის წინაპირობას წარმოადგენს.

ყველაფერი ეს იყო უმნიშვნელოვანესი შემადგენელი ნაწილი რუსეთის იმპერიის სტრატეგიული გეგმისა, რაც უკვე პეტრე ღიდის პერიოდიდან დასახა რუსეთმა და რასაც პეტრეს შემდგომი საუკუნეების მანძილზე ცდილობდა მისი იმპერია.

ეს ვითარება რუსეთის ინტერესთა სფეროში აქცევდა არა მარტო ამიერ, არამედ მთელ კავკასიასაც, ვინაიდან მაჰმადიანი ხალხებით დასახლებული ჩრდილოეთი კავკასია დაკავშირებული იყო არა მხოლოდ ოსმალეთთან და სპარსეთთან, არამედ შავი ზღვის ჩრდილოეთი სანაპიროს (უმთავრესად ყირიმის) მაჰმადიანურ სამყაროსთანაც.

ამავე დროს, დიდი რუსეთის ძლევამოსილი მსვლელობა აღმოსავლეთისაკენ, რაც აგრეთვე ჩქარი ტემპით მიმდინარეობდა, თავისი მარჯვენა ფლანგით (კასპიის ზღვა, კავკასია, ირანი) უშუალოდ უკავშირდებოდა ამიერკავკასიას, კერძოდ საქართველოს.

ამ ვითარებაში, ქრისტიანული საქართველო მე-18 საუკუნის რუსეთის იმპერიისათვის უმთავრესი დასაყრდენი გახდა მთელ კავკასიაში, როგორც, ჯერ ერთი, მაჰმადიანური ჩრდილო-კავკასიის ზურგი; მეორე, შავი ზღვის ჩრდილოეთი მაჰმადიანური სანაპიროს მიმართულებით რუსთა მოძრაობის მარცხენა, საიმედო ფლანგი; მესამე, ირანის წინააღმდეგ პერსპექტიული მოქმედების საყრდენი ბაზი; და მეოთხე — უმთავრესი — შავი ზღვის აღმოსავლეთი სანაპიროს ოსმალეთის ციხესიმაგრეებზე და ხმელეთიდან (ახალციხე და მთელი სამხრეთი საქართველო) ოსმალეთზე შეტევის ძირითადი ბაზა.

ამრიგად, შეიძლება სარწმუნოდ ითქვას, რომ საქართველოსადმი ყურადღება, რასაც რუსეთი მე-18 საუკუნეში (განსაკუთრებით მისი მეორე ნახევრიდან) იჩენს, გაპირობებული იყო არა ლოკა-

ლური, ადგილობრივი მიზნებით, არამედ იმპერიის დიდი სტრატეგიული გეგმით.

ახლა ამიერკავკასიაში არსებულ ორმხრივ ურთიერთობაში — აღმოსავლეთი საქართველო — ირანი და დასავლეთი საქართველო — ოსმალეთი, დამყარდა სამმხრივი ურთიერთობა — აღმოსავლეთი საქართველო — რუსეთი — ირანი და დასავლეთი საქართველო — რუსეთი — ოსმალეთი. ამით ფაქტიურად დაირღვა. ოსმალეთ-ირანის 1555 წლის ამასიის ზავით დაწესებული გავლენის სფეროთა განაწილება და ირან-ოსმალეთის მიერ ორად გაგლეჯილ საქართველოს მოევლინა მისი გამაერთიანებელი გარეშე ძალა, რომელმაც შემდგომში თუმცა დაარღვია საქართველოსთან ხელშეკრულებით განსაზღვრული ურთიერთობა, მაგრამ ობიექტურად მისი ეროვნული სხეულის გამაერთიანებელი გახდა და ამით უდიდესი პროგრესული როლი შეასრულა საქართველოს ისტორიაში.

ასევე სარწმუნოდ შეიძლება ითქვას, რომ ტრაქტატი, რომელიც ერეკლე მეორის მიერ დაიდო იმპერატრიცა ეკატერინესთან 1783 წელს, წარმოადგენდა რუსეთის დიდი გეგმიდან გამომდინარე ღონისძიებას. მას უდიდესი მნიშვნელობა ჰქონდა მთელი საქართველოსათვის (დასავლეთი საქართველოს, კერძოდ იმერეთისა. ვისაც) და ქართველ პოლიტიკოსთა სიბრძნეზე მეტყველებდა.

ამიერიდან საქართველო გამოეთიშა მაჰმადიანურ სამყაროს. გათავისუფლდა აზიური ქვეყნების გავლენისა და მათი ისტორიის ჩარხის ტრიალისაგან (თუმცა ეს ფაქტიურად ცოტა უფრო გვიან მოხდა); იგი, როგორც ევრაზიული ქვეყანა, მთლიანად მოექცა ევროპული ცივილიზაციისა და ისტორიის ორბიტაში, რამაც, ჯერ ერთი, გადაარჩინა საქართველო ფიზიკურ და ეროვნულ მოსპობას. მაჰმადიანური სამყარო რომ უქაღდა, და მეორე, რუსეთის იმპერიაში და დასავლეთ ევროპაში მიმდინარე ეკონომიკურ, სოციალურ-პოლიტიკურ და კულტურულ მოვლენებში მონაწილეობით, ე. ი. თანამედროვე ცივილიზებულ ერთა თანაარსებობის ფერხულში ჩაბმით, შექმნა წინაპირობა ქვეყნის სწრაფი სამეურნეო-ეკონომიური და კულტურული აღორძინებისათვის.

ამ დებულების ნათელ ილუსტრაციას წარმოადგენს თუნდაც ის ფაქტი, რომ XIX და განსაკუთრებით XX საუკუნის ყველა მნიშვნელოვან ტექნიკურ თუ სოციალ-ეკონომიკურ სიახლეს საქართველო ეზიარა მათი გამოგონების, აღმოჩენისა და შექმნიდან რაღაც ათეულ თუ ერთეულ წელთა შემდეგ, მაშინ, როცა მაჰმადიანური გავლენის სფეროში მოქცეულ საქართველოს საუკუნეები სჭირდებოდა ამისათვის (მაგალითად. წიგნის ბეჭდვა დავიწყეთ 270 წლის შემდეგ გუტენბერგის გამოგონებიდან, ხოლო პირვე-

ლი რკინიგზა, ტელეგრაფი, ტელეფონი, ავტომობილი, კინო, ელექტროგანათება, რადიოგადაცემა, რენტგენი, ტელევიზია და ატომი რაღაც ათეული და თვით ერთეული წლების შემდეგ გაჩნდა საქართველოში).

ამრიგად, მე-18 საუკუნე არა მარტო დასავლეთი საქართველოს, კერძოდ იმერეთის, არამედ მთელი საქართველოს ისტორიაში ძველი ერის დასასრული და თვისებრივად ახალი ერის დასაწყისია, მაშასადამე, იგი უმნიშვნელოვანესი საუკუნეა მთელს ჩვენს ისტორიაში.

საქართველოს ისტორიოგრაფიამ (აქ იგულისხმება საქართველოს შესახებ არსებულ ქართულ და არაქართულ წყაროთა ერთობლიობა) მეტ-ნაკლები სისრულით გააშუქა ეს პერიოდი, მრავალი წინააღმდეგობრივი აზრი და დებულება გამოითქვა, შეიქმნა სხვადასხვა თეორია და ცნება, მაგალითად, „ნაკლები ბოროტებისა“.

რასაკვირველია, ვერაინ გაამართლებს ზოგიერთი უგუნური რუსი მოხელის მოქმედებას, რომლებიც ქართველ მეფე-მთავრებთან იყვნენ მოვლინებულნი ან რუსეთის ჯარების შენაერთებს მეთაურობდნენ (როგორც, მაგ. ტოტლებენი), ვერც ქართველი მეფე-მთავრების ზოგჯერ ჭიუტ და წინდაუხედავ მოქმედებას ვუპოვით გამართლებას, ვერც რუსეთის თვითმპყრობელობის გამარჯვებელ და მცირე ერთა მჩაგვრელ პოლიტიკას გავიზიარებთ, მაგრამ ისტორიული თვალსაზრისით უმჯობესი ალტერნატივა ქართველი ხალხისათვის არ არსებობდა; მოვლენათა შემდგომმა განვითარებამ, რაშიც რუსი ხალხის წარმომადგენლებთან ერთად ქართველებსაც დიდი როლის შესრულება დააკისრა ისტორიამ, ეს საკვებით დაადასტურა.

მეტი თვალსაჩინოებისათვის შეიძლებოდა მსჯელობა ასე წარგვემართა — ძლიერი შესაძე ძალის გამოჩენა ამიერკავკასიაში არსებითად ცვლიდა აქ არსებულ სიტუაციას და კარგ პერსპექტივას უსახავდა ქართველ პოლიტიკოსებს საკუთარი ქვეყნის თავისუფლებისა და დამოუკიდებლობის შენარჩუნებისათვის.

ჯერ კიდევ ბიზანტიისა და ირანის აგრესიულ ზრახვათა შეჯახება ამიერკავკასიაში (IV — V სს. ჩვ. წ. ა.) შესაძლებლობას უქმნიდა ქართველებს დაპირისპირებულ ძალთა წონასწორობის ვითარებაში დამოუკიდებლობა და თვითმყოფობა შეენარჩუნებინათ; უფრო გვიან, როცა საქართველოს დასავლეთელ ძლიერ მეზობლად ბიზანტიის ნაცვლად აგრესიული ოსმალეთი მოველინა, ეს წონასწორობა (ირანი — ოსმალეთი) ერთ ხანს ჩვენს სასარგებლოდ მოქმედებდა, მაგრამ ამასიის ზავით ორივე აგრესორმა იგი თავიანთ სასარგებლოდ წარმართა და საქართველო შუაზე გაიყო.

ახლა, ძლიერი რუსეთის შემოსვლით კავკასიაში საუკუნეთა მანძილზე შექმნილი ქართველთათვის ავბედითი ეს წონასწორობა (აღმოსავლეთი საქართველო — ირანს, დასავლეთი საქართველო — ოსმალეთს) დაირღვა, ჩვენს პოლიტიკოსებს ახალი დიდი ასპარეზი გაეხსნათ — დაპირისპირებულ ძალთა კიბილში საკუთარი თვითმყოფობა გადაერჩინათ და საგარეო სიტუაცია ქვეყნის სასარგებლოდ წარემართათ.

როგორც ვიცით, ასე არ მოხდა. მოვლენები სულ სხვაგვარად წარიმართა. არ შეიძლება ეს ჩვენი სამშობლოს მესვეურთა (ერეკლე, სოლომონ დიდი და სხვ.) პოლიტიკურ სიბეცეს, მათ წინდაუხედაობას ან უმოქმედობას მივაწეროთ.

თუ XVIII საუკუნისა და მომდევნო პერიოდის ამიერკავკასიაში ზემოთ აღნიშნული წონასწორობა ვერ შეიქმნა, ეს უთუოდ დაპირისპირებულ საგარეო ძალთა უთანასწორობის შედეგი იყო და არა ქართველ პოლიტიკოსთა წინდაუხედაობისა. რუსეთი უკვე მე-18 საუკუნეში წარმოადგენდა დიდ, ძლიერ, სოციალ-ეკონომიკურად, პოლიტიკურად, კულტურულად, სამხედრო ორგანიზაციით უფრო პროგრესულ სახელმწიფოს, ვიდრე იმავე საუკუნის ოსმალეთი და ირანი;

ამდენად, თუ ქართველი მეფეები გარკვევით არ დადგებოდნენ რუსეთის მხარეზე და შეეცდებოდნენ ხელი შეეშალათ რუსის ჯარის შემოსვლისათვის ამიერკავკასიაში, ამით მხოლოდ უფრო გაართულებდნენ ვითარებას, შესაძლოა განსაზღვრული ხნით გააჭიანურებდნენ კიდევაც თავიანთი სამეფოების არსებობას, მაგრამ ვერავითარ პოლიტიკურ წონასწორობას ამიერკავკასიაში ვერ მიაღწევდნენ.

შემდეგი კითხვა, რომელიც იმერეთის ისტორიის საერთო შეფასებისას ისმის ჩვენს წინაშე, მეტად ბუნებრივია: „რა ქონებამ გაუძლო ამისთანა ყოფასა, რა ჰკვებავდა ხალხსა, რა სახსრებით უძღვებოდა ამოდენა ომებსა და სისხლის ღვრასა?“ (ილია ჭავჭავაძე).

მესამე კითხვა, რომელიც უპასუხოდ არ უნდა დარჩეს, ასეთია — რატომ ვერ შეძლეს გაცილებით უფრო დიდმა და ძლიერმა ოსმალეთმა და სპარსეთმა შესაბამისად დასავლეთი და აღმოსავლეთი საქართველოს დაპყრობა, მოსახლეობის გამაჰმადიანება და ამ ქვეყნების მითვისება, ისე, როგორც ეს მოხდა აჭარასა და ახალციხეში (სამხრეთ საქართველოში)?

მეთხე კითხვაც ამ ორთან უშუალოდ არის დაკავშირებული — რატომ ვერ შეძლეს საქართველოს მეფეებმა და საერთოდ, მეფემთავრებმა ერთიანობისათვის მიეღწიათ და საერთო ძალით უფრო ქმედითი წინააღმდეგობა გაეწიათ გარეშე მტრებისათვის, რის

საპიროება და აუცილებლობაც მათ კარგად ჰქონდათ შეგნებული? „დამოუკიდებელი“ არსებობის სამნახევარი საუკუნის მანძილზე დასაველეთმა საქართველომ პოლიტიკურ სიღუბეში იტყუარა და კულტურულ-ზნეობრივ დაქვეითებასთან ერთად განუწყვეტელი შინაომებისა და გარეშე მტრის თავდასხმის პირობებში მძიმე ეკონომიკური დაქვეითებაც განიცადა. ამას ადასტურებს ყველა წყარო, განსაკუთრებით თვალნათლივ — თვითმხილველი უცხოელი მოგზაურებისა და მისიონერების თხზულებანი, რომლებიც მრავლად დაგვიტოვა ისტორიამ.

ჩვენს წიგნში ცალკე თავად არის მოცემული იმერეთის სამეურნეო მდგომარეობის აღწერილობა, საიდანაც ჩანს, თუ რამდენად მძიმე სამეურნეო-ეკონომიკურ პირობებში ცხოვრობდა ჩვენი მოსახლეობა ამ საუკუნეებში. განუწყვეტელი შინა და გარე ომების მეოხებით ხალხის ეკონომიკური სიღუბეში კიდევ უფრო გაძლიერდა და იგი ყოფნა-არყოფნის წინაშე დადგა.

გარდა განუწყვეტელი ბრძოლებისა, სამეურნეო დაქვეითებას ხელი შეუწყო ეპიზოტები (საქონლის დაავადებანი) და ეპიდემიები (ინფექციურ დაავადებათა მასობრივი გავრცელება). ყოველივე ამან განაპირობა დიდი სიღუბე, რაც სხარტად აქვს გადმოცემული მის ერთ-ერთ მხილველს მურავიოვს (იხ. სიგელ-გუჯრები, II, გვ. 71 — 72): „იმერნი — მშიერნი, იკვებებიან ველური (ტყის — მ. რ.) ხილით, ფეხშიშველნი და უტანსაცმლონი“.

მაგრამ უნდა გვახსოვდეს, რომ საქართველო (კერძოდ დასავლეთი) ბუნებით მეტად მდიდარი ქვეყანაა (ასეთი იყო იგი განხილულ საუკუნეებშიც); მისი ჰავა — სუბტროპიკული, ზომიერი, მიწა — უხვი სხვადასხვაგვარი მცენარეებით, დაბურული ტყეებით, ანკარა მდინარეებით, ზომიერი სარტყელის უმდიდრესი ფლორითა (კერძოდ, ვაზით) და ფაუნით, უხვი მოსავლით. მისი ბატონყმური წყობა უფრო პროგრესული იყო, ვიდრე გარემომცველი მაჰმადიანური სამყაროს სოციალური სისტემა; ქართული სოფლის მეურნეობა იყო მრავალდარგოვანი, მიწათმოქმედება — ინტენსიური (მრავალმინდვროვანი სისტემა), აგროტექნიკა — მოწინავე; მოსახლეობა — ბინადარი, მემკენარეობა — მრავალდარგოვანი (განვითარებული მეხილეობა-მევენახეობით), მესაქონლეობა (გარდა მეცხვარეობისა) — ბავური, არა მომთაბარე, რაც არ გამორიცხავდა საზაფხულო საძოვრების გამოყენებას.

ყოველივე ეს საშუალებას აძლევდა მოსახლეობას ნატურალური მეურნეობის პირობებში წლიდან წლამდე თავი გაეტანა და შიმშილით არ ამოწყვეტილიყო.

რამ განაპირობა დასავლეთი საქართველოს გამძლეობა, როგორ გაუმკლავდა იგი ოსმალეთის სამხანხევარსაუკუნოვან განუწყვეტელ ზღრესიას, არ გადაგვარდა, არ გაპაპმადიანდა, შეინარჩუნა ღვთისმყოფობა?

ეს უნდა მიეწეროს მთელ რიგ გარემოებებს. ჯერ ერთი, როგორც აღინიშნა, იმერეთის და მთელი დასავლეთ საქართველოს სოციალური წყობა უფრო მოწინავე და პროგრესული იყო, ვიდრე აგრესორებისა — ეს განაპირობებდა მის გამძლეობას. მეორე, იმერნი მხნე, უშიშარ, გულად მეომარ ქართულ ტომს წარმოადგენდნენ — გავიხსენოთ იმავე მურავიოვის ნათქვამი: „იმერნი — ამაყნი და ურჩნი, თოფიანნი და ხმლოსანნი“. (იხ. სიგელ-გუჯრები, II, გვ. 71 — 72). ამასვე ადასტურებენ უცხოელი მოგზაურები და მისიონერები, რომლებიც აღნიშნავენ, რომ სამეგრელოში დიდად იყო გავრცელებული სამხედრო ხელოვნება, პატარა ბავშვებიც კი კარგად ხმარობდნენ იარაღს.

ამ მხრივ დიდი მნიშვნელობა ჰქონდა დასავლეთ საქართველოს გეოგრაფიულ პირობებსაც. იტალიელი ლეონი დაწვრილებით აღწერს აქაურ ბუნებრივ პირობებს და აღნიშნავს: „...იმერეთი ათჯერ მეტი ბუჩქნარიანია, ვიდრე ქართლი და კახეთი. დაბლობი თითქმის არა აქვს და ფერდობი იმდენად ვიწრო და დაქანებულია, რომ ერთ ცხენოსან კაცს ძლივს შეუძლია გავლა; ერთმა მეორის შემდეგ უნდა გაიაროს, ერთიმეორის მიდევნებით, ორს ერთად არასდროს არ შეუძლია გავლა. ამის გამო იმერეთს არა სჭირდება ბევრი ჯარისკაცი... მტრის დასაძლევად. მათი ძალა ტყესა და ბუჩქნარებში მდგომარეობს. იმერლები მის გარშემო ჩასაფრდებიან ხოლმე, მტერს შუაში იმწყვდევენ და ისე ამარცხებენ. თუ ვინიცობაა მტერი ველებზე გავა დასაბანაკებლად, მაშინ იმერლები მალაღლი მთებიდან ქვებს აგორებენ, კაცებს და ცხენებს ჩეხავენ და ნაკუწ-ნაკუწად აქცევენ. ზემოთ ასვლა მტერს არ შეუძლია, იმოტომ. რომ გზები ჩახერგილი აქვთ ხეებითა და მორებით... ამიტომ გამარჯვებული რჩებიან...“¹. ჩასაკვირველია მცირერიცხოვანი იმერთა ჯარის გამძლეობა ძირითადად პარტიზანული ომის მეთოდების გამოყენებით უნდა აიხსნას.

სოციალ-ეკონომიკური უპროგრესობის, ხელსაყრელი გეოგრაფიული პირობებისა და მხნე ხასიათის გარდა, დასავლეთი საქართველოს გამძლეობა ხალხის ძლიერი ეროვნული თვითშეგნებითაც უნდა აიხსნას მდიდარი ისტორიული წასრულის, ენისა და ლიტერატურის (ხალხური და მწერლური) ფონზე.

¹ გაზეთი „კომუნარი“ (ამბროლაური), 1959, № 95—96.

იმ მიწების გაერთიანება, სადაც „ქართულითა ენითა უამი შეიწირვის“, ე. ი. ქართველური ტომების ერთიანობა, ყოველთვის შეადგენდა მოწინავე ქართველების მიზანს და მისწრაფებას. ქართული სამეფო-სამთავროები მე-18 საუკუნეში ხელშეკრულებითაც კი აფორმებენ ამ მისწრაფებას (ამის შესახებ უკვე იყო ზემოთ ლაპარაკი), მაგრამ ფაქტიურად ამ განზრახვას ფრთები ვერ შეესხა — საქართველო სამეფო-სამთავროებად დანაწილებული შევიდა რუსეთის მფარველობაში და შემდეგ მის იმპერიაშიც, ასე რომ, მხოლოდ რუსთა იარაღით მოხდა როგორც მე-18 საუკუნის საქართველოს, ისე ოდითვე მისი კუთვნილი და შემდეგ ოსმალთა მიერ მიტაცებული მიწა-წყლის გაერთიანება.

რამ განაპირობა ეს ვითარება?

პირველ ყოვლისა, არსებულმა სოციალურმა წყობამ — ფეოდალიზმმა, რომელიც საქართველოში წარმოადგენდა კარჩაკეტილი ნატურალური მეურნეობის საფუძველზე შექმნილ სათავადოთა კონგლომერატს. აქ იგულისხმება მცირე სამეფოებიც, რომლებიც წარმოადგენენ ცალ-ცალკე არსებულ მეურნეობრივ ერთეულებს. ისინი მეტისმეტად სუსტად იყვნენ ერთმანეთთან დაკავშირებული, რადგან ვაჭრობისა და ხელოსნობის დაქვეითება, რაც განუწყვეტელმა შინა და გარე ომებმა გამოიწვია, ნიადაგს აცლიდა სამეურნეო ურთიერთობის განვითარებას და აღებ-მიცემობას, ეს კი, თავის მხრივ, გადაულახავ დაბრკოლებად ეღობებოდა ერთიანობისაკენ მისწრაფებას და ეკონომიკურ საფუძველს აცლიდა მას — ეს იყო ძირითადი შინა მიზეზი. ამავე დროს არსებობდა მეორე უმნიშვნელოვანესი მიზეზი — აგრესორი ქვეყნების — ოსმალეთისა და ირანის მიერ ამასიის ზავით შექმნილი ურთიერთწონასწორობის პირობები, რომელთა თანახმად დასავლეთი საქართველო ოსმალთა ინტერესების სფეროს წარმოადგენდა, ხოლო აღმოსავლეთი — ირანისას. ამ პირობების ყოველგვარი დარღვევა გამოიწვევდა ირან-ოსმალეთის ომს, რაც მათ შორის წონასწორობის მაშინდელ პირობებში არც ერთი მხარისათვის არ იყო მისაღები.

ამრიგად, ზემოხსენებული შინა და გარე მიზეზების გამო სამეფო-სამთავროებად დანაწილებული საქართველოს გაერთიანება არ ხერხდებოდა და იგი ასეთივე სახით უნდა შესულიყო რუსეთის მფარველობაში.

ყოველივე ზემოთქმულის საფუძველზე უნდა დავასკვნათ, რომ იმერეთის ისტორია განუყოფელია მთელი ჩვენი სამშობლოს ისტორიისაგან და მისი ცალკეული ნაწილების ცხოვრება საერთო ქართული ისტორიის ნაწილია.

იმერეთის მეფეთა სია

(სამეფოს წარმოშობიდან XVIII საუკუნის ბოლომდე)

1. ბაგრატ II (1462—1478 წ.წ.)
2. ალექსანდრე II (1478 წ.*) (პირველად)
3. კონსტანტინე II (1479—1484 წ. წ.) (პირველად)
4. ალექსანდრე II (1484—1487 წ. წ.) (მეორედ)
5. კონსტანტინე II (1487 წ. წ.*) (მეორედ)
6. ალექსანდრე II (1487—1510 წ. წ.) (მესამედ)
7. ბაგრატ III (1510—1565 წ. წ.)
8. გიორგი II (1565—1586 წ. წ.)
9. ლევან I (1586—1590 წ. წ.)
10. როსტომ I (1590—1605 წ. წ.)
11. გიორგი III (1605—1639 წ. წ.)
12. ალექსანდრე III (1639—1660 წ. წ.)
13. ბაგრატ IV (1660 წ.*) (პირველად)
14. არჩილ I (1661—1663 წ. წ.) (პირველად)
15. დემეტრე გურიელი (1663 წ.*) (პირველად)
16. ბაგრატ IV (1663—1668 წ. წ.) (მეორედ)
17. დარეჯან დედოფალი და ვახტანგ ბაგრატიონი (1668 წ.*)
(პირველად)
18. დემეტრე გურიელი (1668—1669 წ. წ.) (მეორედ)
19. ბაგრატ IV (1669—1678 წ. წ.) (მესამედ)
20. არჩილ I (1678 წ.*) (მეორედ)
21. ბაგრატ IV (1679—1681 წ. წ.) (მეოთხედ)
22. გიორგი გურიელი (1681—1683 წ. წ.)
23. ალექსანდრე IV (1683—1690 წ. წ.) (პირველად)
24. არჩილ I (1690—1691 წ. წ.) (მესამედ)
25. ალექსანდრე IV (1691—1695 წ. წ.) (მეორედ)
26. არჩილ I (1695—1696 წ. წ.) (მეოთხედ)
27. გიორგი IV (გოჩიად წოდებული) (1696—1698 წ. წ.).
28. არჩილ I (1698 წ.*) (მეხუთედ)

29. სვიმონ I (1698—1701 წ. წ.)
30. შამია III გურიელი (1701—1702 წ. წ.) (პირველად)
31. გიორგი აბაშიძე (1702—1707 წ. წ.)
32. გიორგი VI (1707—1711 წ. წ.) (პირველად)
33. შამია III გურიელი (1711—1712 წ. წ.) (მეორედ)
34. გიორგი VI (1712—1713 წ. წ.) (მეორედ)
35. შამია III გურიელი (1713—1714 წ. წ.) (მესამედ)
36. გიორგი VI (1714—1716 წ. წ.) (მესამედ)
37. გიორგი გურიელი (1716)
38. გიორგი VI (1719—1720 წ. წ.) (მეოთხედ)
39. ალექსანდრე V (1720—1741 წ. წ.) (პირველად)
40. გიორგი ბატონიშვილი (1741 წ.)
41. ალექსანდრე V (1741—1746 წ. წ.) (მეორედ)
42. მამუკა ბატონიშვილი (1746—1749 წ. წ.)
43. ალექსანდრე V (1749—1752 წ. წ.) (მესამედ)
44. სოლომონ I (1752 წ.) (პირველად)
45. სოლომონ I (1753—1766 წ. წ.) (მეორედ)
46. თეიმურაზ მამუკას ძე ბატონიშვილი (1766—1768 წ. წ.)
47. სოლომონ I (1768—1784 წ. წ.) (მესამედ)
48. დავით გიორგის ძე (1784—1789 წ. წ.) (პირველად)
49. დავით არჩილის ძე (სოლომონ II) (1789—1790 წ. წ.) (პირველად)
50. დავით გიორგის ძე (1790 წ.) (მეორედ)
51. სოლომონ II (1790—1810 წ. წ.) (მეორედ)

* რამდენიმეჯერ გაშვებულია შესახებ დრახხილებში ნახევრები მერამდენე მეფობაა.

ლიტერატურა

1. ასათიანი ნ. მასალები მე-17 საუკუნის საქართველოს ისტორიისათვის, თბ. 1973; ფეოდალური საქართველოს დაშლის ისტორიიდან, თსუ შრომები, ტ. 78, თბ. 1963; გლუხობა მე-16-17 საუკუნეების კახეთის სამეფოში, ხელნაწერის უფლებით; გზა გამოხსნა—აღდგომისაკენ, თბ. 1983.
2. ასათიანი ლ. ცნობრება აკაკი წერეთლისა, თბ. 1965.
3. აკოფაშვილი გ. გლუხობა კატეგორიების საკითხისათვის იღმოსავლეთ საქართველოში, მსდკი, ნაკვ. 34, 1962; აზნაურთა უფლებრივი მდგომარეობის საკითხისათვის, მსდკი, ნაკვ. 32, თბ. 1955.
4. ანთელავა ი. ოდიშის სამთავროს პოლიტიკური ისტორიიდან, საისტორიო კრებული, ტ. 5, 1976.
5. „არჩილიანი“, ტ. II, თბ. 1937.
6. ამირანაშვილი შ. ქართული ხელოვნების ისტორია, თბ. 1967.
7. ბერძენიშვილი ნ. საქართველოს ისტორიის საკითხები, ტ. II, III, IV, V, VI, თბ. 1965, 1966, 1977, 1970, 1973; ფეოდალური ურთიერთობიდან მე-15 ს-ში, მსდკი, I, ტფ. 1937; საქართველოს რუსეთთან შეერთების ისტორიული-მნიშვნელობისათვის, „მნათობი“ № 6, 1954. დოკუმენტები საქართველოს სოციალური ისტორიიდან, ტ. I, II. ნ. ბერძენიშვილის რედაქციით, თბ. 1940, 1953.
8. ბატონიშვილი დ. „ახალი ისტორია“, ბატონიშვილი, „ახალი მოთხრობა“, თ. ლომოურის გამოც., თბ. 1941.
9. ბროსე მ. საქართველოს ისტორია, ნაწ. II, ტფ. 1900.
10. ბერაძე თ. ერთი საკითხი სამეგრელოს ისტორიული გეოგრაფიიდან, საქ. ისტორიული-გეოგრაფიის კრებული, თბ. 1964, მისივე „რაკა“, თბ. 1983.
11. ბერიძე ვ. ძველი ქართველი ისტატები, თბ. 1967.
12. ბაქრაძე დ. არქეოლოგიური მოგზაურობა საქართველოში და აქარაში. 1878.
13. ბესიკი, თბზ. სრული კრებული, აღ. ბარამიძისა და ვ. თოფურაძის რედაქციით, თბ. 1932.
14. ბატონიშვილი იოანე. კალმასობა.
15. ბოჭორიძე გ. რაჭის ისტორიული ძეგლები, საქართველოს ისტორიის მოამბე, ტ. 5, 6, თბ. 1928, 1931—1932.
16. ბურჯანაძე შ. სოლომონ I-ის შეფობის პირველი პერიოდი (1752—1768 წწ). თბილისის სახ. უნივერსიტეტის შრომები, ტ. 41, 1950; ლიხთიმერეთის 1737 წლის რუკა როგორც ფეოდალური საქართველოს ისტორიის პირველწყარო, საქ. მეცნიერებათა აკადემიის ხელნაწერთა ინსტიტუტის მოამბე, ტ. 1, 1959; იმერეთის სამეფოს პოლიტიკური ისტორიისათვის

1784—1789 წწ. საქ. სსრ მეც. აკადემიის ხელნაწერთა ინსტიტუტის მოაზბე, II, 1960, იმერეთის სამეფო 1768—1784 წლებში, იქვე, ტ. III, 1961; იმერეთის სამეფოს საშინაო პოლიტიკა—1789—1802 წლებში. იქვე, ტ. 4, 1962; ისტორიული დოკუმენტები იმერეთის სამეფოსა და გურია-ოდისის სამთავროების (1466—1770 წწ.), გამოსცა შ. ბურჯანაძემ, თბ. 1959.

17. გაბაშვილი ვ. ქართული ფეოდალური წყობილება მე-16-17 სს. თბ. 1958; მე-16-17 სს. საქართველოს ქალაქები მახლობელი აღმოსავლეთის სავაჭრო ურთიერთობათა შუქზე, ნარკვევები მახლობელი აღმოსავლეთის ქალაქების ისტორიიდან, თბ. 1966.
18. გაბაშვილი ტ. მიმოსვლა, გამოსცა შეტტეველმა, 1956.
19. გუგუშვილი პ. მარცვლულის მეურნეობა საქართველოსა და ამიერკავკასიაში, თბ. 1954; ტყეებით ვაჭრობა საქართველოში, მნათობი, № 11, 1938.
20. გუჩუა ვ. ხიზან გლუხთა წარმოშობის საკითხისათვის, მსდვი, ნაკვ. 34, თბ. 1962.
21. გრიგოლია კ. ახალი ქართლის ცხოვრება, თბ. 1954; ილორის წმ. გიორგის ხატის წარწერა, ენიქის მოაზბე, ტ. 13, 1942.
22. გვრიტიშვილი დ. ნარკვევები საქართველოს ისტორიიდან, ტ. II, თბ. 1965; ფეოდალური საქართველოს სოციალური ურთიერთობის ისტორიიდან, თბ. 1955.
23. გონიკაშვილი მ. იმერეთი მე-18-19 საუკუნეთა მიჯნაზე, თბ. 1979.
24. დუმბაძე მ. დასავლეთ საქართველო მე-19 ს. პირველ ნახევარში, თბ. 1957.
25. დადიანი ნ. ქართველთ ცხოვრება, შ. ბურჯანაძის გამოცემა, თბ. 1962.
26. „ნახტანგის სამართალი“, გამოსცა თ. ენუქიძემ, თბ. 1955.
27. თაყაიშვილი ექ. ხონის ეკლესია და მისი სიძველენი, ძველი საქართველო, ტ. III; არქეოლოგიური მოგზაურობა სამეგრელოში, ძვ. საქართველო, ტ. III, ნიმუშები სამეგრელოს სიგელგუჯრებისა, გაზეთი „ივერია“, 1891; ქსნის საერისთავოს სტატისტიკური აღწერილობანი, თსუ შრომები, ტ. 45, 1951; არქეოლოგიური მოგზაურობა რაქაში, თბ. 1963. საქართველოს სიძველენი ტ. 1—4, თაყაიშვილის გამოცემა, ტფ. 1899—1910; დავთარი ქუთაისის საყდრის გამოსავალი ბეგრისა, შედგენილი 1578 წელს, ტფ. 1915; ძველი საქართველო, ტ. 1—4, მისივე, სამი ისტორიული ქრონიკა, ტფ. 1890.
28. თამარაშვილი მ. კათოლიკობა ქართველთა შორის, ტფ. 1902.
29. იოსელიანი პლატონ „ცხოვრება გიორგი მეცამეტისა“, თბ. 1936, 1978.
30. იესეოსესიშვილი. თავჯადასავალი, ს. კაკაბაძის გამოცემა, ტფ. 1913.
31. ფეშინგი, „შაჰნავაზიანი“, თბ. 1935.

32. ოსებ თბილელი, „დღემორაეიანი“, თბ. 1939.
33. კაკაბაძე ს. საქართველოს ისტორია, ახალი საუკუნეების ეპოქა, თბ. 1922; სასიხლო სიგელების შესახებ, საისტორიო შრომებ, II, 1924; კლუვაძეზანი საქართველოს ისტორიის საკითხების შესახებ, თბ. 1920.
34. „მცნება სასჯულო“, გამოსცა ს. კაკაბაძემ, 1913.
35. „გენიალოგია დიდი ალექსანდრე მეფისა“, გამოსცა ს. კაკაბაძემ, თბ. 1913.
36. „დასავლეთ საქართველოს საეკლესიო საბუთები“, ს. კაკაბაძის გამოცემა, ტფ. 1913.
37. „სამართალი კათალიკოსისა და მისი შედგენის დრო“, გამოსცა ს. კაკაბაძემ, ტფ. 1913.
38. „სიგელი ქართლის მეფე კონსტანტინესი 1488 წლისა“, ს. კაკაბაძის გამოცემა, ტფ. 1913.
39. „უცნობი აფხაზ-მერეთის მეფე თამარ მე-2“ გამოსცა ს. კაკაბაძემ, ტფ. 1913.
40. ვახტანგ უცნობი მე-14 საუკუნის აფხაზ-მერეთის „მეფეთაგანი და მისი მემკვიდრე მეფე ვიორგი“, გამოსცა ს. კაკაბაძემ, ტფ. 1913.
41. „ზაგრატ მეფე მე-15 საუკუნის რაჭა-არგვეთის მფლობელი“, გამოსცა ს. კაკაბაძემ, ტფ. 1913.
42. ისტორიული დოკუმენტები, 1—5, გამოსცა ს. კაკაბაძემ, ტფ. 1913; მისივე გამოცემა, აფხაზეთის საკათალიკოსო გლეხების დიდი დაეთარი, ტფ. 1913; მისივე გამოცემა საცაგერლოს გამოსავალი დაეთარი, ტფ. 1914; მისივე გამოცემა საეკლესიო რეფორმისათვის სოლომონ I დროს, ტფ. 1913; მისივე გამოცემა, საცაიშლოს გამოსავლის დაეთარი.
43. კანდელია კ. ი., სოლომონ მეფე და როსტომ ერისთავი, თბ. 1936.
44. კეკელიძე კ. ქართული ლიტერატურის ისტორია, ტ. II, თბ. 1941.
45. კიკნაძე რ. საქართველო-ირანის ურთიერთობის ისტორიიდან მე-15 ს-ის II ნახევარში, ისტორიის ინსტიტუტის შრომები, ტ. 7, 1954.
46. ლეონიძე გ. წერილები და გამოკვლევები.
47. ლომსაძე შ. სამცხე-ჯავახეთი, თბ. 1975.
48. ლორთქიფანიძე ი. მასალები საქართველოს ისტორიისათვის (მე-18 ს) მსლკი, ნაკვ. II, 1940.
49. ლომინაძე ბ. ქართული ფეოდალური ურთიერთობის ისტორიიდან, სენიორიები, თბ. 1966; გელათი, თბ. 1958, ფეოდალური მიწისმფლობელობის ისტორიიდან „საწინამძღვრო“, მსლკი, ნაკვ. 31, თბ. 1954; საეკლესიო — „სამწყსო“ გადასახადთა შესახებ საბუთების მნიშვნელობისათვის, მსლკი, ნაკვ. 83, თბ. 1960, სამწარველო მე-13 საუკუნეში, მიმომხილველი, I, 1949; ბიჭვინთის ხატის 1568 წლის წარწერა, მსლკი, ნაკვ. 33, თბ. 1960.
50. მათურელი ი. იმერეთის მეფის ალექსანდრე მეხუთის რუკა, ქუთაისის პედ. ინსტიტუტის შრომები, ტ. 9, 1949.
51. მაკარაძე ე. ასპინძის ბრძოლა, თბ. 1957. მასალები მე-18 ს. მეორე ნახევრის რუსეთ-საქართველოს ურთიერთობის ისტორიისათვის, 1968; მისივე, ბესიკი დიპლომატიურ სარბიელზე, თბ. 1968.

52. მასალები რუსეთ-საქართველოს ურთიერთობის ისტორიისათვის 1652—1660 წწ., გამოსცა გ. პაიჭაძემ, საისტორიო მოამბე, № 19-20, თბ. 1965; მისივე, მასალები რუსეთ-საქართველოს ურთიერთობის ისტორიისათვის (1660—1685 წწ), საისტორიო მოამბე, № 23—24, 1970.
53. მაკალათიას. სამეგრელოს ისტორია და ეთნოგრაფია, თბ. 1941.
54. მეტრეველი ე. მასალები იერუსალიმის ქართული კოლონიის ისტორიისათვის, თბ. 1962; იერუსალიმის რამდენიმე ქართული მონასტრის დათარიღების ცდა, ხელნაწერთა ინსტიტუტის მოამბე, ტ. 4, თბ. 1962.
55. მენაბდე ლ. ძველი ქართული მწერლობის კერები, ტ. I, ნაკვ. II, თბ. 1962.
56. მეუნარგია ი. სამეგრელოს. სამთავროს უკანასკნელი პერიოდი, თბ. 1939.
57. მუსხელიშვილი ლ. დასავლეთ საქართველოს გლეხობის სოციო-ეკონომიური კატეგორიები მე-16-17 სს. ენიშკის მოამბე, თბ. 1940, № 5-6.
58. მეტრეველი გ. იმერეთის სამეფო მე-18 ს. II ნახევარში სამთავროებთან მიმართებაში.
59. ოდიშელი ფ. აღმოსავლეთ საქართველოს პოლიტიკური ისტორიისათვის მე-14-17 სს, წიგნში, რამდენიმე ქართული ისტორიული დოკუმენტი, თბ. 1969.
მეორე ქრონიკები (კინკლოსების ისტორიული მინაწერები), ტექსტები გამოსცა, შესავალი წერა და კომენტარები დაურთო ფ. ოდიშელმა, თბ. 1968.
60. ორბელიანი პაპუნა, „ამბავი ქართლისანი“, ქართლის ცხოვრება, ნაწ. II, დ. ჩუბინაშვილის გამოცემა, სპბ. 1854.
61. ორბელიანი სულხან-საბა, მოგზაურობა ევროპაში, თბ. 1940.
62. თ. ჟორდანიას, ქრონიკები, ტ. II, ტფ. 1897, მისივე ქრონიკები, ტ. III, გამოსცეს გ. ჟორდანიამ, შ. ხანთაძემ, 1968.
63. როდონაია ე. რუსეთ-საქართველოს ურთიერთობის ისტორიიდან მე-17 ს. I ნახევარში.
64. რეხვიაშვილი ნ. მკვდლობა რაჭაში, თბ. 1953.
65. რეხვიაშვილი მ. იმერეთის სამეფო მე-16 ს-ში, თბ. 1976.
66. რჩეულიშვილი მ. მასალები ქართული ცხვარის შესწავლისათვის, შოთა რუსთაველის ეპოქის მატერიალური კულტურა, თბ. 1938.
67. სოსელია ო. ფეოდალური ხანის დასავლეთ საქართველოს ისტორიიდან, თბ. 1966, ნარკვევები ფეოდალური ხანის დასავლეთ საქართველოს სოციალ-პოლიტიკური ისტორიიდან, თბ. 1973; ნარკვევები ფეოდალური ხანის დასავლეთ საქართველოს სოციალ-პოლიტიკური ისტორიიდან (სათვალდები), თბ. 1981; სამეგრელოს სამთავროს წარმოშობის თარიღისათვის, მიმომხილველი, II, თბ. 1951.
68. სვანიძე მ. საქართველო-ოსმალეთის ურთიერთობის ისტორიიდან (მე-16-17 სს), თბ. 1971.
69. საქართველოს ისტორია, ჯანაშიას რედაქციით, თბ. 1946.
70. საქართველოს ისტორიის ნარკვევები, ტ. მე-4, თბ. 1973.
71. საქართველოს ისტორია, დამხმარე სახელმძღვანელო, I, თბ. 1958.

72. საკითხავი წიგნი საქართველოს ისტორიაში გ. მელიქიშვილის რედაქციით, თბ. 1980.
73. სანაძე მ. გლახობა დასავლეთ საქართველოში მე-15-18 ს-ში, თბ. 1979.
74. ტატიშვილი, ქართველები მოსკოვში, თბ. 1947.
75. ტივაძე თ. ერთი ეპიზოდი მე-17 ს-ის 60-იანი წლების რუსეთ-საქართველოს ურთიერთობის ისტორიიდან, კრებულში ქართული სამეფო-სამთავროების საგარეო პოლიტიკის ისტორიიდან, I, თბ. 1970.
76. პაიჭაძე გ. რუსეთ-საქართველოს ურთიერთობა 1725—1735 წწ. თბ. 1967; ტიმოთე გაბაშვილის ელჩობა რუსეთში (1737—1749 წწ), წიგნში. ქართული სამეფო-სამთავროების საგარეო პოლიტიკის ისტორიიდან, I, თბ. 1970.
77. შარაშიძე ქ. სამხრეთ საქართველოს ისტორიის მასალები (მე-15-16 სს.), თბ. 1961.
78. შანავაზიანი, გ. ლეონიძისა და ს. იორდანიშვილის რედაქციით.
79. შენგელია ნ. სახლთუხუცესის თანამდებობა იმერეთის სამეფოში, ქუთაისის პედ. ინსტიტუტის შრომები, ტ. I, 1940.
80. ყაუხჩიშვილი თ. ბერძნული წარწერები საქართველოში.
81. ცინცაძე ი. უკრაინისა და საქართველოს ურთიერთობის ისტორიიდან, იხ. წიგნში — ძიებანი რუსეთ-საქართველოს ურთიერთობის ისტორიიდან (მე-16-17 სს.), თბ. 1916; მასალები საქართველოსა და პოლონეთის ურთიერთობის ისტორიისათვის, თბ. 1966; ორი საბუთი რუსეთ-საქართველოს ურთიერთობის ისტორიიდან, იხ. წიგნში ენიჭის მოამბე, 5—6, თბ. 1940; 1783 წლის მფარველობითი ტრაქტატი, თბ. 1960, აღა-მამაძის თაქსტის საქართველოზე, თბ. 1969.
82. ცაიშვილი ი. ბესიკი, თბ. 1962.
83. ცქიტიშვილი ზ. საქართველოს სახელმწიფო მოღვაწენი, მე-18 ს. II ნახევარი, მე-19 ს. დამდეგი, თბ. 1980.
84. ჩხატარაიშვილი ქე. საქართველოს საგარეო ურთიერთობათა ისტორიიდან, წიგნში, საქართველოს ფეოდალური ხანის ისტორიის საკითხები, თბ. 1972; დასავლეთი საქართველო მე-18 ს. პირველ ნახევარში, საქ. ისტ. ნარკვევები, ტ. 4, თბ. 1973; იქვე, დასავლეთ საქართველოს განთავისუფლება ოსმალეთის ბატონობისაგან; გურიის სამთავროს პოლიტიკური ისტორიიდან. „მანუა“, №4, 1964; გურიის სამთავროს შეერთება რუსეთთან, თბ. 1985.
85. ჩავახიშვილი ივ. ქართველი ერის ისტორია, ტ. 3, 4 თბ. 1966, 1967; ქართული სიგელთმცოდნეობა ანუ დიპლომატიკა, თბ. 1926, საქართველოს ისტორია მე-11 — მე-15 ს-ში, თბ. 1949; ქართული სამართლის ისტორია, წიგნი I, 1919; დამოკიდებულება რუსეთსა და საქართველოს შორის მე-18 ს-ში, თბ. 1919; თხზულებათა 8 ტომი, თბ. 1977.
86. საქართველოს ეკონომიური ისტორია, ნაწ. I, II, თბ. 1976, 1934.
87. ქამბურია გ. გიორგი სააკაძე, თბ. 1964; ქართული ფეოდალური ურთიერთობის ისტორიიდან, თბ., 1955.
88. ქიქია ს. ევლია ჩელები ლაზებისა და ლაზეთის შესახებ, იხ. წიგნში იბერიულ-სავსკისური ენათმეცნიერება, ტ. 6, თბ. 1954.
89. ქანაშვილი მ. მასალები საქართველოს ისტორიისათვის, თბ. 1905.
90. ქამბაკური-ორბელიანი, აღა-მამაძის შემოსევა ქ. ტფილისში, ტფ. 1895.

91. ხახანაშვილი ალ. სოლომონ II, ტფ. 1911, ბატონყმობა საქართველოში რუსეთთან შეერთებამდის, ტფ. 1910.
92. ხერხეულიძე იმან, „მეფობა ირაკლი მეორისა, მეფისა თეიმურაზის ძისა“, ქართლის ცხოვრება, ნაწ. II, ლ. ჩუბინაშვილის გამოცემა, სპბ. 1854.
93. ხუსკივაძე ლ. ლევან დადიანის საოქრომკვედლო სახელოსნო, თბ. 1974.
94. კიკინაძე ზ. ფარული საზოგადოების დაარსების მიზეზები, ტფ. 1919.
95. კიკინაძე ი. კტიტორთა გამოსახულებანი, მნათობი, 1975 წ. № 2.
96. ქართული სამართლის ძეგლები, ტ. 1—4, გამოსცა ი. დოლიძემ, თბ. 1963, 1965, 1970, 1972.
97. ქართლის ცხოვრება, ტ. II, თბ. 1959.
98. ქართლის ცხოვრება, ტ. მე-4. თბ. 1973.
99. ქართველიშვილი ი. მემუარები, გამოსცა ა. იოსელიანმა, თბ. 1952.
100. ქართული ლიტერატურის ისტორია, ალ. ბარამიძის რედაქტორობით, ტ. II, თბ. 1966.
101. ჟარსადან გორგიჯანიძის ისტორია, ს. კაკაბაძის გამოცემა, თბ. 1925.
102. ფურცელაძე დ. ქართველ თავად-აზნაურთა სიგელ-გუჯრები, 1881 (რუსულ ენაზე)
103. ფუთურიძე ვ. ოსმალეთი მე-16-17 საუკუნეთა მიჯნაზე, წიგნში, ნარკვევები მახლობელი აღმოსავლეთის ისტორიიდან, თბ. 1957.
104. ფრ. ენგელსი, გლეხთა ომი გერმანიაში, თბ. 1956.
105. ჩხეიძე ს. „ცხოვრება მეფეთა“, ქართლის ცხოვრება, ნაწ. II, ლ. ჩუბინაშვილის გამოცემა, სპბ. 1854.

უცხოეთიდან აკრძალვა

1. ბოროზდინი კ. ერისთავი რაფ. და შერეი. ბატონყმობა სამეგრელოში, ტფ. 1927.
2. ბარბარო იოსაფასა და კონტარინი ამბროზიოს ცნობები საქართველოს შესახებ, მოამბე, 1894, № II, იტალიურიდან თარგმნა ალ. ჭყონიამ.
3. გულდენშტედტის მოგზაურობა საქართველოში, გერმანულიდან თარგმნა გ. გელაშვილმა, ტ. I-II, თბ. 1962, 1964.
4. დონკრისტოფორო დე კასტელი, ცნობები და აღბოძი საქართველოს შესახებ, იტალიურიდან თარგმნა ბ. გიორგიძემ, თბ. 1976.
5. დონჩუხეჟე ჯულიჩე მილანელი, წერილები საქართველოზე, იტალიურიდან თარგმნა ბ. გიორგიძემ, თბ. 1964.
6. დეგრადე ფუას ცნობები საქართველოს შესახებ, ფრანგულიდან თარგმნა ქ. ოდიშელმა, თბ. 1985.
7. თავრიზელი არაქელი, გაზეთი ივერია, 1885, № 7.
8. თავარიშვილის ცნობები საქართველოს შესახებ, თურქულიდან თარგმნა ვლ. ფუთურიძემ, მსდკი, ნაკვ. 30, თბ. 1954.

9. იველიევი ალექსისა და ტოლოჩანოვის 1650—1652 წლ. იმერეთის სამეფოში ელჩობის საანგარიშო აღწერილობა, რუსულიდან თარგმნა და გამოსცა ი. ცინცაძემ, თბ. 1969, 1970.
10. კატერინოძენო, ქოვან შარია ანჯოლელი და ანონიმი ვენეციელის თხზულებანი საქართველოს შესახებ, იტალიურიდან თარგმნა ვ. შამისთვალის შვილმა, იხ. წიგნში, ევროპის ქვეყნების ისტორიის პრობლემები, თბ. 1975.
11. ლამბერტი არქანჯელო, სამეგრელოს აღწერა, იტალიურიდან თარგმნა ალ. ჭყონიამ, თბ. 1938.
12. ლეონის ცნობები საქართველოს შესახებ, ამბროლაურის რანის გაზეთი „კომუნარი“, 1959. იტალიურიდან თარგმნა ბ. გიორგაძემ.
13. ნაიმა მუსტაფა, ცნობები საქართველოსა და კავკასიის შესახებ, თურქულიდან თარგმნა და გამოსცა ნ. შენგელიამ, თბ. 1979.
14. პიეტრო დელავალეს მოხსენება საქართველოს შესახებ, იტალიურიდან თარგმნა ალ. ჭყონიამ, თბ. 1927. გაზეთი ივერია, 1879, № 3.
15. რეინენგსი, საქართველოს პოლიტიკური და ეკონომიური მდგომარეობა მე-18 ს-ში. ივერია, 1897.
16. რუმულუ პასანის ცნობები საქართველოს შესახებ, სპარსულიდან თარგმნა და გამოსცა ვლ. ფუთურიძემ, შენიშვნები დაურთო რ. კიკნაძემ, თბ. 1966.
17. ტავერნიე უან ბატისტ, დიდი სენიორის სამეფო კარის ახალი აღწერა, ფრანგულიდან თარგმნა და გამოსცა კ. გურულმა, თბ. 1974.
18. ფეხევი იბრაჰიმის ცნობები საქართველოსა და კავკასიის შესახებ, თურქულიდან თარგმნა და გამოსცა ს. ჩიქიამ, თბ. 1964.
19. ჩელები ევლიას მოგზაურობის წიგნი, I, II, თურქულიდან თარგმნა ვლ. ფუთურიძემ, თბ. 1971, 1973.
20. შარდენი უან, მოგზაურობა სპარსეთსა და აღმოსავლეთის სხვა ქვეყნებში, ფრანგულიდან თარგმნა მ. მგალობლიშვილმა, თბ. 1975.
21. ჰამერი, ოსმანთა სახელმწიფოს ისტორია, 1836, გერმანულ ენაზე.
22. Акты, собранные кавказской археологической комиссией (АКАК), Тифлис, 1866—1904.
23. Бурнашов. Картина Грузии, Курсу. 1793; Тифлис, 1894.
24. П. Бутков. Материалы для новой истории Кавказа с 1722 по 1803, I, II, III, СПб, 1869.
25. С. Белокуров. Сношения России с Кавказом, выпуск 1. Москва, 1889.
26. М. Броссе. Переписка на иностранных языках грузинских царей с российскими государями, от 1639 г., по 1770 г., СПб. 1861.
27. Дубровин. История войны и владычества русских на Кавказе, т. 1—5, СПб. 1871—1888.

28. Месхиа Ш. Города и городской строй феодальной Грузии 17—18 вв. Тб. 1950.
29. Накашидзе Н. Грузино-русские политические отношения с первого нападения 17 века, Тб. 1968.
30. А. Цагарели. Грамоты и другие исторические документы 18 столетия, относящиеся к Грузии, тт. I—II, спв. 1891, 1898.
31. Чарльз Дарвин. Полное собрание сочинений, т. II, книга I, 1927.

პირთა საძიებელი¹

ა

აბას-მირზა 352
 აბაშიძე აბილაშ 89
 აბაშიძე გიორგი 139, 140, 143, 145,
 147, 149—154, 167, 290, 340,
 342, 407, 480, 482
 აბაშიძე დავით 165, 257, 258, 374,
 454
 აბაშიძე დიმიტრი 381
 აბაშიძე ევგენი 257, 258
 აბაშიძე ვახუშტი 153, 165, 166, 269,
 445, 460
 აბაშიძე ზაალ 297
 აბაშიძე ზურაბ 154—158, 163, 165—
 167
 აბაშიძე თამარ იხ. თამარ დედო-
 ფალი
 აბაშიძე ივანე 386
 აბაშიძე იოანე 304
 აბაშიძე ლევან 136, 163, 165—167,
 176, 178, 183, 185—187, 190,
 205, 206, 288, 406
 აბაშიძე მალაქია 46
 აბაშიძე პატა 74, 120, 136, 137
 აბაშიძე სვიმონი 386
 აბაშიძე სიმონი 156
 აბაშიძე ქაიხოსრო 211, 288—291,
 378, 381, 386
 აბაშიძე ქაქუჩელა, საქარელი 377
 აბაშიძე ხახული 386
 აბაშიძეები 66, 67, 183, 187, 198,
 214, 253, 303, 389
 აბაშიძე-მამუკაშვილი 183

აბაშიძე-ლაბუაშვილი დავით 386
 აბდალაძე ა. 26, 27
 აბდულ-ალა 276
 აბესაძე ხახუტა 487
 აბულაძე ქაიხოსრო 229
 აგიაშვილი იოანე 304
 აგიაშვილი ქაიხოსრო 278, 284
 ავალიანები 184, 349
 ავალიანი ს. 447, 448
 ავ-გიორგი 29, 30
 ავთანდილ გიორგის ძე 89
 ავთანდილოვი 375
 ათანასე-პაპუნა 116—118
 აია ფაშა (არზრუმის ბეგლარბეგი) 42
 აქოფაშვილი გ. 444, 446, 458
 ალავერდი-ხანი 73
 ალაიად-ხანი 264—265
 ალექსანდრე I 13, 16, 26
 ალექსანდრე I (რუსეთის იმპერატო-
 რი) 330—332, 340, 344, 487
 ალექსანდრე არჩილის ძე 148, 149
 ალექსანდრე II (კახეთის მეფე) 13,
 61, 77
 ალექსანდრე III გიორგი იმერთა
 მეფის ძე 22, 88—90, 93—108,
 110, 113, 115—118, 120, 133,
 157, 200, 201, 479
 ალექსანდრე ხანი იხ. ალექსანდრე
 III
 ალექსანდრე IV 130, 132, 135—141,
 145, 201
 ალექსანდრე V 158—160, 162—177,
 183, 218, 408, 480
 ალექსანდრე ბაგრატიის ძე 19—23,
 29, 30

¹ შეადგინა მ. ინასარიძემ

ალექსანდრე პავლეს ძე (რუსეთის
ხელმწიფე) 263—265, 312, 326,
351, 394
ალექსანდრე გიორგის ძე 307
ალექსანდრე გიორგის ძე (კახეთის
მეფე) 76, 79
ალექსანდრე მიხეილის ძე (რუსეთის
იმპერატორი) 102, 103, 107,
132, 456
ალექსანდრე ბატონიშვილი 257, 258,
266, 280, 289, 307, 328, 352,
376, 483, 486
ალექსანდრე ბატონიშვილი (ირანში
გადახვეწილი) 357—359, 361
ალექსანდრე შაქარის ძე 27, 260—
263, 266, 267
ამილახვარი ალექსანდრე 267, 271,
485, 486
ამილახორი გივი 164
ამილახვრისშვილი ალექსანდრე დი-
მიტრის ძე 252
ამირ ჰამზა ხან თალიში 124
ანა დედოფალი (დავით გიორგის ძის
მეუღლე) 330, 486
ანდრონიკაშვილი მალხაზ 361, 368,
371, 379, 380, 386
ანდრონიკაშვილი (ქიზიყის მოურავი)
281, 302, 317
ანთაძე 164
ანთელავა ი. 71, 81
ანიკა (გიორგი აბაშიძის ასული) 145
ანტონ I კათალიკოსი 262, 266, 483,
488
ანტონ II 326
ანტონ გიორგის ძე 216
ანტონ რაქოს ერისთავი 373
ანტონ ჭარდინი 478
ანჩაბაძე დათა 420
Анчабадзе 3, 71, 81
ანჩაბაძე თემურყევა 420, 421
ანჭოლელი ჭიოვანი მარია 27—29
არარაკი არტემ 323, 325
არსენ ბერი 326, 474
არსენ ივალთოელი 474
არტიმონ არქიმანდრიტი 102
არჩილ ვახტანგის ძე 113, 138
არჩილ მეფე 120, 121, 123—125,
133—135, 139—146, 251, 270,
279, 284, 490

არლუთინსკი იოსებ 323, 325
ასათიანი ლ. 269
ასათიანი ნ. 16—18, 117—120, 126—
128, 453, 459, 460, 470
ასლან-ფაშა 114, 121, 128, 135
აღა-შაჰ-ად-ხანი 315—320
აღბულა 14, 46, 447, 456, 458
ახვერდოვი 374
აკმედ III 151
აკმედ-ფაშა 64, 193, 406

ბ

ბაბა-ხანი 333, 361
ბაზაძე 467
ბაგრატ ალექსანდრეს ძე 79
ბაგრატ თეიმურაზის ძე 67
ბაგრატ II იხ. ბაგრატ VI
ბაგრატ III 23, 26, 30—37, 39—42,
44—47, 49—54, 198, 200, 222,
404, 454, 460, 461, 475
ბაგრატ IV 102, 108, 110, 111,
113—119, 121, 125—136, 202,
477
ბაგრატ VI 13—19
ბაგრატ ბატონიშვილი 208, 209, 278,
282, 302, 310, 338
ბაგრატ (ქართლის მეფე) 27
ბაგრატიონები 330, 332, 333, 376
ბაგრატიონი არჩილ 387
ბაგრატიონი გიორგი ალექსანდრეს ძე
486, 488
ბათულა 58—60
ბარათაშვილი (მოქაული) 375
ბარათაშვილი სულხან 326
ბარაშიძე ა. 125, 261
ბარბარო იოსაფა 19
ბარკლაი დე ტოლი 415
ბაქრაძე დ. 150, 446
ბაღდაშვილი იესე 477
ბაღუაშვილი 198
ბაღუაში ლიპარიტ 198
ბაში-აჩუკი 38, 41, 42
ბახუტა, ბახუტაბეგი 106
ბებუთოვი (ბებუთაშვილი) 323, 325,
421
ბედიანი 117, 18

- ბეზბოროდო ა. 272
 ბეზიურგი მირზა 374
 ბელოკუროვი ს. 13, 76
 ბეჟანი 153
 ბერაძე თ. 81, 197
 ბერძენიშვილი ნ. 8, 16, 17, 51, 52, 58, 76, 108, 109, 122, 146, 147, 169—172, 176, 179, 180, 188, 190, 195, 197, 242, 250, 256, 271, 277, 278, 297, 305, 316, 318, 326, 336—338, 344, 347, 349, 358, 377, 379, 383, 393, 394, 400, 442, 450
 ბესარიონ კათალიკოსი 177, 178, 202, 204, 205, 207, 211, 212, 215.
 ბესარიონი (გარეჯის უღაბნოდანი) 408
 ბესარიონ ჭყონდიდელი 314, 348
 ბესიკი, ბესარიონ გაბაშვილი (გაბაონოვი) 260—265, 268, 270, 283—285, 294, 295, 298—300, 484, 485, 487
 ბეჟა 447, 458
 ბეჟა III 161
 ბიძინა თარჯიმანი 104
 ბოროზდინი 465
 ბოკორიძე გ. 197, 203
 ბრონეესკი 333, 334
 ბროსე მარი 25, 26, 33, 58, 79, 84, 92, 96, 104, 108, 137, 139, 140, 145, 169, 170, 173, 175, 262, 326, 446
 ბულგაკოვი 271
 ბურნაშოვი 295, 296, 281, 286—289
 ბურჯანაძე შ. 7, 8, 89, 110, 114, 118, 158, 171, 176, 178—180, 182, 184—186, 188, 191, 193—196, 202, 205, 208, 225, 257, 258, 267, 281, 284—286, 306, 309, 339, 411
 ბურჯანაძეები 407
 ბუტკოვი 272, 280, 282, 287, 292—294, 320, 323, 325
 ბუჟველა 418
- ბ
- შაბაონოვი იხ. ბესიკი
 გაბაშვილი ვ. 24, 25, 41
 გაბაშვილი ზაქარია 262, 266, 483
 გაბაშვილი იოანე ზაქარიას ძე 482
 გაბაშვილი იოსებ 484
 გაბაშვილი ნიკოლოზ ზაქარიას ძე 484
 გაბაშვილი ოსე ზაქარიას ძე 486
 გაბაშვილი სვიმონ 300
 გაბაშვილი ტიმოთე 169, 170, 172—175, 204, 488
 გაბრიელ ჭყონდიდელი 407
 გამალოელი ბერი 326
 გედეონ გენათელი 127, 163
 გელაშვილი მ. 188
 გელოვანი ბერი 308, 310, 313, 314, 369, 371, 373, 386
 გელოვანი კიბოსრო 301
 გვიტიშვილი დ. 81, 92, 95, 110, 111, 138, 429, 439—441, 446, 447, 450, 541, 457, 469—471
 გიორგაძე ბ. 212
 გიორგი ბეგი 64
 გიორგი ბრწყინვალე 14
 გიორგი (გულანის გადამწერი) 477
 გიორგი II, ზაგრატის ძე 47, 54—61, 64, 65, 74, 461
 გიორგი III 73, 74, 77, 79—81, 88—94
 გიორგი IV, გოჩიად წოდებული 144, 480
 გიორგი V, 201, 275, 276, 482
 გიორგი VI 150, 152—157, 201, 487
 გიორგი VIII, 14, 15, 18, 31
 გიორგი IX 32
 გიორგი XI (ქართლის მეფე) 201, 202
 გიორგი XI, აბაშიძე 135, 138, 142—144
 გიორგი XII 227, 230, 326, 331
 გიორგი XIII 308, 314, 317, 327, 330
 გიორგი ალექსანდრეს ძე (სოლომონ I-ის ბიძაშვილი) 284
 გიორგი (ალექსანდრე V-ის ნახევარძმა) 165, 166, 177, 178
 გიორგი ალექსანდრეს ძე, ბატონიშვილი 306, 307, 480, 488
 გიორგი ბატონიშვილი (სოლომონ I-ის ბიძა) 205, 280

გიორგი გურიელი, ბატონიშვილი 249
 გიორგი კონსტანტინეს ძე (იმერეთი
 მეფე) 72
 გიორგი (კახთა მეფე) 49
 გიორგი (ალექსანდრე I-ის ძმა) 16—
 18
 გიორგი (როსტომ რაჭის ერისთა-
 ვის ძე), ქიორ-ბეი 204, 205, 210,
 212, 216, 289, 290
 გიორგი ბაგრატიონი 113
 გიულდენშტედტი 188, 196, 435
 გოლა-ფაშა 137
 გონიკაშვილი მ. 8, 9, 377
 გორგაძე ს. 262
 გორგიჯანიძე ფარსადან 34, 41, 42,
 66, 68, 73, 74, 89, 91, 93, 94,
 97, 104—106, 110—113, 117—
 121, 124, 128, 129, 135, 136,
 141, 142
 გორიჭელი ბეი 87
 გოშაძე 126
 გრიგალაშვილები 184
 გრიგოლ კათალიკოსი 149, 483
 გრიგოლ (რაჭის ერისთავი) 163, 165,
 166, 168
 გრიგოლ (მოშიტა III-ის ძე) 200
 გრბოლაშვილი მიტროფანე 486
 გრიგოლია კ. 78, 81, 90—92, 97, 123
 გუგუშვილი პ. 416, 420, 422, 428
 გუდოვიჩი 316—318, 320, 323, 325,
 352—358
 გულქან დედოფალი 307
 გურამიშვილი გიორგი 322
 გურამიშვილი დავით 413
 გურიელები 15, 18, 20, 21, 56—60,
 64, 65, 72, 77, 79, 82, 106
 გურიელი გიორგი 54, 67, 72, 219,
 275, 276, 290, 430
 გურიელი გიორგი დემეტრეს ძე 107
 გურიელი გიორგი მამიას ძე 155
 გურიელი გიორგი V 194
 გურიელი გიორგი ქაიხოსროს ძე
 129—131, 134—136
 გურიელი გიორგი (მამია IV გურიე-
 ლის ძმა) 178
 გურიელი დავით მამიას ძე 275
 გურიელი დემეტრე 106, 107, 120,
 121, 125, 128, 129
 გურიელი ვახტანგ 65, 276, 287

გურიელი ლევან 397
 გურიელი მალაქია დემეტრეს ძე 107
 გურიელი მამია II 32—34, 37, 39,
 40, 72, 74, 79, 80, 83
 გურიელი მამია III 139, 145, 151,
 154, 155, 163
 გურიელი მამია IV 177—179, 186,
 194, 239, 274, 275, 362, 393,
 369, 371, 373, 389, 400—409
 გურიელი როსტომ 52—54
 გურიელი სვიმონ 83, 84
 გურიელი სიმონ გიორგის ძე 276
 გურიელი ქაიხოსრო 93, 105—107,
 482
 გუტენბერგი 492
 გუჩუა ვ. 469

დ

დადიანი ალექსანდრე 307
 დადიანი ბეჟან 155—158, 162
 დადიანი გიორგი 59, 65, 169, 307, 438
 დადიანი (გიორგი XIII-ის სიძე) 327
 დადიანი გრიგოლ კაციას ძე 301—
 303, 306—314, 335, 337—339,
 344, 346—349, 369
 დადიანი ვამიყ 105, 106, 112, 113,
 115, 119—121
 დადიანი იოანე (გიორგის ძე) 307
 დადიანი იოსებ 82
 დადიანი კაკია 154, 163, 164, 186,
 211, 212, 215, 219, 227, 240—
 242, 250, 251, 256, 267, 281, 301
 დადიანი კაცია II 208
 დადიანი ლევან 72, 74, 77—84, 89—
 99, 104—106, 121, 123, 125—
 127, 129, 130, 134, 135, 373,
 380, 382, 400, 403, 404, 432
 დადიანი ლიპარიტ 106
 დადიანი მამია 37, 39, 40, 59, 65,
 105
 დადიანი მანუჩარ 72, 78, 79, 85
 დადიანი მანუჩარ კაციას ძე 301,
 308—310, 385

დადიანი მანუჩარ (ლევან დადიანის
მამა) 67, 68

დადიანი ნ. 165, 166, 176, 183, 185,
187, 266, 278, 281, 299, 301—
303, 307—310, 326, 350, 363,
387, 416, 417, 486

დადიანი ოტია ბეჟანის ძე 159, 162,
163, 165, 166, 185, 186

დადიანი ტარიელ 310, 311, 386

დადიანი შამადავლე 48, 461

დავიდოვი (დავითაშვილი) გიორგი
260

დავით ირჩილის ძე 280—282, 284—
287, 289, 295—299, 301, 302. იხ.
სოლომონ II

დავით ოლმუშენებელი 198, 223, 280

დავით კათალიკოსი 454

დავით (მღვიანებეგი) 284

დავით (მღვდელ-მონაზონი) 99

დავით ნაირნი 45, 198

დავით ქსნის ერისთავი 234

დავით კონსტანტინეს ძე 22

დავით ბატონიშვილი 208, 209, 374,
377

დავით გორგის ძე 11, 216, 257—259,
280—299, 301—304, 306, 310,
320, 326, 327, 329, 338, 362,
392, 393, 485, 486

დავითი (კახეთის მთავარი) 18

დავით IX (ქართლის მეფე) 27, 29, 50

დარეინი ჩარლზ 397

დარეჟანი (ზურაბ ერისთავის მეუღ-
ლე) 90

დარეჟანი (გიორგი ბატონიშვილის
მეუღლე) 307

დარეჟან დედოფალი 327

დარეჟან (ბაგრატ IV-ის ასული) 126,
134—136

დარეჟან (ბერი წულუკიძის ასული)
258

დარეჟან იხ. ნესტან-დარეჟანი

დარჩია 323

დაუთ-ხანი 123

დე გრაი დე ფუა 224, 409

დეედარიანი თეიმურაზ 386

დეედარიანი ივანე 386

დემეტრე შწერალი 477

დიე სულთანი 41

დიმიტრი (გიორგი ბატონიშვილის ძე
გურიელის ასულ დარეჟანთან)
307

დიონიზიო (მკურნალი) 216

დიუზუა 420

დოდაშვილი სოლომონ 326

დოლიძე ი. 454, 458

დომენტი კათალიკოსი 166

დოსითეოზ კათალიკოსი (წერეთელი)
257, 333

დოსითეოზ ნეკრესელი 391

დოსითეოზ (ქუთათელი მიტროპოლი-
ტი) 284, 304

დუბროვინი ნ. 287—289, 312,
323—325, 331, 355, 394, 416

დუმბაძე მ. 329, 334, 339, 347, 379,
392

0

მგნატაშვილი ბერი 12, 13, 34, 35,
55, 92, 94, 96, 117, 128, 136

მეღემონ კათალიკოსი 47, 49, 51,
404

მეღემონ მიტროპოლიტი 134

მეღემონ ქუთათელი 149

მეშეკელი 134 ;

მკატერინა, ქეთევანი, კატერინა ნეს-
ტან-დარეჟანის ძმისშვილი) 110,
113, 114, 116—118, 125, 128

მკატერინე II 202, 221, 225, 232,
233, 236, 237, 242, 243, 245,
248—250, 254, 255 264, 266,
272, 279, 293, 318, 410, 492

მელნე ლუარსაბის ასული 137

მელნე (გიორგი როსტომის ძე ერის-
თავის მეუღლე, დავით გიორგის
ძის და) 290

მელნე ერეკლეს ასული 280, 281, 302

მელნე (ბაგრატ III-ის მეუღლე) 47

მელნე დავითის ასული 216

ელიზბარი ქსნის ერისთავის ძე 266,
284, 296, 297, 351, 352

ელისაბედი (ერეკლე II-ის და) 241
ელჩინი თ. 432

ემუხვარი სესირყვა 420

ენგელსი ფ. 443

ენუქიძე თ. 439, 443

ერეკლე დავითის ძე იხ. ერეკლე I
ერეკლე I, ნიკოლოზ დავითის ძე,
ნიკოლაი დავიდოვიჩი, ნაზარალი-
ხანი, ერეკლე დავითის ძე 107,
108, 115—117, 119, 121, 132—
134, 137, 140—143, 145

ერეკლე II 176, 192, 193, 195, 202,
207, 209, 212, 215, 216, 220—
234, 241, 242, 246—248, 253,
254, 258—262, 266, 267, 271—
273, 280, 282, 284—286, 288,
289, 293—296, 298, 299, 301—
303, 305, 307, 315—324, 326,
330, 333, 391, 392, 412, 417,
483—486, 490, 492, 494

ერისთავები 14, 198, 199

ერისთავი გიორგი 374

ერისთავი დავით 137

ერისთავი დავით 374

ერისთავი ელიზბარ 287, 295, 379, 485

ერისთავი ზურაბ 89

ერისთავი (პოლკოვნიკი) 342

ერისთავი რაფ. 465, 468

ერისთავი როსტომ 203, 204, 482

ერიცოვი 323

ერმოლოვი 418, 419

ეთფთვიმი(გენათელი მიტროპოლიტი)
284, 304, 307, 373

3

მარდარ ალი-ფაშა 405

ვასილი (მღვდელ-მონაზონი) 99

ვაჭრიძე პ. 486

ვახტანგ V, შაჰ-ნავაზი, მუხრანბატონი
105, 112, 114—116, 119—121, 123—
125, 133, 137, 201, 479

ვახტანგ VI 153, 154, 160, 168, 170,
202, 221, 260—262, 266, 269,

289, 331, 411, 412, 433, 447, 455,
456, 458, 459, 479, 480, 490

ვახტანგ მეფე 191

ვახტანგ მეფე 58

ვახტანგ მეფე 163

ვახტანგ ბატონიშვილი 278, 279

ვახტანგი (კახეთის მეფე) 27

ვახტანგი (გრიგოლ რაჰვის ერისთავის
ძმა) 168

ვახტანგი (ბაგრატი III-ის ძმა) 53

ვახტანგ შოშიტა III-ის ძე 200

ვახტანგი (ბაგრატიონი, რომელსაც
კუჭუნისაშვილს ეძახდნენ) 111,
116, 117, 128, 129

ვახუშტი (გიორგი აბაშიძის ძმისშვი-
ლი) იხ. აბაშიძე ვახუშტი

ვახუშტი ბაგრატიონი 13, 14, 17,
20—22, 26, 27, 29, 33, 36,
37, 45, 49, 50, 52—60, 62, 66—
68, 74, 78—81, 92—94, 97, 98,
117, 125—127, 136, 142—144,
150, 151, 153—155, 157—159,
163—166, 172, 177, 270, 409,
427, 428, 430, 431, 438, 446,
454, 479

ვიტენბერგი (სოლომონ 1-ის მკურნა-
ლი ექიმი) 288, 289

ვოლტერი 255

ვოსკერჩიანი 323, 325

ზ

ზაალ (არაგვის ერისთავი) 106

ზაალ (გურიის ერისთავი) 410

ზაქარია მოძღვარი 262

ზაქარია მიტროპოლიტი 104

ზებედე 477

ზევდგინიძეები 16

ზუბაშვილი რომანოზ 488

ზუბოვი 351

ზურაბ (გიორგი აბაშიძის ძმისშვი-
ლი) 153

ზურაბ (არაგვის ერისთავი) 88

თ

თაბუჯაშვილი 375

თავზარაშვილი ქაქუჩა 386

თავდგირიძე მამუკა 274
 თავდგირიძე აშვედ-ბეგი 140
 თათია 121, 125—127
 თამარაშვილი მ. 16, 89, 93, 131, 192,
 204, 280, 398, 400—403, 477
 თამარ მეფე 197, 203, 280, 388
 თამარ (იმერეთის მეფის ასული,
 ლუარსაბის მეუღლე) 31
 თამარ (მამია გურიელის ქალი) 79
 თამარ დედოფალი (ლევან III-ის
 ნაცოლარი, ბაგრატ IV-ის ცო-
 ლი) 130, 134, 135
 თამარი (კოკიბროლად წოდებული)
 167
 თამარ დედოფალი 143—145, 205
 თამარ (სოლომონ I-ის დედა) 177
 თამარ (ლევან აბაშიძის ასული) 205
 თარხან-მოურავები 221
 თაყაიშვილი ექვთ. 22, 57, 81, 84,
 92, 178, 182, 186, 197, 410, 464
 თაყერი მოხმედ 106, 113, 114, 118,
 119, 123
 თეიმურაზ ბატონიშვილი (გიორგი
 XIII-ის ძე) 320, 321, 325
 თეიმურაზ I 44, 72—74, 77, 79,
 89—91, 97—100, 103, 105, 108,
 110, 111, 113—117, 119, 123,
 137, 201, 204, 209, 398, 478,
 479, 490
 თეიმურაზ II 241, 290
 თეიმურაზ ხანი იხ. თეიმურაზ I
 თეიმურაზ მამუკას ძე 193, 194, 196,
 208
 თეკლა ბატონიშვილი 321
 თინათინი (აფხაზეთის მთავრის ასუ-
 ლი) 179
 თინათინ (ბაგრატ IV-ის და) 126
 თოფურაა ვ. 261
 თუმანიშვილი სულხან 8

0

იაზიკოვი 204, 233, 236, 239, 240,
 242, 243
 იამანიძე ბასილა 210
 იამანიძე კვიციანა 210
 იამელიძე 184, 213

იაშვილი ნასყიდა 145
 იაყუბ ყაენი 20, 21
 იბრაჰიმ ფაშა 192
 იბრაჰიმ-ხანი 406
 იბრეიმ-ბეგი 351
 იბრეიმ-ხანი 171
 იეგლევი ა. 49, 100, 101, 103, 104,
 433, 479
 ივანე III (მოსკოვის მთავარი) 76
 ივანე IV 76
 ივანე (ქართველი ელჩი რუსეთის სა-
 მეფო კარზე) 99
 ივანე (პატრი) 400
 ილარიონ ქართლელი 375
 ინალოსშვილის ასული 179
 ინანიკისშვილი მანოელ 476
 იოანე გიორგის ძე (ერეკლე II-ის
 შვილიშვილი) 303, 326
 იოანე (გულანის გადამწერი) 477
 იოანე მატონიშვილი 280, 407
 იოანე მთავარეპისკოპოსი 284
 იოანე ოქროპირი 482
 იოანე პეტრიწი 474
 იოვაკიმ 48
 იოსებ გელათელი 480
 იოსებ თბილელი 269, 270
 იორდანეშვილი 112
 იოსებ გენათელი 195
 იოსებ კათალიკოსი 213—216, 251,
 302
 იოსებ (პატრი) 401
 იოსებ ჭუდიჩი 402
 იოსებ (სოლომონ I-ის ძმა) 212
 იოსებლანები 184, 349
 იოსებლანი ეგნატე 326
 იოსებლანი ქლატონ 230, 305, 306,
 326, 446
 ირბახი (ჩოლოყაშვილი) ნიკოლოზ 92
 ირაკლი 208
 ისიყ-ფაშა 152, 154—158, 164
 ისმაილ I 28
 იტალინსკი 312, 338, 339, 345, 346,
 362
 იულონ ბატონიშვილი 317, 327—334,
 486
 იუსუფ ფაშა 64, 166, 167

ბაკაბაძე ს. 17, 22, 42, 44—47, 66, 68, 74, 81, 83, 92, 112, 114, 121, 125, 126, 141, 145, 159, 165—167, 176—179, 182, 183, (185, 187, 188, 190, 191, 194, 197, 200—202, 206, 258, 259, 281, 307, 372, 400, 411, 412, 443—445, 448—451, 454, 460, 463—466

კალანდაძე ანანია 477

კალატოზოვი (კალატოზიშვილი) მაიორი 378

კარბელაშვილი 182

კარგარეთელი იოსებ 477

კატერინა იხ. ეკატერინა (ნესტან-დარეჯანის ძმისშვილი)

კაჭარავა დ. 132, 133

კახაბერიძე (რაჭის ერისთავი) 45

კახაბერიძეები 198

კეკელიძე ა. 174, 261, 262

კვინიძე დავით 8, 238, 240, 254, 263, 291, 294, 298, 338, 339

კვინიძეები 482

კიკნაძე რ. 20, 42

კიკნაძე პაატა 386

კიკნაძე ხოსია 386

კიკნაძეები 407

კილიჩ ალი-ფაშა 62

კლემენტე გალანო 401

კნორინგი 326, 329, 331, 334, 392

კომნენი (მაიორი) 375

კონსტანტინე ბატონიშვილი 329—334, 337—339, 343, 344, 349, 350, 356, 368, 373

კონსტანტინე 13, 20—22

კონსტანტინე (იმერთა მეფე გიორგის ძმა) 65

კონტარინი ამბროზიო 19

კოსტავა ქრიშობედ 417

ლ

ლაზარევი 326, 331, 392

ლაშბერტი არქანჯელო 62, 71, 78, 80—85, 92—98, 400—403, 420,

428—430, 434, 434, 461—463, 478

ლასნიშვილი ხოსია 120, 121, 129

ლევან ბატონიშვილი 485

ლევანი 67

ლევან I დადიანი 44, 58

ლევან II დადიანი 48

ლევან (კახეთის მეფე) 40, 41, 76

ლევან გიორგის ძე (როსტომ ჩაქვის ერისთავის შვილიშვილი) 65, 216

ლევან (იმერთა მეფე) 65—67

ლევან („პაქიმი“) 76

ლევანოვი პ. 85

ლეონტი უფლისწული 107

ლეონი (იტალიელი მისიონერი) 205, 211, 215, 216, 496

ლეონიძე გ. 112, 216, 479

ლეონიძე (ლიონიძე) სოლომონ 8, 305, 306, 327, 329, 334—341, 365, 366, 368, 370, 371, 391—394, 417, 481

ლევი 178, 236, 239

ლიპარი 106

ლიპარიტ იესეს (იოსების) ძე

ლიპარიტ იესეს (იოსების) ძე

ლიპარტელიანი გიორგის შვილები 153

ლიპარტიანი გიორგი 137—140, 142, 144, 145, 1150, 151

ლიპარტიანები 56, 115—117

ლიპარტიანი გიორგი 78, 82, 104

ლიპარტიანი ვამიყ 104

ლიპარტიანი კაცია 153

ლიტვინოვი პეტრე 347—351, 361, 367, 414

ლომინაძე ბ. 45—47, 84, 475, 476, 480

ლომოური თ. 208, 209, 282, 319, 374

ლომსაძე შ. 193

ლომიცი 414

ლორთქიფანიძე ბეჟან 127, 136, 136, 141

ლორთქიფანიძე ბერი 374

ლორთქიფანიძე გედეონ 477

ლორთქიფანიძე გრიგოლ (კათალიკოსი) 153, 165

ლორთქიფანიძე ი. 9, 281, 286, 295—299, 302, 317

ლორთქიფანიძე შერაბ 411

ლორთქიფანიძეები 184
 ლუარსაბი (მაგრატ მეფის სიძე)
 32, 39
 ლუარსაბ I (ქართლის მეფის დავითის ძე) 31, 99, 107, 108, 110, 115
 ლუარსაბ I (ქართლის მეფე) 72—75
 ლუარსაბი (შაჰ-ნავაზის ძე) 201
 ლუკიანე (თავადი) 115
 ლუკიანოვი ივანე 118
 ლუტფალ-ხანი 315

8

შაჰარაძე ვ. 221, 224—231, 236, 246, 250, 250, 263—266, 272—274, 283—295, 288
 მათე (ლევან II დადიანის ცრუ ძე) 403, 404
 მასისურაძე ნ. 484
 მაკალათია ს. 78
 მაკარიოსი (პატრიარქი) 128
 მალაქია (კათალიკოსი) 404, 476
 მალაქია (აფხაზეთის კათალიკოსი) 74, 84, 89
 მალაქია, ქართლის კათალიკოსი 51
 მალიპიერო ჰანიბალ 28
 მაქსიმე კათალიკოსი 8, 286, 291, 294, 298, 300, 411
 მაქსიმე მონაზონი 482
 მაქსიმე ქუთათელი 196, 197, 218, 219, 221
 მამედბეგი 164
 მამია გიორგის ძე (იუსუფ-ფაშად წოდებული) 64
 მამისთვალისვილი ე. 27—29
 მამრიკაშვილი 460, 461
 მამუკა ბატონიშვილი 97, 102, 163, 164, 166, 168, 177, 178, 185, 205, 286
 მამუკა ბოქაულთუხუცესი 89
 მამუკა გიორგის ძე 89
 მამუკა ლებელი 260, 264, 265
 მარეხი (ლევან იმერთა მეფის მეუღლე) 72
 მანოელი 477

მანუჩარი (სამცხის მთავარი) 65, 307
 მარიამი (ქლენტის ასული) 307
 მარიამი (ოტია დადიანის ასული) 179
 მარიამ დედოფალი 89, 92, 93
 მარიამ დედოფალი (გიორგი XII-ის მეუღლე) 331
 მარიამ დედოფალი (სოლომონ II-ის და) 321
 მარიამი (ლევან დადიანის და) 84, 90
 მარიამ დედოფალი (სოლომონ I-ის მეუღლე) 279
 მარიამი (გრიგოლ დადიანის და) 302
 მარიამი (მაგრატ IV-ის ასული) 202
 მარიამი (სოლომონ II-ის მეუღლე) 279, 375, 386, 390
 მარქსი კ. 66, 217
 მარტანია ჯამლეთ 420
 მასხარაშვილი ბუქუა 296
 მახაბელი ზურაბ 284
 მაქუტაძე 420
 მაჰმად-ბეგი 159
 მაჰმად-ფაშა 95
 მგალობლისვილი მზია 131, 399
 მზეკებაუცი (სამცხის ათაბაგი) 25, 27, 30, 33
 მირზა იუსუფ ყარაბაღელი 323
 მირიან ბატონიშვილი 316, 320
 მიქაბერიძეები 184
 მიქელაძე გიორგი 136, 141, 151
 მიქელაძე პაატა 304
 მიქელაძე სვიმონ 257
 მიქელაძენი 94
 მიხაილი (პატრიარქი) 48
 მიხეილ თეოდორეს ძე 397, 398
 მეთოდე (როსტომ რაჭვის ერისთავის ძე) 216
 მენაბდე ლ. 473, 475—478, 481, 484, 486
 მესხია შ. 432, 433
 მესხი თამაზა 257
 მესხები 184, 349
 მეტრეველი გ. 9
 მეტრეველი ელ. 17, 174, 204
 მეუნარგია იონა 182, 323, 468
 მობური ლატურ 385
 მოგილევსკი 369—372
 მოურავოვი ანტონ 221, 224, 232, 240
 მურიე 465

შურთაზ-ფაშა 405
 შუნში ისკანდერ 40, 42
 შურად IV 88, 161
 შურავიოვი 495
 შურასოვი 375
 შურიდან მეფე 309
 შუსტათა ლალა-ფაშა 61—64
 შუსტათა 88
 შუსტათა-ფაშა 35, 37
 შუსტათა (სულეიმანის ძმა) 142
 შუსტათა II 151
 შუსტათა III 197
 შუსტათა 256
 შუსადია 55
 შუსაფაშა 38
 შუსხელიშვილი ი. 486
 შუსხელიშვილი ლევან 92, 451, 154,
 455, 458, 460, 464, 468
 შურხანბატონი იხ. ვახტანგ V
 შუჰამედ-ფაშა 63
 შხეიძე ბეჟან 416
 შხეიძე გიორგი 416
 შხეიძეები 198

5

ნადირშაჰი 167, 171
 ნაზარალი-ხანი იხ. ერეკლე I
 ნათანელი 477
 ნაიმა შუსტათა 123
 ნაკაშიძე (თავადი) 158
 ნაკაშიძე ნ. 77
 ნამანა ელჩი 226
 ნაპოლეონ I 312, 337, 339, 352, 354,
 384, 385
 ნემსაძე ბეჟან 56
 ნესელოვ 419
 ნესტან-დარეჯანი (ალექსანდრე III-ის
 მეუღლე), დარეჯან დედოფალი
 110—114, 115, 117—119, 127—
 129, 132, 134
 ნიკიფორე შიტროპოლიტი 397
 ნიკოლა (პატრი) 417
 ნიკოლაი დავიდოვიჩი იხ. ერეკლე I
 ნიკოლოზ არქიმანდრიტი 170
 ნიკოლოზ გენათელი 149
 ნიკოლოზ დავითის ძე იხ. ერეკლე

ნიკოლოზ მწიბი 479
 ნინო(გიორგი XIII ქალიშვილი) 307,
 314
 ნინო (ლევან V დადიანის დედა) 314
 ნიჟარაძე აბესა 386
 ნიჟარაძე მერაბ 257, 258
 ნიჟარაძე როსტომ 330, 353, 368, 374
 ნოოლზი 29

მ

მდიშელი ქ. 17, 31, 33, 186
 მონღრე მონაზონი 477
 მრბელიანი ალ. 319, 321—323, 326
 მრბელიანი გრიგოლ 423
 მრბელიანი დავით 482
 მრბელიანი დიმიტრი 332, 357—359,
 361—365, 378—381, 383, 416
 მრბელიანი ზაალ 234
 მრბელიანი მზევაბუკ 391
 მრბელისანი ჭაპუნა 167, 177,
 185—187, 191, 192, 205
 მრბელიანი იხ. სულხან-საბა
 ოსმან II 87
 ოსმან-ოღლი 386
 ოსესშვილი იესე 412
 ოტია ბეჟანის ძე 155, 159

პ

პაატა გიორგის ძე 153
 პაატა ბატონიშვილი 252, 267
 პაიჭაძე გიორგი 107, 116—119, 158,
 172—175, 488
 პავლე ალექსოვილი 128
 პანინი ნიკიტა 220, 221, 224, 233,
 235, 238, 241, 242
 პაპიძე ქაქუჩა 417
 პაპუნა (ვეზირი) 81, 82
 პაპუნა II (რაჰის ერისთავი) 137, 138
 პაპუნა (გედევან გენათელის ძმისწუ-
 ლი) 163, 177
 პაპუნა (რაჰის ერისთავი) 119, 120,
 141, 143, 153, 201
 პაპუნოვა (პაპუნაშვილი) გიორგი 267
 პასკევიჩი 20

პაულინი (მარკიზი) 352
პაბოში (არქიმანდრიტი) 99
პენკლერი 177
პენტელოვი(პენტელაშვილი) 375
პეტრე I 148, 149, 169, 170, 202,
491
პეტრე III 266
პიეტრო დელა ვალე 72
პიუს IV (რომის პაპი) 271
პოლიექტოვი მ. 77

პოტაპოვი 219, 220, 241
პოტიომკინი გრიგოლ 288, 291—294,
298—300
პოტიომკინი პავლე 272, 282, 283,
285, 287—289, 296, 298

შ

შორდანია თ. 20, 22, 26, 31, 79, 111,
118, 127, 164, 470, 488
შლენტი ანდრია 386
შლენტი ბერიაკა 386

რ

რაინეგსი 272
რეის ეფენდი 312
რეზვიაშვილი მ. 46, 172, 184, 192,
274, 404
რეზვიაშვილი ნ. 435
რიკოფი 307, 314, 349, 351—355,
357, 389, 487
რიუფენი 385
როდაში (სოლომონ I-ის და) 275
როზენი 374, 375, 380, 381, 383
როსტომ გიორგის ძე 89
როსტომ კონსტანტინეს ძე 65, 67,
72
როსტომ მეფე (ზოსრო-პირზა) 67—69,
92, 97, 98, 1105, 106, 123, 269
როსტომ (რაჰვის ერისთავი) 168, 177,
178, 183, 185—187, 190, 192,
194, 196, 199, 201—203, 205—
214, 216, 218, 406, 480

როსტომ-ფაშა (ახალციხის მფლობე-
ლი) 105, 106, 128
როსტომ შოშიტა III-ის ძე 200
როსტომ-ხანი 90, 91
რტიშჩევი 423
რუმინაევი 361
რუმულუ ჰასან 20—21, 37, 38, 41, 42
რჩეულიშვილი მ. 431

ს

სააკაძე გიორგი 88, 89
სალარიძე 376
სანაძე მ. 8
საფარ-ფაშა 405
საყვარელიძე ექვთ. 477
საყვარელიძე მელქისედეკ 375
სევიდნუქ ბეგი 42
სეიდ-ამედ-ფაშა 406
სეიდ-სულეიმან-ფაშა 416
სეილი ფაშა 405
სელიმ I 25, 26, 28—30, 32
სელიმ-ფაშა იხ. ხიმშიაშვილი (სეა-
ლიმ-ფაშა)
სიმონ I 65, 67, 68
სიმონ (მეფე ქართლისა) 62—64, 66,
67
სიმონ ალექსანდრე IV-ის ძე 145, 147,
150, 152
სიმონოვიჩი 364—369, 371, 372, 375,
378—384, 386, 389
სინან ფაშა, 63, 64
სიპიაგინი 420
სისხარულიძე კ. 186, 187
სუანიძე მ. 8, 26, 39, 40, 42 43, 61,
63, 64, 161
სეიმონ (გურიელის ძე) 79
სეიმონ (გიორგი აბაშიძის ძმისშვი-
ლი) 79
სეიმონ კათალიკოსი 127
სეიმონ მეფე 68, 69
სეიმონ ქუთათელი 136, 138, 141, 407
სოკოლოვი 329, 331
სოლომონ I, დიდი 11, 168, 175—197,
199—229, 234—242, 245, 247—
264, 268, 270—290, 293, 295,

296, 302, 304, 307, 308, 393,
394, 406, 407, 409—411, 480,
481, 483—488, 490, 492

სოლომონ II, დავით არჩილის ძე
11, 166, 179, 206, 216, 300—
303, 306—313, 316, 317, 319—
335, 337—343, 346—371, 373—
377, 379—390, 415, 481, 485—
488

სოსელია ო. 7, 45, 46, 52, 57, 114,
119, 120, 144, 167, 178, 183, 197,
198, 200, 207, 208, 211, 438,
440, 441, 445, 451, 455, 457,
460, 464—466

სტრაბონი 420

სტროგანოვი 418

სულეიმან I 32, 37, 42

სულეიმან-ფაშა 290 294

სულეიმანი 142

სულხან-საბა ორბელიანი 409

სუმბათაშვილი 372, 374

სუხოტინი 243—250

ბ

ბავერნიე ჟან ბატისტ 86, 397, 398,
401

ბატიშვილი ვ. 138

ბივაძე თ. 107, 121, 132—134, 404

ბიტოვი 378

ბიხოცი 379

ბოლოჩანოვი ნ. 49, 99—102, 428,
429, 433, 443, 444, 479

ბოლსტოი პ. 149

ბორმასოვი 358—362, 364—376,
378—380, 383—386, 415

ბოტლუბენი 221, 224, 225, 227—246,
248, 250—252, 409, 493

ბუჩკოვი 333, 342

უ

უკრეხელიძეები 184

უზუნ-ქასანი 19, 27

ურბნელი ნ. 446

უსტაქლუ 42

უსუფი (ისიყ-ფაშას ძე) 158, 159

უსუფ-ფაშა 355

ფ

ფათალი-ხანი 267, 271

ფალავანდოვი (ფალავანდიშვილი) 375

ფანჯულიძე დავით 172

ფარად-ფაშა 106

ფარნაოზ ბატონიშვილი 332—334

ფაშვიბერტყაძე (ხითარიშვილი) ფე-
შანგი 479

ფეკეტე ლ. 42

ფეოდოროვი ივანე 116

ფეშანგ მღვიანი 104

ფეშანგი 111, 270

ფეშანგი სტეფან 323, 325

ფეჩევი იბრაჰიმ 37, 38

ფინეზაშვილი-აბაშიძე ნიკო 183

ფლაეიოს იოსიპოს 477

ფრიდრიხ II 243

ფუთურიძე გ. 406

ფუთურიძე ვ. 20, 21, 87, 88, 106,
114, 118, 121, 124

ფურცელაძე დ. 154

ძ

ძაიხოსრო ათაბაგი 52, 53

ძაიხოსრო ყუარყუარეს ძე 34—36,
39, 40

ძარბაზიშვილი თანე 323, 486

ძეთევანი იხ. ეკატერინა

ძემხა 187

ძერიმ-ხანი 222, 258, 259, 262, 264—
266

ძერიმ-ხან ზენდი 315

ძვარიანი (გენათელი ეპისკოპოსი) 97

ძვარიანი ზაქარია 477

ძიორბეი იხ. გიორგი როსტომ რა-
ქის ერისთავის ძე

ძიქოძე გ. 391

ქობინაშვილი 476
ქორქაშვილები 184
ქუთათელაძე ლ. 487
ქუთუაჯ-ფაშა 406

ლ

ლოლობერიძე ბეჟან 115, 120
ლოლობერიძეები 184

შ

შაუხჩიშვილი თ. 475
ყვარყვარე 14, 17, 20, 63
ყვარყვარე III 33—35
ყიფიანები 184
ყიფიანი დიმიტრი 326
ყუფუჩი 140

შ

შალიკაშვილი ოთარ 34—36, 39
შადაცლევ იოსების ძე 121
შანშე (ქსნის ერისთავი) 165, 171, 172
შარდენი ეან 82, 98, 130, 131, 272, 397—399, 402, 420, 429
შარვაშიძე 15
შაპაბაზი, შაპაბასი 44, 72—75, 91
შაპთაშაზი 34—37, 40, 42
შაპისმაილი 30, 41
შაპნავაზი იხ. ვახტანგ V
შაყულუ მენ კამზა 42
შაპ-ხუღბანდღე 62
შენგელია ნ. 123, 353, 391
შერვაშიძეები 71, 421
შერვაშიძე ალ. 420
შერვაშიძე ასლან-ბეგ 382
შერვაშიძე ბეჟან 421
შერვაშიძე მანუჩარ 373
შერვაშიძე მიხეილ 420
შერვაშიძე სეტემან 79
შერვაშიძე სორეხ 81, 82

შერვაშიძე ქელეშ-ბეი 297, 314
შერვაშიძე ქურუკ-ბეი 363
შერვაშიძე ხუტუნია 187
შერვაშიძე პასან-ბეგი 420
შერვაშიძე (იფხაზეთის მთავარი) 139, 154, 159, 179, 227
შერიფ-ფაშა 364, 366
შოშიტა (რაქის ერისთავი) 120, 136, 137, 154—157, 163
შოშიტა II 200
შოშიტა III 144, 202, 206, 482

ჩ

ჩარტორიისკი 340
ჩელები ევლია 26, 86, 87, 405, 406, 428
ჩერქეზიშვილი-არუსთაველი ნიკოლოზ 483
ჩიქვანი გიორგი 301, 314
ჩიჩუა კაცია 190
ჩიჭავაძე ვახუშტი 373
ჩიჭავაძე 67
ჩიჭავაძე ქაიხოსრო 304
ჩოგლოცოვი 231
ჩუბინაშვილი დ. (ჩუბინოვი) 167, 177, 191, 205, 278, 326
ჩხატარაშვილი ქ. 8, 148—150, 157, 158, 162, 164, 176, 178, 179, 190, 195, 196, 274—276, 291
ჩხეიძე გრიგოლ 386
ჩხეიძე სეხნია 127—129, 136, 158, 164, 200
ჩხეიძე შოშიტა 45
ჩხეიძე ხოფილანდრე 52
ჩხეიძეები 66
ჩხეტიძეები 67, 198
ჩხეტიძე ევდემონ 475—477
ჩხეტიძე სვიმონ 126
ჩხეტიძე შოშიტა 198

ც

ცაგარელი ა. 178, 181, 193, 196, 202, 204, 218, 219, 221—223, 227,

229—242, 244, 250—252, 254,
271—273, 291, 318, 320

ცაშვილი ს. 261

ცაბროვი ვ. 487

ცინცაძე იასე 76, 99—101, 104, 232,
245, 247, 248, 272, 273, 292,
294, 319, 320, 323, 429, 443

ცინცაძე ნაკვარტიოზ 477

ციციანოვი (ციციშვილი) პავლე დი-
მეტრის ძე 311—314, 331—334,
337—352, 356, 359, 363, 366,
367, 388, 389, 394, 414, 415

ციხისთავიშვილი იოსებ 417

ცოტნიაშვილი 467

ცქირიშვილი ზ. 8, 180, 181, 197, 200,
251, 294, 394

ძ

ძამპი დონ-მარი-ეოზეფ 131, 402

ძენო კატერინო 27—29

წ

წერეთლები 66, 68, 214, 257, 258,
269, 295 301, 302

წერეთელი ბეჟან 257

წერეთელი ბერი 390

წერეთელი გიორგი 269, 374

წერეთელი გრიგოლ 390

წერეთელი დავით 269

წერეთელი დოსითეოს იხ. დოსითეოზ
კათალიკოსი

წერეთელი ვახუშტი 257

წერეთელი ზაალ 114

წერეთელი ზურაბ 166, 168, 257, 276,
284, 288, 291, 293, 294, 298, 302
304, 320, 321, 325, 340, 342, 353,
356, 358—366, 369, 373, 389,
391, 393, 482

წერეთელი ნიკოლოზ 194

წერეთელი პაატა 110

წერეთელი პაპუნა 165, 210, 213,
257, 281, 182, 284, 287, 289,
295, 298

წერეთელი როსტომ 364, 379, 380
390

წერეთელი სვიმონ გიორგის ძე 374,
379, 380, 390

წერეთელი ქაიხოსრო 110, 166, 194,
304, 333, 340, 342, 368, 377,
385, 386, 390

წერეთელი ქველი 257, 269

წულუკიძე ბერი 214, 257, 258, 278,
281, 284, 289, 295, 297, 370

წულუკიძე გიორგი 214, 284, 295, 483

წულუკიძე მერაბ 163

წულუკიძე ოტია 373

წულუკიძე პაატა 79, 80, 203, 214

წულუკიძე სესნია 304, 342, 367, 368,
373

წულუკიძე სვიმონ 370

წულუკიძე ქაიხოსრო 370

წულუკიძე (რაქის საერისთაოდან)

185

წულუკიძეები 214, 257, 295, 301

ჭ

ჭაბუკიანები 184

ჭავჭავაძე გარსევან 299

ჭავჭავაძე ილია 494

ჭანტურიძე პ. 417

ჭილაძე დარეჯან 104

ჭილაძე ვარაზა 56

ჭილაძე (ოდიშის დიდებულო) 400,
401

ჭილაძე ჭავჭავ 57

ჭილაძეები 57, 94

ჭიქინაძე ზ. 111, 113, 260, 318, 320,
323—325, 333

ჭიქინაძე ივანე 132

ხ

ხალილ-ფაშა 150, 1,1

ხაზანაშვილი ალ. 346, 359, 366, 374,
379, 383, 385—387, 447

ბელაშვილი იონა-ბერი 325
 ბერბეულიძე ო. 267, 326
 ბერბეულიძე ზაალ 137
 ბეაბულიძე 223, 224
 ბეარაშვი (გიორგი იმერთა მეფის
 ასული) 89
 ბიშნაშვილი სელიმ-ფაშა 414, 416
 ბიშნაშვილი ასმედ-ბეგი 420
 ხინთიბიძე ე. 273
 ხონდემირი 41
 ხოსიტაშვილი ს. 15
 ხოსრო ვახტანგის ძე 55
 ხოსრო-მირზა (დავით-ხანის უკანონო
 შვილი, პირველი გამაჰმადიანე-
 ბული ბაგრატიონი, რომელმაც
 1632 წელს განდევნა თეიმურაზ
 I) 123 იხ. როსტომ-მეფე
 ხუსკივაძე ო. 370
 ხუსრევ ფაშა 63

ჟ

ჯავახიშვილი ივ. 12, 15—19, 26, 34,
 41, 75, 92, 94, 108, 146, 171,
 256, 271, 272, 426, 428—430,
 442
 ჯათიშვილი გ. 486

ჯამბაკურ-ორბელიანი ალექსანდრე
 ვახტანგის ძე 321
 ჯამბურია გ. 89, 92, 466, 469
 ჯანაშვილი მ. 262, 446
 ჯანაშია მ. 317
 ჯანაშია ს. 19, 26, 146, 171, 198, 256
 ჯანელიძე დ. 263, 264
 ჯაფარაშვილი ჯაფარა 203, 204
 ჯაფარიძე (იმერეთის ელჩი რუსეთში)
 328
 ჯაფარიძე 370
 ჯაფარიძე ლომკაც 102
 ჯიქია ს. 26
 ჯუღიძე მილანელი დონ ჯუზეპე 82
 ჯუღიძე იოსებ 89, 92, 93, 98
 ჯუშათელი მიტროპოლიტი 363

ს

შაბერი 177—180, 191, 193, 194, 205
 შასან-ფაშა 192, 194
 შაჟი-აჰმედი 190, 191
 შაჟი-ბეგ ზადე ფაშა 63
 შაჟი-ალი-ფაშა 264
 შუსეინ-ყულიხანი 351
 შეღაიად-ხანი 264

შ ი ნ ა პ რ ს ი

შესავალი

5

ნაწილი პირველი

XVI საუკუნე

ფეოდალური საქართველოს პოლიტიკური დაშლა და იმერეთის სამეფოს წარმოქმნა	12
იმერეთის სამეფოს საგარეო პოლიტიკური ვითარების გართულება, ოსმალეთის აგრესიის დასაწყისი	23
იმერეთის მეფის ბაგრატ III შიდასახელმწიფოებრივი ღონისძიებანი	44
იმერეთის სამეფოს საშინაო და საგარეო პოლიტიკური ვითარება ამასიის ზავის შემდეგ	54
იმერეთის სამეფო XVI საუკუნის უკანასკნელ მეოთხედში	60

ნაწილი მეორე

XVII საუკუნე

იმერეთის სამეფოს პოლიტიკური მდგომარეობა XVII საუკუნის პირველ ნახევარში	70
იმერეთის სამეფოს პოლიტიკური მდგომარეობა XVII საუკუნის მეორე ნახევარში	108

ნაწილი მესამე

XVIII საუკუნე

იმერეთის სამეფო XVIII საუკუნის მიჯნაზე	146
შინაფეოდალური ომები იმერეთის სამეფოში და თურქი ინტერვენტები	147
სოლომონ I-ის გაშეფება და მისი პირველი ღონისძიებანი	175
ბრესილის ომი	184
საეკლესიო კრება	187
ბრძოლა თურქებთან 1758—1768 წწ.	190
სოლომონ მეფე და როსტომ რაჭის ერისთავი	197
რუსეთ-თურქეთის ომი 1768—1774 წლებში და იმერეთის სამეფო	217
ქუჩუქ-კაინარჯის ზავიდან ნაკიშკრევის ბრძოლამდე	256
ბრძოლა ტახტისათვის და აფერ-იმერის გაერთიანების ცდა	280
იმერთა მონაწილეობა კრწანისის ბრძოლაში	315
სოლომონ II. ბრძოლა დამოუკიდებლობისათვის	326
ტყვის სყიდვა დასავლეთ საქართველოში	395

XVI—XVIII საუკუნეების იმერეთი

სამეფოს სოციალ-ეკონომიკური მდგომარეობა	425
საზოგადოებრივი წოდებანი — თავადი	438
გლეხი	446
მსახური	457
ხიზანი	468

მწერლობა და ხელოვნება მე-16—18 საუკუნეების იმერეთის სამეფოში	472
იმერეთის ისტორია ერთი თვალის გადავლით	489
იმერეთის მეფეთა სია	498
ლიტერატურა	500
უცხოენოვანი ავტორები	505
პირთა საძიებელი	508

გამომცემლობის რედაქტორი მ. ინასარიძე
მხატვარი ო. ჯანდარია
სამხატვრო რედაქტორი ი. ჩიქვინიძე
ტექნიკური რედაქტორი ფ. ბუღალაშვილი
კორექტორი ე. ხურცი

გარეკანის პირველ გვერდზე იშვრეთის სამეფოს დროშა

სბ 1555

გადაეცა წარმოებას 3.05.88. ხელმოწერილია დასაბეჭდად 22.11.88 რუე 07991-
საბეჭდი ქალაქი 60X90^{1/16} პირობითი საბეჭდი თაბახი 33. სააღრ.-საგამომც.
თაბახი 30,08 ტირაჟი 20 000 შეკვეთის № 4537.

ფახი 2 მან. 10 კამ.

თბილისის უნივერსიტეტის გამომცემლობა,
თბილისი, 380028, ი. ჭავჭავაძის პრ. 14.

Издательство Тбилисского университета
Тбилиси, 380028, пр. И. Чавчавадзе, 14.

საქართველოს სსრ გამომცემლობათა, პოლიგრაფიისა და
წიგნის ვაჭრობის საქმეთა სახელმწიფო კომიტეტის
ჭუთაისის პოლიგრაფიული საწარმოო გაერთიანება,
ჭ. ჭუთაისი, ი. ჭავჭავაძის პროსპექტი, 33.

Кутанское полиграфическое производственное объединение
Государственного комитета по делам издательств, полиграфш
и книжной торговли Грузинской ССР
г. Кутанси, пр. И. Чавчавадзе, 33.